

**JUSIÑAMUI UAI**

**JUSIÑAMUI JITO RAFUE ILLA RABENICO**

El Nuevo Testamento  
de nuestro Señor Jesucristo  
en el idioma  
(huitoto) murui



**La Liga Bíblica**  
*Las Sagradas Escrituras para Todos*

El Nuevo Testamento  
de nuestro Señor Jesucristo  
en el idioma  
(huitoto) murui

Primera edición, 1978  
Segunda edición, 2008

Publicado por  
© LA LIGA BIBLICA 2008

Usted es libre de copiar, distribuir y comunicar públicamente la obra bajo las condiciones siguientes:

- Reconocimiento. Debe reconocer los créditos de la Liga Bíblica (pero no de una manera que sugiera que tiene su apoyo o apoyan el uso que hace de su obra).
- No comercial. No puede utilizar esta obra para fines comerciales.
- Sin obras derivadas. No se puede alterar, transformar o generar una obra derivada a partir de esta obra.

# ÍNDICE

|   |     |
|---|-----|
| Mateo Jesucristo Eniruemo Illa Rafue Cuiafue<br>(San Mateo) . . . . .   | 5   |
| Marcos Jesucristo Eniruemo Illa Rafue Cuiafue<br>(San Marcos) . . . . .   | 66  |
| Lucas Jesucristo Eniruemo Illa Rafue Cuiafue<br>(San Lucas) . . . . .   | 102 |
| Juan Jesucristo Eniruemo Illa Rafue Cuiafue<br>(San Juan) . . . . .   | 162 |
| Jesucristo Oretaganodi Naimie Rafue Llocana Uilla Rafue<br>(Hechos de los Apóstoles) . . . . .                        | 202 |
| Romamo Ite Cristona ḥinotinomo Pablo oretaga rabe<br>(Carta a los Romanos) . . . . .                                  | 253 |
| Corintomo Ite Cristona ḥinotinomo Pablo Nano Oretaga Rabe<br>(Primera Carta a los Corintios) . . . . .                | 277 |
| Corintomo Ite Cristona ḥinotinomo Ie Emodomoo Pablo Oretaga Rabe<br>(Segunda Carta a los Corintios) . . . . .         | 306 |
| Galaciromo Ite Cristona ḥinotinomo Pablo Oretaga Rabe<br>(Carta a los Gálatas) . . . . .                              | 322 |
| Efesomo Ite Cristona ḥinotinomo Pablo Oretaga Rabe<br>(Carta a los Efesios) . . . . .                                 | 331 |
| Filipomo Ite Cristona ḥinotinomo Pablo Oretaga Rabe<br>(Carta a los Filipenses) . . . . .                             | 340 |
| Colosamo Ite Cristona ḥinotinomo Pablo Oretaga Rabe<br>(Carta a los Colosenses) . . . . .                             | 346 |
| Tesalónicamo Ite Cristona ḥinotinomo Pablo Nano Oretaga Rabe<br>(Primera Carta a los Tesalonicenses) . . . . .        | 352 |
| Tesalónicamo Ite Cristona ḥinotinomo Pablo Ie Emodomoo Oretaga Rabe<br>(Segunda Carta a los Tesalonicenses) . . . . . | 357 |
| Timoteomo Pablo Nano Oretaga Rabe<br>(Primera Carta a Timoteo) . . . . .  | 360 |
| Timoteomo Pablo Ie Emodomoo Oretaga Rabe<br>(Segunda Carta a Timoteo) . . . . .                                       | 367 |
| Titomo Pablo Oretaga Rabe<br>(Carta a Tito) . . . . .   | 372 |

|  |     |
|--|-----|
| Filemómo Pablo Oretaga Rabe<br>(Carta a Filemón) . . . . .                   | 375 |
| Hebreos Cominimo Oretaga Rabe<br>(Carta a los Hebreos) . . . . .             | 377 |
| Santiago Oretaga Rabe<br>(Carta de Santiago) . . . . .                       | 399 |
| Pedro Nano Oretaga Rabe<br>(Primera Carta de San Pedro) . . . . .            | 405 |
| Ie Emodomio Pedro Oretaga Rabe<br>(Segunda Carta de San Pedro) . . . . .     | 412 |
| Juan Nano Fueñe Oretaga Rabe<br>(Primera Carta de San Juan) . . . . .        | 416 |
| Juan Ie Emodomio Oretaga Rabe<br>(Segunda Carta de San Juan) . . . . .       | 422 |
| Juan Ie Emodomio Jiaie Oretaga Rabe<br>(Tercera Carta de San Juan) . . . . . | 423 |
| Judas Oretaga Rabe<br>(Carta de San Judas) . . . . .                         | 424 |
| Juan Ico Suille Rafuena Cuiafue<br>(Apocalipsis) . . . . .                   | 427 |

## MATEO JESUCRISTO EN ILLUENO ILLA RAFUE CUIAFUE

Jesucristo ie usumatiai  
(Lc. 3.23-38)

**1** <sup>1</sup>Jesucristo rafuena omoimo cue lloiacana jira, naimie cominina nano lloitice. Jesucristo usumatiai micoriai mameciaina omoimo lloitice. Naimie usumadi David micori. Jiae usuma Abraham micori. <sup>2</sup>Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori. <sup>3</sup>Judá micori jitodi Fares micori. Jiae jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori. <sup>4</sup>Aram micori jitodi Aminadab micori. Aminadab micori jitodi Naasón micori. Naasón micori jitodi Salmón. <sup>5</sup>Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori. <sup>6</sup>Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiñona ollena, David micori Urías micorina jobaimemo orede. Jobaimemo naimie fiodailla mei, naiñaiñona ote. <sup>7</sup>Salomón micori jitodi Roboam micori. Roboam micori jitodi Abías micori. Abías micori jitodi Asa micori. <sup>8</sup>Asa micori jitodi Josafat

micori. Josafat micori jitodi Joram micori. Joram micori jitodi Uzías micori. <sup>9</sup>Uzías micori jitodi Jotam. Jotam micori jitodi Acaz. Acaz micori jitodi Ezequías micori. <sup>10</sup>Ezequías micori jitodi Manasés. Manasés micori jitodi Amón. Amón micori jitodi Josías. <sup>11</sup>Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci. <sup>12</sup>Naie meinomo Jeconías micori Salatiel micorina comuitate. Salatiel micori jitodi Zorobabel micori. <sup>13</sup>Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori. <sup>14</sup>Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori. <sup>15</sup>Eliud micori jitodi Eleazar micori. Eleazar micori jitodi Matán. Matán micori jitodi Jacob micori. <sup>16</sup>Jacob micori jitodi José micori. José micoridi María ini. Naiñaiñodi Jesús ei. Naimie mameci jiaicidi Cristo. <sup>17</sup>Abraham micori illa facaisemona David micori jeicia facaisemo Jesús ie catorce nanoramaci mameci jai ite. David micori facaisemona Babiloniamo ite nairai anamo cai jaiagai illa facaisemo catorce nanoramaci mameci jiai ite. Babiloniamo ite nairai anamo cai jaiagai illa facaisemona Jesús jeicia

facaisemo catorce nanoramaci mameci jiai ite.

**Jesús jeicia rafue**

(Lc. 2.1-7)

<sup>18</sup>Jesucristo comuilla rafuena lloitucie. Jesús eidi María. Naiñaiñona jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiñona uruesitate. <sup>19</sup>José micori maremie. María jai uruesillana naimie micori fidianona, naiñaiñona meidaitañellena jira, naiñaiñona bainino dotaacade. Jiaimie diga illamona urueside raillanona comecin facajanona, naiñaiñona dotaacade. <sup>20</sup>Naimie micori comecin iemo facaia, naimie micori nicaíllanona, naimie micorimo Jusiñamui jaenici bairiano raite:

—José, David micori jito, Maríana jaciruiñeno ono, o aina illena. Jusiñamui Joreño naiñaiñona jai uruesitate. <sup>21</sup>Himana jocoite. Ie comini naimaci jeacinomona naimie jilloitajaibilla jira, Jesúna o jitalle naimie mamecidi —raite. <sup>22</sup>Bie rafue suide, Jusiñamuidi ie lloraima micori jaie llotataga uaina suillena. <sup>23</sup>Jaie llotatate:

Himana uiñönediñaiñomo comuite uruedi.

Himana jocoite.

Emanuel ie mameci jitalle.

Bie mameci oni dobaiñuamona raite: “Jusiñamui cai diga ite”.

<sup>24</sup>José micori casidemo, Jusiñamui jaenici lloga uaina finode. Maríana ote, ie aina illena; <sup>25</sup>iadedi nai jitona naiñaiño nia jocoñenia, naiñaiño diga naimie micori nia iniñede. Naiñaiño jito jeicia mei, José micori jitade naimie mamecina Jesúna.

**Monamo ite ramo comeciaina facauidino rafue**

**2** <sup>1</sup>Judea railla eniruemo Jesús jeiciga. Naimie jeicianodí Belén. Naie facaiseconi ite illaimadi Herodes

micori. Monamo ite ramo comeciaina facauidino naie facaiseconi Jerusalémo jitoma billafo dinena bitimaci.

Jerusalémo itinomo jicanotimaci:

<sup>2</sup>—¿Ninomo como jeiciga omoi judíuai illaimadi? Jitoma bisoillafomo como bairede ucuduna ciódicai. Naiemona naimie jeiciana jai uiñoticai. Naimiemo iobillacinona fecallena biticai.

<sup>3</sup>Herodes micoridi naicinona cacajanona, ie comeci jarire ite. Jiaimie naimie meifomo illana jitaiñede. Jerusalémo itinodi jiai jarire itimaci. <sup>4</sup>Ie facaise Herodes micori judíuai illaicomínina uaiduanona, naimacimo Cristo raillamie jeiciana jicanote. <sup>5</sup>Uai otimaci:

—Judea railla eniruemo. Belémo. Iena Jusiñamui facaina micoridi jaie cuega:

<sup>6</sup> Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla cominina sedaite.

Iemona Belén nairai Judea illaicomini baífemo faite cuega. <sup>7</sup>Iena cacaja mei, Herodes micoridi monamo ite ramo comeciai facauidino bainino uaidote. Naie ucudu bairia facaise raise uiñollena jicanote. <sup>8</sup>Naimacina Belémo orede. Llote:

—Naie uruena raise jeno. Naimiena omoi ciua mei, cuemo lluaibi, naimie dine cue jaillesa. Naimiemo iobillacinona jiai fecaacadicue —llote.

—Jii —fairiotimaci. <sup>9-10</sup>Iena naimie micori llua mei, jaidimaci. Ucuduna naimaci dane ciuamona, eo iobidimaci. Naimaci ciua ucududi naimacina ifuanona, monamo naie urue afemo ride. <sup>11</sup>Fo jaillano uruena, ie ei María diga, ciódimaci. Naimiemo iobillacinona fecallena, caiñici ifodo ana

rainadatimaci. Naimaci bolsas sebiñanona, naimiemo rana jamai fecadimaci. Oro fecadimaci. Caimare sorirede rana jiai fecadimaci.<sup>12</sup> Naimaci inia anamo naimaci nicaíllanona, Jusiñamui llote:

—Herodes dine abido jaiñeno —llote. Ie jira Jerusalémo jaiñeno abido naimaci eniruemo jaidimaci.

#### Egiptomo Jesús jailla rafue

<sup>13</sup> Naimaci jailla mei, José micori inia anamo nicaírite. Nicaíllanona, Jusiñamui jaienicidi naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloiticue. Herodedi nai uruena jenoite, naimieno meinellena —raite.

<sup>14</sup> José micori raire casillano, nai urue diga, Jesús ei diga, Egiptomo naiona jaide. <sup>15</sup> Herodes micori fiodaille dinori nainomo ite. Ie muidona Jusiñamui ie facaina lloraima micori llotataga uai jai suide. Jaie lloga: “Egiptomona cue Jitona jai uaidoticue”.

#### Mena años itisaiai dierisedena faia rafue

<sup>16</sup> Egiptomo Jesús jaillana Herodes micori fidinéde. Monamo ite ramo comeciaina facauidino naimaci eniruemo abido jaillana naimie micori jiai fidinéde. Naimie micori dine naimaci abido biñena jira, naimie micorina naimaci jifuia jira, naimie micori eo icirite. Ie jira mena años itisaiai dierisedena faetate. Nana Belémo ite iisaiai diese faetate. Belén ecimo itino uruiaína jiai faetate. Naie ucudu mena años jaie nano bairena jira, mena años itisaiai dierisedena faetate. <sup>17</sup> Raquel micori jaie eia isoi, Belén itino birui eedimaci. Jeremías micori iena jaie cuega:

<sup>18</sup> Ramá railla nairai dinena Raquel micori eo eiana cacadicue.

Cai usuño Raquel micori eede. Naiñaiño micori uruiai micoriai facaina eede.

Jiae cominimona firaduacinona jitaiñede, naiñaiño uruiai micoriai jai fiodailla jira.

<sup>19</sup> Digarui illanona, Herodes micori fiodailla mei, Egiptomo José micori dane nicaíllanona, Jusiñamui jaienici naimiemo bairede. <sup>20</sup> Llote:

—O comini eniruemo na o urue diga, ie ei diga, abido mai jai. Nai o uruena meineiacadimie jai fiodaite.

<sup>21</sup> Ie jira ie eniruemo naie urue diga, ie ei diga, abido jaide. <sup>22</sup> Herodes micori jitodi ie moo ifomo jai illana José micori fidiano, jaciruite. Herodes micori jito mamecidí Arquelao. Nainomo José jaiacaiñede. José micori dane nicaíllanona, Jusiñamudi Galilea railla eniruemo naimie jaillena naimiemo llote. <sup>23</sup> Nazaret railla nairai dine jaide, nainomo illena. Iemonia Jusiñamui facaina lloraini micoriai jaie cuegafuiai jai suide. Cristona jaie cuetimaci: “Naimiedi Nazaret imie”.

#### Jofue iñenanomo Juan Bautista micori illa rafue

(Mr. 1.1-8; Lc. 3.1-9,15-17;  
Jn. 1.19-28)

**3** <sup>1</sup> Diga años illanona, Juan Bautista raillamie micoridi jofue iñenanomo illanona, cominina dafaifia, Jusiñamui rafuena naimacina llofueuide. <sup>2</sup> Comini naimie micori dine billanona, naimacimo llote:

—Omoi jeacinona fainonocaida, omoi comecia iuaillai meido. Jusiñamui dibelimo omoi i. Naimie anamo omoi illana naimie jitaila jira, omoimo iena lloiticue —llote. <sup>3</sup> Isaías micoridi Jusiñamui facaina lloraima. Juan Bautista micori nia iñenia, Isaías micoridi naimie micorina jaie cuete:

Jofue iñenanomo damie  
jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote. Iese llote; iadedi naimie uaina naimaci feiñollena, naimaci comeciai marena finuana ñaita. <sup>4</sup>Juan micoridi camello itiraiāi ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite. <sup>5</sup>Diga comini naimie micori dñe jai jaisoidimaci. Jerusalémona, nana Judeamona, nana Jordán fuemonia jai jaisoidimaci. <sup>6</sup>Jusiñamui naimaci jeacinona naimaci llua meino, naimacidi Juan micori bautizaga. <sup>7</sup>Bautizallena, diga fariseuai, diga saduceuai, naimie micori dñe bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jaio nairai isoidomoi. ¿Niese Jusiñamui riicaillifuemona jilloitomoi? Cue dñe omoi billena, ¿bu omoimo llua? <sup>8</sup>Omoi comeciai iuaillai meido. Omoi jeacinona fainonocai. Iemonia Jusiñamui jitaillacina fino. Mare rafuena finocana jai. Naiemona omoi comeciai iuaillai meiduana uiñoticai. Ie mei omoi bautizallomoi. <sup>9</sup>Omoi comeciaina facañeno: “¿Bue ñellenia o llua isoi finoiticai? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicaillifuemona jilloiticai”. Ero, omoimo lloitice: Cue llua isoi omoi finoñenia, naimie riicaillifuemona jilloñetomoi. Abraham micori uruiaidomoi; iadedi Jusiñamui jitaillacinodo jaiacaiñedomo. Naimie jitaia, naimie jitaillacina naimaci finollena, bene ite noficimona naimiedi Abraham micori facaina uruiaina comuitarede. <sup>10</sup>Ero, llisíñede riara tiedomoi. Tiia mei, maraiñena jira, iena

jobaidomoi. Ie isoidomoi. Omoi maraiñena jira, Jusiñamui omoina jai duere finoacad. Ie riicaillafue anamo jai itomoi. Omoi comeciai iuai omoi meidoñenia, omoina duere finoite.

<sup>11</sup>Jusiñamui dibeimo omoi comeciai iuai omoi meidoia, jinui diga omoina bautizaiticue. Cue baifemo faitimie bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie dibeimo omoi jaillamona, Jusiñamui Joreño omoimo itataite. Omoi comeciai iuai omoi meidoñenia, omoina duere finoite. <sup>12</sup>Trigona omoi betaia, mare trigona eenotomoi.

Maraiñede ra oni dotajanona, iena jobaitomoi. Ie isode. Naimie rafuena lluanona, comeciai iuaillai meidotinona ie moo illanomo naimiedi ofitaite; iadedi jiae cominina duere finoite. Iraimo dotaite. Naie irai jaca duiñede —llote.

Jesús bautizaja rafue  
(Mr. 1.9-11; Lc. 3.21-22)

<sup>13</sup>Juan micori Jordán dñe nia ia, Galileamona Jesús bite. Naimiena bautizallena, Juan micori dñe bite.

<sup>14</sup>Juan dñena naimemo llote:

—Bautizallena cuemo bitio; ia dama ite. Cuena o bautizaia, cuemonia mare.

<sup>15</sup>Jesús uai ote:

—Cuena mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade. <sup>16</sup>Jesús bautizaja mei, jinuimona bite. Mona bojadena ciode. Jusiñamui Joreño, ucugi isoi, naimie emodomoo ana billana ciode. <sup>17</sup>Ie facaise monamona Jusiñamui llote:

—Bimie cue eo isiruiga Jito. Naimieri iobidicue.

**Jesúna Taife ramo faia rafue**  
(*Mr. 1.12-13; Lc. 4.1-13*)

**4** <sup>1</sup>Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite. <sup>2</sup>Cuarenta digarui Jesús guíñede. Naie facaise fuilla mei, guíñeno illamona, aimetaite. <sup>3</sup>Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomenicona jaita”. <sup>4</sup>Jesús uai ote:

—Dama ite. O lluana finoñeiticue. Jusiñamui facaina lloraima micori iena jaie cuega: “Jiae rafuedi llomenico guilla baifemo faite. Dama guillemo comeccina facañeno; iadedi Jusiñamui lloga uaimo cai comeccí facajamona, ie uaido cai jailla” cuega.

<sup>5</sup>Ie mei Jerusalémo Jusiñamui jofo muidomo Taife Jesúna uite. <sup>6</sup>Raite:

—Jusiñamui Jitodiodena, eniruemo mai ana uai. David micori ona jaie cuega:

Ona eenollena, Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci cuega. Naie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

<sup>7</sup>Jesús uai ote:

—Dama ite. Ana uaiñeiticue. Ero, ie comínimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluana finoñeiticue.

<sup>8</sup>Ie mei a ite anedumo Taife naimiena uite, naie anedumona nana nairaiaina cioillena. Naie nairaiai eo ebire eruaide. <sup>9</sup>Naimiemo llote:

—Nana bie nairaiai cue anamo birui illamona, cuena o sedaia, nana bie nairaiai omo iiticue. O caiñici ifodo ana rainada, cuemo iobillacino o fecallena.

<sup>10</sup>Jesús uai ote:

—Dama ite. Ona sedañeiticue. Ie comínimo Moisés micori jaie cuega: “Cai Nama Jusiñamuina seda. Dama naimiemo iobillacina feca”. Taife, mai cuemonia oni jai. <sup>11</sup>—Ie facaise naimiemonia Taife jaide. Naimie jailla mei, Jusiñamui jaienaisai Jesús díne bitimaci. Naimiena ecallena bitimaci.

**Galileamo Jesús illa rafue**  
(*Mr. 1.14-15; Lc. 4.14-15*)

<sup>12</sup>Naie facaise Juan Bautista micorina Herodes gaitajana naimie fidiano, Galilea railla eniruemo Nazaretmo Jesús jaide.

<sup>13</sup>Nainomo rilla mei, Capernaumo jaide. Capernaum nairai jorai fuemo ite.

Nainomo Zabulón railla enirue ite. Neftalí railla enirue jiai ite. <sup>14</sup>Nainomo Jesús jailla jira, Isaías micori jaie cuegafuiai jai suide.

<sup>15</sup>Naimie micori naie comínina jaie cuega: Bie eniruemo diga nairai ite.

Zabulón ite. Neftalí ite.

Monaillai fuemo nairai ite. Jordán ruicafebeimo nairai ite.

Galileamo nairai jiai ite. Nainomo judíuafinedino jai itimaci.

<sup>16</sup>Jeacino anamo naimaci illamona, naga naie eniruemo ite comini jitiredinomo itimaci isoidimaci Jusiñamuina uiñoñeno fiodaicana jaidimaci; iadedi eo mare rafue birui cacaitimaci.

Naie rafue naimaci comeciaina lligaiñoite. Naie rafuena uitimie bairenate

cuega. Jusiñamuina naimaci uiñoñena jira, naimacina iese cuega. Jesús nainomo birui llofuia jira, mare rafuena jai cacadimaci. <sup>17</sup>Galileamo rilla mei, Jesús llocana jaide. Llofuetate:

—Jusiñamui dibeimo illena, omoi jeacinona fainonocaída, omoi comeciaí iuaina meido. Ie cominina omoi jaillena birui jitade.

**Ie llofueicaiganona jaillena,  
Jesúdi nagaamagamienetutu rafue  
(Mr. 1.16-20; Lc. 5.1-11)**

<sup>18</sup>Jiairuido Galilea railla jorai fuemo Jesús macaritemo, menamieni ciode. Naga ie ama iaimaiai. Damie Simón. Jiaicí naimie mamecidi Pedro. Ie ama Andrés diga ite. Llojina fairaima iaimaiai. Iese jaca naie iaimaiaidi maijiiuidiaimaiai. <sup>19</sup>Iaimaiaimo llote:

—Cue diga omico jaoicaillena, cue diga mai bi. Cue llofueganona omico jaillena jitadicue. Lliciaina birui ocabitomico; iadedi cominina oitomico, cue dibeimo naimaci illena.

<sup>20</sup>Iena cacajanona, ieconi iaimaiai llojina fainonocaída, naimie diga jaidiiaimaiai. Ie llofueganona jaillena, jaidiiaimaiai. <sup>21</sup>Llai bai Jesús jaide, jiae menamieni ciode. Naga ie ama iaimaiai. Damie Jacobo. Jiaimie Juan Iaimaiai moodi Zebedeo. Naimie diga botemo ittiaimaiai. Llojina sigaidimaci. Jesús iaimaiai uайдote, naimie llofueganona jaillena. <sup>22</sup>Ieconi iaimaiai moona fainonocaída, botemoni ari billanona, Jesús diga jaidiiaimaiai.

**Jesús ailluena cominina  
llofua rafue  
(Lc. 6.17-19)**

<sup>23</sup>Nana Galileamo Jesús jaide. Judiuai ofiracuaimo llofueuide. Naimie anamo cominina illana Jusiñamui jitalla jira, Jesúdi Jusiñamui dibeimo naimaci comeciaí iuaina meiduana llofuete. Naga isoide duicona duidinona jillotate. <sup>24</sup>Iemoni nana Siria railla eniruemo naimie mameci soride. Naie comini

naga isoide duicona duidinona naimie dine atidimaci. Abi isiredinona atidimaci. Jananiai anamo illa cominina atidimaci. Naillidinona atidimaci. Niraídanidinona atidimaci. Nana naimacina jillotate. <sup>25</sup>Ailluena comini naimieni racadimaci. Galileamona, Decápolimona, Jerusalémona, Judeamona, Jordán ruica dibeimona comini bitimaci.

**Anedumo naimie ia,  
Jesús lloga rafue  
(Lc. 6.20-23)**

**5** <sup>1-2</sup>Ailluena cominina Jesús racadimaci. Naimacina Jesús ciuanona, anedu muidomo jaide. Ie llofueicaigano naimie diga jaidimaci. Nainomo ana raita, Jesús naimacimo llote:

—Omoina Jusiñamui ie cominina sedaacana rafuena ja llofueiticue. Naimie anamo naimaci illena llofueiticue. <sup>3</sup>Ero, Jusiñamui naimieni jitaidinona sedaite. Comeciaina facadimaci: “Naimie jitallacina dani finonidicai; ia naimie caina canuanona, iena finoiticai”. Naimie cominina naie isoidino illamona, naimie naimacina canoite. Iemoni caimare iitimaci.

<sup>4</sup>Jusiñamui sunaitinona sedaite. Ailluena comini jeacino finocana jaidimaci. Iena uiñuamona, damierie sunaitimaci. Naimie cominina naie isoidino illamona, Jusiñamui naimaci comeciaína ocuiñotaite. Iemoni caimare iitimaci. <sup>5</sup>Jusiñamui abina ideoñedinona sedaite. Naimie cominina naie isoidino illamona, Jusiñamui nana enirue naimacimo iiite. Eniruemo cominina ico cue sedaia, iese iiite. Iemoni caimare iitimaci. <sup>6</sup>Jusiñamui naimie jitallacino finodinona sedaite. Jusiñamui mare rafuena naimaci finuana canoite. Iemoni caimare

iitimaci. <sup>7</sup>Jusiñamui cominina duenaitinona sedaite. Naimacina naimie duenaillamona, Jusiñamui naimacina ico duere finoñeite. Iemonia caimare iitimaci. <sup>8</sup>Jusiñamui jeanide comeciredinona sedaite. Naimie cominina naie isoidino illamona, naimie diga jaca iitimaci. Iemonia caimare iitimaci. <sup>9</sup>Jusiñamui naimie diga uri itinona sedaite. Naimie cominina naie isoidino illamona, jiae cominina uri itataitimaci. Naie isoidino naimie cominina jaca mamecirenitimaci. Iemonia caimare iitimaci. <sup>10</sup>Jusiñamui jitailacintona finuamona, damierie duere sefuitimaci. Jusiñamui naie isoidinona sedaite. Naimie cominina naimaci illamona, naimie sedajanomo jaca jaínaaitimaci. Iemonia caimare iitimaci. <sup>11</sup>Cuemo omoi duia, duere sefuitomoi. Jiae comini omoina jeare ñaitimaci. Omoina duere finoitimaci. Omoi joreñona tainona lloitimaci. Duere sefuitomoi; iadedi Jusiñamui omoina caimare itataite. <sup>12</sup>Omoi isoi omoi jaiagaimona Jusiñamui facaina lloraini micoriai jaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feñua jira, birui omoi duere sefuia, iocire omoi jai.

**Jesús comini illa rafue  
(Mr. 9.50; Lc. 14.34-35)**

<sup>13</sup>Jesús llote:

—Jusiñamui ie cominina sedaacalle rafue nia llofueiticue. Llicisi rifaia, jai maraiñede. Iena rifaiñellena, llicisimo sal joneticaí. Sal isoidomoi. Jusiñamui jitaila isoi omoi illamona, jiae comini maraiñede rafuena eo finoñedimaci. Sal ie caímano jai iñenia, ¿niese dane nibaíamona caimarenite? Jai maraiñede. Jitaiñena jira, iena oni faiga. Ie isoide. Jusiñamui jitaila isoi

omoi iñenia, naimie omoina duere finoite.

<sup>14</sup>Cuemo omoi duilla jira, jiae cominina Jusiñamuina omoi uiñotajamona, lligaiñora isoidomoi. Anedumo ite nairai jaca bairede. Ie illanona jaca uiñoticaí. Jusiñamui jitaila isoi omoi illamona, jiae comini naimiena uiñoitimaci. <sup>15</sup>Lamparín unia mei, cirigai anamo buna rainañega. Jaca ie rainarafomo rainaca, nana jofo jeraina lligaiñollena. <sup>16</sup>Ie isoide. Cue rafuena jamaiñeno; iadedi omoi marena illamona, cominina Jusiñamuina uiñota. Omoi marena illamona, comini omoi mare finoca rafuena uiñoitimaci. Iemonia: “Juiñamui maremiena” raitimaci.

**Jesúdi Moisés micorina  
llofuria rafue**

<sup>17</sup>Jesús llote:

—Jusiñamui ie cominina sedaacalle rafue nia llofueiticue. Iena cue llofuria jira, omoimona damierie comecin facade: “Bimie Moisés micori lloga rafuedo jaiñede”. Ero: “Moisés micori llogacinuai maraiñede” raiñedicue. “Jusiñamui facaina lloraini micoriai jaie llogacinuai maraiñede” jiae raiñedicue; iadedi omoina naie llogacinaina raise uiñotaacadicue. <sup>18</sup>Biemo omoi comeciaina faca. Mona, enirue diga, nia ia, nana naie llogacinuai jaca suite.

<sup>19</sup>Omoi einamaci raitimaci: “Dajerie llogacino jiae llogacino baifemo faite”. Cue raiticue: Naga llogacino omoi iñoenia, naga omoi llofueñenia, nana Jusiñamui jitailacintona finoñedomoi. <sup>20</sup>Ero, Jusiñamui jitaila rafuedo judíuai illaicomini baifemo omoi jaiñenia, Jusiñamui sedajanomo jaca iñeitomoi. Naimaci naie jaie llogacinuai uiñotimaci; iadedi naimaci comeciai Jusiñamui dibeimo iñedimaci.

**Jusúdi iciriñena llofuia rafue**  
(Lc. 12.57-59)

<sup>21</sup>Jesús llote:

—Omoi llofuerainimona bie jai cacadomoi. Moisés micori omoi jaiagaimo llote: “Comena meineñeno. Comena bu meineia, jeacino jai finode. Naimie fiodaillena juez llua”. <sup>22</sup>Naie llogacinodo jai jaicabidomoi. Omoimo birui jiae rafue lloitice. Jiaimie diga bu iciria, jeacino jai finode. Naimie duere sefullena, juez dñe naimie uiga. Jiaimienra bu jeare ñaia, jeacino jai finode. Naimie duere sefullena, illaicomini dine naimie uiga. Jiaimienra bu faidoia, jeacino jai finode. Jusiñamui naimienra duere finoite. Iraimo jaita.

<sup>23-24</sup>Jerusalémo Jusiñamui jofomo omoi jeacino facaina naimemo ra fecallena omoi jaia, omoi comini diga uri nano i. Jiaimie omoi diga icirillana omoi uibiñoia, omoi ra fañonocaida, naimie dine nano mai jai. Naie rafue raise finollena, naimie dñe jai. Ie mei Jusiñamuimo omoi rana feca.

<sup>25</sup>Omoina bu llogidoia, juez dñe nia omoi riñenia, omoina llogidotimie diga naie rafuena raise fino. Iena raise finoñenia, juez dñe omoi ria, nainomo duere sefuitomoi. Calabozomo omoina oreata. <sup>26</sup>Nana raise iñañenia, juez llua isoi, jino jaiñetomoi. Iese omoimo suñellena, jiaimie diga rafuena comuitañeno. Jeacino finoñellena, jiaimie diga iciriñeno.

**Jesúdi iima ie aíñede riño  
diga illa llua rafue**

<sup>27</sup>Jesús llote:

—Omoi llofuerainimona bie jai cacadomoi. Moisés micori jiae llote: “Omoi aíñede riñoniai diga iñeno. Omoi iñiñede iñiai diga iñeno”. “Iena bu finoa, jeacino jai finode” raitomoi. <sup>28</sup>Jiae rafue birui

lloitice. Ie aíñede riñomo eruaillamona naiñaiñona bu nícidioia, naiñaiño diga jamai iniacananona naimie comeći facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeći facajamona, jeacino jai finode. <sup>29-30</sup>Bienña ñaíticue. Nie isoide rafue omoina jeacino finotaia, iemo eruaiñeno. Iena llinoñeno. Iemo começina facañeno. Omoi ciua rana jira, omoi jitaillamona jeacino finodomoi. Rana omoi jetaja jira, omoi jitaillamona jeacino finodomoi. Omoi abina omoi namatañenia, omoi uisina juicono. Omoi onollí jaita. Omoi começina ñaíticue. Omoi abina omoi raise namatallena, omoi começi nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iraimo omoi jaiñellena, jeacino finoñeno.

**Jesúdi iima ie aina dotaja llua rafue**  
(Mt. 19.9; Mr. 10.11-12; Lc. 16.18)

<sup>31</sup>Jesús llote:

—Omoi llofuerainimona bie jai cacadomoi. Moisés micori jiae llote: “Ie aina bu dotaacanía, naiñaiñomo dotajacanabena fecaja”. Iedo jai jaicabidomoi. Iena bu finoia, omoimona mare. <sup>32</sup>Jiae rafue birui lloitice. Jiaimie diga naiñaiño iñenia, ie aina bu dotajia, maraiñede. Jiairuido jiaimie diga naiñaiño ia, nanodí ie ini muidona naiñaiño jeacino jai finode. Dotaca riñona ie aina illena bu ua mei, naimiedi jeacinona jai finode. Jeacino finoñellena, aina dotañeno.

**Jesúdi Jusiñamui mameci jamai  
ebena llinoñenana llua rafue**

<sup>33-35</sup>Jesús llote:

—Omoi llofuerainimona bie jai cacadomoi. Moisés micori omoi jaiagaimo llote: “Taino lloñeno; ia Jusiñamuimo omoi lloga uaina fino”. Iedo jai jaicabidomoi. Omoi lloga uai omoi finollena jiae comini uiñollena,

Jusiñamui mamecina llinotomoi. “Iena caí llinoia, caí lloga uaina caí finoñenia, Jusiñamui caina duere finoite” raitomoi. Jusiñamui mameci omoi llinoñenia, omoi lloga uai omoi finoñenia, omoimona mare. “Jusiñamui caina duere finoñeite” raitomoi. Iemona monamo ite ra mamecina jamai ebena llinotomoi. Eniruemo ite ra mamecina jamai ebena llinotomoi. Jerusalén railla nairai mamecina jamai ebena llinotomoi. Omoi ifogí mamecina jamai ebena jiai llinotomoi. Jusiñamui mamecina jamai ebena llinofiedomo; ia jiae ra mamecina jamai ebena llinotomoi. Ero, monamo ite ra mamecina omoi llinoia, Jusiñamui mamecina jiai llinotomoi, nainomo ie illano illa jira. Eniruemo ite ra mameci omoi llinoia, iena Jusiñamui finua jira, iena naimie sedaja jira, naimie mamecina jiai llinotomoi. Jerusalén railla nairai mamecina omoi llinoia, Jerusalén naimie naíraína jira, naimie mamecina jiai llinotomoi.<sup>36</sup> Omoi jitirede ifotiraina usere omoi jitanina jira, omoi userede ifotiraina jitire omoi jitanina jira, omoi ifogí mameci jiai llinoñeno. Dama Jusiñamui iena usere itataja jira, dama naimie iena jitire itataja jira, ifotírai mamecina omoi llinoia, Jusiñamui mamecina jiai llinotomoi.<sup>37</sup> Le jira Jusiñamui mameci jamai ebena llinoñeno. Jiae ra mameci jamai ebena llinoñeno; iadedi nie isoide rafuena omoi finoia, omoi lloga uaina taino lloñeno fino. Uanaicinona jaca llono. Uanaicinona omoi lloñenia, Taifemona omoi uaina otomoi.

**Jesúdi iba oñenana llofua rafue**  
(Lc. 6.29-30)

<sup>38</sup>Jesús llote:  
—Omoi llofuerainimona bie jai cacadomoi. Moisés micorí jaie llote:

“Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere finoia, o duere sefuilla isoi, juez naimiena duere finua”. Iedo birui jai jaicabidomoi;<sup>39</sup> iadedi birui omoimo lloticue: ibana oñeno. Maraiñede rafue finodimiemona omoi abina riidoñeno. Omoi cacaina naimie dutaia, naimie diga iciriñeno. Enefebeimo omoi uieco dobaíño, enefebet omoína naimie dutallesa. Naimie omoína duere finoia, ibana oñeno.<sup>40</sup> Omoi iniroi bairollena omoína bu llogidoia, juez nia omoimo lloñenia, naimie jitaila iniroi baifemo naimiemo feca.<sup>41</sup> Daje kilómetro naimaci raruiaí omoína uillana illaicomini ocuia, iena uiño. Nibai omoi comeci jitaiñede; ia naimacina canollena, iena mena kilómetros uiño. Naimaci ocuilla baifemo uiño.<sup>42</sup> Omoimo ite rana bu jicaia, iena caidiñeno. Omoi rana bu jamai jicuano uia, abido atillena, iena caidiñeno feca.

**Jesúdi omoína gaiñenanano  
isiruillena llua rafue**  
(Lc. 6.27-28,32-36)

<sup>43</sup>Jesús llote:  
—Omoi llofuerainimona bie jai cacadomoi. Llotimaci: “Omoi cominina isirui; iadedi omoi naíraíñedinona enoi”. Iedo jai jaicabidomoi.<sup>44</sup> Omoimo birui lloticue: Omoi naíraíñedinona isirui. Omoi gaiñenanona isirui. Omoína duere finodino facaina Jusiñamuimo jii. Naimaci comeciaí iuai meiduana naimiemo jicano.<sup>45</sup> Jusiñamui cominina omoi illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimedi jitomana maraiñedinona lligaiñotade.

Mareuidinona jiae lligaiñotade.  
Maraiñedino dine noci deitate.  
Mareuidino dine jiae noci deitate.  
<sup>46</sup>Naimie comini omoi illamona, nana  
comini daje isoi isirui. Omoina  
isiruitinona omoi isiruia, mare; iadedi  
omoina gaiñenanona omoi isiruiñenia,  
Jusiñamui omoina: “Mare” raiñeite.  
Maraiñede finoraini naimacina  
isiruitinona isiruitimaci. Nana cominina  
omoi isiruiñenia, maraiñede finoraini  
baifemo faiñedomoi. Naimaci isoi  
itomo. <sup>47</sup>Dani omoi cominina omoi  
uaidoia, mare; ia omoina gaiñenanona  
omoi uaidoñenia, naimaci baifemo  
faiñedomoi. Jusiñamuina iñoñedino  
baifemo faiñedomoi. Naimaci isoi  
itomo. <sup>48</sup>Iena omoi uiñuamona, omoi  
Moo Jusiñamui finua isoi, mare rafuena  
finocana omoi jai.

**Jesúdi mare rafue  
finuana llua rafue**

**6** <sup>1</sup>Jesús llote:

—Omoina nia llofueiticue. Jiae  
comini iena cioillena, mare rafuena  
omoi finoiajedi, omoina:  
“Mareuidinodimaci” naimaci raillena,  
Jusiñamuimona ibana feiñoeitomoi. Ie  
jira mare rafuena finoñeno, iena jiae  
comini jamai cioillena. Iena ja ñaiticue.  
<sup>2</sup>Dueredinomo rana omoi jamai feacaia,  
iena uainino feca. Jiae cominimona  
iobillacinona omoi feiñollena, iena  
feacañeno. Ofiracomo maredinona abi  
caitadino isoi omoi iñeno. Naisomo  
maredino abi caitadino isoi iñeno. Iena  
comini cioillena, dueredinomo rana  
marefodo fecacabidimaci. Cominimona  
naimaci iobillacino birui jai feiñotimaci.  
Jusiñamuimona ico feiñoeitimaci.  
<sup>3</sup>Dueredinomo rana omoi feacaia, jiae  
cominimo iena lloñeno. <sup>4</sup>Iena bainino  
feca. Bainino iena omoi feacaia,  
Jusiñamui iena uiñote. Naimiemona

ibana feiñoitomoi. Omoina: “Mare”  
raite.

**Jesús Jusiñamuimo jiia rafue  
(Lc. 11.2-4)**

<sup>5</sup>Jesús llote:

—Jusiñamuimo omoi jiia,  
maredinona abi caitadino isoi omoi  
iñeno. Ofiracomo naimacina comini  
cioillena, marefodo jiidimaci. Jiocabilla  
facaiseconi naisomo naimaci ia,  
naimacina comini cioillena, marefodo  
jiae jiidimaci. Naimacina: “Jusiñamuina  
eo sedadimaci” comini raillana  
jitaídimaci. Cominimona iobillacinona  
birui jai feiñotimaci. <sup>6</sup>Omoi jiíacanía,  
omoi jofomo fo jai. Nainomo  
Jusiñamuimo anado omoi jií. Iena  
Jusiñamui uiñuamona, omoi jicaca  
rafue naimiemona feiñoitomoi.

<sup>7</sup>Jusiñamuimo omoi jiia, naimienia  
iñoñedino isoi jamaicinona ñaiñeno.  
Naimaci comeicina facadimaci: “Daje  
jiíracinona diga icaiño caí jiia jira, ja  
muidomo caí Moo caina raise cacaite”.

<sup>8</sup>Naimaci isoi iñeno. Nia omoi jicañenia,  
naimie omoi jitaille rafuena uiñote.

<sup>9</sup>Naimiemo omoi jiíacanía, iese jií:

Ore Moo, monamo itio.

Comini ori iobidesa.

<sup>10</sup>O illaimana jira, nana cominina o  
anamo raire itata.

O jaíenisaí o jitailiacinona finua  
isoi, cominina o jitailiacinona  
finota.

<sup>11</sup>Nagarui guille caímo itata.

<sup>12</sup>Caina jeare jiaino finoia, iena  
caimona feilla isoi, caí jeacinona  
omona feilla jira, caí jeacinona  
oni dota.

<sup>13</sup>Caimo ramo bu faia, caina cano,  
iena caí iiñoi raillano. Jeacinona  
finuamona caína jillota.

Iese omoi jií. <sup>14</sup>Omoina jiae comini  
jeare finoia, iena omoi feitaia, omoi

monamo ite Moo omoi jeacinona iena feitajanona, jiai oni dotaite; <sup>15</sup>iadedi jiae comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

#### **Jesús guiñenaruina llua rafue**

**<sup>16</sup>Jesús llote:**

—Omoina nia llofueiticue. Raitomoi: “Jusiñamuina eo raise cai sedajanona, birui cai guiñeticai. Iemon aaimie caina eo duenaite” raitomoi. Iese Jusiñamuina omoi sedajia, sunaiñeno, mareuidinona abi caitadino isoi. Sunaitimaci. Naimaci uieco finobicabiside. Naimaci guiñenarui facaise illana comini uiñollena, naimacina comini cioillena, iese itimaci. Naimacina: “Mare” comini raillamona, iobillacina birui jai feiñotimaci. Jusiñamuimona ico iena feiñoneitimaci. <sup>17</sup>Ero, naimaci isoi omoi iñeno; iadedi omoi guiñenarui ia, omoi abiai raise fino. <sup>18</sup>Iemei comindí omoi guiñenarui illana uiñoñeitimaci. Naimacimona iobillacina feiñoneitomoi. Dama Jusiñamui iena uiñote. Bainino omoi finoca rafue naimie uiñua jira, naimiemona iba feiñoitomoi.

#### **Jesúdi Jusiñamuimo começina**

#### **facaja rafue**

(Lc. 12.33-34)

**<sup>19</sup>Jesús llote:**

—Omoi jofomo ailluena rana eencana uiñeno. Giireco iena guicabite. Dajerie ra nemuide. Omoi jofomona jiae comini iena fiiacadimaci. Ailluena ra eenuamo omoi começaina facaño; <sup>20</sup>iadedi Jusiñamui dine monamo omoi ra illa isoi, iemo omoi começaina faca. Naimiemo começaina cai facajamona, nainomo cai iobillacino iite. Giirecuaimona, nemuilla mona, fiirirainimona, iena nainomo

faifiñeitomoi. <sup>21</sup>Aillue ra omoimo ia, Jusiñamuimo começaina facañedomo; iadedi naimie jitallacina omoi finoia, naimiemo começaina facadomo.

#### **Jesús cai começina llua rafue**

(Lc. 11.34-36)

**<sup>22-23</sup>Jesús llote:**

—Cai uisi diga rana ciocai. Cai uisi maraiñenia, rana raise cioñedica. Ie isoide. Cai comeci maraiñenia, maraiñedicinona finocana jaidicai. Jusiñamuina uiñoñedicai. Ie rafuena jiai uiñoñedicai. Naimiena nabaiñedicai.

#### **Jesús raruiaina llua rafue**

(Lc. 16.13)

**<sup>24</sup>Jesús llote:**

—Mena patrones diga daruido buna jaca majinide. Mena diga bu maijiacania, damiena jiaimie baifemo gaiite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiai ollemo começina omoi eo facaia, Jusiñamui jitallacino começina raise facañeitomoi.

#### **Jesúdi Jusiñamui cai**

#### **sedajana llua rafue**

(Lc. 12.22-31)

**<sup>25</sup>Jesús llote:**

—Jusiñamui jitallacino omoi começina facaia, omoi illamo omoi começina jarire facañeitomoi. Bue omoi guillermo jarire começina facaño. Omoi jitalle iniroimo jarire começina facaño. Jusiñamui omoina itataja muidona, guille omoimo iite. Naimie omoi abi finua muidona, iniroidi omoimo iite. <sup>26</sup>Silliñiaimo começina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoina canoite.

27 Omoimona, ¿bu ie comeci jarire facajamona a sairite? Iese jaca buna a sairiñede. Dama Jusiñamui omoina a sairitate. 28 ¿Bue ñellena ñiroimo jarire comecina facadomoi? Safiamo omoi comecina faca. ¿Niese sicodimaci? Maijíñedimaci. Ñiroina tiforíñedimaci; 29 iadedi Salomón micori naimaci isoi jaie iñede. Naimie illaimana jira, naimie micori ñiroi eo ebiredé; iadedi safia naimie ñiroi baifemo ebire eruaide. 30 Jusiñamui safiana ebiretacabide. Dallu facaise illanona, safiadí duide. Safia baifemo omoi uaila jira, Jusiñamuidi ñiroina omoímo jaca iite. Safiana naimedi ebiretaja muidona, omoímo ñiroidi jaca iite. Omoi ra omoímo illena, naimieni iino. 31 Omoi comeci jarire finoñeno. “¿Buena guitcai? ¿Buena jitaiticai?” raiñeno. Iemo comeciaina eo facaño. 32 Jusinamuina iinoñedino iemo comecina facacabidimaci. Nana omoi jitaillicinona omoi Moodí uiñua jira, naimaci isoi iñeno. 33 Jusiñamui anamo raise omoi i. Naimie jitaillicinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemonia guille omoimo iite. Ñiroi omoimo iite. 34 Jusiñamui omoi birui jitalla ra omoimo iite. Iena uiñuamona, jiaíruido suille rafuemlo jarire comecina facaño. Ieo omoi jitalla ra omoimo jiai iite.

Jesúdi cai jitalla ra  
jicaja llua rafue  
(Lc. 6.31; 11.9-13)

**7** <sup>1</sup>Jesús llote:  
—Omoina nia llofueiacadicue. Jiaie cominina mameriñeno. Jiaie cominina omoi mameria, omoímo ite maraiñede rafue facaina Jusiñamui omoina duere finoite. <sup>2</sup>Jiaie cominina omoi mamerilla diese Jusiñamui omoina duere finoite.

3 Omoi ecimo itímiemo janore maraiñedicino illana omoi uiñoia, iemo comecina facaño; iadedi omoimo ailluena ite maraiñedicinomo nano omoi comecina faca. <sup>4</sup>Omoimo maraiñedicino illamona, ¿niese omoi ecimo itímiema mameritomoi? <sup>5</sup>Omoimo ite maraiñedicinomo omoi comecina facaacaíñena jira, maredinona abi caitadínodomoi. Omoi comeciaina nano raise fino. Iemei omoi ecimo itímiema canorenitomoi. Naimie comecina raise canorenitomoi.

<sup>6</sup>Ero, eo mare rana omoi jiconiaimo fecaño. Eo raifide rana omoi chanchuaimo fecaño. Naimacimo omoi fecaiajedi, iena feiñoñetimaci. Omoina gaiñenamona, jiconiai omoina ainitimaci. Chanchuai iena jamaillamona, iena saitaitimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabiñeno. Naimacimo omoi llocabia, omoina duere finoitimaci. Omoi rafuena jamaitimaci.

Jesúdi cai jitalla ra  
jicaja llua rafue  
(Lc. 6.31; 11.9-13)

<sup>7-8</sup>Jesús llote:  
—Daje ra omoi fafia, iena jenodomoi. Raise jenoia, iena baitomoi. Damiema omoi jenoia, naimie illanomo jaidomoi. Nainomo naimieni baillamona, omoina feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoimo iite. <sup>9</sup>Ero, omoimona naimiemo llomenicona ie moomo ie jito jicaia, noficina fecañede. <sup>10</sup>Lliciaina jicaia, jaiona fecañede. <sup>11</sup>Jeacinona finocabidomoi; iadedi mare ra omoi uruiaimo fecacabillana uiñotomoi. Cai Moo Jusiñamuidi jaca mareuidimie. Cai

baifemo naimie faite. Ie muidona naimiemo jicanotinomo mare rana fecaite.

<sup>12</sup>Jusiñamui jitaillacínona omoi finuamona, jiae cominina marena fino. Jiae comini omoina finuana omoi jitailla isoi, naimacina fino. Naimaci omoina marena finuana omoi jitaia, naimacina marena fino. Naimaci omoina maraiñeno finuana omoi jitaia, naimacina ie isoi maraiñeno fino. Moisés micori ie isoidicínona jaie llofueté. Jusiñamui facaina lloraini micoriai ie isoidicínona jaie jiae llofuetimaci.

**Jesúdi Jusiñamui dine  
rille llua rafue**  
(Lc. 13.24)

<sup>13-14</sup>Jesús llote:  
—Jusiñamui dine omoi rillena, janorede naisodo omoi jailla isoi isoilla. Naisomo ite nasedi janorede isoide. Naimie dine naie rilla jira, naiedo omoi jai. Nainomo jaidino jaca iitímaci. Naimie dine rillena eo sefurena jira, janore comini naiedo jaidimaci. Jiae naiso ite. Naie naisodi aillue. Naie naisomo ite nasedi jiae aillue. Naiedo jaidino faítimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

**Jesúdi abi caitadinomona abi  
rairuillana llua rafue**  
(Lc. 6.43-44)

<sup>15</sup>Jesús llote:  
—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoina jifueiacadimaci. Naimaci llofuiacínodo omoi jaia, Jusiñamui rafuedo raise jaiñetomoi. <sup>16</sup>Naimaci lloga rafuemona naimaci Jusiñamui llorainiñenana

uiñoitomoi. Ero, eecuaimona uvas railla riara oñega. Ecuaimona higos railla riara jiae oñega. <sup>17</sup>Mare riaramona mare llisilla comuide. Maraiñede riaramona maraiñede llisilla comuide. <sup>18</sup>Mare riaramona maraiñede llisilla comuiñede. Maraiñede riaramona mare llisilla comuiñede. <sup>19</sup>Mare llisilla comuitañena jira, naga maraiñede riara jaitaca, iena jobaillena. <sup>20</sup>Ie isoide. Naimaci finoca rafuemona nie isoide lloraini naimacina uiñoitomoi. Jusiñamui llorainidena uiñoitomoi. Jusiñamui lloraiñedidena uiñoitomoi. Naimaci maraiñena jira, Jusinamui naimacina duere finoite.

**Jesúdi ie Moo ie comini  
sedajanomo ille llua rafue**  
(Lc. 13.25-27)

<sup>21</sup>Jesús llote:  
—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitaille rafue finodimiedi nainomo iite. <sup>22</sup>Cominimo juez isoi Jusiñamui ico llua facaiseconi, diga cominidi cuemo lloitímaci: “Nama, caína o oretatio cai raillamona, o rafuena llocabiticai. O uaido jananiaina oni oredicai. O uai diga siño rafuena finodicai” lloitímaci. <sup>23</sup>Uai oiticue: “Omoina uiñoñedicue. Cue cominiñedomoi. Jeacino omoi começimo nia illa jira, cuemonia oni omoi jai. Cue Moo ie comini sedajanomo jaca iñeitomoi”.

**Jesúdi naimiena iiñuana ñaia rafue**  
(Lc. 6.47-49; Mr. 1.22)

<sup>24</sup>Jesús llote:  
—Cue lluana cacadomoi; iadedi omoimona nana iiñoñedomoi. Cue lluana iiñotimiedi abi uiñotimie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana

raite. <sup>25</sup>Noci deidemo, eo jinuidemo, jofomo ille toia, aifi bitemo, jofo raise finua jira, jofo goiñede. Iena faifiñede. Ie isoide. Cue lluana iñotimie faifiñeite. <sup>26</sup>Cue lluana iñonédimiedi abi uiñonédimie. Jofona raise finoñedimie isoide. Jofona raise finoñedimiedi ie jofona finodemo, conillie emodomio iena finode. Ana raiñede. <sup>27</sup>Noci deidemo, eo jinuidemo, jofomo ille toia, aifi bitemo, jofo goillamona, jai eo judaisite. Iena faifide. Ie isoide. Cue lluana iñonédimie faifite —llote.

<sup>28-29</sup>Moisés micori rafue uiñoraini isoi naimie llofueñena jira, illaímamo ite uai itimie isoi naimie llofua jira, nainomo ite cominidi naimie lluari raijicaidimaci.

**Jesúdi efonaitimieno jillotaja rafue**  
(Mr. 1.40-45; Lc. 5.12-16)

**8** <sup>1</sup>Naimie llofua mei, anedumona Jesúsi ie llofueoicaigano diga ana bite. Ailluena comini naimieno racadimaci. <sup>2</sup>Efonaitimie naimie dine billanona, naimieno raise uaiduamona, cañici ifodo ana rainadate. Raite:

—Maestro, o jitaiadedi, cuena jillotaredio.

<sup>3</sup>Jesúsi ie onollí naimiemo oni ñuitajanona, naimieno jetade. Raite:

—Ona jillotaiacadice. Mai o jillo.

—Ieconi naimie jillode. <sup>4</sup>Jesúsi naimiemo llote:

—O jilluana bumó lloñeno; iadedi Jerusalémo, Jusiñamui jofomo, Jusiñamui diga ñairaima dine mai jai. O jilluana comini raise uiñollena, naimiemo o abina acatajai. Moisés micori jaie lloga rana Jusiñamuimo feca. —Iemei Jesúsi oni jaide.

**Jesúdi capitán mullaimana jillotaja rafue**  
(Lc. 7.1-10)

<sup>5</sup>Capernaum railla nairaimo Jesúsi ria, capitán raillamie naimie dine bite. Naie

capitán Roma railla nairai imie. Judíuñedimie. Billanona, duere llote:

—Maestro, cuena cano. Cue jofomo cue mullaima ite. Ie abina niraidanide. Naimie abi eo isirede. Naimieno jillota.

<sup>7</sup>Jesús uai ote:

—Naimie dine jaiticue, naimieno cue jilloitallena.

<sup>8</sup>Naie capitán dane llote:

—Jaiñeno. Jamai bue isoidicue. Iemo, ¿niese cue jofomo biitio? O uaido bene lluanona cue mullaima jilloite. <sup>9</sup>Jiae illaicomini anamo iticue. Naimaci lloga uaina iñoticue. Cue anamo jiae soldaduá illanona, cue uaina iñotimaci. Cue anamo cue mullaima illa jira, naimiedi cue uaina iñote. O anamo naie duico illa jira, o uaina o lloia, cue mullaima jilloite.

<sup>10</sup>Iena cacajanona, Jesúsi raijicai. Naimie diga jaidinomo llote:

—Bie isoi cue uaina iñotimieno jaca baiñedicue. Cai judíuái cominimona biesedimieno jaca iñede. <sup>11</sup>Ero, Jusiñamui ie cominina sedajanomo naimaci illena, diga judíuáiñedino cue llua uaina iñotimaci. Naga nairaíaimona iñotimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuáiñedino iñtimaci. Nainomo caimare nabaitimaci. <sup>12</sup>Ailluena judíuáiñedino iñotimaci. Jusiñamui ie cominina sedajanomo duillanodi omoi judfuai. Naimieno omoi iñóñena jira, omoina oni dotaite. Dotaja mei, eo duere sefuillamona eeitomoi.

<sup>13</sup>Capitámo Jesúsi llote:

—Mai jai. Cue uai siñonana o iñuña jira, o jitaiilla rafue omo jai suide.

—Ieconi naimie mullaima jillode.

**Jesúsi Pedro jifaiñona jillotaja rafue**  
(Mr. 1.29-31; Lc. 4.38-39)

<sup>14</sup>Oni jaillanona, Pedro jofomo Jesúsi ridemo, Pedro jifaiño duillana ciode.

Naiñaiño abi cuaride.<sup>15</sup> Naiñaiño dine jaillanona, naiñaiñona jetade. Jetajamona ieconi naiñaiño jillode. Abi cuariñede. Naiñaiño naidacaillanona, guille finuanona, ie jofomo itinona ecade.

**Jesúdi ailluena duidinona  
jillotaja rafue**  
(Mr. 1.32-34; Lc. 4.40-41)

<sup>16</sup> Naie naiona naimie dine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate. <sup>17</sup> Naimacina Jesús jillotajamona, Isaías micori jaie cuegafuiai iese jai suide. Naimie micori jaie cuega: “Caina jilloitajanona, cai duicona oni oretaite”.

**Jesús ie llofuegamiena damie  
jaillana ie rafue**  
(Lc. 9.57-62)

<sup>18</sup> Ailluena comini naimie ecimo illana Jesús ciuanona, ie llofueoicaiganomo ruica dine jaillena llote. <sup>19</sup> Ieconi Moisés micori rafue llofueraima naimie dine billanona, llote:

—Maestro, o jaillinomo o diga jaiacadicue. O llofuegamiena jaiacadicue.

<sup>20</sup> Jesús uai ote:

—Janorede ocainaiaidi joforedimaci. Silliñiai jillañiaia redimaci; iadedi jofonidicue. Monamona billanona, iimana jaidicue; iadedi buenidicue. Jofonidicue. Cue diga o jaiacania, bue isoidena cuemona oñeitio. Iemo o começina raise faca.

<sup>21</sup> Ie facaise jiaie llofuegamie Jesús mo llote:

—O diga jaiticue; ia cue moo nia fioldaiñena jira, o diga nia jaiñeiticue.

<sup>22</sup> Jesús naimie uai ote:

—Cue diga idai mai bi. Cuenā iinoñedinodi o moona canoredimaci.

Naimie fiodaia, naimienā naimaci raille. Cue rafue jiaie rafue baifemo faite. Cue diga mai bi.

**Jesúdi joraina lliicitaja rafue**  
(Mr. 4.35-41; Lc. 8.22-25)

<sup>23</sup> Naie llofuegamie diga Jesús ñaia mei, ruica dine jaillena, botemo jaide. Ie llofueoicaiganō jiai jaidimaci. <sup>24</sup> Botemo jailla mei, Jesús ñide. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira, <sup>25</sup> jaciruillamona, Jesúsna casitatiñaci. Raitimaci:

—Maestro, caina cano. Jai buisaidicai. Jai corobaisaidicai.

<sup>26</sup> Jesús uai ote:

—¿Bue ñellena jacinaitomo? Cuenā raise iinoñedomoi. Jacinaiñeno.

Iemei Jesús naidacaillano, aifina lletade. Joraina jiai lliicitade. Ieconi lliicaiide. Bagoñede. <sup>27</sup> Naimie llofueoicaiganō iemonā raijicaidimaci. Iemonā raitimaci:

—Bimiedi, ¿nie isoidimie? Aifi naimie uaina iñote. Jorai naimie uaina jiai iñote.

Bai jaillanona, ruica dine ridimaci.

**Jesúdi Gadara railla  
eniruemo illa rafue**  
(Mr. 5.1-20; Lc. 8.26-39)

<sup>28</sup> Ruica dine naimaci ridemo, Gadara railla eniruemo sijidimaci. Ieconi menamie Jesús dine bitiñaimaiai. Jananiai anamo ite iaimaiai. Comini raioillanomo nofie moto ifuaimona bitiñaimaiai. Nai iaimaiai eo riirena jira, jaca bu nainomo Jainide.

<sup>29</sup> Jesús iaimaiai ciua facaise jananiai iaimaiaina curioitate:

—Jusiñamui Jitodio. ¿Niese cocona niñaiacadio? Coco duere sefuille facaise nia iñede; iadedi birui cocona duere finuaibidio —cuiroiodiaimaiiai.

<sup>30</sup>Naie bai iaire ailluena chanchuai guillano itimaci. <sup>31</sup>Jananaiai Jesúmo duere llotimaci:

—Oni caina o retajanova, chanchuai abimo caina oreta.

<sup>32</sup>Jesús uai ote:

—Mai jai.

Ieconi nai iaimaiaimona jananaiai oni jaillanova, chanchuai abimo jaide. Iemonia iconiaido chanchuai joraimo aísicana jaillanova, corobaiside.

<sup>33</sup>Iena ciuanona, chanchuai sedaraini imaci nairai díne aísicana jaidimaci. Nana naie rafuena llotimaci. Jaive jananaiai anamo illa iaimaiai rafuena llotimaci. <sup>34</sup>Le jira ailluena comini Jesús díne bitimaci. Naimiena ciuano, naimiemo duere llotimaci, naimaci illanomona naimie jaillena. Naimaci jitilla jira, Jesús oni jaide.

**Jesús tisitaitimieno jillotaja rafue**  
(Mr. 2.1-12; Lc. 5.17-26)

**9** <sup>1</sup>Botemo ie llofueicaigano diga Jesús jaillano, ruica díne abido jaide. Capernaumo ie illanomo ride. <sup>2</sup>Nainomo rilla mei, naimie díne comini ie biiramo biide tisitaitimieno atide. Naimiena atidinodí Jesús naimieno jillotajana iñote. Iena Jesús uiñuanona, tisitaitimieno llote:

—Moo, o comechina ocuiño. O jeacino cue feitaja jira, iena jai oni dotadicue. Ie facai ibana jai oñefiticue.

<sup>3</sup>Jesús díne ofidinomona dajerie Moisés micori llogacinona llofueraini itimaci. Jesús lluana naimie cacajano, Moisés micori llogacinona llofueraini comechina facadimaci: “Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”. <sup>4</sup>Naimie comeciaina facajacinona Jesús uiñuanona, Jesús dinena jicanote:

—¿Bue ñellena omoi comechina jeare facadomo? <sup>5</sup>Bimiemo: “O jeacinona jai

oni dotadicue” cue lloia, cue uai siñonana uiñoñetomoi; ia bimiemo: “Mai naidacaillanona macari” cue lloia, cue uai siñonana uiñoñetomoi.

<sup>6</sup>Monamona jaie cue billanona, iimana jaidicue. Ie jira jeacino oni dotaja uai cuemo ite. Iena omoi uiñollena, tisitaitimieno lloitice: “Mai naidacai. O biira ferianona, o jofomo mai jai”.

<sup>7</sup>Iese naimie raillamona, tisitaitimie jillode. Naidacaida, ie jofomo jaide.

<sup>8</sup>Comini iena ciuanona, jacinaitimaci. Bimiemo ie uaina Jusiñamui fecajana naimaci uiñuanona, Jusiñamuiño iobillacínona fecadimaci.

**Jesúdi Mateona fetua rafue**  
(Mr. 2.13-17; Lc. 5.27-32)

<sup>9</sup>Jesús bai macaritemo, cuena ucubena oranomo cue raillana ciode. Mateodicue. Gobierno ucube oraimadice. Jesús cuemo llote:

—Cue llofuegamieno o jaillena, cue diga bi.

Naidacaida, naimie diga jaidicue.

<sup>10</sup>Nailli cue jofomo Jesús ie llofueicaigano diga guite. Diga gobierno ucube oraini jiai guisaibitimaci. Diga Moisés micori llogacinodo jaiñedino jiai guisaibitimaci. <sup>11</sup>Nainomo fariseuai comini jamai bitimaci. Moisés micori llogacinodo eo jaidimaci. Jesús ciuanona, naimie llofueicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micori llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanotimaci.

<sup>12</sup>Iena cacajano, Jesús llote:

—Ecairedinodí médicona jitaiñedimaci; ia duidinodí médicona

jitaidimaci. Ie isoide. Mareuidino cuena jitaiñedimaci; ia maraiñedino cuena jitaidimaci. <sup>13</sup>Jusiñamui facaina lloraima micori jaie cuega rafuem omoi comeciaina faca: “Jusiñamui llote: ‘Rana cuemo omoi fecajana jitaidicue; ia cominina omoi dueruillana jiai jitaidicue’ llote”. Cominina cue dueruilla jira, Jusiñamui dibeimo naimaci illena, mareuidinona itatajaibñedicue; iadedi Jusiñamui dibeimo naimaci illena, maraiñedinona itatajaibñiticue. Omoimona maraiñedino diga nabairiticue; ia naimacina uaibiticue.

**Jesús dine Juan Bautista  
llofueoicaigano billa rafue  
(Mr. 2.18-22; Lc. 5.33-39)**

<sup>14</sup>Naie facaise Juan Bautista llofueoicaiganodi Jesús dine bite. Naimemo llote:

—Cai einamaci llua isoi, Jusiñamuina cai raise ibotallena, guínenaruillai illa facaiseconi guíñedicai. Cai jeacino facaina sunaicabiticai. Fariseuái comini jiai guíñedimaci; iadedi o llofueoicaigano guitimaci. Cai einamaci llogacinodo jaidicai. ¿Bue ñellena o llofueoicaigano iedo jaiñedimaci?

<sup>15</sup>Jesús uai ote:

—Jiaie rafuedo iena lloiticue.

Coniruedi ie aína uarui ia, iobilla jira, ie nabaiñiai sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci começi sunaillamona, naimaci jitaia, guínenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. <sup>16</sup>Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi, jocua mei, comue iniroi jacaie iniroimona fo

llirite. Eo fodo cuararite. Jai maraiñeno cioite. <sup>17</sup>Jacagomona finoca bolsa como finoca vino joneñega. Jonegadena, maíriñena jira, sirillamona, igoi raire cuararite. Vino faifite. Igoi jiai faifite. Como finoca vino comogomo jonelle. Iemei iena faifiñeite. Ie isoide. Omoi einamaci rafue ifomo jiaie rafue birui te. Iena omoimo llocabiticue. Iedo jaidicai —llote.

**Jesúdi mena duide riñona  
jillotaja rafue  
(Mr. 5.21-43; Lc. 8.40-56)**

<sup>18</sup>Juan Bautista llofueoicaigano diga Jesús llotemo, jiaimie naimie dine bite. Naimiedi jidúuai ofiraco sedaraíma. Jesúna duere jicanollena, caíñici ifodo rainadacaida llote:

—Cue jisa como fiodaite. O onollí naiñaiñomo o jonellesa, naiñaiño jilloillesa, cue jofomo cue diga mai bi.

<sup>19</sup>Iena cacajano, Jesús naimie diga jaide. Ie llofueoicaigano jiai jaidimaci.

<sup>20</sup>Bai jaillanona, duidiñaiño jinafona jaide. Naimie iniroina jetallena, naimie dine bite. Ie jeraimona doce años jaca diaide. Billanona naimie iniroina jetade.

<sup>21</sup>“Naimie iniroi cue jetajamona jilloiticue” começina facajamona, naiñaiño naimie iniroina jetade.

<sup>22</sup>Ieconi Jesús dobaidacaida, abido erodatemo, naiñaiñona ciode. Raite:

—Ñoo, o começina ocuiño. Cuena o iiñua jira, jai jillodio.

Ieconi naiñaiño jillode.

<sup>23</sup>Ofiraco sedaraíma jofomo Jesús rillano, naie jofo nama jisa jai fiodailla jira, comini merire fillana cacade. Ailluena failliñaillana cacade. <sup>24</sup>Jesús dinena raite:

—Jofomona nana omoi jino jaillana jitaidicue. Cuemona biñaiño fioldaiñedes. Jamai inide.

Iena cacajano, naiñaiño jai fiodaite uiñuamona, Jesúri jaisitimaci. <sup>25</sup>Comini

jino oretaja mei, naiñaiño onollina naimie llinuano, fiodaillamona naiñaiño jillode. Jillua mei, naiñaiñodi naidacaide. <sup>26</sup>Naie rafue nana naie enirue itinomo llocana jaide.

**Jesúdi uisínide iaímaiaina  
jillotaja rafue**

<sup>27</sup>Ofiraco sedaraima jofomona Jesús bai jaidemo, uisínide iaímaiai naimie jinafona jaidiaimaiai. Jesúna ado uaidotiaímaiai:

—Cai illaima David micori jitodio. Jusiñamuimona o billa jira, cocona duenai.

<sup>28</sup>Uai oñeno Jesús Capernaumo jaide. Naimie fo jailla mei, naimie dine bitiiaímaiai. Iaímaiaimo Jesús jicanote: —¿Omicona cue jillotajana iinotomico?

Fairiotiaímaiai:

—Jii.

<sup>29</sup>Iaímaiai uisina Jesús jetajano raite: —Cuena omico iñuña diese jilloitomico.

<sup>30</sup>Ieconi iaímaiai uisidi ciode. Jesús naie rafuena lluana eo janotade.

—Bumo lloñeno —llote; <sup>31</sup>iadedi iena llocana jaidiaímaiai. Iemonia Jesús mameci nana naie eniruemo itinomo soride.

**Jesús ñaiñedimíena jillotaja rafue**

<sup>32</sup>Capernaumona Jesús bai jaidemo, naimie dine Janaba anamo illamiena jiaie comini atidimaci. Janaba anamo naimie illa jira, naimie ñainide. <sup>33</sup>Jesús Janabana oni orede. Oretaja mei, naie iima ñaite. Naimomo ite comini raijicaillanona raitimaci:

—Cai comini dine bie isoide iima jilluana jaca cioiñedícai.

<sup>34</sup>Ie jira fariseuai comini dinena raitimaci:

—Taife dibeimo Janaba illamona, Jesúdi Taife uaido Janabana oni orede —raitimaci.

**Jesúdi cominina duenailla rafue**

<sup>35</sup>Diga nairaíaimo ie llofueoicaigano diga Jesús illocana jaide. Nainomo judíuái ofiracuaimo llofueuide. Naimie anamo comini illana Jusiñamui jitaila jira, Jesúdi Jusiñamui díbeimo naimaci comeciai iuaina meiduana llofueete.

Ailluena duidinona jillotate. Naga isoide duicomona jillotate. <sup>36</sup>Naimacina duenaite. Naimaci comeciai iticino oni duiñoitímie iñena jira, naimacina duenaite. Ailluena cominina ciode. Toica llaudaiai isoi ebe isoi jaidimaci. Naimaci comeciai ocuiñonidimaci. Jusiñamui naimacina sedaacana uiñoñedimaci. <sup>37</sup>Naimacina duenaillamona, ie llofueoicaiganomo llote:

—Illimo ailluena trigo ia, iena ollena, ailluena maijirainina jitaila. Ie isoide. Ailluena comini ite naimacimo Jusiñamui rafuena cai llollena; iadedi naie rafuena lloraini eo iñedimaci. <sup>38</sup>Ie rafue naimaci llollena, ailluena cominina raire naimie oretallena Jusiñamuimo jicano.

**Jesúdi ie doce llofueoicaiganona  
fetua rafue**

(Mr. 3.13-19; Lc. 6.12-16)

**10** <sup>1</sup>Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Duicona oni oretallena, iena jiai iñonocaide. <sup>2</sup>Ie llofueoicaiganodi iese mameciredimaci: Simón. Naimie mameci jiaicidi Pedro. Andrés. Naimiedi Simón ama. Jacobo. Juan. Iaímaiai Zebedeo jito iaímaiai. <sup>3</sup>Felipe. Bartolomé. Tomás. Cuena jiai uайдote. Mateodícue. Gobierno ucubena oraimadicue. Jiaie Jacobo. Naimiedi Alfeo jito. Tadeo. <sup>4</sup>Jiaie Simón. Naimiedi cananista comini facaisemo

duide. Judas Iscariote micori. Naimiedi Jesúna gaitatare.

**Jesúdi ie llofueoicaiganona  
oretaja rafue**  
(Mr. 6.7-13; Lc. 9.1-6)

<sup>5</sup>Jesús ie llofueoicaiganona oni oretajanona, raite:

—Judiuañedino díne jaiñeno. Samaritano railla comini díne jaiñeno; <sup>6</sup>ia cai judiuai comini díne jai. Naimacimona ailluena comini Jusiñamui rafuena nia iinoñedimaci. Faificana nia jaidimaci. <sup>7</sup>Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitilla jira, naimie dibeimo omoi comeciai iuaina meido”.

<sup>8</sup>Duidinona jillota. Fiodaitinona jillota. Efonaitinona jillota. Jananiaña oni oreta. Cue uaina jamai omoi feiñua jira, cominina jilloitajana ibatañeno.

<sup>9</sup>Ucubena uiñeno. Guille ifo meidlenna, rana uiñeno. <sup>10</sup>Ailluena rana omoi uiñellena, bolsana uiñeno. Abi meidlolle iniroina uiñeno. Meidlolle zapatona uiñeno. Omoi abi riidlenna, jiguídana uiñeno. Jiae cominina omoi canua isoi, omoina naimaci canua. Naimacimona omoi jitilla rana omoi ono. Ie jira ailluena rana uiñeno. <sup>11</sup>Nie nairaimo omoi ria, omoi rafuena jitañimieno jeno, naimie jofomo omoi illena. Naie jofomo omoi i, naie nairaimo omoi ille dinori. <sup>12</sup>Naie jofomo omoi rillanona, naie cominina marena uaido. <sup>13</sup>Omoina naimaci raise feiñoia, naimaci uri illena, naimacimo marecinona llono; iadedi omoi rafuena naimaci jitaiñenia: “Jusiñamui omoina canoite” naimacimo lloñeno. <sup>14</sup>Omoina bu feiñoiacaiñenia, omoi uaina bu cacarefiacaiñenia, naie nairaimona omoi jailandona, omoi eillaimo ite jearacuaina jaidino.

Maraiñede rafuena naimaci finuana naimaci uiñollena, omoi eillaina jaidino. <sup>15</sup>Omoimo uanaicinona lloticue. Omoina naimaci feiñoñenia, Jusiñamuidi naimacina duere finoite. Sodoma railla nairai jaie jeacinona eo finodimaci. Gomorra railla nairai jaie jeacinona eo finodimaci. Ie jira Jusiñamui naimacina jaie duere finode. Omoina comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

**Jesús duere sefullifuena llua rafue**

<sup>16</sup>Jesús ie llofueoicaiganomo nia llote:

—Naimacina janallari fañellena, naimaci duere sefullifuena, toica llauðaiai raise sedajana jitañimaci. Ie isoide. Eo maraiñede comini motomo omoina oretaiticue. Omoina duere finoacanitimaci. Raise sedajana jitañodomoi. Jaio fiodaiñellena, aside. Naimiena bu meineñellena, ie abina eenollena, jaio aside. Ie isoi omoi abi uiñocana omoi jai. Ucugidu buena jeare finoñede. Ie isoi omoi illa. Jeacino finuamona eneno omoi i. <sup>17</sup>Abina rairui. Dajerie omoina llogidoñimaci. Omoina gaitaja mei, naimaci ofiracomo omoina faitimaci. <sup>18</sup>Cue rafue omoi llua muidona, omoina gaitajanona, illaicomini dine omoina uitimaci. Omoina llogidoñinomo cue rafuena lloitomoi. Naie illaicomini iena jiae lloitomoi. <sup>19</sup>Naie illaicomini dine omoi ia, omoi riidlolicinomo omoi comeciaina jarire facañeno. Naie facaise omoi ñaiñilicinona uiñoitomoi. <sup>20</sup>Dani omoi comeciai icinodo ñaiñeitomoi; ia Jusiñamui Joreño uaido ñaitomoi. <sup>21</sup>Cuena iñotomoi; ia ailluena cuena iñoñeitimaci. Cuena omoi iñuua jira, omoina enoitimaci. Iemonia dajerie ie amana meinatallena, naimiena

llogidoite. Dajerie moodi ie uruena meinettallena, naimiena llogidoite. Dajerie uruiaidi naimaci moona, naimaci eina meinettallena, naimacina llogidoitimaci. <sup>22</sup>Cue muidona ailluena comini omoina enoitimaci; iadedi cue uaina fainonocaiñedimie cue Moo diga monamo ja muidomo jaca iite. Naimiena Jillotaiticue. <sup>23</sup>Cue rafue naimaci jitaiñenamona, omoina nie nairai duere finoia, dinomona cue rafuena llollena, jiaie nairaimo raire jai. Cue rafuena omoi llollena, diga judíuai illanuaímo nia jaitomoi. Nana naie comini nia iñóñenia, Jusiñamui dinena dane abido biiticue. <sup>24</sup>Ero, ie llofueraima duere sefuria, ie llofuegamie daje isoi duere sefuite. Le ecí illamie duere sefuria, ie mullaima daje isoi duere sefuite. <sup>25</sup>Ie isoide. Cue cominina omoi jaillamona, cue duere sefuria, jiai duere sefuitomoi. Taife mameci jiaici llinuanona, “Beelzebúdio” jiaino cuena raitimaci. Iese cuena naimaci jeare ñaia jira, cue cominina omoi illa jira, omoina jiai jeare ñaitimaci.

**Jesúdi jaciruiñeno llofua rafue  
(Lc. 12.2-9)**

<sup>26</sup>Jesús nia llote:  
—Cuena iñóñedino omoina jeare ñaitimaci; ia nana cue rafuena llocana omoi jailla jira, naimacina jaciruiñeno. <sup>27</sup>Omoimo rafuena anado jai lloticue. Iena nana cominimo marefodo llono. Ado llono. <sup>28</sup>Omoi abina meineredimaci; ia omoi joreñona meinenedimaci. Omoina naimaci meineia, omoi joreño Jusiñamui dine jaite. Iena uiñuamona, omoi meineiacadinona jaciruiñeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño diga, iraimo dotarede. <sup>29</sup>Omoina duere

finoacadinona jaciruiñeno. Ero mena janorede sillina fecadomoina, eo janore ibaca; iadedi cai Moo Jusiñamui jitaiñenia, naimacimona daje fiodañede. <sup>30</sup>Ero, niga ifotirai omoimo illana Jusiñamui uiñote. <sup>31</sup>Naimiedi omoina sedajana jiai uiñote. Silliñiai baifemo Jusiñamui isiruigaomoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

**Jesús naimiena janoñenana  
llofua rafue  
(Lc. 12.8-9)**

<sup>32</sup>Ie llofueoicaiganomo Jesúsi nia llote:  
—Cue rafuena omoi lluamona, jiaino omoina duere finoitimaci. Cuena birui omoi janoñenia, nana comini Jusiñamui uicomio ico ia, nainomo omoina janoñeiticue. “Cue cominidomoi” omoina raiticue. <sup>33</sup>Cuena birui omoi janoia, nana comini Jusiñamui uicomio ico ia, nainomo omoina janoiticue. “Cue cominiñedomoi” omoina raiticue.

**Jesús muidona nana  
comini uri iñena rafue  
(Lc. 12.51-53; 14.26-27)**

<sup>34</sup>Ie llofueoicaiganomo Jesúsi nia llote:  
—Nana cominina uri itatallena eniruemo biñedicue. Cuena iñóñedino cuena iñotinona enoitimaci. Enoillamona cuena iñotinona duere finoitimaci. <sup>35</sup>Cue lloga rafuena damierie iñuua muidona, ie moo illa dibeimo ie jito iñeite. Ie ei illa dibeimo naiñaiño jisa iñeite. Ie jifaiño illa dibeimo naiñaiño mio iñeite. Iese cominina uri itatañedicue. <sup>36</sup>Omoi comini cominina enoitomoi. Iemonia duere sefuitomoi. <sup>37</sup>Ero, ie moona cue baifemo bu isiruia, ie eina cue baifemo bu isiruia, cue jitalla ra naimie finoacaiñena jira, cuemo raise duiñede.

Ie uruiai cue baifemo bu isiruia, cuemo raise duiñede.<sup>38</sup> Cue facaina bu fiodaicaiñenia, cuemo raise duiñede. Naimiedi cue comini naimiena lloiacaiñedicue.<sup>39</sup> Cue facaina fiodaicaiñedimie ja muidomo faifite. Cue diga jaca iñeite; iadedi cue facaina fiodaitimie monamo cue diga jaca iite.

**Jesús Jusiñamuimona  
ibana feiñua llua rafue**  
(Mr. 9.41)

<sup>40</sup> Jesús llote:

—Cue rafuena omoi llocana jaia, diga jofuemo riitomoi. Cue cominina omoi illamona, omoina feiñotino cuena jiai feiñotimaci. Omoina bu feiñoia, cuane jiai feiñote. Cuena feiñotimedi cuena oretatimieno jiai feiñote.<sup>41</sup> Naimie cue comini illamona, damierie Jusiñamui facaina lloraimana feiñotimaci. Jusiñamui facaina lloraimana bu feiñoia, Jusiñamuimona ibana feiñoite, naie lloraima Jusiñamuimona feiñua isoi. Cue jitailacina finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite.<sup>42</sup> Cue dibeimo itinona bu janore canoia, Jusiñamuimona ibana feiñoite. Naimacimo nibai jamai jinuina fecade; iadedi naimacina canuamona, Jusiñamuimona ibana feiñoite —llote. Iemei Jesús ie llofueoicaiganona, ie rafuena llollena, orede.

**Jesús dine Juan Bautista micori ie  
llofueoicaiganona oretaja rafue**  
(Lc. 7.18-35)

**11** <sup>1</sup> Ie doce llofueoicaiganona Jesús oretaja mei, iairei ite comini illanuaimo naimiedi ie rafuena llocana jaide.

<sup>2</sup> Ie facaiseconi cárcelmo Juan Bautista micori Jesús finoca rafuena fidiano, iena raise uiñollena, Jesús dine ie

llofueoicaiganona orede.<sup>3</sup> Jesús llotimaci:

—Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamieno o illana uiñoiacadicai. Imieñediodena, jiaimie billemo nia ocuiridicai.

<sup>4</sup> Jesús uai ote:

—Cue lluana cacadomoi. Cue finoca rafuena ciodomoi. Juan dine abido omoi jaillanona, iena naimiemo llono.<sup>5</sup> “Uisinidino jai ciodomaci.

Nuja-ñujacaída jaidinodi jai raise macaritimaci. Efonaítino jai jillodimaci. Jefona cacaiñedino jai jefona cacasite. Fiotaillamona damierie jai jillodimaci. Dueredino mare rafuena jai cacadimaci<sup>6</sup> naimiemo llono. <sup>6</sup> Jiai llono: “Níbai nana cue rafuena raise cacaiñedio; ia cuena jaca nia iñocana o jaia, caimare iitio”.

<sup>7</sup> Juan llofueoicaigano abido jailla mei, naimie ecimo ailluena ite cominimo Jesúdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimieno ciodomoi? Daje uaido rafuena comechina facadimieno ciodomoi. Ero, fuirina aifi billamona, raitire afai bijide. Afaina aifi billamona, raitire fuirí bijide. Naimie ie isoiñede. Nie isoide rafue naimiemo ia, cue rafuena llocana jaide.<sup>8</sup> ¿Bue ñellenia naimie dine jaidomoi? Mare iniroina jitadimieno cíoñedomoi. Mare iniroina jitadinona omoi cíoacanaiadeti, illaicomini dine jaidomoi.<sup>9</sup> Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira.<sup>10</sup> Malaquías micori naimieno jaie cuega:

Jusiñamui raite: “Ero, o uicodo cue rafuena llollena, damieno oretaiticue,

comini comeciaina marenina  
duiñollena”

cuega. Malaquías Juan Bautistana cuete. <sup>11</sup>Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuetu; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioiñede. Iemonia naimie baifemo faitomoi. <sup>12</sup>Juan llofuria tainiamona ailluena comini cue rafuena iiñuamona, Jusiñamui dibeimo birui duere iacadimaci. <sup>13</sup>Nana Jusiñamui facaina lloraini micoriaidí cue billena jaie llotimaci. Moisés micori iena jiai jaie llote. Juan facaise naie llogacino jai suide. <sup>14</sup>Jusiñamui facaina lloraima jaie llote: “Bie rafue sulle facaise Elías isoidimie biite”. Naimie rafuena iiñotomoidena, Juandi naimienra uiñotomoi. <sup>15</sup>Omoi jeforena jira, raise fueollena, cue lluamo cacarei.

<sup>16</sup>Jesús nia llofuetu:

—Ero, omoina ñaiticue. Jifanote uruiai isoidomoi. Uruiai jifanoiacania, naimaci nabairiñaina uaiduanona, raitimaci: <sup>17</sup>“Omoi diga jifanoiacadicai; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedica” raitimaci. <sup>18</sup>Ie isoidomoi. Juan jirorainide. Caimare guíñede; ia naimie diga nabairiñedomoi. Naimienra gaiñedomoi. Ie jira omoimona dajerie naimienra raitimaci: “Janaba anamo naimie illamona, naimie uaírico isoi ite” raitimaci. <sup>19</sup>Monamona billanona, iiñama jaidicue. Omoi isoi guiticue. Caimataidicue; ia cue diga nabairiñedomoi. Cuena jiai gaiñedomoi. Ie jira cuena jeare ñaitomoi. Raitomoi:

“Guillaredimie. Jiroruidimie. Jearede rafue finodino diga nabairitimedio”. Iese raitomoi; iadedi Jusiñamuina iiñotinodi cue finoca rafuena marenana uiñotimaci.

Dajerie nairaí Jesúna  
iiñoñena rafue  
(Lc. 10.13-15)

<sup>20</sup>Ailluena comini Jesús dina nia ia, naimacimo ie navui jailla nairaíaina ñaíte. Naimie siño finoca rafuena uiñotimaci; iadedi naimaci comeicia iuai meidoñedimaci. Ie jira naimacina ñaíte. <sup>21</sup>Llote:

—Omoimona damierie Corazín railla illanomona bitomoi. Omoimona damierie Betsaida railla illanomona bitomoi. Cue rafuena omoi iiñoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeicia eo isinotaillamona, naimaci comeicia iuai meidotimaci. Naimaci comeicia iuaina meiduana uiñotallena, ebinide iniroina jitajanona, naimaci ifogiaimo jusefona jonetimaci.

<sup>22</sup>Jusiñamui uicomono nana comini ico ia, Tiro nairai baifemo duere sefuitomoi. Sidón nairai baifemo duere sefuitomoi.

<sup>23</sup>Omoimona damierie Capernaum railla illanomona bitomoi. Birui abina iedoiacadomoi; iadedi jiairuido sunaitomoi. Omoi dine navui cue siño finoca rafuena Sodoma railla nairaimo jaie finodicuena, naie nairaídi birui niadeti nia ite. Omoi comeicia iuai omoi meidoñenia, monamo cue Moo diga jaca iñetomoi; iadedi naimie omoina duere finollemona sunaitomoi.

<sup>24</sup>Jusiñamui uicomono nana comini ico ia, cue rafuena omoi iiñoñena jira, Sodoma railla nairai baifemo duere sefuitomoi —llote.

**Jesús ie Moo diga ñaia rafue**  
(Lc. 10.21-22)

**25-26** Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uiñotoninona bie isoide rafuena uiñotañedio; iadedi jamai bue isoidinona iena uiñotadio. O jitaila jira, ie se uiñotadio. Ie jira iobillacinona omo feacaacadie. Mai.

**27** Jesús dínená naimie ecímo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaille diese omoina naimiena uiñotadicue. Ie muidona naimiena uiñotomoi. **28** Omoi jeacintonona omoi jillobillena, duere jaidomoi. Omoi comeciai marena uri illena, cue díbeimo mai omoi i. **29** Cue lluacino anamo omoi i. Cue riinina jira, cuemoná omoi fueo. Iemei omoi comeciai marena uri ii. **30** Omoina cue canua jira, cue lluacino anamo omoi iacanano ia, sefuinide. Omoina cue canolle jira, cue lluacino finuana sefuinide.

**Sábadoruimo Jesús**  
**llofueoicaigano majija rafue**  
(Mr. 2.23-28; Lc. 6.1-5)

**12** **1** Ie rafue lluamona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo motodo joide naido jaide. Ie llofueoicaigano aimetailla jira, trigona tijiano, golluano, guicana jaidimaci.

**2** Dajerie fariseuui iena ciuano, llotimaci: —Ero, o llofueoicaigano rairuica rana finosite. Moisés micori rairuilla jira, sábadoruimo majjinidicai; iadedi trigona naimaci tijiamona, caimona jai

majjidimaci. Iese caí abimo jeacinona jai finodimaci.

**3** Ie llofueoicaiganona riiduano, Jesús uai ote:

—Cuemoná jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. **4** Jusiñamuimo fecaca llomenicona uanona, guitímaci. Jamai bue isoidino naie llomenicona guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga David micori iena guite; ia Jusiñamui naimacina duere finoñene. **5** Moisés micori llogacinomo jiai raise comeciaina facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini majjiuidimaci. Jusiñamuina naimaci sedallena, ocainana fatimaci. Iraina bonodimaci. Iese majjiuidimaci; iadedi Jusiñamuima jeacino finoñedimaci. Moisés micori jaie cuegaufuiaína raise cacaiñedomoi. Iena raise facañedomoi. **6** Omoimo nia lloitice. Jusiñamui jofomo finoca rafue baifemo faiticue. **7** Jusiñamui facaina lloraima iena jaie cuega: “Cuemo rana omoi fecajana jitaidicue; ia omoi jitailamona, jiaie cominina omoi duenallacinnodi rana cuemo fecajaciona baifemo faite”. Iena omoi uiñotomoidena, cue llofueoicaiganomo: “Maraiñedicinona finodomoi” lloñedomoi. Cuemoná cue llofueoicaigano jeacino finoñedimaci. **8** Monamona billanona, iimana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jiai rairuiredicue.

**Jesúdi onollina idisarodimienä**  
**jillotaja rafue**  
(Mr. 3.1-6; Lc. 6.6-11)

**9** Bai jaillanona, nairai dine rillanona, naimaci ofiracomo Jesús fo jaide.

<sup>10</sup>Nainomo onollina idisarodimie illanona, fariseuai dinena Jesúmo jicanotimaci:

—Sábadoruimo bimiena o jilloitajana mare? —jicanotimaci. Sábadoruimo duidimiena bu jillotaia, naimacimona naimie jai majlide. Uai uanona: “Mare” Jesús raiadedi, naimacimona naimie jai majiacana jira, naimiena llogidoiacadimaci. <sup>11</sup>Jesús uai ote:

—Sábadoruimo omoimona damie ie toica llauda ifomo uaídena, nairuido ari iena ote. Naimiemo buena lloñedomoí.

<sup>12</sup>Ero, cominidi llauda baifemo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

<sup>13</sup>Onollina idisarodimiemo llote:

—O onollí mai oni ñuita.

Iena ñuitajamona jillode. <sup>14</sup>Iena ciuanona, fariseuai jino jaidimaci. Naimiena meinellena, coniniri siadotimaci.

### Isaías micorí jaie Jesúna ñaia rafue

<sup>15</sup>Naimiena naimaci meineiacanana Jesús uiñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

<sup>16</sup>—Cuenca llocana jaiñeno —naimacimo llote. Naimie mameci are sorillana jitaiñede. Fariseuai diga ie uai uaitaiacaiñede. <sup>17</sup>Iemona Isaías micori jaie cuegafuiai jai suide. Jusiñamu Isaías micorina jaie cuetataga:

<sup>18</sup> Ero, cue fetoca mullaima ite. Naimiedi cue isiruigamie. Naimieri iboidicue.

Cue Joreño naimiemo cue fecajanona, judíuafíñedino naimacina cue jilloitaacanana lloite.

<sup>19</sup> Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

<sup>20</sup> Comeciai ocuinidinona canoite. Dueredinona canoite. Naimacina duere finoñeite; ia naimacina canoite.

Ie mare rafue lluamona, naimiena iinotinona canoite.

Nana comini naimie anamo ille dinori iese naimie canoite.

<sup>21</sup> Naimaci jillobillena, ie rafue cacajanona, ailluena judíuafíñedino naimiena iiñotimaci.

### Fariseuai Jesúna jeare ñaia rafue (Mr. 3.19-30; Lc. 11.14-23; 12.10)

<sup>22</sup> Jesús dine damieriedi Janaba ie anamo illamiena atidimaci. Janaba anamo naimie illa jira, naie aticamiedi cíoñede. Jiai ñaiñede. Jesús Janabana oni oretajanona, naimiena jillotate. Naimie uaina botade. Ñaite. Ciode.

<sup>23</sup> Naiena ciódino raijicaillanova raitimaci:

—Nibai bimiedi David micori jito. Cai illaimana naimie illena, naimie micori jitomo ocuividicai.

<sup>24</sup> Iena damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominiñimona Jesús Janabana oni oretate —raitimaci.

<sup>25</sup> Naimiena naimaci enoiliana Jesús uiñuanona, naimacimo llote:

—Daje isoi comeciaína lloillamo daje nairai facañenia, danomo majinidimaci. Oni jaidimaci. Daje isoi comeciaína lloillamo daje jofomo itino facañenia, danomo jainaíainidimaci. Oni jaidimaci.

<sup>26</sup> Ie isoide. Beelzebú uaido jananiaína omoí llua isoi cue oretaia, Janaba ie dibemio itino diga jai nabairiñede.

Iemona naimie comini danomo

iñeitimaci.<sup>27</sup>Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uiñollena. Iemei cue finoca rafuena uaitañetomoi.<sup>28-29</sup>Ero, maíridimie ie jofomo ite rana nibai fiacadomoi. Iena fiillena, naimiena nano raise omoi maiga. Raise maia mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafefitaticue. Iemonia Jusiñamui rafuena cue lluana jai uiñotomoi.<sup>30</sup>Cue dibeimo iñedimie cuena enoide. Cue dibeimo cominina itatañedimiedi naie cominina cuena iñotañede.<sup>31</sup>Ie jira omoimo lloitue: Jusiñamuidi nana comini jeacinona dotarede. Naimiedi comini maraiñediginona dotarede; iadedi naimiedi ie Joreñona jeare ñaiaconina dotañete.<sup>32</sup>Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamuimona biticue. Cuena omoi jeare ñaia, Jusiñamui iena feitaredi; iadedi naimie Joreñona omoi jeare ñaia, Jusiñamui iena birui feitañete. Iena ico jaca feitañete.

**Jesúdi riara llisilla llua rafue**  
(Lc. 6.43-45)

<sup>33</sup>Jesús llote:

—Llisillamona nie isoide riara illana uiñoticai. Amena ie llisilla llillamona, amena marena uiñoga. Llillamona, amena maraiñenana jiai uiñoga.<sup>34</sup>Ie isoide. Omoi ñaiamona omoina uiñoticai. Cuena omoi maraiñeno ñaia jira, omoi comeciai iticinona uiñoticai. Omoi maraiñena jira, jaio nairaidomoi isiodomoi.<sup>35</sup>Mareuidimie mare ie

comecimona ñaite; iadedi maraiñedimie maraiñede ie comecimona ñaite.

<sup>36</sup>Jamai ebena birui omoi ñaia, Jusiñamui uicomono nana comini ico illa facaiseconi Jusiñamui iña oite.<sup>37</sup>Omoi jeare ñaiaconi duere sefuitomoi; iadedi omoi mare ñaiaconi duere sefuiñetomoi. Ie jira Jusiñamui dibeimo omoi comeciai iuai meido.

**Dajerie Jesús siño rafuena  
finuana jitaila rafue**  
(Mr. 8.12; Lc. 11.29-32)

<sup>38</sup>Naie facaiseconi dajerie Moisés micori llogacínona llofueraini dajerie fariseuai diga Jesúmo llotimaci:

—Maestro, o lloga uaina cai iñollena, siño rafuena o finuana cioacadicai.

<sup>39</sup>Jesús uai ote:

—Maraiñediginona finocabidomoi. Jusiñamui dibeimo iacaiñedomo; iadedi siño rafuena cioacadomoi. Iena omoi jamai cioillena, siño rafuena finoñeticue. Ero, Jonás micori jaie ite rafuena uiñotomoi. Naiemo omoi comeciaina omoi faca.<sup>40</sup>Darui amani aillue llisiai jeraimo naimie illamona jillode. Ie isoite. Cue fiodailla mei, darui amani raiafomo iiticue. Iemei naiemona jilloiticue.<sup>41</sup>Lliaisa jeraimona naimie jillua mei, Nníve railla nairai díne Jonás micori jaide. Nainomo Jusiñamui rafuena llote. Naie comini iena cacajano, naimaci comeciai icinuaína meidotimaci. Cue rafuena omoi cacajamona, omoi comeciai icinuaína birui omoi meidoñena jira, Jusiñamui uicomono ico nana comini illa facaiseconi: “Cue cominidomoi” omoina raiñeticue. Jonás micori baifemo birui uaidicue; iadedi cuena iñoñedomoi.<sup>42</sup>Ero, Saba railla nairai ie illaño micoridi Salomón micori díne jaie aarena jaide. Naimie micori uiñuacinona naiñaiño micori cacareillena, aarena jaide. Salomón

micori baifemo birui uайдicue; iadedi cuena iiñoñedomoi. Omoi comeciai icinuaina birui omoi meidoñena jira, Jusiñamui uicomu nana comini ille facaiseconi naiñaiño micori omoina ico ñaite: "Naimiedi siño rafue finuana ciodomoi. ¿Bue ñellena naimiena iiñoñedomoi?" omoina ico ñaite.

**Janaba anamo illamie rafue**  
(Lc. 11.24-26)

<sup>43</sup>Jesús naimacimo nia llote:

—Birui bene ite maraiñede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede. <sup>44</sup>Baiñena jira, naimie começina facade: "Navui cue anamo illamie dine abido jaiticue". Abido naimie bia, naie iima começi namanidena naimie baite. <sup>45</sup>Iemei oni jaillanona, jiaie siete jananiaina naimie diga atide, naimaci anamo naie iima illena. Naie siete janariai naimie baifemo maraiñedimaci. Iemonia naie iima eo fodo jaide. Ie isoide birui ite maraiñede comini. Cue rafue naimaci iiñoñenia, eo fodo jaitimaci.

**Jesús ie comini**  
(Mr. 3.31-35; Lc. 8.19-21)

<sup>46</sup>Jofomo comini diga Jesús nia ñaia, naimie ei, ie amatiai diga, bite. Naimie diga ñaiacanano, jino naidaide. <sup>47</sup>Damie Jesús llo:

—O ei, o amatiai diga, jino ite. O diga ñaiacade.

<sup>48</sup>Naimiemo Jesús dinena jicanote:

—¿Bu cue ei? ¿Bu cue amatiai?

<sup>49</sup>Ie llofueoicaigano dine ie onollí ñuitajanona, raite:

—Jadi, cue ei, cue amatiai. <sup>50</sup>Cue Moo monamo ite. Naimie jitallacinona finodimiedi cue amana, cue miriñona, cue eina. Imaci ua cue cominina.

**Trigo judaidimie rafue**  
(Mr. 4.1-9; Lc. 8.4-8)

**13** <sup>1</sup>Nai jofomona nairui Jesús jaillanona, jorai fue dine jaide.

<sup>2</sup>Ailluena comini nainomo ofilla jira, botemo Jesús jaillano, ana raide; iadedi comini jorai fuedo itimaci. <sup>3</sup>Ailluena rafue naimacimo llote:

—Jusiñamui omoina sedaacana omoi fueollena, bie rafuena lloitice. Damie trigona judaiaide. <sup>4</sup>Naimie judaiamona, naisomo janore iduai juide. Naimie bai jailla mei, silliiñai iena guisaibitimaci. Ie jira siconede. <sup>5</sup>Nofiemu jiaie iduai juide. Nainomo enirue raise iñena jira, <sup>6</sup>raise jainañena jira, ecasillamona duide. Ie jira llisiñede. <sup>7</sup>Eecuai illanomo jiaie iduai juide. Eecuai sicutamona, riara eecuai iibaica. Ie jira llisiñede.

<sup>8</sup>Mare eniruemo jiaie iduai juide. Sicode. Llisillamona danademo cien diga llisillana ote. Jiañamona sesenta diga llisillana ote. Jiañamona treinta diga llisillana ote. <sup>9</sup>Omoi jeforena jira, raise fueollena, cue lluamo cacarei. Iena iino.

**Jesús ie como lloga**  
rafuena llofuia rafue  
(Mr. 4.10-12; Lc. 8.9-10)

<sup>10</sup>Ie llofueoicaigano Jesús mu jicanuaibiside:

—¿Bue ñellena bie isoide rafuedo cominina llofuetio?

<sup>11</sup>Uai ote:

—Jusiñamuidi omoina ie sedaacana rafuena jai uiñotade. Jaie iena uiñoñedomoi. Jiaie cominina iena nia uiñotañede. <sup>12</sup>Jusiñamuina iiñotimie Jusiñamui rafuena iiñocana jaite. Jusiñamui naimiena uiñotaite; iadedi Jusiñamuina iiñoñedimie Jusiñamui rafuena uiñoñecana jaite. <sup>13</sup>Ie jira bie

isoidicinodo naimacimo lloticue. Cue siño finoca rafuena ciodomaci; iadedi iena naimaci iinoñena jira, uiñoñeno jaitimaci. Cue llofuiiana jamai cacadimaci; iadedi naimaci iinoñena jira, raise cacaiñedimaci. Uíñoñedimaci.

<sup>14</sup>Isaías micori naimacina jaie cuega rafue burui jai suide. Jaie raite:

Jusiñamui llote: “Cue rafuena cacaitomoi; iadedi iena cacaíñeitomoi.

Rafuena citoitomoi; iadedi iena uiñoñeitomoi.

<sup>15</sup>Omoi comeciai jai tainomo ite isoide.

Omoi jefona jai cacaiñedomoi isidomoi. Cue rafuena jai cacaacaiñedomoi.

Jai uisinidomoi isidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue dibeimo iacaiñedomoi, omoina cue jilloitai raillanona”.

Isaías micori Jusiñamuina iinoñedinona iese jaie cuete; <sup>16</sup>iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi iinua jira, ni ua omoi marena ille jillaci.

<sup>17</sup>Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie iinotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

**Jesúdi trigo judaidimiena llua rafue**

(Mr. 4.13-20; Lc. 8.11-15)

<sup>18</sup>Jesús llote:

—Ero, omoina trigo iduaina judaidimie rafuena llofueiticue.

<sup>19</sup>Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci.

Jaie Taifedi naimaci comeciaimo cacaja uaina iinotañede. <sup>20</sup>Jiae iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. <sup>21</sup>Nofiemer riga iduai jainaonidedi raise sicoñede. Naie comini janore iinua jira, ie isoidimaci. Dallu nano iinotimaci. Jusiñamui uai muidona duere naimaci sefuia, abido danomo uaidimaci. <sup>22</sup>Jiae iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. Hinotimaci; iadedi naimaci comeciai jarire illamona, naimaci raruaina ebiruillamona, naie uai naimaci comeciaimo itabiñede. Jusiñamui jitaille rafuena finocana jaiñedimaci. <sup>23</sup>Jiae iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitalla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

### Raiticiai trigo motomo illa rafue

<sup>24</sup>Jesús jiae rafuena llote:

—Jusiñamui ie cominina sedaacana rafuena lloitice. Naimie dibeimo comini jaillena, naimie rafue llocana jaidicue. Jiae uaido iena omoimo lloitice. Damie trigona judaide. Ie illimo mare iduaina judaide. <sup>25</sup>Naimie inia mei, ie enoidimie trigona eruaide raiticiaina bainino judaide. Iemei oni jaide. <sup>26</sup>Trigo sicuamona lliside. Naie facaise naie raiticiai como raise bairede. <sup>27</sup>Judaide imie maijiraini iena ciuanona, naimiemo llote: “Mare iduai navui ritio. ¿Niesedeta raiticiai eo sicode?” <sup>28</sup>Uai ote: “Cuena enoidimie iese finoca”. Naie

maiñiraini naimiemo jicanotimaci:  
“*¿Birui nai raiticiai cai raitiana  
jitalidio?*” <sup>29</sup>Uai ote: “Dama ite. Raiticiai  
omoi raitia, trigona jiai jaititomoi.  
Dama iesede. <sup>30</sup>Danomo sicoite. Ua  
facaiseconi cue maijirainimo lloitice:  
“Raiticiai nano jaita. Danomo ofita,  
jobaillesa. Trigo uanona, cue jofomo  
atianona, eeno”.

**Jesúdi mostaza ido llua rafue  
(Mr. 4.30-34; Lc. 13.18-19)**

<sup>31</sup>Jesús jiae rafue llote:

—Jusiñamui dibeimo comini jailla  
rafuena lloitice. Jiae uaido iena  
omoimo lloitice. Damie mostaza idona  
rillamona, naiemona eo aillue riara  
sicode. <sup>32</sup>Mostaza ido eo janorede;  
iadedi sicua mei, eo aillue riara  
jaillamona, nainomo sillinaij jicaicaina  
finodimaci. Ie isoide. Jusiñamui rafuena  
janore comini birui cacajamona,  
ailluena comini naimie cominina ico  
jaitimaci.

**Jesús siritate rana llofua rafue  
(Mr. 4.33-34; Lc. 13.20-21)**

<sup>33</sup>Jesús jiae rafuena llote:

—Jusiñamui dibeimo comini jailla  
rafuena lloitice. Jiae uaido iena  
omoimo lloitice. Daje cirigai raifi  
coremo siritate ra faianona, namo  
tameia siritate. Ie isoide. Ailluena  
comini iena cacaillena, Jusiñamui rafue  
llocana jaite.

<sup>34</sup>Naie isoide rafuedo Jusiñamui ie  
cominina sedaacana rafuena cominimo  
Jesús llote. Jiae rafuedo iena lloñede.

<sup>35</sup>Jusiñamui facaina lloraima micori  
ieno jaie cuega:

Jusiñamui llote: “Jiae isoide  
rafuedo cominimo lloitice.  
Comini iea uiñoñega rafuena lloitice.  
Enirue finua facaisemona jaca bu  
ieno uiñoñede.

Birui naimaci uiñollena, iena  
lloitice”.

**Jesús trigo motomo riga  
raiticiaina llofua rafue**

<sup>36</sup>Comini jino fainonocaida, Jesús ie  
risoilla jofomo abido jaide. Ie  
llofueoicaigano naimiemo llotimaci:

—Iena raise caí uiñollena, trigo  
motomo riga raiticiai rafuena caimo  
llono.

<sup>37</sup>Uai ote:

—Mare iduai judaidimiedi cue.  
Jusiñamui rafuena lloitice. <sup>38</sup>Naie illidi  
nana comini. Mare iduaidi Jusiñamuimo  
duide comini. Raiticiaidi Taifemo duide  
comini. <sup>39</sup>Naie maraiñede iduai  
judaidimiedi Taife. Ua facaisesdi cue  
abido bille facaise. Trigo otinodi  
Jusiñamui jaienisa. Trigodi cuena  
iñotino. <sup>40</sup>Jobaillena raiticiai ofitaja  
isoi, ico abido cue bia, daje isoi iite.  
<sup>41</sup>Cue jaienisaina oreataiticue, nana  
jeacinona finoraini diese ofitallena, cue  
illanomona iraimo dotallena.

<sup>42</sup>Nainomo eo duere sefuillacoma,  
eeitimaci. Subicaitimaci. <sup>43</sup>Iemei jitoma  
lligaiñua isoi, Jusiñamui sedajanomo  
naimiena iñotinodi marena  
bairenitimaci. Omoi jeforena jira, raise  
fueollena, cue lluamo cacarei. Bie isoi  
omoi duere sefuiñellena, cue lluana  
iño.

**Jesúdi eniruemo isiruiga  
reica rana llofua rafue**

<sup>44</sup>Jesús llote:

—Jusiñamui dibeimo comini jailla  
rafuena lloitice. Jiae uaido iena  
omoimo lloitice. Eniruemo isiruiga  
raifide ra bu baia, ie nama jai iñena jira,  
naie eniruena uainino ibaacade, naie ra  
ollena. Ucube ollena, naie rari iobilla  
jira, nana naimiemo ite raruiaina  
fecaite. Iemei eniruena ibaite. Ie isoide.

Jusiñamui illanomo omoi illena, jiae rafue uanona jaiñeno. Dani Jusiñamui rafuena uanona jai. Dani iemo omoi comeciaina faca.

### Perlas railla rafue

<sup>45</sup>Jesús llote:

—Jusiñamui dibeimo comini jailla rafuena lloitice. Iena omoi raise uiñollena, perlas railla rana ibaraimana lloitice. Eo mare perlas iballena jenocabide. <sup>46</sup>Eo raifide perla naimie baia, naie perlana iballena, nana ie raruiaina feacite. Ie isoide. Jusiñamui ie cominina sedaacaja rafuena omoi cacaja jira, iena ocana jai.

### Jesús lloijina ñaia rafue

<sup>47</sup>Jesús llote:

—Jusiñamui dibeimo comini jailla rafuena lloitice. Iena omoi raise uiñollena, lloijina lloitice. Joraimo lloijina comini faianona, naga isoide llisiaina otimaci.

<sup>48</sup>Ari sonua mei, mare llisiai diese fetodimaci. Maraiñede llisiai diese oni faitimaci. <sup>49</sup>Ie isoide. Ico abido cue bia, iese iiite. Jusiñamuina iinotonomona naimiena iinoñedino diese oni fetollena, Jusiñamui jaenísaí biitimaci. <sup>50</sup>Iemei iraimo Jusiñamuina iinoñedinona dotaitimaci. Nainomo eo duere sefuiłamona eeitimaci. Subicaitimaci.

### Jesús llofueoicaiganodi mare rafuena jai uiñua rafue

<sup>51</sup>Ie llofueoicaiganomo Jesús jicanote:

—¿Nana cue lluana cacadomoi?

Uai otimaci:

—Jii, nana cacadicai.

<sup>52</sup>Naimacimo llote:

—Ie jofomo comini bia, naimacina raise nafuellena, naimacina caimare itatallena, jofo nama ie mare raruiaimona naimaci jitaila ra naimacimo fecade. Comini comeciaina llotice. Jusiñamui facaina

lloraini micoriai llogacinona uiñotomoi. Cuemona Jusiñamui ie cominina sedaja rafuena fueocana jiai jai jaidomoi. Comini comeciaina caimare itatallena, birui llofueredomoi.

### Nazaretmo Jesús illa rafue

(Mr. 6.1-6; Lc. 4.16-30)

<sup>53</sup>Naie rafuena Jesús llua mei, nainomona Nazaretmo jaide. <sup>54</sup>Ie eniruemo rillanona, Nazaretmo ite ofiracomo llofuite. Naiemona cominidi raijicallamona raitimaci:

—¿Niese naimiedi eo abina uiñote? ¿Niese siño rafuena naimiedi finode? Naimiedi jamai bue isoidimie. <sup>55</sup>Naimie amederaima jito. Naimie eidi María. Naimie amatiaidi Jacobo, José, Simón, Judas. <sup>56</sup>Naimie miriñotiaidi cai motomo jiai ite. Naimaci diga nagarui nabairiticai. Naimieori cai nabairicabilla. Ie jira, ¿ninena ie siño uaina ote?

<sup>57</sup>“Cai comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie risoilla jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina iinoñedomoi.

<sup>58</sup>Naimie uaina naimaci iinoñena jira, Jesús ailluena siño rafue finoñede.

### Juan Bautista micori fiodailla rafue

(Mr. 6.14-29; Lc. 9.7-9)

**14** <sup>1</sup>Naie facaiseconi Herodes railla gobernador Jesús mamecina cascade. <sup>2</sup>Naimie ecimo majiuidinomo llote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

<sup>3-4</sup>Iese raite, Herodes Juan micorina navui meinetaja jira. Juan Bautista micorina nia meinetañenia, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluana gaiñenano, naimiema duere finode. Herodes Juan micorina gaitatajanona, cárcelmo jonetade. <sup>5</sup>Naimie micorina meinetaacade; iadedi Herodes dinena cominina jaciruite. Juan micoridi Jusiñamui facaina lloraimana naimaci raillanona, naimie micorina jaciruite. <sup>6</sup>Iemei Herodes cumpleaños ie rafuena finode. Nainomo jiae cominina uaidote. Rafuemo Herodías jisa naimaci uicomu saillamona, Herodena iobitade. <sup>7</sup>Ie jira naiñaiñomo llote:

—Nie isoide rana o jitaiadeti, omo iiticue. Illaima uai cuemo illa jira, iena ua finoiticue.

<sup>8</sup>Naiñaiño ei naiñaiñomo lluanona, naiñaiño uai ote:

—Juan Bautista ifogi bandejamo jonecaida, cuemo ine.

<sup>9</sup>Iena cacajano, naimie sunaite; iadedi naimie jino ie llua uaina jira, nainomo naimie uaidogano jiai jai cacaja jira, Juan micorina meinetajana llote. <sup>10</sup>Ie lloga uaina finollena, cárcelmo soldadona oredé. Nainomo Juan micori ifogina jaitade. <sup>11</sup>Bandejamo naimie micori ifogi jonecaida, soldado atiano, Herodíasjisamo fecade. Ieconi ie eimo fecade. <sup>12</sup>Iena fidianona, Juan micori llofueoicaigano naimie micori abina uaibitimaci. Iena naimaci raia mei, Jesúmo lluaidimaci.

**Jesús cinco mil iiñiaina ecaja rafue**  
(Mr. 6.30-44; Lc. 9.10-17; Jn. 6.1-14)

<sup>13</sup>Juan micori meiniana Jesús fidiano, nainomona comini iñenanomo ie

llofueoicaigano diga botedo jaide; iadedi naimie jaillana comini fidiano, naimiema racadimaci. Diga comini illanuaimona eillido bitimaci.

<sup>14</sup>Eniruemo Jesús sijiiia, ailluena cominina dafaifide. Naimacina ciuanona, naimacina duenallanona, duidinona jillotate. <sup>15</sup>Jitoma ana itemo, ie llofueoicaigano naimie díne lluaibitimaci. Raitimaci:

—Jofue bene iñede. Jaca buedi iñede. Jai navuiacade. Cominina mai abido oreta. Ianori ite nairaímo naimaci guille ollena, naimacina oreta.

<sup>16</sup>Uai ote:

—Naimacina oretañeiticue.  
Naimacina omoi eca.

<sup>17</sup>Uai onaisite:

—Dani caimo ite cinco llomenico, mena lliciai diga.

<sup>18</sup>Uai ote:

—Iena cuemo ati. <sup>19</sup>Raitie illanomo comini ana raillesa llono —raite.

Naie cinco llomenicona naie mena lliciai diga uanona, monamo erauillañona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. <sup>20</sup>Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci. <sup>21</sup>Cinco mil iiñiaina diese guitimaci. Naimaci aitiae jiai guitimaci. Naimaci uruiai jiai guitimaci.

**Jesús jinui emododo  
macarilla rafue**

(Mr. 6.45-52; Jn. 6.16-21)

<sup>22</sup>Guilla mei, botedo ie llofueoicaigano ruica díne jaillena llote. Naie facaiseconi naimie cominina nia facadote. <sup>23</sup>Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite. <sup>24</sup>Naie facaiseconi ie llofueoicaigano

jurai motomo itimaci. Aifi billamona, eo bagode. Naimacimo riire aifi rilla jira, riire jaitimaci. <sup>25</sup>Nia monaiñedemo, jinui emododo naimaci dine Jesús bite.

<sup>26</sup>Naimiena naimaci cianoná, jacinaillamona, raitimaci:

—¿Bu joreño caimo billana ciódicai?

—Jacinailamona curiidimaci. <sup>27</sup>Naie dacaiño Jesús naimacimo llote:

—Omoi joreñonicaiñeno. Cuesa. Jaciruiñeno.

<sup>28</sup>Pedro uai ote:

—Uanai cai Namadio. O díne cue bilesa cuemo llono.

<sup>29</sup>Jesús uai ote:

—Cue díne bi. —Je jira botemoná jinui emodo Jesús díne Pedro macarite; <sup>30</sup>iadedi aifi billana naimie cianoná, jacinaite. Jínuimo anabaiacade. Ado curioide:

—Nama, cuena cano.

<sup>31</sup>Jesús ie onollí oní ñuitajanona, naimiena llínuanona, raite:

—Eo janore cue uaina iinotio. ¿Bue ñellena eo iinoñedio? Cuena iinotiodena, jinui emododo cue díne niadedi ridio.

<sup>32</sup>Botemo a iaimaiai jaillamona, ie facaise aifi lliicaide. <sup>33</sup>Ie jira botemo itíno Jesúmo iobillacínona fecadimaci.

—Odi ua Jusiñamui Jitodio  
—raitimaci.

**Jesúdi duidinona Genesaret  
eniruemo jillotaja rafue**  
(Mr. 6.53-56)

<sup>34</sup>Ruica díne jaillanona, Genesaret railla eniruemo ridimaci. <sup>35</sup>Jestúna nainomo itíno uiñuanona, naimie díne duidinona atillena, nana nairaimo jiae cominina oredimaci. <sup>36</sup>Naimie díne billanona, dani ie iniroi fuedamo jutadallená naimiemo jicanotimaci. “Naimie iniroimo cai jutadallemona jilloiticai” raillamo comeciaina facadimaci. Nana jutadate diese jillodimaci.

**Jesúdi comini comeciaina**

**ñaia rafue**

(Mr. 7.1-23)

**15** <sup>1</sup>Jerusalémona fariseuai comini Jesús díne bitimaci. Moisés micori llogacinona llofueraini jiai bitimaci. <sup>2</sup>Naimiemo jicanotimaci:

—¿Bue ñellena o llofueoicaigano cai einamaci rafuedo jaiñedimaci? Naimaci guiacania, naimaci onollí cai einamaci llua isoi raise jocoñedimaci. Ie jira cai abimo jeacino finodomoi.

<sup>3</sup>Jesús uai ote:

—¿Bue ñellena nana Jusiñamui llogacinodo jaiñedomoi? Omoi einamaci llogacinodo jaidomoi; iadedi nana Jusiñamui llogacinodo raise jaiñedomoi.

<sup>4</sup>Jusiñamui jaie llote: “O moo uai iinuanona, naimiena cano. O ei uai iinuanona, naiñaiñona cano. Ie moori jeare ñaitimie, ie eiri jeare ñaitimie meinelle”. <sup>5</sup>Iese Jusiñamui llote; iadedi omoi einamaci llotimaci: “Jusiñamuimo cai ucubena cai fecajamona, cai moona, cai eina jai canonidicai”. <sup>6</sup>Iese omoi finocabilla jira, omoi einamaci llogacinodo omoi jaillamona, Jusiñamui uaina jamaidomoi. <sup>7</sup>Mareuidinona abi caitauqidinodomoi. Isañas micori omoina jaie raise llote. Naimiedi Jusiñamui lluana cuete:

<sup>8</sup>Bimaci naimaci uaido marecinona cuemo llote; iadedi cue rafuedo raise jaiacañedimaci.

“Ona isiruiticai” llotimaci. “Ona sedadicali” llotimaci.

Jamai ñaitimaci. Naimaci comecia cue dibeimo raise iñede.

<sup>9</sup>Cue uai itena, jamai comini lluacínona naimaci llofuecabilla jira, taínona cuena sedadimaci.

<sup>10</sup>Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uiñollena, cue lluamo cacarei.<sup>11</sup> Omoi einamací isoi omoi guíñenia, naimaci isoi omoi onollina omoi jocoñenia, omoi comeciaina jearetañedomoi. Omoi guigamona, omoi onollina jocuamona, Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciai jearena jira, jeacinona finocabidomoi.

<sup>12</sup>Ie llofueicaigano naimiemo lluañibitimaci:

—O llua muidona, fairseuai cominina icidio.

<sup>13</sup>Naimie dinena uai ote:

—Dama ite. Nana cue Moomona oñega rafuedi jai ieconi duite. Naimaci rafue cue Moomona ofenia, ja muidomo ieconi duite.<sup>14</sup> Naimacina fainonocai. Uanaicinona naimaci uiñoñena jira, uisinidino isoidimaci. Jiaimiena uisinidimie ifoia, dafomo uaidiaimai. Ie isoide. Uanaicinona fariseuai uiñoñena jira, uanaicinona llofuenidimaci. Uanaicinodo jañedimaci. Ja muidomo faifitimaci.

<sup>15</sup>Pedro naimiemo llote:

—Aillinano o llua caimo raise llono.

<sup>16</sup>Uai ote:

—¿Niese cue lluana jiai nia cacaíñedomoi?<sup>17</sup> Nie isoide ra guítomoina, omoi jebomo jaide. Ie mei omoi abiaimona jino bite;<sup>18</sup> iadedi omoi comeciaimo iticinomona jearedena ñaitomoi. Omoi comeciai jearena jira, jearede rafuena finocabidomoi.<sup>19</sup> Omoi comeciai jearena jira, jeare comeciaina facacabidomoi. Comena meinecabitomoi. Omoi aiñede riño diga icabitomoi. Omoi iniñede iima diga icabitomoi. Fiiricabitomoi. Tainona llogiricabitomoi. Jiae comini joreñona jeare ñaicabitomoi.<sup>20</sup> Bie isoidicinuai omoi comeciaimo illa jira, jearede rafuena finocabidomoi; iadedi omoi

einamací llua isoi, omoi onolli jocoñenamona jeacino comuiñede.

**Jesúdi judío iñaiñoñediñaiñona  
jillotaja rafue  
(Mr. 7.24-30)**

<sup>21</sup>Genesaret railla eniruemona ie llofueicaigano diga Jesús jaillanona, Tiro railla eniruemo jaide. Sidón railla eniruemo jiai jaide.<sup>22</sup> Le facaiseconi naie eniruemona judíuñediñaiñodi billanona, raite:

—Maestro, David micori jitodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

<sup>23</sup>Jesús uai oñede. Ie jira ie llofueicaigano naimie dñe billanona, duere llote:

—Naiñaiñona abido ie jofomo oreta. Caimo duere jicanuaibitesa.

<sup>24</sup>Jesús uai ote:

—Faificana jaillana naimaci jai jailla jira, daní cai judíuai cominimo cue Moo cuena oretate. Naimiedi judíuñediñaiñomo cuena oretañede.

<sup>25</sup>Ie facaise naimie dñe naiñaiño billanona, naimiemo iobillacina fecallena, caiñici ifodo ana rainada raite:

—Maestro, cuena cano.

<sup>26</sup>Judíuñedinona naimie canoñenana naiñaiño uiñollena, naiñaiñomo Jesús llote:

—Uruiai guillamona jiconiaina ecadicaidenai, maraiñede.

<sup>27</sup>Naiñaiño dinena uai ote:

—Jii, maestro; iadedi jiconiaidi imaci nama guillamona fiebide guillemona guitimaci. —Iese llote; ia jiae rafuemo comeciná facade. Uruiaina llote; iadedi judíuaimo comeciná facade. Jiconiaina llote; ia judíuñedinomo jiai comeciná facade. Comeciná facade: “O cominimo o rafue duide; ia cai Namana o illa jira, nibai o rafue caimo janore duide”.

<sup>28</sup>Jesús uai ote:

—Cue uaina o iinua jira, o jitaila rafuena finoiticue. —Ieconi naiñaiño jisa jillode. Janaba naiñaiñomona oni jaide.

**Jesús ailluena duidinona  
jillotaja rafue**

<sup>29</sup>Nainomona Jesús bai jaillanona, Galilea railla jorai fuedo jaide. Iemei aneduaimo jaillanona, nainomo ana raide. Nainomo rilla mei, <sup>30</sup>ailluena comini naimie dine bitimaci. Ailluena duidinona atidimaci. Nuja-ñujacaida macaritina, onollina idisaruaidinona, uisiniñinona, uainidinona atidimaci. Diga duidinona naimie dine atidimaci. Iemei naimacina jillotate. <sup>31</sup>Ailli uainidino jai ñaiana cacajamona, ailli onollina idisaruaidino onollí jai marenana illana ciuamona, ailli ñuja-ñujacaidino macaritino jai marena macarillana ciuamona, ailli uisiniñidino jai ciuana ciuamona, nainomo ite comini eo rajjicaidimaci. Cai Jusiñamuimo iobillacina fecadimaci.

**Jesúdi cuatro mil  
iiniaina ecaja rafue**

(Mr. 8.1-10)

<sup>32</sup>Jesús ie llofueoicaigano naimie dine uaiduanona, raite:

—Bie comini darui amani bene cue diga illa jira, naimacimo guille jai iñede. Naimacina aimeri oretaiacaiñeddicue, naisomo naimaci baii raillanona. Naimacina cue duenalla jira, naimacina canoacadicue.

<sup>33</sup>Jicanotimaci:

—¿Ninomona guille oiticai, naimacina cai ecallená? Ailluena comini ite; iadedi jofue iñenanomo iticai.

<sup>34</sup>Jesús jicanote:

—¿Niga llomenico omoimo ite?  
Uai otimaci:

—Siete. Janorede llicisiriai caimo jiaite.

<sup>35</sup>Comini ana raillena Jesús llote.

<sup>36</sup>Naie llomenico llicisiriai diga uanona, Jusiñamuimo iobillacino fecade.

Tailluanona, ie llofueoicaiganomo fecade, naie cominimo fecallena. <sup>37</sup>Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. <sup>38</sup>Nainomo cuatro mil iñiai guitimaci. Naimaci ainiai jiai guitimaci. Naimaci uruiai jiai guitimaci. <sup>39</sup>Iemei cominina naimaci jofuemo orede. Naimacina oretaja mei, botedo Magdala railla eniruemo Jesús jaide.

**Fariseuái comini Jesúmo siño  
rafuena finuana jicanuano  
billa rafue**

(Mr. 8.11-13; Lc. 12.54-56)

**16** <sup>1</sup>Dajerie fariseuái comini Jesús dine bitimaci. Naimiena facacillena, dajerie saduceuái comini jiai bitimaci. Siño rafuena naimie finuana jicaacadimaci. Iena naimie finoñedena, naimie ie llua isoi iñenana uiñoñitimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

<sup>2</sup>Jesús uai ote:

—Jitoma sojicaidemo, mona jiairenia, raitomoi: “Ico are maremonanite”. <sup>3</sup>Jiai raitomoi: “Jitíramo mona jiairenia, ja noci deite”. Monamo omoi eruällamona, marena monaillana uiñotomoi; iadedi birui cue finoca rafuena raise uiñoñacaiñedomoi. Omoi motomo birui suide rafuena raise cacaiñedomoi. Abina uiñotinona abi caitadomoi. <sup>4</sup>Jeacinona finocabidomoi. Jusiñamui dibeimo raise iacaiñedomoi. Siño rafuena finoñeiticue. Jonás micorimo jaie suide rafuena uiñotomoi.

Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiai jilloiticue. —Ie llua mei, naimacimona Jesú斯 ie llofueoicaigano diga oni jaide.

**Jesús siritate rana llofua rafue**  
(Mr. 8.14-21)

<sup>5</sup>Ruica dine naimaci rillanona, ie llofueoicaigano llomenicona feillana ubiñotimaci. <sup>6</sup>Iena naimie uiñuamona, naimacimo Jesú斯 llote:

—Fariseuai siritate ramona abina rairui. Saduceuai siritate ramona abina rairui. —Iese Jesú斯 llote; iadedi naimaci llofuiaconomona abi rairuillena ñaite. <sup>7</sup>Jesú斯 iese llua jira, iena naimaci raise cacaíñena jira, dani coniniri siadotimaci:

—Llomenicona cai atiñena jira, caímo iese llote.

<sup>8</sup>Naimaci siaduana Jesú斯 uiñua jira, naimie lluana naimaci nia raise cacaíñena jira, naimacimo llote:

—Cue uaina nia raise iiñoñedomoi. Omoina canoredicue. ¿Bue ñellena dani omoi llomenico iñenana siadotomo? <sup>9</sup>¿Niese iiñoñedomo? ¿Niese cue navui siño finoca rafuemo comeciaina facañedomo? Navui cinco mil iiñiai cinco diganicodemo guitimaci. Monillamona, guigamona fiebillamona, doce cirigaiamo iraidomoi. <sup>10</sup>Jiaicaiño cuatro mil iiñiai siete diganicodemona guitimaci. Monillamona guigamona fiebillamona, siete cirigaiamo iraidomoi. <sup>11</sup>Omoina cue ecallena, ¿niese cuena birui iiñoñedomo? Llomenicona aillí ñaiñedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

<sup>12</sup>Ie facaise naimie lluana jai cacadímaci. Llomenico siritate rana naimie ñaiñede; iadedi fariseui llofuiaconomona naimaci abina rairuillena ñaite. Saduceuai

llofuiaconomona naimaci abina rairuillena ñaite.

**Pedro Jesúna llua rafue**  
(Mr. 8.27-30; Lc. 9.18-21)

<sup>13</sup>Cesarea Filipo railla eniruemo Jesú斯 jaidemo, ie llofueoicaiganomo jicanote:

—¿Niese jiaie comini cuena raitimaci?

<sup>14</sup>Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloraima micoridio”.

<sup>15</sup>Jesú斯 dane jicanote:

—¿Niese omoi cuena raitomo?

<sup>16</sup>Pedro uai ote:

—Odi cai Jilloitaraimadio. Cristodio. Jusiñamui facaina lloraini micoriai o billena jaie llotimaci. Cai cajede Jusiñamui Jitodio.

<sup>17</sup>Jesú斯 dinena uai ote:

—Simón Pedro, Jonás jitodio. Marena llotio. Comini ona iena uiñotañede; iadedi cue Moo Jusiñamui ona iena uiñotade. <sup>18</sup>Pedro, o comechina uiñoticue. Cuena como o lloga uaina meidoñetio. Bie rafuena jiaie cominimo o lluamona, jiai iiñoñimaci. Cuena iiñuamona, cue cominina jaitimaci. Cue dibelmo iiñedino iena itatanidimaci.

<sup>19</sup>Ailluena cominimo Jusiñamui ie cominina jailla rafuena nano lloraimana jaitio. O lluacinodo jaitino cue cominina jaitimaci. O lluacinodo jaiñeitino cue cominina jaiñeitimaci

<sup>20</sup>Iena llua mei, ie llofueoicaiganona rairuide:

—Cue Cristonana bumó nia lloñeno.

**Jesú斯 ie fiodaillena llofua rafue**  
(Mr. 8.31—9.1; Lc. 9.22-27)

<sup>21</sup>Naie facaisemona ie llofueoicaiganomo Jerusalémo naimie jaillena marefodo llote:

—Nainomo cai judíuai illaicomini cuena eo duere finoitimaci. Cuena meineitimaci; iadedi darui amani illanona, fiodaillamona jilloiticue.

<sup>22</sup>Pedro dinena lletade:

—Nama, ¡Jusiñamui iena jitaiñede! Bie isoide rafue omo suiñeite.  
<sup>23</sup>Jesús jinafo díne naimiemo erodate. Raite:

—Cuemona oni jai. Iese ñaiñeno, Taife isoi o comeicina o facaja jira. Jusiñamui isoi cuemo comeicina facañedio. Comini isoi cuemo comeicina facadio. Iese o comeicina facañeno.

<sup>24</sup>Ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaijallamona, duere sefuicana jaite. Nibai naiemona fiodaite. Bu iese jaiacania, cue dibeimo naimie iite.  
<sup>25</sup>Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaia, jaca faifiñeite. <sup>26</sup>Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿niese cue Moo díne riite? Nainomo naimie riñeno faifite. <sup>27</sup>Cue jaienisaí diga cue Moo dinena monamona ico biiticue. Cue Moo uai cuemo illanona, ebirena biiticue. Nagamie imaci finoca rafue diese cue iba ollena biiticue. Cue cominiñedinona duere finoiticue.

<sup>28</sup>Uanaicinona omoimo lloitue. Omoimona dajerie nia fiodañeitomoimo, illaimana cue bairellena cioitomoí.

**Jesús abi meidocaila rafue**  
*(Mr. 9.2-13; Lc. 9.28-36)*

**17** <sup>1</sup>Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobona jiai uite. Jacobo ama, Juan,

jiai uite. Jiae llofueoicaiganona uiñede.

<sup>2</sup>Nainomo rilla mei, naimaci uicomio naimie abi meidocaide. Jitoma isoi naimie ueco bairecaide. Naimie iniroi naie dacaiño eo userecaide. <sup>3</sup>Naie facaise naimacimo Moisés micori joreño, Elías diga bairede. Elíadi Jusiñamui facaina jaie lloraima. Jesús diga ñaitiñaimaiai. <sup>4</sup>Jesúmo Pedro llote:

—Nama, bene cai illana mare. O jitata, daje amani bisaini finoiticue. Daje oue; jiae Moisés micori ie; jiae Elías ie.

<sup>5</sup>Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga Jito. Naimieri iobidicue. Naimie lluamo cacareillanona, iena iino —llote. <sup>6</sup>Jesús llofueoicaigana iena cacajanona, eo jaciruillanona, naimaci ueco dinena ana bitadatimaci. <sup>7</sup>Jesús naimaci díne billano, naimacina jetajanona, raite:

—Mai jaciruiñeno naidacai.

<sup>8</sup>Naimaci erorillamona, dama Jesúna ciodomaci. <sup>9</sup>Anedumona bitimacimo, naimacimo Jesús llote:

—Omoi ailli ciua rafuena bumolloñeno, cue fiodaillamona cue jillua dinori.

<sup>10</sup>Naimiemo llotimaci:

—Moisés micori llogacinona llofueraini birui raicabitimaci: “Elías raillamie dane biite. Ie mei cai Jilloitaraíma biite” raitimaci.

Jusiñamuimona o billana iñotimaci. Odi cai Jilloitaraímana iñotimaci. Odi cai Jilloitaraímadomo, ¿bue ñelli iese raitimaci?

<sup>11</sup>Uai ote:

—Raise iñotomoi. Elías isoidimie jai bite, nana Jusiñamui jitalla rafue raise llollena. Jusiñamui dibeimo naimaci illena, comini imaci comeicia meiduana llote. <sup>12</sup>Ero, naimie jai bite; iadedi bie

comini naimiena raise uiñoñedimaci. Naimaci jitaila jira, naimiena jai meineticaci. Ie isoide. Naimacimona duere sefuiticue. Monamona biticue, iimana cue jaillena; iadedi duere sefuiticue.

<sup>13</sup>Ie muidona Jesús llofueoicaigano naimiedi Juan Bautista micorina ñaiana jai uiñotimaci.

**Jesúdi Janaba anamo itimien  
jillotaja rafue**  
(Mr. 9.14-29; Lc. 9.37-43)

<sup>14</sup>Ie jiaie llofueoicaigano dine Jesús abido ria, nainomo ailluena comini itimacimo ride. Jesús dine damie billanona, naimiena raise uaiduanona, caiñici ifodo rainadacaida raite:

<sup>15</sup>—Maestro, cue jitona duenai. Janaba anamo naimie ite. Iemonia naillicabide. Duere sefuide. Uai-uaicabide. Jiaicaiñodedi iraimo uaillanona, uside. Jinuimo jiai uaillanona, niadeti corobaite.

<sup>16</sup>Naimiena jilloitallena o llofueoicaigano dine naimiena atidicue; iadedi naimiena jillotanidimaci.

<sup>17</sup>Iena cacajanona, Jesús ie llofueoicaiganomo llote:

—Cue uai siñonana nia iinoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi iinollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

<sup>18</sup>Naimiena atiamona, Jesús naimiemo Janaba illana uiñote. Janabana Jesús lletaja jira, naie uruemonia Janaba oni jaide. Ieconi naie urue jillode.

<sup>19</sup>Ie mei ie llofueoicaigano Jesúmo anado jicanotimaci:

—¿Bue ñellena Janabana oni oretanidicai?

<sup>20</sup>Uai ote:

—Raise nia omoi iinoñena jira, uanaicinona omoimo lloitue. Janaba oni oretallena, cue uai navui omoimo iticue. Birui raise cuena omoi iinoñenia, bie Janaba oni oretanidomoi.

Jusiñamuina eo janore iinotomoidena, diga rana finodomoi. “Oni bai jai” bie anedumo llotomoidena, omoina naimie canuamona, bie anedu oni lliai bai jaite. Jusiñamuina omoi iinoia, naga rana finoredomoi. <sup>21</sup>Jusiñamuimo omoi comeciaina facallena omoi guíñenamona, Jusiñamui diga omoi ñaianamona, bie isoide Janabana oni oretaredomoi.

**Jesús ie fiodaillena  
dane llofuia rafue**  
(Mr. 9.30-32; Lc. 9.43-45)

<sup>22</sup>Galileamo ie llofueoicaigano diga danomo itemo, Jesús naimacimo llote:

—Monamona billanona, iimana jaidicue. Jusiñamui jitaila jira, cuena jiaie comini gaitajanona, illaicominimo fecaitimaci.

<sup>23</sup>Naie illaicominí cuena meineitimaci; iadeti darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

**Jesúmo Jusiñamui jofo facaina  
damie ibataja rafue**

<sup>24</sup>Capernaumo naimaci rilla mei, Jusiñamui jofo ucube oraini Pedro dine jicanuaibite:

—Moisés micori llua isoi, ¿o llofueraima Jusiñamui jofomo ucubena fecacabide?

<sup>25</sup>Pedro dinena uai ote:

—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús dinena naimiemo jicanote:

—Simón Pedro, ¿niece o comeicina raitio? ¿Bumona illaicominidi imaci ucubena ocabitimaci? Imaci

jitoniaimona ocabiñedimaci; ia naimacimo duide cominimona otimaci.

<sup>26</sup>Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitoniaina ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofo facaina naimie cuena ibatañede; <sup>27</sup>iadedi Jusiñamui jofo ucube orainina coco iciñellesa, ucubena jenuai. Joraimo aimajaitiosa jai. Nano o olle llisiai fuena jibui. Nainomo ucubena batio. Iena uanona, Jusiñamui jofomo coco facaina feca. —Pedro iena finode.

**Jesús ie llofueoicaigano moto imiena ille rafue**  
(Mr. 9.33-37; Lc. 9.46-48)

**18** <sup>1</sup>Naie facaiseconi naimie dine ie llofueoicaigano jicanuabitimaci:

—Jusiñamui ie cominina sedajanomo ico cai ia, ¿bu cai moto imiena ille?

<sup>2</sup>Iena cacajanona, Jesús daje urue uaiduanona, naimaci motomo jonete.

<sup>3</sup>Uai ote:

—Uanaicinona omoimo lloitice. Jusiñamui dibeimo omoi illena, jeacinona omoi fañonocaiñenia, bie urue isoi omoi moto imieñedimiena illanona, Jusiñamui sedajanomo iñeitomoi. Cue cominina omoi ia, bie urue isoi iitomoi. <sup>4</sup>Bie urue isoi abi iedoñedimiedi Jusiñamui ie cominina sedajanomo imie moto naimiena ille. <sup>5</sup>Bie isoidimie cuemo duillamona, naimiena feiñotimiedi cuena jai feiñote; <sup>6</sup>iadedi cuena iiñotimiena jeacinona finotaiacadimie iena finoñellena, jeacinona finotaiacadimie címaiomo aillue nosfici maianona joraimo corobaillena, naimiena dotacadena, cuemonia mare.

**Jesúdi jeacinona finoñenana llofuia rafue**  
(Mr. 9.42-48; Lc. 17.1-2)

<sup>7</sup>Jesús llote:

—Ramo faitino duere sefuillesa. Diga ramo omoi faicana uitinomo riitomoi; iadedi Jusiñamui omoi ramo faitimienia duere finoite. <sup>8-9</sup>Biená ñaiticue. Nie isoide rafue omoina jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitallamona jeacino finodomoi. Omoi abina omoi namatañeniadedi, omoi onollí jaita. Omoi uisina juicono. Iemonia jeacinona finoñellena, Jusiñamui dine daje onollí diga, daje eilli diga, daje uisi diga riitomoi; ia jeacinona omoi finoia, iraimo jaitomoi. Omoi começina ñaiticue. Omoi abina omoi raise namatallena, omoi começi nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iraimo omoi jaiñellena, jeacino finoñeno.

**Jesúdi naimiena iiñotinomona damie faifillana jitaiñena rafue**  
(Lc. 15.3-7)

<sup>10</sup>Jesús llote:

—Urue isoi omoi illena como lloticue. Iena dane lloitice. Cue Moo naimacina uiñua jira, bie urue isoidinona jamaiñocaiñeno. Monamo cue Moo ecimo naimaci jaienisai jaca ite, naimacina canollena. <sup>11</sup>Jusiñamuimona cue billanona, naimiena iiñoñedínona naimaci jeacinomona jilloitallena biticue. <sup>12</sup>Ero, omoimo iena jiaie rafuedo lloitice. Damiemo cien diga toica llauda ite. Naiemonia daje feiraite. Iena fafiñellena, jiaie llaudaiaína fainonocaida, iena jenuaite. <sup>13</sup>Iena baillanona, ieri iobite. Baillari oni

jaiñedinori baifemo iobite. <sup>14</sup>Ie isoide. Jusiñamui naimiena iinotinomona damie faifillana jitaiñede. Ie jira naimacina jeacinona finotañeno.

**Jesús omoi ecimo itimie omoina  
jeare finuana llofua rafue**  
(Lc. 17.3)

<sup>15</sup>Jesús nia llote:

—O ecimo itimie ona jeare finoia, naimie dine iena lluai. Daimaiai iena omico llono. O uai naimie fairioia, naimie o dibeimo jai iite. <sup>16</sup>O uai naimie fairioñenia, jiai menamiena uiño, o lluamo iaimaiai cacareillesa. <sup>17</sup>O uai naimie fairioñenia, omoi ofiracomo bicabitiñomo iena llono. Naimaci uai naimie fairioñenia, Jusiñamuina iññoñedimienna omoi nabaiñena isoi, Moisés llogacinodo raise jaiñedino omoi nabaiñena isoi, naimiena nabaiñeno. Omoi ofiracomo naimiena feiñoñeno. <sup>18</sup>Iese omoi finoia, omoi comeciai daje isoi lloillamona, Jusiñamuimona mare.

<sup>19</sup>Omoimo nia lloitice. Daje isoi comeicina cue Moo Jusiñamuimo jicallena menamaiiai facajamona, cue Moomo iaimaiai jianona, cue Moo iaimaiai jitaille rafuena finoite. <sup>20</sup>Menamie cue dibeimo illamona, damie amani cue dibeimo illamona, naimaci motomo iticue.

<sup>21</sup>Pedro naimiemo jicanuaibite:

—Nama, cue ecimo itimie cuena jeare finoia, ¿niga icaiño ibana cue oñeno iena feitaiticue? Nibai siete digacaiño.

<sup>22</sup>Jesús dinena uai ote:

—“Nibai siete digacaiño” raitio. Ona jeare finodimie ie finoca rafuena naga icaiño feita. Iena omoi raise uiñollena, bie rafuena lloitice.

<sup>23-24</sup>Jusiñamui ie dibeimo itinona iese sedaite: Daje nairai illaimadi ie majjirainina uaidote, naimaci cuentas iballena. Damie eo debebe. Diez mil

ucubena debebe. <sup>25</sup>Naimie ucube iñena jira, naie illaimadi ie cuenta iballena, naimie ai, ie uruiai diga, nana ie raruiai diga, fecallena llote. <sup>26</sup>Iena cacajano, ie illaima uicomocaiñici ifodo raita duere jicade: “Nama, dama ite. Fecuisse omo ibaiticue”. <sup>27</sup>Naimie duenaillamona, naie illaima llote: “Ibatañeiticue. Cuemo jai debeñedio. Mai jai”. <sup>28</sup>Ie mei naimie jaide. Bai jaillanona, jiae maijiraima diga dafaifide. Jai debeñedimiemo janore debebe. Cien ucubena debebe. Jai debeñedimie dinena ie cimaiona llinuana llote: “O debia cuemo mai iba”. <sup>29</sup>Ie jira debedimie caiñici ifodo ana rainadacaída, duere jicade: “Ucube cuemo iñede; iadedi cuena duenai. Fecuisse omo ibaiticue”. <sup>30</sup>Uai ote: “Ja raire jitaidicue”. Naimiena duenaiñena jira, cárcelmo naimiena jonetade, ie cuenta iballe dinori. <sup>31</sup>Naimie nabaiñiai iena fidianona, sunaitimaci. Ie jira naimaci illaima dine nana naie rafuena lluaidimaci. <sup>32</sup>Naie illaimadi nano debedimieno abido uaiduano, naimiemo llote: “Maraiñedio. Navui o cuentana ibatañedicue, cuemo o duere jicanua jira. <sup>33</sup>¿Bue ñe o nabaina duenaiñedio, ona cue duenalla isoi?” <sup>34</sup>Icirillamona, naie illaima naimiena cárcelmo jonetade, nainomo duere sefuillena, nana ie cuenta iballe dinori. <sup>35</sup>Ie isoide. Cue Moo Jusiñamui omoina duere finoite, omoi comeciai jitallamona omoi ecimo itimie ie maraiñede finoca rafuena omoi feitañenia —llote.

**Jesús iima ie aina dotaja rafuena  
llofua rafue**  
(Mr. 10.1-12; Lc. 16.18)

**19** <sup>1</sup>Ie llofueoicaigano diga Galileamona jaillanona, Jordán railla ille ruica dibeimo Judeamo Jesús jaide. <sup>2</sup>Ailluena comini naimiena racadimaci Nainomo duidinona jillotate.

<sup>3</sup>Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Hima ie aina dotajana rairuidio?  
¿Nie isoide rafue muidona damie ie aina dotarede?

<sup>4</sup>Jesús dinena uai ote:

—Moisés micori jaie cuete: “Enirue finua facaiseconi Jesiñamuidi come iaímaiaina finode. Hmana finode. Riñona jiai finode”. <sup>5</sup>Le jira Jusiñamuidi jaie llote: “Ie aí diga illena, iima ie moona fainonocaite. Ie eina jiai fainonocaite. Ie aí diga illamona, menade comedí daamiena jai jaide” llote. <sup>6</sup>Menade come jai damiena jai ite. Jusiñamui iese iaímaiaina itataja jira, iima ie aina dotañellesa. Riño ie inina dotañellesa.

<sup>7</sup>Dane jicanotimaci:

—¿Bue ñe Moisés micori cuete: “Hima ie aina dotaacanía, dotalle rabena nano cueite. Ie mei naiñaiñona dotaite”?

<sup>8</sup>Jesús uai ote:

—Jusiñamui uaina raise omoi iinoñena jira, Moisés micori iima ie aina dotajana rairuiñede; iadedi nano dofocni iese iñede. <sup>9</sup>Jiaie riño diga naimie illena, ie aina bu dotaia, jiaie iima diga naiñaiño iñenia, naimiedi jeacinona jai finode. Ie aina dotajana rairuidicue.

<sup>10</sup>Naimiemo ie llofueoicaigano dinena llotimaci:

—Iese ia, cai jitaillamona aina jamai cai dotanina jira, damamei ainidicai.

<sup>11</sup>Naimacimo Jesús llote:

—Nana comini omoi como lluacinodo jainidimaci. Dani Jusiñamuina jitaídino iedo jairedimaci. <sup>12</sup>Dajerie naimaci jeiciamona aireiacaiñedimaci. Dajerie naimaci abina diamona aireiacaiñedimaci. Dajerie Jusiñamuina eo sedaacanano aireiacaiñedimaci.

Jesúdi naimie dine uruiai  
billana jitailla rafue  
(Mr. 10.13-16; Lc. 18.15-17)

<sup>13</sup>Jesús dine comini naimaci jesanidena atisite. Ie onollí naimacimo naimie joniamona, naimaci facaina naimie Moo diga naimie ñaillena atisite. “Naimacina raise cano” ie Moomo lollena jitaidimaci. Ie llofueoicaigano iena rairuidimaci; <sup>14</sup>iadedi Jesús raite:

—Uruiai cue dine billesa. Naimacina rairuiñeno. Cuena bie isoide iñotinodi Jusiñamui ie cominina sedajanomo jainaiaidimaci.

<sup>15</sup>Ie jira ie onollí naimacimo jonete. Naimie facaina Jusiñamui diga ñaite, naimaci marena illena. Ie mei ie llofueoicaigano diga naimie oni jaide.

Ucuberedimie Jesús diga ñaia rafue

(Mr. 10.17-31; Lc. 18.18-30)

<sup>16</sup>Jesús oni jaillanona, conirue Jesús dine bite. Jicanote:

—Maestro, Jusiñamui diga cue jaca illena, ¿nie isoide mare rafuena finoiticue?

<sup>17</sup>Jesús dinena uai ote:

—¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaína iñocana jai.

<sup>18</sup>Uai ote:

—¿Nie llogacinuaína iñoiticue?

Jesús dinena uai ote:

—Comena meineñeno. O aiñede riño diga iñeno. Fiiñeno. Jaimiena o llogidoia, tainona lloñeno. <sup>19</sup>O moo uaina iño. O ei uaina iño. O abina o isiruilla isoi, nana cominina isiru.

<sup>20</sup>Naie conirue uai ote:

—Nana iena jai iñoticue. ¿Nie isoide rafuena nia finoiticue?

<sup>21</sup>Jesús dinena uai ote:

—Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuena o iinuamona, monamo ico jaca iitio. Cue llofuegamienda o illena, mai cue diga bi.

<sup>22</sup>Iena naimie cacajano, sunaite. Naimiemo eo ailluena ra illa jira, iena feacaacaiñede. <sup>23</sup>Jesús ie llofueoicaganomo llote:

—Uanaicinona omoimo lloitice. Ucuberedimiedi Jusiñamui cominina jaillena eo sefuiruite. <sup>24</sup>Iena nia lloitice. Igido ifodo camello jaca Jainide. Ie isoide. Ie ra isiruillamona, ucuberedimiedi Jusiñamui ie cominina jiai raise Jainide.

<sup>25</sup>Iena ie llofueoicaigano cacajano, Jusiñamui cominina ucuberedino raise Jainina jira, “¿Niese dueredinodicaídi Jusiñamui cominina jaiticai?” raillamo comeciaina facadimaci. Rajjicaillanona, raitimaci:

—Nana comini rana jitailla jira, buca jillobiti.

<sup>26</sup>Naimacimo eruallanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

<sup>27</sup>Pedro uai ote:

—Ero, o llua isoi nana cai rana fainonocaida, o diga jaicabidicai. ¿Niese Jusiñamuimona ibana feiñoiticaí?

<sup>28</sup>Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuajiai iiite, nainomona omoi judfuai doce nairaiaina omoi sedallenai. <sup>29</sup>Cuena naimie isiruillamona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia,

Jusiñamuimona ailluena ibana feiñoite. Monamo ico caimare iocire jaca iiite. Nainomo benomo baifemo iocire caimare iiite. <sup>30</sup>Jamai bue isoidomoi. Omoimona jiaino jamai bue isoñiedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

### Jesús Jusiñamui ie cominina sedaacana llua rafue

**20** <sup>1</sup>Jesús llote:  
 —Jusiñamui dibeimo comini jailla rafuena lloitice. Naimie cominina naimaci jaillamona, Jusiñamuimona nana naimie comini daje isoidimaci. Iena raise omoi uiñollena, bie rafuedo iena lloitice. Jitiramo daje patrón ie illimo majijillena, majijiuidinona jenuaide. <sup>2</sup>Dajeriena baillanona, “Omoimo daberie ibaiticue” llote. “Jee” raitimaci. Ieconi ie illimo majijillena, naimacina orede. <sup>3</sup>Jitoma nia oni daidemo, mercadomo naimie jiañona ciode. Jamai itimaci. <sup>4</sup>Ie jira naimacimo llote: “Cue illimo majijai. Raise ibaiticue” llote. <sup>5</sup>Ie mei jaidimaci. Jitoma naidai ia, jiañona ciuanona, naimacimo majijillena llote. Jitoma oni caidemo, jiañona ciuanona, naimacimo majijillena jiai llote. <sup>6</sup>Jitoma jasici muido itemo, jiañona ciuanona, jicanote: “¿Bue ñellenia namonana jamai itomoi?” <sup>7</sup>Uai otimaci: “Jaca caimo majijile rana budi lloñede”. Ie jira naimacimo llote: “Mai. Cue illimo majijai” llote. <sup>8</sup>Jitoma edaciidemo, naie patrón ie mullaimamo llote: “Majijainina uaido. Jinafona majijaaidinona raire nano iba. Ie mei jitiramo majijaaidinona jinafona iba” llote. <sup>9</sup>Ie jira jinafona majijaaidinona nano ibade. Dabe ibade. <sup>10</sup>“Naimaci baifemo feiñoiticaí” raillamo jitiramo majijaaidino comeciaina facadimaci; iadedi iese feiñoñedimaci. Nana daberie feiñotimaci. <sup>11</sup>Ie jira naie patrón joreñona jeare ñaitimaci: <sup>12</sup>“Jinafona majijaaidino

dallu majidimaci. Ecasilla facaise majiñedimaci; iadedi namonana majidicai. Dani cai ibaja isoi ibadio” ñaitimaci.<sup>13</sup> Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio.<sup>14</sup> O ucubena jai o feiñua jira, mai jai. Cue jitaila jira, da o ibaja isoi dallu majidinona ibadicue.<sup>15</sup> Cue ucubena jira, cue jitaille isoi cue ibaia, ¿niese cuena jeare ñaitomoi? Jainaona cue duenallanona, ¿bue ñellena uradodomoi? Mai jai” llote. Jusiñamui ie cominina sedaacana omoi raise uiñollena, bie rafue jai lloticue.<sup>16</sup> Jamai bue isoidomo. Omoimona jiaíno jamai bue isoñedimaci; ia naimie cominina naimaci jaillamona, Jusiñamumona naimaci diga daje isoidomo. Naimie diga jaca iitomoi.

**Jesúdi ie fiodaillena dane llua rafue**

(Mr. 10.32-34; Lc. 18.31-34)

<sup>17</sup> Jerusalémo ie llofueoicaigano diga Jesús jaídeo, dani naimaci diga ñaillena, naimacina oni uite.<sup>18</sup> Raite: —Ero, Jerusalémo jai jaídica. Monamona billanona, iimana jaídigue; iadedi omoi illaicomini cuena gaitaitimaci. Gaitaja mei, cue meinellena lloitimaci.<sup>19</sup> Judíuainédino illaicomínimo cuena fecaitimaci. Cueri jifanoitimaci. Cuena faitimaci. Ie mei cuena coraítimaci; iadedi cue fiodailla mei, darui amani illanona, Jusiñamui cuena jillotaite.

**Jesús dine Jacobo Juan  
iaimaiai ei billa rafue**

(Mr. 10.35-45)

<sup>20</sup> Naie facaise Jesús dine Jacobo, Juan iaimaiai ei diga, bitiiaimaiai. Iaimaiai moodi Zebedeo. Jesús dine iaimaiai ei rillanona, naimiena raise uaidollena, cañíci ifodo ana rainadacaída llote:

—Omo daje rafue jicaniacadicue.

<sup>21</sup> Naiñaiñomo Jesús dinena jicanote:

—¿Bue ñiaibitio?

Naiñaiño uai ote:

—Illaimana o jailla mei, cue jito iaimaiai o ecimo illana o lluana jitaídigue. Damie o nabeimo. Jiaimie o jarifebeimo. —Jiaíno baifemo iaimaiai illena, naiñaiño iese llote.<sup>22</sup> Naimacimo eruaíllanona, Jesús dinena uai ote:

—O jitaillacina raise uiñoñedio.

Cue duere sefuiticue.

Naiñaiño jito iaimaiaimo jicanote:

—¿Ie isoi duere sefuiacadomico?

Uai otiiaimaiai:

—Jii.

<sup>23</sup> Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

<sup>24</sup> Iena jiaie llofueoicaigano cacajano, naie iaimamaiairi iciritimaci.<sup>25</sup> Jesús nana naimacina uaiduanona, raite:

—Nana illaicomini naimaci anamo itinona ocuicabidimaci;<sup>26</sup> iadedi omoi díne iese iñena. Omoimona bu imiena iacania, omoi mullaímana naimie jaisoillasa.

<sup>27</sup> Omoimona bu imiena iacania, omoina naimie canocana jaisoillasa.<sup>28</sup> Cuemona fueo. Biñedicue cominina cue ocuillena; iadedi cominina camuaibidicue. Cue jitaila jira, nana comini facaina fiodaísabiticue. Naimaci jeacinomona naimaci jillobillena, fiodaísabiticue. Ailluena comini cuena iinuamona jilloitimaci. Coninina omoi canua —llote.

**Jesús mena uisinidíaimaaina**

**jillotaja rafue**

(Mr. 10.46-52; Lc. 18.35-43)

<sup>29</sup> Jericó railla naíraímona jaidimacimo, ailluena comini naimaci jinafona racadimaci.<sup>30</sup> Ie facaiseconi mena uisinidíaimaai nai fuemo

raidiaaimaiai. Jesús naiedo jaillano cacajano, naimieno ado uaidotiaaimaiai:

—David micori Jitona o illamona, Jusiñamuimona o billa jira, cocona duenai. Cocona cano.

<sup>31</sup>Iaimaiai lliicaillena, Jesús diga jaidino iaaimaaina lletade; iadedi eo curioidiaaimaiai:

—Maestro, David micori Jitona o illamona, cocona duenai.

<sup>32</sup>Iaimaiaina Jesús cacajano, ieconi naidadajanona, iaaimaaina uaidote. Jicanote:

—¿Niese omicona cue nibaiana jitaidomico?

<sup>33</sup>Uai otiaaimaiai:

—Maestro, coco uisina o citojana jitaidicoco.

<sup>34</sup>Iaimaiaina duenaillanona, iaaimaiai uisina jetade. Ieconi iaaimaiai uisidi ciode. Iaaimaiai jai cianonana, ie llofueganona iaaimaiai jaillena, Jesús diga jaidiaaimaiai.

Jesús illaima isoi

Jerusalémo jailla rafue

(Mr. 11.1-11; Lc. 19.28-40;

Jn. 12.12-19)

**21** <sup>1</sup>Oni jaillanona, Jerusalémo iairecaidimaco, Betfagé railla nairaimo Jesús ie llofueoicaigano diga ridimaci. Olivos railla anedumo ite. Ie llofueoicaiganomona Jesús menamienna orede. <sup>2</sup>Raite:

—Bie nairai illa uicomodo mai omico jai. Nainomo cuinaca burrana baitomico. Ie ecimo ie uruena baitomico. Naie iaaimaaina suiñuanu bene ati. <sup>3</sup>Omicomo “¿Bue fiellena bie suiñodomico?” bu jícanoia, llono: “Coco Nama naie iaaimaaina jitaide. Nailli naimie iaaimaaina raire abido orteate” —raite.

<sup>4</sup>Jusiñamui facaina lloraima micori jaie llua isoi, bie rafue suide. <sup>5</sup>Naimie micori jaie cuete:

Jerusalén itinomo llono:

“Ero, omoi illaima omoina sedallena biite.

Abi iedoñeno biite.

Burra urue emododo naimie biite” cuete. <sup>6</sup>Iaimaiai jaillanona, Jesús llua isoi finodiaaimaiai. <sup>7</sup>Burra ie urue diga atidiaaimaiai. Burra urue emodomio naimie llofueoicaigano naimaci iniroina jobianona, ie emodomio Jesús rainadate.

<sup>8</sup>Naimieno iobitallen, illaima isoi naimie jaillena, ailluena comini imaci iniroi diga, naiso motomo jobedimaci. Jiaño raforono uanona, naiso motomo jobedimaci. <sup>9</sup>Dajerie Jesús uicomodo jaidimaci. Dajerie naimie jinafona jaidimaci. Ado cuiriisite:

—¡Cai Jilloitarima billa! ¡Naimiedi David micori Jito! ¡Jusiñamui mamecido bitimie eo mare! ¡Jusiñamui caña jilloitajasa!

<sup>10</sup>Jerusalémo naimie ridemo, nana nainomo itino naie rafuena uiñoiacadimaci.

—¿Buta bite? —jicanotimaci. <sup>11</sup>Jesús diga bitino dinena uai otimaci:

—Jesús bite. Naimiedi Jusiñamui facaina lloraima. Galileamo ite Nazaret imie.

Jesúdi Jusiñamui jofomona

damierena dotaja rafue

(Mr. 11.15-19; Lc. 19.45-48;

Jn. 2.13-22)

<sup>12</sup>Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamui mo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiai diga, damierie fecauidimaci. Iena Jesús cianonana, naimaci mesaiaina oni caicode. Ucugina fecauidino rairacuai jiai oni caicode. <sup>13</sup>Naimacimo llote:

—Ie facaina lloraima Jusiñamui llogacino jaie cuega: “Cue jofo ite,

nainomo cuemo comini jiillena” cuega. Ero, ailluena omoi ibataja jira, naimie jofona fiiriruidino jofona omoi finoca.

<sup>14</sup>Ie facaise uisnidino Jusiñamui jofomo naimie dine bitimaci. Ñuja-ñujacaída macaritino jiai bitimaci. Naimaci billanona, Jesús naimacina jillotate. <sup>15</sup>Nainomo Jesúdi diga mare rafuena finode. Diga cominina jillotate. Iena ciuanona, nainomo ite uruiai ado cuirisite:

—David micori Jitor iobidicai. Jusiñamui lloraini micoriai jaie llua isoi, cai Jilloitaraíma jai ite.

Iena ciuanona, iena cacajanona, judíuai illaicomini iciritimaci.

<sup>16</sup>Naimiemo jicanotimaci:

—¿Bie uruiai cuiriillana cacadio?

Jesús dinena uai ote:

—Jii, cacadicue. David micori iena jaie cuete. ¿Niese iena cacaiñedomo? Naimie cuete:

Naimiemo Jusiñamuidi uruiaína mare iobillacinona fecataite.

<sup>17</sup>Naimacina fainonocaida, Betaniamo Jesús jaide, nainomo inillena.

**Jesús higuera railla  
riarana faidua rafue**  
(Mr. 11.12-14, 20-26)

<sup>18</sup>Ie areruido Jerusalémo abido ie llofueicaigano diga Jesús bia, aimetaite. <sup>19</sup>Nai fuemo higuera railla riarana ciuanona, iena jibuide. Naiemo naie llisilladi inede. Dama ie ibena ciode. Ie jira naie amenana llote:

—Biemona jaca llisiñeite. —Iese railla dacaiño naie riaradí duide. <sup>20</sup>Ie llofueicaigano iena ciuanona, raijicaillamona raitimaci:

—¿Niese naie riara raire duide?

<sup>21</sup>Jesús dinena uai ote:

—Uanaicinona omoimo lloitucie. Cue Moona raise omoi iinoia, bie isoide rafuena finoitomoi. Raise omoi iinoia, omoi comeci igireñenia, bene ite

anedumo omoi lloia: “Monaillaimo o illena, benomona mai jai”, Jusiñamui o jitaille rana finoite. <sup>22</sup>Naimie iena finuana omoi iiñuamona, nie isoide rafue cue Moomo omoi jicajia, iena naimie finoite.

**Jesúdi ie siño uaina llua rafue**

(Mr. 11.27-33; Lc. 20.1-8)

<sup>23</sup>Jerusalémo rillanona, Jusiñamui jofomo Jesús fo jailla mei, nainomo ite cominina llofuetete. Judíuai illaicomini naimie dine billanona, jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

—<sup>24</sup>Jesús dinena uai ote:

—Omoimo daje rafuena nano jicanoitucie. Raise omoi fairioia, omoimo cue uaido cue finoca rafuena lloitucie. <sup>25</sup>Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanotide: “¿Bue fiellena naimie micori lluana iinoñedomo?” <sup>26</sup>“Comini” cai fairioia, bene itino caña nibai meineitimaci, Juan micoridi Jusiñamui facaina lloraima naimaci railla jira.

—<sup>27</sup>Ie jira fairiotimaci:

—Uiñoñedicai.

Jesús dinena raite:

—Ie muidona cuemo nie isoide uai illana omoimo lloñeitucie.

**Jesúdi mena jito iaímaiai  
illa llua rafue**

<sup>28</sup>Judíuai illaicomínimo Jesús llote:

—Bie rafuemo omoi comeciaína faca. Damiemo mena jito ite. Nano doforamiemo llote: “Moo, cue illimo

birui maijiai".<sup>29</sup> Uai ote:

"Jaiacaiñedicue" llote. Dallu illanona, ie comeciná dane facajano, maijiaide.  
 30 Jiae jitomo daje isoi llote. Naimie uai ote: "Jii, maijiaitcue" llote. Iese llote; iadedi maijiañede.<sup>31</sup> ¿Nie jitoca ie moo jitalla rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoimo lloitcue.

Omoina ñaiticue. Omoimona maraiñedimaci; iadedi Jusiñamui cominina naimaci jaillamona, gobierno ucube oraíni Jusiñamui illanomo iitímaci. Callirediñaiñuaídi nainomo jiae iitímaci; iadedi nainomo jaca iñetomoí.  
 32 Marena omoi comeciaína itatallena, Juan micori navui bite; iadedi naimie micorina iñoñedomoí. Ucube oraíni naimie micorí rafuena iñotimaci. Callirediñaiñuaí naimie micorí rafuena iñotimaci. Iena uiñotomoí; iadedi omoi comeciaí iuailaina meidoñedomoí. Hinoñedomoí.

**Jesúdi maraiñede maijiraini  
rafuena llua rafue**  
(Mr. 12.1-12; Lc. 20.9-19)

<sup>33</sup> Judíuai illaicominimo Jesús llote:

—Jiae rafuena omoimo lloitcue.

Iemo cacareí. Daje patrón uvas railla riaraíaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidaçana finode. Iena sedallena, ibatajanona jainomo fecade. Ie mei jiae eniruemo jaide.<sup>34</sup> Uvas jai einailla facaise riaraíaina sedaraini dine naie patrón janore mullaíaina oredé, naimie facaise iedinona naimie feiñollena;  
 35 iadedi naie sedarainidí ie mullaíaina duere finosite. Daje mullaíama fatimaci. Jiaimiena meineticaci.

Jiaimiena noficina fairinotimaci.<sup>36</sup> Ie

mei patrón jiae mullaíaina oredé. Naimacina jiae duere finodimaci.<sup>37</sup> Ja muidomo ie jitona oredé. "Cue jitona jaciruitimaci. Naimie uaina iinoñimaci" comeciná facade.<sup>38</sup> Riaraíaina sedaraini naimieno ciuanona, coniniri raitimaci: "Bimimo bie illi fiebiite, naimie moo fiodailla mei. Naimieno cai meinelli, bie illi caimo fiebillesa" raitimaci.

<sup>39</sup> Naimieno jino dotajanona, naimieno meineticaci.<sup>40</sup> Naie illi nama ico abido bille mei, ¿nie isoide rafuena naimie naie illina sedarainina finoite? Cuemo llono —llote.

<sup>41</sup> Judíuai illaicominimo uai otimaci:

—Naie maraiñedínona dueruñeno meineite. Ie mei jiae cominimo naie illi fecaite, iena sedallena, naiemonia riaraná feiñollena.

<sup>42</sup> Naimacimo Jesús llote:

—Naie illi sedaraini isoidomoi.

Jusiñamui facaina lloraima micorí omoina jiae cuete. Ie cuega fuena raise facañedomoí. Naimie micorí cuega:

Jofo finoraini jitaiñena nofici  
nana naie jofomo ite nofici  
baifemo jai uaide.

Jusiñamui iena finotate.

Iena cai uiñuamona, "Eo mare"  
raiticai

cuega. Jusiñamui cominina damierie jaillana naimie micorí cuete. Jusiñamui oretagamiéna damierie jitaiñenamona, naimie cominina jaiñeitomaci; iadedi Jusiñamui oretagamiéna ailluena iñuamona, naimie cominina jaitimaci. Ero, naimie micorí caina cuete. Naie jofoma finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomaci.

<sup>43</sup> Jusiñamuidí ie cominina sedajanomo omoina itatañeite; iadedi jiae cominina nainomo itataite, naimie jitalla rafuena naimaci finua jira.

<sup>44</sup> Jesús llote:

—Naie nacificina dane ñaiticue. Nacificimo bu eicaitaia, bofedaite; ia naie nacifici bumo ana uaia, naimiena saitaite. Ie isoide. Cue lluana omoi jamaia, duere sefuitomoi. Iena omoi iïnoñenia, ja muidomo faifitomoi.

<sup>45</sup>Jesús lluana naie judíuái illaicomini cacajanona, naimiedi naimacina ñaiana jai uiñotimaci. <sup>46</sup>Icillamona, naimiena gaitaacadimaci; iadedi cominina jaciruitimaci, comindi naimie Jusiñamui facaina lloraimana raillanona.

**Jesúdi illaíma ie jito  
aina ua llua rafue**

**22** <sup>1</sup>Jusiñamui jofomo Jesús nia illanona, nainomo itinona llofuite:

<sup>2</sup>—Jusiñamui dibeimo comini jailla rafuena omoimo lloitice. Iena omoi uiñollena, bie rafuedo iena lloitice. Illaimadi ie jito ai ua rafue finode. <sup>3</sup>Naimie ie mullaini orede, rafuemo llogano uaidollena; iadedi nai llogano biacaiñedimaci. <sup>4</sup>Dane jiae mullaini oretajano llote: “Nai lloganomo llono: ‘Rafue guille jai finocasa. Firetaiai, farediretaiai diga, jai faga. Jai nana fuite. Rafuemo mai bi’”. <sup>5</sup>Naimaci cacarefiacaiñede. Damie ie illimo jaide. Jiaimie ie chinganamo jaide. <sup>6</sup>Jiaino mullainina gaitadimaci. Gaitajanona naimaciri jifanotimaci. Ja muidomo naimacina meineticimaci. <sup>7</sup>Ie jira naie illaíma eo icirite. Naimie soldaduaí oretate, naimie mullaini meineticinona meinellena. Naimie naimaci illano jobaitate. <sup>8</sup>Ie meinoconi ie fiebide mullainimo llote: “Rafue guille jai nana finoca; ia llogano maraiñedimaci. <sup>9</sup>Naiso bojicaillanomo jai. Nana o ciolle diese llono: ‘Rafuemo bi’ llono”. <sup>10</sup>Ie jira ie mullaini jai naisonja jaide. Maraiñedino baillanona diese

ofitativimaci. Jiai maredino diese ofitativimaci. Rafue finua jofo naie llogano diga oruide. Illaíma nainomo fecaca iniroina jitadimaci. <sup>11</sup>Illaíma fo bia, mesamo itino jibuillena, dinomo daje iima rafue ie mare iniroina jitañenana ciode. <sup>12</sup>Naimiemo jicanote: “Nabai, ¿niese bene rafue ie mare iniroina jitañeno bitio?” jicanote. Naimie uainicaide. <sup>13</sup>Ie jira naie illaíma ie mullaíaimo llote: “Naimie cuena iïnoñena jira, naimie onollí dajemo nitaicaida maino. Ie eillina daje isoi maino. Cuemona naimie jino dota. Nainomo itino diga duere sefuite. Jiai sunaite” llote. <sup>14</sup>Ero, naie rafuemona omoi fueo. Illaíma ailluena uайдote; ia nana biñedimaci. Ie isoide. Jusiñamui ailluena cominina uайдote; iadedi naimacimona janore fetode.

**Jesúmo gobiernomo ucubena  
fecajana jicanua rafue  
(Mr. 12.13-17; Lc. 20.20-26)**

<sup>15</sup>Naimacimo Jesús llua mei, fariseuai comini abido jaillanona, coniniri siadotimaci. Naimie raise uai oñedena, naimiena duere finollena, Jesúna facaciacadimaci. <sup>16</sup>Ie jira naimie díne naimaci cominimona dajerie oredimaci. Herodianuai railla cominina jiai jaidimaci. Jesús díne rillanona, raitimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. <sup>17</sup>Omo rafuena jicanoiacadicaí. Dani Jusiñamuina sedadicai; iadedi romanos railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

<sup>18</sup>Naimaci comeciaína maraiñediginona facajana Jesús uiñuamona, uai ote:

—¿Bue ñellena cuena facacitomo? Maredinona abi caitadomo. <sup>19</sup>Ucube cuemo acata —llote. Ie jira acatativaci.

<sup>20</sup>Jesús dinena jicanote:

—¿Bu ie joreño nainomo ite? ¿Bumo jainaiaide bie cuega radi?

<sup>21</sup>Uai otimaci:

—César.

Jesús dinena raite:

—César iena itedi Césarmo ille.

Jusiñamui iena itedi Jusiñamuimo ille —raite.

<sup>22</sup>Naimie lluana cacajano, raijicaidimaci. Naimie jeare uai oñena jira, naimie dinomona oni jaidimaci.

**Jesús dine saduceuai railla comini billa rafue**  
(Mr. 12.18-27; Lc. 20.27-40)

<sup>23</sup>Naie facaise saduceuai railla comini naimie dine bitimaci. Fiodaillamona jaca buna jilloñellena iñotimaci.

Jestímo llotimaci:

<sup>24</sup>—Maestro, Moisés micorí jaie cuega: “Hima fiodailla meinoconi, naimie urue

iñenia, ie ama naie feciño olle. Naimiedi uruiaina ie ama facaina comuitaite” cuega.

<sup>25</sup>Ero, caí motomo siete amatiai ite. Nano doforamie ie aína ote. Naimie nia uruiaínide fiodailla. Ie emodo imie ie ama feciñona ote. Uruiaínide jiai fiodailla.

<sup>26</sup>Naie siete digamiedemonia iese sefuide.

<sup>27</sup>Ja muidomo naie riño jiai fiodaite.

<sup>28</sup>Fiodaillamona, ico naimaci jilloiadedi, ¿bu naie riño ienite? Naiñaiño siete digamieni inirede —llotimaci.

<sup>29</sup>Jesús uai ote:

—Moisés micorí cuegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomo. <sup>30</sup>Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jainenisaí ainidimaci. Innidimaci. Ie isoi iitimaci.

<sup>31</sup>Fiodaitino jilluana omoimo lloitice.

Jusiñamui omoi jaiagaimo jaie llogacinona iñonoñedomo. Naimie llote: <sup>32</sup>“Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuaí nia itimaci. Jusiñamuidi dani cajedino imaci Jusiñamuina jira, naimaci joreñuaí naimie dine itimaci. Ico naimaci abiaina jiai jillotaite —llote. <sup>33</sup>Nainomo ite comini iena cacajano, naimie llofuiari raijicaidimaci; ia saduceuai dinena uainicaidimaci.

**Jesús nanoca llogacinona  
llofua rafue**  
(Mr. 12. 28-34)

<sup>34</sup>Saduceuai comini uainicaillana fariseuaídi jai fidiano, Jesús dine ofidimaci. <sup>35</sup>Naimacimona damiedi Moisés micorí jaie llogacinona eo uiñote. Jesúna facacillena, naimemo jicanote:

<sup>36</sup>—Maestro, Moisés micorí jaie llogaciuaimona, ¿nie llogacino ua nanoca llogacinona?

<sup>37</sup>Jesús dinena uai ote:

—Moisés micorí jaie cuega: “Omoi jitaila jira, nana omoi comecimona cai Nama Jusiñamuina isirui. Naimemo omoi comecina eo faca”. <sup>38</sup>Bie ua nanoca llogacino. <sup>39</sup>Ie emodomio ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. <sup>40</sup>Bie mena llogaciuaimona nana jiaia llogaciuai comuide. Nana Moisés micorí llogaciuai naiemona comuide. Nana Jusiñamui facaina lloraíni micoriai llogaciuai naiemona comuide —llote.

**Jesús dinena fariseuai  
cominimo jicanua rafue**  
(Mr. 12.35-37; Lc. 20.41-44)

<sup>41</sup>Naimie dine nia fariseuaí comini ia, Jesús naimacimo llote:

<sup>42</sup>—Jusiñamui lloraini micoriai jaie raitimaci: “Jusiñamuidi Cristo raillamiéna oretaite, ie cominina sedallená”. ¿Niese naimiena raitomoi? ¿Bu jito naimiedi?

Uai otimaci:

—David micori jito. David micori isoi Cristo ie cominina sedaite.

<sup>43</sup>Jesús dinena jicanote:

—Naimiedi David micori isoidena, ¿bue ñellena David micori “Cristodí cue Nama” llote? Jusiñamui Joreñodi David micori ñaitatajanona, David micori llote:

<sup>44</sup>Jusiñamuidi cue Namamo llote:

“Illaimana o illamona, cue nabei dine ana rai.

Ona iñofiedino o anamo itataiticue”.

<sup>45</sup>“Cristodí cue Nama” David micori raite. Iese naimie micori raila jira, Cristo David micori afemo faite. Naimiedi jamai David micori jitoñede; ia jiai ie Nama.

<sup>46</sup>Uaina onidimaci. Naie facaisemona Jesús ie uaina dane uaitañedimaci.

### Jesúdi judíuaí illacominiña ñaia rafue

(Mr. 12.38-40; Lc. 11.37-54; 20.45-47)

**23** <sup>1</sup>Jusiñamui jofomo Jesúis nia illanona, naimie dine ailluena comini bitimaci. Ie llofueicaigano nainomo jiai illanona, nana naimacimo llote:

<sup>2</sup>—Moisés micori llogacinuaina llofuerainidi naie rafuedo jai jaicabidimaci. Fariseuái comini iedo jiai jaicabidimaci. <sup>3</sup>Naimaci llofuiacínodo omoi jai. Naimaci llofuiiana omoi cacarefi; iadedi naimaci illa isoi omoi iñeno, naimaci llofuiacínodo naimaci jaiñena jira. <sup>4</sup>Omoi einamaci llogacinuaido raise omoi jaillena, diga rafuena omoi finuana jitaidimaci; iadedi

iedo omoi jaillena, omoina jaca canoñedimaci. “Jusiñamuina eo raise sedadícaí” comeciná facadimaci. Iemo naimaci comeciná facajamona, <sup>5</sup>iená omoi cioillena, nana naimaci finua rafuena marefodo finodimaci. Jiae cominimo ite Jusiñamuimo jiirabe baifemo faitibena uiacacabidimaci. Íniroi fuedadi aillofena jonegana gaidimaci. <sup>6</sup>Rafue ia, naimaci jamai bue isoñedinomo comeciná facajanona, rafue nama ecimo raiacadimaci. Ofiracomo uicomo raiacadimaci, comini naimaciri acarillena. <sup>7</sup>Nine naimaci jiai, nana comini naimacina uaiduana gaidimaci. Maestrodicinona uaiduana jiai gaidimaci. <sup>8</sup>Jusiñamuina eo raise naimaci sedajana omoi uiñuana jitaidimaci. Naimaci isoi iñeno. Omoi damacina jira, omoimona damie omoi baifemo faíamo comeciná facañeno. Naimiena maestrona raiñeno. Omoi baifemo cue illanona, omoi maestrodícu. <sup>9</sup>Omoi Moo Jusiñamui monamo illanona, dama naimiena seda. Jiaimiena sedañeno. Jusiñamui isoi jiaimiena “Moo” raiñeno. <sup>10</sup>Omoi damacina jira, omoimona damiena “Cai illaima” raiñeno. Omoi illaimana jai iticue. <sup>11</sup>Omoimona bu imiena jaiacanía, omoi mullaimana naimie nano jaillamona, omoina naimie canua. <sup>12</sup>Jusiñamuidi “Jiaino afemo iticue” raillano comeciná facadimiená jamai bue isoñdimiená itataite; ia Jusiñamuidi “Jiaino afemo iñedicue” raillano comeciná facadimiená jamai bue isoñdimiená itataite.

<sup>13</sup>Naie facaise Moisés micori llogacinona llofuerainidi fariseuái comini diga illanona, Jesúis naimacimo llote:

—Jusiñamui omoina duere finoite. Mareuidinona abi caitadinodomoi. Jusiñamui dibeimo comini illana

jitaiñedomoi. Naimie dibeimo omoi illana jiai jitaiñedomoi. Ie muidona Jusiñamuimona duere sefuitomoi.  
 14 “Jusiñamuina eo sedadimaci” omoimo comini comeciaina facajana jitaidomoi. Ie jira are jiñdomoi; iadedi iese iñedomoi. Maraiñede rafuena finocabidomoi. Jifuiyanona feciñuaí rana bairocabidomoi. Ie jira Jusiñamui omoina eo duere finoite.  
 15 Damiena omoi dibeimo itatallena, omoi isoi Jusiñamui rafuedo naimie jaillena, diga rafuena finodomoi. Omoi dibeimo illa mei, omoi baifemo omoi einamaci llogacinodo naimie jaillana jitaidomoi. Omoi diga ico naimie ua faifite. Cominina uanaiñedicinodo jaitatomoi. Iese omoi illa jira, duere sefuitomoi.

16 ‘Omoi llofuiacino diga cominina canoñedomoi. Mareuidinona abi caitadinomoi. Raicabitomoi: “Cai lloga uai cai finollena jiai comini uiñollena, Jusiñamui jofomo ite oro mamecina llínnoticai; iadedi Jusiñamui jofo mamecina cai llinoia, cai lloga uaina cai finoñenia, caimonamare. Jusiñamuimona duere sefuiñeiticaí” raicabitomoi. 17 Abi uiñoñedomoi. Omoi llofuiacino diga cominina canoñedomoi. Jusiñamui jofomo naie oro jainailla jira, naie orodi mare; iadedi naie oro naie jofo baifemo uaiñede. Abina omoi uiñoñena jira, Jusiñamui omoina duere finoite.  
 18 Jiai raitomoi: “Jusiñamuimo faga toica ocaina jobaisoillano mamecina cai llinoia, cai lloga uaina cai finoñenia, caimonamare; iadedi Jusiñamuimo fecaca toica ocaina mamecina cai llinoia, cai lloga uaina jaca finoíticaí”. 19 Abi uiñoñedomoi. Omoi llofuiacino diga cominina canoñedomoi. Naie jobaisoillanomo naie ocaina illa jira, naie ocaina mare; iadedi naie ocaina naie jobaisoillano baifemo uaiñede.  
 20 Ero, Jusiñamuimo

ocaina jobaisoillano mamecina omoi llinoia, nainomo ite ocaina mamecina jiai llínnotomoi.  
 21 Jusiñamui jofo mamecina omoi llinoia, Jusiñamui nainomo illa jira, naimie mamecina jiai llínnotomoi.  
 22 Monamo ite ra mamecina omoi llinoia, Jusiñamui illano nainomo illa jira, nainomona cominina naimie sedaja jira, naimie mamecina jiai llínnotomoi. Omoi llua rafuena omoi finoñenia, Jusiñamui omoina duere finoite.

23 Mareuidinona abi caitadinona omoi illamona, omoimo nia lloitice. Nana omoi illimo ite ramona, nana omoimo ite ucubemona Jusiñamuimo janore jisa fecacabidomoi. Nana comini omoi isoi illena jitaidomoi. Mare; iadedi nanoca rafuena jaca finoñedomoi. Jiae cominimo omoi comeicina facañedomoi. Jiae cominina duenaiñedomoi. Omoi lloga uaina finoñedomoi. Nana naie isoide rafuena omoi jiai finua. Iena omoi finoñenia, Jusiñamui omoina duere finoite.  
 24 Abina uiñoñedomoi. Jallecima jiroracomo ia, iena oni faiga; ia aillue ra nainomo ia, iena cioiñeno namo gutadomoi. Ie isoide. Omoi llofuiacino diga cominina canoñedomoi. Jusiñamui ie eo jitailla rafuedo comini jaillana llofueñedomoi.  
 Nanocafueñededo comini jailla rafuena llofuetomoi. Nanoca rafuedo comini jaillana llofueñedomoi.

25 Omoimo nia lloitice. Omoi einamaci llogacinodo eo jaidomoi; iadedi omoi comeciaina raise finoñedomoi. Eo fiidomoi. Jifuiyanona comini rana bairodomoi. Jeacinona finocana jaidomoi.  
 26 Abina uiñoñedomoi. Da pocillos jinafo, da platos jinafo jocodino isoidomoi. Pocillos jerai, platos jerai jocoñedino isoidomoi. Omoi abina finodomoi; iadedi omoi comeciaina raise

finoñedomoi. Nano omoi comecina raise fino. Mare rafue finocana jai. Omoi einamací rafuemo comecina facañeno; ia Jusiñamui rafuemo comecina faca. Iese omoi jaiñenia, Jusiñamui omoina duere finoite.

<sup>27</sup>Omoimo nia lloitice. Marena finoca raiifo isoidomoi. Jinofe marena eruaidé; iadedi nainomo mare ra iñede. Comini illaici jamai ite. Jai maraiñede. <sup>28</sup>Ie isoidomoi. Marena eruaidomoi; iadedi maredinona abí eo caitadomoi. Omoi comeciai eo maraisñede. Omoi comecina raise omoi finoñenia, Jusiñamui omoina duere finoite.

<sup>29</sup>Omoimo nia lloitice. Naimacimo birui omoi comeciaina raise facallena, Jusiñamui facaina lloraini micoriai raiafona marena eruällena finodomoi. Mareuidino micoriai raiifo emodo marena eruällena finodomoi, <sup>30</sup>raillano: “Cai jaiagai Jusiñamui facaina lloraini micoriaina meineticaci. Naie facaiseconi iticaídena, naimaci isoi finoñedicai. Cai jaiagai isoi birui iñedicai” raitomoi; <sup>31</sup>iadedi omoi lluamona Jusiñamui facaina lloraini micoriai meinetino uruiai omoina uiñoticaí. <sup>32</sup>Omoi jitaila jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai. <sup>33</sup>Omoi maraiñena jira, jaio nairai isoidomoi. Ja muidomo iraimona jillobiñetomoi. Nainomo duere sefuitomoi. <sup>34</sup>Cue rafuena llollena, cue facaina llorainina omoi dine oretaiticue. Cue rafuena eo uiñotinona omoi dine oretaiticue. Cue rafuena omoi raise uiñollena, llofueraini omoi dine jiai oretaiticue. Dajeriena meineitomoi. Naimacina coraitomoi. Omoi ofiracomo dajeriena faitomoi. Diga nairaimo naimacina duere finoitomoi. <sup>35</sup>Abel micori jaie ite. Naimie maremie. Ie ama naimienia

meineti. Naimie facaisemonia omoi jaiagai ailluena mare cominina meineticaci. Ie mei omoi jaiagai Zácariana meineticaci. Naimiedi Berequías jito. Jusiñamui jofomo Jusiñamuimo toica ocaina jobaisoillano ecimo naimienia meineticaci.

<sup>36</sup>Uanaicino omoimo lloitice. Naimacina omoi jaiagai meinia muidona, omoimona Jusiñamui birui ibana oite. Naimaci isoi maraiñede rafuena finocana jaidomoi. Jusiñamui omoina duere finoite.

**Jesús Jerusalémo  
itinomo llua rafue  
(Lc. 13.34-35)**

<sup>37</sup>Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruiai sedaja isoi, diga icaiño cue anamo omoina uaidoiacadicue; iadedi omoi dinena cuena jitaiñedomoi. <sup>38</sup>Lemonia Jusiñamuidi omoi illanona jai fainonocaidé. <sup>39</sup>Cue Moo dine jaiticue. Cue jailla mei, cuena cioñeitomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

**Jesúdi Jerusalémo ite Jusiñamui  
jofo judaiana llua rafue  
(Mr. 13.3-23; Lc. 17.22-24; 21.5-24)**

**24** <sup>1</sup>Jusiñamui jofomona ie llofueoicaigano diga Jesús jino jaidemo, Jesúna nai jofona eruaitatimaci. <sup>2</sup>Jesús dínenia llote:

—Bie jofona ciodomoi. Uanaicinona omoimo lloitice. Nana bie jofomo ite noficai ico judaísate —llote. <sup>3</sup>Ie mei Olivos railla anedu dine rillanona, Jesús

naie muidomo raidemo, ie llofueoicaigano naimiemo iena anado llotimaci:  
 —Jusiñamui jofo judaiana omo jicanoiacadai. ¿Niruido iena suite? Caimo llono. O abido billirui iairei ia, ¿nie isoide rafue suite, o abido billiruina cai uiñollena?

<sup>4</sup>Uai ote:

—Omoina bie rafuena bu jifueñellena, omoi abina rairui. <sup>5</sup>Ailluena comini cue mamecido billanona: “Cristodice” raitimaci. Diga cominina jifueitimaci. Iemonia omoi abina rairui. <sup>6</sup>Jobaimiai illena fidiiptomoi; iadedi jaciruiñeno. Iese suite; iadedi abido nia biñeiticue. <sup>7</sup>Daje nairai jiae nairai diga jobairitimaci. Daje gobierno jiae gobierno diga jobairite. Diga illanuaimo comini aime guitimaci. Diga illanuaimo ñuisañuai suite. <sup>8</sup>Iese suia, omoi duere sefuillfue omoimo suite.

<sup>9</sup>Cuena iiñoñedino omoina gaitatajanona, omoina meineitimaci. Cue cominina omoi illamona, nana nairaiai omoina enoitimaci. <sup>10</sup>Naie facaise cue dibeimo itinomona ailluena abido danomo jaitimaci. Iemonia duere omoi sefullena, omoina janoeitimaci; iadedi omoina enoillamona, omoina llogidoitimaci. <sup>11</sup>Naie facaise diga comini raitimaci: “Jusiñamui facaina llorainidicai”; iadedi Jusiñamui facaina llorainiñedimaci. Uanaicinona lloñeitimaci. Diga comini naimaci dibeimo itataitimaci. <sup>12</sup>Jeacino eo comuicana jailla jira, ailluena comini conini isiruiñeitimaci; <sup>13</sup>iadedi cuena fainonocaiñedimie ja muidomo monamo jaca ii te. Naimiena jillotaiticue. <sup>14</sup>Diga cominidi Jusiñamui dibeimo comini ille rafuena nana nairaimo lloitimaci, nana nairaiai iena cacallena. Ie mei abido biiticue.

<sup>15</sup>Cue lluamo cacarei. Daniel micori Jusiñamui facaina lloraima. Naimie micoridi jiaimie jearede rafue finollena

jaie llote. Naie rafue suia, Jusiñamui jofomo Jusiñamuina sedañeitomoi. Nainomo naie jearede rafue finuana omoi ciuanona, <sup>16</sup>naiemona omoi jillobilena, duere omoi sefuiñellena, Judeamo omoi illamona, aneduai dine omoi aisi. <sup>17</sup>Jofo emodom omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno. <sup>18</sup>Aneduai dine raire rillena, illimo omoi ia, abido jofomo biñeno, omoi iniroi omoi diga uillena. <sup>19</sup>Naie rafuemona jillobilena, naie facaise urueside riñó duere sefuite. Uruena nia jirode riñodi jiai duere sefuite. <sup>20</sup>Eo duere sefuiñellena, Jusiñamuimo omoi jicano, rollime facaiseconi bie rafue suiñellena. Moisés micori sábadomo are jaillana jiae rairuide. Sábadoruimo bie rafue suiñellena, Jusiñamuimo jicano. <sup>21</sup>Naie facaise comini eo duere sefuitimaci. Enirue finua facaisemona iese comini nia duere sefuiñedimaci. Ico iese eo duere sefuiñeitimaci. <sup>22</sup>Naie facaise ianori fo Jusiñamui oñeitena, buna jaca jillobiñete. Naimie fetocano muidona, naie facaise Jusiñamui ianori fo oite. <sup>23</sup>Le facaise omoimo bu raia: “Jadi, Jusiñamui facaina lloraima benomo birui bairede. Naimiedi Cristo”, iena iiñoñeno. Jiaimie raia: “Oni batine Cristo birui bairede”, iena iiñoñeno. <sup>24</sup>Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. <sup>25</sup>Ero, bie rafue nia suiñenia, iena omoimo jai lloticue. <sup>26</sup>Omoimo naimaci raia: “Ero, batine jofue iñenanomo Cristodi ite”, nainomo jaiñeno. Naimaci raia: “Ero, bene bie jofomo Cristo ite”, iena iiñoñeno. <sup>27</sup>Mona borillamona mona jillacidi

usere ciode. Nana cominimo bairede. Ie isoide. Cue abido bia, nana comini iena uiñotimaci. <sup>28</sup>Urujaisai rifaide ramo ofillana uiñua isoi, nana cuena iiñotino cue billena uiñotimaci.

**Jesús abido ie bille rafue**

(*Mr. 13.24-37;*

*Lc. 17.26-30, 34-36; 21.25-33*)

<sup>29</sup>Jesús llote:

—Naie duere sefulla facaise meinoconi jitoma lligaiñoñeite. Fivui jiai lligaiñoñeite. Monamona ucuai llujite. Nana naie radi jaidisite. <sup>30</sup>Ie mei monamo baireiticue. Ieconi nana nairaiai jarire ittimaci. Jacinaitimaci. Uillie motodo cue billena citoitimaci. Ebire biiticue. Naimacina cue sedallena, illaimana biiticue. <sup>31</sup>Cue jaenínsaina cue ecimona oretaiticue. Ado trompeta ficiretajano, cue fetocano diese naganomona ofitaitimaci.

<sup>32</sup>Higuera railla riaramona omoi fueo. Bie eniruemo naie riara firuillamona, fiemonra raire illana uiñotomoi. <sup>33</sup>Ie isoide. Bie rafue ico suia, cue billirui iairei illena uiñotomoi. <sup>34</sup>Uanaicinona omoimo lloitice. Nana bie rafue suille facaiseconi bie nairai nia iite. <sup>35</sup>Mona enirue diga fuite; iadedi cue lloga uai jaca suite. <sup>36</sup>Cue abido billirui jaca bu uiñoñede. Jusiñamui jaenínsai iena uiñotimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote. <sup>37</sup>Abido cue billirui iairei ia, Noé micori facaiseconi itino isoi comini ittimaci. Naimaci duere sefullemo Noé micori facaise itinodi comeciaina facañedimaci. <sup>38</sup>Naie facaiseconi nia eo noci deiñenia. Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Daní iemo comeciaina

facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. <sup>39</sup>Nia noci deiñenia, Noé micori lloga uaina iiñoñedimaci. Noci deilla mei, ebena nana fafidimaci. Cue abido bia, ie isoite. Ebena biiticue. <sup>40</sup>Naie facaiseconi menamie illimo danomo iitiiaimai. Damie Jusiñamui díne jaite. Jiaimie fiebillanona, Jusiñamuimona duere sefuite. <sup>41</sup>Mena riño danomo doberitiaeñua. Dañaiño Jusiñamui díne jaite. Jiañaiño fiebillanona, Jusiñamuimona duere sefuite. <sup>42</sup>Cue billirui omoi uiñoñena jira, iemo ocuiri. <sup>43</sup>Bie rafuemo omoi comeciaina omoi faca. Jofo namadi fiiriraima nie naiona billena uiñotena, ie rana faifinellena, ie jofona raise sedade. <sup>44</sup>Ie isoi cue billemo ocuiri. Monamona ico abido biiticue. Omoi ocuiriñena facaisemo riiticue. Ie jira cue billemo nagarui ocuiri.

**Jesúdi patrón ie mullaímana ie jofona sedataja llua rafue**

(*Lc. 12.41-48*)

<sup>45</sup>Jesús llote:

—Cue billena omoi raise cacaillena, jiaie rafuedo iena lloitice. Patrón daje mullaímana ie jofona sedataje. Naie mullaíma iiñogamie. Abina uiñotimie. Nainomo itinona raise ecacabide. Naie mullaímana ie jofona sedataja mei, naie patrón oni jaide. <sup>46</sup>Patrón ico abido bia, ie jofona ie mullaíma raise sedaia, mullaímarai naimie iobillamona, ie mullaíma marena iite. <sup>47</sup>Iobillamona, patrón ie mullaímana nana ie raruiaina sedataataje; <sup>48</sup>iadedi ie mullaíma maraiñenia, ie comeciná facaite: “Cue patrón are biñeite. Naimie lloga uaina finoñeticue”. <sup>49</sup>Ie comeciná iese facaja jira, naimie anamo ite mullaíaina faite. Ie jitaila rafue finuamona, jifairuidino

diga jirocabite. Naimacina nabaillamona, naimaci diga guite. Naimaci isoi jearede rafuena finoite. <sup>50</sup>Ie ocuiriñena facaise ie patrón abido billanona, naimiena duere finoite. <sup>51</sup>Ie isoide. Cue abido bia, cuena iinotinori iobiticue; ia cuena iinotinona abi caitadino dine cuena iinoñedinona dotateitue. Nainomo duere sefuillano eeditimaci.

**Jesúdi diez jitaiñuaína llua rafue**

**25** <sup>1</sup>Jesús llote:  
—Abido cue bia, Jusiñamui ie cominina sedaite. Cue billemo ocuriritinona sedaite. Naie facaise ite cominidí diez jitaiñuaímo ite rafue isoidimaci. Naiñaiñuai lamparíniai llinuanona, iima ie aina ua meinomo finoca rafuemo jaiacadimaci.  
<sup>2</sup><sup>4</sup>Lamparíniai unellena, farena naiñaiñuai uilla jira, cinco diga abina uiñotimaci. Farena naiñaiñuai uiñena jira, cinco diga abina uiñoñedimaci.  
<sup>5</sup>Hima diga ie rafue dine jaillemo ocurridimaci. Hima are biñena jira, inidimaci. <sup>6</sup>Daje diberuise damie ado lluana cacadimaci. Llote: “Jadi, naie iimadi jai bite. Mai bi, naimie uicomó naimiemo cai dafaifillesa”. <sup>7</sup>Casillanona, naie jitaiñuaí lamparíniai unedimaci.  
<sup>8</sup>Abi uiñoñediñaiñuai dinena abi uiñotifñaiñuaímo jicadimaci: “Farena caimo feca. Cai lamparíniai boacaiñedes”. <sup>9</sup>Uai otimaci:  
“Fecaacaiñediaci. Omoimo cai fecaiadedi, caimo baiñeite. Omoi jitaia, chinganomo ibajai”. <sup>10</sup>Naiñaiñuai ibajailla mei, naie iima ride. Naimiemo ocuridiñaiñuai diese naimie diga nainomo guillena, rafuemo jaidimaci. Naimaci fo jailla mei, nase naie iima ibaide. <sup>11</sup>Ie mei naie farena ibajaidiñaiñuai abido billano, raitimaci: “Nase econo”. <sup>12</sup>Naie iima uai ote:

“Uanaicinona omoimo lloitice. Omoina uiñoñedicue. Econoñeiticue”. <sup>13</sup>Ie isoide. Cue billiruina omoi uiñoñena jira, nagarui cuemo omoi ocuiri.

**Jesúdi patrón ie mullaiaimo ucubena fecaja llua rafue**

<sup>14</sup>Jesús llote:

—Abido cue bia, Jesiñamui ie cominina sedaite. Naie facaise ite comini daje patrómo ite rafue isoide. Patrón jiae enirue jaiacana jira, ie mullaiaína ie ucubena eenotade.

<sup>15</sup>Damiemo cinco diga ucubena fecade. Jiaímiemo menacubena fecade.

Jiaímiemo dacubena fecade. Nagamie ie maijille dinori fecade. Ie mei oni jaide.

<sup>16</sup>Cinco diga ucubena feiñotimie jaillanona, iena fecallena, rana ibade. Iemonia jiae cinco diga ucubena ote.

<sup>17</sup>Menacubena feiñotimie iena fecallena, rana ibade. Iemonia jiae menacubena ote. <sup>18</sup>Daucubena feiñotimie eniruemo naie ucube eenote. Iena fecallena, rana ibañede. Iemonia buena oñede. <sup>19</sup>Digarui illanona, naie patrón abido bite. Naimaci cuentas siadollena, ie mullaiaína uaidote. <sup>20</sup>Cinco diga ucubena feiñotimie bite. Ie ucube atiano raite: “Patrón, cinco diga ucubena cuemo fecadio. Jiae cincona oticue”.

<sup>21</sup>Patrón uai ote: “Raise marena maijidio. Eo mare mullaímadio. Janore ucube o raise sedaja jira, ona ailluena rana sedataitue. Cue diga caimare jaca iitio”. <sup>22</sup>Menacubena feiñotimie bite. Raite: “Patrón, cuemo menacubena fecadio. Iemonia jiae menacube oticue”.

<sup>23</sup>Naimie patrón uai ote: “Raise marena maijidio. Eo mare mullaímadio. Janore ucube o raise sedaja jira, ona ailluena rana sedataitue. Cue diga caimare jaca iitio”. <sup>24</sup>Daucubena feiñotimie bite. Raite: “Patrón, o riirenera uiñoticue. O mullaiaí maijiamona ganacabidio.

<sup>25</sup>Ucubena cue faifiñellena ona jaciruiticue. Ie jira eníruemo o cuemo iga ucubena eenoticue. Jadi, iena jai abido atidicue". <sup>26</sup>Patrón uai ote: "Maraiñedio. Rairaiedio. Cue mullaiai maijiamona cue ucube uana uiñotio. <sup>27</sup>Bancomo naie ucubena jonetiodena, naie ucubemona jiae ucube janore uamona, abido cue bia, iena feiñoticue". <sup>28-30</sup>Ie mullaiaimo lloite: "Naimemona ie ucubena bairo. Diez ucube illamiemo iena feca. Bie maraiñede mullaíma jitiredinomo cuemona oni dota. Nainomo comini duere sefuillanona eeitimaci". Jusiñamui ie jitailla rafuena finodinona: "Mare" raite; iadedi ie jitaille rafuena finoñedinona duere finoite. Jusiñamui omoína duere finoñellena, cue abido billirui omoí uiñoñena jira, Jusiñamui jitaillacina finocana omoí jai.

### Jesúdi comínina duere finolle llua rafue

<sup>31</sup>Jesús lloite:

—Omoína nia llofueiticue. Abido cue bia, nana cue jaienisai diga biiticue. Illaimana ico cue bia, illaima illa ifomo iiticue. Eo siño uaido biiticue. <sup>32</sup>Cue uícomo nana nairaiai ofitimaci. Toica llaudaiai sedaraima ie chivos motomona ie llaudaiai oni fetua isoi, naimacina fetoiticue. <sup>33</sup>Cue jitaillacina finodino diese cue fetuanona, cue nabeimo itataiticue. Cue jitaillacina finoñedino diese cue fetuanona, cue jarifebeimo itataiticue. <sup>34</sup>Cue illaimana jira, cue nabeimo itinomo lloitue: "Cue Moo omoíri iobillanona, omoína jai caimare itata. Cue Moo comínina omoí illa jira, cue sedajanomo mai bi. Nainomo duidomoi. <sup>35</sup>Cue jitaillacina omoí finuamona navui aimetaiticuemo, cuena ecadomoi. Jiroacadicuemo, jinui cuemo fecadomoi. Omoí nairai dine cue

macaria, cuena omoí uiñoñeno omoí jofomo cuena feiñotomoi.

<sup>36</sup>Iniroinidicuemo, iniroi cuemo fecadomoi. Duidicuemo, cuena canollena, cuena jibuisaibidomoi. Cárcelmo iticuemo, cuena canollena, cuena jibuisaibidomoi". <sup>37</sup>Cue jitaillacina finodino dinena cuemo jicanitimaci: "Nama, ¿niruido aimetaitiomo, ona ecadicai? ¿Niruido jiroacadiomo, jinui omo fecadicai? <sup>38</sup>¿Niruido ona ciódicai, cai jofomo ona feiñollena? ¿Niruido iniroina omo fecadicai? <sup>39</sup>¿Niruido duidiomo, ona jibuisaidicai? ¿Niruido cárcelmo itiomo, ona jibuisaidicai?" <sup>40</sup>Uai oiticue: "Uanaicinona omoímo lloitue. Cuena iiñotonomona jamai bue isoidimienca canodomomo, cuena jiae canodomoi" lloitue.

<sup>41</sup>Iemei cue jarifebeimo itinomo lloitue: "Cuemona oni mai jai. Cue cominiñedomoi. Jai fafidomoi. Duere omoí sefuillena, iraimo mai jai. Naie irai jaca duñede. Jusiñamuidi naiena Taife iena jai finode. Jusiñamuidi Taife comini iena jiae jai finode. <sup>42</sup>Cue jitaillacina omoí finoñenamona, navui aimetaiticuemo, cuena ecañedomoi. Jiroacadicuemo, jinui cuemo fecañedomoi.

<sup>43</sup>Omoí nairai dine cue macaria, omoí jofomo cuena feiñedomoi. Iniroinidicuemo, iniroi cuemo fecañedomoi. Duidicuemo, cuena canollena, cuena jibuisaibñedomoi. Cárcelmo iticuemo, cue canollena, cuena jibuisaibñedomoi". <sup>44</sup>Cuemo jicanitimaci: "¿Niruido aimetaitiomo, ona ecañedicai? ¿Niruido jiroacadiomo, jinui omo fecañedicai? ¿Niruido ona ciódicai, cai jofomo ona feiñollena? ¿Niruido iniroinidomoi, omo fecañedicai? ¿Niruido duidiomo, ona jibuisaibñedica? ¿Niruido cárcelmo itiomo, ona jibuisaibñedica?" <sup>45</sup>Uai oiticue: "Uanaicinona omoímo

lloitice. Diga comini cuena iinotimaci. Naimacimona jamai bue isoidimiena omoi canoñena jira, cuena canoñedomo? lloitice. <sup>46</sup>Naimaci jaca isi cacaitimaci; iadedi cue jitailacina finodino cue Moo sedajanomo jaca iitímaci.

**Judíuai illaicomini Jesúna**

**gaitallena siadua rafue**

(Mr. 14.1-2; Lc. 22.1-2; Jn. 11.45-53)

**26** <sup>1</sup>Ie llofueoicaiganona llofuria mei, naimacimo Jesús llote:  
<sup>2</sup>—Pascua railla rafue illena, menarui fíebide. Iena uiñotomoi. Monamona jaie cue billamona, iimana jaidicue. Cue fiodaillena cue Moo cuena oretate. Illaicomini cuena coraillena, birui cuena gaitaitimaci —llote. <sup>3</sup>Naie facaiseconi Jusiñamui diga nanoca ñairainidi, jiaie illaicomini díga, nanoca ñairaima jofomo ofidimaci Nanoca ñairaimadi Caifás. <sup>4</sup>Jesúna jífuiano gaitallena coniniri siadotimaci. Naimiena meinellena jíai siadotimaci. <sup>5</sup>Raitimaci:  
—Pascua railla facaise naimiena nia gaitañeitaci. Naie facaise naimiena cai gaitataia, iena gaiñenamona, comini cai diga fuiritimaci. Nia sedaiticai.

**Jesúmo riño caimare**

**soride ra totaja rafue**

(Mr. 14.3-9; Jn. 12.1-8)

<sup>6</sup>Betania railla nairaimo Jesús jaillanona, Simón jofomo jaide. Simódi jaie efonaitimie. <sup>7</sup>Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. <sup>8</sup>Jesús llofueoicaigano iena ciuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide. <sup>9</sup>Iena fecacadena, eo ailluena raifide. Naie ucube dueredinomo fecadena, caimona mare.

<sup>10</sup>Naimaci ñaiana Jesús uiñua jira, naimacimo llote:

—¿Bue ñellena naiñaiñona jeare ñaitomoi? Mare rafuena cuemo finode.

<sup>11</sup>Omoi diga dueredino jaca itimaci; iadedi omoi diga jaca iñeitice. <sup>12</sup>Cue abimo bie caimare soride ra naiñaiño totajamona, cue fiodaillirui facaina naiñaiño iese finode.

<sup>13</sup>Omoimo uanaicinona lloitice. Ninomo cue mare finoca rafuena bu lloia, naiñaiñona ubiñollena, nana cominimo naiñaiño finoca rafuena lloite.

**Judas micori raillamie Jesúna**

**gaitataiacana rafue**

(Mr. 14.10-11; Lc. 22.3-6)

<sup>14</sup>Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide. <sup>15</sup>Naimacimo jicanote:

—Omoimo Jesúna cue fecaia, ¿niga ucubena cuemo fecaitomoi? —jicanote. Naimaci siadua mei, treinta ucubena naimiemo fecadimaci. <sup>16</sup>Naie facaiseconimona Jesúna gaitatalliruimo naimie ocuride.

**Jesúdi ie fioldaille**

**rafueña llua rafue**

(Mr. 14.12-25; Lc. 22.7-23;

Jn. 13.21-30; 1 Co. 11.23-26)

<sup>17</sup>Pascua railla rafue ia, siritaga rana guíñedimaci. Dani llomenicona guitimaci. Egiptomona cai jaiagai jillobillana comecillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitadio?

<sup>18</sup>Uai ote:

—Jerusalémo omoi jaillanona, omoimo cue llogamieno omoi ciuanona, naimiemo llono: “Cai llofueraima fioldaille facaise iairei ite. O jofomo ie llofueoicaigano diga pascua rafuena finoacade” llono.

<sup>19</sup>Ie muidona ie llofueoicaiganodi ie lluana finodimaci. Pascua railla rafue guille finodimaci. <sup>20</sup>Nairui jitoma ana itemo, Jesús ie doce llofueoicaigano diga nainomo guisaide. <sup>21</sup>Naimaci mesamo guitimacimo, Jesús llote:

—Omoimona damie cuena gaitataite —llote. <sup>22</sup>Iena cacajanona, eo sunaitimaci. Damierie naimiemo jicanoside:

—¿Cuena ñaitio?

<sup>23</sup>Uai ote:

—Omoimona damie bie platomo cue diga llomenico diga mutade. <sup>24</sup>Jusiñamui facaina lloraima cuega isoi, monamona jai billamona fiodaiticue; iadedi cuena gaitataitimie eo duere sefuite. Naimie jeiciñegadena, cuemonamare.

<sup>25</sup>Jesúna gaitataitimiedi Judas micori. Naimie jicanote:

—Maestro, ¿ona iese finotaiticue?

Uai ote:

—Jii, iese finotaitio.

<sup>26</sup>Naimaci nia guitimacimo, llomenicona Jesús llinuanona, Jusiñamuimo iobillacinona fecaja mei, llomenicona tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecin facajano, iena guiño.

<sup>27</sup>Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecajano, raite:

—Biemona nana omoi jiro. <sup>28</sup>Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodí naie rafue facai ie. Cue llua isoi bie vinona omoi jiruamona, cue fiodaillamo omoi comeci. <sup>29</sup>Omoina bene dane iese caimare nabaiñeiticue. Cue Moo sedajanomo omoi diga cue ia,

nainomo omoina dane iese caimare marena nabaiticue. —Iena jirodimaci.

**Jesúdi Pedro naimiena**

**januana llua rafue**

(*Mr. 14.26-31; Lc. 22.31-34;*

*Jn. 13.36-38*)

<sup>30</sup>Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci. <sup>31</sup>Jesús naimacimo llote:

—Cuemo suille rafue muidona, ja naio cuena fainonocaitomoi. Jusiñamui facaina lloraima micori iena jaie cuega: “Toica laudaiai sedaraimana meinetaiticue. Naimie toiniae uaficaida jaitimaci” cuega. Naimie micori caina cuete. <sup>32</sup>Ero, fiodaillamona cue jillua mei, omoi uicodo Galileamo jaiticue, nainomo omoi diga dafaifillena.

<sup>33</sup>Pedro uai ote:

—O finolle rafue muidona nana jiaino ona fainonocaia, ona jaca fainonocaiñeiticue.

<sup>34</sup>Jesús dinena raite:

—Uanai omo lloitucue. Ja naio iitava nia ñaiñenia, dacaiño amani cuena janoitio.

<sup>35</sup>Pedro uai ote:

—O diga cue fiodaiaidedi, ona janoñeiticue.

Nana ie llofueoicaigano daje uaido jiai raitimaci.

**Jesúdi Getsemanímo**

**Jusiñamuimo jiai rafue**

(*Mr. 14.32-42; Lc. 22.39-46*)

<sup>36</sup>Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena, jaiticue.

<sup>37</sup>Pedrona uite. Zebedeo ie jito iaimaiaina jiai uite. Naimie sunaicaide. Ie comeciuri iñede. <sup>38</sup>Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

<sup>39</sup>Naimie janore bai jaillanona, eniruemo bitadate. Jiiide:

—Ore Moo, o jitaia, cuena duere finoñeno; iadedi cue comeci jitailiacinona finoñeno. Cuemo o jitailacino fino —jiiide. <sup>40</sup>Ie mei ie llofueoicaigano dine abido billanona, naimaci inisitemo ride.

Naimacina casitajano, Pedromo jicanote:

—¿Niese raire inidio? daje hora nia iñedemo. <sup>41</sup>Iniñeno. Taife ramo omoina fai raillano, iena omoi iiñofellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoina naimie ocuiñotallena —llote. <sup>42</sup>Ie mei dane jiñllena jaide. Raite:

—Ore Moo, o jitaia, cue duere sefuillamona cuena jillota. Cue fiodaillana o jitaia, o jitaila rafuena finoiticue.

<sup>43</sup>Ie llofueoicaigano dine dane billanona, naimaci uisi llirioilla jira, naimaci inisitemo ride. <sup>44</sup>Abido jaillanona dane jiiide. Aillí daje isoidiuaido jiiide. <sup>45</sup>Ie mei ie llofueoicaiganomo dane billanona, llote:

—Nia inidomoi. Jafaici nia otomoi.

Monamona jaie billanona, iiñana jaidicue; ia ja fiodaiticue. Cuena ja gaitajanona, Jusiñamui jitailla jira, naimieni iiñonéndino anamo ja iiticue. <sup>46</sup>A naidacai. Maiña. Cue gaitataitimie jai bite.

### Jesúna gaitalle rafue

(Mr. 14.43-50; Lc. 22.47-53;

Jn. 18.2-11)

<sup>47</sup>Jesús nia ñaitemo, ieconi Judas micori bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiai atidimaci. Jusiñamui diga nanoca ñairainimona bitimaci. Einamaci dinena jiai bitimaci. <sup>48</sup>Jesús dine naimaci nia

riñenia, Judas micori naimie diga bitinomo jai llote:

—Jesúna omoi uiñollena, naimieni llibanoiticue. Ie mei naimieni gaita —llote. <sup>49</sup>Jesús dine naimaci rillanona, Judas micori Jesúns dine raire jaide.

Naimieni uaidoté:

—Maestro, jai biticue. —Ieconi naimieni llibanote. <sup>50</sup>Jesús dinena raite: —¿Bue ñiaabitio?

Ie mei Judas micori diga bitinodi Jesúna gaitadimaci. <sup>51</sup>Iena ciuanona, Jesúns diga itinomona damie ie lloebi llinuanona, Jusiñamui diga nanoca ñairaima ie mullaima jefona jaibonote. <sup>52</sup>Jesús naimiemo llote:

—O furiacania, o jiai fiodaitio. O lloebi dane eeno. Cue riiduanona, furiñeno. <sup>53</sup>Cuena riidollena, cue Moomo cue jicaia, eo ailluena jaienisaí cue dine naimie oretaite; <sup>54</sup>iadedi iese cuena riidoia, Jusiñamui facaina lloraini micoriai cuegafuiai suiñeite. Cue fiodaille rafuena cuetimaci —llote.

<sup>55</sup>Ieconi naimie dine bitinomo Jesúls llote:

—Omoi butaralluna uitomoi. Omoi lloebi diga jiai bitomoi. Fiiriraimadicueta cuena omoi gaitajaibilla. Jusiñamui jofomo nagarui llofuecabiticue; iadedi cuena gaitañedomoi. <sup>56</sup>Nana bie rafue suide, Jusiñamui facaina lloraini micoriai cuegafuiai suillena —llote. Ie facaise nana naimie llofueoicaigano naimieni fainonocallano, aisidimaci.

### Jesúdi judíuái illaicomini dine illa rafue

(Mr. 14.53-65; Lc. 22.54-55, 63-71;

Jn. 18.12-14, 19-24)

<sup>57</sup>Jesúna gaitadinodi Caifás jofomo Jesúna uitimaci. Caifás Jusiñamui diga nanoca ñairaima. Naimie jofomo jiai illaicomini jai ofidimaci. Moisés micori

llogacinona llofueraini ofidimaci. Einamaci jiai ofidimaci.<sup>58</sup> Jesús jinafona Pedro aarena jaide. Caifás jofo nairaibírimo jaide. Naie rafue fuiduana naimie uiñollena, nainomo ite jofomo maijiraini diga raide.

<sup>59</sup>Naimieno meinellena, nana naie illaicomini Jesúmo nicino illana uiñoiacadimaci.<sup>60</sup>Iena cominiri siadotimaci; iadedi naimiemo jaca nie isoide maraiñede rafue illana uiñoñedimaci. Diga comini Jesúna ñaitimaci; iadedi taíno llotimaci. Ie mei menamie bitiiaimaiai.<sup>61</sup>Raitiiaimaiai:

—Bimie llote: “Jusiñamui jofona judairedicue. Judaia mei, darui amani illanona, iena dane finoredicue” —llotiiaimaiai.

<sup>62</sup>Jusiñamui diga nanoca ñairaima Jesúmo jicanote:

—¿Niese iaimaiai uai oitio? ¿Nie isoide rafue ona llogidotiaimaiai?

<sup>63</sup>Jesús uai oñede. Naie ñairaima dinena llote:

—Cai Jusiñamui cajede. Naimie caña uiñua jira, uanaicinona cai lloñenia, caña duere finoite. Uanaicinona caimo llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

<sup>64</sup>Jesús dinena uai ote:

—Jii, naimiedicue. Iena raise llotio. Monamona jaie cue billamona, iimana jaidicue;; iadedi ico jiairuido illaimana cue illena, Jusiñamui ecimo cue raillana omoi naíraí cioitimaci. Mona ullie motodo cue abido billena jiai cioitimaci.

<sup>65</sup>Iena cacajanona, naimiemona Jusiñamuina Jesús jeare ñaia jira, naie nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimieno llogidotinona jai jitaiñedicai. Ie ñaímona dama naimie abina llogidote.<sup>66</sup>¿Niese naimieno raitomoi?

Jiai illaicomini dinena uai otimaci:

—Naimie fiadaillesa.

<sup>67</sup>Ie mei naimie uecona tuallaitimaci. Naimieno ducoídmaci. Jiai bucoídmaci.<sup>68</sup>Raitimaci:

—O Cristodiodena, ¿bu o bucoia? caimo llono.  
Jesús uai oñede.

**Pedrodi Jesúna janua rafue**  
(Mr. 14.66-72; Lc. 22.56-62;  
Jn. 18.15-18, 25-27)

<sup>69</sup>Naie facaise Pedro naie jofo nairaibírimo ite. Naie jofo nama mullaiñó naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite.<sup>70</sup>Nana nainomo itinomo Pedro llote:

—O lluana uiñoñedicue.

<sup>71</sup>Nase fuemo Pedro jaidemo, naimieno jiaie mullaiñó ciuanona, nainomo itinomo llote:

—Bimiedi Nazaret ie Jesús comini imie.

<sup>72</sup>Pedro uai ote:

—Uanaicinona cue lluana Jusiñamuidi uiñote. O llogamieno uiñoñedicue.

<sup>73</sup>Dallu illanona, nainomo itino Pedro dine billano, naimiemo llotimaci:

—Ua Jesús comini imiedio, o uai bairia jira. Naimie isoi ñaitio.

<sup>74</sup>Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, Jesús uiñoñedicue.

—Ieconi iitava ñaite.<sup>75</sup>Iena cacajano, Pedro Jesús lluana uibiñote. Jaive Jesús Pedromo llote: “Itava nia ñaíñenia, dacaiño amani cuena janoitio” llote. Iena uibiñuanona, Pedro jino jaillano, sure eede.

**Pilato dine Jesús illa rafue**  
(Mr. 15.1; Lc. 23.1-2; Jn. 18.28-32)

**27**<sup>1</sup>Monaídem, nana Jusiñamui diga nanoca ñairainidi, nana einamaci diga, Jesús siadotimaci.

Naimiena meinellena siadotimaci.  
2Siadua mei, Jesúna maianona, Poncio Pilatomo uitimaci. Romanuái railla nairai anamo naimaci illa jira, Pilatodi naimaci gobernador.

### Judas micori fiodailla rafue

3Judas micori Jesúna jai gaitatate. Naie illaicominí Jesúna meiniana lluana naimie micoridi uiñuamona, ie começí iuaina meidote. Illaicominimo ie treinta diga ucubena abido atide. <sup>4</sup>Raite:  
—Jesús maraiñede rafuena jaca finoñede. Naimie fiodañeite. Naimiena cue gaitatajamona, maraiñediginona jai finodicue.

Uai otimaci:

—¿Bue ñe caimo lluabitio? O rafue caimo duiñede.

<sup>5</sup>Je mei Judas micori Jusiñamui jofo jeraimo naie ucubena fo jamai faite. Jino jaillanona, oni jaide. Dama naimie abina meinellena, cimaio llirinote raona. <sup>6-7</sup>Jusiñamui diga nanoca ñairaini naie ucubena iraia mei, iena siadotimaci. Coniniri raitimaci:

—Naie isoide ucube nainomo joniana Moisés micori jaie rairuilla jira, Jusiñamui jofomo ite ucubeocabiranomo jonenidicai. Naie ucube diga damie meinellena ibadicai. —Je jira naie ucube diga eniruena ibadimaci. Naie illanodi jiñora ouilla enirue. Jiaie nairaimona bu bia, naimie fiodaia, naie eniruemo naimiena raillena, iena ibadimaci. <sup>8</sup>Naie ucube muidona damie fiodailla jira, birui naie enirue mamecidi dirue ie enirue. <sup>9</sup>Iemona Jeremías micori jaie cuega rafue jai suide. Naimie micoridi Jusiñamui facaina lloraima. Naimie micori cuega: “Cai Israel railla cominimona damierie railla jira, naimiena meinellena, treinta ucubena fecaitimaci. <sup>10</sup>Naie ucube diga jiñora ocabilla eniruena ibaitimaci, cai Nama Jusiñamui llua isoi” cuega.

### Pilato dine Jesús illa rafue (Mr. 15.2-5; Lc. 23.3-5; Jn. 18.33-38)

11Pilato railla gobernador uicomó Jesúna atia mei, Pilato Jesúmo jicanote:

—¿Judíuaí comini illaímadio?

Jesús uai ote:

—Jii. Raise llotio.

12Je mei Jusiñamui diga nanoca ñairainidi, einamací diga, naimiena llogidote; iadedi naimie dinena uai oñede. Je abina riidoñede. <sup>13</sup>Je muidona Pilato naimemo lloote:

—Diga rafuena ona llogidotimaci.

¿Niese uai oñedio?

14Jesús nia uai oñede. Je jira Pilato uainicaide.

### Pilatodi Jesús fiodaillana llua rafue

(Mr. 15.6-20; Lc. 23.13-25;  
Jn. 18.38—19.16)

15Naga año pascua railla rafue facaiseconi cárcelmo itinomona Pilatodi comini jícacamieno jamai jino orede.

16Bie año cárcelmo Barrabás raillamie ite. Naimie mamecidi eo are soride. <sup>17</sup>Naie rafue illa jira, ailluena comini naimie dine ofillano, naimacimo Pilato jicanote:

—Bie año cárcelmona, ¿bumie jino cue oretajana jitaídomoi? Barrabás raillamie ite. Jesúr raillamie jiai ite. Naimedi Cristona jiai mamecirede.

18Iese jicanote; iadedi naimedi Jusiñamui diga nanoca ñairaini Jesúri uradoillana uiñote. Naimaci Jesúna meineiacanana jiai uiñote. <sup>19</sup>Je maijiracomó naimie nia illanona, naie facaise Pilato ai naimie dine rabe orede. Cuete: “Bimedi maraiñede rafuena jaca finoñede. Naimiena duere finoñeno. Jaive naio cue nicaírrillano, naimie muidona cue começí jarire ite”.

20Ailluena comini Pilato dine ofillanona, Jusiñamui diga nanoca ñairainidi, einamací diga, cominimo llotimaci:

—Pilato caimo jicaneria, Barrabás jino oretallena jica. Jesús meinellena jica  
—llotimaci. <sup>21</sup>Comini ofilla mei,  
naimacimo Pilato dane jicanote:  
—¿Nimie cue jino oretajana  
jitaidomo?

Uai otimaci:  
—Barrabás.  
<sup>22</sup>Pilato dinena jicanote:  
—¿Niese Jesúna cue finuana  
jitaidomo? Naimiedi Cristona jiai  
mamecirede.

Nana uai otimaci:  
—Naimienra cruzmo corai.  
<sup>23</sup>Pilato dane jicanote:  
—¿Nie isoide maraiñede rafuena  
finode?  
Naimaci dinena ado ibi llonoidimaci:  
—Naimienra corai.

<sup>24</sup>Jesúna jino oretajana jitaiñedimaci.  
Iena Pilato uiñuamona, comini jai uri  
iñenana naimie ciuanona, jinui diga ie  
onollina jocuanona raite:

—Bimie fiodaillana cue muidonañede.  
Bie rafue cuemo jai duiñede. Naimie  
fiodaite omoi muidona.

<sup>25</sup>Uai otimaci:  
—Dama iesede. Naimie fiodaite cai  
muidona. Jiai cai uruiai muidona.  
<sup>26</sup>Ie mei Pilatodi Barrabás naimaci  
jitailla jira, jino orede; iadedi Jesúna  
sechedotajanona, naimienra coraillena  
orede. <sup>27</sup>Dajerie soldaduaidi Pilato  
jofomo Jesúna uite. Nana soldaduai  
nainomo ofidimaci. <sup>28</sup>Naimie iniroi  
duiñuano, naimienra jiduirede iniroina  
jitatimaci. <sup>29</sup>Eecuaimona niga  
nuiciraina naimie ifogimo jitatimaci. Ie  
nabeillimo radosina jonete, illaimana  
naimie illa isoi. Caiñici ifodo raidimaci,  
illaimana naimie illa isoi. Raitimaci:

—Jadi, judíuaí illaima. —Iese  
raillanona naimienra jifanododimaci.  
<sup>30</sup>Naimienra tuallaitimaci. Naimie  
onollimo ite radosina naimaci

llinocaida, naiedo naimie ifogina  
buta-butadimaci. <sup>31</sup>Jesúna naimaci  
jifanodua mei, naimie jiduirede iniroina  
duiñodimaci. Nano naimie iniroina dane  
abido naimiemo jítadimaci. Ie mei  
naimienra coraillena oni uitimaci.

### Jesúna coraia rafue

(*Mr. 15.21-32; Lc. 23.26-43;*  
*Jn. 19.17-27*)

<sup>32</sup>Jerusalémona naimaci jaillanona,  
Cirenra railla eniruemonra bitimiem  
dafaifidimaci. Naimie mamecii Simón.  
Naimienra Jesú uiga cruzna  
rocatatimaci. <sup>33</sup>Gólgota raillanomo  
jaidimaci. Ifocoraina eruilla jira, iese  
mamecirede. <sup>34</sup>Nainomo rillanona, ie  
abi isirena cacaíñella, vinomo erirede  
rana faianona, naimienra fecadimaci;  
iadedi iena naimie facajano, iena  
jiroñede. <sup>35</sup>Naimie coraia mei, cruzna  
naidania mei, naie soldaduai naimie  
iniroi daní coninimo fecasite. Naie  
iniroi bu uille raillanona uiñollena,  
jifanododimaci. <sup>36</sup>Ie mei ana raidimaci,  
naimienra eruaillena. <sup>37</sup>Naimie ifogi  
afebeimo ie llogiduafuena jonetimaci.  
Iese cuela: “Bimiedi Jesú. Judíuaí  
comini illaima”. <sup>38</sup>Ie mei mena fiiriruide  
iaimaiaina coraidimaci. Damie Jesú  
nabeimo coraica. Jiaimie Jesú  
jarifebeimo coraica. <sup>39</sup>Naisodo jamai  
jaidino Jesúna mameritimaci.  
Mamerillamona, ifogiaina jaididimaci.  
<sup>40</sup>Raitimaci:

—Navui raisoidio: “Jusiñamui jofona  
judáiiticue. Darui amani illanona, iena  
dane finoiticue” raisoidio. Ie muidona  
dama o abina mai jilloita. Jusiñamui  
Jitodiodena, cruzmona ana bi.

<sup>41</sup>Ie facaise Jusiñamui diga nanoca  
ñairaini naimienra mameritimaci. Moisés  
micori llogacino llofueraini naimienra  
jiai mameritimaci. Einamaci naimienra  
jiai mameritimaci. Raitimaci:

<sup>42</sup>—Jiaie cominina jillotate; iadedi dama naimie abina jilloitanide. Naimiedi cai judíuai comini illaima raillamiedena, cruzmona naimie ana niade billasa. Le mei naimiena iinoiticaí. <sup>43</sup>“Jusiñamui Jitodícué” naimie raila jira, naimiedi Jusiñamuina ja iñotena, Jusiñamui jitaia, Jusiñamui naimiena jillotaite. —Iese naimiena mameritimaci. <sup>44</sup>Naimie diga coraica iaímaiai daje isoi naimiena mameritiiaímaiai.

### Jesús fiodailla rafue

(*Mr. 15.33-41; Lc. 23.44-49;*  
*Jn. 19.28-30; He. 9*)

<sup>45</sup>Jitoma naidai itemona, daje amani horas mona jitibicaide. <sup>46</sup>le meinomo judíuai railla uaido Jesús ado jídaioide: —Elí, Elí, ¿lama, sabactani? —jídaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

<sup>47</sup>Iena cacajano, nainomo jamai itinomona damierie raitimaci: —Naimie jaie Jusiñamui facaina lloraima Elíana uaidote —raitimaci. <sup>48</sup>Naimacimona damie jarire jaillanona, fibecode ramo vinona faite. Radosimo jillillano jirrollena, naimemo a fecade. <sup>49</sup>Ieconi jiaino raitimaci:

—Ina nai. Dallu seda. Elías naimiena jilloitajaibillena sedaiticai.

<sup>50</sup>Ieconi Jesús dane ado curioita, fiodaite.

<sup>51</sup>Naie facaise Jusiñamui jofomo ie fetaca iniroife ana anaba jillacimo motodo menafe cuararide. Ieconi ñuisaño suide. Iemonia nofie oni bojode. <sup>52</sup>Diga raiafuai econote. Jesús jillua mei, raiafomona, fiodaillamona, ailluena Jusiñamuina iñotinodi jillodimaci. <sup>53</sup>Le mei Jerusalémo naimaci jaillanona, diga comini naimacina ciodimaci. <sup>54</sup>Nainomo

ite capitán, ie soldaduai diga, Jesús fiodaillana eruaidimaci. Ñuisaño ñuillana cacadimaci. Nana suide rafuena cianona, eo jacinaillamona, naimie raite:

—Uanai bimedí Jusiñamui Jito.

<sup>55</sup>Ailluena riñoniai naie rafuena aarena ciodimaci. Naimena canollena, Galileamona Jesús diga navui bitimaci.

<sup>56</sup>Naimaci motomo María Magdalena ite. Jiaie María jiai ite. Naiñaiñodi Jacobo ei. Naiñaiño jiai José ei. Zebedeo uruiai ei jiai ite.

### Jesús raiafomo jonia rafue

(*Mr. 15.42-47; Lc. 23.50-56;*  
*Jn. 19.38-42*)

<sup>57</sup>Jitoma ana itemo, eo ucuberedimie Pilato dñe jaide. Naimiedi Arimatea nairai imie. Naimie mameci José. Jesús dibeimo jaidimie. <sup>58</sup>Jesús abina jicallena, Pilato dñe jaide. Pilato “Jee” raillanona, Jesús abina naimie ollena llote. <sup>59</sup>Ie mei Jesús abina cruzmona ana José uanona, jeanide mare userede iniroi diga naimie abina ferinote.

<sup>60</sup>Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonia mei, José naifomo noficina ñuitade. Naifo ibaide. Le mei oni jaide. <sup>61</sup>María Magdalena raiago uico dñe jiaie María diga rainadattiaíñuai.

### Soldaduai Jesús raiago sedaja rafue

<sup>62</sup>Ie areruido, pascua railla rafue illarui, dajerie judíuai illaimoni Pilato dñe jaidimaci. <sup>63</sup>Raitimaci:

—Ero, naie abi caitadimie nia fiodaiñenia, navui llote: “Cue fiodaillamona, darui amani illanona, jilloiticue”. <sup>64</sup>Ie jira o uai oreta, darui amani raifi naie raiago raise ibaillena, naimie llofueoicaigano nainomo jaillanona, naimie abi ari oi raillano.

Naimie abina naimaci fianona lloitimaci: "Naimie jai jillode". Iese suia, cominina eo jifueitimaci.

<sup>65</sup>Pilato uai ote:

—Soldaduai omoido oreiticue, naie raiifo raise sedallena.

<sup>66</sup>Ie jira jaidimaci. Raona nitajano, raiifo raise ibaidimaci. Naiena sedallena, soldaduaina nainomo fainonocaidimaci.

**Jesús fiodaillamona jillua rafue**  
(*Mr. 16.1-8; Lc. 24.1-12; Jn. 20.1-10*)

**28** <sup>1</sup>Sábado fuilla mei, monaiacania, María Magdalena, jiae María diga, raiafona jibuisaidiiañuai. <sup>2</sup>Ieconi ñuisaño suide. Monamona billanona, Jusiñamui jaeníci raiafomo ibaica noficina oni ñuitade. Naie noficimo raide. <sup>3</sup>Eo queniredena eruaide. Naimie iñiroi eo userede. <sup>4</sup>Nainomo ite soldaduai naimieno eo jacinaillamona, abi docaidimaci. Iemonia fiodaitino isoi dallu itimaci. <sup>5</sup>Ie facaise naie jaienicidi dinena naie riño iañuaimo llote:

—Jaciruiñeno. Coraica Jesúna omuiño jenuana uiñoticue. <sup>6</sup>Naimie bene iñede. Naimie llua isoi, fiodaillamona naimie jai jillode. Naimie ifo jeraimo biillano mai jibuisaibi. <sup>7</sup>Ie mei ie llofueoicaigano díne raire omuiño jai. Fiodaillamona naimie jilluana naimacimo llono. "Galileamo omoi uicomó naimie jaite" llono. Bie rafue omuiño jai lloticue —llote. <sup>8</sup>Ie jira raiafomona raijicaillanona, eo iobillanona, raire jaidiiañuai. Ie llofueoicaigano díne aisidiiañuai. <sup>9</sup>Ie llofueoicaigano díne iañuau nia riñenia, Jesús iañuaimo dafaifillano, raite:

—Itomuiño. —Naimie díne iañuau rillanona, naimieno sedallena, naimie eillina llinottiiañuai. <sup>10</sup>Jesús dinena raite:

—Jaciruiñeno. Cue llofueoicaiganomo llono: "Galileamo jai. Nainomo omoina citoiticue" llono.

### **Soldaduai raiafona sedademo suide rafue**

<sup>11</sup>Jaidiiañuaimo, nainomo ite soldaduaimona dajerie Jerusalémo jaide, nanoca Jusiñamui diga ñairainimo nana naimacimo suide rafue llollena. <sup>12</sup>Iena cacajano, einamaci diga iena siadotimaci. Ie mei naie soldaduaimo ucubena fecadimaci. <sup>13</sup>Raitimaci:

—Jiae cominimo llono: "Cai iña mei, ie llofueoicaigano ie abiña fiano uitimaci" llono. <sup>14</sup>Iena cai gobernador fidia, naimie diga ñaiticai, omoina naimie duere finoñellena —raitimaci. <sup>15</sup>Ie jira naie ucubena feiñuanona, cominimo illaicomini llua isoi llotimaci. Naie rafue uiñocana jaide. Birui nia iena uiñocana jaide.

**Jesús ie llofueoicaiganomo iraícaíño lloga rafue**  
(*Mr. 16.14-18; Lc. 24.36-49; Jn. 20.19-23*)

<sup>16</sup>Ie mei Galileamo naie once llofueoicaigano jaidimaci. Jesús lloga anedumo jaidimaci. <sup>17</sup>Naimieno naimaci ciuanona, naimieno sedadimaci; iadedi dajerie Jesús jilluana raise nia iinoñedimaci. <sup>18</sup>Jesús dinena raite:

—Cue Moo cue uai cuemo iga, monamo cue jitaila rafue cue finollena, eniruemoo cue jitaila rafue cue finollena. <sup>19</sup>Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza. <sup>20</sup>Nana omoimo cue lloga rafuena naimaci iena iñollena, llofue. Nia abido cue biñenia, omoina canollena, omoi diga cue Joreño jaca ii te —llote. Mai. Macaibaite. Mateodicue.

## MARCOS JESUCRISTO ENIRUEMO ILLA RAFUE CUIAFUE

**Jofue iñenanomo Juan Bautista  
micori illa rafue**  
(Mt. 3.1-12; Lc. 3.1-9, 15-17;  
Jn. 1.19-28)

**1** <sup>1-2</sup>Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micori Jusiñamui facaina jaie lluamona, Juan Bautista micori llofuelleña llote. Iena suillamona, Jesucristo eniruemo ite rafue tainede. Iena nano lloiacadicue. Isaías micori cuete:

“Ero, o uicodo cue rafuena llollena, damiena oretaiticue” Jusiñamui raite.

**3** <sup>3</sup>Jofue iñenanomo damie jidai-jidaillana cacadicue. Naimie llote: “Cai Nama biiite. Naimie naiso atona raise fino” llote.

Naisonaa llote; iadedi naimie uaina naimaci feiñollena, naimaci comeciai marena finuana ñaite.

<sup>4</sup>Isaías micori llua isoi, Juan Bautista raillamie micoridi Jusiñamui rafuena jofue iñenanomo llofuecana jaide. Cominina dafaifia, naimacimo llote:  
—Omoi jeacinona fainonocaida, Jusiñamui dibeimo omoi comeciai iuaillai meido. Iemonaa omoi jeacinona feitaite. Omoi comeciai iuaillai omoi meidoia, cominina iena uiñotallena, mai omoi bautizallomoi.

<sup>5</sup>Diga comini naimie micori dine jai jaisoidimaci. Jerusalémona, nana Judeamona, nana Jordán fuemonia jai jaisoidimaci. Jusiñamuimo naimaci jeacinona naimaci llua meino, naimacidi Juan micori bautizaga.

<sup>6</sup>Juan micoridi camello itiraiai ie nulla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite. <sup>7</sup>Cominimo llote:  
—Cue baifemo faitimie bie facaise biite. Jamai bue cue isoilla jira, naimienaa cue canuana uiñóñedice. <sup>8</sup>Jusiñamui dibeimo omoi illamona, jinui diga omoina bautizadice; ia naimie bia, naimie dibeimo omoi jaillamona, Jusiñamui Joreñona omoimo itataite.

**Jesús bautizaja rafue**  
(Mt. 3.13-17; Lc. 3.21-22)

<sup>9</sup>Jordán dine Juan micori nia ia, Galileamona, Nazaretmona naimie dine Jesús bite. Nainomo Jesúdi Juan bautizaga. <sup>10</sup>Bautizaja mei, jinuimona billanona, ieconi mona bojodena ciode. Jusiñamui Joreño, ucugí isoi, naimie emodomoo ana billana ciode.

<sup>11</sup>Monamona Jusiñamui llote:  
—Cue isiruiga Jitodio. Ori iobidicue.

**Jesúna Taife ramo faia rafue**  
(Mt. 4.1-11; Lc. 4.1-13)

<sup>12</sup>Jesús bautizaja mei, Jusiñamui Joreño jofue iñenanomo naimienaa uite.

<sup>13</sup>Comini nainomo iñede. Difai ocainaiai itimaci. Nainomo cuarenta digarui ite. Ie facaise Taife naimieno ramo faite; ia Jusiñamui jaienisai naimieno sedadimaci.

**Galileamo Jesús illa rafue**  
(Mt. 4.12-17; Lc. 4.14-15)

<sup>14</sup>Naie facaise Juan Bautista micorina Herodes gaítaja mei, Galilea railla eniruemo Jesús jaide. Jusiñamui ie mare rafuena llocana jaide. <sup>15</sup>Llote:

—Jusiñamui birui omoina sedaacadé. Ie cominina omoi jaillena birui jitaide. Jusiñamui díbeimo illena, omoi jeacínona fainonocaida, omoi comeciai iuaina meido. Bie rafuena mai omoi iino.

**Ie llofueicaigano jaillena, Jesúdi nagaamagamiéna fetua rafue**  
(Mt. 4.18-22; Lc. 5.1-11)

<sup>16</sup>Jiairuido Galilea railla jorai fuemo Jesús macaritemo, menamieno ciode. Naga ie ama iaimaiai. Damie Simón. Jaimie Andrés. Llojina fairaima iaimaiai. Iese jaca naie iaimaiaidi majiuidiiaimaiai. <sup>17</sup>Iaimaiaimo llote:

—Cue diga omico jaoicaillena, cue diga mai bi. Cue llofueganona omico jaillena jitaídigue. Lliciaína birui ocabitomico; iadeti cominina oitomico, cue díbeimo naimaci illena.

<sup>18</sup>Iena cacajanona, ieconi iaimaiai llojina fainonocaida, naimie diga jaidiiaimaiai. Ie llofueganona jaillena, jaidiiaimaiai. <sup>19</sup>Lliai bai Jesús jaide, jiae menamieno ciode. Naga ie ama iaimaiai. Damie Jacobo. Jaimie Juan. Iaimaiai moodi Zebedeo. Botemo iaimaiai llojina sigaiddiamaiai. <sup>20</sup>Jesús iaimaiaina uadote, ie llofueganona jaillena. Ie majiraini diga iaimaiai moona fainonocaida, botemonia ari billanona, Jesús diga jaidiiaimaiai.

**Jesúdi Janaba anamo itímie**  
**jillotaja rafue**  
(Lc. 4.31-37)

<sup>21</sup>Bai jaillanona, Capernaumo ie llofuegano diga Jesús ride. Nainomo naimie ia, sábadoruimo judíuái ofiracomo jaide. Nainomo llofueté.

<sup>22</sup>Moisés micori llogacino llofueraini isoi llofueñede. Illáima uai isoi naimie llofuia jira, nainomo ite comini naimie llofuiamona rajjicaidimaci. <sup>23</sup>Janaba anamo illamie nainomo ite. <sup>24</sup>Jesús llofuiiana cacaíta, Janabadi iimana ado curioitade:

—Odi Nazaret ie Jesús. ¿Bue ñeacadío cai diga? Caina duere finuaibidio. Ona uiñoticue. Odi Jusiñamui ie mare fetocamidio.

<sup>25</sup>Jesús naimieno lletade:

—Lliicai. Naimiemona oni jai.

<sup>26</sup>Janaba naimieno docaitajanona, ado curioillanona, naimiemona oni jaide.

<sup>27</sup>Iena ciuanona, nana nainomo itino rajjicaidimaci. Cominiri siadotimaci:

—¿Niese ite? Bimie jiae uaido llofueté. Janabamo naimie llua mei, iimamona Janaba oni jaide. Janaba Jesús uaina iinote.

<sup>28</sup>Iemonia nana Galilea eniruemo Jesús mameci are soride.

**Jesús Pedro jifaiñona jillotaja rafue**  
(Mt. 8.14-15; Lc. 4.38-39)

<sup>29</sup>Ofiracomona Jesús jaillanona, ie llofuegano diga, Simón jofomo jaide. Andrés nainomo jiae jainaiaide. Jacobo, Juan diga jiae fo jaide. <sup>30</sup>Ie facaise Simón jifaiño duide. Abi cuaride. Nainomo itino Jesúmo naiñaiño duillana llote. <sup>31</sup>Iena cacajanona, naiñaiño dine jaillanona, Jesús naiñaiño onollina ilinote. Naiñaiñona naidacaitade. Ieconi abi cuarilla fainonocaida. Guille finuanona, ie jofomo itinona ecade.

**Jesúdi ailluena duidinona  
jillotaja rafue**  
(Mt. 8.16-17; Lc. 4.40-41)

<sup>32</sup>Navuida, jitibicaidemo, Jesús díne comini ailluena duidinona atidimaci. Janaba anamo itinona jiai atidimaci. <sup>33</sup>Nana Capernaum comini naie jofo nasemo ofidimaci. <sup>34</sup>Jesúdi diga duicona ailluena duidinona jillotate. Ailluena comini Janaba anamona jillotate. Naimiena jananai uiñua jira, Jesús naimaci ñaiana rairuide.

**Galileamo Jesús llofuia rafue**  
(Lc. 4.42-44)

<sup>35</sup>Je areruido nia monaiñenia, Jesús casillanona, Capernaumona comini iñenamoto Jesú jaide. Nainomo Jusiñamuimo jiide. <sup>36</sup>Monaia, casidemo, jofo Jesú iñena jira, Simón, ie nabaiñiai diga, Jesúna jenuaide. <sup>37</sup>Baillanona, raite:

—Nana comini ona jenodimaci.

<sup>38</sup>Jesú uai ote:

—Jiae nairaiai díne mai cai jaiili. Nainomo llofueiacadicue. Ie jira Capernaumona jino biticue.

<sup>39</sup>Nana Galileamo Jesús jaide. Judíuai ofiracuaimo llofuecana jaide. Ailluena cominimona jananaiña oni oretate.

**Jesúdi efonaitimieno jillotaja rafue**  
(Mt. 8.1-4; Lc. 5.12-16)

<sup>40</sup>Ie facaise efonaitimieno Jesús díne billanona, naimieno raise uaiduamona, cañici ifodo ana rainadate. Raite:

—O jitaiadedi, cuena jillotaredio.

<sup>41</sup>Naimieno duenallamona, Jesús ie onollí naimieno oni ñuitajanona, naimieno jetade. Raite:

—Ona jillotaiacadicue. Mai o jillo.

<sup>42</sup>—Ieconi naimieno jillode. <sup>43</sup>Ie facaise Jesús naimieno oretaiacanano, naimieno riire llote:

<sup>44</sup>—O jilluana bumó lloñeno; iadeti Jerusalémo Jusiñamui jofomo Jusiñamui diga ñairaima díne mai jai. O jilluana comini raise uiñollena, naimieno o abina acatajai. Moisés micori jaie lloga rana Jusiñamuimo feca.

<sup>45</sup>Iese Jesús naimieno llote; iadeti Jesús finoca rafue llocana eo uite. Ie muidona ailluena comini Jesúna cíoacana jira, Jesús marefodo comini illanomo jaisoiñede; ia comini iñenamoto jaisoide. Iese jaisoide; ia naganomona naimie díne biñoidimaci.

**Jesús tisitaitimieno jillotaja rafue**  
(Mt. 9.1-8; Lc. 5.17-26)

**2** <sup>1</sup>Nigarui illanona, Capernaumo Jesús dane abido ride. Comini iena fidianona, <sup>2</sup>ie risoillacomo naimie díne ofidimaci. Ailluena billa jira, fo illino iñede. Nasemo jiai eo ofidimaci. Jesús naimacimo Jusiñamui rafuena llofuetu. <sup>3</sup>Cominina Jesús llofuetemo, naimie díne nagaamagamie ie biiramo biide tisitaitimieno atidimaci. <sup>4</sup>Ailluena comini illa jira, Jesús díne naimaci rinidimaci. Naie jofo bibanilla jira, jofo emodomoo a jaidimaci. Jofo beicimo ite tidabacido a jaidimaci. Jofo emodo econuano, Jesús ecímo naimieno ie biiramo biide diga, rao diga, ana ñuitadimaci. <sup>5</sup>Iena Jesús ciuanona, tisitaitimie jilluana naimaci iñuana Jesús uiñote. Tisitaitimieno llote:

—Nabai, o jeacino cue feitaja jira, iena jai oni dotadicue. Ie facai ibana jai oñeiticue.

<sup>6</sup>Nainomo itinomona damierie Moisés micori llogacinona llofueraini nainomo raidimaci. Comecina facadimaci:

<sup>7</sup>“¿Niese bimiedi iese llote? Dama Jusiñamui jeacintono dotarede. Bimie Jusiñamuñede; ia Jusiñamui ifomo iacade. Jusiñamuina jai jeare ñaite”.

<sup>8</sup>Naimaci comeciai facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomo? <sup>9</sup>Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona, o biira ferinocaída, mai macari” cue lloia, cue uai siñonana uiñoñotomoi. <sup>10</sup>Monamona jaie cue billanona, iimana jaidicue. Ie jira jeacino oni dotaja uai cuemo ite. Iena omoi uiñollena, tisitaitimemo lloitice: <sup>11</sup>“Mai naidacai. O biira ferianona, o jofomo mai jai”.

<sup>12</sup>Iese naimie raillamona, tisitaitimie jillode. Naidacaída, ie biira feria mei, naimacimona jino jaide. Nana nainomo itino raijicaidimaci. Lemona Jusiñamuimo iobillacínona fecadimaci. Raitimaci:

—Bie isoide siño comena jaca cíoñedcai.

**Jesúdi Levína fetua rafue  
(Mt. 9.9-13; Lc. 5.27-32)**

<sup>13</sup>Jiairuido jorai fuemo Jesús dane jaide. Ailluena comini naimie díne ofillanona, naimacina llofueté. <sup>14</sup>Llofuiá mei, Jesús baí macaritemo, Leví raillamiéna ciode. Levídi Alfeo jito. Gobierno ucube ouillanomo naimie majiuide. Nainomo rádena Levína ciode. Naimiemo llote:

—Cue llofuegamiéna o jaillena, cue diga bi. —Naidacaída, Jesús diga jaide.

<sup>15</sup>Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacínodo raise jaiñedino jai guisaibitimaci. <sup>16</sup>Ie facaise fariseuai comini, Moisés micori llogacínona llofueraini diga, nainomo jamai

bitimaci. Jesúna ciuanona, naimie llofueoicaigano jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci.

<sup>17</sup>Iena cacajano, Jesús llore:

—Ecairedinodi médicona jitaiñedimaci; ia duidinodi médicona jitaidimaci. Ie isoide. Mareuidino cuena jitaiñedimaci; ia maraiñedino cuena jitaidimaci. Jusiñamui dibeimo mareuidinona uaibiñedicue; iadedi maraiñedínona uaibiticue. Omoímona maraiñedino diga nabairiticue; ia naimacina uaibiticue.

**Jesúmo comini guiñenana  
jicanua rafue  
(Mt. 9.14-17; Lc. 5.33-39)**

<sup>18</sup>Ie facaise Jusiñamuina raise iobitallená, Juan Bautista llofueoicaigano guiñenaruillai ite. Ie facaise fariseuai comini jaii guiñenaruillai ite. Jesús díne comini billanona, naimiemo llote:

—Cai einamaci llua isoi, Jusiñamuina naimaci raise iobitallená, guiñenaruillai illa facaiseconi Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano iedo jaii jaidimaci; ia o llofueoicaigano jaca guitimaci. ¿Bue ñellena cai einamaci rafuedo jaiñedimaci?

<sup>19-20</sup>Jesús uai ote:

—Jiae rafuedo iena lloitice.

Coniruedi ie aína uarui ia, iobilla jira, ie nabaiñiai sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaídi iite. Ie isoide. Cue comini diga birui cue illa jira, iocire

itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

<sup>21</sup>Jiae rafuedo iena lloitice. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. <sup>22</sup>Jacagomona finoca bolsa como finoca vino joneñega. Jonegadena, mairiñena jira, sirillamona igoi raire cuararite. Vino fafite. Igoi jiai fafite. Como finoca vino comogomo jonelle. Iemei iena faifiñeite. Ie isoide. Omoi einamaci rafue ifomo jiae rafue birui ite. Iena omoimo llocabiticue. Iedo jaidicai —llote.

**Sábadoruimo Jesús  
llofueoicaigano maijia rafue**  
(Mt. 12.1-8; Lc. 6.1-5)

<sup>23</sup>Jiairuido sábadoruimo Jesús, ie llofueoicaigano diga, trigo illa illi motodo joide naísona jaide. Ie llofueoicaigano trigona tijiano, guicana jaidimaci. <sup>24</sup>Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

<sup>25</sup>Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. <sup>26</sup>Naie facaise Jusiñamui diga nanoca ñairaimadí Abiatar. Jusiñamui jofomo naimaci fo jailla mei, Jusiñamuimo fecaca llomenicona uanona, guitimaci. Jamai bue isoidino naie llomenicona guillana Jusiñamui

rairuide. Dani Jusiñamui diga ñairaini iena guiredimaci. Ie nabaiñiai diga, David micori iena guite; ia Jusiñamui naimacina duere finoñede. <sup>27</sup>Jusiñamui sábadona finuamona, sábado ite, nairui illamona comini caimare illena; ia omoi llofuiamona, iese iñedimaci. Nairuimo rairuica rana finoñellena, comini iese illena llofuecabitomoi. <sup>28</sup>Monamona cue billamona, iiñana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitaila rafuena finoredicue.

**Jesúdi onollina idisarodimiena  
jillotaja rafue**  
(Mt. 12.9-14; Lc. 6.6-11)

**3** <sup>1</sup>Jiae sábadoruimo judíuai ofiracomo Jesús dane jaide. Ie facaise onollina idisarodimie nainomo ite. <sup>2</sup>Nainomo itino Jesús eruaidimaci, sábadoruimo Jesús naimie raabaca ie segoitai. Iena Jesús finoia, naimacimona sábadoruimo naimie jai maijia jira, naimieno llogidoiacadimaci.

Sábadoruimo bu maijia, naimacimona jeacino finode. <sup>3</sup>Onollina idisarodimieno Jesús llote:

—Cue ecimo mai bai bi.

<sup>4</sup>Jesús nainomo itinomo jicanote:

—¿Nie isoide rafue sábadoruimo finuadí mare? Bimie birui cue jillotaiadedi, birui mare rafuena finodicue. Cuena birui omoi meineiaidedi, birui maraiñede rafue finodomoi. Sábadoruimo, ¿nie isoide rafue finuana rairuidomoi?

Comini dínenia uai oñedimaci.

<sup>5</sup>Naimie uaina naimaci iñoñena jira, riicaillanona, Jesús naimacimo erodate. Duidimiemo llote:

—O onollí mai oni ñuita.

Iena oni ñuitajamona jillode. <sup>6</sup>Iena ciuanona, fariseuai jino jaidimaci.

Naimiena meinellena, illaima Herodes dibeimo itinona baillanona, naimaci diga coniniri siadotimaci.

**Jorai fuemo Jesúdi ailluena  
cominina llofua rafue**

<sup>7</sup>Naie nairaimona jorai fuemo Jesús, ie llofueoicaigano diga, oni jaide. Galilea railla eniruemona ailluena comini naimie dine bitimaci.

Judeamona jiaino bitimaci.

<sup>8</sup>Jerusalémona, Idumeamona, Jordán ruicafebellemona, Tiro jinofemo ite eniruemona, Sidón jinofemo ite eniruemona ailluena bitimaci. Nana naimie siño finoca rafuena cacajanona, naimiena cioacadimaci. <sup>9</sup>Comini naimiena meetasii raillanona, ie llofueoicaiganomo daje botemo naimie jaillena eenogana llote. <sup>10</sup>Ailluena duidinona naimie jai jillotaja jira, nana duidino naimemo riacadimaci.

Jilloillena naimiena jetaacadimaci.

Iemona naimie illa bote eenuana jitaide.

<sup>11</sup>Jananiai anamo itino Jesúsna cioia, Jesús uicomó ana bitadajanona, jananiai naimacina ñaitatajamona, raitimaci:

—Jusíñamui Jitodio. <sup>12</sup>—Ia Jesús naimiena naimaci lluana rairuide.

**Jesúdi ie doce  
llofueoicaiganona fetua rafue**  
(Mt. 10.1-4; Lc. 6.12-16)

<sup>13</sup>Naie facaise anedumo Jesús jaide. Ie jitallano diese naimie dine uaidote.

Naimie dine billa mei, <sup>14</sup>doce digamiensa fetode. Naimie diga jaicabilena, naimacina fetode. Ie rafuena lollena, naimacina oretaiacade.

<sup>15</sup>Janaba anamo itinomona Janabana oni oretallena, ie uai naimacimo ite.

<sup>16</sup>Iese mameciredimaci: Simón; naimie mameci jiaicidi Jesús jitaca Pedrona.

<sup>17</sup>Jacobo, Juan; iaimaiai Zebedeo jito iaimaiai. Jiaie mameci iaimaiaina Jesús

jonete Boanergesna. Naie mameci oni dobaiñuamona mona guruama.

Iciruilla jira, iese mamecirediamaiai.

<sup>18</sup>Andrés, Felipe, Bartolomé, Mateo, Tomás, jiaie Jacobo; naimiedi Alfeo jito. Tadeo, jiaie Simón; naimiedi cananista comini facaisemo duide. <sup>19</sup>Judas Iscariote micori; naimiedi Jesúna gaitatatiemie.

**Fariseuai Jesúna jeare ñaia rafue**  
(Mt. 12.22-32; Lc. 11.14-23; 12.10)

<sup>20</sup>Ie llofueoicaiganona fetua mei, ie risoilla jofomo naimaci diga Jesús abido jaide. Ailluena comini naimie dine billa jira, naimie guillena, naimie abi juanide. <sup>21</sup>Naimiena ie comini fidiano: “Naimiedi jai uaírico isoi iacade” raillanona, comecina facadimaci. Ie jira naimiena ie ei jofomo isaibiacadimaci.

<sup>22</sup>Jerusalémona Moisés micori llogacinona llofueraini naie facaise billanona, raitimaci:

—Beelzebúdi Janaba comini.

Beelzebú anamo Jesús illamona, Beelzebú uaido Janaba illa cominimona Jesúdi Janabana oni oretate

—raitimaci.

<sup>23</sup>Naimaci raillana naimie cacajanona, naimie dine Jesús naimacina uaidote.

Llote:

—Janaba dibeimo Beelzebú illamona, dama ie abina oretanide. <sup>24</sup>Ero, daje isoi comeciaina lloíñenamo daje nairai facañenia, danomo maijinidimaci. Oni jaidimaci. <sup>25</sup>Daje isoi comeciaina lloíñenamo daje jofomo itino facañenia, danomo jainaiaínidimaci. Oni jaidimaci.

<sup>26</sup>Ie isoide. Beelzebú uaido jananiaina omoi llua isoi cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci. Ie uai ieconi saite. <sup>27</sup>Ero, maíridimie ie jofomo ite rana nibai fiiacadomoi. Iena fiillena, naimiena

nano raise omoi maiga. Raise maiga mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue ifñenia, cominina jillotanidicue. Naimie afemo cue illa jira, iena finoredicue.<sup>28</sup> Ie jira bie omoimo lloitice. Jusiñamui nana comini jeacinona dotarede. Naimiedi naimaci jeare ñaiacchinona dotarede;<sup>29</sup> iadedi naimiedi ie Joreñona jeare ñaiacchinona jaca dotañeite. Jusiñamui iena jaca feitañeite —llote.

<sup>30</sup>—Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jestuna raitimaci. Iese naimaci railla jira, “Jusiñamui naie isoide ñaiacchinona jaca dotañeite” iese Jesús llote.

**Jesús ie comini**  
(Mt. 12.46-50; Lc. 8.19-21)

<sup>31</sup> Jesú comini naimie dine rillanona, naimie diga ñaiacanano jino naidaidimaci. <sup>32</sup> Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

<sup>33</sup> Jesú dinena uai ote:

—¿Bu cue ei? ¿Bu cue amatiai?

<sup>34</sup> Naimie ecimo itinomo erodajanona, llote:

—Jadi, cue ei, cue amatiai.

<sup>35</sup> Jusiñamui jitaillacchinona finodimie cue amana, cue miriñona, cue eina. Imaci ua cue cominina.

**Jesúdi trigona  
judaídymienaa llua rafue**  
(Mt. 13.1-9; Lc. 8.4-8)

**4** <sup>1</sup> Jiaíruido jorai fuemo dane jaillanona, ailluena comini naimie dine ofillamona, Jesús naimacina

llofuete. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itímaci.

<sup>2</sup> Ailluena rafuena naimacina llofuete. Raite:

<sup>3</sup>—Omoi fueollena, bie rafuemu raise cacarei. Damie trigona judaiaide.

<sup>4</sup> Naimie judaíamona, naisomo janore iduai juide. Naimie bai jailla mei, silliniái iena guisaibitimaci. Ie jira sicoñede. <sup>5</sup> Nofiemoo jiae iduai juide. Nainomo enirue raise iñena jira,<sup>6</sup> raise jainañena jira, ecasillamona duide. Ie jira llisiñede. <sup>7</sup> Eecuái illanomo jiae iduai juide. Eecuái sicuamona riara eecuái ibaica. Ie jira llisiñede. <sup>8</sup> Mare eniruemo jiae iduai juide. Sicode. Llisillamona danademo treinta diga llisillana ote. Jiaínamona sesenta diga llisillana ote. Jiaínamona cien diga llisillana ote. <sup>9</sup> Omoi jeforena jira, raise fueollena, cue lluamo cacarei. Iena iiino.

**Jesús ie como lloga  
rafuena llofuiacina rafue**  
(Mt. 13.10-23; Lc. 8.9-15)

<sup>10</sup> Ailluena cominimona jailla mei, naimie diga jaisoidinodi, ie doce llofueicaigano diga, Jesúsmo ie llofuiiana jicanotimaci. <sup>11</sup> Uai ote:

—Jusiñamuidi omoina ie sedaacana rafuena jai uiñotade. Jiae iena uiñoñedomoi. Jiae cominina iena nia uiñotañede. <sup>12</sup> Ie jira bie isoidicinodo naimacimo lloticue. Cue siño finoca rafuena ciódimaci; iadedi iena naimaci iiñoñena jira, uiñoñeno jaitimaci. Cue llofuiiana jamai cacadimaci; iadedi naimaci iiñoñena jira, raise cacaiñedimaci. Uiñoñedimaci.

Jusiñamui dibeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite. <sup>13</sup> Cue como llofuiacina omoi raise cacaiñenia,

dane cue llofua, iena jiai raise nibai cacaiñetomoi; <sup>14</sup>ia iena omoina llofueitcue. Trigona judaídmedi Jusiñamui rafue lloraima isoide.

<sup>15</sup>Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacadímaci; ia Taife naimaci comeciaimo cacaja uaina iiñotañede. <sup>16</sup>Jiae iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci.

<sup>17</sup>Nofiemro riga iduai jainaonidedi raise sicoñede. Naie comini janore iiñua jira, ie isoidimaci. Dallu nano iiñotimaci. Jusiñamui uai muidona duere naimaci sefuya, abido danomo uaidimaci. <sup>18</sup>Jiae iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadímaci. IIñotimaci; <sup>19</sup>iadedi naimaci comeciai jarire illamona, naimaci raruiaina ebiruillamona, naie uai naimaci comeciaimo itabiñede. Jusiñamui jitaille rafuena finocana jaiñedimaci. <sup>20</sup>Jiae iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitalla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

**Jesúdi lamparína ñaia rafue**  
(Lc. 8.16-18)

<sup>21</sup>Jorai fuedo Jesúdi cominina nia llofuet:

—Jai unea lamparín jiae illanomona atia mei, jiae ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade. <sup>22</sup>Ie isoide. Cue

rafue llocana jaia, comini comeciai iticinona uiñotade. Uanaicino naimaci cacajamona, damierie iiñotimaci. Damierie iiñoñedimaci. <sup>23</sup>Omoi jeforena jira, raise fueollena, cue lluamo cacarei. Iena iiño.

<sup>24</sup>Cue lluamo raise cacarei. Omoi cacaja diese Jusiñamui omoina uiñotaite. <sup>25</sup>Iena omoi iiñoia, Jusiñamui omoina canoite. Omoina uiñocana jaitaite. Jiae iena janore cacajamona, iena iiñoñenia, Jusiñamui naimiena faifitaite.

**Jesúdi Jusiñamui ie cominina sedaacana llofua rafue**

<sup>26</sup>Jesús llote:

—Jusiñamui dibeimo comini jailla rafuena nia lloitcue. Naimie dibeimo comini jaillena, naimie rafue llocana jaidicue. Jiae uaido iena omoimo lloitcue. Damie ie illimo judaiaide.

<sup>27</sup>Judaia mei, ie illimo nagaru ie maijicabilla isoi naimie jaide. Niexe iduai denuana naimie raise uiñoñede;

<sup>28</sup>ia eniruemono nano sicode. Monailla mei, lliside. Lemona naicuai comuide.

<sup>29</sup>Jai einaia, iena ote. Ie isoide.

Jusiñamui rafuena raise cacaiñedomoi; ia iena iiñocana jaidomoi.

**Jesúdi mostaza ido llua rafue**  
(Mt. 13.31-35; Lc. 13.18-19)

<sup>30</sup>Jesús jiae rafuena llote:

—Jusiñamui dibeimo comini jailla rafuena nia lloitcue. Jusiñamui rafuena janore comini birui cacajamona, ailluena comini naimie cominina ico jaitimaci. <sup>31</sup>Jiae rafuedo iena omoimo lloitcue. Damie mostaza idona rillamona, naiemona eo aillue riara sicode. Mostaza ido eo janorede; <sup>32</sup>iadedi sicua mei, eo aillue riara jaillamona, ie onogaillai jegairiena jira, icairo anamo manaidinomo silliñiai

jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

<sup>33</sup>Naie isoide rafuiaido Jesúdi Jusiñamui ie cominina sedaacana rafuena cominimo llote. <sup>34</sup>Naimaci cacaja diese llote. Naimacimo jiae rafuedo lloñede; ia ie llofueoicaiganomo iena eneno llofuete.

**Jesúdi jorai baguana  
Illiçaitaja rafue**  
(Mt. 8.23-27; Lc. 8.22-25)

<sup>35</sup>Ailluena comini llofuria mei, jitoma jai sojicaidemo, ie llofueoicaiganomo Jesús llote:

—Ruica enefebimo mai cai jailli.

<sup>36</sup>Cominina fainonocaida, botemo naimie jai illamona, naimie llua isoi, oni jaidimaci. Jiae botes jiai jaide.

<sup>37-38</sup>Bai jaillanona, jillacimo Jesús inide. Ie ifogi almohadamo biide. Ie facaise aifi eo riire bite. Joraidi eo bagode. Baguamona, botemo jinui a uaide. Oruacana jira, jacinallamona, Jesús casitativimaci. Raitimaci:

—Maestro, ¿niese itio inioilla? Caina cano. Jai buisaidicai. Corobaisaidicai.

<sup>39</sup>Naimie casillano, aifina lletade. Jinui baguana illiçaitade. Ieconi aifi illiçaidae. Bagoñede. <sup>40</sup>Ie llofueoicaiganomo jicanote:

—¿Bue ñellena jacinaitomo? ¿Niese cuena raise iñoñedomo?

<sup>41</sup>Uai oñeno eo rajicaidimaci. Coniniri ñaitimaci:

—Bimiedi ¿nie isoidimie? Aifi naimie uaina iiñote. Jorai naimie uaina jiae iiñote.

—Bai jaillanona, ruica dine ridimaci.

**Jesúdi Gadara railla  
eniruemo illa rafue**  
(Mt. 8.28-34; Lc. 8.26-39)

**5** <sup>1</sup>Ruica dine naimaci ridemo, Gadara railla eniruemo sijidimaci.  
<sup>2</sup>Botemona ari Jesús jaidemo, naimie

dine damie bite. Naimiedi Janaba anamo itimie. <sup>3</sup>Comini raioillanomo nofie moto ifuaimo naimie i-isoide. Janaba anamo naimie illamona, comini diga marena jaca irainide. <sup>4</sup>Diga icaiño lloeo diga ie onollidi maiga; iadedi oni ecocaida, lloeona ticonote. Ie eilli jiae maiga; iadedi saitaicaida, lloeona ticonote. Ie jira buna naimiena raise mainide. <sup>5</sup>Nagarui nofie motomo ite. Anedumo jaisoide. Cuiri-cuirisoide. Dama ie abinanofici diga jaídode. Iese naimie isoide. <sup>6</sup>Nofiemona Jesús ciuanona, aisciana Jesús dine bite. Naimiena sedallena, ie caiñici ifodo ana rainadate. <sup>7-8</sup>Jesús llote:

—Janaba, bimiemona oni jai.

Janabadi iimana ado llotatate:

—Nanoca Jusiñamui Jitodio. ¿Niese cuena nibaïacadio? Jusiñamui mamecidó cuena duere finoñeno.

<sup>9</sup>Jesús Janabamo jicanote:

—¿O mameci bu?

Uai ote:

—Allosiedicai.

<sup>10</sup>Bie illanomona naimacina oreñañelena Jesús duere jicanotimaci. <sup>11</sup>Naie facaise nainomo ite anedumo ailluena chanchuai itimaci. <sup>12</sup>Chanchuai abimo naimaci jaillena Jesús duere jicanotimaci. <sup>13</sup>Jesús díñena:

—Jee —raite. Ieconi iima abímona oni jaillanona, chanchuai abímo jaidimaci. Dos mil chanchuai nainomo itimaci. Iena suidemo, iconi jillacimo joraimo chanchuai aísiano corobaisidimaci.

<sup>14</sup>Iena ciuanona, chanchuai sedaraini naimaci nairai dine aisciana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena. <sup>15</sup>Jesús díne naimaci ridemo, jaive Janaba anamo illamiena Jesús ecimo raillana ciódimaci. Naimie ñiroina jai jitade. Naimie jai

uairicoñede. Iena ciuanona, Jesúna jaciruitimaci.<sup>16</sup>Naie rafuena ciódino jaive Janaba anamo illamie jilluana llotimaci. Chanchuaímo suide rafuena jiai llotimaci.<sup>17</sup>Naie enirue itinodi Jesúmo naimaci eniruemona oni jaillena duere jicanotimaci.

<sup>18</sup>Botemo Jesús jaiacanía, jaive Janaba anamo illamie Jesúmo jicanote, naimie diga jaillena;<sup>19</sup>ia Jesús raite: —Dama ite. O nabaiñiai díne jai. Nana Jusiñamui omo finoca rafuena naimacímo llono. Jusiñamui ona duenailana naimacímo llono.

<sup>20</sup>Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini raijicaidimaci.

**Jesúdi mena duide  
riñona jillotaja rafue**  
(Mt. 9.18-26; Lc. 8.40-56)

<sup>21</sup>Ruica dibeimo ie llofueoicaigano diga Jesús abido rilla mei, ailluena comini naimie díne ofidimaci. Jorai fuedo naimie nia ia,<sup>22</sup>Jairona mameciredimiedí Jesús díne bite. Naimiedi judíuai rafue ofiraco sedarima. Jesúmo duere jicanollena, ana bitadate.<sup>23</sup>Duere jicanote:

—Cue jisa jai fioldaiacade. Cue jofomo cue diga bi, o onolli naiñaiñomo o jonellena, naiñaiño jilloillena.

<sup>24</sup>Iena cacajano, ie llofueoicaigano diga, naimie diga Jesús jaide. Ailluena comini Jesúmo ñaijillanona jaidimaci.

<sup>25</sup>Bai jaillanona, duidíñaiño Jesús jinafona jaide. Naiñaiño jeraimona doce años jaca diaide.<sup>26</sup>Diga manorainimona duere sefuide. Jilloñede; ia fodo jaide. Nana ie ucube jiai fuite.<sup>27</sup>Jesús duidinona jilluana naiñaiño fidiamona, jinafo dinena billanona, naimie iniroina jetade.<sup>28</sup>Naimie iniroi cue jetajamona jilloiticue” comecina facajamona,

naiñaiño naimie iniroina jetade.<sup>29</sup>Ieconi diailladi fainonocaide. Ie abi jilluana naiñaiño jai uiñote.<sup>30</sup>Ie abimona ie uai oni jaillana Jesús uiñuanona, dobaicaide. Cominimo jicanote:

—¿Bu cue iniroina jetade?

<sup>31</sup>Ie llofueoicaigano dinena uai otimaci:

—Ailluena comini o ecimo jaidimaci. Omo ñaijidinona: “¿Bu cue iniroi jetade?” raitio.

<sup>32</sup>Raise uiñollena, Jesús ie ecimo itinomo erodate.<sup>33</sup>Duidíñaiño ie jilluana uiñua jira, Jesús díne jaciruicana bite. Naimie uicomona ana bitadajanona, nana naiñaiñomo ite rafuena llote.<sup>34</sup>Naiñaiñomo Jesús llote:

—Noo, cuena o iñuña jira, jai jillodio. Mai marena o jai. O duicomona jai jillobidio.

<sup>35</sup>Naiñaiño diga Jesús nia ñaitemo, Jairo jofomona jiaino bite. Jairoomo llote:

—O jisa jai fioldaite. Maestrona ñaidoñeno.

<sup>36</sup>Iena cacajano, Jairoomo Jesús llote:

—O comeci jarire iñeno; ia cuena nia iino.

<sup>37</sup>Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama.<sup>38</sup>Jairo jofomo rillanona, nainomo itino eecuinaillana cascade. Failliñaillana cascade.<sup>39</sup>Jesús fo jailla mei, nainomo itinomo jicanote:

—¿Niese itomoí eecuinailla? Cuemona naiñaiño fioldaiñedes. Jamai inide.

<sup>40</sup>Iena cacajano, naiñaiño jai fioldaite uiñuamona, Jesúri jaisitimaci. Naimacina Jesús jino oretaja mei, nai jitaño moo diga, naiñaiño ei diga, ie llofueoicaigano diga, naiñaiño ecimo Jesús jaide.<sup>41</sup>Naiñaiño onollina llínocaida, judíuai uaido raite:

—Talita, cumi. —Iena oni dobaiñuamona: “Jitaibici, mai naidacai” raite.

<sup>42</sup>Ieconi jilluanona naidacaide. Jai jilluano macarite. Naiñaiñomo doce años jai ite. Nana nainomo itino ieri eo raijicaidimaci.

<sup>43</sup>—Bumo bie rafuena lloñeno —naimacimo Jesús llote. Guillena naiñaiñona ecajana jaii llote.

**Nazaretmo Jesús illa rafue**  
(Mt. 13.53-58; Lc. 4.16-30)

**6** <sup>1</sup>Naie illanomona Jesús oni jailla mei, ie llofueoicaigano diga Nazaretmo ride. <sup>2</sup>Rilla mei, sáboruimo nainomo ite ofiracomo llofueté. Iena cacajanona, nainomo itino raijicaidimaci. Raitimaci:

—¿Niese eo abina uiñote? ¿Bumona ie uaina ote? ¿Niese siño rafuena naimiedi finode? Naimiedi jamai bue isoidimie. <sup>3</sup>Naimiedi amederaima. María jito. Ie amatiaidi Jacobo, José, Judas, Simón. Naimie miriñotiaidi cai motomo jaii ite. —“Cai comena naimie ite” raillanova naimie uaina jamaidimaci.

<sup>4</sup>Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina iiñoñedomoi.

<sup>5</sup>Ie muidona nainomo siño rafuena eo finonide. Damierie duidinona jetajamona, naimacina jillotate; <sup>6</sup>ia naimaci iiñoñenari raijicaida. Ie mei diga nairaimo Jesús llofuecana jaide.

**Jesúdi ie llofueoicaiganona**  
**oretaja rafue**  
(Mt. 13.53-58; Lc. 4.16-30)

<sup>7</sup>Te doce llofueoicaiganona Jesús uaiduanona, naimacimo ie uai

iñonocaide, jananiai anamona cominina jilloitallena. Ie rafuena llollena, jiae illanuaimo naimacina menamierie oretaiacade. <sup>8</sup>Raite:

—Ailluena rana uiñeno. Omoi abi riidlolla, jiguidana uiñeno. Llomenicona uiñeno. Ailluena rana omoi uiñellena, bolsana uiñeno. Ucubena uiñeno.

<sup>9</sup>Zapatona jitajano jai. Abi omoi meidolle imiroina uiñeno. <sup>10</sup>Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i. <sup>11</sup>Omoina bu feiñoiacaiñenia, omoi uaina bu cacarefiacaiñenia, naie nairaimona omoi jaillanova, omoi eilliaimo ite jearacuaina oni jaidino. Maraiñede rafuena naimaci finuana naimaci uiñollena, omoi eilliaina jaidino.

<sup>12</sup>Jesús naimacimo llua mei, jaidimaci.

—Omoi jeacinona fainonocaillanova, Jusiñamui dibeimo omoi comeciai uiu meiduana omoi jai —llofuecana jaidimaci.

<sup>13</sup>Janaba anamo ite cominimona Janabana oredimaci. Duidino abimo farena gia mei, naimacina jillotate.

**Juan Bautista micori fiodailla rafue**  
(Mt. 14.1-12; Lc. 9.7-9)

<sup>14</sup>Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fiodaillamona Juan Bautista micori jai jillode. Jesús raillameli naimie. Ie jira naimie siño rafuena finocabide.

<sup>15</sup>Jiae comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

<sup>16</sup>Jesúna fidiano, Herodes comecin facade: “Juan micori ie ifogina navui jaitataticue. Fiodaillamona naimie jai jillode”.

<sup>17-18</sup>Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidí Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

<sup>19</sup>Ie muidona Herodías dinena Juan Bautista micorina jearuite. Naimiena meinetaiacade; <sup>20</sup>ia finonide, Juan Bautista micorina Herodes jaciruilla jira. Naimiedi Juan micorina mareuidimienä uiñote. Naimie Juan micori Jusiñamui rafuedo jaillana jiai uiñote. Ie muidona naimie Juan micorina raise eenote. Diga icaiño naimie micori lluana cascade. Iena gaide; ia iena raise cacaiñede. Ie muidona Herodías naimie micorina meinetañade; <sup>21</sup>ia ja muidomo naiñaiño sedallirui ride. Herodes cumpleaños ie rafuena finode. Ailluena illaicominina ie rafuemo uaidote. Eo ucuberedinona jiai uaidote. <sup>22</sup>Rafuemo Herodías jisa saillamona, Herodenä iobitade. Ie uaidoganona jiai iobitade. Iobillamona, Herodes naiñaiñomo llote:

—O jitailla ra cuemo jica. Iena omo fecaiticue. <sup>23</sup>Illaima uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

<sup>24</sup>Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

<sup>25</sup>Herodes dine raire abido billanona, llote:

—Juan Bautista ifogi bandejamo ja jonecaida, cuemo ine.

<sup>26</sup>Iena cacajano, Herodes sunaite; iadedi naimie llua jira, nainomo naimie

uaidogano jiai illa jira, ie lloga uaina janoiacaiñede. <sup>27</sup>Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade. <sup>28</sup>Bandejamo naimie ifogi jonecaida, iena atiano, Herodías jisamo fecade. Ieconi ie eimo fecade. <sup>29</sup>Iena fidianona, Juan micori llofueoicaigano naimie micori abina uaibitimaci. Iena raitimaci.

**Jesús cinco mil iiñaina ecaja rafue**  
(Mt. 14.13-21; Lc. 9.10-17; Jn. 6.1-14)

<sup>30</sup>Jesús llofueoicaigano abido bia, Jesúmo nana naimaci finoca rafuena llotimaci. <sup>31</sup>Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiai abi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

<sup>32</sup>Ie muidona botedo comini iñenanomo dani jaidimaci. <sup>33</sup>Ailluena comini naimaci oni jaillana ciódimaci. Naimacina uiñuamona, diga nairaiaimona aisicana jaidimaci. Jesús nia riñenia, uicodo ie jaillanomo ridimaci. <sup>34</sup>Jesús sijianona, ailluena cominina ciode. Naimacina sedallená bu iñena jira, toica llaudaiaina sedaraíma iñena isoi, isoidimaci. Iena uiñuamona, Jesús naimacina duenaite. Ailluena rafuena naimacina llofueete. <sup>35</sup>Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade. <sup>36</sup>Comini mai abido oreta. Ianori ite nairaiaimo, ianori ite jofuemo naimaci guille ollena, bie cominina abido oreta.

<sup>37</sup>Jesús uai ote:

—Naimacina bene eca.

Uai onaisite:

—Naimaci guillena doscientos ucube  
raifi llomenico cai uana nibai jitaidio.

<sup>38</sup>Naimacimo jicanote:

—¿Niga llomenico omoímo ite? Mai  
jibuisai.

Jibuisilla mei, raitimaci:

—Cinco llomenico mena lliciai diga.

<sup>39</sup>Iena cacajano, cominimo raitie  
illanomo dajerise ana raillena Jesús  
llote. <sup>40</sup>Naimaci cien digamierie ana  
raísite. Jíaino cincuenta digamierie ana  
raísite. <sup>41</sup>Naie cinco llomenicona, naie  
mena lliciai diga, Jesús uanona,  
monamo eruafillanona, Jusiñamuimo  
iobillacinona fecade. Iemei taillude. Ie  
llofueoicaiganomo fecade, cominina  
ecallena. Iese naie mena lliciai nana  
cominimo fecade. <sup>42</sup>Nana guillanona  
monidimaci. <sup>43</sup>Monillamona, fiebide  
guillena iraidimaci. Doce cirigaiáimo  
oruitatimaci. <sup>44</sup>Cinco mil iñíñai diese  
guitimaci. Naimaci ainiai, imaci uruiai  
diga, jiai guitimaci.

### Jesús jinui emododo

#### macarilla rafue

(Mt. 14.22-27; Jn. 6.16-21)

<sup>45</sup>Guilla mei, botedo ie llofueoicaigan  
ruica dine Betsaidamo jaillena llote. Naie  
facaiseconi cominina naimie nia facadote.

<sup>46</sup>Cominina facadua mei, aneduaimo dane  
jaide, Jusiñamui diga ñaillena.

<sup>47</sup>Jitibicaidemo, nainomo dama ite. Ie  
llofueoicaigan jorai motomo jai itimaci.

<sup>48</sup>Aifi naimacimo riire rilla jira, riire  
jaitimaci. Iena Jesús ciuanona, jinui  
emododo naimaci dine bite. Naimaci ecido  
naimie jaisaide; <sup>49</sup>ia naimiena naimaci  
ciuanona, comecina facadimaci: “¿Bu  
joreño caimo billana ciodialci?” <sup>50</sup>Naimiena  
ciuanona, nana jacinaillamona  
cuiriodimaci. Naie dacaiño Jesús  
naimacimo llote:

—Omoi joreñonicaíñeno. Cuesa.  
Jaciruiñeno.

<sup>51</sup>Botemo Jesús jaide. Ie facaise aifi  
lliicaide. Ieri eo rajicicaidimaci. <sup>52</sup>Janore  
guillemona ailluena cominina naimie  
ecajana jaive ciodialaci; ia naimie uai  
siñonana nia raise uiñoñedimaci.

Naimiena nia raise iinoñedimaci.

### Jesúdi duidinona Genesaret

#### eniruemo jillotaja rafue

(Mr. 14.34-36)

<sup>53</sup>Ruica dine jaillanona, Genesaret railla  
eniruemo ridimaci. Nainomo sijidimaci.

<sup>54</sup>Botemona ari jaidemo, nainomo itino  
Jesúna uiñotimaci. <sup>55</sup>Nana naie eniruemo  
aisicana jaidimaci, duidino naimie dine  
atillena. Naimaci biira emododo duidinona  
atisite. Jesús illana naimaci fidiano, iese  
atiuidimaci. <sup>56</sup>Diga nairaimo Jesús ria, naimaci  
illano motomo duidinona atisite. Jilluana  
jitaídimaci. Ie iniroi fueda jetallena  
naimiemo duere jicanotimaci. Nana naimie  
iniroina jetadino diese jillodimaci.

### Jesúdi comini comeciaína ñaia rafue

(Mt. 15.1-20)

**7** <sup>1</sup>Naie facaise fariseuai comindí Jesús  
dine bitimaci. Moisés micori  
llogacinona llofueraini Jerusalémona jiai  
bitimaci. <sup>2</sup>Jesús llofueoicaiganomona  
damierie naimaci isoi guiñenana ciodialaci.

<sup>3-5</sup>Fariseuai dinena Jesúsmo jicanotimaci:

—¿Bue ñellena omoi llofueoicaigan  
cai einamací rafuedo jaiñedimaci?

Naimaci guiacania, naimaci onolli cai  
einamací llua isoi, raise jocoñedimaci.  
Ie jira cai abímo jeacino finodomoi.

Iese jicanotimaci, naimaci einamací  
rafuedo naimaci jailla jira. Maraiñede  
rafue naimacimo suiñellena, iese  
ailluena judíuái jaidimaci. Naimaci  
guiacania, naimaci einamací llua isoi,  
onollina diga icaiño jocuano, guitimaci.  
Mercadomona bia, naimaci einamací

llua isoi, abina lleredimaci. Naimaci einamaci llua isoi, tazones, ollas, bandejas jiai jocodimaci. Iese jaisoidimaci. Comecina facadimaci: "Iese cai finoia, Jusiñamuimona mare. Iese cai finoñenia, Jusiñamuimona marañede. Naimie caina duere finoite". Jearede rafue naimaci abimo oñellena, iese finouidimaci.

<sup>6</sup>Jesús uai ote:

—Mareuidinona abi caitauidinodomoi. Isaías micorí jaie omoina raise llote. Naimiedi Jusiñamui lluana cuete:

Bimaci naimaci uaido marecinona cuemo llote; iadedi cue rafuedo raise jaiacaiñedimaci.

"Ona isiruiticai" llotimaci.

"Ona sedadicai" llotimaci.

Jamai ñaitimaci. Naimaci comeciai cue dibeimo raise iñede.

<sup>7</sup> Cue uai itena, jamai comini lluacinona naimaci lloguecabilla jira, tainona cuena sedadimaci cuete. <sup>8</sup>Isaías micori llua isoi itomoi.

Jusiñamui llogacinona fainonocaida, omoi einamaci rafuedo jaidomo. <sup>9</sup>¿Bue ñellena nana Jusiñamui llogacinodo jaiñedomoi? Omoi einamaci llogacínodo jaidomo; iadedi nana Jusiñamui llogacinodo raise jaiñedomoi. <sup>10</sup>Moisés micorí jaie llote: "O moo uai iinuanona, naimiena cano. O ei uai iinuanona, naiñaiñona cano. Le moori jeare ñaitimie, ie eiri jeare ñaitimie meinelle". <sup>11-12</sup>Iese Moisés micorí llote; iadedi omoi einamaci llotimaci:

"Jusiñamuimo cai ucubena cai fecajamona, cai moona, cai eina jai canonidicai". <sup>13</sup>Iese omoi finocabilla jira, omoi einamaci llogacinodo omoi jaillamona, Jusiñamui uaina jamaidomo. Bie isoide rafuedo jaca jaidomo.

<sup>14</sup>Fariseuaí diga iese llua mei, naimie ecimo ailluena comini dane offilanona, naimacimo llote:

—Iena raise omoi uiñollena, cue lluamo cacarei. <sup>15</sup>Omoi einamaci isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guillamona, omoi onollina jocuamona. Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciai jearena jira, jeacinona finocabidomoi. <sup>16</sup>Omoi jeforena jira, raise fueollena, cue lluamo cacarei. Iena iino.

<sup>17</sup>Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie lluana jicanotimaci. <sup>18</sup>Uai ote:

—¿Niese cue lluana jiai nia cacaiñedomoi? Nie isoide ra guitmoina, omoi comeciaimo jeare iñede. <sup>19</sup>Omoi comeciaimo jaiñede; ia omoi jebemo jaide. Ie mei omoi abiaimona jino bite.

Jesús lluamona, nana guille radi mare uiñoticai. <sup>20</sup>Jesús llote:

—Omoi comeciai jearena jira, jearede rafuena finocabidomoi. <sup>21</sup>Omoi comeciai jearena jira, jeare comeciaina facacabidomoi. Omoi aiñede riño diga icabitomoi. Omoi iniñede iima diga icabitomoi. Fiiricabitomoi. Cominina meinecabitomoi. <sup>22</sup>Jiai comini rana nicidocabitomoi. Jearede rafuena finocabidomoi. Iena ebiruitomoi. Jifuericabitomoi. Abina uradoicabidomoi. Jiaie comini joreñiona jeare ñaicabitomoi. Abina iedocabitomoi. Ebena jaicabidomoi. <sup>23</sup>Bie isoidicinuai omoi comeciaimo illa jira, jearede rafuena finocabidomoi; iadedi omoi einamaci llua isoi, omoi onoll jocoñenamona jeacino comuiñede.

**Jesúdi judío iñaiñoñediñaiñona  
jillotaja rafue  
(Mt. 15.21-28)**

<sup>24</sup>Nainomona Jesús jaillanona, Tiro railla eniruemo jaide. Sidón railla eniruemo jiai jaide. Nainomo jofomo

jaillanona, iena buna fidiana jitaiñede; ia iena janonide.<sup>25-26</sup> Ie facaise judío iñaiñoñedíñaiño daño bite. Naiñaiñodi sirofenicia naírai iñaiño. Ie jisa Janaba anamo ite. Jesúna fidianona, naimie dine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade.<sup>27</sup> Judúuaiñedinona naimie canoñenana naiñaiño uiñollena, naiñaiñomo Jesús llote:

—Uruiai guillamona jiconiaina ecadicaidena, maraiñede. Uruiai nano ecadicai.

<sup>28</sup>Naiñaiño dínená uai ote:

—Jii, maestro; iadedi jiconiaidi uruiai guillamona fiebide guillemona guitimaci. —Iese llote; ia jiae rafuemo comecina facade. Uruaina llote; iadedi judíuaimo comecina facade. Jiconiaina llote; ia judíuainedenomo jiai comecina facade. Comecina facade: “O cominimo o rafue duide; ia cai Namana o illa jira, nibai o rafue caimo janore duide”.

<sup>29</sup>Jesús uai ote:

—Raise llotio. O jofomo mai abido jai. O jisamona Janaba oni jaide.

<sup>30</sup>Naimie llua isoi jofomo jaide. Ie jisa biirramo biidena ciode. Janaba naiñaiñomona oni jaillana jai uiñote.

### Jesús jefona cacaíñedimien jillotaja rafue

<sup>31</sup>Tiro railla eniruemona Jesús oni jaide. Jaillanona, Sidón railla eniruemona jaide. Decápolis railla eniruemona jiai jaide. Ja muidomo Galilea railla jorai fuemo ride.<sup>32</sup>Iena fidiano, naimie dine comini jefona cacaíñedimieno atide. Naimie gogoma. Naimiena jilloitallen, naimemo ie onollí jonellena Jesúmo jicadimaci.<sup>33</sup>Ailluena comini naimie dine jai billa jira, jefona cacaíñedimieno eneno oni uite. Nagafebe jefomo onocaiñuitade. Ie onocaimo tuajanona, iima

iifena jetade.<sup>34</sup>Jusiñamui dine monamo eruaita, naimiena duenaillamona, jafaicina faite. Judúuai uaido naimemo llote:

—Efata! —Oni dobaiñuamona:  
“¡Ecoricai!” raite.

<sup>35</sup>Ieconi ie jefodi ecoricaide. Jai raise cascade. Jai raise ñaite.<sup>36</sup>Cominimo:  
—Bimie jai jilluana bumó lloñeno  
—Jesús diga icaiño llote; ia naimie uaina iiñoñedimaci. Iena llocana uitimaci.<sup>37</sup>Naimieri eo raijicaidimaci. Coninina naimiena raitimaci:

—Naga rafuena raise finode. Jefona cacaíñedimieno jai jillotate.  
Gogonaitimieno jai jillotate.

**Jesúdi cuatro mil iiñiaina  
ecaja rafue**  
(Mt. 15.32-39)

**8** <sup>1</sup>Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

<sup>2-3</sup>—Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci baïi raillano. Naimacina cue duenalla jira, naimacina canoiacadicue.

<sup>4</sup>Jicanotimaci:

—¿Niese naimacina bene ecaitacai?  
Jofue iñenanomo iticai.

<sup>5</sup>Jesús jicanote:

—¿Niga llomenico omoimo ite?

Uai otimaci:

—Siete.

<sup>6</sup>Comini ana raillena Jesús llote. Naie llomenicona uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci.

<sup>7</sup>Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús

llote. <sup>8</sup>Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. <sup>9</sup>Nainomo cuatro mil iiñiai guitimaci. Naimaci ainiai, imaci uruiai diga, jiai guitimaci. <sup>10</sup>Guilla mei, cominina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

**Fariseuai comini Jesúmo  
siño rafuena finuana jicanuano  
billa rafuena**  
(Mt. 16.1-4; Lc. 12.54-56)

<sup>11</sup>Dajerie fariseuai comini Jesús díne bitimaci. Naimie uaina uaitaiacadimaci. Naimena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uiñotimaci. Naimena duere finoacadimaci. Llotimaci:

—Iena cai cioillena, Jusiñamuina siño rafuena finota.

<sup>12</sup>Sunaillanona, Jesús jafaici faite. Raite:

—¿Bue ñellena siño rafuena finuana cioacadomo? Omoi facaina iena finoñeticue.

<sup>13</sup>Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica díne Jesús jaide.

**Jesús siritate rana llofua rafue**  
(Mt. 16.5-12)

<sup>14</sup>Ruica díne rilla mei, Jesús llofueoicaigano llomenicona feillana uibiñotimaci. Naimacimo daje llomenico ite. <sup>15</sup>Iena naimie uiñuamona, naimacimo Jesús llote:

—Fariseuai siritate ramona abina rairui. Illaima Herodes siritate ramona abina rairui. —Iese Jesús llote; iadedi naimaci llofuiacynomona abi rairuillena ñaite.

<sup>16</sup>Jesús iese llua jira, iena naimaci raise cacaiñena jira, dani coniniri siadotimaci:

—Llomenicona cai atiñena jira, caimo iese llote.

<sup>17</sup>Naimaci siaduana Jesús uiñua jira, naimie lluana naimaci raise nia cacaiñena jira, naimacimo jicanote:

—¿Bue ñellena iese siadotomoi?

¿Niese cuena iinoñedomoi? Cuemo siño uai illana nia raise cacaiñedomoi.

<sup>18</sup>Uisiredomoi. Jeforedomoi. ¿Niese cue navui siño finoca rafuemo comeciaina facañedomoi? <sup>19</sup>Navui cinco mil iiñiai cinco diga llomenicona guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

<sup>20</sup>Jesús llote:

—Jiaicaiño cuatro mil iiñiai siete diga llomenicona guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

<sup>21</sup>Jesús dinena jicanote:

—¿Niese cuena nia raise iinoñedomoi? Siño uai cuemo illana nia raise iinoñedomoi.

**Jesús uisinidimiena jillotaja rafue**

<sup>22</sup>Oni macarillanona, Betsaidamo Jesús, ie llofueoicaigano diga, ride. Ie facaise naimie díne comini uisinidimiena atide. Naimena jilloitallena, naimena jetallena, Jesús jicanote. <sup>23</sup>Iena Jesús cacajanona, ie onollina llinuanona, nárai illa jinofemo uisinidimiena uite. Ie mei ie uisina tuade. Ie uisina jiai jetade. Naimemo jicanote:

—¿Buena ciódio?

<sup>24</sup>A eruaillanona, uai ote:

—Comini macarillana ciódice; ia amena isoi eruaidimaci. Nia raise cionidice.

<sup>25</sup>Ie uisina Jesús dane jetade. Iemona oni ero caillamona, jai Jillode. Jai raise ciode. <sup>26</sup>Jai Jillua jira, ie jofomo naimieno abido orede. Jesús llote:

—Betsaidamo itino o Jilluana lloñeno; ia nainomo jaiñeno o jofomo mai abido jai.

**Pedro Jesúna llua rafue**  
(Mt. 16.13-20; Lc. 9.18-21)

<sup>27</sup>Cesarea Filipo eniruemo ite nairaiaimo Jesús jaide, ie llofueoicaiganomo jicanote:

—¿Niese jiae comini cuena raitimaci?

<sup>28</sup>Uai otimaci:

—Damierie raitimaci: “Juan Bautista micoridio”. Damierie raitimaci: “Odi Eládio”. Jiaño raitimaci: “Jusiñamui facaina jaie ite llorainimona damie jai Jillode. Imedio”.

<sup>29</sup>Jesús dane jicanote:

—¿Niese omoi cuena raitomoi?

Pedro uai ote:

—Odi cai Jilloitaramadio. Jusiñamui facaina lloraini micoriai o billena jaie llotimaci

<sup>30</sup>Jesús iena bumo lluana rairuide.

**Jesús ie fiodaillena llofua rafue**  
(Mt. 16.21-28; Lc. 9.22-27)

<sup>31</sup>Ie facaise ie llofueoicaiganona ie duere sefuillena llofueté. Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadeti darui amani illanona, fiodaillamona jilloiticue.

<sup>32</sup>Iena marefodo naimacimo llote.

Iena cacajano, Pedro dinena lletade:

—Dama ite. Iese lloñeno. Bie isoide rafuena lloñeno.

<sup>33</sup>Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñeno, Taife isoi o comechina o facaja jira.

Jusiñamui isoi cuemo comechina facañedio. Comini isoi cuemo comechina facadio.

<sup>34</sup>Naimie dine ailluena comini uaidua mei, ie llofueoicaiganano nainomo jiai illanona, naimacimo llote:

—Cue cominina bu jaiacanía, ie jitaille rafuedo jaiñena. Cue dibeimo naimie jaillamona, duere sefucana jaite. Nibai naiemona fiotaite. Bu iese jaiacanía, cue dibeimo naimie ite.

<sup>35-37</sup>Duere sefuiñana jaciruillamona, cue cominina bu jaiacaiñenia, ja muidomo faifite; iadeti duere sefuiñana jaciruñenamona, cue cominina bu jaia, jaca faifiñeite. Cue cominina bu jaiñenia, nibai eo duere sefuiñeite. Nibai ailluena ra naimiemo ite; ia, ¿niese cue Moo dine riite? Nainomo naimie riñeno faifite. <sup>38</sup>Birui ite comini Jusiñamuina jitaiñedimaci. Naimieno jai fainonocaidimaci. Jeacinona finocana jaide, cue cominina bu meiruia, cue rafuena bu meiruia, dane cue bia, naimieno meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaenínsai diga, cue Moo dinena, monamona ico biiticue. Cue Moo uai cuemo illanona, ebire biiticue.

**9** <sup>1</sup>Omoimo uanaicinona lloticue.  
Omoimona dajerie nia  
fiodañetomoimo, illaimana ebire cue bairellena cioitomoi.

**Jesús abi meidocailla rafue**  
(Mt. 17.1-13; Lc. 9.28-36)

<sup>2</sup>Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiai uite. Juan jiai uite. Jiae llofueoicaiganona uiñede. Nainomo rilla mei, naimaci uicomó naimie abi meidocaide. <sup>3</sup>Naie dacaiño naimie iniroi

eo quenirecaide. Eo userecaide. Cai iniroimo jitoma lligaiñuamona ie isoi usere jaca jaiñede. <sup>4</sup>Naie facaise naimacimo Moisés micori joreño, Elías diga, bairede. Elíadi Jusiñamui facaina jaie lloraima. Jesús diga ñaitiiaimaiai. <sup>5</sup>Iaimaiai jaiacania, Pedro Jesúmo llole:

—Maestro, bene cai illana mare. Daje amani bisaini cai finollena, mare. Daje oie, jiae Moisés micori ie, jiae Elías ie.

<sup>6</sup>Eo jaciruilla jira, naimie ñiaia rafuena raise uiñofeno jamai ebena ñiaite. <sup>7</sup>Je facaise uillie billamona, naimacina ibaide. Uilliemona Jusiñamui llole:

—Bimie cue isiruiga Jito. Naimie lluamo cacareillanona, iena iino —llote.

<sup>8</sup>Ieconi oni erodajanona, dama Jesúna ciódimaci. Jiaínona cíoñedimaci.

<sup>9</sup>Anedumona bitimacimo, naimacimo Jesús llole:

—Omoi ailli ciua rafuena bumolñoeno, cue fiodaillamona cue jillua dinori. <sup>10</sup>Jesús llua isoi finodimaci. Iena bumolñoedimaci; ia fiodaillamona naimie jilluana naimaci raise nia cacaiñena jira, iemo comecinacafacádimaci. <sup>11</sup>Naimiemo llotimaci:

—Moisés micori llogacinona llofueraini biru raicabítimaci: “Elías raillamie dane biite. Ie mei cai Jilloitaraima biite” raitimaci. Jusiñamui mona o billana iinotícai. Odi cai Jilloitaraimana iinotícai. Odi cai Jilloitaraimadiomo, ¿bue ñelli iese raitimaci?

<sup>12</sup>Uai ote:

—Raise iinotomoi. Elías isoidimie jai bite, nana Jusiñamui jitilla rafue raise llollena. Jusiñamui dibeimo naimaci illena, comini imaci comeciai meiduana llole. Jusiñamui facaina lloraini micoriai cue eo duere sefuillena cuetimaci. Comini cue jeare finollena cuetimaci. Iemo omoi comeciaña jiae faca. <sup>13</sup>Elías isoidimie jai bite; iadedi

Jusiñamui facaina lloraima micori jaie cuega isoi, naimaci jitilla jira, naimiena jai meineti maci.

**Jesúdi Janaba anamo  
itímena jillotaja rafue  
(Mt. 17.14-21; Lc. 9.37-43)**

<sup>14</sup>Je jiae llofueoicaigano dine Jesús abido ria, nainomo ailluena comini itimacimo ride. Moisés micori llogacinona llofueraini dinena ie llofueoicaigano uaina uaitaside. <sup>15</sup>Jesús billana comini ciuanona, jacinaisidimaci. Naimiena feiñollena, naimie dine aisida jaidimaci. <sup>16</sup>Moisés micori llogacinona llofuerainimo Jesús jicanote:

—¿Niese cue llofueoicaigano uaina uaitatomoi?

<sup>17</sup>Uai oñedimaci; ia cominimona damie uai ote:

—Maestro, Janaba anamo cue jito illa jira, o dine naimiena atidicue. Cue jito Janaba anamo illamona ñainide.

<sup>18</sup>Nagarui Janaba bille diese, naimiena eniruemo uaitate. Iemonia fuedi mullede. Ie isidodi murude. Ie abi jaiaire jaide. O llofueoicaiganomo jicadicue, Janabana oni oretallena; ia oretanidimaci. Ie jira Moisés micori llogacinona llofueraini bie rafuena, o llofueoicaigano diga, uaina uaitatimaci.

<sup>19</sup>Iena cacajanona, Jesús ie llofueoicaiganomo llole:

—Cue uai siñonana nia iinóñedomoi. Omoi diga are iticue. Raise omoi iinollena, ¿nie dinori omoi diga iiticue?

Naie duidimie moomo llole:

—O jito cue dine mai ati.

<sup>20</sup>Naie urue Jesús díne atianona, Janaba naimiena naillitate. Iemonia urue eniruemo uaide. Jabi-jabide. Fue mullede. <sup>21</sup>Jesús dinena naie urue moomo jicanote:

—¿Nie dinori o jitodi bie isoi ite?

Uai ote:

—Naimie uruenamona.<sup>22</sup> Janabadi, diga icaíño iraimo usillena, naimiena uaitate. Corobaillena, diga icaíño jinuimo jiai uaitate. Janaba oni o oretarenia, cocona duenaillamona, cocona cano.

<sup>23</sup>Jesús uai ote:

—“O oretarenia” raitio. Ero, o jito jillotaredicue. Cuena o iinoia, o jito jilloite.

<sup>24</sup>Naie urue moo ieconi llote:

—Ona iinoticue. Raise nia cue iinoñenia, cuena raise iinota.

<sup>25</sup>Naie facaise ailluena comini naimie dine raire ofillana naimie ciuanona, Jesús Janabana lletade:

—Bie uruena ñaitatañedio. Naimiena cacaitañedio. Naimiemonia oni jai. Naimie dine dane biñeno.

<sup>26</sup>Ado cuirioillanona, naimiena eo riire naillitanona, Janaba oni jaide. Iemonia naie urue fiodaitimie isoi eroaide. Naimiena ciuanona, nainomo itino raitimaci:

—Naimie jai fiodaite;<sup>27</sup>—ia Jesús naimie onollina llinocaída, naimiena a naidanete.

<sup>28</sup>Iemonia oni jaillanona, damie jofomo Jesús nailli ria, naimiemo ie llofueoicaigano anado jicanotimaci:

—¿Bue ñellena Janabana oni oretanidicai?

<sup>29</sup>Jesús uai ote:

—Jusiñamuimo omoi jihamona, naimiena raise omoi iinuamona, bie isoide Janabana oretaredomoi. Naimiena omoi raise iinoñena jira, bie uruemonia Janabana oni oretañedomoi.

**Jesús ie fiodaillena**

**dane llofua rafue**

(Mt. 17.22-23; Lc. 9.43-45)

<sup>30-31</sup>Ie llofueoicaigano diga Jesús oni jaillanona, Galilea railla eniruemo jaide.

Ie llofueoicaiganona naimie llofueiacana jira, naimie ie jaillana jiae comini fidiana jitaiñede. Naimacimo llote:

—Monamona billanona, iimana jaidicue. Jusiñamui jitaila jira, cuena jiae comini gaitajanona, illaicominió fecaitimaci. Naie illaicomini cuena meineitimaci; iadedi darui amani illanona, jilloiticue.

<sup>32</sup>Ie llofueoicaigano iena raise cacaíñedimaci; ia naimiemo iena jicanuana meiruitimaci.

**Jesús ie llofueoicaigano moto  
imiena ille rafue**

(Mt. 18.1-5; Lc. 9.46-48)

<sup>33</sup>Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naison acai bia, ¿nie isoide rafuena coniniri siadotomoi?

<sup>34</sup>Uai oñedimaci. Naimaci moto imiena illena, naisodo siadocana bitimaci. Meiruillanona, uai oñedimaci.

<sup>35</sup>Naimie ana rainadaja mei, ie ecimo naimacina uaidote. Raite:

—Omoi moto imiena bu iacania, jamai bue isoidimena naimie illa. Omoi muillaimana naimie jailla isoilla.

<sup>36</sup>Iena naimaci raise uiñollena, nainomo ite cominimona daje urue bai Jainanocaída, naimaci motomo naimiena jonete. Naimiena menioita, naimacimo llote:

<sup>37</sup>—Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiena feiñotimiedi cuena jai feiñote. Cuena feiñotimie Jusiñamuina jiai jai feiñote, Jusiñamui cuena oretaja jira.

**Jesúdi ie dibeimo itinona llua rafue**

(Mt. 10.42; Lc. 9.49-50)

<sup>38</sup>Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimienca ciódicai. Cai diga naimie jaicabiñena jira, iena finuana rairuidicai.

<sup>39</sup>Jesús uai ote:

—Naimienca rairuiñeno. Cue mamecido siño rafuena bu finoia, cuena jeare raire ñaiñeite. <sup>40</sup>Cai dibeimo itimiedi caí facaisena ite. <sup>41</sup>Ero, cuemo omoi duillamona, omoina bu janore canoia, Jusiñamuimona ibana feiñoite. Omoimo nibai jamai jinuina feacaite; iadedi omoina naimie canuamona, Jusiñamuimona ibana feiñoite. Le jira naimie isoidino siño rafuena finuana rairuiñeno.

**Jesúdi jeacinona finoñenana  
llofuia rafue**

(Mt. 18.6-9; Lc. 17.1-2)

<sup>42</sup>Jesús nia llofuetec:

—Cuena como iinotinona jeacinona finotaiacadimie iena finoñellena, naimie cimaiomo aillue nosfici maianona, joraimo corobaillena naimiena dotacadena, mare. <sup>43-48</sup>Biená ñaiticue. Nie isoide rafue omoina jeacino finotaia, iena llinoñeno. Naie rafue dine jaiñeno. Iemo eruaíñeno. Rana omoi jetaja jira, omoi ciuá rana jira, omoi jitaillacmona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemonia jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comeciná ñaiticue. Omoi abina omoi raise namatallena, omoi comeci nano raise fino. Iraimo omoi jaiñellena, jeacino finoñeno. Naimacimo ite aiai fioldaiñena jira, naie irai jaca duiñenamona, nainomo itino jaca duere sefuitimaci.

<sup>49</sup>Ero, birui omoi duere sefuiñamona, cue cominina jai jaidinona uiñoiticue.

<sup>50</sup>Guille caimaretallena, sal mare; iadedi ie caimano jai iñenia, iena dane caimaretañedicai. Le isoide. Jeacino omoi finoia, omoi comeciai caimare iñede. Jusiñamui jitaillacmona omoi finuamona, coniniri caimare omoi i. Coniniri uri omoi i.

Jesús iima ie aina dotaja  
rafuena llofuia rafue  
(Mt. 19.1-12; Lc. 16.18)

**10** <sup>1</sup>Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica dibeimo jaide. Alluena comini naimie dine ofillamona, naimie llofueuilla isoi, naimacina llofuetec. <sup>2</sup>Naimienca facacillena, dajerie fariseuái naimie dine bitimaci. Rafuena jicaniacadimaci. Naimaci uai naimie raise oñenia, naimienca duere finoacadimaci.

Jicanotimaci:

—¿Hima ie aina dotajana rairuidio?

<sup>3</sup>Uai ote:

—¿Niese Moisés micori llote?

<sup>4</sup>Uai otimaci:

—Moisés micori jaie cuete: “Hima ie aina dotaacanía, dotalle rabena nano cueite. Le mei naiñaiñona dotaite”.

<sup>5</sup>Jesús uai ote:

—Jusiñamui uaina raise omoi iinoñena jira, Moisés micori iima ie aina dotajana rairuiñede; <sup>6</sup>iadedi nano dofoconi iese iñede. Enirue finua facaiseconi Jusiñamuidi come iaímaiaina finode. Hímana finode. Riñona jíai finode. <sup>7</sup>Le jira Jusiñamuidi jaie llote: “Le ai diga illena, iima ie moona fainonocaita. Le eina jíai fainonocaita. Le ai diga illamona, menade comedí daamienca jai jaide” llote. <sup>8</sup>Menade come jai daamienca jai

ite. <sup>9</sup>Jusiñamui iese iaimaiaina itataja jira, iima ie aina dotajana rairuidicue. Riño ie ñinina dotajana rairuidicue.

<sup>10</sup>Jofomo ie llofueoicaigano diga, naimie nailli illanona, naimiemo bie rafuena jicanotimaci. <sup>11</sup>Jesús dinena llote:

—Jiae riño diga naimie illena, ie aina bu dotaia, naimiedi jeacinona jai finode. Ie aina jeare jiai finode. <sup>12</sup>Ie ñinina faínonocaillanona, jiaimiena nie riño uamona, naiñaiño jeacino jai finode.

**Jesúdi naimie dine uruiai  
billana jitaila rafue**  
(Mt. 19.13-15; Lc. 18.15-17)

<sup>13</sup>Naie facaise Jesús dine comini naimaci jesanide díese atidimaci. Ie onollí naimacimo naimie joniana jitaidimaci. “Naimacina raise cano” ie Moomo lollena jitaidimaci. Ie llofueoicaigano iena rairuidimaci; <sup>14</sup>iadedi iena cacajano, Jesús icirite. Jesús raite:

—Uruiai cue dine billesa. Naimacina rairuiñeno. Cuena bie isoi ñinotinodi Jusiñamui cominidimaci. <sup>15</sup>Bie uruiai abina ideoñedimaci. Einamacimona jamai bue isoidimaci. Naimaci isoi bu ñienia, Jusiñamui cominina jaiñeitimaci. Jusiñamui naimiena sedallena, Jusiñamui cominina naimie jaiñeite.

<sup>16</sup>Naie uruiai dasarie meni-menioicaida, naimaci ifogimo ie onollina joneta:

—Jusiñamui omoina canoite —llote.

**Ucuberedimie Jesús diga ñaia rafue**  
(Mt. 19.16-30; Lc. 18.18-30)

<sup>17</sup>Ie llofueoicaigano diga Jesús oni jai jaillanona, aiscana damie naimie dine bite. Naimiena raise uaidollena, ie cañici ifodo rañadate. Raite:

—Maestro, odi maremiedio.

Jusiñamui diga ico cue jaca illena, ¿buena finoiticue?

<sup>18</sup>Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano. <sup>19</sup>Moisés micorí llogacinuaina ñinocana jai. Jaie cuete: “Comena meineñeno. O añede riño diga ñieno. Fiiñeno. Jiaimiena o llogidoia, tainona lloñeno. O moo uaina ñino. O ei uaina ñino”.

<sup>20</sup>Uai ote:

—Maestro, uruena cue illa facaise mona nana bie llogacinuaina ñinoticue.

<sup>21</sup>Jesús dinena naimiemo eraíllanona, naimie ie comecido jaide. Naimiemo llote:

—Omo daje rafue fieberde. Jusiñamui jitailacino o jaiacania, o raise marebicaiacania, omo ite raruiaina feca. Naie ucubena dueredinomo feca. Cuena o ñiuamona, monamo ico jaca itio. Cue llofuegamienna o illena, mai cue diga bi.

<sup>22</sup>Iena cacajano, naimiedi sunaite. Eo aillue ra naimiemo illa jira, iena naimie fecaacaiñena jira, sure jaide. <sup>23</sup>Naimie jailla mei, ie llofueoicaiganomo eraíllanona, naimacimo llote:

—Ucuberedinodi Jusiñamui cominina jaillena eo sefuiruitimaci.

<sup>24</sup>Iena cacajano, iena naimaci raise caciñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite. <sup>25</sup>Igido ifodo camello jaca Jainide. Ie isoide. Ie ra ñisuillacoma, ucuberedimiedi Jusiñamui ie cominina jiai raise Jainide.

<sup>26</sup>Iena ie llofueoicaigano cacajano, Jusiñamui cominina ucuberedino raise Jainina jira, “¿Niese dueredinodicaidi Jusiñamui cominina jaiticai?” raillamo comeciaína facadimaci. Raijicaillanona, coniniri raitimaci:

—Nana comini rana jitaila jira, ¿buca jillobiti?

<sup>27</sup>Naimacimo eruailanona, Jesús  
raite:

—Nana comini dani jillobinidimaci;  
iadedi Jusiñamuidi naimacina  
jillobitarede.

<sup>28</sup>Pedro dinena llote:

—O llua isoi jai finodicai. Nana cai  
rana fainonocaída, o diga jai  
jaicabidicai.

<sup>29</sup>Jesús uai ote:

—Uanaicina lloitice. Cuena naimie  
isiruillamona, cue rafuena naimie  
lluamona, ie jofona bu fainonocaia, ie  
amatiaina bu fainonocaia, ie miríñuaina bu  
fainonocaia, ie moona bu fainonocaia, ie  
eina bu fainonocaia, ie uruiaina bu  
fainonocaia, ie eniruena bu fainonocaia,  
<sup>30</sup>Jusiñamuimona birui ailluena ibana  
feiñoite. Duere sefuite; ia naimie isoi cue  
cominina ailluena jaillamona, naimie jofue  
iite. Ie amatiai, ie miríñuai, ie eitiae, ie  
uruiai, ie enirue birui iite. Monamo naimie  
ico caimare iocire jaca iite. <sup>31</sup>Birui  
damierio ailluena ra illamona,  
Jusiñamuimo eo comechina facañedimaci.  
Naimacimona jamai bue isoiñedimaci; ia  
Jusiñamuimona ico jamai bue isoitimaci  
Jiaínomo ailluena ra birui iñede; ia  
Jusiñamuimo comechina facadimaci.  
Naimacimona jamai bue isoidimaci; ia  
Jusiñamuimona ico jamai bue  
isoñeitimaci.

**Jesús ie fioldaillena dane llua rafue**

(Mt. 20.17-19; Lc. 18.31-34)

<sup>32</sup>Jerusalémo nia jaillanona, Jesús  
uicodo jaide. Nainomo naimie jaciruiñeno  
jaillamona, ie llofueoicaigano  
rajjicaidimaci. Naimaci diga jaidino  
jaciruoicaida jaidimaci. Naimacina jiai  
meiniana jaciruitimaci. Ie llofueoicaigano  
diga ñiaianona, naimiemo suille rafuena  
llote:

<sup>33</sup>—Ero, Jerusalémo jai jaidicai.  
Monamona billanona, iimana jaidicue;

iadedi omoi illaicomini cuena  
gaitaitimaci. Gaitaja mei, cue  
meinellena lloitimaci. Judíuaindino  
illaicomimimo cuena fecaitimaci. <sup>34</sup>Cueri  
jifanoitimaci. Cuena tuallaitimaci.  
Cuena faitimaci. Cuena meineitimaci;  
iadedi cue fiodailla mei, darui amani  
illanona, jilloiticue —llote.

**Jesús dine Jacobo Juan**

**iaimaiai billa rafue**

(Mt. 20.20-38)

<sup>35</sup>Naie facaise Jesús dine Jacobo,  
Juan diga bitiiaimaiai. Iaimaiai moodi  
Zebedeo. Raitiiaimaiai:

—Omo coco jicalle rafue cocoena  
finuana jitaidicoco.

<sup>36</sup>Jesús uai ote:

—¿Nie isode rafuena jitaidomico?

<sup>37</sup>Uai otiiamaiai:

—Illaimana o jailla mei, o ecimo coco  
illena o lluana jitaidicoco. Damie o  
nabeimo. Jiaimie o jarifebeimo.

—Jiaíno afemo iaimaiai illena, iese  
llotiiaimaiai.

<sup>38</sup>Jesús dinena llote:

—Omico jicanuana raise  
uiñoñedomico. Cue eo duere sefuiticue.  
Llegi cacaiticue. ¿Ie isoi duere  
sefuiacadomico? ¿Ie isoi llegi  
cacaiacadomico?

<sup>39</sup>Uai otiiamaiai:

—Jii. Sefuiacadicoco.

Jesús dinena raite:

—Cue isoi duere sefuitomico. Llegi  
cacaitomico; <sup>40</sup>iadedi cue nabeimo  
omico illena, cue jarifebeimo omico  
illena itatanidicue. Naie illano jai cue  
Moo finoca, nainomo iitino iena.

<sup>41</sup>Iena jiaie llofueoicaigano cacajano,  
naie iaimaiairai iciritimaci. <sup>42</sup>Jesús nana  
naimacina uaiduanona, raite:

—Nana illaicomidi naimaci anamo  
itinona ocuicabidimaci; <sup>43</sup>iadedi omoi dine  
iese iñena. Omoimona bu imienia iacania,

omoi mullaimana naimie jaisoillasa.  
<sup>44</sup>Omoimona bu imiena iacania, omoina naimie canocana jaisoillasa. <sup>45</sup>Cuemona fueo. Biñedicue, cominina cue ocuillena; iadedi cominina canuaibidicue. Cue jitaila jira, nana comini facaina fioldaisaibiticue. Naimaci jeacinomona naimaci jillobillena, fioldaisaibiticue. Ailluena comini cuena iinuamona, jilloitimaci. Coninina omoi canua —llote.

**Jesúdi Bartimeona jillotaja rafue**  
*(Mt. 20.29-34; Lc. 18.35-43)*

<sup>46</sup>Oni jaillanona, Jericó railla nairaimo Jesú ride. Naiemona ie llofueoicaigano diga jaillanona, ailluena comini Jesú jinafona racadimaci. Naie facaise nai fuemo uisnidimie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena. <sup>47</sup>Nazaret ie Jesú jaillana naimie cacajano, ado curioide:

—David micori Jitona o illamona, Jusiñamuimona o billa jira, cuena duenai. Cuena cano.

<sup>48</sup>Naimie lliicaillena, Jesú diga jaidino naimiena lletade; iadedi eo curioide:

—Maestro, David micori Jitona o illamona, cuena duenai.

<sup>49</sup>Naimiena cacajano, Jesú naidadajanona, llote:

—Naimiena cue dine uaido.

Bartimeona uaiduanona, raitimaci:

—O comeccina ocuiño. Mai naidacai. Jesú ona uaidote.

<sup>50</sup>Iena cacajano, ie emodomio itiroina duiñuanona, raire naidacaída, Jesú dine bite. <sup>51</sup>Naimemo Jesú jicanote:

—¿Niese ona cue nibaiana jitadio?

Uai ote:

—Maestro, ciaoacadicue.

<sup>52</sup>Jesú dinena uai ote:

—Cuena o iinua jira, jai jillodio. Mai jai. —Ieconi naimie jai ciode. Jesú diga jaidino diga naimie jiai jaide.

**Jesús illaima isoi**  
**Jerusalémo jailla rafue**  
*(Mt. 21.1-11; Lc. 19.28-40;*  
*Jn. 12.12-19)*

**11** <sup>1</sup>Oni jaillanona, Jerusalémo iaíreicaidimaco, Betfagé railla nairaimo ie llofueoicaigano diga Jesú ride. Betania nainomo jiai ite. Olivos railla anedumo naga nairai iaimaiai ite. Ie llofueoicaiganomona Jesú menamiena orede. <sup>2</sup>Raite:

—Bie nairai illa uicomó mai omico jai. Nainomo omico ria, cuinaca burritona baitomico. Ie emodomio nia buna jaiñede. Iena suiñuanona bene ati. <sup>3</sup>Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide. Nailli iena raire abido oretaité llote”.

<sup>4</sup>Naimie llua isoi, jaidiaimaiai. Naisomo jofo nasemo burritona baillanona, iena suiñodiiaimaiai. <sup>5</sup>Ie facaise nainomo itino jicanote:

—¿Bue ñellena burritona suiñodomico?

<sup>6</sup>Jesú llua isoi uai otiaimaiai. Ie muidona:

—Jee —raitimaci.

<sup>7</sup>Burritona atidíaimaiai. Ie emodomio naimie llofueoicaigano naimaci iniroi jobianona, ie emodomio Jesú rainadate.

<sup>8</sup>Naimiena iobitallená, illaima isoi naimie jaillena, diga comini, imaci iniroi diga, naiso motomo jobedimaci. Jiaño nai fuemoná raforona uanona, naiso motomo jobedimaci. <sup>9</sup>Dajerie Jesú uicomó jaidimaci. Dajerie naimie jinafona jaidimaci. Ado cuiiriisite:

—¡Cai Jilloitaraima billa! Jusiñamui mamecido bitimie eo mare. <sup>10</sup>Cai illaima David micori ifomo caina sedallena, damie billemo birui ocuriridicai. Jusiñamui caina jilloitajasa.

<sup>11</sup>Iese Jerusalémo naimie jaide. Nainomo rillanona, Jusiñamui jofomo

jaide. Nainomo eruaide. Jitoma ana illa jira, ie doce llofueoicaigano diga, Betaniamo ɻillena jaide.

**Jesús higuera raila  
riarana faiðua rafue**  
(Mt. 21.18-19)

<sup>12</sup>Ie areruido Betaniamona Jerusalémo abido ie llofueoicaigano diga Jesús bia, aimetaite. <sup>13</sup>Arena higuera raila riarana ciuanona, iena jibuide. Como firuide; ia naie llisilladi iñede. Ie llisilla facaise nia iñede. <sup>14</sup>Ie jira naie riarana llote:

—Biemona jaca llisiñeite. —Ie llofueoicaigano naimie lluana cacadimaci.

**Jesúdi Jusiñamui jofomona  
damieriena dotaja rafue**  
(Mt. 21.12-17; Lc. 19.45-48;  
Jn. 2.13-22)

<sup>15</sup>Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaia diga, damierie fecauidimaci. Iena Jesús ciuanona, naimaci mesaiaina oni caicode. Ucugina fecauidino rairacuai jiai oni caicode. <sup>16</sup>Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide. <sup>17</sup>Naimacina llofueté:

—Ie facaina lloraima micori Jusiñamui llogacino jaie cuega: “Cue jofo ite, nainomo nana comini cuemo jiillena” cuega. Ero, ailluena omoi ibataja jira, naimie jofona fiiruidino jofona omoi finoca.

<sup>18</sup>Judíuai illacomini naimie finoca rafuena fidianona, naimena meinellena, coniniri siadotimaci. Ailluena comini

naimie llofuiana ebiruillanona, raijicaidimaci. Ie jira judíuai illacomini naimena jaciruillamona, naimena nia meinendimaci. <sup>19</sup>Nairui navuida ie llofueoicaigano diga, Jerusalémona Jesús oni jaide.

**Jesús faiðoca riara duilla rafue**  
(Mt. 21.20-22)

<sup>20</sup>Ie are ie llofueoicaigano diga, Jerusalén díne Jesús jaillanona, higuera raila riara duillana ciódimaci. Nana ie Jainao diga duillana ciódimaci. <sup>21</sup>Jesús navui are lluana Pedro uibiñuanona, naimiemo llote:

—Maestro, ero. O faiðoca higuera jai duide.

<sup>22</sup>Jesús uai ote:

—Jusiñamuina iñocana jai.

<sup>23</sup>Uanaicinona omoimo lloitice. Jusiñamui lluana raise bu iñoia, naimie comeci igireñenia, bene ite anedumo naimie lloia: “Monaillaimo o illena, benomona mai jai”, Jusiñamui ie jitaille rana finoite. <sup>24</sup>Nie isoide rafue Jusiñamuimo omoi jicajia, naimie iena finuana omoi iñuamona, iena naimie finoite. <sup>25</sup>Jusiñamuimo o jiñacania, jiaimie diga o rafue ia iena feita. Ie isoí cai Moo Jusiñamui omoimo ite jeacino jiai feitaite; <sup>26</sup>iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

**Jesúdi ie siño uaina llua rafue**  
(Mt. 21.23-27; Lc. 20.1-8)

<sup>27</sup>Jerusalémo naimaci rillanona, Jusiñamui jofomo Jesús fo jailla mei, judíuai illacomini naimie díne bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Diese billanona, <sup>28</sup>jicanotimaci:

—¿Nie isoide uaido o finoca rafuena finodio? ¿Bu omo iga uai dígá o finoca rafuena finodio?

<sup>29</sup>Jesús dinena uai ote:

—Omoimo daje rafuena nano jícanoiticue. Raise omoi fairioia, omoimo cue uaido cue finoca rafuena lloiticue.  
<sup>30</sup>Juan Bautista micoridí cominina navui bautizade. ¿Bu naimie micorina orede, cominina bautizallena? ¿Jusiñamui?  
 ¿Comini? Cuemo llono —llote.

<sup>31</sup>Dani coniniri iena siaduanona, anado raitimaci:

—“Jusiñamui” cai fairioia, caimo jícanoite: “¿Bue ñellena naimie micori lluana iinoñedomo?” <sup>32</sup>“Comini” cai fairioia, bene itino caina nibai meineticaci, Juan micoridí Jusiñamui facaina lloraima naimaci railla jira.

<sup>33</sup>Ie jira fairiotimaci:

—Uiñoñedacai.

Jesús dinena raite:

—Ie muidona cuemo nie isoide uai illana omoimo lloñeiticue.

**Jesúdi maraiñede maijiraini  
rafuena llua rafue**  
(Mt. 21.33-46; Lc. 20.9-19)

**12** <sup>1</sup>Judíuái illaicomínimo Jesús llote:  
 —Jaie rafuena omoimo lloiticue. Iemo cacarei. Daje patrón uvas railla riaraiaña rite. Naie abí llaite. Jairuido uvas ijina eenollena, eniruemo ifona raite. Naie illina raise eruaillena, tidaiana finode. Iena sedallená, ibatajanona, jíainomo fecade. Ie mei jaie eniruemo jaide. <sup>2</sup>Uvas jai einailla facaise riaraiaña sedarainí dine naie patrón ie mullaimana orede, naie illímona dajerie riara llisilla ollena; <sup>3</sup>jadedi naie sedarainidí ie mullaimana fatimaci. Ie mei naimiemo riara fecañeno naimiena abido oredimaci. <sup>4</sup>Ie mei patrón jiaie mullaimana orede. Naimie ifogina bofedimaci. Naimiena

jeare finodimaci. <sup>5</sup>Ie mei patrón jíaimena orede. Naimiena meineticaci. Ie mei ailluena mullaiaina orede. Damierena fatimaci. Damierena meineticaci. <sup>6</sup>Patrómo ie isiruiga jito ite. “Cue jitona jaciruitimaci. Naimie uaina iiñootimaci. Naimiena oretaíticue” patrón comechina facade. <sup>7</sup>Riaraiaña sedarainí naimiena cianoná, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci. <sup>8</sup>Naimaci díne naimie rilla mei, naimiena meineticaci. Ie mei ie abina illímona jino dotadimaci. <sup>9</sup>Iena fidia mei, ¿niese naie patrón nibaite? Ero, naimie billanona, ie illina sedarainina fuidoite. Ie mei jíainona ie illina sedataite.

<sup>10-11</sup>Naimacímo Jesús llote:

—Naie illi sedarainí isoidomoi.

Jusiñamui facaina lloraima micori omoína jaie cuete. Ie cuegaufuna raise facañedomoi. Naimie micori cuega:

Jofo finoraini jitaiñena nofici  
nana naie jofomo ite nofici  
baifemo jai uaide.

Jusiñamui iena finotate.

Iena cai uiñuamona: “Eo mare”  
raiticai

cuega. Jusiñamui cominina damierie jaillana naimie micori cuete. Jusiñamui oretagamiéna damierie jitaiñenamona, naimie cominina jaiñeitimaci; iadedi Jusiñamui oretagamiéna ailluena iiñuamona, naimie cominina jaitimaci. Ero, Jusiñamui facaina lloraima micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi.

<sup>12</sup>Judíuái illaicomini iena cacajanona, Jesús naimacina ñáiana naimaci uiñuamona, naimiena gaitaacadimaci; ia cominina jaciruitimaci. Ie jira naimiemona oni jaidimaci.

**Jesúmo gobiernomo ucubena  
fecajana jícanua rafue**  
(Mt. 22.15-22; Lc. 20.20-26)

<sup>13</sup>Judíuoa illaicomini jailla mei, dajerie fariseuai cominina Jesús díne oredimaci. Illaíma Herodes dibeimo itinona oredimaci. Naimie raise uai oñenia, naimieno duere finollena, Jesúna facaciíacadimaci.

<sup>14-15</sup>Naimiemo llotimaci:

—Maestro, uanaicinona llofuecabito. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. Omo rafuena jícanoiacadicai. Dani Jusiñamuina sedadicai; iadedi romanuai raila nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

Naimaci mareuidinona abina caitadinona naimie uiñuamona, naimacimo llote:

—¿Bue ñellena cuena facacitomoi? Ucube cuemo acata.

<sup>16</sup>Ie jira acatatiñaci. Naimacimo jicanote:

—¿Bu ie joreño nainomo ite? ¿Bumo jainaiaide bie cuega radi?

Uai otimaci:

—César.

<sup>17</sup>Jesús díñena raite:

—César iena itedi, Césarmo ille. Jusiñamui iena itedi, Jusiñamuimo ille —raite.

Naimie lluana cacajano, naimie raise uai ua jira, ieri raijicaidimaci. Naimie iese llua jira, naimieno duere finonidimaci.

**Jesús díne saduceuaí railla  
comini billa rafue**

(Mt. 22.23-33; Lc. 20.27-40)

<sup>18</sup>Naie facaise saduceuaí railla comini naimie dine bitimaci. Fiodaillamona jaca buna jilloñellena iiñotimaci. Jesúmo llotimaci:

<sup>19</sup>—Maestro, cai facaina Moisés micori jaie cuega: “Iima fiodailla meinoconi, naimie urue iñenia, ie ama naie feciño olle. Naimiedi uruiaína ie ama facaina comuitaite” cuega. <sup>20</sup>Bie rafuena uiñoiacadicai. Siete amatiai ite. Nano doforamie ie aina ote. Naimie nia uruiaínde fiodailla. <sup>21</sup>Ie emodo imie ie ama feciñona ote. Naimie uruiaínde jiai fiodailla. Naie siete digamiedemona iese sefuide. <sup>22</sup>Uruiaínde nana fiodailla. Ja muidomo naie riño jiai fiodaite. <sup>23</sup>Fiodaillamona, ico naimaci jilloiadedi, ¿bu naie riño ienite? Naiñaiño siete digamienda inirede —llotimaci.

<sup>24</sup>Jesús uai ote:

—Moisés micori cuegafuiaina raise omoi uiñóñena jira, Jusiñamui uaina raise omoi uiñóñena jira, bie isoide rafuena raise uiñóñedomo.

<sup>25</sup>Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisai ainidimaci. Innidimaci. Ie isoi naie siete amatiai iitimaci. <sup>26</sup>Fiodaitino ico jilloillena omoimo lloitice. Moisés micori jofue iñenanomo illa facaise, amena boode motodo Moisés micrimo Jusiñamui ñaia facaise, naimie micrimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. <sup>27</sup>Jai fiodaitimaci; ia naimaci joreñuaí nia itimaci. Jusiñamuidi dani cajedino imaci Jusiñamuina jira, naimaci joreñuaí naimie dine itimaci. Ico naimaci abiaína jiai jillotaite. Fiodaillamona jilluana omoi raise uiñóñedomo —llote.

**Jesús nanoca llogacinona  
llofua rafue**  
(Mt. 22.34-40)

<sup>28</sup>Naie facaise Moisés micori llogacinona llofueraima Jesús díne

billanona, naimiedi comini Jesús uaina uitajana cacade. Jesús raise uai uana cacajano, Jesúsmo jicanote:

—Moisés micorí jaie llogacinuaimona, ¿nie llogacino ua nanoca llogacinona?

<sup>29</sup>Jesús dinena uai ote:

—Moisés micorí jaie cuega: “Israel comini, bie rafuemo cacarei. Cai Nama Jusiñamui jaca dajede.” <sup>30</sup>Omoi jitaila jira, nana omoi comeciai diga, cai Nama Jusiñamuina isirui. Naimiemo omoi comeciaina eo faca”. <sup>31</sup>Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. Bie mena llogacino jiae llogacinuai baifemo faite.

<sup>32</sup>Naie llofueraima dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede.

<sup>33</sup>Cai jitaila jira, nana cai comeciai diga naimiena cai isiruia, naimiemo cai comeciaina eo facaia, cai abina cai isiruilla isoi cai ecimo itinona cai isiruia, Jusiñamuina raise sedadicai. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

<sup>34</sup>Naimie raise uai ua jira, naimiemo Jesús llote:

—Iese o iinocana jaia, Jusiñamui jitaila isoi, ie cominina raire jaitio. —Ie facaisemona buna naimiena facaciaibíñede.

#### **Jesús dinena fariseuá cominimo jicanua rafue**

(Mt. 22.41-46; Lc. 20.41-44)

<sup>35</sup>Jusiñamui jofomo Jesús jailla mei, nainomo itinomo jicanote:

—¿Niese Moisés micorí llogacinona llofueraini Cristona raitimaci? ¿Niese naimiedi David micori jitona raitimaci?

<sup>36</sup>Jusiñamui Joreñodi David micorina ñaitatajanona, David micori llote:

Jusiñamuidi cue Namamo llote:  
“Illaimana o illamona, cue nabe  
dine ana rai.  
Ona iinoñedino o anamo  
itataiticue”.

<sup>37</sup>“Cristodi cue Nama” David micori  
raite. Iese naimie micorí railla jira,  
Cristo David micorí afemo faite.  
Naimiedi jamai David micorí jitoñede;  
ia jiai ie Nama. —Nainomo itino naimie  
llofuiiana iocire cacareidimaci.

#### **Jesúdi judíuai illaicominina ñaia rafue**

(Mt. 23.1-36; Lc. 11.37-54; 20.45-47)

<sup>38</sup>Jusiñamui jofomo Jesús nia  
llofuianson, raite:

—Moisés micorí llogacinona  
llofuerainimona abina rairui.  
Illaicomina naimaci itimacida,  
naimacina comini cioillena, eo mare  
iniroina jitaacacabidimaci. Nine  
naimaci macaria, naimaci jamai bue  
isoñedínona itimacida, comini  
naimacina uaiduana gaidimaci.

<sup>39</sup>Comini naimacimo acarillena,  
ofiracomo uicomó raiacadimaci. Rafue  
ia: “Jamai bue isoñiedicai” raillamo  
comecinia facajanona, rafue nama ecimo  
raiacadimaci. <sup>40</sup>Feciñuaimona rana  
ocabillanova, naiñaiñuaina duere  
finodimaci. Naimiena eo  
sedadicida, Jusiñamui mo are  
jiicabidimaci. Iese naimaci icabilla jira,  
Jusiñamui naimacina jiae comini  
baifemo duere finoite.

#### **Jesúdi Jusiñamui jofomo duerede fecíño ucube fecajana ciua rafue**

(Lc. 21.1-4)

<sup>41</sup>Jusiñamui jofomo Jesús nia ia,  
ucube fecarano uicomó ana raide.  
Nainomo comini ucubena joniamo  
eruaide. Alluena ucuberedino alluena  
ucubena jonetimaci. <sup>42</sup>Ie facaise eo

duerede feciño menaruñu jonete.<sup>43</sup>Iena ciuanona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiae comini jonia baifemo jonete.

<sup>44</sup>Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñomo ite ucubena jonete. Ie jira jiaino baifemo jonete.

**Jesúdi Jerusalémo ite Jusiñamui jofo judaiana llua rafue**  
(Mt. 24.1-2; Lc. 21.5-6)

**13** <sup>1</sup>Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo itenoficiai co ebirede. Bico eo ebire ciode.

<sup>2</sup>Jesús dinena uai ote:

—Bie jofo birui eo mare; ia nana bie jofomo itenoficiai ico judaisite —llote.

<sup>3</sup>Le mei Olivos railla anedu díne rillanona, Jusiñamui jofo uico díne Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

<sup>4</sup>—Jusiñamui jofo judaisillana omo jicanoiacadai. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

<sup>5</sup>Uai ote:

—Omoina bie rafuena bu jifueñellena, omoi abina rairui. <sup>6</sup>Ailluena comini cue mamecido billemona: “Cristodicue” raitimaci. Diga cominina jifueñtimaci. Lemona omoi abina rairui. <sup>7</sup>Jobaimiai illena fiditomoi; iadedi jaciruiñeno. Iese suite; iadedi abido nia biñeiticue.

<sup>8</sup>Daje nairai jiae nairai diga jobairitimaci. Daje gobierno jiae gobierno diga jobairite. Diga illanuaimo ñuisañuai suite. Diga illanuaimo comini

aime guitimaci. Iese suia, omoi duere sefullifue omoimo suite. <sup>9</sup>Abina rairui.

Dajerie omoina llogidoitimaci. Omoina gaitaja mei, naimaci ofiracomo omoina faitimaci. Cuemo omoi duilla jira, omoina gaitajanona, omoina duere finollena, illaicomini díne omoina uitimaci; ia naimacimo cue rafuena lloitomoi. <sup>10</sup>Diga comini cue rafuena nana nairaimo lloitimaci, nana nairaiai iena cacaillena. Ie mei abido biiticue.

<sup>11</sup>Naie illaicomini díne omoi ia, juez díne omoi ia, omoi abi riidollicinomo omoi comeciaina jarire facañeno. Naie facaise omoi ñaillacinona uiñoitomoi. Dani omoi comeciai icinodo ñaiñeitomoi; ia Jusiñamui Joreño uaido ñaitomoi. <sup>12</sup>Cuena iñnotomoi; ia ailluena cuena iñnoñeitimaci. Cuena omoi iñnuá jira, omoina enoitimaci. Lemona dajerie ie amana meinatollena, naimiena llogidoite. Dajerie moodi ie uruena meinatollena, naimiena llogidoite. Dajerie uruiaidi naimaci moona, naimaci eina meinatollena, naimacina llogidoitimaci. <sup>13</sup>Cue cominina omoi illamona, nana nairai omoina enoitimaci; iadedi cuena fainonocaiñedimie ja muidomo monamo jaca iiite. Naimiena jillotaiticue. <sup>14</sup>Cue lluamo cacarei. Jusiñamui facaina lloraimadi jiaeñie jearede rafue finollena jiae llote. Naie rafue suia, Jusiñamui jofomo Jusiñamuina sedañeitomoi. Nainomo ite jearede rafue finuana omoi ciuanona, naiemona omoi jillobilena, duere omoi sefuiñellena, Judeamo omoi illamona, aneduai díne omoi aisi. <sup>15</sup>Jofo emodom omoi ia, ana billanona, aneduai díne raire rillena, jofomo jaiñeno. Nainomo ite rana omoi diga uiñeno. <sup>16</sup>Aneduai díne raire rillena, illimo omoi ia, abido jofomo biñeno, omoi iniroi omoi diga uillena. <sup>17</sup>Naie

rafuemona jillobilena, naie facaise urueside riño duere sefuite. Uruena nia jirode riñodi jiai duere sefuite. <sup>18</sup>Eo duere sefuiñellena, Jusiñamuimo omoi jicano, rollime facaiseconi bie rafue suiñellena. <sup>19</sup>Naie facaise comini eo duere sefuitimaci. Jusiñamuidi enirue finua facaisemona iese comini nia duere sefuiñedimaci. Ico iese eo duere sefuiñetimaci. <sup>20</sup>Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

<sup>21</sup>Le facaise omoimo bu raia: “Jadi, Jusiñamui facaina lloraima benomo birui bairede. Naimiedi Cristo”, iena iiñoñeno, Jiaimie raia: “Oni batine Cristo birui bairede”, iena iiñoñeno. <sup>22</sup>Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. <sup>23</sup>Le jira omoi abina rairui. Ero, bie rafue nia suiñenia, iena omoimo jai lloticue.

#### Jesús abido ie bille rafue

(Mt. 24.29-35, 42-44; Lc. 21.25-36)

<sup>24</sup>Naie duere sefuilla facaise meinoconi, jitoma lligaiñoñeite. Fivui jiai lligaiñoñeite. <sup>25</sup>Monamona ucuai ana llujite. Nana naie radi jaidisite. <sup>26</sup>Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. <sup>27</sup>Cue jaienisaina cue ecimona oretaiticue. Cue fetocano diese naganomona ofitaitimaci.

<sup>28</sup>Higuera railla riaramona omoi fueo. Bie eniruemo naie riara firuillamona, fiemonra raire illana uiñotomoi. <sup>29</sup>Ie isoxide. Bie rafue ico suia, cue billirui iairei illena uiñotomoi. <sup>30</sup>Uanaicinona omoimo lloiticue. Nana bie rafue suille

facaiseconi bie nairai nia iite. <sup>31</sup>Mona enirue diga fuite; iadedi cue lloga uai jaca suite. <sup>32</sup>Cue abido billirui jaca bu uiñoñede. Jusiñamui jaienisa iena uiñoñedimaci. Jusifiamui Jitodicue; iadedi cue abido billiruina jiai uiñoñedicue. Dama cue Moo iena uiñote. <sup>33</sup>Abina rairuicana jai. Naimie omoina canollena, Jusiñamui jiai jiicabi. Cue billirui omoi uiñoñena jira, iemo ocuiri.

<sup>34</sup>Iena omoi raise uiñollena, bie rafuena lloiticue. Patrón jiaie eniruemo jaide. Nia jaiñenia, ie mullaiaina ie jofona sedatare. Nagamie ie majille ocuide. Jofo nasena sedadimemo naimie billemo raise ocuririllena llote. <sup>35</sup>Naie patrón abido billena naimaci uiñoñena jira, naga hora iemo ocuriritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite. <sup>36</sup>Ebena naimie biite. Ínidimacimo naimaci balsaibi raillanona, naimaci jaca ocurilla. <sup>37</sup>Le isoxide. Ebena biiticue. Cue abido billirui omoi uiñoñena jira, iemo jaca omoi ocuriri.

#### Judíuai illaicomini Jesúna

gaitallena, siadua rafue

(Mt. 26.1-5; Lc. 22.1, 2; Jn. 11.45-53)

**14** <sup>1</sup>Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana jaca guiñedimaci. Egiptomona naimaci jaiagai jillobiliana comecillena, naie rafue ite. Judíuai illaicomini Jesúna jifuiano gaitaacadimaci. Naimiena meineiacadimaci. Iena siadua mei, <sup>2</sup>raitimaci:

—Pascua railla facaise naimiena nia gaitañeitacai. Naie facaise naimiena cai gaitataia, iena gaiñenamona, comini cai diga fuiritimaci. Nia sedaiticai.

**Jesúmo riño caimare  
soride ra totaja rafue**  
(Mt. 26.6-13; Jn. 12.1-8)

<sup>3</sup>Betania railla nairaimo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide.

<sup>4</sup>Damierie iena ciuanona, iciritimaci. Coniniri dani ñaitimaci:

—Naie ra jamai dotade. Jai faifide.

<sup>5</sup>Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare.

—Naiñaiñona iese ñaitimaci.

<sup>6</sup>Naimaci ñaiana Jesús uiña jira, naimacímo llote:

—Dama ite. <sup>7</sup>Bue ñellena naiñaiñona jeare ñaitomoi? Mare rafuena cuemo finode. <sup>8</sup>Omoi diga dueredino jaca itimaci. Niruido o jitaia, naimacina canoredomo; ia omoi diga jaca iñeiticue. <sup>9</sup>Cue facaina naiñaiño finoacana diese jai finode. Nia fiodañedice; ia cue fiodaillirui facaina naiñaiño iese finode. <sup>10</sup>Omoimo uanaicinona lloiticie. Ninomo cue mare finoca rafuena bu lloia, naiñaiñona ubiñollena, nana cominimo naiñaiño finoca rafuena lloite.

**Judas micori raillamie Jesúna  
gaitataiacana rafue**  
(Mt. 26.14-16; Lc. 22.3-6)

<sup>10</sup>Ie facaise Jesús llafueoicaiganomona Judas Iscariote micori raillamiedi Jesúna gaitatallena, Jusiñamui diga nanoca ñairaini díne jaide. <sup>11</sup>Iena cacajano, iobidimaci.

—Iena o finoia, omo ucubena fecaiticai —llotimaci. Iemonia Jesús gaitatalliruimo Judas ocuiride.

**Jesúdi ie fiadaille  
rafuena llua rafue**  
(Mt. 26.17-29; Lc. 22.7-23;  
Jn. 13.21-30; 1 Co. 11.23-26)

<sup>12</sup>Llomenico guille rafue illanona, judíuai comini toica llaudaiaina fajarui illanona, Jesús ie llofueoicaigano jicanote:

—¿Ninomo pascua railla rafue ie guille finuana jitadio?

<sup>13</sup>Naimacimona menamiena oretajanona raite:

—Jerusalémo omico jaillanona, nogodo jinuina uitimienna ciotomico. Naimienra raca. <sup>14</sup>Naimie jailla jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’” <sup>15</sup>Ie mei omicomo afebebamo ite aillue cuartona acataite. Na raruia diga ite. Nainomo cai guille fino.

<sup>16</sup>Jesús llua isoi jaidiaimaiai. Jerusalémo rilla mei, naimie llua isoi baitiiaimaaiai. Pascua rafue guille finodiaaimaaiai. <sup>17</sup>Nairui jitoma ana itemo, ie llofueoicaigano diga, Jesús nainomo guisaide. <sup>18</sup>Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

<sup>19</sup>Iena cacajanona, sunaitimaci. Damierie naimiemo jicanoside:

—¿Cuena ñaitio?

<sup>20</sup>Uai ote:

—Omoimona damie bie platomo cue diga llomenico diga mutade.

<sup>21</sup>Jusiñamui facaina lloraima micori cuega isoi, monamona jai billamona, fiaditicue; iadedi cuena gaitataitimie eo duere sefuite. Naimie jeiciñegadena, cuemonia mare.

<sup>22</sup>Naimaci nia guitimacimo, llomenicona Jesús llinuanona,

Jusiñamuimo iobillacinona fecaja mei, llomenicona tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

<sup>23</sup>Ie mei naimie jiroracoma jiai llinote. Jusiñamuimo iobillacinona llua mei, naie jiroracomo jai totaca vino naimacimo fecade. Lemona nana jirodimaci. <sup>24</sup>Naimie raite:

—Cue fiodaillamona, dama cue diaillamona, jeacino anamona ailluena jillotaiticue. Jusiñamui jiae rafue birui itatajamona, naimaci jeacino oni dotajana jai llote. Bie vinodi naie rafue facai ie. <sup>25</sup>Omoina bene dane iese caimare nabaiñeiticue. Cue Moo sedajanomo omoi diga cue ia, nainomo omoina dane iese caimare marena nabaiticue.

**Jesúdi Pedro naimiena  
januana llua rafue**  
(Mt. 26.30-35; Lc. 22.31-34;  
Jn. 13.36-38)

<sup>26</sup>Iobilla rua Jusiñamuimo naimaci rua mei, Olivos railla anedumo Jesús ie llofueoicaiganu diga jaide. <sup>27</sup>Naimacimo llote:

—Cuenca fainonocaitomoi. Jusiñamui facaina lloraíma micori iena jaie cuega: “Toica llaudaiái sedaraímana meineticaci. Naimie toiníai uaficaida jaitimaci” cuega. Naimie micori caína cuete. <sup>28</sup>Ero, fiodaillamona cue jillua mei, omoi uicodo Galileamo jaiticue, nainomo omoi diga dafaifillena.

<sup>29</sup>Pedro uai ote:

—Nana jiaino ona fainonocaya, ona jaca fainonocaiñeiticue.

<sup>30</sup>Jesús dinena raite:

—Uanai omo lloitice. Ja naio iitava menacaiño nia ñaiñenia, dacaiño amani cuena janoitio.

<sup>31</sup>Pedro dinena riire llote:  
—O diga cue fiodaiaidedi, ona janoeñeiticue.  
Nana ie llofueoicaiganu daje uaido jiai raitimaci.

**Jesúdi Getsemanímo  
Jusiñamuimo jiia rafue**  
(Mt. 26.36-46; Lc. 22.39-46)

<sup>32</sup>Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

<sup>33</sup>Naimie diga Pedrona uite. Jacobona uite. Juan jiai uite. Naimie sunaicaide. Ie comeciuri iñede. <sup>34</sup>Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi ji.

<sup>35</sup>Naimie janore bai jaillanona, eniruemo bitadate. Naimie duere sefuiñellena, Jusiñamuimo jiide:

<sup>36</sup>—Ore Moo, nana rana finoredio. Cuena llegi cacaitaño. Cue jitaila isoi cuena finoñeno; iadedi o jitaila isoi cuena fino.

<sup>37</sup>Ie mei ie llofueoicaiganu dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niexe raire inidio? daje hora nia iñedemo. <sup>38</sup>Iniñeno. Taife ramo omoina fai raillano, iena omoi iñoñellena, Jusiñamuimo ji. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo ji, omoina naimie ocuiñotallena —llote.

<sup>39</sup>Ie mei dane jiillena jaide. Ailli naimie jiia isoi, dane jiide. <sup>40</sup>Ie llofueoicaiganu dine dane billanona, naimaci uisi llirioilla jira, naimaci inisitemo ride. Naimacina casitajano,

Jesús naimaci diga ñaite; ia naimaci dinena uai uana uiñoñede.<sup>41</sup> Dane jiia mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fioldaille facaise jai ite. Jusiñamui jitaila jira, cuena ja gaitajanona, naimiena iinoñedino anamo ja iiticue.<sup>42</sup> A naidacai. Maiña. Cue gaitataitimie jai bite.

**Jesúna gaitalle rafue**  
(Mt. 26.47-56; Lc. 22.47-53;  
Jn. 18.2-11)

<sup>43</sup> Jesúna nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micori llogacinona llofuerainimona bitimaci. Naimaci einamacimona bitimaci.<sup>44</sup> Jesúna dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiena llibanoiticue. Le mei naimiena gaita. Naimiena raise maianona, naimiena oni uiño.

<sup>45</sup> Jesúna dine naimie rillanona, Judas Jesúna dine raire jaide. Naimiena uaidote:

—Maestro, jai biticue. —Ieconi naimiena llabanote.<sup>46</sup> Ie jira Jesúna gaitadimaci.

<sup>47</sup> Iena ciuanona, Jesúna diga itinomona damie ie lloebi illinuanona, naimiedi nanoca ñairaima ie mullaima jefona jaibonote.<sup>48</sup> Naimiena gaitadinomo Jesúna llote:

—Omoi lloebina atidomoi. Omoi butaralluna atidomoi. Cuena gaitallená, firiraimadicutia cuemo omoi billa.

<sup>49</sup> Jusiñamui jofomo nagarui llofuecabiticue. ¿Bue ñe nainomo cuena

gaitañedomoi? Cuena jai omoi gaitajamona, Jusiñamui facaina lloraini micoríai cuegafuiai suite.

<sup>50</sup> Ie facaise nana naimie llofueoicaigano naimiena fainonocaillano, aisidimaci.

**Jesúna jinafona conirue racaja rafue**

<sup>51</sup> Ie facaise daje conirue Jesúna jinafona racade. Jamai abimo iniroi ferinocaida racade. Naimiena ciuanona, comini naimiena gaitadimaci;<sup>52</sup> ia ie iniroina fainonocaillanona, taimiena aside.

**Jesúdi judíuái illaicomini  
dine illa rafue**

(Mt. 26.57-68; Lc. 22.54, 55, 63-71;  
Jn. 18.12-14, 19-24)

<sup>53</sup> Jesúna gaitaja mei, Jusiñamui diga nanoca ñairaima dine naimiena uitimaci. Nana judíuái illaicomini itimaci. Nanoca ñairaini itimaci. Einamaci jiai itimaci. Moisés micori llogacinona llofueraini jiai itimaci.

<sup>54</sup> Pedro naimaci jinafona aarena racade. Jusiñamui diga nanoca ñairaima nairaibírimo jaide. Jofono sedadíno diga nainomo ite iraimo agaide.

<sup>55</sup> Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide maraiñede rafue illana uiñoñedimaci.<sup>56</sup> Diga comini Jesúna llogidotimaci; ia tainona llotimaci. Daje isoi lloñedimaci.<sup>57</sup> Damierie billanona, tainona llogiduanona, raite:

<sup>58</sup> —Bimie lluana cacadicai. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaianona, darui amani illanona, jiae finoiticue. Comini iena finoñeitimaci”.<sup>59</sup> —Iese llotimaci; ia daje isoi lloñedimaci.

<sup>60</sup>Naimaci motomo Jusiñamui diga nanoca ñairaima naidadajanona, Jesúmo jicanote:

—¿Niese uai oitio? ¿Nie isoide rafue ona llogidotimaci?

<sup>61</sup>Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

<sup>62</sup>Jesús uai ote:

—Jii, naimiedicue. Monamona jaie cue billamona, iimana jaidicue; ia ico jiairuido illaimana cue illena, Jusiñamui ecimo cue raillena, omoi nairai cioitimaci. Mona uilliemo cue abido billena jiai cioitimaci.

<sup>63</sup>Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaino naimiena llogidollena jai jitaiñedicai. <sup>64</sup>Jusiñamuina naimie jeare ñaiiana jai cacadomoi. ¿Niese naimiena raitomoi?

Jiaie illacomini dinena:

—Naimie fiodaillesa —llotimaci.

<sup>65</sup>Ie facaise damierie naimiena tuallaitimaci. Ie uecona ibailla mei, naimiena ducoídimaci. Raitimaci:

—Bu o ducoia caimo llono.

Naimiena gaitadino dinena naimiena jiai ducoídimaci.

#### Pedrodi Jesúna janua rafue

(Mt. 26.69-75; Lc. 22.56-62;

Jn. 18.15-18; 25-29)

<sup>66</sup>Naie facaise Pedro nairaibrimo ite. Naie nanoca ñairaima mullaiñuaimona dañaiño nainomo billanona, <sup>67</sup>Pedro agaillana ciode. Raite:

—Nazaret ie Jesús cominidio.

<sup>68</sup>Pedro iena januano, raite:

—O lluana uiñoñedicue. Iena raise cacaiñedicue.

Ie mei nase fuedo jaide. Naie facaise iitava dacaiño ñaite. <sup>69</sup>Naie mullaiño

naimiena dane ciuanona, nainomo jamai itinomo llote:

—Bimiedi Jesús ie llofueoicaigano imie.

<sup>70</sup>Iena Pedro dane janote. Dallu illanona, nainomo jamai itino Pedromo llote:

—Odi Galilea imedio. Jesús diga jaicabidio.

<sup>71</sup>Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, omoi llogamiéna uiñoñedicue.

<sup>72</sup>Ieconi iitava dane ñaite. Iena cacajano, Pedro Jesús lluana ubiñote. Jaive naio Jesús Pedromo llote: “Itava menacaiño nia ñaiñenia, dacaiño amani cuena janoitio”. Iena ubiñuamona, Pedro eo eede.

#### Pilato dine Jesús illa rafue

(Mt. 27.1, 2, 11-14; Lc. 23.1-5;

Jn. 18.28-38)

**15** <sup>1</sup>Jitiramo monaidemo, judíuai illacomini danomo siadotimaci. Jusiñamui diga nanoca ñairaini itimaci. Naimaci einamaci jiai itimaci. Moisés micori llogacinona llofueraini jiai itimaci. Siadua mei, Jesúna maianona, Pilatomo uitimaci. Romanuái railla nairai anamo naimaci illa jira, Pilatodi naimaci gobernador. <sup>2</sup>Pilato naimiemo jicanote:

—¿Judíuái comini illaimadio?

Jesús uai ote:

—Jii.

<sup>3</sup>Ie muidona Jusiñamui diga nanoca ñairaini Jesúna llogidotimaci:

—Naimie diga maraiñede rafuena finode —llotimaci.

<sup>4</sup>Pilato dinena naimiemo jicanote:

—¿Niese uai oñedio? Ona eo llogidotimaci.

<sup>5</sup>Jesús nia uai oñena jira, Pilato uainicaide.

**Pilatodi Jesús fiodaillana llua rafue**  
(Mt. 27.15-31; Lc. 23.13-25;  
Jn. 18.38—19.16)

⁶Naga año pascua railla rafue facaiseconi cárcelmo itinomona Pilatodi comini jicacamieno jamai jino oredē. ⁷Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite. ⁸Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci. ⁹Pilato jicanote:

—¿Bu jino cue oretallena jitaidomo? Omoi judíuai railla illaimana nibai jitaidomo.

⁹Iese jicanote; iadedi naimiedi Jusiñamui diga nanoca ñairaini Jesúri uradoillana uiñote. Naimaci Jesúna meiniacanana jiai uiñote. ¹¹Jusiñamui diga nanoca ñairaini naimacina llotataja jira, comini dínená Barrabás jino jamai oretallena jicadimaci. ¹²Iena cacajano, Pilato naimacimo jicanote:

—¿Niese bimieno cue finuana jitaidomo? Naimiedi omoi judíuai illaima raillamie.

¹³Ado llotimaci:

—¡Naimieno corai!

¹⁴Pilato dane jicanote:

—¿Nie isoide maraiñede rafuena finode?

—Iena cacajano, ado ibi llonoidimaci:

—¡Naimieno corai!

¹⁵Naimacina iobitallena, naimaci jitaila jira, Barrabás jino oredē; iadedi Jesúna sechedotaja mei, naimieno corailena oredē.

¹⁶Soldaduai naimieno gobernador jofo fo uillanona, nana soldaduai naimeno ofidimaci. ¹⁷Jiduirede iniroi naimieno jitadimaci. Eecuaimona niga nuiciraina naimie ifogimo jitadimaci. ¹⁸Naimieno jifanoduanona, naimieno uaidotimaci:

—¡Jadi, judíuai illaima!  
¹⁹Radosi diga ie ifogimo buta-butadimaci. Naimieno tuallaitimaci. Naimie illaimana itena, naimieno sedallena, caiñici ifodo raiedimaci. ²⁰Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimieno jitadimaci. Ie mei naimieno corailena oni uitimaci.

**Jesúna coraia rafue**  
(Mt. 27.32-44; Lc. 23.26-43;  
Jn. 19.17-27)

²¹Jerusalémona naimaci jaillanona, jamai bitimiemo dafaifidimaci. Naimiedi Simón. Cirene railla enirue imie. Naimie jito iaimaiaídí Alejandro iaimaiaí Rufo diga. Jerusalén onifemonia naimie billanona, naimieno dafaifidimaci. Naimieno Jesú uiga cruzna rocatatimaci. ²²Gólgota raillanomo jaidimaci. Ifocoraina eruailla jira, iese mamecirede. ²³Nainomo rillanona, ie abi isirena cacaiñellena, vinomo erirede rana faianona, Jesúmo fecadimaci; iadedi naimie iena jiroñede. ²⁴Ie mei naimie cruzmo coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uiñollena, jifanododimaci.

²⁵Jitoma nia furi daidemo, naimieno coraídumaci. ²⁶Cruzmo ie llogiduafuena jonetimaci. Jai cuega: “Judíuai comini Illaima”. ²⁷Ie mei mena fiiriruide iaimaiaina coraídumaci. Damie Jesú nabeimo coraica. Jiaimie Jesú jarifebeimo coraica. ²⁸Iemonia Jusiñamui facaina lloraima micori jaie cuegafue suide. Cuega: “Maraiñedino isoi naimie jai ite”.

²⁹Naisodo jamai jaidino Jesúna mameritimaci. Mamerillamona, ifogiaina jaididimaci. Raitimaci:

—Navui raisoidio: “Jusiñamui jofona judaíticue. Darui amani illanona, iena dane finoiticue” raisoidio. <sup>30</sup>Ie muidona dama o abina mai jillota. Cruzmona ana bi.

<sup>31</sup>Ie facaise Jusiñamui diga nanoca ñairainai naimiena jifanododimaci. Moisés micori llogacino llofueraiñi naimiena jiai jifanododimaci. Raitimaci:

—Jiae cominina jillotate; ia dama naimie abina jillotanide. <sup>32</sup>Naimiedi Cristodena, naimiedi cai judíuái comini illaima raillamiedena, dama niadedi cruzmona ana ie billa. Iena cai cioia, naimiena iiñoiticai. —Iese naimiena jifanododimaci. Naimie diga coraicamie iaímaiai naimiena jiai jeare ñaitiaímaiai.

### Jesús fiodailla rafue

(Mt. 27.45-56; Lc. 23.44-49;  
Jn. 19.28-30; He. 9)

<sup>33</sup>Jitoma naidai itemona, daje amani horas mona jitibicaide. <sup>34</sup>Ie meinomo judfuai railla uaido Jesús ado jídaiode:

—Eloi, Eloi, ¿lama, sabactani?  
—jídaiode. Iena oni dobaiñuamona raite: “Cue Jusiñamui, cue Jusiñamui, ¿gue ñellena cuena fainonocadio?” raite.

<sup>35</sup>Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elána uайдote —raitimaci. <sup>36</sup>Naimacimona damie jarire jaillanona, fibecode ramo vinona faite. Radosimo jillillano jirollena, naimemo a fecade. Raite:

—Dallu sedaiticai. Elías naimiena jillotajaibillena uiñoiacadcaí.

<sup>37</sup>Ie facaise ado cuirioita fiodaite. <sup>38</sup>Naie facaise Jusiñamui jofomo ie fetaca iniroife ana anaba jillacimo motodo menafe cuararide. <sup>39</sup>Jesúna sedallena, nainomo capitán ite. Jesúmo eruaiñanona, Jesús fiodaillana ciode. Raite:

—Uanai bimiedi Jusiñamui Jito.

<sup>40</sup>Dajerie riñoniai naie rafuena aarena ciodomaci. Naimaci motomo María Magdalena ite. Jiae María jiai ite. Naiñaiñodi Jacobo ei. Naimiedi jamamie. Naiñaiñodi jiai José ei. Salomé jiai ite.

<sup>41</sup>Galileamo Jesús navui illa facaise naie riñoniai naimie diga jaisoidimaci. Naimieno canoudimaci. Jerusalémo Jesús billanona, ailluena riñoniai naimie diga jiai bitimaci. Ie fiodaillana jiai ciodomaci.

### Jesús raiafomo jonia rafue

(Mt. 27.57-61; Lc. 23.50-56;  
Jn. 19.38-42)

<sup>42</sup>Jitoma ana itemo, sábado rille jai iaírei illanona, <sup>43</sup>Arimatea nairai imie Pilato dine jaide. Naimiedi José.

Naimiedi illaicomini. Maremie. Naimie Jusiñamui ie cominina ico sedajanomo illemo ocuride. Ie comecinha ocuiñocaida, Pilato dine jaide. Iena raillena, Jesús abina jícade. <sup>44</sup>Iena cacajano, Pilato Jesús fiodaillana raise uiñoiacade. Ie fiodaillana nia fidiñede. Jesúna sedade capitána uaiduanona, naimemo Jesús fiodaillana jicanote.

<sup>45</sup>—Jesús jai fiodaite —capitán railla mei, Pilato Jesús abina Josémo fecallena llore. <sup>46</sup>José mare userede iniroi ibaja mei, cruzmona Jesús abi ana ua mei, naie iniroi diga ie abina ferinote. Nofici motomo finoca raiafomo jonete. Naifona ibaillena, ailluenofici nainomo bai ñuitade. <sup>47</sup>María Magdalena, jiae María diga, naimie raiana ciode. María José ei.

### Jesús fiodaillamona jillua rafue

(Mt. 28.1-10; Lc. 24.1-12; Jn. 20.1-10)

**16** <sup>1</sup>Sábadoruimo jitoma sojicaidemo, María Magdalena caímare soride rana ibade. Jacobo ei, María jiai ibade. Salomé jiai ibade. Jesús abimo jonellena, ie abina raise finollena naimaci einamaci finocabilla isoi, naiñaiñuaí iena ibade.

<sup>2</sup>Domingo jitíramo jitoma como

bairedemo, Jesús raiado dine naiñaiñuaí jaide.<sup>3</sup> Jaillanona, coniñuaimo jicanote:  
—¿Bu noficina caina oni ñuitalle  
raiafomona?  
<sup>4</sup>Raiado dine rillanona, iemo  
eruaillanona, nofici oni ñuitacana ciode.  
Naie nofici eo aillue. <sup>5</sup>Raiafomo  
jaillanona, naiñaiñuaí coniruena  
eruaídimienna nabeimo raillana ciode.  
Naimie are userede iñiroina jitade.  
Naimiedi Jusiñamui jaienici. Naiñaiñuaí  
jacinaite. <sup>6</sup>Nainomo itimie dinena raite:  
—Jacinaiñeno. Nazaret ie Jesúna  
jenodomoi. Naimieno coraídimiaci; ia  
fiodaillamona naimie jai jillode. Bene  
jai iñede. Naimie jonianomo mai eroda.  
<sup>7</sup>Naimie llofueoicaiganomo iena lluia.  
Ua Pedromo llono. Galileamo omoí  
uicomodo naimie jaite. Omoímo naimie  
llua isoi, naimieno citoitomoi.  
<sup>8</sup>Naiñaiñuaí jino jaillanona,  
raiafomona aisicana jaide.  
Jacinaillamona abi jaidisite.  
Jaciruillamona, iena bumó lloñede.

**Jesús María Magdaleno  
bairia rafue  
(Jn. 20.11-18)**

<sup>9</sup>Domingo jitíramo Jesús jillua mei,  
María Magdaleno Jesús nano  
bairede. Naiñaiño Janaba anamo navui  
illamona, Jesús naiñaiñomona siete  
jananíai navui oni orede. <sup>10</sup>Naiñaiñomo  
naimie bairia mei, naimie diga  
jaicabidinomo iena lluaide. Naimacimo  
iena nia lloñenia, sure eedimaci.

<sup>11</sup>—Naimie jai jillode. Naimieno jai  
ciódicue —naimacimo naiñaiño llua  
mei, iena iñonédimaci.

**Mena llofueoicaiganomo  
Jesús bairia rafue  
(Lc. 24.13-35)**

<sup>12</sup>Ie meinoconi Jesús mena  
llofueoicaiganomo bairede. Naimie

eruaisoilla isoi, eruaiñede. Iaimaiai  
naisomo macaria, iaimaiaímo bairede.  
<sup>13</sup>Jerusalémo abido iaimaiai rilla mei,  
jiaie llofueoicaiganomo iena  
llotiaimaiái; ia iñonédimaci.

**Jesús ie once llofueoicaiganomo  
bairia rafue  
(Mt. 28.16-20; Lc. 24.36-49;  
Jn. 20.19-23)**

<sup>14</sup>Ie once llofueoicaiganomo  
guitimacimo, Jesús naimacimo bairede.  
Naimie jillua mei, damierie naimieno  
ciuanona, ie llofueoicaiganomo iena  
llote; ia iñonédimaci. Naimací iñonéna  
jira, Jesús naimacimo riire llote.  
<sup>15</sup>Naimacimo llote:

—Nana nairaíaimo jai. Nana  
cominimo cue mare rafue llocana jai.  
<sup>16</sup>Cuena iñuamona, bautizagano díese  
Jusiñamuimona duere sefuiñeitimaci;  
iadedi Jusiñamui cuena iñonédinona  
duere finoite. <sup>17</sup>Cuena iñotino Janaba  
anamo itinomona Janabana oni  
oretaitimaci. Naimací nia uiñónega  
uaido ñaitimaci. <sup>18</sup>Jaiona naimaci  
llinoia, naimacina niese nibaíñeite.  
Bainode ra naimaci jiroia, naimacina  
nieße nibaíñeite. Duidinona naimaci  
jetajamona, jilloitimaci.

**Jesús monamo jailla rafue  
(Lc. 24.50-53)**

<sup>19</sup>Ie llofueoicaiganomo diga ñaia mei,  
Jusiñamui caí Nama Jesús monamo  
uiga. Illaimana Jesús illa jira,  
Jusiñamui nabeimo naimie raide.

<sup>20</sup>Monamo Jesús jailla mei, ie  
llofueoicaiganomo, diga nairaíaimo, ie  
rafuena llocana jaidimaci. Caí Nama  
naimacina canuamona, naimacina siño  
rafuena finotate. Lemona comini dímena  
Cristomona naimaci rafue illana  
uiñotimaci. Macaibaite. Cue cuega rafue  
jai fuite. Marcodicue.

## LUCAS JESUCRISTO ENIRUEMO ILLA RAFUE CUIAFUE

Lucas Teófilomo cartana orede

**1** <sup>1-4</sup>Teófilo, cue isiruiga nabai.  
¿Nigacino? Omo bie cartana  
oredicue. Cai motomo birui diga rafue  
jai suide. Jesucristo rafuena omo  
cueticue. Naimie billa mei, diga comini  
naimiemo suide rafuena ciódimaci. Iena  
llocana jiai jaidimaci. Naimacimona bie  
rafue raise uiñoticue. Bie rafuena  
fidianona, damierie iena jai cuetimaci.  
Bie rafuena jiai jai cacadio. Bie rafuena  
cue raise uiñua jira, uanaicinona o raise  
uiñollena, bie cartana jai cueticue. Iese  
birui cue comeci jitaide.

Jusiñamui jaienici Juan Bautista  
micori jeicillena llua rafue.

<sup>5</sup>Jesucristo nia jeicínenia, Zacarías illa  
facaise Herodena mamecirede illaimadi.  
Judea railla eniruena sedade. Zacarías  
Jusiñamui diga ñairaima. Abías raillasie  
facaimo duillamona, Jusiñamui jofomo  
maiñiuide. Naimie aidi Elisabet.  
Naiñaiño jaie ite usumadi Aarón micori.  
Aarón micoridí Jusiñamui diga nano  
ñairaima. <sup>6</sup>Jusiñamuimona iaímaiai  
mare, nana naimie lloga uaina raise  
iaímaiai iñua jira. <sup>7</sup>Naiñaiño oiniñona  
jira, uruenidialmaiai. Jiai jai uaicima  
iaímaiai.

<sup>8</sup>Zacarías facai ite comini maijia  
facaise ia, Jusiñamui jofo dine naimie  
maiñiaide. <sup>9</sup>Nainomo naimie maijia,

caimare soride ra fo jobaillena,  
naimieno fetodimaci. Naimaci finouilla  
isoi, jobaillanona dani Jusiñamui diga  
ñairaini naimieno fetodimaci. Iemei  
naimie fo jaide. <sup>10</sup>Fo jailla mei, naie  
caimare soride ra boa facaiseconi,  
Jusiñamui diga naimie ñaiano, ailluena  
comini Jusiñamui jofo ecimo itimaci.  
<sup>11</sup>leconi cai Nama Jusiñamui jaienici  
naie ra boano nabeimo Zacarías  
bairede. <sup>12</sup>Naimieno ciuanona, Zacarías  
jacinaite. <sup>13</sup>Jaienici naimiemo llote:  
—Zacarías, jacinaiñeno. Jusiñamui o  
jiacinaona jai cascade. Iemonia o ai uruses.  
Timana jocoite. Juan o jitalle naimie  
mamecidi. <sup>14</sup>Iemonia o comeci caimare iiite.  
Iobitio. Ailluena comini naimie jeicari  
iobitimaci. <sup>15</sup>Jusiñamuimona naimie jamai  
bue isoñeitimienna jaite. Jifatate rana  
jiroñeite. Naimie jeiciamona Jusiñamui  
Joreño naimieno namataite. <sup>16</sup>Cai Nama  
Jusiñamui dibeimo ailluena Israel  
cominina naimie itataite. <sup>17</sup>Jusiñamui  
jitaillacinaona finocana jaite. Elíamo  
Jusiñamui Joreño jaie siño uai illa isoi,  
naimiemo iiite. Jusiñamui rafuena naimie  
lluamona, damierie, naimaci jaiagai isoi,  
Jusiñamuina iñoitimaci. Ailluena  
Jusiñamui uaina jai iñoitimaci; ia  
damierie birui iñoitimaci. Naimaci  
comeciai Jusiñamui dibeimo meidoitimaci.  
Iemonia cai Nama Jesucristo bia, naimieno  
iñoitimaci.

<sup>18</sup>Zacarías dinena jicanote:

—¿Niese o llua suillena uiñoticue?  
Jai uaicimadícoco.

<sup>19</sup>Jusiñamui jaienici dínená uai ote:

—Gabrieldicue. Jusiñamuimona  
biticue. Cuena oretate, bie mare rafuena  
omo llollena. <sup>20</sup>Ero, cue uaina o  
iinoñena jira, uainitio, o jito jeicille  
dinori. Jiairuido bie rafue suite.

<sup>21</sup>Jusiñamui jofomo jino itíno Zacarías  
jino billena sedadímaci. “Bue ñellena  
naimie are biñede?” comeciaina  
facadímaci. Naimie jino are biñena jira,  
raijicádimaci. <sup>22</sup>Naimie jino bitemo,  
naimaci diga jai ñainide. Ie onolli diga  
facajamona. Jusiñamui jaienici naimiemo  
jai lluana uiñotimaci. Naimie ñaiñeno ite.  
<sup>23</sup>Jusiñamui jofomo naimie majia facaise  
fuilla mei, ie jofomo abido jaide. <sup>24</sup>Digarui  
illanona, ie aidi urueside. Ie jira jofomo  
naiñaiño cinco fivui fiebide, comeciná  
facajanona: <sup>25</sup>“Cue uruesilla jira, iena nia  
buna lloiacaiñedicue. Cue Nama cuena jai  
duenaillana uiñoticue. Navui cue urue  
iñena jira, meiruiticue. Jai meiruiñeticue.  
Comini cue joreñona jai ñaiñeitimaci”.

### Jusiñamui jaienici Jesús jeicillena llua rafue

<sup>26-27</sup>Elisabet seis fivui uruesilla mei,  
Jusiñamuidi Galileamo ie jaienici  
Gabrielna orede. Nazaretmo María dine  
naimiena orede. María nia ñinide; ia jai  
José jicanogañaiño. Naimie usumadi  
David micori.

<sup>28</sup>Rillanona, naiñaiñomo llote:

—Itio. Cai Nama Jusiñamui ona eo  
duenaite. Ona jai fetuamona, nana jiaie  
riñoniai baifemo naimiedi ona marena  
itataite.

<sup>29</sup>Iena cacajanona, naiñaiño jacinaite.  
Iena naiñaiño raise cacaiñena jira, iemo  
comeciná facade. <sup>30</sup>Gabriel dínená llote:

—Jacinaiñeno. Jusiñamui ona  
duenaite. <sup>31</sup>Birui uruesitio. Iimana  
jocoitio. Naimie mamecina jitaitio

Jesúna. <sup>32</sup>Siño Jitona jaite. Nanoca  
Itimie Jitona jaite. Ie usuma David  
micori illaima illa isoi, Jusiñamuidi  
naimiena illaimana itataite. <sup>33</sup>Illaimana  
illamona, Israel railla nairaina jaca  
sedaite. Naimie ifomo jiaimie jaca  
iñeite.

<sup>34</sup>María uai ote:

—Iima diga nia iñedicue. ¿Niese bie  
nibaille?

<sup>35</sup>Gabriel llote:

—Jusiñamui Joreño omo iite. Ie siño  
uai diga iena finoite. Jusiñamui marena  
isoí naimie jiai marenite. Naimiedi  
Jusiñamui Jito. <sup>36</sup>O comini iñaiño,  
Elisabet, ie uaicitalla facaise jiai jai  
urueside. Naiñaiño jai jionaide; ia jai  
seis fivui naiñaiño uruesilla ite.

<sup>37</sup>Jusiñamui nana bie isoide rafuena  
finorede.

<sup>38</sup>María uai ote:

—Jee. Jusiñamui anamo iticue. O  
lluacino cuemoná mare.

Ie facaise Gabriel naiñaiñomona oni  
jaide.

### Maríadi Elisabet dine jailla rafue

<sup>39</sup>Ie facaiseconi Maríadi aneduai dine  
Judea railla eniruemo Zacarías illanomo  
raire jaide. Elisabetna cioillena, jaide.

<sup>40</sup>Zacarías jofomo rillano:

—Itio —raillanona, Elisabetna  
uaidote. <sup>41</sup>Elisabet naiñaiño uaina  
cacajano, ieconi naiñaiño jeraimo ite  
urue iena jiai uiñuamona, niraide. Ie  
facaise Jusiñamui Joreño anamo  
Elisabet jai ite. <sup>42</sup>Iese illamona, María  
uruesillana uiñote. Naiñaiño ado llote:

—Jusiñamui ona eo marena canoite.  
O uruena marena itataite. <sup>43</sup>Jamai bue  
isoidicue; ia, odi cue Jilloitaraíma ei  
illanona, cue díne bitio. Iena cuemo nia  
lloñedio; <sup>44</sup>ia, cuena o uaiduanona,  
iobillamona cue jeraimo ite uruedi  
niraide. <sup>45</sup>Cai Nama omo llotataga

uaina suillana o iinua jira, Jusiñamui ona eo marena canoite. —Jusiñamui Joreño naiñaiñomo illamona, iena llote.

<sup>46</sup>María dinena uai ote:

Caiñai Nama eo mare. Naimiemo iobillacina feacaadicue.

<sup>47</sup>Naimiedi cue Jilloitaraimana jira, naimieri iobidicue.

<sup>48</sup>Jamai bue isoidicue; iadedi cuena fetode.

Ie jira biruimona nana comini cuena marena ñaitimaci.

<sup>49</sup>Naimiedi siño. Naimiedi mareuidimie. Cue facaina eo mare rafuena finode.

<sup>50</sup>Naimiena iinotinona jaca duenaita. Cai jaiagaina jaca duenaita. Caina birui jaca duenaita. Ua nana naimiena iinotinona duenaita.

<sup>51</sup>Diga siño rafuena finoite. Abi iedotino comeciai facajacinona lliçaitaite.

<sup>52</sup>Naimiedi illaicominina oni dotaite; ia jamai bue isoidinona jamai bue isoñedenona itataite.

<sup>53</sup>Dueredinona eo canoite; ia duenidinomo buena fecañeite.

<sup>54</sup>Duenallamona, cai Israel cominina feitaneite.

<sup>55</sup>Cai jaiagaímo naimie jaie llua isoi, birui caina canoite.

Abraham micorimo jaie llote: “Ona duenaiticue. O cominina jaca duenaiticue”

María llote. <sup>56</sup>Elisabet diga davui amani naiñaiño fiebide. Ie mei ie jofomo abido jaide.

#### Zacarías jito jeicia rafue

<sup>57</sup>Elisabet jocuarui jai ridemo, iimana jocode. <sup>58</sup>Naiñaiño ecimo ite comini, naiñaiño comini diga, iena fidiamona, cai Nama naiñaiñona eo duenallana uiñotimaci. Naiñaiño diga iobidimaci.

<sup>59</sup>Ocho digarui jeicia mei, naimaci

finouilla isoi, urue abina dia rafuemo bitimaci. Ie moo mamecina jitaacadimaci; <sup>60</sup>iadedi Elisabet llote:

—Dama ite. Jitaiñedicue. Naimie mamecidi Juan cai jitalle.

<sup>61</sup>Uai otimaci:

—¿Bue ñellena iese raitio? O cominimona jaca bu Juan mameciredimieno iñede.

<sup>62</sup>Jefona cacaifena jira Zácaríamo onollí diga jicanotimaci, ie jito mamecina jitallena. <sup>63</sup>Onollí diga Zácarías fairiuano, rabena jicade. Cuete: “Naimie mamecidi Juan”. Ieri raijicaidimaci. “¿Bue ñelle iena jitade?” comeciaína facadimaci. <sup>64</sup>Ieconi Zácarías jai dane ñaite. Ie jira Jusiñamuimo iobillacino fecade. <sup>65</sup>Nana iaímaiai ecimo itino raijicaidimaci.

—Jusiñamui muidona naie rafue suide —llotimaci. Bie rafuena fidiano, nana Judea railla aneduaimo itinodi iena ñaoidimaci. <sup>66</sup>Iena cacajano, comeciaína facadimaci: “Bimie jamai bue isoñeitimienna jaite”. Cai Nama naimiena marena jaca canua jira, iese llotimaci.

#### Zacarías Jusiñamuimo iobillacina feacija rafue

<sup>67</sup>Ie facaise Jusiñamui Joreño Zácariana llotatajanona, Zácarías llote:

<sup>68</sup>Cai Nama Jusiñamuidi mare. Cai Israel comini díne biite, caina jilloitallena.

<sup>69</sup>David micori Jusiñamuina jaie sedade.

David micori cominimona siño Jilloitaraimana cai díne oreataite.

<sup>70</sup>Ie facaina lloraínido naimie jaie llua isoi, cai Jilloitaraimana oreataite,

<sup>71</sup>Taifemona, Janabamona cai jilloillena.

<sup>72-73</sup>Cai usumatiái micoriaímo: “Omoína duenaiticue” llote.

Cai usuma Abraham micorimo jaie llogacínona feitañede.

<sup>74-75</sup> Taifemona cai jilloillena, cai Jilloitaraimana oretaite. Nana cai ille dinori Jusiñamuina jaciruiñeno sedajana jitaide. Naimie jitaila illa isoí cai illena, naimie jitailacínona cai finollena, cai Jilloitaraimana oretaite.

<sup>76</sup> Cue jito, ona lloitcue. Jusiñamui ie lloraimana jaitio. Cai Nama uicomo jaitio, comini comeciai o raise finollena.

<sup>77</sup> Ie cominímo jeacinomona jilluacínona lloitio. Iena naimaci iinoia, Jusiñamui naimaci jeacinona feitaite.

<sup>78-79</sup> Jeacino anamo jai cai illa jira, jitiredinomo iticai isoidicai. Jusiñamuina cai nia iñoñenia, fiodaillana jaciruitcái. Naimie caina duenallamona, cai Jilloitaraima billena o llofuelleña, ona oretaite.

Naimieno cai iinoia, jitiredinomo iñeitcái; ia Jusiñamui diga cai comeciai uri iite.

<sup>80</sup> Zácarías jito sairide. Jusiñamuina iinocana jaide. Cominímo naimie nia marefodo lloñenia, jofue iñenanomo ite.

### Jesús jeicia rafue

(Mt. 1,18-25)

**2** <sup>1-2</sup>Jesús jeicia facaise César Augusto anamo ailluena nairai aitie. Romamona naimacina sedauide. Naie facaise Siria railla enirue gobernadordi Cirenio. César Augusto, nie diese comini naga nairaimo illana naimie uiñollena, nana comini mameciai cuellena ocuide. Jaca bu iese jaie finoñede. <sup>3</sup>Naimaci jaiagai illanomo mameciai cuiana ocuide. <sup>4</sup>Ie jira José Galileamona Nazaretmona jaide. Judeamo Belémo jaide. David micorí cominímo naimie

jainaiailla jira, David micorí illanomo jaide. <sup>5</sup>Ie ai María diga jaide. Naiñaiño fenai jai eo aillue. <sup>6-7</sup>Belémo iaimaiai rillanona, naie facaise comini jofomo inillino iñena jira, jurareta jofomo ridiiaimaiai. Nainomo ie doforado jito jeicite. Jocua mei, iñiroina naimieno ferinote. Ie jito inillena, jurareta ecaranomo naimieno jonete.

### Jusiñamui jaienisai toica llaudaiai sedaraini díne jailla rafue

<sup>8</sup>Jesús jeicia facaise naie naio Belén ecimo ite pastomo damierie toica llaudaiai sedaraini itimaci. Naimaci toiniaina sedadimaci. <sup>9</sup>Ieconi cai Nama Jusiñamuimona daje jaienici naimacimo ebena bairede. Jusiñamui ie siño uai diga naimacina quetiñote. Jacinaitimaci.

<sup>10</sup>Jaienici llote:

—Jacinaiñeno. Mare rafue lloiacadicue. Nana cominina iobitallena, iena lloiacadicue. <sup>11</sup>David micorí illanomo damie como jeiciga. Jusiñamui facaina lloraini micoriai naimie billena jaie llouidimaci. Naimiedi Cristo cai Nama. Naimie omoi Jilloitaraima. Jeacinomona omoina jillotaite. <sup>12</sup>Naimieno jibuisai. Iñiroina feringa urue jurareta jofomo imaci ecaranomo baitomoi. Lemona cue lluana uanaicinona uiñoitomoi —llote.

<sup>13</sup>Ie facaise naie jaienici díne ailluena jaienisai bitimaci. Jusiñamuimo iobillacínona fecajano rotimaci:

<sup>14</sup> Monamo Jusiñamui illanona, naimiemo iobillacínona fecaacadicai.

Cominina naimie duenallamona, naimie diga uri iitímaci rotimaci. Ie mei abido jaidimaci.

<sup>15</sup>Monamo jaienisai jailla mei, toica llaudaiai sedaraini coniniri ñaitimaci:

—Belémo mai cai jailli, cai Nama caimo como lloga rafuena cai jibuisaillena.

<sup>16</sup>Ieconi raire jaidimaci. María José diga baitimaci. Iaimaiai urue jurareta ecaranomo biillana ciodimaci.  
<sup>17</sup>Naimiena ciua mei, nana naimacimo jaienici lloga rafuena llotimaci. <sup>18</sup>Nana naie rafuena cacadinodi ieri raijicaidimaci. <sup>19-20</sup>Iaimaiai uruena ciua mei, llaudaiiai sedaraini imaci toiniae dine abido jaidimaci. Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacinona fecadimaci. María naie rafuena feitañede; ia iena comeciná facauide.

**Jerusalémo Jusiñamui jofomo  
Jesúna iaimaiai uilla rafue**

<sup>21</sup>Ocho digarui illanona, naie urue abina dete. Ie ei jeraimo naimie nia comuiñenia, Jusiñamui jaienici naimie lloga mamecina jitade. Jusiñamui jaienici llua isoi, Jesúna ie mamecina jitade.

<sup>22-24</sup>Moisés micori jaie llua isoi Jerusalémo Jesúna uitiaimaiai. Moisés micori jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga nairaima iena faja mei, riño facaina Jusiñamuimo jobaica”. Jiai cuete: “Naga nano doforamiedi Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaimaiai.

<sup>25</sup>Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo iñocana jaide. Naimie cominina Cristo jilloitallena, Cristo billemo ocuiride. Naie facaise Jusiñamui Joreño anamo naimie ite. <sup>26</sup>Iemonia Jusiñamui Joreñodi, naimiena Cristona cioillena,

navui uicodo uiñotade. O nia fioldaiñenia, Cristona cioito raillanona llote. <sup>27</sup>Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José diga, Jesúna fo uillana Simeón ciode. <sup>28</sup>Naimaci dine jaillanona, Jesúna meniñote. Jusiñamuimo iobillacinona fecajano jiide:

<sup>29</sup>Nama, o anamo iticue. Cuemo o lloga uai jai suilla jira, uri fioldaiticue.  
<sup>30</sup>O oretaga Jilloitaraimana jai ciodicue.  
<sup>31</sup>Naimiena oredio, nana comini jilloillena.  
<sup>32</sup>Naimiedi judíuainedinona uanaicinona uiñotaite. O cominina iobitaite jiide. <sup>33</sup>Iena cacajamona, iaimaiai jitona lloga uairi raijicaidiñaaimaiai.  
<sup>34-35</sup>Simeón iaimaaimo caimaredicinona llote:  
—Jusiñamui omoina raise canoite —llote.

Maríamo llote:  
—Ero, ie rafuena llollena, Jusiñamui o jitona jai fetode. Naimie illamona, comini comeciaina facajaciona uiñotaite. Naimiemo suille rafuemonia o comeci sure iiite. Cai cominimona ailluena naimiena jitañeitimaci. Ailluena jitañimaci.

<sup>36</sup>Nairuido Jusiñamui jofomo Ana railla feciño ite. Jusiñamui naiñaiñomo lloga rafuena llouide. Naiñaiño moo Fanuel micori. Naiñaiño nairaídí Aser. Jitañio facaisemonia ie ini diga siete años illanona, naimie fioldaite. <sup>37</sup>Naiñaiño jai eo uaiciño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jianona guicabiñeno naimiena sedauide.

<sup>38</sup>Simeón ñaiana cacajano, naiñaiño Jesús comini dine billano, Jusiñamuimo

lobillacinona fecade. Naimie billemo naimaci ocuirilla jira, naiñaiño naimaci Jilloitaraimana nainomo itinomo llocana uite.

**Nazaretmo abido  
naimaci jailla rafue**

<sup>39</sup>Moisés micorí lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidiaimaiiai. <sup>40</sup>Nainomo Jesús sairicana mairicana jaide. Eo abina uiñote. Naimieri lobillamona, Jusiñamui naimiena canouide.

**Jerusalémo Jusiñamui  
jofomo Jesús illa rafue**

<sup>41</sup>Naga año Jerusalémo pascua railla rafue dine Jesús moo iaimaiai jaisoidiaimaiiai. Egipciona naimaci jaiagai jillobillana comeccilena, naie rafue ite. <sup>42</sup>Naimiemo doce años illa facaise Jerusalémo iaimaiai jaisoilla isoi, jaidiaimaiiai. Naimie doce años illa jira, Jesúna uitiaimaiiai. <sup>43-44</sup>Rafue fuilla mei, abido bitiaimaiiai. Ailluena comini jiai billa jira, Jesús billana raise uiñonediariaimaiiai. “Cai comini diga naimie bite” raillanona comeccina facadiiaimaiiai; ia Jesús Jerusalémo fiebide. Darui raifi billa mei, iaimaiai cominimo naimiena eo jenodiiimaiiai. <sup>45</sup>Baiñena jira, inia mei, Jerusalémo darui jaillanona, abido jaidiaimaiiai. <sup>46</sup>Le are Jusiñamui jofomo naimiena baitiaimaiiai. Moisés micorí llogacina llofueraini motomo naimie ite. Naimaci llofuiiana cacade. Iena naimaci diga jiai siadote. <sup>47</sup>Nana cacadino naimie uiñogacinaraijicaidimaci. Naimie raise siadogacinaraijicaidimaci. <sup>48</sup>Naimiena iaimaiai baia, raijicaidiaimaiiai. Ie ei naimiemo jicanote: —¿Bue ñellena cocona duere finodio? O moocama diga ona eo duere jenodicoco.

<sup>49</sup>Naimie uai ote:  
—¿Bue ñellena cuena duere jenodomico? Cue Moo jofomo naimie rafuena finodicue. ¿Niese bene cue illana uiñoñedomico?

<sup>50</sup>Naimie lluana raise cacaiñediiaimaiiai. <sup>51</sup>Iemei iaimaiai diga Nazaretmo naimie abido jaide. Iaimaiai uai iiñuanona, iaimaiai anamo ite. Le ei María nana naie rafue ie comeccimo facauide. <sup>52</sup>Naimie sairicana abina uiñocana jaide. Jusiñamui naimieri iobide. Comini dinena naimiena jiai gaidimaci.

**Jofue iñenanomo Juan Bautista  
micorí illa rafue**

(Mt. 3.1-12; Mr. 1.1-8; Jn. 1.19-28)

**3** <sup>1-2</sup>Jofue iñenanomo diga años Juan illanona, Jusiñamuimona ie uaina feiñote. Naimiedi Zacarías jito. Naie facaiseconi Romamo quince años Tiberio Césardi nanoca illaimana jai ite. Judea railla enirue gobernadordi Poncio Pilato. Galilea railla enirue gobernadordi Herodes. Naimie amadi Felipe. Iturea railla enirue, Traconite railla enirue diga, gobernadordi Felipe. Abilinia railla enirue gobernadordi Lisaniás. Jusiñamui diga nanoca ñairaima iaimaiaidi Anás, Caifás diga. <sup>3</sup>Jusiñamui llua jira, nana Jordán fuemo ite comini dine Juan llofuecana jaide. Llote:

—Omoi jeacinona fainonocaida, Jusiñamui dibeimo omoi comecciai iuai meido. Iemonia Jusiñamui omoi jeacinona feitaite. Omoi comecciai iuai omoi meidoia, comini iena uiñollena, mai omoi bautizallomoi.

<sup>4</sup>Isaías micorí ie rabemo naimiena jaie cuete:

Jofue iñenanomo damie jidai-jidaillana cacadicue.  
Naimie llote: “Cai Nama biite.  
Naimie jaillino atona fino.  
<sup>5</sup> Nana iconi oruita.

Naga aneduai diese eniruena judai.  
Neicairuai joide naísona atona fino.  
Naimo itaicuai illa diese eniruena  
oruita, daje facai illena.  
<sup>6</sup> Nana comini Jusiñamui naimacina  
jillotaiacanana uiñoitimaci”  
cuete; ia naimaci comeciaina ñaite. Cai  
Namana iinuana ñaite. Abina  
iedoñenana ñaite. Jeacino finocana  
jaínenana ñaite. Cai Nama Jesús bia,  
Jesús uaina naimaci feiñollena, naimaci  
comeciai marena finuana ñaite.

<sup>7</sup> Naimacina bautizallena, ailluena  
comini naimie dine bitimaci.

Naimacimo llouide:

—Maraiñede rafuena finocana omoi  
jailla jira, jaio nairai isoídomoi. ¿Niese  
jilloitomoi? Cue dine omoi billena, ¿bu  
omoimo lloga? <sup>8</sup>Omoi comeciai iuallai  
meido. Omoi jeacinona fainonocai.  
Iemonia Jusiñamui jitailiacinona fino.  
Mare rafuena finocana jai. Naiemona  
omoi comeciai iuallai meiduana  
uiñoitaci. Ie mei bautizallomoi. Omoi  
comeciaina facañeno: “¿Bue ñellena o  
llua isoi finoitaci? Jusiñamui Abraham  
micorina jaie eo raise nabaide. Abraham  
micori cai moo illamona, Jusiñamui  
riicallifuemonia jilloitaci”. Ero, omoimo  
lloitice: Cue llua isoi omoi finoñenia,  
naimie riicallifuemonia jilloñeitomoi.  
Abraham micori uruiaidomoi; iadedi  
Jusiñamui jitailiacinodo jaiacaiñedomoi.  
Naimie jitaia, naimie jitailiacinona  
naimaci finollena, bene ite noficimona  
naimiedi Abraham micori facaina  
uruiaina comuitarede. <sup>9</sup>Ero, llisiñede  
riara tiedomoi. Tíia mei, maraiñena jira,  
iena jobaidomoi. Ie isoidomoi. Omoi  
maraiñena jira, Jusiñamui omoina jai  
duere finoacade. Ie riicallafue anamo  
jai itomoi. Omoi comeciai iuai omoi  
meidoñenia, omoina duere finoite.

<sup>10</sup>Iena cacajanona, comini dinena  
naimemo jicanotimaci:

—Cai bautizaja mei, ¿niese iiticai?  
¿Nie isoide mare rafuena finoitaci?

<sup>11</sup>Juan uai ote:

—Ailluena iniroiredimiedi  
iniroinidimiemo iniroina feca.  
Guilleredimiedi guillenidimiemo  
guillena feca.

<sup>12</sup>Naimacina bautizallena, gobierno  
ucubena oraini jiai bitimaci.  
Jicanotimaci:

—Llofueraima, cai bautizaja mei,  
¿niese iiticai? ¿Nie isoide mare rafuena  
finoitaci?

<sup>13</sup>Uai ote:

—Gobierno facaina omoi ibataia,  
cominimona gobierno llua baifemo  
oñeno.

<sup>14</sup>Naimie dine billanona, soldaduai  
jicanotimaci:

—Cai bautizaja mei, ¿niese iiticai?  
¿Nie isoide mare rafuena finoitaci?

Uai ote:

—Cominimona rana bairoñeno.  
Riicinodo rana oñeno. Tainona  
llogiduamona, cominimona rana oñeno.  
Omoi ucube illa diese feiño. Ie baifemo  
ucubena nicidoñeno.

<sup>15</sup>Juan llofuiamona naie facaise  
cominidi Cristo billemo ocurilla jira,  
“Juandi nibai Cristo” raillanona,  
Juanmo comeciaina facauidimaci.

<sup>16</sup>Iena fidiano, Juan llote:

—Cristoñedicue. Jusiñamui dibeimo  
omoi illamona, jinui diga omoina  
bautizadicue. Cai baifemo faitimie bie  
facaise biite. Naimie cue ifomo  
meidoite. Jamai bue cue isoilla jira,  
naimienia cue canuana uiñoñedicue.  
Naimemo omoi duia, naimiedi  
Jusiñamui Joreño omoimo itataite.  
Omoi comeciai iuai omoi meidoñenia,  
omoina duere finoite. <sup>17</sup>Trigona omoi  
betaia, mare trigona eenotomoi.  
Maraiñede ra oni dotajanona, iena  
jobaitomoi. Ie isoide. Naimie rafuena

lluanona, naimiedi comeciai iuaillai meidotinona ie Moo illanomo ofitaite; iadedi jiae cominina duere finoite. Iraimo dotaite. Naie irai jaca duiñede —llote.

<sup>18</sup>Bie isoidicinodo cominimo ie mare rafuena llofueuide. <sup>19</sup>Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiae mariñede rafuena finode. Ie muidona Juan naimiena lletade. <sup>20</sup>Maraiñede rafuena Herodes finocana jaillamona, Juan cárcelmo jonetade.

**Juandi Jesúna bautizaja rafue  
(Mt. 3.13-17; Mr. 1.9-11)**

<sup>21</sup>Ailluena cominina Juan bautizaja facaise, Jesúna jiai bautizade. Bautizaja mei, Jesúdi ie Moo diga ñaianona, mona bojode. <sup>22</sup>Ieconi Jusiñamui Joreño ucugina eruaíllano, naimie emodomio ana bite. Monamona Jusiñamui llote:

—Cue isiruiga Jitodio. Ori iobidicue.

**Jesucristo ie usumatiái  
(Mt. 1.1-17)**

<sup>23</sup>Jesús treinta años illamona, Jesús ie maijille rafue tainede. “Naimedi José micori jito” raillano naimiemo cominidi comeciaina facadimaci. Josédí Elí micori jito. <sup>24</sup>Elídí micori Matat micori jito. Matat micori Leví micori jito. Leví micori Melqui micori jito. Melqui micori Jana micori jito. Jana micori José micori jito. <sup>25</sup>José micori Matatías micori jito. Matatías micori Amós micori jito. Amós micori Nahum micori jito. Nahum micori Esli micori jito. Esli micori Nagai micori jito. <sup>26</sup>Nagai micori Maat micori jito. Maat micori Matatías micori jito. Matatías micori Semei micori jito. Semei micori José micori jito. José micori Judá micori jito. <sup>27</sup>Judá micori Joana micori jito. Joana

micori Resa micori jito. Resa micori Zorobabel micori jito. Zorobabel micori Salatiel micori jito. Salatiel micori Neri micori jito. <sup>28</sup>Neri micori Melqui micori jito. Melqui micori Adi micori jito. Adi micori Cosam micori jito. Cosam micori Elmodam micori jito. Elmodam micori Er micori jito. <sup>29</sup>Er micori Josué micori jito. Josué micori Eliezer micori jito. Eliezer micori Jorim micori jito. Jorim micori Matat micori jito. Matat micori Leví micori jito. <sup>30</sup>Leví micori Simeón micori jito. Simeón micori Judá micori jito. Judá micori José micori jito. José micori Jonam micori jito. Jonam micori Eliaquim micori jito. <sup>31</sup>Eliaquim micori Melea micori jito. Melea micori Mainán micori jito. Mainán micori Matata micori jito. Matata micori Natán micori jito. Natán micori David micori jito. <sup>32</sup>David micori Isaí micori jito. Isaí micori Obed micori jito. Obed micori Booz micori jito. Booz micori Salmón micori jito. Salmón micori Naasón micori jito. <sup>33</sup>Naasón micori Aminadab micori jito. Aminadab micori Aram micori jito. Aram micori Esrom micori jito. Esrom micori Fares micori jito. Fares micori Judá micori jito. <sup>34</sup>Judá micori Jacob micori jito. Jacob micori Isaac micori jito. Isaac micori Abraham micori jito. Abraham micori Taré micori jito. Taré micori Nacor micori jito. <sup>35</sup>Nacor micori Serug micori jito. Serug micori Ragau micori jito. Ragau micori Peleg micori jito. Peleg micori Heber micori jito. Heber micori Sala micori jito. <sup>36</sup>Sala micori Cainán micori jito. Cainán micori Arfaxad micori jito. Arfaxad micori Sem micori jito. Sem micori Noé micori jito. Noé micori Lamec micori jito. <sup>37</sup>Lamec micori Matusalén micori jito. Matusalén micori Enoc micori jito. Enoc micori Jared micori jito. Jared micori Mahalaleel

micori jito. Mahalaleel micori Cainán micori jito. <sup>38</sup>Cainán micori Enós micori jito. Enós micori Set micori jito. Set micori Adán micori jito. Adándi Jusiñamui comuitagamie.

**Taife ramo Jesús faia rafue**  
(Mt. 4.11-12; Mr. 1.12-13)

**4** <sup>1</sup>Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiena orede. <sup>2</sup>Nainomo cuarenta digarui Taifedi naimiena ramo faite. Naie facaiseconi Jesús jaca guifede. Naie facaise fuilla mei, guíñeno illamona, naimie aimetaite. <sup>3</sup>Jesús aimetaillana Taife uiñuamona, naimiemo lloote:  
—Jusiñamui Jitodiodena, naimiemo llonoo: “Ore Moo, bie noficina llomenicona jaita”.

<sup>4</sup>Jesús uai ote:

—Iena lloñeiticue. Jusiñamui facaina lloraima micori iena jaie cuega: “Jiae rafuedi llomenico guilla baifemo faite”.

<sup>5</sup>Ie mei a ite anedumo Taife Jesúna ullano, dallu illanona, naimiemo nana nairaiaina acataste. <sup>6-7</sup>Llote:

—Nana bie nairaiai cue anamo ite. Iena cue iacagamiemo itataredicue. Cuena o sedajamona, iobillacinona cuemo o feacia, nana bie nairaiai omo fecaiticue. Bie nairaiai illaimana jaitio.

<sup>8</sup>Jesús uai ote:

—Dama ite. Ona sedañeiticue. Moisés micori jaie cuega: “Cai Nama Jusiñamuina seda. Dama naimiemo iobillacinona feca”.

<sup>9</sup>Ie mei Jerusalémo Jusiñamui jofo muidomo Taife Jesúna uite. Raite:

—Jusiñamui Jitodiodena, eniruemo mai ana uai. <sup>10-11</sup>David micori ona jaie cuega:

Ona eenollena Jusiñamuidi ie jaienisaimo lloote.

Eniruemo o uaiñellena, o abi bofedaiñellena, ona feiñoitimaci cuega. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

<sup>12</sup>Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluana finoñeiticue.

<sup>13</sup>Taife naimiena ramo faia mei, naimiemonia ie jitaille dinori oni jaide.

**Galileamo Jesús ie rafue lolle jillací**  
(Mt. 4.12-17; Mr. 1.14-15)

<sup>14</sup>Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride. <sup>15</sup>Alluena judíuai ofiracuaimo naimie llofueuide. Iena cacajanona, comini: “Naimie llofuiacino mare” raitimaci.

**Nazaretmo Jesús illa rafue**  
(Mt. 13.53-58; Mr. 6.1-6)

<sup>16</sup>Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie cuegafuiai ado facallena, naimie a naidadate. <sup>17</sup>Naie lloraco nama nullaimadi Isaías micori jaie cuegafuiai jai ferinoga rabe naimiemo facade. Iena oni suiñocaida, bie rafuena baillanona facade:

<sup>18-19</sup> Jusiñamui Joreño cuemo ite. Dueredinomo mare rafuena llollena, cuena fetode.

Taife anamo ailluena comini illa jira, Jusiñamui naimacina jillotaiacana uiñoñedimaci.

Jusiñamui rafuena ailluena comini uiñoñena jira, naimie illanomo rillena uiñoñedimaci.

Jeacino anamo naimaci illa jira, Jusiñamui naimacina jillotaiacana uiñoñedimaci.

Naimie naimacina duenallana birui uiñuana jitaide.

Naimacimo mare rafue llollena, cuena jai oretate.

<sup>20</sup>Naie rafue facaja fuillamona, cuegafuaí abido fecade. Naimacina llofuelleña, dane ana raide. Nana nainomo ite comini naimiemo eo eruaídimaci. <sup>21</sup>Iemei naimie naimacina llofuetete. Raite:

—Omoi como cacaja cuegafuaí omoi motomo jai suide. Cuena ñaíte.

<sup>22</sup>Naimie lluana comini cacajano, coninina raitimaci:

—Naimie fue mare. Naimie marena llofuetete. —Iemonia rajjicaillamona, coniniri raitimaci—, Naimiedi jamai José jito. ¿Niese naie rafue birui suide?

<sup>23</sup>Iena uiñuamona, Jesús dinena llote: —Cue lluana iinoñedomoi.

Comeciaina facadomoi: “Capernaumo naimie siño finoca rafuena fididicai. Siño rafuena cai motomo naimie jiaí finoia, naimienia iinoitacai. ‘Ua médico duia, ie abina dama jillotaredé’ cai einamaci raisoidimaci. Ie isoide. Naimie llua isoi naimie ia, siño rafue cai motomo finorede” comeciaaina facadomoi. <sup>24</sup>Uanaicinona omoimo lloitice. Naimie comini nairaimo Jusiñamui facaina lloraima ia, ie comini naimie uaina feiñiacasifede. Iena jamaisite. Ie isoide. Cue nairaimo cue illa jira, cue uaina iinoñedomoi. <sup>25</sup>Jaie ie isoide. Elías facaiseconi daje amani años abimo atomonado noci deiñede. Aime guittimaci. Naie facaiseconi bie eniruemo cai comini dine ailluena feciñuai itimaci; iadedi omoi jaiagai

Jusiñamui uaina iinoñedimaci.

<sup>26</sup>Jusiñamuidi Elíana cai comini dine oreñede; iadedi jiae eniruemo ite feciño dine naimienia orede. Sarepta railla nairaimo orede. Sidón railla eniruemo naie nairai ite. Cai cominiñede feciñomo orede. <sup>27</sup>Jiae rafuena lloitice. Eliseo micoridi Jusiñamui facaina jiae llote. Eliseo micori facaiseconi bie eniruemo diga efonaitino ite; iadedi naimacimona Jusiñamui buna jillotañede. Omoi jaiagai Jusiñamui uaina iinoñena jira, Eliseo micori duidinona jillotañede. Naie facaiseconi dama Naamán micorina jillotate. Cai cominimo naimie duiñede; ia Siria railla eniruemo duide. Ie isodomoi. Cue uaina iinoiacaiñedomoi —llote.

<sup>28</sup>Jesús lluana cacajano, naie ofiracomo itino eo iciritimaci.

<sup>29</sup>Naidacaillano, naimienia jino uitimaci. Naie illanodí iconimo ite. Nainomo naimienia uillanona, iconimona naimienia ana dotaacadimaci.

<sup>30</sup>Naimienia meineiacadimaci; iadedi naimaci motomo naimie jaillanona, naimacimona naimie jillobillano oni jaide.

### Jesúdi Janaba anamo itimie jillotaja rafue (Mr. 1.21-28)

<sup>31</sup>Jesús Capernaumo jaide, Galilea railla eniruemo ite. Nainomo naimie ia, sáboruimo judíuái ofiracomo jaide. Nainomo llofuetete. <sup>32</sup>Illaima uai isoi naimie llofuija jira, nainomo ite comini naimie llofuiamona rajjicaidimaci. <sup>33</sup>Janaba anamo illamie nainomo ite. Jesús llofuiiana cacaíta, Janabadi iimana ado cuiroitante:

<sup>34</sup>—Odi Nazaret ie Jesús. ¿Bue ñeiacadío cai diga? Caina duere finuaibidio. Ona uiñoticue. Odi Jusiñamui ie Mare Fetocamiedio.

<sup>35</sup> Jesú斯 naimiena lletade:  
—Lliicai. Naimiemona oni jai. —Iena cacajanona, naimaci motomo Janaba iimana ana dotade; ia naimiedi bofedaiñede. Ie mei Janaba naimiemona oni jaide. <sup>36</sup>Iena ciuanona, nana nainomo itino raijicaidimaci. Cominiri siadotimaci:

—¿Nie isoide Jesú斯 uai? Janabamo naimie llua mei, iimamona Janabadi oni jaide.

<sup>37</sup> Jesú斯 finoca rafue muidona, naimie mamecidi nana naie eniruemo soride.

**Jesúdi Simón Pedro jifaiñona**

**jillotaja rafue**

(Mt. 8.14-15; Mr. 1.29-31)

<sup>38</sup> Ofiracomona Jesú斯 jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiñona jilloitallena, nainomo itino Jesúmo jicanote. <sup>39</sup> Naiñaiño dine Jesú斯 jaillanona, ie uai lluamona, naie duicodi oni jaide. Ieconi naiñaiño jillode. Abi cuariñede. Naidacaillanona, guille finuanona, ie jofomo itinona ecade.

**Jesúdi ailluena duidinona**

**jillotaja rafue**

(Mt. 8.16-17; Mr. 1.32-34)

<sup>40</sup> Nairuido jitoma ana itemo, comini ailluena duidinona Jesú斯 dine atidimaci. Diga duicuai illanona atidimaci. Naimacina jetajamona, naimacina jillotate. <sup>41</sup> Jananiaina jiai oni oretajano, jananiai dinena raite:

—Odi Jusiñamui Jitodio. —Naimiena naimaci uiñua jira, Jesú斯 naimaci ñaiiana rairuide. Naimiedi Jusiñamui Jitona uiñotimaci.

**Judeamo Jesú斯 llofua rafue**

(Mr. 1.35-39)

<sup>42</sup> Ie areruido jitíramo jofue iñenanomo Jesú斯 jaide; iadedi comini

naimiena jenuaidimaci. Baillanona, naimaci motomona naimie jaiñellena jicanotimaci. <sup>43</sup> Naimacimo llote:

—Jiae nairaimo cue mare rafuela lloiacadicue. Naimie anamo comini illana Jusiñamui jitilla jira, naimacimo iena lloiacadicue. Ie mare rafuela llollena, Jusiñamui cuena orede. Oni jaiticue. Omoi diga fiebiñeiticue.

<sup>44</sup> Ie mei Judeamo ite ofiracuaimo Jesú斯 llocana jaide.

**Jesú斯 muidona, naimaci ailluena illicaina ua rafue**  
(Mt. 4.18-22; Mr. 1.16-20)

**5** <sup>1</sup> Jiairuido Genesaret railla jorai fuemo Jesú斯 ia, ailluena comini naimie díne bitimaci. Ie rafue raise cacaillena, conini oni ñuicocana naimie ecimo bitimaci. <sup>2</sup> Ie facaise jorai fuemo Jesú斯 mena sijide botena ciode. Naimaci lloijina naimaci jocua jira, naie botemo lloiji fairaini iñede. <sup>3</sup> Comini ie llofuiacinona raise cacaillena, Jesú斯 daje botemo jaide. Naie bote namadi Simón Pedro. Naie bote joraimo janore bai ñuitallená Simómo jicanote. Botemo ana raita, botemona cominina llofuite. <sup>4</sup> Llofua mei, Simómo llote:

—Aforedinomo jai. Nainomo omoi lloijina faino.

<sup>5</sup> Simón uai ote:

—Maestro, cue nabaiñiai diga namona naio lloiji faiticai; iadedi jaca buena oñedicai. ¿Niese ja oiticai? Iadedi o llua jira, lloijina faiticue.

<sup>6</sup> Iena naimaci faia mei, ailluena illicaina jiitativaci. Ie jira naimaci lloiji cuaranoiacade. <sup>7</sup> Iena ciuano, onollí diga imaci nabaiñiai uaidote, naimiena naimaci canollena. Naimaci canuaibilla mei, illicaina naga bote oruitate. Eo oruilla jira, buiacade. <sup>8</sup> Iena ciuano, Simón Pedro Jesúmo iobillacino fecallena, caiñici ifodo rainadate. Raite:

—Odi siño Jitodio; ia cue jamai bue isoilla jira, cuemoná oni jai. Jeacinona finouidimiedicue.

<sup>9</sup>Ailluena llisiaina naimaci ua jira, naimaci raijicaillamona, iena naimie llote. <sup>10</sup>Naimie nabaiñiaimona Zebedeo jito iaimaiai ite. Juan diga Jacobo iaimaiai. Simómo Jesús llote:

—Cuená jaciruiñeno. Llisiaina birui ocabitomoi; iadedi cue díbeimo naimaci illena, biruimona cominina oitomoí.

<sup>11</sup>Eniruemo sijiano, naimaci raruiai fainonocaida, Jesús diga jaidimaci.

#### Jesúdi efonaitimienna jillotaja rafue

(Mt. 8.1-4; Mr. 1.40-45)

<sup>12</sup>Jiairuido Jesúdi jiae nairaimo ia, efonaitimie naimie dine bite. Naimie eo fodo jaide. Jesúna naimie ciuano, naimienra raise uaiduamona, ana bitadate. Llote:

—Maestro, o jitaiadedi, cuena jillotaredio.

<sup>13</sup>Jesús ie onollí oni ñuitajanona, naimienra jetade. Raite:

—Ona jillotaiacadicue. Mai o jillo.

—Ieconi jillode.

<sup>14</sup>Jesús naimiemo llote:

—Omo suide rafue jaca bumlo lloñeno; iadedi Jerusalémo Jusiñamui jofomo Jusiñamui diga ñairaimamo o abina acatajai. O jillua jira, Jusiñamuimo Moisés micori jaie lloga rana feca Iemoná comini o jilluana uiñoitimaci.

<sup>15</sup>Iese Jesús naimiemo llote; iadedi Jesús finoca rafue llocana eo uite. Ie muidona naimie illuana cacailena, duidinona Jesús jillotallena, ailluena comini naimie dine bitimaci. <sup>16</sup>Bitimaci; iadedi Jusiñamui diga ñailena, jofue iñenanomo Jesús jaide.

#### Jesúdi tisitaitimienna jillotaja rafue

(Mt. 9.1-8; Mr. 2.1-12)

<sup>17</sup>Jiairuido naimie llofueia, diga comini naimie illa jofomo bitimaci.

Fariseuai railla comini bitimaci. Moisés micori llogaciuaina llofueraini bitimaci. Galileamona diga nairaimona bitimaci. Judeamona bitimaci.

Jerusalémona bitimaci. Jusiñamui uaido Jesús naimie dine bite duidinona jillotate. <sup>18</sup>Ie facaise ie biiramo biide tisitaitimienna Jesús dine damierie atidimaci; <sup>19</sup>iadedi naimaci uillifo iñena jira, ailluena comini illa jira, riñedimaci. Naie jofo b̄ibanilla jira, jofo emodomio a jaidimaci. Jofo beicimo ite tidabacido a jaidimaci. Jofo emodo econocaida ifodo naimienra ie biiramo biide diga, comini motomo Jesús ecimo ana ñuitadimaci. <sup>20</sup>Iena Jesús ciuanona, tisitaitimie jilluana naimaci iñuana Jesús uiñote. Tisitaitimiemo llote:

—Jadi, o jeacinona cue feitaja jira, iena oni jai dotadicue. Ie facai ibana jai oñeiticue.

<sup>21</sup>Nainomo itinomona Moisés micori llogaciuaina llofueraini itimaci. Fariseuai jiae itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuñede; ia Jusiñamui ifomo iacade”. <sup>22</sup>Naimaci comeciai facajaciona Jesús uiñuanona, naimacimo jicanote:

—¿Bue fiellena omoi comeciaina iese facadomoí? <sup>23</sup>Bimíemo: “O jeacinona jai oni dotadicue” cue lloia, cue uai siñonana uiñóñetomoi; ia bimíemo: “Mai naidacaillanona macari” cue lloia, cue uai siñonana uiñoitomoi.

<sup>24</sup>Monamona jaie cue billanona, iimana jaidecue. Ie jira jeacino oni dotaja uai cuemo ite. Iena omoi uiñollena, tisitaitimiemo lloitice: “Mai naidacai. O biira ferianona, o jofomo mai jai”.

<sup>25</sup>Iese naimie raillamona, tisitaitimie jillode. Ieconi naimaci motomo naimie naidaide. Ie biira feriano, Jusiñamuimo iobillacino fecajano, ie jofomo jaide.

<sup>26</sup>Nana naiena ciodino eo raijicaidimaci. Iemonia Jusiñamuimo iobillacínona fecadimaci. Eo raijicallamona, raitimaci:

—Bie isoide siño comena jaca cíoñedícaí.

**Jesúdi Levína fetua rafue**  
(Mt. 9.9-13; Mr. 2.13-17)

<sup>27</sup>Jesús jino macarillano, gobierno facaina ucube oraimana ciode. Naimie mameci Leví. Ie ucubena ouillanomo raide. Jesús naimiemo llote:

—Cue llofuegamiéna o jaillena, cue diga bi.

<sup>28</sup>Naidacaída, Jesús diga jaillanona, ie majiana fainonocaide. <sup>29</sup>Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiae comini jiae guisaibitimaci. Jesús diga danomo guitimaci.

<sup>30</sup>Nainomo fariseuai cominidi, Moisés micori llogacino llofueraini diga, jamai bitimaci. Jesúna cianona, ie llofueoicaiganomo jicanotimaci:

—¿Bue ñelli ucube oraini diga guitomoi? Maraiñede comini diga guitomoi.

Moisés micori llogacinodo ucube oraini raise jaiñenamona, naie isoidino diga fariseuai comini nabairiñena jira, iese jicanotimaci. <sup>31</sup>Jesús iena cacajano, llote:

—Ecairedino médicona jítaiñedimaci; iadedi duidinodi médicona jitaidimaci.

<sup>32</sup>Jusiñamui dibeimo mareuidinona uaibiñedicue; iadedi maraiñedinona uaibiticue.

**Jesúmo comini  
guiñenana jicanua rafue**  
(Mt. 9.14-17; Mr. 2.18-22)

<sup>33</sup>Naie facaise fariseuai dinena Jesúmo llote:  
—Cai einamaci llua isoi, Jusiñamuina cai raise iobitallena, guiñenaruillai illa

facaiseconi guiñedícaí. Jusiñamuimo jiçabidícaí. Cai jeacino facaina sunaicabitícaí. Cai einamaci rafuedo Juan Bautista llofueoicaigano jaidimaci. Cai llofuegano iedo jiae jaidimaci; iadedi o llofueoicaigano jaca guitimaci. ¿Bue ñellena cai einamaci rafuedo jaiñedimaci?

<sup>34</sup>Jesús uai ote:

—Jiae rafuedo iena lloitucie. Coniruedi ie aína uarui ia iobilla jira, ie nabaiñiai sunaiñedimaci. Iobillamona guitimaci. <sup>35</sup>Jairuido jai aireiacade conirue naimaci diga iñenia, naimaci comeći sunaillamona, naimaci jitaia, guiñenaruillaídi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. <sup>36</sup>Jiae rafuedo iena lloitucie: Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. <sup>37</sup>Jacagomona finoca bolsa como finoca vino joneñega. Jonegadena, mairiñena jira, sirlamona igoi raire cuararite. Vino faifite. Igoi jiae faifite.

<sup>38</sup>Como finoca vino comogomo jonelle. Iemei iena faifiñeite. <sup>39</sup>Navui finoca vino jirua mei: “Navui finoca vino nia mare” raillamona, como finoca vino buna jiroacaiñede. Ie isoide. Omoi einamaci rafue ifomo jiae rafue birui ite. Iena omoimo llocabitucue. Iedo jaídicaí; ia omoi einamaci rafuemo omoi fibilla jira, jiae rafuedo birui jaiacaiñedomo —llote.

**Sábadoruimo Jesú  
llofueoicaigano maijia rafue**  
(Mt. 12.1-8; Mr. 2.23-28)

**6** <sup>1</sup>Jairuido sábadoruimo Jesú, ie llofueoicaigano diga, trigo illa illi motodo joide naisoná jaide. Ie

llofueoicaigano trigona tijano, golluano, guicana jaidimaci. <sup>2</sup>Dajerie fariseuai iena ciuano, llotimaci:

—Rairuica rana finosite. Moisés micorí rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Caimona jeacinona jai finodimaci.

<sup>3</sup>Ie llofueoicaiganona riiduano, Jesús uai ote:

—Cuemona jeacino finoñedimaci. David micorí jaie finoca rafuemo omoi comeciai raise facañedomoi. David micorí guille iñenia, naimie aimetaia, ie nabaiñiai diga Jusiñamui jofomo fo jaide. <sup>4</sup>Jusiñamuimo fecaca llomenicona uanona, guitimaci. Jamai bue isoidino naie llomenicona guillana Jusiñamui rairuide. Dani Jusiñamui diga ñairaini iena guiredimaci. David micorí iena guite; ia Jusiñamui naimacina duere finoñede. <sup>5</sup>Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

**Jesúdi onollina idisarodimienna  
jillotaja rafue**  
(Mt. 12.9-14; Mr. 3.1-6)

<sup>6</sup>Jiae sábadoruimo judíuaif ofiracomo Jesús jaillanona, llofuetu. Ie facaise nainomo nabellimo idisarodimie ite. <sup>7</sup>Moisés micorí llogacinona llofueraini, fariseuai diga, Jesúmo eruaídimaci, sábadoruimo Jesús naimiena raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci.

Naimacimona sábadoruimo bu majjiia, jeacinona finode. <sup>8</sup>Naimaci comeciaina facajacinona Jesús uiñuamona, onollina idisarodimiemo llote:

—Cue ecimo naidada. —Iemei Jesús ecimo naidadate.

—Jesús nainomo itinomo jicanote:

—¿Nie isoide rafue sábadoruimo finuadene mare? Bimie birui cue jillotaiadeti, birui mare rafuena finodicue. Cuena birui omoi meineiajadedi, birui maraiñede rafue finodomoi. Sábadoruimo ¿nie isoide rafue finuana rairuidomoi?

<sup>10</sup>Naimacimo eruaíllanona, duidimíemio llote:

—O onollí mai oni ñuita. —Iena ñuitajanona jillode. <sup>11</sup>Nainomo itino iena ciuanona, eo iciritimaci.

—¿Niese Jesúna nibaiñiticaí?

—naiemona coniniri siadotimaci.

**Jesúdi ie doce  
llofueoicaiganona fetua rafue**  
(Mt. 10.1-4; Mr. 3.13-19)

<sup>12</sup>Nairui aneduaimo Jesús jaide, Jusiñamui diga ñaillena. Namona naio jiide. <sup>13</sup>Monaidermo, ie llofueganona naimie dine uaidote. Naimacimona doce digamiena fetode. Naimie diga icabilena, naimacina naimie facaina llorainina naimaci jaillena, naimacina fetode. <sup>14</sup>Iese mameciredimaci: Simón; naimie mameci jiaicidi Jesús jitaca Pedrona. Andrés; naimiedi Pedro ama. Jacobo, Juan, Felipe, Bartolomé, <sup>15</sup>Mateo, Tomás, jiae Jacobo; naimiedi Alfeo jito. Jiae Simóna fetode. Naimiedi cananista comini facaisemo duide. <sup>16</sup>Judas; naimiedi Jacobo jito. Judas Iscariote micorí; naimiedi Jesúna gaitatatiemie.

**Jesúdi ailluena cominina  
llofua rafue**  
(Mt. 4.23-25)

<sup>17</sup>Aneduaimona siniaidinomo ie doce llofueoicaigano diga Jesús bite. Ie jiae llofuegano naimie dine bitimaci.

Ailluena jiae comini bitimaci. Nana Judeamona bitimaci. Jerusalémona bitimaci. Tiromona bitimaci. Sidómoma bitimaci. Tiro monaillai fuemo ite. Sidón monaillai fuemo jiai ite. Naimie lluamo cacareillena bitimaci. Naimaci duicomona jiai jilloiacadimaci.

<sup>18</sup>Jananaiā anamo itinomona Jesús jananaiaina oni orede. <sup>19</sup>Nana comini naimiena jetaacadimaci. Naimiemo siño uai illa jira, naimiena jetajamona, naimaci duicomona jillodimaci.

**Jesús lloga rafue  
(Mt. 5.1-12)**

<sup>20</sup>Ie llofueganomo eruaillanona, Jesús llote:

—Naimie anamo omoi jai illamona, Jusiñamui omoīna sedaacana rafuena omoīna llofueiticue. Naimiena jitaidomoina, omoīna sedaite. Comeciaīna facadomoī: “Jusiñamui jitaillicinona dani finonidicai; ia Jusiñamui caina canuamona, iena finoīticas”. Naimie comini omoi illamona, naimie omoīna canoite. Iemonia caimare iitomoī. <sup>21</sup>Naimie jitaillicino omoī finuamona, Jusiñamui omoīna sedaite. Naimiedi mare rafuena omoī finuana canoite. Iemonia caimare iitomoī. Omoī sunaia, Jusiñamui omoīna sedaite. Ailluena comini jeacino finocana jaidimaci. Iena uiñuamona, sunaitomoi. Naie isoidino omoi illamona, Jusiñamui omoi comeciaīna ocuiñotaite. Iemonia iocire iitomoī.

<sup>22</sup>Cuelo omoi duia, duere sefuitomoi. Jiae comini omoīna enoitimaci. Omoīna oni dotaitimaci. Omoīna jeare ñaitimaci. Cuuelo omoi duilla jira, omoīna jamaitimaci; ia Jusiñamui omoīna caimare itataite. <sup>23</sup>Omoi isoi omoi jaiagaimona Jusiñamui facaina lloraini micoriai jaie duere sefuidimaci. Iena omoi uiñuamona, monamo

Jusiñamuimona ailluena ibana ico omoi feiñua jira, birui omoi duere sefua, iocire omoi jai. <sup>24</sup>Iese iitomoī; ia Jusiñamuina jitaiñedino ico duere sefuitimaci. Comeciaīna facadimaci: “Jusiñamuina jitaiñedicai. Marena birui iticai. Nana cai comeciaī jitaillicino birui caimo ite”. Iese birui itimaci; ia Jusiñamui naimacina ico duere finoīte. <sup>25</sup>Jusiñamuimona buena birui jitaiñedino ico duere sefuitimaci. “Nana cai comeciaī jitailla rafue caimo birui illa jira, Jusiñamuimona buena jitaiñedicai” raitimaci. Iese birui itimaci, ia Jusiñamui naimacina ico duere finuamona, buenitimaci. “Cai comeciaīna iocire itatallena, Jusiñamuina jitaiñedicai” damierie birui raitimaci. Naimaci jeacino facaina sunaiñedimaci. Birui ite rafuena ebiruitimaci. Iese birui itimaci; ia Jusiñamui naimacina ico duere finuamona, sunaitimaci. Eeitimaci. <sup>26</sup>Naimaciri iobillamona, omoi jaiagaídi Jusiñamui facaina llorainina abi caitadinona marena ñaitimaci. Damierie birui daje isoidimaci. Jusiñamuina iobitaiaacaiñedimaci; ia cominina iobitaiaacadimaci. Iemonia comini naimacina marena ñaitimaci; ia Jusiñamui naimacina ico duere finoīte.

**Jesúdi iba oñenana llua rafue  
(Mt. 5.38-48; 7.12)**

<sup>27</sup>Jesús llote:

—Cue lluana cacajamona, iena iiño. Finuamona omoīna enoidinona isirui. Naimacina cano. <sup>28</sup>Omoi jeare ñaitinona marena ñaino. Omoīna jeare finodino facaina Jusiñamuimo omoi jii. <sup>29</sup>Omoi cacaīna bu dutaiade, iba oñeno; iadedi enefebelmo dobaida, enefebelmo jiai dutallena. Omoi iniroina bu bairoiacania, omoīmo naimie nia jicañenia, naimie jitailla iniroi baifemo

naimiemo feca.<sup>30</sup> Omoimo ite rana bu jicaia, iena caidiñeno feca. Omoimona rana bu bairoia, iena abido jicañeno.

<sup>31</sup> Jusiñamui jitailacina omoi finuamona, jiae cominina marena fino. Jiae comini omoina finuana omoi jitaila isoi, naimacina fino. Naimaci omoina marena finuana omoi jitaia, naimacina marena fino. Naimaci omoina maraiñeno finuana omoi jitaia, naimacina ie isoi maraiñeno fino. O finoacaga ra isoi jiae cominimo fino.

<sup>32</sup> Naimie cominina omoi illamona, nana comini daje isoi isirui. Omoina isiruitinona omoi isiruia, mare; iadedi omoina gaiñenanona omoi isiruiñenia, Jusiñamui omoina: "Mare" raiñeite. Maraiñede rafuena finoraini naimacina isiruitinona isiruitimaci. Nana cominina omoi isiruiñenia, maraiñede rafuena finoraini baifemo faíñedomo. Naimaci isoi itomoi.

<sup>33</sup> Naimie cominina omoi illamona, nana comini daje isoi cano. Omoina canodinona omoi canoia, mare; iadedi omoina canoñedinona omoi canoñenia, Jusiñamui omoina: "Mare" raiñeite. Maraiñede rafuena finoraini naimacina canodinona canodimaci. Nana cominina omoi canoñenia, maraiñede rafuena finoraini baifemo faíñedomo. Naimaci isoi itomoi.

<sup>34</sup> Naimie cominina omoi illamona, nana cominimo daje isoi rana feca. Omoimo ra fecadinsona rana omoi fecajia, mare; iadedi omoimo rana fecañedinsona rana omoi fecañenia, Jusiñamui omoina: "Mare" raiñeite. Maraiñede rafuena finoraini naimacimo rana fecadinsona rana jiae fecadimaci. Nana cominimo rana omoi fecañenia, maraiñede rafuena finoraini baifemo faíñedomo. Naimaci isoi itomoi.

<sup>35-36</sup> Omoina gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuiriñeno; ia

Jusiñamui omoi raise ibaite. Jusiñamui maraiñedinona canocabide. Naimieri iobiñedimaci; ia naimacina canocabide. Naimacina duenaicabite. Ie jira maraiñedinona omoi duenai. Naimie isoi omoi illamona, maraiñedinodi naimie cominina omoi illana uiñoitimaci. Jusiñamuidi cominina duenalla isoi, cominina omoi jiae duenai.

**Jesúdi jiae cominina  
mameriñenana llua rafue  
(Mt. 7.1-5)**

<sup>37</sup> Jesús llote:

—Duenallacina nia llofueiacadicue. Jiae cominina mameriñeno. Jiae cominina omoi mameria, omoimo ite maraiñede rafue facaina Jusiñamui omoina duere finoite. Omoimo maraiñede rafuena bu finoia, iena feita. Iena omoi feitañenia, Jusiñamui omoimo ite maraiñede rafuena feitañeite. <sup>38</sup> Jiae rafuedo iena lloitue. Rana omoi fecaia, iena raise omoi gaieia, ico ibana omoi oia, raise gaiecana feiñotomo. Ie isoide. Jiañomo maraiñede rafuena finoñeno; ia naimacina duenallamona, naimacimo rana jamai feca. Iena raise feca. O fecaja diese Jusiñamuimona eo raise ibana feiñotomo.

<sup>39</sup> Naimacina iena nia llofuiamona, naimacimo Jesús jiae rafuena llote:

—Cue cominina omoi illamona, bie rafuena cacarei. Uanaicinodo omoi jaiñenia, uisínidimie isoi itomoi. Uisínidimie jiae uisínidimiena ifonide. Ifo iade, nagamaiai dafomo uaidiiaimaiai. <sup>40</sup> Fueotimie ie llofueraima baifemo uaiñede; iadedi naimie raise fueoia, ie llofueraima isoi jaite. Raise fueollena, cue uaimo cacarei. <sup>41</sup> Omoi ecimo itimiemo janore maraiñedicino illana omoi uiñoia, iemo

comecina facañeno; iadedi omoimo alluena ite maraiñedicionomo nano omoi comecina faca. <sup>42</sup>Omoimo maraiñediciono illamona, ¿niese omoi ecimo itimiena mameritomo? Omoimo ite maraiñedicionomo omoi comecina facaacañena jira, maredinona abi caitadinodomoi. Omoi comeciaina nano raise fino. Iemei omoi ecimo itimiena canorenitomo. Naimie comecina raise canorenitomo.

**Jesúdi riara llisilla llilla llua rafue**  
(Mt. 7.17-20; 12.34-35)

<sup>43</sup>Jesús nia llofuet:

—Mare riara maraiñede riara isoi llisiñede. Maraiñede riara mare riara isoi jiai llisiñede. <sup>44</sup>Llisillamona nie isoide riara illana uiñoticai. Amena ie llisilla llillamona amena marena uiñoga. Llillamona, amena maraiñenana jiai uiñoga. Eecuaimona uvas railla riarana oñedicai. Monaigimona higos railla riarana jiai oñedicai. <sup>45</sup>Ie isoide. Naimaci comeciaimo iticinomona comini ñaitimaci. Mare comeci iticinomona maremiedi mare rafuela finocabide. Maraiñede comeci iticinomona maraiñedimie maraiñede rafuela finocabide.

**Jesúdi naimiena iiñuana ñaia rafue**  
(Mt. 7.24-27)

<sup>46</sup>Jesús nia llofuet:

—Omoimona damierie cuena: “Cai Nama” raitomoi; iadedi cue llogacinona finoñedomoi. <sup>47</sup>Diga comini cue dine bitimaci. Cue uaina cacadimaci. <sup>48</sup>Cue uaina iiñotimie jofona raise finodimie isoide. Jofona raise finodimedi ie jofona finodemo, jofona goiñellen, nofici illa dinori eo ana raite. Noci deidemo, eo jinuidemo, jofomo ille toia, jofo raise finua jira, jofo goiñede. Iena faifiñede. Ie isoide. Cue lluana iiñotimie

faifiñete. <sup>49</sup>Cue uaina iiñotimie jofona raise finoñedimie isoide. Jofona raise finoñedimedi ie jofona finodemo, enirue emodomo iena finode. Ana raiñede. Noci deidemo, eo jinuidemo, jofomo ille toia, jofo goillamona, jai eo judaisite. Iena faifide. Ie isoide. Cue lluana iiñotimie faifite —llote.

**Jesúdi capitán**  
**mullaímana jillotaja rafue**  
(Mt. 8.5-13)

**7** <sup>1</sup>Ie llua fuillacmona, Jesús Capernaumo jaide. <sup>2</sup>Nainomo romanos railla naíraímo duide illaima ite. Cien soldaduaina sedauide. Naimedi capitán. Judíuñedimie. Ie mullaíma eo duide. Niade fioldiacade. Capitán naimiena eo gaide. <sup>3</sup>Capernaumo Jesús illana capitán fidiano, Jesús dine judíuái einamacina orede. Naimie dine Jesús billena jitaide. <sup>4</sup>Jesús dine naimaci rillano, capitán dine naimie billena, naimemo duere jicanotimaci. Raitimaci:

—Naimedi caimoná maremienna jira, naimiena o canuana jitaídícai. <sup>5</sup>Cai nairaina isiruite. Ie ucube diga cai ofiracona finotate.

<sup>6</sup>Iena cacajamona, Jesús naimaci diga jaide. Capitán jofomo iaírei Jesús ria, capitádi Jesús dine ie nabaiñiaína orede, Jesúmo llollena:

—Maestro, biñeno. Jamai bue cue isoilla jira, cue jofomo biñeno. <sup>7</sup>Jamai bue cue isoilla jira, o dine jiai jaiñedice. O illanomona o uaido cue mullaíma jilloita. <sup>8</sup>Jiai illaicomini anamo iticue. Naimaci lloga uaina iiñoticue. Cue anamo jiai soldaduái illanona, cue uaina iiñotimaci. Cue anamo cue mullaíma illa jira, naimiedi cue uaina iiñote. O anamo naie duico illa jira, o uaina bene o lloia, cue mullaíma jilloite.

<sup>9</sup>Iena cacajano, Jesús raijicaide. Oni dobaidajano, naimie diga jaidinomo llote:

—Bie isoidimie cue uaina iinotimieno jaca baiñedicue. Cai jidúuai cominimona bie isoidimieno jaca iñede. Mai abido jai.

<sup>10</sup>Capitámona bitino abido capitán jofomo rillano, mullaíma jai jilluana ciódimaci.

#### Jesúdi feciño jitona jillotaja rafue

<sup>11</sup>Jiairuido Naín railla nairaimo Jesús jaide. Ie llofueoicaigano jiai jaidimaci. Ailluena comini jiai jaidimaci. <sup>12</sup>Naie nairai ie nasemo naimie iaireicaia, jai fiódaitimieno comini jino atiana ciode. Naie fiódaitimiedi conirue. Ie eidi feciño. Dajede ie jitodi jai fiodaite. Ailluena Naín itino naie feciño diga jaidimaci. <sup>13</sup>Jesús naiñaiñona cianoná, naiñaiñona duenaite. Naiñaiñona raite:

—Mai eeñeno.

<sup>14</sup>Fiodaitimie díne Jesús jaillanona, naimie ieconi naidadallena, ie uiga rana jetade. Naimieno uitinodi ieconi naidadatimaci. Fiodaitimieno Jesús llote:

—Mai a rainada.

<sup>15</sup>Iena Jesús llua mei, naie fiódaitimie ie uiga ramona a rainadate. Ie meinocomi naimie ñaite. Jesús naimieno ie eimo abido ite. <sup>16</sup>Naieri nana jacinaitimaci. Jusiñamuimo iobillinona fecadimaci. Raitimaci:

—Jusiñamui facaina lloraima caí motomo ite. Naimie uai eo siño. Naimieno Jusiñamui oretaja jira, Jusiñamui caina birui canoacana jira, iobidicai.

<sup>17</sup>Nana Judeamo itino Jesús finoca rafuena fididimaci. Judea enirue fuemo ite nairaiidaí jiai fididimaci.

**Jesús díne Juan Bautista micori ie llofueoicaiganona oretaja rafue  
(Mt. 11.2-19)**

<sup>18</sup>Juan Bautista micori llofueoicaiganodí nana Jesús finoca

rafuena fidiano, iena naimieno llote. Ie llofueoicaiganomona Juan micoridi menamiensu uaidote. <sup>19</sup>Llote:

—Jofue iñenanomo navui cue ia, jiaimie billena llofuecabiticue. Jesús díne omico jai: “¿Buudio? ¿Odi Juan llofuegamiedio? ¿Jiaimie billemo nia ocuiriticai?” naimieno jicanó.

<sup>20</sup>Jesús díne iaimaiaí rillano, Jesúmo llotiaimaiá:

—Juan Bautista cocona orede. Jofue iñenanomo navui naimie ia: “Jusiñamuimona damie biite” naimie llofuecabite. Juan llofuegamiensu o illana uiñoiacadicai. Imieñediodena, jiaimie billemo nia ocuiriticai. Cocomo llono.

<sup>21</sup>Jesús díne iaimaiaí billa facaiseconi, Jesús díne isoide duicuiaí illanona jillotate. Jananía anamo itinomona jananaiá oni jiai orede. Uisinidinona uisina dane ciotate. <sup>22</sup>Ie jira Jesús iaimaiaimo llote:

—Cue lluana cacadomico. Cue finoca rafuena ciodomico. Juan díne abido omico jaillanona, iena naimieno llono. “Uisinidino jai ciódimaci.

Ñuja-ñujacaída jaidinodi jai raise macaritimaci. Efonaítino jai jillodimaci. Jefona cacaiñedinodi jai jefona cacasite. Fiódallamona damierie jai jillodimaci. Dueredino mare rafuena jai cacadimaci”. Iese naimieno llono. <sup>23</sup>Jiaí llono: “Nibai nana cue rafuena raise cacaiñedio; ia cuena jaca nia iinocana o jaia, caimare iitio”.

<sup>24</sup>Iaimaiaí abido jailla mei, naimie ecimo ailluena ite cominimo Jesúdi Juan rafuena llote:

—Jofue iñenanomo naimie navui ia, naimie díne jaidomoi. ¿Nie isoidimieno ciodomoi? Daje uaido rafuena começina facadimieno ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie

isoñede. Nie isoide rafue naimiemo ia, cue rafuena llocana jaide.<sup>25</sup> ¿Bue ñellena naimie dine jaidomoi? Mare iniroina jitadimiena cioñedomoi. Mare iniroina jitadinona omoi cioacanaiadedi, illaicomini díne jaidomoi. Naimacimo ailluena ra ite.<sup>26</sup> Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira.<sup>27</sup> Malaquías mícori naimieno jaie cuela: “Jusiñamui raite: ‘Ero, o uicodo cue rafuena llollena, damieno oretaiticue, comini comeciaina marecinona duiñollena’” cuela. Malaquías Juan Bautistana cuete.

<sup>28</sup> Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofueté; ia naimie cue lloga rafuena omoi isoi cacañede. Naimie cue lloga rafue omoi isoi suillana cioñede. Iemonia naimie baifemo faitomoi.

<sup>29</sup> Naimacina navui Juan bautizaja jira, nainomo ite comini iena cacajano, Jusiñamuimo iobillacínona fecadímaci. Gobierno ucube orainidi jiai fecadímaci;<sup>30</sup> iadedi fariseuai iobillacínona fecañedímaci. Moisés llogacínua llofueraini jiai fecañedímaci. Jusiñamui naimacina jillotajana naimaci jamailla jira, naimaci jeacínona Jusiñamuimo lloñena jira, Juan naimacina navui bautizañede.<sup>31</sup> Jesús llore:

—Cuenca iinoñedínona lloitice: Ero, omoína ñaiticue.<sup>32</sup> Jifanote uruiai isoidomoi. Uruiai jifanoiacania, naimaci nabaiñiaina uaiduanona, raitimaci: “Omoi diga jifanoiacadicai; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina

nabairiñedímaci.”<sup>33</sup> Ie isoidomoi. Juan jirorainide. Caimare guíñede; ia naimie diga nabairiñedomoi. Naimieno gaiñedomoi. Ie jira omoimona dajerie naimieno raitimaci: “Janaba anamo naimie illamona, naimie uaírico isoi ite” raitimaci.<sup>34</sup> Monamona billanona, iimana jaidicue. Omoi isoi guiticue. Caimataidicue; ia cue diga nabairiñedomoi. Cuena jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimidio”.<sup>35</sup> Iese raitomoi; iadedi Jusiñamuina iiñotinodi cue finoca rafuena marenana uiñotimaci.

### Jesús Simón jofomo illa rafue

<sup>36</sup> Jairuido fariseuai cominimona, ie jofomo naimie diga guillena, damiedi Jesúna uaidote. Naimiedi Simón. Naimie dine Jesús jaillanona, naimie diga guite.<sup>37</sup> Jesús guitemo, daje riño fo jaide. Naiñaiñodi maraiñede rafuena finoraiño. Naicomo Jesús guerrilla fidiano, naiñaiño fo jaide. Noficimona finoca frascona atide, na soride ra illa diga.<sup>38</sup> Judíauai aciaita jaca guisoidimaci. Jinafo dine eilli jonesuidimaci. Fo jaillano, naie riño Jesús abimo naidaide. Naiñaiño eiamona, naiñaiño uisimona uайде uillinociá diga Jesús eillina jicode. Safenailleña, naimie eillina ie ifotie diga dote. Ie eillina jiai llibanote. Ie mei ie eillimo frascomona soride rana totade. Naimieno naiñaiño isiruillamona, iese naiñaiño finode.<sup>39</sup> Iena ciuanona, Simón dama comecia facade: “Bimie Jusiñamui facaina lloraimadena, nie isoide naimieno jetade riñona niade uiñote. Naimiedi naiñaiño maraiñede rafuena finoraiñona uiñote. Iena naimie uiñuamona, naiñaiñona jino raire orede. Naimiedi Jusiñamui facaina

lloraimañede".<sup>40</sup> Jesúś naimie comecinacajacinona uiñuano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

<sup>41</sup> Jesúś llote:

—Damie menamaiaimo ucubena fecade. Damiemo quinientos diga ucubena fecade. Jíaimemo cincuenta diga ucubena fecade.<sup>42</sup> Ie iade, naiena abido meidoniaimai. Ie jira ucubena fecadimiedi raite: "Dama omico meidoñega. Naiena jai feitaticue". Ero, Simón, ¿nimieca ucubena fecadimienaeo isiruite?

<sup>43</sup> Simón dinena uai ote:

—Cue comeci raite: Ailluena ucube feitaja jira, eo ailluena ucubena igamie.

Jesús dinena raite:

—Raise cue uaina fairiotio.

<sup>44</sup> Iemei Jesúdi riño dine dobaidajanona, Simómo llote:

—Biñaiñona ja lloitice. O jofomo biticue; ia cuena raise nafueñedio. O nabai o díne bia, naimiena raise nafuecabitio. Ie jearede eilli jocollena, comini finocabilla isoi, jinui fecadio. Safenallena eilli dora fecadio.

Naimiena llibanotio. Ie abi caimare sorillena, janore soride ra naimiemo Jonetio. Iese cuena nafueñedio; ia bie riño cuena isiruillamona, ie uillinociái diga cue eillina jocode. Ie ifotie diga dote.<sup>45</sup> Naiñaiño cue ecimo fo billanona, cue eillina diga icaño llibanote.

<sup>46</sup> Naiñaiño cue eillimo soride rana totade.<sup>47</sup> Naiñaiñomo eo jeacino ite; ia cuena naiñaiño eo isiruillamona, nana ie jeacinona jai oni dotajana uiñoticiái. "Jeacino cuemo raise iñede" comecinabu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecinacafa.

<sup>48</sup> Naiñaiñomo llote:

—O jeacino jai oni dotaca. Iena jai feitaticue.

<sup>49</sup> Jiajino nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

<sup>50</sup> Jesúś dinena riñomo llote:

—Cuena o iinua jira, o jeacynomona jai jillodio. Mai uri o jaillano o i.

### Dajerie riñonai Jesúna canua rafue

**8** <sup>1</sup> Ie facaise diga naíraimo Jesúdi mare rafuena llocana jaide. Naimie anamo comini illana Jusiñamui jitaila jira, Jesúdi Jusiñamui díbeimo naimaci comeciai iuaina meiduana llofuet. Ie doce llofueicaigano naimie diga jaidimaci.<sup>2</sup> Dajerie riñonai jiai jaidimaci. Naiñaiñuaimona dajerie Jesúś navui jananiai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñomona siete diga jananiai oni oretate.<sup>3</sup> Juana ite. Naiñaiño inidi Chuza. Herodes railla illaima ecimo naimie majiuide. Susana ite. Jiae riñonai jiai itimaci. Naiñaiñuai ramona Jesúna canouidimaci.

### Jesúdi trigona

### judaídimienna llua rafue

(Mt. 13.1-9; Mr. 4.1-9)

<sup>4</sup> Diga naíraimona ailluena comini Jesúś dine billanona, naimacimo llote:

—Jusiñamui omoina sedaacana omoi fueollena, bie rafuena lloitice.

<sup>5</sup> Damiedi trigona judaiaide. Naimie judaiamona naísomo janore iduai juide. Comini nainomo jaillano, iena saitadimaci. Bai jaiilla mei, sillñíai iena jiae guisaibite. Ie jira sicoñede.

<sup>6</sup> Nofiembo jiae iduai juide. Sicode; iadedi jinui raise iñena jira, duide.

<sup>7</sup> Ecuai illanomo jiae iduai juide.

Eecuai sicuamona, riara eecuai ibaica. Ie jira llisiñede.<sup>8</sup> Mare eniruemo jiae iduai juide. Sicode. Llisillamona danademo cien diga llisillana ote.

Bie rafuena naimie llua mei, naimacimo llote:

—Omoj beforena jira, raise fueollena, cue lluamo cacarei. Iena iino.

**Jesús ie como lloga  
rafuena llofufia rafue**  
(Mt. 13.10-23; Mr. 4.10-20)

<sup>9</sup>Jesúmo ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

<sup>10</sup>Uai ote:

—Jusiñamuidi omoina ie sedaacana rafuena jai uiñotade. Jiae iena uiñoñedomo. Jiae cominina iena nia uiñotañede. Ie jira bie isoidicinodo naimacimo lloticue. Cue siño finoca rafuena ciódimaci; iadedi iena naimaci iinoñena jira, uiñoñeno jaidimaci. Cue llofuiiana jamai cacadimaci; iadedi naimaci iinoñena jira, raise cacaiñedimaci. Uíñoñedimaci.

<sup>11</sup>Omoina cue como lloga rafuena llofueticue. Naie iduaidi Jusiñamui uai. <sup>12</sup>Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina iinoí raillano, naimaci naiemona jilloi raillanona, Taife naimaci comeciaimo cacaja uaina iinotañede.<sup>13</sup> Jiae iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. Nofiemeriga iduai jainaonidedi raise sicoñede. Naie comini janore iinua jira, ie isoidimaci. Dallu nano iinotimaci. Jusiñamui uai muidona duere naimaci sefuiia, abido danomo uaidimaci.<sup>14</sup> Jiae iduai eecuai illanomo juide. Naie iduai sicua mei,

iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñinotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaimo itabiñede. Jusiñamui jitaille rafuena finocana jaiñedimaci.<sup>15</sup> Jiae iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciaimona iinocana jaidimaci. Eo lliside isoidimaci. Jusiñamui jitalla rafuena sefuiruiñeno iinocana jaidimaci.

**Jesús ie rafue llocana  
jailla llua rafue**  
(Mr. 4.21-25)

<sup>16</sup>Jesús nia llote:

—Lamparín bu unia meinoconi, jiae ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainaca.<sup>17</sup> Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie iinotimaci. Damierie iinoñedimaci.<sup>18</sup> Cue lluamo raise cacarei. Iena omoi iinuamona, Jusiñamui omoina canoite. Omoina uiñocana jaitaite. “Jusiñamui rafuena uiñoticue” raitimiedi iinoñenia, Jusiñamui naimiena faifitaite.

**Jesús dibeimo itinona ñaia rafue**  
(Mt. 12.46-50; Mr. 3.31-35)

<sup>19</sup>Cominina Jesús nia llofufia, naimie dine Jesús ei, ie amatiai diga bitimaci; ia ailluena comini illa jira, naimiemo riñedimaci.<sup>20</sup> Nainomo itino naimiemo llote:

—O ei, o amatiai diga jino naidaidimaci. O diga ñaiacadimaci.

<sup>21</sup>Jesús uai ote:

—Jusiñamui uaina cacajamona, iena iiñotino ieca cue eidi, cue amatiaidi.

**Jesúdi jorai baguana  
Illiçaitaja rafue**  
(Mt. 8.23-27; Mr. 4.35-41)

<sup>22</sup>Jiairuido botemo Jesús jailla mei, ie llofueoicaiganomo llote:

—Ruica dibeimo mai cai jailli. —Ie mei jaidimaci. <sup>23</sup>Naimaci jaidemo, Jesús inide. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci.

<sup>24</sup>Jesúna casitajano, naimienra itimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina illiçaitade. Ieconi aifi illiçaidem. Bagoñede. <sup>25</sup>Naimacimo jicanote:

—¿Bue ñellena cuena iiñoñedomo? —Naimienra jacinallamona uai oñedimaci. Rajicaillamona, coniniri ñaitimaci:

—Bimiedi, ¿nie isoidimie? Aifi naimie uaina iiñote. Jorai naimie uaina jiai iiñote.

**Jesúdi Gadara railla  
eniruemo illa rafue**  
(Mt. 8.28-34; Mr. 5.1-20)

<sup>26</sup>Ruica dibellemo ridemo, Gadara railla eniruemo sijidimaci. Galilea facaisemo ite.

<sup>27-29</sup>Botemona ari Jesús jaidemo, damie Jesús dine bite. Naie nairai imie. Janaba anamo illamie. Taimienra jai jaicaisoide. Jofomo naimie irainide; ia comini raioillanomo nofie moto ifuaimo i-isoide. Ebena cominina naimie faei raillanona, lloeo diga ie onollidi maiga. Ie eilli jiai maiga; iadedi lloeo oni ticonote. Ie mei jofue iñenanomo Janaba naimienra jaitate. Iese suisoidae.

Jesúna naimie ciuanona, curioide. Jesús ecimo uaide. Janaba naimienra ado llotata:

—Jesús, nanoca Jusiñamui Jitodio. ¿Niese cuena nibaïcadío? Cuena duere finoñeno.

Iese raite, Janaba naie iimamona oni jai oretajana Jesús llua jira. <sup>30</sup>Jesús naimiemo jicanote:

—¿O mamaci bu?

Uai ote:

—Allosiedicai. —Ailluena jananai naimie ecimo illa jira, iese naimiedi raite. <sup>31</sup>Jesúmo duere jicanoside, iraimo naimacina nia oretañellena. <sup>32</sup>Naie facaise nainomo ite anedumo ailluena chanchuai itimaci. Chanchuai abimo naimaci jaillena Jesúmo duere jicanotimaci. Jesús dinena:

—Jee —raite. <sup>33</sup>Ieconi iimamona jaidemo, chanchuai abimo jaidimaci. Iena suidemo, iconi jillacimo joraimo chanchuai aisidimaci. Dinomo corobaiside.

<sup>34</sup>Iena ciuanona, chanchuai sedaraini naimaci nairai dine aisciana jaidimaci. Naie rafuena llocana jaidimaci. <sup>35</sup>Ie jira diga comini jaide, naie rafuena raise fidillena. Jesús dine naimaci ridemo, jaive Janaba anamo illamienra Jesús ecimo raillana ciódimaci. Naimie iniroina jai jitade. Naimie jai uaíricoñede. Iena ciuanona, Jesúna jaciruitimaci. <sup>36</sup>Naie rafuena ciódonodi como bitinomo naimie jilluana llotimaci.

<sup>37</sup>Naimienra naimaci jaciruillanona, naimacimona oni jaillena nana naie eniruemo ite nairaidi Jesús jicanotimaci. Ie jira botemo Jesús jaide, ruica dibeimo abido jaillena. <sup>38</sup>Ieconi jaive Janaba anamo illamie Jesús jicanote, naimie diga jaillena; iadedi Jesús raite:

—Dama ite. <sup>39</sup>Mai o jofomo o jai. Nainomo itinomo nana Jusiñamui omo finoca rafuena llono.

Ie mei jaide. Nana naimie nairaimo Jesús naimiemo finoca rafuena llocana jaide.

**Jesúdi mena duide  
riñona jillotaja rafue  
(Mt. 9.18-26; Mr. 5.21-43)**

<sup>40</sup>Ruica dibeimo Jesús abido ria, naimie abido billemo naimaci ocurilla jira, ailluena comini naimiena feiñotimaci.  
<sup>41</sup>Jairona mameciredimedi Jesús dine bite. Naimedi judíua rafue ofiraco sedaraima. Jesúmo duere jicanolla, ana bitadate. Naimie jofomo Jesús billena duere jicanote.  
<sup>42</sup>Dañaiñode ie jisa. Doce años naiñaiñodi ite. Niadeti fiodaiacade. Ie jira Jesúmo jícanuaibite. Iena cacajano, naimie diga Jesús jaide. Ie llofueoicaiganon jiai jaidimaci. Jesús jaillano, diga comini naimiemo ñajisaide.

<sup>43</sup>Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiñona jaca buna jillotanide. <sup>44</sup>Jinafo dinena billanona, Jesús iñiroi fueda jetade. Iemonia diailladi fainonocaide. Jillode.

<sup>45</sup>Jesús dinena jicanote:  
—¿Bu cuena jetade?  
Naimie ecimo ite comini uai ottimaci:  
—Onajetañediaci.  
Ie nabaiñiai diga Pedro dinena raite:  
—Maestro, ailluena comini o ecimo jaidimaci. Omo ñajidimaci.

<sup>46</sup>Jesús uai ote:  
—Damie cuena jetade. Cue abimona cue uai jaillamona, naimie jai jillode.  
<sup>47</sup>Jaive duidiñaiñodi Jesús naiñaiñona uiñuana uiñote. Ie jira Jesús dine jaciruicana bite. Naimie uicomu ana bitadajanona, nana comini uicomu naimiena jetaja rafuena llote. Naiñaiño ieconi jilluana llote. <sup>48</sup>Jesús dinena naiñaiñona raite:

—Noo, cuena o iñuña jira, jai jillodio. Mai jaillanona, uri o i.  
<sup>49</sup>Naiñaiño diga Jesús nia ñaitemo, Jairo jofomona damie bite. Jairomo llote:

—O jisa jai fiodaite. Maestrona ñaidoñeno.

<sup>50</sup>Iena Jesús cacajano raite:

—O começi jarire iñeno; ia cuena nia iino. Naiñaiño jilloite.

<sup>51</sup>Jairo jofomo naimaci rillano, ailluena comini naimie diga fo jaillana rairuide. Dani dice fo jaillana jitaide: Pedro, Jacobo, Juan, nai jitaibici moo, naiñaiño ei. Jaca dice fo illana jitaide. <sup>52</sup>Nana nainomo itino eecuinaidimaci. Failliñaidimaci. Jesús dinena raite:

—Omoi eeñeno. Cuemonia naiñaiñodi fiodaiñedes. Jamai iñide.

<sup>53</sup>Jai fiodaitedi: “¿Bue ñelli iñide raitio?” raillanona jaisitimaci. <sup>54</sup>Jesús fo jailla mei, naiñaiño onollina llinocaida, raite:

—Jitaibici, mai naidacai.

<sup>55</sup>Ieconi naiñaiño joreño abido bite.

Naidacaide. Jesús llote:

—Guillena naiñaiñona eca.

<sup>56</sup>—Naiñaiño moo, ie ei diga, raijicaiðiaímaiai. Jesús iaimaiaímo llote:

—Bie rafuena bumlo lloñeno.

**Jesúdi ie llofueoicaiganona  
oretaja rafue  
(Mt. 10.5-15; Mr. 6.7-13)**

**9** <sup>1</sup>Ie doce llofueoicaiganona naimie dine Jesús uaiduanona, naimacímo ie uaina iñonocaide, jananiaina anamona cominina jilloitallena. Duicuaína oni oretallena, iena jiai iñonocaide. <sup>2</sup>Naimacímo llote:

—Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciai uaina meido”. Duidinona jillota. <sup>3</sup>Omoi jaia, buena uiñeno. Omoi abina riidlollen, jiguidana uiñeno. Ailluena rana omoi uiñellena, bolsana uiñeno. Llomenicona

uiñeno. Ucubena uiñeno. Guille ifo meidollena, rana uiñeno. Meidlolle iniroina uiñeno.<sup>4</sup> Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i.  
<sup>5</sup>Omoina comini feiñoñenia, naimaci nairaimona omoi jaia, omoi eilliaimo ite jearacuaina oni jaidino. Nicino naimacimo illana naimaci uiñollena, omoi eilliaina oni jaidino.

—Jesús naimacimo llua mei, jaidimaci. Jusiñamui rafuena lluanona, diga nairaimo jaidimaci. Diga comini imaci duicomona jillotatimaci.

**Juan Bautista micorí fiodailla rafue  
(Mt. 14.1-12; Mr. 6.14-29)**

—Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micorí jai jillode” dajerie railla jira, ie comeciuri iñede. <sup>8</sup>Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micorí jai jillode.

<sup>9</sup>Jesúna fidiano, Herodes comeciuri iñede. Comecina facade: “Juan micorí ie ifogina navui jaitataticue. Ie muidona ¿birui bu ie rafuena fididicue?” Raise uiñollena, Jesúna ciaoacade.

**Jesús cinco mil iiñiaina ecaja rafue  
(Mt. 14.13-21; Mr. 6.30-44; Jn. 6.1-14)**

—Jesús llofueoicaigano abido bia, Jesúmo naimaci finoca rafuena llotimaci. Ie mei dani ie llofueoicaigano diga Jesús Betsaida railla nárai díne jaide;<sup>11</sup>iadedi comini iena fidianona, naimiena racadimaci. Naimie díne naimaci rilla mei, naimacina feiñuanona, naimie anamo comini illana Jusiñamui jitailla jira, Jesúdi Jusiñamui dibeimo naimaci comeciai iuaina

meiduana llofuetete. Duidinona jiai jillotate.

—Jitoma ana itemo, ie doce llofueoicaigano naimie díne billanona, raitimaci:

—Jofue bene iñede. Bene jaca buedi iñede. Ianori ite nairaimo, ianori ite jofuemo naimaci inillena, naimaci guille ollena, bie cominina abido oreta.

—Jesús uai ote:

—Naimacina bene eca.

Uai onaisite:

—Dani caimo ite cinco llomenico mena llíciai diga. Nana naimaci guillena, ¿guille cai iballena nibai jitaidió?

—Cinco mil iiñiai nainomo illa jira, ailluena guille jitaillana uiñotimaci. Naimaci ainiai, imaci uruiai diga, jiai itimaci. Ie llofueoicaiganomo Jesús llote:

—Comini ana raillesa llono.

Cincuenta digamierie ana imaci raillesa llono.

—Iena finodimaci. <sup>16</sup>Naie cinco llomenicona, naie mena llíciai diga Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. <sup>17</sup>Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

**Pedro Jesúna llua rafue  
(Mt. 16.13-19; Mr. 8.27-29)**

—Jairuido Jesús ie Moomo jia facaiseconi, ie llofueoicaigano naimie diga illanona, naimacimo jicanote:

—¿Niese cominidi cuena raitimaci?

—Uai otimaci:

—Damierie raitimaci: “Juan Bautista micorí”. Damierie raitimaci: “Odi Elíadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

<sup>20</sup>Jesús naimacimo jicanote:  
—¿Niese omoi cuena raitomoi?  
Pedro uai ote:  
—Odi cai Jilloitaraimadio. Jusiñamui facaina lloraini micoriai o billena jaie llotimaci. Jusiñamui ona orede.

**Jesús ie fiodaillena llofuaia rafue**  
(Mt. 16.20-28; Mr. 8.30—9.1)

<sup>21</sup>Jesús naimaci como llogacino bumo lluana rairuide. <sup>22</sup>Llote:  
—Cai jufuái illacomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

<sup>23</sup>Nana ie llofueicaiganomo llote:  
—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue dibeimo naimie iiite. <sup>24</sup>Duere sefuillana jaciruilla mona cue cominina bu jaiacaiñenia, ja muidomo faifite; iadedi duere sefuillana jaciruñenamona cue cominina bu jaia, jaca faifiñeite. <sup>25</sup>Cue cominina bu jaiñenia, nibai eo duere sefuiñeite. Nibai aillena ra naimiemo iiite; ia, ¿niese cue Moo dine riite? Nainomo naimie riñeno faifite. <sup>26</sup>Cuena bu meiruia, cue uaina bu meiruia, dane cue bia, naimiena meiruiticue. Cuena meiruilla mona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaíenaisai siño uai isoi illanona, cue Moo dinena monamona ico biiticue. Cue Moo uai cuemo illanona, ebire biiticue.

<sup>27</sup>Uanaicinona omoimo lloticue. Omoimona dajerie nia fiodaiñeitomoimo, illaimana cue bairellena cioitomoí.

**Jesús abi meidocaila rafue**  
(Mt. 17.1-8; Mr. 9.2-8)

<sup>28</sup>Ocho digarui illanona, Jusiñamuimo jiñlena, anedumo Jesús jaide. Naimie

diga jaillena, Pedrona uite. Juan jiai uite. Jacobona jiai uite. Jiaie llofueicaiganona uiñede. <sup>29</sup>Naimie jihamona naimie abi meidocaide. Naimie iniroi naie dacaiño eo userecaide. <sup>30</sup>Ieconi menamie bairiano, Jesús diga ñaitiñaimaiai. Moisés micori joreño ite. Elías jiai ite. <sup>31</sup>Ebrie baireidiaimaiai. Jesús Jerusalémo fiodeallera fuena ñaitimaci. <sup>32</sup>Ie facaiseconi Pedro ie nabaiñiai diga jai inidimaci; ia casillamona, Jesús ebirenana ciódimaci. Jesús ecimo ñitiñaimaiaiñia jiai ciódimaci. <sup>33</sup>Iaímaiai jaiacania, Pedro Jesúmo llote:

—Maestro, bene cai illana mare. Daje amani bisaini cai finollena, mare. Daje oie, jiae Moisés micori ie, jiae Elías ie.  
—Iese raite; ia ie ñaia rafuena raise uiñoñeno jamai ebena ñaite.

<sup>34</sup>Iena naimie nia lluanona, uillie billamona, naimacina ibaide. Uillie ibaibillaconi jacinaitimaci. <sup>35</sup>Uilliemona Jusiñamui naimacimo llote:

—Bimiedi cue Jito. Naimienia fetodicue, cue jitaille rafue finollena. Naimie lluana omoi cacareillanona, iena iino —llote.

<sup>36</sup>Jusiñamui llua mei, dama Jesúna dane ciódimaci. Jesús diga itino naimaci ciua rafuena naie facaiseconi jaca bumo lloñedimaci.

**Jesúdi Janaba anamo  
itímena jillotaja rafue**  
(Mt. 17.14-21; Mr. 9.14-29)

<sup>37</sup>Ie areruido anedumona ana bitimacimo, ailluena comini naimacimo dafaifide. <sup>38</sup>Cominimona damie ado llote:

—Maestro, cue dajede cue jito duillana jibuisaibi. <sup>39</sup>Janaba naimie anamo illamona, cue jito cuiritate. Cue jitona naillitacabite. Iemonia ie fue mullecabide. Naimienia bofedaaicabite. Naimiemona oni

jaiacaiñede.<sup>40</sup> Janabana oni oretallena, o llofueoicaiganomo jicanotice; ia oretanidimaci.

<sup>41</sup>Iena cacajanona, Jesús ie llofueoicaiganomo llote:

—Cue uai siñonana nia iinnoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi iinollena, ¿nie dinori omoi diga iiticue? —Naie duidimie moomo llote—, O jito cue dine mai ati.

<sup>42</sup>Naie urue billano, Janaba naimiena eniruemo ana dotade. Naimiena naillitate; ia oni jaillena Jesús Janabana lletade. Ieconi naie urue jillode. Iemei Jesús ie moomo naimiena fecade.

<sup>43</sup>Comini iena ciuanona, Jusiñamui siño uai naimiemo illari raijicaidimaci.

Jesús ie fioldaillena  
dane llofua rafue

(Mt. 17.22-23; Mr. 9.30-32)

Naimaci nia raijicaia, Jesús ie llofueoicaiganomo llote:

<sup>44</sup>—Cue lluana feitañeno. Monamona billanona, iimana jaidicue; ia Jusiñamui jitilla jira, jiairuido illaicominí cuena meineitímaci.

<sup>45</sup>Jesús lluana raise cacaiñedimaci. Naimie iena llofueñena jira, iena raise uiñoñedimaci. Naimiemo iena jicanuana jiai meiruitimaci.

Jesús ie llofueoicaigano moto  
imienia ille rafue

(Mt. 18.1-5; Mr. 9.33-37)

<sup>46</sup>Ie facaise Jesús llofueoicaigano conini uaitajanona raitimaci:

—¿Bu cai moto imienia ille?

<sup>47</sup>Jesús naimaci comeciai facajacinona uiñuamona, nainomo ite cominimona daje urue bai jaianocaida, naimaci motomo naimiena jonete. <sup>48</sup>Raite:

—Comini dinena bie urue jamai bue isoide; ia bie isoidimie cuemo

duillamona, naimiena feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiai jai feiñote. Jamai bue isoidimiedi omoi moto imienia ille.

Jesúdi ie dibeimo itinona llua rafue  
(Mr. 9.38-40)

<sup>49</sup>Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimienia ciodicai. Cai diga naimie jaicabiñena jira, iena finuana rairuidicai.

<sup>50</sup>Jesús dinena uai ote:

—Naimiena rairuiñeno. Cai dibeimo itimiedi cai facaisena ite. Ie jira naimie isoidinona rairuiñeno.

Jesús dinena Jacobo,  
Juan iaímaiai lletaja rafue

<sup>51</sup>Monamo abido Jesús jaillirui iairei ia, Jerusalémo jaiacanamo naimie comecin facade. <sup>52</sup>Ie jira dajeriena uicodo oretate. Ie iinillinona jenollena, Samaria railla nairaimo jaidimaci; <sup>53</sup>iadedi Jerusalémo naimaci jailla jira, judíuainedenona samaritanodí gaiñena jira, Jesús llofueoicaiganona feiñoiacaiñedimaci.

<sup>54</sup>Iena fidianona, Jacobo, Juan diga, Jesúmo jicanotiaímaiai:

—Nama, ¿bie comini jobailena, monamona irai billena Jusiñamuimo coco jicanuana jitadio?

<sup>55</sup>Iaímaiaimo eruaillanona, Jesús dinena iaímaiaimo riire lletade:

—Dama ite. Iena jitaiñedicue.

<sup>56</sup>Ie mei iinllena jiaie illanomo jaidimaci.

Jesús ie llofuegamienna damie  
jaillena ie rafue

(Mt. 8.19-22)

<sup>57</sup>Naisonai ie llofuecaigano diga, Jesús oni jaillanona, Jesúmo damie llote:

—O jaillinomo o diga jaiacadicue. O llofuegamienna jaiacadicue.

<sup>58</sup>Jesús uai ote:

—Janorede ocainaiaidi joforedimaci. Silliñiai jillainiairedimaci; iadedi jofonidicue. Monamona billanona, iimana jaidicue; iadedi buenidicue. Jofonidicue. Cue diga o jaiacania, bue isoidena cuemona oñeitio. Iemo o comechina raise faca.

<sup>59</sup>Jiaimimo Jesús llote:

—Cue llofuegamieno o jaillena, cue diga mai bi.

Naimie uai ote:

—O diga jaiticue; ia cue moo nia fioldaiñena jira, o diga nia jaiñeiticue.

<sup>60</sup>Jesús naimimo dane llote:

—Dama ite. Cue diga mai bi. Cuenia iinoñedinodi o moona canoredimaci. Naimie fiodaia, naimieno naimaci raille. Cue rafue jiae rafue baifemo faite. Naimie anamo comini illana Jusiñamui jitilla jira, naimie dibeimo naimaci comeciai iuaina meiduana llocana cue diga mai o bi.

<sup>61</sup>Jiaimie Jesúmo llote:

—O llofuegamieno jaiacadicue; iadedi cue jofomo nano jaiacadicue, cue cominina facadollena.

<sup>62</sup>Jesús uai ote:

—Cue llogamieno jaiacania, jiae ramo naimie comechina eo facañena. Jiae ramo naimie comechina eo facaia, Jusiñamui facaina raise maijinide.

**Ie rafuena llollena, Jesús setenta digamieno oretaja rafue**

**10** <sup>1</sup>Ie llofueganona llofuia mei, naimacimona Jesús setenta digamieno fetode. Naga naimie jaiacana nairaiaimo menamierena oretate.

<sup>2</sup>Naimacimo llote:

—Diga comini ite, naimacina Jusiñamui rafuena iinotallen; iadedi eo janore lloraini ite. Jusiñamui jicano, jiae llorainina naimie oretallen. <sup>3</sup>Mai jai; iadedi abi rairuicana jai. Toica

llaudaiai janallari illanomo illa isoi, omoina oredicue. <sup>4</sup>Ucubena uiñeno. Ailluena rana omoi uiñellena, bolsana uiñeno. Meidlolle zapatona uiñeno. Naisomo bu omoimo dafaifia, are ñaiñeno. <sup>5</sup>Bu ie jofomo omoi ria, jofomo itinomo marena uaido. <sup>6</sup>Nainomo maremie ia, o uaina fairioite. Maremie iñenia, o uaina fairioñenia: “Jusiñamui ona canoite” naimimo lloñeno. <sup>7</sup>Nie nairaimo omoi ria, daacomo omoi ri. Omoi ecalle rana guño. Cue facaina omoi maijia jira, comini omoina ecacia, cue facaina omoi maijia facaina omoi guño. Naga jofomo guicana jaiñeno. <sup>8</sup>Nie nairai omoi ria, omoina naimaci feiñoia, omoi ecalle rana uaitañeno guño. <sup>9</sup>Duidinona jillota. Nainomo itinomo llono: “Naimie anamo omoi illana Jusiñamui jitilla jira, naimie dibeimo omoi comeciai iuaina meido”. <sup>10</sup>Nie nairaimo omoi ria, omoina naimaci feiñoñenia, ie naiso motomo jaillanona llono: <sup>11</sup>“Omoi naisomo caí eillimo ite jearacuajai jai jaidinoticai, maraiñede rafue omoimo illana omoi uiñollena. Jusiñamui omoina sedaacad; ia iena jitaiñedomoi” llono. <sup>12</sup>Sodoma nairai jiae eo maraiñede. Jusiñamui iena jiae fuidode; ia nana comini naimie uicom oco ia, Jusiñamuidi omoina feiñoñedinona Sodoma railla nairai baifemo duere finoite.

**Jesús ie iinoñedinona llua rafue**

(Mt. 11.20-24)

<sup>13</sup>Ie fetocanomo Jesús nia llote:

—Corazín railla illanomo navui iticue. Betsaida railla illanomo navui jiai iticue. Naimaci dine diga siño rafuena finodicue; iadedi iinoñedimaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciai eo isinotaillamona, naimaci comeciai

iuai meidotimaci. Naimaci comeciai iuai meiduana jiae comini uiñotallena, ebinide imiroina jitajanona, jusefo naimaci ifogiaimo jonetimaci.

<sup>14</sup>Jusíñamui uicomu nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci. <sup>15</sup>Capernaumo itino jiai duere sefuitimaci. Birui abina iedoiacadimaci; iadedi jiairuido sure iitimaci. Monamo cue Moo diga jaca iñeitimaci; iadedi naimie naimacina duere finollemona, sure iitimaci.

<sup>16</sup>Omoi lluana naimaci cacaacanía, cuena cacadimaci. Omoi lluana naimaci jitaiñenia, cuena jitaiñedimaci. Cuena jitaiñedinodi cuena oretagamiena jiai jitaiñedimaci. —Jesús naie fetocanomo iese llua mei, oni jaidimaci.

#### **Le setenta fetocano abido billa rafue**

<sup>17</sup>Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananíaina oni oredicai.

<sup>18</sup>Jesús naimacimo lloote:

—Monamona Taife borilla isoi jaie ana dotajana ciódicue. Iemona cue uai naimie uai baifemo faiana uiñoticue. <sup>19</sup>Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue dibeimo iñedino omoi anamo jai itataticue. Omoina niese nibaiñeitimaci; <sup>20</sup>iadedi omoi uaina jananíai iñua jira, iobiñeno; iadedi Jusíñamui cominina omoi illamona, omoi mameciai monamo Jusíñamui rabenicomu jai cuiamo iobi.

#### **Jesús ie Moo diga ñaia rafue**

(Mt. 11.25-27; 13.16-17)

<sup>21</sup>Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uiñotinona bie

isoide rafuena uiñotañedio; iadedi jamai bue isoidinona iena uiñotadio. O jitalla jira, iese uiñotadio. Ie jira iobillacina omo feacaacadicue. Mai.

<sup>22</sup>Jesús dinena naimie ecimo ite cominimo dane lloote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaille diese omoina naimiena uiñotadicue. Ie muidona naimiena uiñotomoi.

<sup>23</sup>Ie llofueoicaigano diga eneno ia, naimacimo lloote:

—Cue finoca rafuena omoi ciua jira, ni ua omoi marena illino jillací.

<sup>24</sup>Jusíñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacañedimaci. Jusíñamuina jaie iñotino micoriai iena cioacadimaci; iadedi cioiñedimaci. Iena cacaacadimaci; iadedi cacañedimaci.

#### **Jesús cai ecimo itímienna isiruillana llua rafue**

<sup>25</sup>Jesús ecimo itinomona Moisés micori llogaciuaina llofueraimadi Jesúna facaciano, naimiemo jicanote:

—Maestro, Jusíñamui illanomo jaca cue illena, ¿bue finoiticue?

<sup>26</sup>Jesús uai ote:

—¿Niese Moisés micori llogaciuai iena raite?

<sup>27</sup>Uai ote:

—Moisés micori jaie cuega: “O jitalla jira, o começina facajamona, cai Nama Jusíñamuina nana o começi jitallamona naimiena eo isirui. O abina o isiruilla isoi, o ecimo itínona isirui”.

<sup>28</sup>Jesús dinena raite:

—Marena cue uai otio. Iena o finoia, Jusíñamui illanomo jaca iitio.

<sup>29</sup>Naie llofueraima Jesúmo dane jicanote:

—¿Bu cue ecimo itino?

<sup>30</sup>Jesús uai ote:

—Jiae rafuedo iena omo lloitcue. Jerusalémona Jericómo damie jaide. Naimie jaillano fiiredino naimie dine bitimaci. Ie iniroina bairosite. Naimieno fatimaci. Niade ie meinianona ie ecimona jaisite. <sup>31</sup>Dallu illanona, Jusiñamui diga ñairaima naie naisonja jaide. Fagamienna ciode; iadeci ecido jaide. <sup>32</sup>Dallu illanona, Jusiñamui jofomo maijiraima jiai jaide. Fagamienna cianona, ecido jiai jaide. <sup>33</sup>Ja muidomo Samaria nairai imie jaide. Naie nairaína eniodomo. Fagamienna naimie cianona, naimieno duenaite. Iemonia naimie canoacade. <sup>34</sup>Naimie dine jaillano, ie bofellañona manode. Jiai maitade. Ie burro emodomio jonecaida, naimieno uite. Inmillinomo rilla mei, nainomo naimieno sedade. <sup>35</sup>Ie areruido ie inia jofo namamo janore ucubena fecade. Raite: “Naimieno seda. Naimie facaina jiae rana o oia, abido cue bia, iena ibaitcue”. Ie mei oni jaide. <sup>36</sup>—Naie llofueraimamo Jesús dinena jicanote— ¿Fagamienna ecimo itimiedi bu?

<sup>37</sup>Uai ote:

—Fagamienna duenaitimie.

Jesús raite:

—Jai raise uiñotio. Mai jai. Ie isoi finocana o jai.

### Jesúdi Marta iañuai

#### María jofomo illa rafue

<sup>38</sup>Nia macaritimacimo, comini illanomo Jesús ie llofueoicaiganu diga ridimaci. Marta raillañaiño ie jofomo naimieno feiñote. <sup>39</sup>Naiñaiño euiñodi María. Jesús ecimo llaribamo María ana ráide, naimie llofuiacina cacareillena; <sup>40</sup>iadeci Martamo maijille eo illa jira, naiñaiño naimie llofuiacina cacarefiñede. Ie jira Jesúmo llote:

—Nama, cue euiñona cuena canoacaiñena jira, daño maijidicue. “O euiñona cano” naiñaiñomo llono.

<sup>41</sup>Jesús uai ote:

—Ero, Marta, jarire itio. Diga o ramo comecinha facadio; ia Jusiñamui rafuelo comecinha faca. <sup>42</sup>María iemo comecinha jai facade. Naiñaiño cue llofuiiana nano cacaiacade. Ona canollena naiñaiñomo lloñeitcue.

### Jusiñamuimo Jesús jiia rafue

(Mt. 6.9-15; 7.7-11)

**11** <sup>1</sup>Jairuido ie Moo diga Jesús ñaia, ie llofueganomona damie naimiemo llote:

—Nama, jiiana caña llofue, ie llofueoicaiganu Juan Bautista micori llofuiua isoi.

<sup>2</sup>Jesús uai ote:

—Omoi jiia, iese omoi jii:

Ore Moo, comini ori iobidesa.

O illaimana jira, nana cominina o anamo raire itata.

O jaienisaí o jitaillacina finua isoi, cominina o jitaillacina finota.

<sup>3</sup>Nagarui guille caimo itata.

<sup>4</sup>Caina jeare jiaino finoia, iena caimona feilla isoi, cai jeacinona omuna feilla jira, cai jeacinona oni dota.

Caina ramo bu faia, caina cano, iena cai iiñofellena.

<sup>5</sup>Iena naimacina nia llofuelle, Jesús jiae rafueno llote:

—Naiona mona moto llomenicona jicallena, o nabai dine o jaia, ado lloitio: “Nabai, daje amani llomenicona jitaidicue. <sup>6</sup>Jiae nabai cue jofomo como ride. Jaca cuemo buedi iñede, naimieno cue ecallenau”. <sup>7</sup>Ie jofo jeraimona o nabai fairioite: “Cuenauaidoñeno. Cue nasedi jai cue ibaicasa. Cue uruiá jai inidimaci. Jiae inidicue. Llomenicona omo fecallena casiacaiñedicue”. <sup>8</sup>Ja muidomo casillano, omo iena fecaite. Ie nabaina o illa jira, fecañeite; iadeci o eo

jitailla jira, o jitaille rana fecaite.  
 9<sup>–</sup>10 Daje ra omoi faifia, iena jenodomoi. Raise jenoia, iena baitomoi. Damiéna omoi jenoia, naimie illanomo jaidomoi. Nainomo naimienä baillamona, omoina feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoimo iiite.

11<sup>–</sup>Ero, omoimona ie moomo llomenicona ie jito jicaia, noficina fecañede. Llícaina jicaia, jaiona fecañede. 12<sup>–</sup>Jigina jicaia, acaidona fecañede. 13<sup>–</sup>Jeacinona finocabidomoi; iadedi omoi uruiaímo mare rana fecacabillana uiñotomoi. Cai Moo Jusiñamui jaca mareuidimie. Cai baifemo naimie faite. Ie muidomo naimacina canollena, naimiemo jicadinomo ie Joreñona itataite.

#### Comini Jesúna jeare ñaia rafue

(Mt. 12.22-30; Mr. 3.19-27)

14<sup>–</sup>Jiairuido Janaba anamo illamiemona Jesús Janabana oni orede. Janabana nia oretañenia, Janaba anamo naimie illamona, naie iima ñainide. Janaba oni jailla mei, naimie ñaite. Ie jira comini rajjicaidimaci; 15<sup>–</sup>iadedi dajerie raitimaci:

—Beelzebú anamo bimie illamona, Beelzebú uaido jananiaina oni orede —raitimaci. Beelzebúdi Janaba comini.

16<sup>–</sup>Jiaino naimienä facaciacasite.

Raitimaci:

—Siño uai omo ia, Jusiñamuina siño rafuela finota.

17<sup>–</sup>Naimaci comeciaina Jesús uiñua jira, naimacimo llote:

—Daje isoi comeciaina lloillamo daje nairai facañenia, danomo majjinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiañidimaci. Oni jaidimaci.

18<sup>–</sup>Ie isoide. Beelzebú uaido jananiaina, omoi llua isoi, cue oretai, Janaba ie

dibeimo itino diga jai nabairiñede. Iemoná naimie comini danomo iñeitimaci. 19<sup>–</sup>Omoi comini jananiaina oni oretacabitimaci; iadedi naimaci finoca rafuela uaitañedomoi. Naimacimo jicano, bie isoide rafuela omoi raise uiñollena. Iemei cue finoca rafuela uaitañeitomoi.

20<sup>–</sup>22<sup>–</sup>Jiaie rafuedo iena lloitice. Ero, ie rana raise riiduamona, mairidimie ie rana raise enoite. Ie jofomo ie ra illanona, iena raise sedaite. Jamai bue isoidimie ie rana fiñide; iadedi naimie baifemo mairidimie bia, naimienä emodofillamona, ie rana fiñrede. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui uaido jananiaina cue oretai, Jusiñamui rafuela cue lluana uiñotomoi.

23<sup>–</sup>Cue dibeimo iñedimie cuena enoide. Cue dibeimo cominina itatañedimiedi naie cominina cuena iñotañede.

#### Janaba anamo illamie rafue

(Mt. 12.43-45)

24<sup>–</sup>Jesús naimacimo nia llote:

—Birui bene ite marañede cominidi Janaba anamo illamie isoidimaci.

Naimiemona Janaba oni jaia, jiae illanona baillena, jofue iñenanomo jaide; iade baiñede. Baiñena jira, naimie comeicina facade: “Navui cue anamo illamie dine abido jaiticue”. 25<sup>–</sup>Abido naimie bia, naie iima comeci namanidena naimie baite.

26<sup>–</sup>Iemei oni jaillanona, jiae siete jananiaina naimie diga atide, naimaci anamo naie iima illena. Naie siete jananiai naimie baifemo marañedimaci. Iemoná naie iima eo fodo jaide. Ie isoide birui ite marañede comini. Cue rafue naimaci iñonienia, eo fodo jaitimaci.

**Daje riño Jesús eina  
marena ñaia rafue**

<sup>27</sup>Cominimo Jesús llotemo, comini motomona dañaiño Jesúmo llote:  
—O ei caimare illesa. Naiñaiñomona comuidio. Naiñaiño monoi jirodio.  
Naiñaiño caimare illesa.

<sup>28</sup>Jesús uai ote:

—Marena llotio; ia Jusiñamui uaina naimaci cacajamona, iena iiñuamona, jiajino eo caimare iitimaci.

**Dajerie Jesús siño rafuena  
finuana jitilla rafue**  
(Mt. 12.38-42; Mr. 8.12)

<sup>29</sup>Ie facaise diga comini Jesús dine biñoidimaci. Naimacimo llote:  
—Birui ite cominidomoi maraiñedomo. Siño rafuena cue finuana cioacadomo; iadedi iena omoi jamai cioillena, siño rafuena finoñeticue. Ero, Jonás micori jaie ite rafuena uiñotomo. Naiemo omoi comeciaina omoi faca. <sup>30</sup>Naimiemo suide rafuemona Nínive railla nairaidi Jusiñamui naimiena oretajana jaie uiñotimaci. Ie isoide. Fiodaillamona cue jilluamona birui ite cominidi Jusiñamui cuena oretajana uiñotimaci. <sup>31</sup>Ero, Saba railla nairaí ie illaiño micorid Salomón micori dine jaie aarena jaide. Naimie micori uiñuacinona naiñaiño micori cacareillena, aarena jaide. Salomón micori baifemo birui uaidicue; iadedi cuena iiñonedomo. Omoi comeciai icinuaína birui omoi meidoñena jira, Jusiñamui uicom nana comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiena iiñonedomo?” omoina ico ñaite. <sup>32</sup>Lliciai jeraimona naimie jillua mei, Nínive railla nairai dine Jonás micori jaide. Nainomo Jusiñamui

rafuena llote. Naie comini iena cacajano, naimaci comeciai icinuaína meidoñimaci. Cue rafuena omoi cacajamona, omoi comeciai icinuaína birui omoi meidoñena jira, Jusiñamui uicom ico nana comini ille facaiseconi: “Cue cominidomo” omoina raiñeticue. Jonás micori baifemo birui uaidicue; iadedi cuena iiñonedomo.

**Jesús comini illa rafue**  
(Mt. 5.15; 6.22-23)

<sup>33</sup>Jesús llote:

—Lamparín bu unia mei, jofo anamo bainino rainañega. Cirigai anamo rainañega. Ie rairanomo rainaca, comini nainomo bia, jofo jerai lligaiñollena.

<sup>34</sup>Omoi uisi diga rana ciodomoi. Omoi uisi maraiñenia, rana raise cíoñedomoi. Ie isoide. Omoi comeci maraiñenia, maraiñedicinona finocana jaidomoi. Jusiñamuina uiñonedomo. Ie rafuena jiai uiñonedomo. <sup>35</sup>Ie jira omoi comeciaina raise fino, cue rafuena omoi raise iiñollena. <sup>36</sup>Nana omoi comeciai marena ia, cue rafuena iiñocana jaitomoi. Iena raise uiñotomo. Jofomo lamparín raise lligaiñua isoi, cue rafuena raise uiñotomo.

**Jesúdi judíuai illaicominiña  
ñaia rafue**  
(Mt. 23.1-36; Mr. 12.38-40;  
Lc. 20.45-47)

<sup>37</sup>Cominina Jesús llofua mei, daje fariseo imie naimie dine bite. Raite:

—Cue diga cue jofomo mai guisaíbi.

—Jesús fairiuá mei, naimie diga guisaide.

<sup>38</sup>Naimie nia guíñenia, naimaci einamaci llogacinodo naimie jaiñenamona, Jesús ie onollina jocoñede. Ie jira naie fariseo imie raijicaide. Ie comecin facade: “Naimie eo mare llofueráima. ¿Niese cai einamaci llogacinodo jaiñede?” <sup>39</sup>Jesús naimiemo llote:

—Da platos jinafo, da pocillos jinafo jocodino isoidomo. Da platos jerai, da pocillos jerai jocoñedino isoidomo. Omoi abina finodomoi; iadedi omoi comeciaina finoñedomo. Rana eo nicidotomo. Omoi comeciai jearede.<sup>40</sup> Abi uiñoñedomo. Jusiñamui omoi abiaina omoi comeciai diga finode. Omoi finoca rafuena uiñote. Omoi comeciaina facajacina jiai uiñote.<sup>41</sup> Omoi comeciai marena ia, jiae cominina canodomoi. Iemonia Jusiñamuimona omoi abi jiai mare.<sup>42</sup> Fariseuai, omoimo rafuena lloitie. Nana omoi illimo ite ramona Jusiñamuimo janore jisa feca-fecacabidomo; iadedi jiae cominimo mare rafuena raise finoñedomo. Jusiñamuina jiai raise isiruiñedomo. Nana naie isoxide rafuena omoi jiai finua.<sup>43</sup> Comini omoiroi acarillena, ofiracom uicomo raiacadomo. Nine omoi macaria: “Jamai bue isoñediaci” omoi comeciaina facajamona, jiae comini omoina uaiduana gaidomo. Iese omoi jailla jira, Jusiñamui omoina duere finoite.<sup>44</sup> “Bainino ite raiifo emodomio comini uiñoñeno macarillamona, naimaci abi jai jearede” raitomo. Bainino ite raiifo isoidomo. Omoi diga jiae comindri omoimo ite jeacinona uiñoñeno nabairillamona, jeacinona jiai finodimaci. Iese omoi finocana jaia, Jusiñamui omoina duere finoite.<sup>45</sup> Naie facaise Moisés llogacinuaina llofuerainimona damie Jesúmo llote:  
—Iese o lloia: “Jeacino finodomoi” caina jiai llotio.

<sup>46</sup> Jesús uai ote:  
—Jusiñamuimona jiai duere sefuitomo. Omoi einamaci llogacinuaido raise naimaci jaillena, diga rafue comini finuana jitadomo; iadedi ideo naimaci raise jaillena, naimacina jaca canoñedomo. “Jusiñamuina eo raise sedadicai” comecin facadomo.<sup>47</sup> Omoi jaiagaidi Jusiñamui facaina llorainina meineticaci. Naie

lloraini micoriai raiafuai birui marena finodomoi;<sup>48</sup> iadedi naimaci micoriai llogacinuaido omoi birui jiai jaiñena jira, omoi jaiagai finoca radi: “Mare” raitomo. Jusiñamui rafuedo birui omoi raise jaiñena jira, omoi jaiagai isoi itomoi. Iese omoi jailla jira, Jusiñamui omoina duere finoite.<sup>49</sup> Omoima Jusiñamui abi uiñuamona jai llote: “Cue rafuena lollena, naimaci dine cue facaina llorainina oretaiticue. Cue rafuena eo uiñotinona jiai oretaiticue. Dajeriena meineticaci. Jiaínona duere finoitimaci”.<sup>50</sup> Enirue finua facaisemona ailluena Jusiñamui facaina llorainina meineticaci. Omoimona Jusiñamui iba oite.<sup>51</sup> Abel micori jaie ite. Ie ama naimieno meinete. Naimie facaisemona omoi jaiagaidi diga llorainina meineticaci. Zacaríana jiai meineticaci. Jusiñamui jofomo Jusiñamuimo toica ocaina jobaisoillano motomo naimieno meineticaci. Omoimona Jusiñamui birui iba oite.<sup>52</sup> Omoi llofuiamona comini Jusiñamui rafuena uiñoñedimaci. Jusiñamui rafuena raise uiñoñedomo. Jiaín olena raise uiñuana jitaiñedomo. Iese omoi jailla jira, Jusiñamui omoina duere finoite.

<sup>53</sup> Fariseo jofomona Jesús jailla mei, fariseuai comini icirillamona, Jesúmo diga rafuena jicanotimaci, naimie uaina uaitallena. Moisés micori llogacino llofueraini daje isoi uai uaitatimaci.<sup>54</sup> Naimie raise uai oñedena, naimieno duere finoacadimaci.

Jesúdi mareuidinona abi caitadinona llofuiia rafue

**12** <sup>1</sup> Ie facaiseconi eo ailluena comini Jesús dine ofidimaci. Ailluena illa jira, conini eilliaimo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredicai”

raitimaci; iadedi mareuidinona abi caitadimaci. Naimacimona abina rairui. <sup>2</sup>Naimaci birui finoca rafuena birui bainino finodimaci; ia Jusiñamui naimaci comeciai iticinona ico uiñotaite. <sup>3</sup>Ero, cue rafuena birui anado llocana jaidomoi; ia ico marefodo iena llocana jaitomoi.

**Jesúdi jaciruiñeno llofuia rafue**  
(Mt. 10.28-31)

<sup>4</sup>Ie llofueganomo Jesús llote:  
—Cue nabaiñiaidomoi. Omoina meineiacadinona jaciruiñeno. Omoi abina meineredimaci; ie iadedi omoi joreñona meinenidimaci. Omoina naimaci meinia, omoi joreño Jusiñamui dine jaite. Iena uiñuamona, omoi meineiacadinona jaciruiñeno. <sup>5</sup>Cue rafuedo omoi raise jaiñenia, Jusiñamuina jacirui. Omoi fiodailla mei, omoi abina omoi joreño diga iraimo ie dotalle uai naimiemo ite. Ie jira naimiena jacirui. <sup>6</sup>Ero, dabecuiro janorede sillina fecadomoina, eo janore ibaca. Silliñiai eo janore raifide; iadedi Jusiñamui naimaci illana uiñote. <sup>7</sup>Ero, niga ifotirai omoimo illana Jusiñamui jiai uiñote. Naimiedi omoina sedajana jiai uiñote. Silliñiai bafemo Jusiñamui isiruigaomoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

**Jesús naimiena janoñenana llofuia rafue**  
(Mt. 10.32-33; 12.32; 10.19-20)

<sup>8</sup>Ie llofueoicaiganomo Jesús nia llote:  
—Cue rafuena omoi lluamona, jiaino omoina duere finoitimaci. Cuena birui omoi janoñenia, nana comini Jusiñamui jaienisai uicomodo i ico ia, nainomo omoina janoñeitucue. “Cue comindomoi” omoina raiticue. <sup>9</sup>Cuena birui omoi janoia, nana comini

Jusiñamui jaienisai uicomodo i ico ia, nainomo omoina janoiticue. “Cue cominiñedomoi” omoina raiticue. <sup>10</sup>Jusiñamuidi naga cuena jeare ñaitimie jeacinona feitarede; iadedi Jusiñamuidi ie Joreñona jeare ñaitimie jeacinona feitañeite. <sup>11</sup>Cue rafuena omoi llua muidona, duere sefuitomoi. Illaicomini dine omoina llogidollena comini uia, omoi abi riidollicinomo omoi comeciaina jarire facañeno. <sup>12</sup>Naie facaiseconi Jusiñamui Joreño omoi abi riidollicinona uiñotaite.

**Jesúdi raruiai eo uamona abi rairuillana llofuia rafue**

<sup>13</sup>Nainomo ite cominimona damie Jesúmo llote:

—Maestro, cue moo jai fiodailla mei, cue ama doforamie cue facaina ite rana cuemo iacaiñede. Naimiemo llono, cuemo illena.

<sup>14</sup>Jesús uai ote:

—Juezñedicue. Bie isoide rafue cuemo duiñede.

<sup>15</sup>Ie ecimo itinomo llote:

—Ero, rana nicidoñeno. Ailluena ra omoimo illamona, Jusiñamui illanomo riñetomoi. <sup>16</sup>Iena omoi raise uiñollena, jiaie rafuedo iena lloitucue.

Ucuberedimiedi ie illimona ailluena rana ote. <sup>17</sup>Ie jira comecina facade: “Cue illimona ailluena rana oticue; iadedi ¿nynom iena eenoitucue? <sup>18</sup>Birui cuemo ite eenoracona judaiitucue. Ie mei aillue eenoracona finoiticue. Nainomo cue rana eenoitucue”. <sup>19</sup>Ie comecina facaite: “Cuemo ailluena ra jai ite. Diga años nia iiticue. Jamai iiticue. Marena guiticue. Caimare iiticue”.

<sup>20</sup>Iese comecina facade; iadedi Jusiñamui naimiemo llote: “Abi uiñonédio. Cue llua jira, ja naiona fiodaitio. Ie mei omo ite ra omo fiebiñeite”. <sup>21</sup>Dama ramo ie comecina

bu facaia, Jusiñamui jitaillacinomo ie comecina bu facañenia, faifite.

**Jesúdi Jusiñamui cai sedajana llua rafue**  
(Mt. 6.25-34)

<sup>22</sup>Ie llofueoicaiganomo Jesús llote:  
—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. <sup>23</sup>Jusiñamui omoina itataja muidona, guille omoimo iite. Naimie omoi abi finua muidona, iniroidi omoimo iite. <sup>24</sup>Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoina canoite. <sup>25</sup>Omoimona, ¿bu ie comeci jarire facajamona a sairite? Iese jaca buna a sairiñede. Dama Jusiñamui omoina a sairitate. <sup>26</sup>Omoi comeciaina facajamona omoi a sairiñena jira, jiae ramo omoi comeciaina jarire finoñeno. <sup>27</sup>Safiamo omoi comeciaina faca. ¿Niese sicodimaci? Maijiñedimaci. Iniroina tiforiñedimaci; iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide. <sup>28</sup>Jusiñamui safiana ebretocabide. Dallu facaise illanona, safiadi duide. Safia baifemo omoi uailla jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena iino. Jusiñamuina eo janore iñotomoi. <sup>29</sup>Omoi comeciaina jarire icana jaiñeno. “¿Buena guiticai?” raiñeno. Iemo comeciaina eo facañeno. <sup>30</sup>Jusiñamuina iñoñedino iemo comecina

facacabidimaci. Nana omoi jitaillacinona omoi Moo Jusiñamuidi uiña jira, naimaci isoi iñeno.

<sup>31</sup>Jusiñamui jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemonia guille omoimo Jusiñamui iite. Iniroi omoimo jiai iite.

**Jesúdi Jusiñamuimo comecina facaja rafue**  
(Mt. 6.19-21)

<sup>32</sup>Jesús llote:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoina itatajamona, omoina sedaita. <sup>33</sup>Omoi raruiaina fecajanona, ucubena dueredinomo feca. Sabiñete bolsana ono, omoi ra faifi raillano. Monamo omoi ra illa isoi ñaiticue. Monamo omoi ra illa isoi, iena faifiñetomoi. Fiirraima nainomo jaiñede. Giireco nainomo jiai iñede. <sup>34</sup>Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

**Jesús ie abido billemo ocuirillana llofuia rafue**

<sup>35-38</sup>Jesús nia llofuetate:

—Monamona ico cue abido billemo ocuir. Iena omoi raise cacaillena, bie rafuedo iena lloitice. Damie ie nabai ie ai ua rafue dine naiona jaide. Ie mullaiai naimie abido billemo ocuirillana ocuide. Naimie billemo naimaci raise ocuria, iniroina jitajanona, lamparíniai unianona, ocuiritimaci. Iese naimaci ia, nasena naimie tuia, iena raire econoitimaci. Nie hora naimie abido bia, naimiena naimaci iñeneno ocuria, ieri naimie iobite. Iobillamona, mullaiana naimie itena, mesamo naimacina ecaite. Naimie

bille hora naimaci uiñoñena jira, jaca ocuricana naimaci illa.<sup>39</sup> Ero, fiiriraima bille facaiseconi jofo namadí uiñotena, nia caadote, ie ra faifi raillanona.  
<sup>40</sup> Monamona ico abido biiticue. Omoi ocuririñena facaisemo biiticue. Ie jira cue billemo raise ocuiri.

**Jesúdi patrón ie mullaimana ie jofona sedataja llua rafue**  
*(Mt. 24.45-51)*

<sup>41</sup> Ie como lloga rafuena cacajano, Jesúmo Pedro jicanote:  
 —¿Bumo bie rafuena llotio? ¿Caimo llotio? ¿Nana cominimo?  
<sup>42</sup> Uai ote:

—Bie isoide cominimo lloticue. Ie mullaiaimona patrón damiena fetode, ie jiae mullaiaina sedallena. Naimacina sedajanona, naimie naimacina jiae ecade.<sup>43</sup> Ie mei patrón oni jaide. Jofomo abido naimie bia, ie nanoca mullaima raise maijiana fidii, naimiena raise ibaite.<sup>44</sup> Iobillamona, nana ie raruiaina sedataite;<sup>45</sup> iadedi naie mullaima maraiñenia, comechina facaite: “Cue patrón are biñeite. Jiae rafuena finoiticue”. Ie comechina iese facaja jira, naimie anamo ite mullaiaina faite. Ie jitilla rafue finuamona, jifairuidino diga jirocabite. Naimacina nabailamona, naimaci diga guite. Naimaci isoi jearede rafuena finoite.<sup>46</sup> Ie ocuiriñena facaise ie patrón abido billanona, naimiena meinetaite. Ie uaina iinoñedino isoi, duere finoite.<sup>47</sup> Naie mullaima ie patrón jitilla rafuena finuana uiñote; iadedi iena finoñede. Ie jira eo duere sefuite;<sup>48</sup> iadedi maraiñede rafuena raise uiñoñeno jiae mullaima finoia, janore duere sefuite. Ie isoide. Jusiñamui rafuena raise uiñotino iedo raise jaiñenia. Jusiñamui naimacina eo duere finoite. Iena janore uiñotino iedo raise jaiñenia, Jusiñamui

naimacina janore duere finoite. Iese omoimo suiñellena, mare mullaima isoi, Jusiñamui jitillacino finocana omoi jai.

**Jesús muidona nana cominiuri iñena rafue**  
*(Mt. 10.34-36)*

<sup>49</sup> Jesúl llole:

—Cuena naimaci iinollena, eniruemo comini dine biticue. Cuena dajerie iinuamona, cue cominina jaitimaci. Cuena jiaino iinoñenamona, cue cominina jaiñeitimaci. Iemonia cominina duere finoiticue. Cue maijia raire fuiduana jitaidicue.<sup>50</sup> Cue nia eo duere sefuiticue. Iena raire suillena jitaidicue.

<sup>51</sup> Nana cominina uri itatallena eniruemo biñedicue. Cuena iinoñedino cuena iinotinona enoitimaci. Enoillamona, cuena iinotinona duere finoitimaci.<sup>52</sup> Cue billamona, daje jofomo itino diese danomo iñeitimaci. Dabecuero comini nainomo ia, menamie cue dibeimo iite. Daje amani cue dibeimo iñeite. Iese iñenia, daje amani cue dibeimo iite. Mena cue dibeimo iñeite.<sup>53</sup> Cue lloga rafuena damierie iinua muidona, ie moo illa dibeimo ie jito iñeite. Ie jito dibeimo ie moo iñeite. Ie ei illa dibeimo naiñaiño jisa iñeite. Ie jisa dibeimo ie ei iñeite. Ie jifaiño illa dibeimo ie miodi iñeite. Ie mio dibeimo ie jifaiño iñeite. Iese cominina uri itatañedicue.

**Jesúdi monamo ite rana llofuia rafue**

*(Mt. 5.25-26; 16.1-4; Mr. 8.11-13)*

<sup>54</sup> Cominimo Jesúl dane llole:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi ciua meinomo, ua noci deide.<sup>55</sup> Bie eniruemo beici dinena aifi bia: “Eo ecasiite” raicabitomoi. Iese aifi bia, ua eo ecasite.<sup>56</sup> Abina

uiñotinona abi caitadinodomoi. Monamo eruällamona, rafue suillana uiñotomoi; iadedi omoi ecimo suiacalle rafuena raise uiñoñedomoi. Cue lloga rafuena raise cacaiñedomoi.<sup>57</sup>Iemo omoi comeciaina raise facañedomoi. <sup>58</sup>Ero, omoina bu llogidoia, juez dine nia omoi riñenia, omoina llogidotimie diga naie rafuena raise fino. lena raise finoñenia, juez dine omoi ria, nainomo duere sefuitomoi. Calabozomo omoina jonetaite. <sup>59</sup>Nana raise iñañenia, juez llua isoi, jino jaiñeitomoi. Ie isoide. Cue rafue omoi cacajamona, naimiñemona duere sefuiñellena, Jusiñamui diga omoi rafuena raise fino.

**Jesúdi comeciai iuai  
meiduana dana llua rafue**

## **13** <sup>1</sup>Cominina Jesús nia llofuetemo, jiae comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainañaina fatimaci, Jusiñamuina naimaci sedallena. Ie facaiseconi Pilato railla gobernadordi soldaduaina orede, naie cominina fallena.

<sup>2</sup>Jesús uai ote:

—¿Niese comeciaina facadomoi? “Bie comini iese duere sefuilla jira, jiae Galilea comini baifemo jeacinona finodimaci” comeciaina facadomoi. <sup>3</sup>Iese omoi comeciaina facañeno; ia omoi comeciai iuai meiduamo comeciaña faca. Omoi comeciai iuai omoi meidoñenia, omoidi jiae fafitomoi.

<sup>4</sup>Siloé railla tidacana navui ana goillamo, dieciocho digamie saitabidimaci. Iena fididomoi. ¿Niese naimacimo omoi comeciaina facadomoi? “Nana Jerusalémo ite comini baifemo jeacinona finodimaci” comeciaina facadomoi. <sup>5</sup>Iese omoi comeciaina facañeno; ia omoi comeciai

iuai meiduamo comeciaina faca. Omoi comeciai iuai omoi meidoñenia, omoidi jiae fafitomoi.

**Jesúdi ie Moo comini comeciai  
iuai meiduamo fecuisse ocurilla  
llua rafue**

<sup>6</sup>Iena comini raise uiñollena, Jesús bie rafuena llote:

—Damie ie illimo higuera railla riarana rite. Sicua mei, riara ollena jibuisaide; iadedi nia llisiñede. <sup>7</sup>Ie jira ie illina sedaraimamo llote: “Ero, daje amani años bisoidicue, riarana ollena. Nia llisiñede. Iena mai tie. Naie illanomo jiae riarana coco rillesa”. <sup>8</sup>Ie illina sedaraima uai ote: “Dama ite. Daje año nia seda. Riara abina caigiiticue. Eniruena caimaretatiticue. <sup>9</sup>Jiae año llisia, mare. Llisiñenia, iena tietiticoco”. Ie isoide. Jusiñamui omoi comeciai iuai meiduamo are ocurire; ia meidoñenia, omoina duere finoite.

**Jesúdi jiiçaidiñaiñona  
jillotaja rafue**

<sup>10</sup>Jiairuido sábadoruimo judíuai ofiracomo Jesús llofuite. <sup>11</sup>Nainomo duidiñaiñodi ite. Janaba anamo naiñaiño illa jira, naiñaiño jiiçaidé. Atona naidainide. <sup>12</sup>Naiñaiñona Jesús ciuanona, naiñaiñomo llote:

—Ñoo, o duicomona jai jillodio.

<sup>13</sup>—Ie mei naiñaiñona jetade. Ieconi naiñaiño atona naidadate. Ie jira Jusiñamuimo iobillacinona fecade.

<sup>14</sup>Naie ofiraco sedaraima icirite, sábadoruimo Jesús naiñaiñona jillotaja jira. Nainomo itinomo llote:

—Seis digarui ite maijillena. Nairuido omoi bi, omoi duicomona omoi jilloillena. Sábadoruimo biñeno. Sábadoruimo maijiñedicaí.

<sup>15</sup>Jesús uai ote:

—Maijijinedinona abi caitadinodomoi. Sábadoruimo maijicabidomoi. Sábadoruimo maijicabidomoi.

iruimo omoi toinaina imaci illanomona suiñodomoi, jinui illanomo naimaci jiruailena. Naie isoide majia omoimona mare. <sup>16</sup>Ie isoide. Bie riñodi Abraham micori comini. Omoi nairai iñaiño. Dieciocho años Janaba anamo jai illamona, duere sefuide. Naiñaióna canollena, sábado iruimo naiñaióna Taife anamona cue jillotaia, cuemona mare.

<sup>17</sup>Iena Jesús lluamona, nana naimie dibeimo iñedenodi meidaitimaci; iadedi jiae comini iobidimaci, diga mare rafue naimie finua jira.

**Jesúdi mostaza ido llua rafue**  
(Mt. 13.31-32; Mr. 4.30-32)

<sup>18</sup>Jesús jiae rafuena llote:

—Jusiñamui dibeimo comini jailla rafuena nia lloitice. Jusiñamui rafuena janore comini birui cacajamona, ailluena comini naimie cominina ico jaitimaci. <sup>19</sup>Jiae rafuedo iena omoimo lloitice. Mostaza railla ido eo janorede. Ie illimo damie iena rillamona, eo aillue riadaradi sicode. Ailluena jira, nainomo sillinjai jicaiciaina finodimaci.

**Jesús siritate rana llofua rafue**  
(Mt. 13.33)

<sup>20</sup>Jesús jiae rafuena llote:

—Jusiñamui dibeimo comini jailla rafuena lloitice. Jiae uaido iena omoimo lloitice. <sup>21</sup>Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

**Jesúdi Jusiñamui díne  
rille llua rafue**  
(Mt. 7.13-14, 21-23)

<sup>22</sup>Jesús diga nairaimo llofuecana jaide. Jerusalén díne jaide. <sup>23</sup>Jesús oni jaillanona, damie naimemo jicanote:

—Nama, ¿niga comini o uaina iinoitimaci? —Jesús uai ote:

<sup>24</sup>—Monamo cue Moo díne jaillé nasedi janorede isoide. Naie nasedo lliicana o jai. Ailluena comini naiedo jaiacanitimaci; iadedi fo jainitimaci.

<sup>25</sup>Naie jofo nama nase ibailla mei, ¿niese fo jaitomoi? Jino naidaillamona, nasena tutajanona, raitomoi: “Nama, o nase econo”. Naimie uai ote: “Omoina uiñoñedicue”. <sup>26</sup>Dane lloitomoi: “O diga navui guiticai. Cai illanomo llofuetio”; <sup>27</sup>iadedi naimie uai ote: “Omoina uiñoñedicue. Cue cominiñedomoi. Jeacino omoi comeximo nia illa jira, mai jai”. <sup>28</sup>Jusiñamui illanomo

Abraham micorina, Isaac micorina, Jacob micorina, nana Jusiñamui facaina lloraini micoriaina cioitomoi; ia omoi jino illamona, duere sef ullamona, eetomoi. <sup>29</sup>Diga comini Jusiñamui illanomo iitimaci. Ailluena judíuaindino naga nairaiaimona Jusiñamui illanomo biitimaci. Nainomo coninina caimare nabaitimaci. <sup>30</sup>Naga nairaiaimona Jusiñamui cominina jillotaredo. Cue rafuena cacadomoi; ia cue cominina omoi jaiacanía, abi iedofeno cuena iinocana omoi jailla.

**Jesús Jerusalémo  
itinomo llua rafue**  
(Mt. 23.37-39)

<sup>31</sup>Ie facaiseconi dajerie fariseuai comini Jesús díne billano raitimaci:

—Benomona mai o jai. Cai illaima Herodes ona meineiacade.

<sup>32</sup>Jesús uai ote:

—Herodedi eo jifueraima. Naimie díne jai. Naimiemo llono: “Janaba anamo ite cominimona Janabana oni oreocabidicue. Duidinona jillotacabiticue. Birui siño rafuena finocabidicue. Ico iese nia finoitice. Iese cue majijille fuite. <sup>33</sup>Nia oni jaiticue. Ailluena

Jusiñamui facaina lloraini micoriai nainomo jai fiodailla isoi, Jerusalémo cue rafue jiai raire fuite” llono.

<sup>34</sup>Jerusalémo itinomo comecina facajano, Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruiai sedaja isoi, diga icaiño cue anamo omoina uaidoicadicue; iadeci omoi dinena cuena jitaifedomoi. <sup>35</sup>Iemona Jusiñamuidi omoi illanona jai fañonocaide. Cue Moo dine jaiticue. Cue jailla mei, cuena cioñeitomoi. Ico cue abido bia, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

**Jesúdi abina siridimiena  
jillotaja rafue**

**14** <sup>1</sup>Jiairuido sábadoruimo Jesúdi fariseo imie jofomo guisaide. Naie fariseo imiedi illaicomini. Nainomo itino Jesúmo eo eruaídrami. <sup>2</sup>Guille facaise naie jofomo duidimie bite. Naimie abina siridimie. <sup>3</sup>Nainomo itinomona damieriedi fariseuai comini. Moisés micori llogacinuaina llofueraini jiai itimaci. Naimacimo Jesús jicanote:

—Sábadoruimo comena cue jillotaia, ¿omoimona jeacino finodicue? ¿Niese Moisés micori llogacinuai iena llote?

<sup>4</sup>Uaina oñedimaci. Ie jira Jesús duidimie onollina llinuamona, naimieni jillotate. Ie mei naimieni jino orede. <sup>5</sup>Nainomo itinomo llote:

—Sábadoruimo majjicabidomoi. Sábadoruimo omoi jurareta pozomo uaidena, iena jillotallena, nairuimo iena ari otomoi. Omoimona naie isoide majjia mare. Bimieni cue jillotaja jira, ¿niese cuena jeare ñaitomoi? <sup>6</sup>Iena cacajanona, uainicaidimaci.

**Jesúdi guillena uaidoganona llua rafue**

<sup>7</sup>Jesúdi naimaci guisaibillana ciode. Jiaino baifemo illena, jofo nama abimo nana raiacadimaci. Iena ciuamona, naimacimo Jesús rafuena llofuete:

<sup>8</sup>—Rafue dine guillena omoina bu uaidoia, jofo nama abimo rañeno, omoi baifemo itimie bi raillano. <sup>9</sup>Jofo nama abimo omoi raia, omoi baifemo itimie bia, jofo nama omoimo lloite: “Bimiemo omoi raillanona feca”. Meidaillanona, oni rainadaitomoi. <sup>10</sup>Ie jira rafue dine omoina uaidoia, naie jofomo omoi ria, oni rai. Ie mei jofo nama jitaia, omoimo lloite: “Cue abimo rai”. Ie mei nana naie itino omoi iobillana citoimaci. <sup>11</sup>Ie isoide. Jusiñamuidi jiaimie afemo iacadimieni jiaimie afemo iñenana itataite. Jusiñamuidi jiaimie afemo iacaiñedimieni jiaimie afemo itataite.

<sup>12</sup>Naimieni uaidotimieno Jesús llote:

—Guille rafuena o finoia, naga icaiño o nabaiñiaina uaidoñeno. Naga icaiño o cominina uaidoñeno. Naga icaiño o ecimo itino ucuberedinona uaidoñeno. Naimacina o uaidotiona, jiairuido guillena ona uaidoimaci, naie iba o ollena; <sup>13</sup>ia rafuena o finoia, dueredinona uaido. Nuja-ñujacaida macaritinona uaido. Uisinidinona uaido. <sup>14</sup>Naimacimona iba ico o oñenamona, Jusiñamui ona caimare itataite. Jiairuido fiodaillamona mareuidino jilloia, monamo Jusiñamui ona ibaite.

**Jesúdi ailluena guille finoica  
rafuena llua rafue**

<sup>15</sup>Jesús abimo itinomona Jesús lluana damie cacajano, raite:

—Monamo Jusiñamui illanomo itimiedi marena iite.

<sup>16</sup>Jesús uai ote:

—Iena omoi raise uiñollenia bie rafuena lloitice. Damie aillue rafuena

finode. Ailluena cominina uaidote. <sup>17</sup>Rafue illaruimo ie mullaimana orede, cominina dane uaidollena. Raite: "Mai bi. Nana guille finuadi jai fuite"; <sup>18</sup>ia biacaiñedimaci. Damie llote: "Eniruena como ibadicue. Iena jibuisaiacadicue. O rafuemo jaiñeiticue. Le jira cue joreñona iciñeitiosa". <sup>19</sup>Jaimie llote: "Diez diga juraretana como ibadicue. Naimacina jibuisaiacadicue. O rafuemo jaiñeiticue. Le jira cue joreñona iciñeitiosa". <sup>20</sup>Jaimie llote: "Riño como oticue. Ie jira o rafuemo jaiñeiticue". <sup>21</sup>Ie nama dine naie mullaima abido jaide. Comini biacaiñenana llote. Iena cacajano, rafue namadi icirite. Le mullaimamo llote: "Cai nairai naisonaa jai. Dueredinona uaido. Ñuja-ñujacaida jaidinona uaido. Uisinidinona uaido". <sup>22</sup>Ie mei naie mullaima jaide. Abido naimie bia, ie namamo llote: "O lluana finodicue. Ailluena comini jai bitimaci. O jofomo illino nia ite". <sup>23</sup>Rafue namadi uai ote: "Naisomo itinona bene atíllena, cue jofona oruitallena, cai nairaimona jino jai. <sup>24</sup>Cue nano uaidogano cue guillena guiñeitimaci". Ie isoide. Jusiñamui rafuena feiñotino monamo Jusiñamui illanomo ico iitimaci; ia naimie rafuena jitaiñedino nainomo ico iñeitimaci.

**Jesúdi naimie llofueganona  
jaiacadino rafue**

<sup>25</sup>Naie facaise ailluena comini Jesús diga jai jaisoidimaci. Naimacimo llote: <sup>26</sup>—Cue llofuegamienja jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruiai baifemo isiruilla. Cuena ie amatiai baifemo isiruilla. Cuena ie miriñotiai baifemo isiruilla. Cuena ie abi baifemo isiruilla. Iese cuena isiruiñenia, cue llofuegamienja raise jainide. <sup>27</sup>Cue llofuegamienja bu jaillamona, duere

sefuicana jaite. Nibai naiemona fiodaite. Bu iese jaiacaiñenia, cue llofuegamienja naimie raise jainide.

<sup>28</sup>Ero, jiaie rafuedo iena lloitice. Jofona bu finoacania, ie ucubena bailla diese uiñollena: "¿Niga raifite?" comecina nano facade. <sup>29</sup>Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci. <sup>30</sup>Raitimaci: "Ie jofo finua tainede; iadedi fuidonide".

<sup>31</sup>Ero, jiaie rafuedo iena lloitice. Illaima jobaimena finoacania, nano comecina facade: "Cuemo ite diez mil soldaduai. Cue bacauaimo ite veinte mil soldaduai. ¿Niese emodofiticue?" Comecina facaja mei: "Emodofineiticue" naimie comecina facajia, <sup>32</sup>nia are naimie bacauai ia, daguelli uicodo orede, ie fairiconi diga ñaillena. Raite: "Jobairiacaiñedicie; ia o diga bie rafuena raise finoacadicue". <sup>33</sup>Biembo comecina omoi faca. Ie raruiaimo bu comecina eo facaia, cue llofuegamienja jainide.

<sup>34</sup>Sal mare; iadedi ie caimano jai iñenia, ¿dane niese nibaïamona caimarenite? <sup>35</sup>Jai maraiñede. Eniruemo jonegadena, jiai maraiñede. Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue lluamo cacarei. Iena iino.

**Jesúdi naimiena iiñotinomona  
damie failliana jitaiñena rafue  
(Mt. 18.10-14)**

**15** <sup>1</sup>Naimaci bisoilla isoi ie rafuena cacaillena, diga gobierno ucubena oraíni Jesús díne ofidimaci. Jusiñamui illogacinona raise jaiñedino jiai ofidimaci. <sup>2</sup>Iena ciuano, fariseuai cominidi, Moisés micori illogacinuaina llofueraini diga, Jesús joreñona ñaitimaci:

—Bimie maraiñedicinona finorainina feiñote. Naimaci diga jiai guite.

<sup>3</sup>Naimaci ñianaui uiñuanona, Jesús naimacimo bie rafuena llote:

<sup>4</sup>—Omoimona damíemo cien toica llaudaiai nibai ite. Naimacimona daje feiraite. Ie noventa y nueve llaudaiaina fainonocaida, iena jenuaite, ie baille dinori. <sup>5</sup>Baillanona, ie fecanicomo rocanocaida, iobicana biite. <sup>6</sup>Jofomo naimie ria, ie nabaiñaina uaidoite. Ie ecimo itinona jiai uaiduanona, raite: “Cue diga iobi. Cue feiraite llaudana jai baiticue”. <sup>7</sup>Ie isoide. Cue rafuena cue lluamona, damie ie comeci jeacinona fainonocailamona, ie comeci iuai meiduamona, monamo itino eo iobitímaci; iadedi noventa y nueve comini marena illamona, janore iobitímaci.

#### Jesúdi faifide ucubena bailla llua rafue

<sup>8</sup>Jesús llote:

—Jiaie rafuena omoimo lloitice. Dañaiñodemo diez diga ucube ite. Naiemona daje ucube naiñaiño faifia, lamparín unianona, ie jofona gallaite. Eo jenoite, ucube ie baille dinori. <sup>9</sup>Iena naiñaiño baia, ie nabaiñaina uaidoite. Ie ecimo itinona jiai uaiduanona, raite: “Cue diga iobi. Cue faifide ucubena jai baiticue”. <sup>10</sup>Ie isoide. Cue rafuena cue lluamona, damie ie comeci jeacinona fainonocailamona, ie comeci iuai meiduamona, Jusiñamui jaenísaí eo iobidimaci.

#### Jesúdi damie ie moo fainonocaila llua rafue

<sup>11</sup>Jesús llote:

—Jiaie rafuena omoimo lloitice. Damiemo mena jito ite. <sup>12</sup>Ie moomo jamamie llote: “Moo, o fiodailla mei, o raruiaimona janore feiñoitice. O

fiodaillana sedaacañedicue. O raruiaina cue facaina birui jitaidicue. Cuemo ine”.

Ie jira ie moo naimiemo fecade. <sup>13</sup>Ie mei nano nie dinori illamona, nana ie raruiai iraianona, jiaie eniruemo jaide. Nainomo ie ucube jamai buruemo faiaide. <sup>14</sup>Nana naimie ucube fuidua facaise, naie eniruemo guille iñede.

Aime guitimaci. Naimie jiai aime guite.

<sup>15</sup>Ie jira nainomo ite patrón dine maijiaide. Naie patrón ie chanchuaina sedallena naimiena orede. <sup>16</sup>Naimiena jaca buna ecarainina jira, chanchuai guillemona guiacade. <sup>17</sup>Iese naimie duere sefuilla jira, ja muidomo abina uiñocaillamona, comecina facade: “Cue moo jofomo nana naimie mullaiai raise guitimaci. Guille fiebicabite; iadedi bene aimeri fiodaiticue. <sup>18</sup>Cue moo dine abido ja jaiticue. Naimiemo lloitice: Jusiñamuimo jeacinona finodicue. Omo jeare jiai finodicue. <sup>19</sup>Odi: ‘Cue jito’ cuena raiñeno. O mullaiai illa isoi, cuena abido feiño”. <sup>20</sup>Ie facaise ie moo dine jai jaide. Nia aare naimie ia, ie moo naimiena ciode. Ie jitona duenallanona, naimie dine aside.

Naimiena caimadote. Jiai llabanote. <sup>21</sup>Ie jito naimiemo llote: “Moo, Jusiñamuimo jeacinona finodicue. Omo jeacino jiai finodicue. Odi: ‘Cue jito’ cuena raiñeno”. <sup>22</sup>Ie moo iena cacajano, ie mullaiaimo llote: “Cue jitona naimie eruaillena, eo mare iniroina ati, naimie jitallena. Cue jitona naimie illa jira, iena jitallena, anillona ati. Naimie jitallena, zapatona jiai ati. <sup>23</sup>Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena finoiticai. <sup>24</sup>Navui cuemonia cue jito fiodaite isoide. Caje cuemo dane abido rilla. Navui cuemonia naimiedi faifide; iadedi birui naimiena dane ciodicue”. Naimie llua isoi, rafuena finodimaci. <sup>25</sup>Naie facaise nano

doforamie illimo ite. Jofomo abido naimie bia, comini iraisillana cascade. <sup>26</sup>Daje mullaímana uaiduanona, naie rafuena jicanote. <sup>27</sup>Naie mullaíma uai ote: “O ama abido jai bite. O ama ramo jiriñeno abido billa jira, o moo ie janoreta farediretana jai fatatate”. <sup>28</sup>Iena cacajano, icirite. Fo jaiacaiñede. Ie jira ie moo jino bite. Naimiena fo uaidote. <sup>29</sup>Ie moomo llote: “Ero, diga años o diga maijidicue. O uaina jaca iinoticue; iadedi cue nabaiñiai diga, rafuena cue finollena, chivo cuemo jaca fecañedio. <sup>30</sup>O jito jamamie ie ucube callirediñainuaímo fuidode; iadedi abido naimie billano, naimie facaina janoreta farediretana fatatatio”. <sup>31</sup>Ie moo uai ote: “Moo, nagarui cue diga itio. Nana cue radi oienite. <sup>32</sup>Cuemona o ama navui fiodaite isoide; iadedi naimiena dane ciodicue. Naimie navui faifide raiticue; iadedi caje cuemo dane abido rilla. Cue iobillanona rafuena finodicue”. Bie rafuemonia omoi fueollena, iena jai lloticue —Jesús llote.

**Jesúdi patrón ie mullaíma finoca  
rafuena llua rafue**

**16** <sup>1</sup>Ie llofueoicaiganomo Jesús jiae rafuena llote:  
—Ucuberede patrón ie mullaímana ie rana sedatare. Naie patrón eneno oni illanona, ie mullaíma ie rana raise sedañenana fidide. <sup>2</sup>Naimiena uaiduanona, naimemo jicanote: “¿Maraíñede o finoca rafuena niese fididicue? Omo ite cuentas cioacadicue. Cuemo ati. Cue diga jai maijíñeitio”. <sup>3</sup>Iena cacajano, naie mullaíma comecin facade: “¿Niese nibaiiticue? Cue nama cuena jai dotaacade. Maijiana ocuinidicue. Jiae cominimona ucube jamai jicajana meiruiticue. <sup>4</sup>Cue finuana jai uiñoticue. Naimaci jofomo comini cuena ico feiñollena cue dotaja mei,

nana cue patrón debedinona uaidoiticue”. <sup>5</sup>Ie jira naimacina uaidote. Damiemo jicanote: “¿Cue patrómo niga debedio?” <sup>6</sup>Uai ote: “Cien bidones raifi aceitunamona oga aceitena debedicue”. Naie mullaíma raite: “O rabemo jarire ja cueno: cincuenta bidones”. <sup>7</sup>Jiaimemo jicanote: “¿Niga debedio?” Uai ote: “Cien digagai trigo raifi debedicue”. Naie mullaíma dinena raite: “O rabemo ochentana cueno”. <sup>8</sup>Iena fidiano, naie mullaímamo ie patrón raite: “Jiairuido marena o illemo o comecin raise facadio. Eo abina uiñotimedio” raite. Ero, Jusiñamuina iinoñedinodi naimiena iinotino baifemo ra fecajana baitadimaci. <sup>9</sup>Naiemona omoi fueollena, omoímo lloitcue. Omoímo ite ra diga dueredinona cano. Iemonia omoi nabaiñiaina jaitimaci. Omoi fiodaia, omoi ra bene fiebrite; ia Jusiñamui illanomo naimaci diga omoi ia, naimacina birui omoi canuamona, nainomo omoína marena ñaitimaci. <sup>10</sup>Janore ra omoímo illamona, Jusiñamui facaina birui omoi raise maijiiia, ailluena ra omoímo itedena, Jusiñamui facaina jiae raise maijijitomoi. Janore ra omoímo illamona, maraiñede rafuena birui omoi finoia, ailluena ra omoímo itedena, maraiñede rafue nia jiae finoitomoi. <sup>11</sup>Omoímo birui ite ra diga Jusiñamui facaina omoi raise maijijenienia, naimiemona jiae rana feiñoñetomoi. <sup>12</sup>Omoi anamo ite ra diga Jusiñamui facaina omoi raise maijijenienia, Jusiñamui ie rafue omoímo itatañeite. <sup>13</sup>Mena patrones diga daruido buna jaca maijinide. Mena diga bu maijiacania, damiena jiaimie baifemo gaite. Ie gaiamie ocuica rana finoite. Jiaimie ocuica rana raise finoñete. Ie isoide. Raruiá ollemo comecin omoi eo facaia, Jusiñamui jitaillassinomo comecin raise facañetomoi.

**Jesúdi fariseuai comini  
diga dane ñaia rafue**

<sup>14</sup>Jesús llofuiana fariseuai comini cacajano, ucubena eo gaia jira, naimie uaina jamaidimaci. <sup>15</sup>Naimacimo Jesús llote:

—Omoi finoca rafuemona comini omoina: “Mare” raillana jitaidomoi; iadedi Jusiñamui omoi comeciai maraiñenana uiñote. Iese omoi illana Jusiñamui gaiñede. <sup>16</sup>Jusiñamui facaina lloraini micoríai cuegafuiaimona Jusiñamui rafuena cacacabidomoi. Moisés micorí cuegafuiaimona iena jiai cacacabidomoi. Juan Bautista micorimona naimie anamo omoi illana Jusiñamui jitallana cacadomoi. Jusiñamui dibeimo omoi comeciai iuaina meiduana cacadomoi. Iena jiai llocabiticue. Iena ailluena iinuamona, Jusiñamui dibeimo birui duere iacadimaci. <sup>17</sup>Mona enirue diga nia ia, nana Jusiñamui llogacínua suicana jaite.

**Jesús iima ie aina dotaja  
rafuena llofuiua rafue  
(Mt. 19.1-12; Mr. 10.1-12)**

<sup>18</sup>Jesús llote:

—Naga aina dotadimiedi, jiaiñaiñoollen, jeacinona jai finode. Dotacañaiñona bu oia, jeacinona jai finode.

**Jesúdi ucuberedimie iaimai  
Lázaro ie rafuena llua rafue**

<sup>19</sup>Jesús jiae rafuena llote:

—Cue llogacinona omoi raise uiñollena, bie rafue lloitice. Ucuberedimie ite. Eo mare iñiroina jitade. Eo caimare raise guicabite. <sup>20</sup>Naimie nasemo Lázaro raillamie jamai biide. Naimedi dueredimie. Efonaitimie. <sup>21</sup>Naimedi ucuberedimie guiga allamona guiacade; ia guiñede.

Jiconiaidi naimie efocaina mecabite.

<sup>22</sup>Ie mei naimie fiodaite. Jusiñamui cominina naimie illamona, Jusiñamui jaienaisi naimie joreño monamo Abraham micorí joreño illanomo uitimaci. Ucuberedimie jiai fiodaite. Comini naimiena raitimaci. <sup>23</sup>Jusiñamui cominina naimie iñenamona, naimie joreño iraimo jaide. Nainomo naimie duere sefuillamona, Abraham joreñona aarena ciode. Naimie ecimo Lázaro micorí ie joreñona jiai ciode. <sup>24</sup>Abraham joreñona uайдote: “Cue moo Abraham, cuena duenai. Lázaronal cue dine oreta, ie onocai diga, jinuina cue fuedo llocatallesa, cue fuedo manare jaillena. Bie iraimona jai eo llegi cacadicue”.

<sup>25</sup>Abraham joreñodí uai ote: “Moo, o illa dinori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefudio. <sup>26</sup>O dine Jainidicai. O enefebetuemo itio. Cai enefebetuemo jiai iticai. Caimona omoi dine bu jaiñellena, omoimona cai dine bu biñellena, iese ite”. <sup>27</sup>Ucuberedimie micorí joreño dinena uai ote: “Cue moo jofomo Lázaronal oreta. <sup>28</sup>Cuemo cinco amatiai ite. Naimacimo riire llollena, bie iraimo naimaci riñellena, naimiena oreta”. <sup>29</sup>Abraham joreñodí uai ote: “Naimacimo Moisés micorí cuegafuiai ite. Jusiñamui facaina jaie lloraini micoríai cuegafuiai jiai ite. Iemo naimaci comeciaina facallesa”. <sup>30</sup>Uai ote: “Iese lloñeno. Iemo comeciaina facañeitimaci; iadedi fiodaillamona jilluanona, naimaci dine bu jaia, naimiena iñoitimaci. Naimaci comeciai iuai meidoitimaci”. <sup>31</sup>Abraham joreñodi uai ote: “Moisés micorí cuegafuiai, Jusiñamui facaina jaie lloraini micoríai cuegafuiai naimaci iñoenia, fiodaillamona bu jilloia, naimiena jiai iñoenitimaci” —Jesús llote.

**Jesúdi jeacinona finoñenana  
llofua rafue**  
(Mt. 18.6-7, 21-22; Mr. 9.42)

## 17 <sup>1</sup>Ie llofueoicaiganomo Jesús llote:

—Diga ramo omoi faicana uitinomo riitomoi. Omoi ramo fajtimie duere sefuite. Jusiñamui omoi ramo fajtimienia duere finoite. <sup>2</sup>Como creyentena jaidimienia ramo bu faia, naimie címaiomo aillue nofici maianona, joraimo corobaillena naimienia dotacadena, mare. <sup>3</sup>Como creyentena jaidimienia ramo omoi faiñellena, abina omoi rairui. O ecimo itimie ona jeare finoia, naimiemo iena llono. Ie comecina meidoiacania, naimie jeareda finoca rafuena feita. <sup>4</sup>Nagarui diga icaiño ona jeare naimie finoia, naga icaiño o diga naimie marena dane ñaiacania, naie rafuena feita.

### **Jesúdi naimienia iiñuana llua rafue**

<sup>5</sup>Ie doce llofueoicaiganomo Jesús llote:  
—Ona iiñotici; ia caina o uaina eo iiñota.  
<sup>6</sup>Uai ote:  
—Jusiñamuina eo janore  
iiñotomoidena, bene ite amenamo omoi lloia: “Benomona jai. Joraimo sico”, naie amena omoi uaina iiñote.

### **Jesúdi ie facaina llofueoicaiganó maiñia llua rafue**

<sup>7</sup>Ie llofueoicaiganomo Jesús llote:  
—Bie rafuemona omoi fueollena, iena lloitice. Illimo ie mullaima maiñiamona, ie toiniai sedajamona jofomo abido naimie ria, ie patrón naimiemo lloñeite: “Mai nano guisaibí”;  
<sup>8</sup>jadedi naimiemo lloite: “Cueiena guillena nano fino. Cuena eca. Ie mei gütio”. <sup>9</sup>Naie mullaima ocuica rana finua muidona, mullaimana naimie illa

jira, ie mullaimamo patródi iobillacinona fecañeite. <sup>10</sup>Ie isoide. Nana cue lluana omoi finodomoina, dani omoi maijiadi, cue cominina omoi illa jira, cuemonia iobillacinona feiñoneítomoi.

### **Jesúdi diez efonaitinona jillotaja rafue**

<sup>11</sup>Jerusalémo ie llofueoicaiganano diga Jesús jaidemo, naimie nabeimo Samaria enirue ite. Naimie jarifebeimo Galilea enirue ite. <sup>12</sup>Nairai dñe naimie riacanía, diez efonaitinodi naimiemo dafaifidimaci. Eneno oni naidaidimaci.

<sup>13</sup>Naimienia ado uaidotimaci:  
—Jesús, Maestro, caina duenai. Caina ja jillota.

<sup>14</sup>Naimacina Jesús ciuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci. <sup>15</sup>Ie abí jilluana ciuano, naimacimona damie Jesús dñe abido bite. Jusiñamuimo iobillacinona ado fecade. <sup>16</sup>Naimiemo iobillacinona jai fecallena, Jesús uicomodo ana bitadate. Naimiedi judíuñedimie. Samaritano imie. <sup>17</sup>Jesús llote:

—Diez digamiedomoi. Omoina jai jillotaticue. ¿Ninomo jiañodi nueve digamie itimaci? <sup>18</sup>¿Niñese Jusiñamuimo iobillacinona feacaçaiñedimaci? Dama bimie fecade. Naimiedi judío imieñedimie.

<sup>19</sup>Jesús naimiemo llote:

—A naídada. Mai jai. Cuena o iiñua jira, jai jillodio.

### **Jesúdi Jusiñamui ie cominina sedajana llofua rafue** (Mt. 24.23-28, 36-41)

<sup>20</sup>Naie facaise fariseuai comini Jesús jicanotimaci:

—¿Niruido Jusiñamui caina bene sedaite?

Jesús uai ote:

—Siño rafuena omoi ciuamona, Jusiñamui omoina sedallená uiñoñetomoi. <sup>21</sup>Buena ciuamona raiñetomoi: “Jadi, Jusiñamui bene caina jai sedade”. “Jadi, batine caina jai sedade”; iadedi omoi motomo itinomona Jusiñamui dibeimo damierie illamona, Jusiñamui omoi motomo jai illana uiñoñitomoi.

<sup>22</sup>Ie llofueoicaiganomo llote:

—Jiaíruido duere sefuillamona cue diga janore jisa iacanitomoi; iadedi iese nia iñeitomoi. <sup>23</sup>Damierie raia: “Ero, batine Cristo jai bairede” nainomo jaiñeno. Naimaci raia: “Ero, bene Cristo jai bairede” iena iinoñeno. <sup>24</sup>Mona borillamona mona jillacidi usere ciode. Ie isoide. Cue abido bia, nana comini iena uiñoñitomací. <sup>25</sup>Birui iese nia suiñeite. Nano duere sefuiticue. Birui ite comini cuena jiaí feiñoñetimaci. <sup>26</sup>Abido cue billirui iairei ia, Noé micori facaiseconi itino isoi, comini iitimaci. Naimaci duere sefuillemo Noé micori facaise itinodi comeciaina facañedimaci. <sup>27</sup>Naie facaiseconi nia eo nocí deiñenia, Noé micori ecimo itino naimaci isoilla isoi icana jaidimaci. Jamai guicana jaidimaci. Aína ua mei, inina ua mei, jebuicana jaca jamai jaidimaci. Dani iemo comeciaina facauqidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. Nia nocí deiñenia, Noé micori lloga uaina iinoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. <sup>28</sup>Lot micori facaiseconi daje isoidimaci. Jamai guicana jaidimaci. Aína ua mei, inina ua mei, jebuicana jaca jamai jaidimaci. Rana ibauqidimaci. Iena fecauqidimaci. Illimo maijiuidimaci. Jofona finouqidimaci. Naimaci isoilla isoi icana jaidimaci. <sup>29</sup>Dani iemo

comeciaina facadimaci. Jusiñamuimo comeciaina facañedimaci. Iese icana jaidimaci, Sodomamona Lot micori jailla dinori. Nairui monamona boode azufre ebena billanona, nana Sodomamo itino jobaide. Ebena nana fafidimaci. <sup>30</sup>Ie isoide. Abido cue billiruimo comini iitimaci. Cue bia, ebena biiticue. <sup>31</sup>Naie facaise bu ie jofo emodomo ia, ie raruiaina ollena, naimie diga uillena, bu fo jaiñena. Illimo bu ia, ie raruiaina ollena, ie jofomo bu jaiñena. <sup>32</sup>Iemonia fueollena, Lot ai micori rafuemo comeciná faca. Naiñaiño ie raruiaimo daño comeciná facajamona, na ie abi diga faifide. <sup>33</sup>Dama ie raruiaimo ie comeciná bu facaia, ja muidomo fafite. Cue diga jaca iñeite; iadedi cue jitaillacina finuamo ie comeciná bu facaia, monamo cue diga jaca iite. <sup>34</sup>Cue bille facaise menamie daje cuartomo iniano iitiiaimaiai. Damie jaite. Jiaimie fiebite. <sup>35</sup>Mena riño danomo doberillanona iitiiañuui. Dañaiño jaite. Jiañaiño fiebite. <sup>36</sup>Menamie illimo maijiano iitiiaimaiai. Damie jaite. Jiaimie fiebite.

<sup>37</sup>Ie llofueoicaiganomo jicanotimaci:

—¿Nine jaitimaci?

Uai ote:

—Urujaisai rifaide ramo ofillana uiñaua isoi, nana cuena iinotino cue abido billena uiñoñitomací. Cuemo duillamona, cue diga jaitimaci.

Jesúdi feciñona llua rafue

## 18 <sup>1</sup>Ie llofueoicaiganomo Jesús rafuena dane llote:

—Jusiñamuimo jiicabi, omoi jicaca rafue omoi feiñolle dinori. Raire feiñoñenia, abina jafueñeno. <sup>2</sup>Iena omoi raise uiñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jiaí jaciruiñede. <sup>3</sup>Nainomo naimie dine daje feciño

jai-jaicabillanona, raite: "Cuena duere finodimiemona cuena cano".<sup>4</sup>Naimie dinena raite: "Dama iesede. Ona canoñeiticue". Ie mei ie comeccina facade: "Jusiñamuina jaciruiñedicue. Cominina jiai isiruiñedicue; <sup>5</sup>ia naiñaiño cuemo sefure bi-bina jira, naiñaiñona canoitcue, cue rairaifaiñellena".

<sup>6</sup>Jesús llote:

—Maraiñede juez lluana cacadomoi. Ja muidomo naiñaiñona canode. <sup>7</sup>Ero, biemo omoi comeciaína faca. Jusiñamui naie juez isoñede. Nagarui Jusiñamuimo naimaci jícaia, ¿niese naimie ie fetocanona canoñeite? Jaca canoite. <sup>8</sup>Raire fairiuanona, naimacina raire canoite; iadedi abido cue bia, ¿niga cuena iiñotino iitímaci? Nibai alluena cuena iiñofeitímaci.

#### Jesúdi Jusiñamuimo menamie jiaa llua rafue

<sup>9</sup>"Mareuidicai" dajerie railla jira, "Jiae comini baifemo faíticai" dajerie railla jira naimacimo Jesús bie rafuena llote:

<sup>10</sup>—Jusiñamui jofomo, nainomo jiñella, menamie jaidaimaiai. Damie fariseo imie. Jiaimie gobierno ucubena oraima. <sup>11</sup>Fariseo imie naidadacaída, dama anado jiide: "Jusiñamui, jiae comini isoñedicue. Fiidimaci. Maraiñedimaci. Naimaci aiñede riñó diga itimaci. Cue ecimo ite ucubena oraima isoi iñedicue. <sup>12</sup>Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite" jiide. <sup>13</sup>Gobierno ucubena oraima eneno naidadacaída, jiide. Monamo eruaiñede; iadedi jamai bue isoillanona, jogobena farode. Raite: "Jusiñamui, jeacínona finoraimadicue. Cuena duenai. Macaibaite" jiide. <sup>14</sup>Jusiñamuidi jiaimie afemo iacadimienaa jiaimie afemo

iñenana itataite. Jusiñamuidi jiaimie afemo iacaiñedimienaa jiaimie afemo itataite. Ie jira gobierno ucubena oraima ie jofomo Jusiñamuimona jai marebicaillanona jaide; ia fariseo imie iese jaiñede.

#### Jesúdi naimie dine uruiai billana jitailla rafue (Mt. 19.13-15; Mr. 10.13-16)

<sup>15</sup>Naie facaise Jesús dine comini naimaci eisaíaina atisite. Ie onollí naimacimo naimie joniana jitaidimaci. "Naimacina raise cano" ie Moomo llollena jitaidimaci. Iena ciuanona, ie llofueoicaigano cominina Jesús dine billana rairuidimaci; <sup>16</sup>iadedi Jesúdi eisaíaina uaiduano raite:

—Uruiai cue dine billesa. Naimacina rairuiñeno. Cuena bie isoi iiñotinodi Jusiñamui cominidimaci. <sup>17</sup>Bie uruiai abina iedoñedimaci. Einamacímona jamai bue isoidimaci. Naimaci isoi bu iñenia, Jusiñamui cominina jaiñeite. Jusiñamui naimienaa sedallena, Jusiñamui cominina naimie jaiñeite.

#### Ucuberedimie Jesús diga ñaia rafue (Mt. 19.16-30; Mr. 10.17-31)

<sup>18</sup>Ie facaise illaicominimona damie Jesúmo jicanote:

—Maestro, odi mareuidimedio. Jusiñamui diga ico monamo cue jaca illena, ¿nie isoide rana finoiticue?

<sup>19</sup>Jesús uai ote:

—¿Bue ñellena cuena: "Mareuidimedio" raitio? Dama damie mareuidimienaa. Naimiedi Jusiñamui. Naimieno jicanoo. <sup>20</sup>Moisés micori llogaciuaina iiñocana jai. Jaie cuete: "O aiñede riñó diga iñeno. Comena meineñeno. Rana fiñeno. Jiaimienaa o llogidoia, tainona lloñeno. O moo uaina iino. O ei uaina iino".

<sup>21</sup>Uai ote:

—Cue uruena illa facaisemona nana bie llogaciuaina iiñoticue.

<sup>22</sup>Iena cacajano, Jesús raite:

—Daje rana nia finoñedio. O raise marebicaiacania, omo ite raruiaina feca. Naie ucubena dueredinomo feca. Cuena o iiñuamona, monamo ico jaca iitio. Cue llofueoicaiganona o illena, mai cue diga bi.

<sup>23</sup>Jesús lluana naimie cacajano, sunaicaide. Naimiemo eo ailluena ra illa jira, iena feacaaciñede. <sup>24</sup>Naimiemo eruaillano, Jesús raite:

—Ucuberedinodi Jusiñamui cominina jaillena eo sefuiruite. <sup>25</sup>Igido ifodo camello jaca Jainide. Ie isoide. Ie ra isiruillamona, ucuberedimiedi Jusiñamui cominina jiai raise Jainide.

<sup>26</sup>Jesús lluana cacadino jicanote:

—¿Iemonia buca jillobiti?

<sup>27</sup>Jesús uai ote:

—Nana comini dani jillobnidimaci; iadedi Jusiñamuidi naimacina jillobitarede.

<sup>28</sup>Pedro raite:

—Ero, o llua isoi cai jofuena fainonocaida, o diga jaisoidicai.

<sup>29</sup>Uai ote:

—Uanaicinona lloticue: Jusiñamui cominina naimie jaillamona, ie jofona bu fainonocaia, ie aina bu fainonocaia, ie amatiaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia,

<sup>30</sup>Jusiñamuimona ailluena ibana birui feiñoite. Monamo ico jiai jaca iite.

**Jesúdi ie fiodaillena dane llua rafue**  
(Mt. 20.17-19; Mr. 10.32-34)

<sup>31</sup>Ie doce llofueoicaigano eneno uillanona, dani naimiemo llote:

—Ero, Jerusalémo jai jaidicai. Monamona billanona, iiñana jaidicue. Jusiñamui facaina lloraini cuena jaie cuetimaci. Nana naie rafue ja suite.

<sup>32</sup>Judíuainedinomo judíuai illacomini cuena fecaitimaci. Cueri jifanoitimaci. Cuena jeare finoitimaci. Cuena tuallaitimaci. <sup>33</sup>Cuena faitimaci. Cuena meineitimaci; ia darui amani illanona, cue fiodaillamona jilloiticue.

<sup>34</sup>Naimie lluana raise cacañedimaci. Naimacina iena Jesús nia raise llofueñena jira, iena raise uiñoñedimaci.

**Jesúdi uisnidimieno jillotaja rafue**  
(Mt. 20.29-34; Mr. 10.46-52)

<sup>35</sup>Jericó railla naíraimo ie llofueoicaigano diga Jesús riacademo, uisnidimie naiso fuemo raillana ciode. Ucubena jamai jica-jicade. <sup>36</sup>Ailluena comini Jesús diga jaillana naimie cacajano, naie cominimo nie isoide rafue illana jicanote. <sup>37</sup>Uai otimaci:

—Nazaret ie Jesús como bene bite.

<sup>38</sup>Ie jira naimie curioide:

—David micori Jitona o illamona, cuena duenai. Cuena cano.

<sup>39</sup>Uicodo jaidino naimiena lletade, naimiena lliicaitallena; iadedi naimie eo curioide:

—David micori Jitona o illamona, cuena duenai.

<sup>40</sup>Naimiena cacajano, Jesús naidadate.

—Cue dñe naimiena ati —llote. Naimiena atianona, naimiemo Jesús jicanote:

<sup>41</sup>—¿Niese ona cue nibaiana jitaidio?

Uai ote:

—Maestro, cioacadicue.

<sup>42</sup>Jesús raite:

—Mai eroda. Cuena o iiñua jira, jai jillodio.

<sup>43</sup>Ieconi naimie uisidi ciode.

Jusiñamuimo iobillacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiai fecadimaci.

**Jesús Zaqueo diga illa rafue**

**19** <sup>1</sup>Jericómo Jesús rillanona, nainomo macaritemo, <sup>2</sup>naie facaise nainomo Zaqueo raillamie ite. Gobierno ucubena nanoca oraima. Naimiedi eo ucuberede. <sup>3</sup>Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúna cionide. <sup>4</sup>Ie jira uicodo aiscana jaide, amenamo a jaillena, naimiena cioillena. <sup>5</sup>Naimie dine Jesús rillano, Zaqueomo a erodate. Naimiena uaidote:

—Zaqueo, raire ana bi. O diga danomo illena, o jofo dine jaiticue.

<sup>6</sup>Ie jira raire ana bite. Ie jofomo Jesúna iocire feiñote. <sup>7</sup>Lena jiaie comini ciuanona, Jesús joreñona jeare ñaianona raitimaci:

—Mariñedicinona finoraima jofomo naimie jaide.

<sup>8</sup>Jesúna naimie feiñua mei, Zaqueo Jesús ecimo naidaita, naimemo llote:

—Nama, atuedo cue raruiaina dueredinomo biruimona fecaiticue. Bumona navui cue fiiia, cuatro diga ra abido iiticue.

<sup>9</sup>Jesús uai ote:

—Iese o llua jira, o comini diga Jusiñamuina jai o iiunana uiñoticai.

—Jamai bitinomo llote:

—Zaqueodi Abraham micori jito; ia Jusiñamuina navui iiñoñede. <sup>10</sup>Naimie isoidino jillobitallena, biticue.

Monamona billanona, iimana jaie jaídicie. Jusiñamuina iiñoñedinona jenuaibidicue, naimacina jillobitallena.

### Illaima ie mullaiaímo ucubena fecaja rafue

<sup>11</sup>Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo

Jusiñamui ie cominina raire sedaite”.

<sup>12</sup>Iena naimaci raise uiñollena, Jesús bie rafue naimacimo llote:

—Illaima jito ie nanoca illaima dñe jiaie nairaimo jaide. Ie cominina sedallena, nanoca illaimamona ie uaina feiñiacade. Iemei abido biacade. <sup>13</sup>Nia naimie jaiñenia, diez diga ie mullaiaina uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide. <sup>14</sup>Ie comini naimiena enoidimaci. Jiaínona nanoca illaima dñe oretajano, raitimaci: “Bimie caina sedajana jitaiñedica”; ia nanoca illaima dinena naimaci lluana jaca cacaiñede. Ie jira naie nanoca illaima naie illaima jitomo ie uaina ite. <sup>15</sup>Ie uaina feiñua mei, abido ie eniruemo jaide. Rilla mei, ie mullaiaina uaidote. Nie diese ucubena ocana naimaci jaillana uiñoiacade. Ie jira naimacina uaidote.

<sup>16</sup>Nano bitimie raite: “Nama, o cuemo dabe fecadio. Dabedemona jai cuemo ite diez digabe”. <sup>17</sup>Naie illaima naimemo llote: “Eo marena maijido. Mare mullaimadio. Janore ra raise o sedaja jira, ona diez nairaiaina sedataiticue”.

<sup>18</sup>Ie mei jiaie mullaíma billanona, raite: “Nama, o cuemo fecaca dabedemona jai cuemo ite cinco digabe”. <sup>19</sup>Illaima llote: “Ona cinco nairaiaina sedataiticue”. <sup>20</sup>Ie mei jiaie mullaíma bite. Raite: “Nama, jadi, o cuemo iga o ucube. Íniroimo tilliano, iena eenoticue. <sup>21</sup>Ona cue jaciruillano, odi eo riimiena jira, iena jamai eenoticue. Jiaie cominimona ie rana bairocabidio. O maijíñena ramona ocabitio”. <sup>22</sup>Illaima dinena raite: “Eo maraiñede mullaimadio. Cuena o llua isoi, ona duere finoiticue. Cue riimienana uiñotio. Jiaie comini ie rana cue bairuana uiñotio. Cue maijíñena motomo ra cue uana uiñotio; ia buena maijíñedio. <sup>23</sup>¿Bue ñellena bancomo cue

ucube joneñedio? Bancomo itena, jiae ucubena ocana jaide. Ie mei abido cue bia, omo cue fecaja ucube baifemo feiñoticue".<sup>24</sup>Nainomo itinomo llote: "Naie ucube naimiemona bairuano, diez digabe itimimo feca".<sup>25</sup>Uai otimaci: "Naimiemo ailluena ucube jai ite. ¿Bue ñellena dane jiae fecaitio?"<sup>26</sup>Illaima dinena uai ote: "Ailluena raredimie jiae rana feiñonte; iadedi janore raredimie ie rana faifite.<sup>27</sup>Cuena enoidinona bene ati. Naimacina cue sedajana jitaiñedimaci. Naimacina meine".

Jesús nia llote:

—Ie isoide. Iese omoímo suiñellana, Jusiñamui ie comini sedalliruina omoi uiñoñena jira, cue jitillacino finocana jai.

#### **Jesús Jerusalémo jailla rafue**

(Mt. 21.1-11; Mr. 11.1-11;

Jn. 12.12-19)

<sup>28</sup>Naie rafuena llofua mei, Jerusalén dine comini uicodo ie llofueoicaíano diga Jesús jaide.<sup>29</sup>Jerusalén iaíreicaídem, mena nairaimo riacad. Betfagémo railla nairaimo ride. Betania nainomo jiai ite. Olivos railla anedumo naga nairai iaimaiai ite. Ie llofueoicaíganomona mena orede.  
<sup>30</sup>Raite:

—Bie nairai illa uicomai omico jai. Nainomo cuinaca burritona baitomico. Naie burrito emodomia nia buna jaírena. Iena suiñuano bene ati.<sup>31</sup>Omicomo: "¿Bue ñellena iena suiñodomico?" bu jicanoya, llono: "Coco Nama iena jitaida".

<sup>32</sup>Naimie llua isoi jaidiiaímaiai. Naimie llua isoi burritona baitiiaímaiai.<sup>33</sup>Ie facaise ie naniai iaimaíaimo jicanote:

—¿Bue ñellena cai burritona suiñodomico?

<sup>34</sup>Uai otiaímaiai:

—Coco Nama iena jitaida.

<sup>35</sup>Ie mei Jesúmo iena atidiiaímaiai. Burrito emodomia iniroina jobianona, ie

emodomia Jesúdi rainadate.<sup>36</sup>Jesús iese jaídem, naimieno iobitallen, illaima isoi naimie jaillena, comini imaci iniroi diga, naiso motomo jobedimaci.

<sup>37</sup>Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caimare itimaci. Nana Jesús siño finoca rafuena naimaci jai ciua jira, iena naimaci uibiñuamona, Jusiñamuimo iobillacina ado eo fecadimaci.

<sup>38</sup>Raitimaci:

—¡Cai Illaima billa! ¡Jusiñamui mamecido bitimiemo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

<sup>39</sup>Naie cominimona dajerie fariseuai raitimaci:

—Maestro, o diga jaidinona lliicaillena, naimacina lleta.

<sup>40</sup>Uai ote:

—Naimaci lliicaia, biso fuemo ite noficidi cuena marena ñaíte.

<sup>41</sup>Jerusalémo Jesús iaírei ria, iena ciuano, eede.<sup>42</sup>Raite:

—Jerusalén itino, Jusiñamui diga omoi uri illena jai biticue. Omoina naimie cominina itataiacadicue; iadedi iena jitaiñedomoi. Iena jitaidomoidena, ico duere sefuiñeitomoi.<sup>43</sup>Jairuido omoi bacauai jobaimena finuanona, omoina cirinoitimaci. Omoi ecido llaitimaci.<sup>44</sup>Omoina meineitimaci. Omoi uruiaina meineitimaci. Omoi illanona judaiitimaci. Jusiñamui omoi motomo birui illana omoi uiñoñena jira, iese omoímo suite.

#### **Jesúdi Jusiñamui jofomona damieriéna dotaja rafue**

(Mt. 21.12-17; Mr. 11.15-19;

Jn. 2.13-22)

<sup>45</sup>Jerusalémo Jesús rilla mei, Jusiñamui jofomo jaide. Jusiñamuimo

ofomaiaina fecallena, naimiemo toica llaudaiaina fecallena, nainomo comini jaisoidimaci. Naie comininá ibatajanona, ofomaiaina, toica llaudaiai diga, damierie fecauqidimaci. Iena cianona, naimacina jino oredé. <sup>46</sup>Raite:  
—Ie facaina lloraima micori Jusiñamui llogacino jaie cuega: “Cue jofo ite nainomo cuemo comini jiíllena” cuega. Ero, ailluena omoi ibataja jira, naimie jofona fiiruidino jofona omoi finoca.

<sup>47</sup>Jusiñamui jofomo nagarui Jesús llofuite. Judíuai illaicominiidi Jesúna meineiacadimaci; <sup>48</sup>iadedi niese nibaiñedimaci, nana comini naimie llofuiiana eo jitaila jira.

**Jesúdi ie siño uaina llua rafue**  
(Mt. 21.23-27; Mr. 11.27-33)

**20** <sup>1</sup>Jusiñamui jofomo Jesúdi cominina llofuite. Jusiñamui rafuena llofuite. Judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Diese billanona, <sup>2</sup>jicanotimaci:

—¿Nie isoide uaido o finoca rafuena finocabidio? ¿Bu omo iga uai diga o finoca rafuena finocabidio?

<sup>3</sup>Jesús dinena uai ote:

—Omoimo nano jicanoticue. <sup>4</sup>Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

<sup>5</sup>Dani coniniri iena siaduanona raitimaci:  
—“Jusiñamui” cai fairioia, caimo jicanote: “¿Bue ñellena naimie micorina iiñoñedomoi? ¿Bue ñellena naimie micori llua isoi bautizañedomoi?” <sup>6</sup>“Comini” cai fairioia, bene itino caina meineitimaci,

Juan micoridi Jusiñamui facaina lloraima naimaci railla jira.  
<sup>7</sup>Ie jira Jesús uai otimaci:  
—Uiñoñedicai.  
<sup>8</sup>Jesús dinena raite:  
—Ie muidona cuemo nie isoide uai illana omoimo lloñeiticue.

**Jesúdi maraiñede maijiraini  
rafuena llua rafue**

(Mt. 21.33-44; Mr. 12.1-11)

<sup>9</sup>Nainomo itinomo Jesús llote:  
—Jiae rafue omoimo lloitice. Iemo cacarei. Daje patrón uvas railla riaraiaina rite. Ie mei ibatajanona jiañomo fecade, iena sedallena. Ie mei jiae eniruemo are illena jaide. <sup>10</sup>Uvas jai einailla facaise riaraiaina sedaraini dine daje mullaimana oredé, naimie facaise iedinona naimie feiñollena; iadedi naie sedaraini naie mullaimana fatimaci. Uvas naimiemo fecañeno abido oredimaci. <sup>11</sup>Ie mei patrón jiae mullaimana oredé. Naimiena fatimaci. Jeare finodimaci. Uvas naimiemo fecañeno abido oredimaci. <sup>12</sup>Naie patrón jiaimiena oredé. Naimiena eo bofedaitajanona jino dotadimaci. <sup>13</sup>Iemei patrón começina facade: “¿Niese nibaiiticue? Cue isiruiga jitona oretaiticue. Naimiena nibai jaciruitimaci. Naimie uaina iiñoñitimaci”.

<sup>14</sup>Riaraiaina sedaraini naimiena cianona, coniniri ñaitimaci: “Bimieno bie illi fiebiite, naimie moo fiodailla mei.

Naimiena cai meinelli, bie illi caimo fiebillesa” ñaitimaci. <sup>15</sup>Naimiena jino dotajanona, naimiena meinetimaci. Iena fidia mei, ¿niese naie patrón nibaite?

<sup>16</sup>Naimie biite, naie sedarainina meinellena. Ie mei jiañona ie illina sedataite.

Naie rafuena cacadino raitimaci:  
—Bie isoide rafue suillana jitaiñedicai.

<sup>17</sup>Naimacimo Jesús eruallano, llote:

—Naie illi sedaraini isoidomoi.

Jusiñamui facaina lloraima micori

omoina jaie cuete. Ie cuegafuena raise facañedomoi. Naimie micori cuega:

Jofo finoraini jitaiñenanofici nana naie jofomo itenofici baifemo jai uaide.

cuega. Jusiñamui cominina damieria jaillana naimie micori cuete. Jusiñamui oretagamienadamierijitaiñenamona, naimie cominina jaiñeitimaci; iadedi Jusiñamui oretagamienaailluena iñuamona, naimie cominina jaitimaci. Ero, naimie micori caina cuete. Naie jofona finoraini isoidomo. Naienofici isoidicue. Cue rafuena omojitaíñena jira, naimie cominina jaiñeitomoi.<sup>18</sup>Naienoficina nia ñaiticue. Noficimo bu eicaitaia, bofedaita; ia naienoficibumo ana uaia, naimienasaitaite. Ieisoide. Cue lluana omojamaia, duere sefuitomoi. Iena omoi iñoenia, ja muidomo fafitomoi—llote.

**Jesúmo gobiernomo ucubena  
fecajana jicanua rafue**  
(Mt. 21.45-46; 22.14-22;  
Mr. 12.12-17)

<sup>19</sup>Jesús como lloga rafuedo naimacina ñianaia uñotimaci. Ie jira naie facaiseconi judíuia illacomini naimienagaitaacadimaci; iadedi cominina jaciruitimaci.<sup>20</sup>Ie jira naimienauñododimaci. Mare rafuedo abi caitadinonaredimaci. Naimie raise uai oñenia, naimienaduerefinollena, naimienafacaciacadimaci. Gobernadormonaimienallogidoiacadimaci.<sup>21</sup>Jesúmo llotimaci:

—Maestro, uanaicinonamarena llofuecabitio. Nana cominina davaido llofuecabitio. Jusiñamui rafuedo cai marena jaillana raise llofuetio.<sup>22</sup>Omo rafuena jicanoiacadacai. Dama Jusiñamuina sedadicai; iadedi romanos railla nairai anamo birui cai illajira, ¿naimaci illaima Césarmo ucubena cai fecajana rairuidio? Caimo llono—llotimaci.

<sup>23</sup>Naimienanaimaci jifuiana uiñuanona, Jesús dinena uai ote:

<sup>24</sup>—Ucube cuemo acata. ¿Bu ie joreño nainomo ite? ¿Bumo jainaiaide bie cuega radí?

Uai optimaci:

—César.

<sup>25</sup>Jesúsraite:

—Césariena itedi, Césarmo ille.

Jusiñamui iena itedi, Jusiñamuimo ille—raite.

<sup>26</sup>Jesúdi uai raise ua jira naimie lluamona jeare rafuena uiñóñedimaci, naimienallogidollena. Naimienlluari raijicallamona, lliicaidimaci.

**Jesúsdine saduceuai railla  
comini billa rafue**  
(Mt. 22.23-33; Mr. 12.18-27)

<sup>27</sup>Naie facaise dajerie saduceuai railla comini naimiedinebitimaci. “Fiodaillamona jaca buna jilloñeite” raisoidimaci.<sup>28</sup>Jesúmolotimaci:

—Maestro, cai facaina Moisés micori jaie cuega: “Iima fiodailla meinoconi, naimie urue iñenia, ie ama naie feciño olle. Naimiediuruiainaie amafacaina comuitaite” cuega.<sup>29</sup>Bie rafuena uiñoiacadacai. Siete amatiai ite. Nano doforamie ie aina ote. Naimienia uruiainide fiodailla.<sup>30-31</sup>Ie emodo imie ie amafeционаote. Naimienuruiainide jiaifiodailla. Naiesiete digamiedemoniese sefuide.<sup>32</sup>Ja muidomo naie riño jiaifodaite.<sup>33</sup>Fiodaillamona, ico naimaci jilloiadedi, ¿bu naie riño ienite? Naiñaiñosiete digamienainirede—llotimaci.

<sup>34</sup>Jesús uai ote:

—Biruiaina otomoi. Ìnina otomoi;

<sup>35</sup>iadedifiodaillamona, Jusiñamuidigajacaitinojillua mei, ainitimaci. Ìninitimaci;

<sup>36</sup>ia Jusiñamui jaienisaísoi illanona, dane fiodaiñeitimaci.<sup>37</sup>Fiodaitinojilluanomo omo lloitice. Moisés micori jofue iñenanomo illafacaise, amena boode

motodo Moisés micorimo Jusiñamui ñiaia facaise, naimie micorimo comini ico jilloillena Jusiñamui llote: "Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue" llote. <sup>38</sup>Jai fiódaitimaci; ia naimaci joreñuaí nia itimaci. Jusiñamuidi dani cajedino imaci Jusiñamuina jira, naimaci joreñuaí naimie dine itimaci. Ico naimaci abiaína jiaí jillotaite. Naimiemo naimaci duillamona, naimaci abiaí diga jilluanona, naimie diga jaca iitímaci —llote.

<sup>39</sup>Iena cacajano, Moisés micori llogacinuaina llofuerainimona dajerie raite:

—Maestro, raise llotio.

<sup>40</sup>Ie facaise naimiemo nie isoide rafuena dane jicanuana jaciruitimaci.

**Jesús dinena fariseuai cominimo  
jicanua rafue**  
(Mt. 22.41-46; Mr. 12.35-37)

<sup>41</sup>Iemei naimie ecimo itinomo Jesús jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci?

<sup>42</sup>Salmos railla cuegafuiaimo David micori jaie cuega:

Jusiñamuidi cue Namamo llote:

“Illaimana o illamona, cue  
nabeimo ana rai.

<sup>43</sup>Ona iinoñedino o anamo itataiticue”.

<sup>44</sup>“Cristodi cue Nama” David micori raite. Iese naimie micori railla jira, Cristo David micori afemo faite. Naimiedi dama David micori jitoñede; ia jiaí ie Nama.

**Jesúdi judíuái illaicomínina  
ñiaia rafue**  
(Mt. 23.1-36; Mr. 12.38-40;  
Lc. 11.37-54)

<sup>45</sup>Nana comini cacajano, ie llofueganomo Jesús llote:

<sup>46</sup>—Moisés micori llogacinuaina llofuerainimona abina rairui. Illaicomínina naimaci itimacídena, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoñedinona itimacídena, comini naimacina uaiduana gaidimaci. Comini naimaciri acarillena, ofiracomo uicomó raiacadimaci. Rafue ia, naimaci jamai bue isoñedinona começina facajanona, rafue nama ecimo raiacadimaci. <sup>47</sup>Feciñuaimona rana ocabillanona, naiñaiñuaina duere finodimaci. Naimiema eo sedadimacídena, Jusiñamuimo are jiicabidimaci. Iese naimaci icabilla jira, Jusiñamui naimacina jiaíe comini baifemo duere finoite.

**Jesúdi Jusiñamui jofomo duerede  
fecíño ucube fecajana ciua rafue**  
(Mr. 12.41-44)

**21** <sup>1</sup>Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode. <sup>2</sup>Eo duerede fecíño menaruñu joniana jiaí ciode. <sup>3</sup>Ie llofueoicaiganomo Jesús llote:

—Bie eo duerede fecíño nana ucuberedino jonía baifemo jonete. <sup>4</sup>Naimacímo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiñomo ite ucubena jai jonete. Janore jonete; ia Jusiñamuimona naiñaiñodi jiaíno baifemo jonete.

**Jesúdi Jerusalémo ite Jusiñamui  
jofo judaiana llua rafue**  
(Mt. 24.1-28; Mr. 13.1-23)

<sup>5</sup>Naie facaise Jesús llofueoicaiganomona dajerie Jusiñamui jofona eraillanona, raite:

—Mare nofici diga finoca. Eo mare ra nainomo jiaí ite.

<sup>6</sup>Jesús llote:

—Birui bie rana ciodomoi; iadedi ico jiairuido nana bie jofomo itenoficiai oni judaisite.

<sup>7</sup>Jicanotimaci:

—Jusiñamui jofo judaisillana omo jicanoiacadicai. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

<sup>8</sup>Uai ote:

—Omoina bie rafuena bu jifueñellena, omoi abina rairui. Ailluena comini cue mamecido billanona: “Cristodicue” raitimaci. “Cristo jai bairede” raitimaci. Naimaci dibeimo iñeno. <sup>9</sup>Jobaimiai illena fiditomoi; iadedi jaciruñeno. Iese suite; iadedi abido nia biñeiticue. <sup>10</sup>Daje nairai jiae nairai diga jobairite. Daje gobierno jiae gobierno diga jobairite. <sup>11</sup>Eo aillena ñuisañuaí suite. Diga illanomo cominidi aime guitimaci. Duicuai eo iite. Monamo comini diga jacirede rana ciotimaci. <sup>12</sup>Bie isoide rafue nia suiñenia, cuena iñoñedino omoina llogidoitimaci. Omoina gaitatajanona, omoina duere finoitimaci. Naimaci ofiracomo omoina uitimaci. Cárcelmo omoina jonetimaci. Cuemo omoi duilla jira, omoi duere sefuillena, illaicomini dine omoina uitimaci. <sup>13</sup>Naie facaiseconi cue rafuena naimacimo lloitomoi. <sup>14</sup>Omoi abina omoi riidoia, omoi lluana uicodo jarire iñeno. <sup>15</sup>Omoi raise llollena, omoina canoiticue. Uñoracinona omoimo iiticue. Lemona omoi dibeimo iñedino o uaina uaitanitimaci. <sup>16</sup>Cuena iñotomoi; ia ailluena cuena iñoñeitimaci. Cuemo omoi duilla jira, omoina enoitimaci. Lemona dajerie mootiai, dajerie eitiae, dajerie amatiae, dajerie nabaiñiae omoina llogidoitimaci. Omoimona dajeriene meineitimaci. <sup>17</sup>Cue cominina omoi illamona, nana nairai omoina enoitimaci; iadedi cuena fainonocaiñedimie ja muidomo monamo

jaca iite. Naimiena jillotaiticue. <sup>18</sup>Omoi ille dinori Jusiñamui omoina raise sedaite. <sup>19</sup>Duere omoi sefuria, cuena fainonocaiñeno jai. Ja muidomo monamo jaca iitomoi. <sup>20</sup>Jerusalén fuedo ruicabene icaifona soldaduai ia, ie judaille facaiseconi iairei iite.

<sup>21</sup>Naiemona omoi jillobillena, duere omoi sefuiñellena, Judeamo omoi illamona, aneduai dine aisi. Jerusalémo omoi ia, naiemona oni jino omoi jai. Jino omoi ia, Jerusalémo omoi jaiñeno. <sup>22</sup>Ie facaina lloraini micoriai cuegafuiai suillanona, naie facaiseconi naimiena iñoñedimonona Jusiñamui ibana oite.

<sup>23</sup>Naie rafuemona jillobillena, naie facaise urueside riño duere sefuite. Uruena nia jirode riñodi jiae duere sefuite. Naie facaise comini duere sefuitimaci. Llegi cacaitimaci. <sup>24</sup>Lloebi diga meinecana uitimaci. Jiae nairai dine naimacina jaiadoitimaci. Judúaiñedino sedalle facaise dinori, naimaci anamo Jerusalémo itino iitimaci.

**Jesús abido ie bille rafue**

(Mt. 24.29-35, 42-44; Mr. 13.24-37)

<sup>25</sup>Jesús nia llofuet:

—Jitoma nagarui illa isoi iñenamona, fivui nagarui illa isoi iñenamona, ucuai nagarui illa isoi iñenamona, comini jiae rafue suillena uiñoitimaci. Monaillai eo baguamona, comini comeciai eo jarire iitimaci. <sup>26</sup>Nana monamo ite radi jaidisite. Iena raise naimaci uiñoñena jira, nie isoide rafue suillena naimaci uiñoñena jira, jaciruñamona, comini fioldaitimaci isoi iitimaci. <sup>27</sup>Naie facaise uillie motodo cue billena nana comini ciotimaci. Ebire biiticue. Naimacina cue sedallena, illaimana biiticue. <sup>28</sup>Bie isoide rafue suia, omoina cue jilloitajaibillirui iairei illa jira, cue billiruimo raise ocurri.

<sup>29</sup>Iena omoi raise uiñollena, bie rafuena omoimo lloitice. Higuera railla riaramo omoi comeciaina faca. Nana amenamo comeciaina faca. <sup>30</sup>Bie eniruemo amena firuillamona, fiemona raire illana uiñotomoi. <sup>31</sup>Ie isoide. Bie rafue ico suia, Jusiñamui ie cominina raire sedajana uiñoitomoi.

<sup>32</sup>Uanaicinona omoimo lloitice. Nana bie rafue suille facaiseconi bie nairai nia iite. <sup>33</sup>Mona fuite. Enirue jiai fuite; iadedi cue lloga uai jaca suite.

<sup>34</sup>Jifaillacinona omoi ebirui raillano, omoi ecimo ite rana ebirui raillano, abina rairuicana jai. Cuena iinoñedinona duere finollena, ebena abido biiticue. <sup>35</sup>Cue bia, illaimana cue illamona, nana cominimo juez isoi lloitice. <sup>36</sup>Ie jira nagarui abi rairuicana jai. Naie duere sefuelle facaise omoi jilloillena, Jusiñamuimo jii. Ja muidomo monamo cue diga jaca iitomoi —llote.

<sup>37</sup>Jusiñamui jofomo Jesús nagarui llofueuide. Naiona Olivos railla anedumo, nainomo inillena, jaisoide. <sup>38</sup>Nagarui jitiramo naimiena cacareillena, Jusiñamui jofomo comini bisoidimaci.

### Judíuai illaicomini Jesúna gaitallena siadua rafue

(Mt. 26.1-5, 14-16; Mr. 14.1-2, 10-11;  
Jn. 11.45-53)

**22** <sup>1</sup>Naie facaise pascua railla rafue iairei ite. Naie facaise llomenico guille rafue jiai ite. Naie rafue ia, siritate rana jaca guinédimaci. Egiptomona naimaci jaiagai jillobiliana comecillena, naie rafue ite. <sup>2</sup>Judíuai illaicomini Jesúna meineiacadimaci; iadedi cominina jaciruillanova, naimiena nia meineñedimaci.

<sup>3</sup>Ie facaiseconi Taife ie anamo Judas Iscariote micorina itataste. Judadi Jesús

ie doce llofueoicaigano imie.

<sup>4</sup>Jusiñamui diga nanoca ñairaini dine jaide. Jusiñamui jofona sedaraini dine jiai jaide. Jesúna gaitatallena, naimaci diga ñaiaide. <sup>5</sup>Iobillanona, naimiemo ucubena feacaacadimaci. <sup>6</sup>Judas dinena:

—Jee —raite. Jesús diga ailluena comini iñena facaiseconi naimiena gaitatallena sedade.

### Jesúdi ie fiodaille rafuena llua rafue

(Mt. 26.17-29; Mr. 14.12-25;  
Jn. 13.21-30; I Co. 11.23-26)

<sup>7</sup>Llomenico guille rafue illanona, judíuai comini toica llauda fauillarui ride. <sup>8</sup>Jesúdi Pedro iaímaiai Juan diga oretajano, raite:

—Cai rafue guille uicodo finollesa omico jai.

—Naimiemo jicanotiiamaiai:

—¿Ninomo naiena coco finuana jitaidio?

<sup>10</sup>Uai ote:

—Ero, Jerusalémo omico ria, nogodo jinuina uitimienna ciotomico. Naimie jailla jofomo naimiena raca. <sup>11</sup>Jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’” Iese llono. <sup>12</sup>Ie mei omicomodo afebebamo ite aillue cuartona acataite. Na raruiai diga ite. Nainomo cai guille fino.

<sup>13</sup>Jaidiaimaiai. Naimie llua isoi baitiiaimaiai. Pascua rafue guille finodiaimaiai.

<sup>14</sup>Guille facaiseconi ia, Jesús ie llofueoicaigano diga nainomo guisaide.

<sup>15</sup>Mesamo guitimacimo, ie llofueoicaiganomo llote:

—Nia cue fioldaiñenia, omoi diga bie rafue guillena eo jitaidicue. <sup>16</sup>Ie cominina cue Moo ico sedalle facaise ia, nana bie rafue fuite.

<sup>17</sup>Jiroracomo jai totaca vino  
llinocaida, Jusiñamuimo iobillacinona  
fecaja mei, raite:

—Mai llino. Biemona nana dajena  
omoi jiro. <sup>18</sup>Omoina bene dane iese  
caimare nabaiñeticue. Cue Moo  
sedajanomo omoi diga ico cue ia,  
nainomo omoina dane iese caimare  
marena nabaiticue. —Iena jirodimaci.

<sup>19</sup>Llomenicona llinuanona,  
Jusiñamuimo iobillacinona fecaja mei,  
ieno tairude. Naimacimo fecajano raite:

—Biedi cue abi facai ie. Omoi facaina  
fiadaiticue. Cue abimo omoi comecin  
facajano, iena guifño.

<sup>20</sup>Naimaci guilla fuilla mei,  
jiroracomo vino diga dane oruitajanona,  
naimacina jirotate. Raite:

—Cue fiodaillamona, dama cue  
diaillamona, jeacino anamona  
jilloitomoi. Jusiñamuidi omoimo jiae  
rafue birui itatajanona, omoi jeacino oni  
dotajana jai llote. Bie vinodi naie rafue  
facai ie. —Iena jirodimaci.

<sup>21</sup>Jesús llote:

—Ero, cuena gaitataitimie cai diga  
guite. <sup>22</sup>Monamona billanona iimana  
jaidicue. Jusiñamui jitalla isoi jai  
jaoicaidicue; iadedi Jusiñamuimona  
cuena gaitataitimie eo duere sefuite.

<sup>23</sup>Iemei: “¿Nimie Jesúna gaitatalle?”  
dani coniniri siadoside.

### Naimaci moto imiena bu ille rafue

<sup>24</sup>Ie facaise coniniri siaduana  
raitimaci:

—¿Cai moto imiena bu ille?

<sup>25</sup>Iena cacajanona, Jesús raite:

—Naimaci jitalla ra finollena,  
judíuafíñedino illaimaíaidi naimaci  
anamo itinona ocuicabide. “Cai anamo  
itinona canocabidica” raitimaci;  
<sup>26</sup>iadedi omoimo iese iñede. Omoi moto  
itimie omoi moto imieñedimiena jailla.  
Omoimona bu imiena iacania, omoi

mullaaimana naimie jaicabillasa.  
Omoimona bu imiena iacania, omoina  
naimie canocana jaicabillasa. <sup>27</sup>Ero,  
jiae rafuedo iena lloitice. Naimiena  
ecallena, naimiena canollena, patrón  
anamo ie mullaiai itimaci. Naimaci  
baifemo patrón illamona, naimacina  
canollena, ie mullaiai facaina maijiñede.  
Cue anamo itomoi; ia omoina canollena,  
omoi mullaaima isoi iticue. <sup>28</sup>Birui duere  
cue sefuidicuemo, cuena  
fañonocaiñedomoi. <sup>29</sup>Cue Moo cuena  
illaímana jai itatate. Omoina fetodicue,  
<sup>30</sup>jiairuido cue illaima illa facaiseconi  
cue ecimo omoi caimare marena iocire  
illena. Nainomo omoi judíuafí doce  
nairaiaina sedaitomoi.

**Jesúdi Pedro naimiena  
januana llua rafue**  
(Mt. 26.31-35; Mr. 14.27-31;  
Jn. 13.36-38)

<sup>31</sup>Jesús llote:

—Simón Pedro, ero, Taifedi  
Jusiñamuimo ona jicanote, o ramo  
faillena; <sup>32</sup>iadedi ori jai jiñdicue, cuena  
nia iñocana o jaillena. Ico cuena raise o  
iñoñena mei, cue dibeimo o comeci  
iuai dane o meidoia, iemona jiae  
creyentiai comeciaína ocuiñotaitio.

<sup>33</sup>Pedro uai ote:

—Nama, cárcelmo o ia, nainomo jiae  
iñiticue. O fiodaia, jiae fiadaiticue. Ona  
fañonocaiñeticue.

<sup>34</sup>Jesús uai ote:

—Pedro, jitíramo iitava nia ñaiñenia,  
dacaño amani cuena janoitio.

**Jesús fiodailla facaise  
iaírei illa rafue**

<sup>35</sup>Ie llofueoicaiganomo Jesúsi llote:

—Omoimo ite rafuena uiñoiacadicue.  
Cue rafue lollena, navui omoina  
oredicue. “Ucubena uiñeno, bolsa  
uiñeno, meidolle zapatos uiñeno”

omoimo lloticue. Naie facaiseconi omoi, ġue rana jitaidomoi?

Uai otimaci:

—Cai buena jitaiñedcai.

<sup>36</sup>Jesús raite:

—Biruimona omoi duere sefuitomoi. Ie jira abina rairuicana jai. Birui ucube omoimo ia, nine omoi jaia, iena uiño. Bolsa bumo ia, iena uiño. Abina riidollena, omoimo lloebi iñenia, janore iniroina feca, lloebi ollena. <sup>37</sup>Cuena jaie cuegafuiai ja suite. Isaías micori cuena jaie cuega: “Maraiñede rafue finoraima isoi naimie duere sefuite”.

<sup>38</sup>Raitimaci:

—Ero, Nama, mena lloebi caímo biruite.

Jesús uai ote:

—Mena ia, macaibaite.

### Jesúdi Getsemanímo

#### Jusiñamuimo jiia rafue

(Mt. 26.36-46; Mr. 14.32-42)

<sup>39</sup>Guille mei, ie llofueoicaigano diga, Jesús jino jaide. Olivos railla anedumo naimie jaisoilla isoi jaide. <sup>40</sup>Nainomo ria, naimacimo llote:

—Taife omoina ramo fai raillano, iena omoi iñonellena, Jusiñamuimo jií —llote.

<sup>41</sup>Naimie janoredrenofici bai faia uailla dinori bai jaide. Caiñici ifodo ana raita, Jusiñamuimo jiíde:

<sup>42</sup>—Ore Moo, o jitaia, cue duere sefuillamona cuena jillota. Cue jitailla isoi cuena finoñeno; iadedi o jitailla isoi cuena fino.

<sup>43</sup>Naimie comecinacociñotallena, ie facaiseconi monamona Jusiñamui jaénici bite. <sup>44</sup>Jesús comeci jarire illamona, naimie rioci faitemo, difai diruena eniruemo uaide. <sup>45</sup>Jiia mei, ie llofueoicaigano dine abido bite. Ocosinallamona, jai inidimaci.

<sup>46</sup>Naimacimo jicanote:

—¿Bue ñellena inidomoi? Mai casi. Taife ramo omoina fai raillano, iena omoi iñonellena, Jusiñamuimo jií.

### Jesúna gaitalle rafue

(Mt. 26.47-56; Mr. 14.43-50;

Jn. 18.2-11)

<sup>47</sup>Nia Jesús lloia, diga comini naimie dine bitimaci. Judas Iscariote micori naimacina ifode. Naimiedi Jesús llofueoicaigamie. Naimiena llabanollena. Jesús díne iairei bite. <sup>48</sup>Jesús raite:

—Judas, cuena llabanuanona, cuena gaitataiacadio.

<sup>49</sup>Ie llofueoicaigano naie rafuena jai ciódimaci. Jicanotimaci:

—Nama, ¿caí atica lloebi diga ona riidoiticaí?

<sup>50</sup>Ie facaise naimacimona damiedi Jusiñamui diga nanoca ñairaima ie mullaima ie nabei jefona jaibonete.

<sup>51</sup>Jesús dinena raite:

—Dama ite. —Ie jefona naimie jetajamona, naimiena jillotate. <sup>52</sup>Diga illaicomini Judas diga Jesús díne bitimaci. Naimacimo Jesús llote:

—Fiiriraimadicueta cuena omoi gaitajaibilla. Omoi lloebina atidomoi. Omoi butaralluna jiaí atidomoi.

<sup>53</sup>Nagarui Jusiñamui jofomo omoi motomo llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

### Pedrodi Jesúna janua rafue

(Mt. 26.57-58, 69-75; Mr. 14.53-54,

66-72; Jn. 18.12-18, 25-27)

<sup>54</sup>Naimiena gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade.

<sup>55</sup>Nairaibiri motomo irai bonua mei, ana raidimaci. Pedro naimaci diga jiaí raide. <sup>56</sup>Nainomo ite mullaiñodi irai bouamona, Pedromo eruallano raite:

—Bimiedi Jesús diga jaisoidimie.

<sup>57</sup>Pedro abi janote:

—Naimiena uiñoñedicue.

<sup>58</sup>Dallu illanona, jiaimie Pedrona ciuanona llote:

—Jesús ie llofueoicaigano imedio.

Pedro dinena uai ote:

—Imieñedicue.

<sup>59</sup>Daje hora illanona, jiaimie raite:

—Bimie galileo imienia jira, bimiedi Jesús diga ua jaisoidimie.

<sup>60</sup>Pedro dinena raite:

—O lluana uiñoñedicue. —Ieconi naimie ñaítemo, iitava ñaíte. <sup>61</sup>Jesús dobaidacaída, Pedromo erodacaide. Iemei Pedro Jesús lluana uibiñote. Jesús naimiemo jaive llote: “Itava nia ñaíñenia, dacaiño amani cuena janoitio”. <sup>62</sup>Pedro jino jaillanona, eo sunaillamona, eo eede.

### Jesúna jifanoudua rafue

(Mt. 26.67-68; Mr. 14.65)

<sup>63</sup>Ie facaise Jesús gaitadino naimiena jifanododimaci. Naimiena jiai fatimaci. <sup>64</sup>Ie uisina maitimaci.

Llotimaci:

—Siño jitodiosa, ¿bu o faja? caimo llono.

<sup>65</sup>Iese jifanodocana uitimaci.

### Jesúdi judíuái illaicomini

dine illa rafue

(Mt. 26.59-66; Mr. 14.55-64;

Jn. 18.19-24)

<sup>66</sup>Monaidemo judíuái illaicomini ofidimaci. Jusiñamui diga nanoca ñairaini ofidimaci. Moisés micorí llogacino llofueraini ofidimaci. Naimaci dine naimiena gaitadino Jesús uitimaci. Naie illaicomini dinena raitimaci:

<sup>67</sup>—Ua Cristodiona, iena caímo llono.

Jesús uai ote:

—Omoimo iena cue lloia, iiñoñetomoí. <sup>68</sup>Buena omoimo cue

jicanoria, cue uaina oñeitomoi.

<sup>69</sup>Monamona jaie billanona, iimana jaidicue. Cuena omoí meiniamona, illaima isoi Jusiñamui ecimo raire iiticue.

<sup>70</sup>Nana jicanotimaci:

—“¿Jusiñamui Jitodicue” raitio?

Uai ote:

—Raise cacadomoí. Imiedicue.

<sup>71</sup>Iena cacajano, raitimaci:

—Naimie lluana jai cacadicai. Jiae comini naimiena llogiduana jai jitaiñedicai. “Jusiñamui Jitona iticue” naimie llua jira, Jusiñamuina jai jeare ñaíte. Naimie Jusiñamui Jitoñede.

### Pilato dine Jesús illa rafue

(Mt. 27.1-2, 11-14; Mr. 15.1-5;

Jn. 18.28-38)

## 23

<sup>1</sup>Judíuái illaicomini naidacaillanona, Pilato dine Jesús uitimaci. <sup>2</sup>Naimiena llogidotimaci:

—Cai cominimo maraiñedifuena llote. Gobiernomo ucubena cai fecajana rairuide. Naimie jiai raite: “Cristodicue. Illaimadicue”.

<sup>3</sup>Pilato dinena naimiemo jicanote:

—¿Judíuái comini illaimadio?

Uai ote:

—Jii, judíuái illaimadicue.

<sup>4</sup>Jusiñamui diga nanoca ñairainimo Pilato llote. Nainomo bite cominimo jiai llote:

—Nicinodi naimiemo iñede.

<sup>5</sup>Uai otimaci:

—Gobierno joreño comini comeciai jeare feidocana naimie uite. Nana Judeamo uite. Galileamona taínde. Bene jai caímo ride.

### Herodes dine Jesús illa rafue

<sup>6</sup>Iena cacajano, naimie llogidotinomo Pilato jicanote:

—¿Naimiedi Galilea imie?

<sup>7</sup>—Jii —raitimaci. Galilea enirue illaima Herodes. Naie facaiseconi

Jerusalémo naimie illa jira, naimie dine Pilatodi Jesúna orede.<sup>8</sup> Jesúna Herodes cíuanona, iobide. Naimie finoca rafuena naimie fidia jira, naimieno cioacade. Siño rafuena naimie finuana jíai cioacade.<sup>9</sup> Jesúmo ie finoca rafuena are jicanote; iadedi Jesús dinena uaina oñede.<sup>10</sup> Ie facaiseconi judíuai illaicomini Jesúna riire llogidotimaci.<sup>11</sup> Herodes ie soldaduai diga naimieno eo jeare ñaitimaci. Illaima jitauiga íniroina jitatatimaci. Ie mei Pilato dine naimieno abido orede.<sup>12</sup> Lemona nairuido Herodes Pilato diga nabairite. Jaie conimana enoidiaimai.

**Pilatodi Jesús fiodaillana llua rafue**  
(Mt. 27.15-26; Mr. 15.6-15;  
Jn. 18.39—19.16)

<sup>13</sup> Pilatodi judíuai illaicomina, nainomo ite comini diga, uaidote.  
<sup>14</sup> Raite:  
—Bimie cue dine atidomoi. Raitomoi: “Comini comecial feidocana naimie uite”. Naimieno jai jicanoticue; ia naimieno nicinodi iñede.<sup>15</sup> Herodes cue dine naimieno como abido orede.  
“Naimieno nicinodi iñede” jíai raite. Naimieno cue meinettalena, naimie jaca nicinona finoñede.<sup>16</sup> Ie jira naimieno cue sechedotajanona, naimieno oni oretaiticue.

<sup>17</sup> Naie rafue facaiseconi naga año cárcelmona damiena jino jamai oretauide.<sup>18</sup> Pilato lluana cacajano, nana comini ado cuiriidimaci:

—¡Naimieno oni uiño, naimieno meinellena! ¡Barrabás cárcelmona jino oreta!

<sup>19</sup> Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite.<sup>20</sup> Jesúna naimieno jamai oretaiacana jira, comini diga Pilato dane ñaite;<sup>21</sup> iadedi cuiriidimaci:

—¡Naimieno corai! ¡Naimieno meine!

<sup>22</sup> Pilato dane jicanote:

—¿Nie isoide maraiñede rafuena finode? Naimieno cai meinellena, naimie jaca nicinona finoñede.

Naimieno sechedotaiticue. Ie mei naimieno jamai oretaiticue.

<sup>23</sup> Eo riire cuiriidimaci:

—¡Naimieno corai! —Ja muidomo Pilato dinena:

—Jee —raite.<sup>24</sup> Naimaci jitaila isoi Pilato fairiote. Jesúna meinellena llote.<sup>25</sup> Ie mei Barrabásna cárcelmona jino oretate, naimieno comini jícaja jira; iadedi Jesús naimacimo fecade, naimieno naimaci jitaila ra naimaci finollena.

**Jesúna coraia rafue**  
(Mt. 27.32-44; Mr. 15.21-32;  
Jn. 19.17-27)

<sup>26</sup> Jesúna soldaduai oni uitomo, Simón raillamie diga dafaifidimaci. Naimiedi Cirene railla enirue imie. Jerusalén onifemonita bite. Jesús jíafona naimieno cruzna rocaoicaida sonotate.<sup>27</sup> Ailluena comini Jesúna racadimaci. Ailluena riñonai eo eecana jaisite.<sup>28</sup> Iena cacajano, Jesús naiñaiñuai dine dobaidacaida, naiñaiñuaimo llote:

—Jerusalén itiñaiñuai, cue facaina eeñeno; iadedi omoi facaina mai omoi ee. Omoi uruiat facaina mai omoi ee.<sup>29</sup> Ero, jíairuido duere sefullemona comini raitimaci: “Oiniñuai jíai eñonaiñuaimo llote: naiñaiñuaimo llote”.

<sup>30</sup> Jusíñamui riicallafuemonia jilloiacanamona, comini jíai raitimaci: “Aneduai caimo jaicorillana jitaidicai”.

<sup>31</sup> Maraiñede rafuena finoñedicue; iadedi jai duere sefuidicue, Maraiñede rafuena finodimaci. Ie jira cue baifemo eo duere sefuitimaci.

<sup>32</sup> Naie iaímaiaina meinellena, mena maraiñede iímana jíai uitimaci. Gobierno llogacinona iínoñediiiaímaiai.

<sup>33</sup>Ifocoraina eruaila illanomo naimacria, Jesúna coraidimaci. Naie maraiñede iaímaiaina jiai coraidimaci. Damie Jesús nabeimo. Jiaimie Jesús jarifebeimo.

<sup>34</sup>Jesús ie Moomo llote:

—Ore Moo, naimaci finoca rafuena naimaci raise uiñoñena jira, bie soldaduai cuena duere finua rafuena feita —llote. Budajerie uille uiñollena, Jesús íniroina jifanoduanu soldaduai facasite.

<sup>35</sup>Ailluena comini eruaidimaci.

Judíuaí illaicominidí naimiena jifanoduanona, coniniri raitimaci:

—Naimiedi jiaie cominina duicomona jillotate. ¿Niese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

<sup>36</sup>Soldaduai naimiena jiai jifanododimaci. Ie abi isirena cacaiñellena, naimiemo vino fecajanona, <sup>37</sup>raitimaci:

—Judíuaí illaimadiodena, fiodaillamona dama o abina jillota.

—Naie vino Jesús jiroñede.

<sup>38</sup>Jesús ifogi afeconi rabicimo Pilato cuetataste: “Bimedi judíuaí comini illaima”.

<sup>39</sup>Jesús diga coraica iaímaiaimona damie naimiena taigode:

—Jusiñamumona bitiodena, nia fioldaiñenamona dama o abina jillota. Cocona jiai jillota.

<sup>40</sup>Jiaimiedi naimiena lletade:

—¿Bue ñellená bimiena taigodio? ¿Niese jearede rafuena nia finoacadio? Ja fioldaitio. Iemei Jusiñamui uicomó ja iitio. ¿Niese Jusiñamui uicomó o illena jaciñuñedio? <sup>41</sup>Maraíñede rafuena coco finua jira, duere sefuidicoco; iadedi bimie maraiñede rafuena finoñede.

<sup>42</sup>Iemei Jesúsmo llote:

—Illaimana o illa facaise cuena comeci.

<sup>43</sup>Jesús uai ote:

—Uanaicino lloticue. Birui cue diga cue Moo illanomo iitio.

### Jesús fiodailla rafue

(Mt. 27.45-56; Mr. 15.33-41;  
Jn. 19.28-30; He. 9)

<sup>44</sup>Jitoma naidai jai itemo, daje amani horas mona jitibicaide. <sup>45</sup>Jitoma raise lligaiñonede. Jusiñamui jofo ie fetaca íniroife ana anaba jillacímo motodo menafe cuuraride. <sup>46</sup>Jesús ado llote:

—Ore Moo, cue joreñona feiño. —Ie mei naimie jai fiodaite.

<sup>47</sup>Soldaduai imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

<sup>48</sup>Ailluena comini Jesús fiodaillana ciodomaci. Ie mei eo sunaillamona, jogobemo fairuanona, jofomo abido jaidimaci. <sup>49</sup>Jesús nabaiñiai bie rafuena aarena ciodomaci. Galileamona bite riñoniai bie rafuena aarena jiai ciodomaci.

### Jesús raiafomo jonia rafue

(Mt. 27.57-61; Mr. 15.42-47;  
Jn. 19.38-42)

<sup>50-52</sup>Pilato dine José raillamie jaide, Jesús abina jicallena. Naimiedi illaicomini. Maremie. Ínogamie. Jesúna meiniana jitaiñede. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuride. <sup>53</sup>Pilato:

—Jee —railla mei, Jesús abina cruzmona ana uanona, iena useroi diga ferinote.

Nofici ie raiafomo jonete. Nia bu raiñenafomo jonete. <sup>54</sup>Nairui viernes.

Sábadorui rille jai iairei illa jira, Jesús abina raiafomo raire jonete. <sup>55</sup>Galileamona navui bite riñoniai racadimaci. Raiafona ciodomaci. Naimie abi finuana ciodomaci.

<sup>56</sup>Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micori jaie llua isoi.

**Jesús fiodaillamona jillua rafue**  
(Mt. 28.1-10; Mr. 16.1-8; Jn. 20.1-10)

**24** <sup>1</sup>Domingo jitiramo monaidemo, naie riñoniaī raifafomo jaidimaci, iñaiñuai finoca soride rana ullena. <sup>2</sup>Raiifo ibailla nofici oni joillana ciódimaci. <sup>3</sup>Fo jaidemo, Jesús abina cioñedimaci. <sup>4</sup>Uainicaidimaci. Ieconi menamie naiñaiñuai ecimo baireddiamaiai. Iaimaiai iniroi eo quenirede. <sup>5</sup>Iaimaiaina jacinaillamona, ifogi ana jitadacaidimaci. Naie iaimaiai dinena jicanote:

—¿Bue ñellena fioldaitimie illanomo cajedimiena jenodomoi? <sup>6</sup>Galileamo navui naimie omoimo llogacinona começicñedomoi. <sup>7</sup>Naimie raite: “Monamona billanona, iimana jaidicue. Jusiñamui jitilla jira, maraiñede rafue finoraini anamo iiticue. Cuena coraiitimaci. Darui amani illanona, fiodaillamona jilloiticue” raite.

<sup>8</sup>Iemona ie llogacinona jai começitimaci. <sup>9</sup>Raiafomona abido jaidimaci. Le once llofueoicaiganomo naiñaiñuai ciua rafuela llotimaci. Naie llofueoicaigano diga itinomo jiai llotimaci. <sup>10</sup>Naie riñoniaimona María Magdalena ite. Juana ite. María ite. Naiñaiñodi Jacobo ei. <sup>11</sup>Naie riñoniaidi iena llotimaci; iadedi ie rafuela cacadinodi iena iinoñedimaci.

—Jamaifuena ñaitomoi —raitimaci.

<sup>12</sup>Iena cacajano, Pedro aísicana raifafomo jaide. Nainomo ria, ana jitadacaida, fo erodate. Useroi joillana ciode. Iemo ie começina facajano, jofomo abido jaide.

**Mena llofueoicaiganomo**  
**Jesús bairia rafue**  
(Mr. 16.12-13)

<sup>13</sup>Jesús jilluarui mena llofuega iaimaiai Emaús railla nairaimo jaidiaimai. Jerusalémona níbá once kilómetros ite.

<sup>14</sup>Nana Jesúmo suide rafuela ñaiano

jaidiaimai. <sup>15</sup>Iaimaiai ñaianona, Jesús iaimaiai diga dafaifillanona, iaimaiai diga jaide. <sup>16</sup>Jusiñamuidi iaimaiaina naimieni uiñotañena jira, naimieni uiñoñediamai. <sup>17</sup>Iaimaiaimo Jesús jicanote:

—¿Buena ñaitomico? —Ieconi naidadatiaimai. Sunaitiimai.

<sup>18</sup>Naie iaimaaimona damiedi Cleofas. Naimie uai ote:

—¿Niese Jerusalémo birui suide rafuela uiñoñedio? Níbá como ridio. Nana jiai comini iena uiñotimaci.

<sup>19</sup>Uai ote:

—¿Nie isoide rafue suide?

Uai otiiamaiai:

—Nazaret ie Jesús rafue. Naimiedi Jusiñamui facaina lloraime. Diga siño rafuela finode. Cominina raise llofue. Jusiñamuimona naimiedi maremie. Cominimona naimie maremie; <sup>20</sup>iadedi cai illaicomini naimieni gaitatatimaci. Naimieni cruzmo coraitatimaci.

<sup>21</sup>Jusiñamui naimie cai dine orecaimemo começina facadicoco. Naimie cai illaimana illemo ocuridicoco; ia naimie jai fiodaite.

Naimie fiodaillamona darui amani jai ite. <sup>22</sup>Cai cominimona dajerie riñoniaibirui caina jacinaitadimaci. Jitiramo Jesús raifafomo jaidimaci; <sup>23</sup>iadedi naimie abina cioñedimaci. Abido naimaci bia:

“Jusiñamui jaienisaina ciódicai” raitimaci. Naie jaienisai naimacimo llote: “Naimiedi caje”. <sup>24</sup>Iemei caimona dajerie raifafomo jaidimaci. Riñoniai llua isoi ciódimaci. Jesús abina cioñedimaci.

<sup>25</sup>Jesús dinena uai ote:

—Abi uiñoñedomico. Nana Jusiñamui facaina lloraini micoriai cuegafuiaina iinoñacaiñedomico. <sup>26</sup>Cristo duere sefullena cuetimaci. Jusiñamui iena jitaillena cuetimaci. “Naimie nia illaimana jaiñenia, duere sefuite” cuetimaci.

<sup>27</sup>Iemei Jesús iaimaiaina llofue. Moisés micori cuegafuiaina llofue. Jusiñamui facaina lloraini micoriai

cuegafuiaina jiai llofuete. Nana Cristona cuegafuiaina llofuete.

<sup>28</sup>Emaús díne iairei naimaci ria, Jesús nia jaiacademo, <sup>29</sup>naimienra caididíaimaiai. Raittiaaimaiai:

—Coco diga fiebi. Jitoma jai ana ite. Jai abi juanide, nia o jaillena. —Le muidona iaimaiai diga fiebillena fo jaide. <sup>30</sup>Nailli guitimacimo, llomenicona Jesús Ilinuano, Jusiñamumo iobillacina fecade. Iena tairuano, iaimaaimo fecade. <sup>31</sup>Jusiñamui jitaila jira, ieconi Jesúna uiñotiaaimaiai. Iemei iaimaaimona naimienra jai cioicaiñena. <sup>32</sup>Daimaiai ñaittiaaimaiai:

—Coco diga naimie ñaia, coco comeci caimare ite.

<sup>33</sup>Naie dacaiño Jerusalémo abido jaidiaaimaiai. Jesús llofueoicaigano naimaci nabaiñiai diga danomo illana baiitiaaimaiai. <sup>34</sup>Iaimaaimo llotimaci:

—Cai Nama fiodaillamona jai jillode. Simón Pedromo jai bairede.

<sup>35</sup>Ie mei naisonra iaimaiai jailla rafuena llotiaaimaiai:

—Cai guiticaimo, naimienra uiñoticoco —llotiaaimaiai.

### Jesús ie llofueoicaiganomo

bairia rafue

(Mt. 28.16-20; Mr. 16.14-18;

Jn. 20.19-23)

<sup>36</sup>“Jesúna ciodicoco” llotiaaimaaimo, ie llofueoicaigano motomo Jesús bairede. Llote:

—Jai biticue. Uri omoi i.

<sup>37</sup>Naimienra ciuamona, jacinaitimaci. “Joreñona ciodicai” comeciaina facajanona, jiai jaciruitimaci.

<sup>38</sup>Naimacimo Jesús jicanote:

—¿Bue ñellena jaciruitomoi? ¿Bue ñellena cue bene illana iinoñedomoi?

<sup>39</sup>Cue onollimo eruai. Cue eillimo eruai. Jesúdicue. Cuena jeta, raise uiñollena. Cuemo llicisi ite. Cuemo illaici ite. Jamai joreño isoñedicue.

<sup>40</sup>Iena llua mei, coraiafona naimaci cioillena, ie onollie ie eilli diga acatate.

<sup>41</sup>Iobiacadimaci; iadedi nia raise iinoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

<sup>42</sup>Naimiemo janorede jai ruica lliciaina fecadimaci. <sup>43</sup>Iena feiñuanona, rite. Iena ciódimaci. <sup>44</sup>Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriai cuena cuetimaci. Jusiñamui jitaila jira, iena jai suide.

<sup>45</sup>Naie facaiseconi naimacina naie cuegafuiaina raise uiñotade.

<sup>46</sup>Naimacimo llote:

—Jusiñamui facaina lloraini micoriai cuena jaie cuetimaci: “Cristo duere sefuite. Fiodaillamona darui amani illanona, jilloite. <sup>47</sup>Naimie muidona comeciai uiuai meiduamona, Jusiñamui naimaci jeacinona oni dotaite. Naimie rafue nana nairaimo damierie lloitimaci”. Omoimo biena lloiticue. Cue rafuena lollena, Jerusalémo taineitomoi. <sup>48</sup>Bie rafuena ciodomoi. Iena lloitomoi. <sup>49</sup>Ero, navui naimie llua isoi, cue Moo Joreño omoi dine oreitaiticue. Jerusalémo fiebi, naimie Joreño omoi feiñolle dinori. Cue rafuena omoi lollena, naimie Joreño omoi comeciaina ocuiñotaite.

### Jesús monamo jailla rafue

(Mr. 16.19-20)

<sup>50</sup>Betania railla nairai dine Jesús naimacina ifode. Marecinona naimacimo llote.

—Jusiñamui omoina raise marena canoite —llote. <sup>51</sup>Iena naimacimo lluanona, monamo jaide. <sup>52</sup>Jerusalémo eo caimare abido jaidimaci.

<sup>53</sup>Jusiñamumo iobillacino fecajano, Jusiñamui jofomo nagarui itimaci. Mai. Macaibaite. Lucadicue.

## JUAN JESUCRISTO ENIRUEMO ILLA RAFUE CUIAFUE

### Jesucristo rafue iese tainede

**1** <sup>1</sup>Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui. <sup>2</sup>Jusiñamui diga jaca nano ite. <sup>3</sup>Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede. <sup>4</sup>Naimie muidona iticai. Naimena cai iñuamona, jaca iiticai. Lligaiñora diga rana cai ciua isoi, caina Jusiñamuina uiñotade. <sup>5</sup>Naimena iñonoñedino jitiredinomo itimaci isoidimaci. Naimaci comeciai jitirede. Ie uaido naimaci comeciaina lligaiñote, naimaci comeciaimo ite jeacino oni jaillena.

<sup>6-7</sup>Naimaci comeciaina lligaiñotimiena llollena, Juan micori lluacinodo Jusiñamuina nana comini iñollena, Jusiñamuidi Juan Bautista raillamie micorina oretate. <sup>8</sup>Juan naie lligaiñonoñedimie; iadedi Juan naimena lluaibite. <sup>9</sup>Nanoca lligaiñotimiena llote. Nanoca lligaiñotimedi eniruemo billanona, nana comini comeciaina lligaiñote. <sup>10</sup>Naimie muidona comini comuidimaci; iadedi naimie bene billa meinoconi, comini dinena naimiena uiñoñedimaci. <sup>11</sup>Ie nairai illanomo naimie ride; iadedi nana cai nairai naimiena feiñonoñedimaci. <sup>12</sup>Damierie naimiena feiñotimaci. Naimena iñotimaci. Ie

uaido naimiedi naimacina Jusiñamui uruiaina itatare. <sup>13</sup>Iena Jusiñamui jitaila jira, Jusiñamui uruiaina jaidicai. Comemonia jeiciamona iena jaiñedicai. Comini jitailamona iena jaiñedicai. Buena cai finuamona iena jaiñedicai.

<sup>14</sup>Iemo caina Jusiñamuina uiñotallena, Jusiñamui Jito comena jaide. Naie facaise cai comini motomo naimie ite. Cai cominina eo duenaita. Uanaicinona llouide. Ie siñó uaina uiñocana jaidicai. Jusiñamui dajede ie Jitona ciodicai. <sup>15</sup>Juan micori naimiena cominimo jaie llote:

—Birui omoimo lloticue; iadedi jiaimie cue ifo meidoite. Cue baifemo faíte. Cue nia jeiciñenia, naimiedi jaca ite —llote.

<sup>16</sup>Jesucristo caina eo duenallamona, birui caina eo canocabide. <sup>17</sup>Moisés micori Jusiñamui uaina jaie llote; iadedi iemonia Jusiñamui caina duenallana jaie raise uiñonédicai. Jesucristo lluamona Jusiñamui caina duenallana jai raise uiñoticai. Naimiemona uanaicinona jai raise cacadicai. <sup>18</sup>Jaca buna Jusiñamuina cioñede; iadedi dajede ie Jito caina naimiena uiñotade. Ie Moo diga danomo illamona, Jesús naimiena uiñote.

### Juan Bautista micoridi

#### Jesúna llua rafue

(Mt. 3.11-12; Mr. 1.7-8; Lc. 3.15-17)

<sup>19</sup>Jerusalémona Juan micori díne judíuái illaicominiidi Jusiñamui diga

ñairainimona dajerie oredimaci.  
Jusiñamui diga ñairaini canorainimona  
dajerie jiai oredimaci. Naimemo:  
—¿Budio? —raillano jicanotadimaci.  
Juan dine rillanona, raitimaci:  
—Cai Jilloitaraíma biite raillamiemo  
ocuridicai. Cristo raillamie billemo  
ocuridicai. ¿Odi naimedio?  
—raillanona jicanotimaci. <sup>20</sup>Naimie  
dinena janoñede; ia:  
—Imieñedicue —raite.  
<sup>21</sup>Dane naimemo jicanodosite:  
—¿Budio? ¿Elías?  
Juan micori dinena uai ote:  
—Elíañedicue.  
Raitimaci:  
—Moisés micori Jusiñamui facaina  
lloraíma ico billena jaie llote. ¿Odi  
naimedio?  
Juan dinena raite:  
—Ieñedicue.  
<sup>22</sup>Dane jicanotimaci:  
—¿Budio? Caimo llono, cai  
oretatinomo cai llollena. ¿Niese  
naimacimo ona lloitacai?  
<sup>23</sup>Juan dinena raite:  
—Jofue iñenanomo ado llotimiedicue.  
Isaías micori jaie llua isoi llocabiticue:  
“Cai Nama brite. Naimie naiso atona  
raise fino”. Iese lloticue; ia naimie uaina  
omoi feiñollena, omoi comeaciai raise  
finollena ñaiticue.  
<sup>24</sup>Juan dine bitinodi fariseuai comini.  
<sup>25</sup>Nia jicanoiacadimaci:  
—Odi cai Jilloitaraímañenia, o Elíañenia,  
o Moisés micori llotimieñenia, ¿bue ñellena  
cominina bautizadio? ¿Nie isoide uai omo  
ite? ¿Ninomona o uaina otio?  
<sup>26</sup>Juan dinena uai ote:  
—Cominina bautizadicue; iadedi omoi  
motomo omoi uiñoñegamie jai ite.  
<sup>27</sup>Naimie cue ifo meidoite. Cue baifemo  
faite. Jamai bue cue isoilla jira, naimie  
illafomo cue riñena jira, naimiena  
canonidicue.

<sup>28</sup>Naie rafuedi Betábaramo suide.  
Jordán railla ille ruicafebeimo ite.  
Nainomo Juan bautizauide.

### Juan micori Jesúna dane llua rafue

<sup>29</sup>Ie areruido Juan micoridi Jesús  
naimie dine billana ciuano, naimiena  
raite:

—Ero, Jusiñamui Jito toica llauda  
mamecido jai bite. Cai jeacino facaina  
faga llauda ifomo Jusiñamui ie Jitona  
jai orede. Naimie fallemona comini  
jeacinona dotaite. <sup>30</sup>Navui naimiena  
ñaiticue. Lloticue: “Cue ifo jaimie  
meidoite. Jamai bue isoidicue; iadedi  
naimie jamai bue isoiñede. Cue nia  
jeiciñenia, naimiedi jaca ite”. <sup>31</sup>Cue  
dine naimie nia biñenia, naimiedi cai  
Jilloitaraímana uiñoñedicue; iadedi  
cominina bautizallena bene iticue, cai  
cominimo naimiena llollena.

<sup>32</sup>Juan jiai llote:

—Monamona ucugi isoi Jusiñamui  
Joreño ana billana ciodicue. Jesúmo  
baite. <sup>33</sup>Naimiedi cai Jilloitaraímana nia  
uiñoñedicue; iadedi cominina  
bautizallena, cuena oretagamiedi jaie  
cuemo llote: “Cue Joreño ana billana  
damiemo baillana ico ciotio. Cue Joreño  
baillamiedi cue Joreño omoimo feacaite”.  
<sup>34</sup>Naie rafuena ciodicue. Iemonia  
naimiedi Jusiñamui Jitonana lloticue.

### Jesús ie fetoacaga comini ie rafue

<sup>35</sup>Ie areruido Juan micori  
llofueoicaiganomona menamie Juan  
micori diga ia, <sup>36</sup>Juan micori Jesús  
macarillana ciuano, raite:

—Ero, Jusiñamui Jito toica llauda  
mamecido jai bite.

<sup>37</sup>Juan micori diga itiiaimai naiena  
cacajano, Jesúna racadiiaimai.

<sup>38</sup>Jinafo dine erodajanona, Jesús  
iaimaiaina ciode. Iaimaiaina jicanote:

—¿Buena jitaidomico?

Iaimaiai dinena uai ottiaimaiai:  
—Rabbí, ¿ni o jofo? ¿Ninomo itio?  
—uai ottiaimaiai. Rabbí oni  
dobaiñuamona: “Llofueraima raillamie”.

<sup>39</sup>Jesús nai iaimaiai uaina ote:  
—Mai. Cue diga bi, omico uiñollena.  
—Ie jira jaidaimaiai. Jesú illanona  
ciodaimaiai. Jitoma nia a illa jira,  
nairuido naimie diga fiebidaimaiai.  
Jitirecaidemo oni jaidaimaiai.

<sup>40-41</sup>Naie iaimaaimona damie  
Andréna mameciredimie. Jesú dinena  
naimie jaidemo, ie ama nano jenuaide.  
Naimie amadi Simón Pedro. Naimien  
baillanona, llote:

—Jai cai cominina Jilloitaraimana  
baiticue. Cristo raillamienra baiticue.  
<sup>42</sup>Ie mei Jesú dine naimienra uite.  
Jesú naimienra eo eruaillanona, raite:  
—Birui o mamecidi Simón. Juan ie  
jitudio. Biruimona Cefana jiai  
mamecirenito —raite. Oni dobaiñuacidi  
Pedro.

### Jesús menamie uaidua rafue

<sup>43</sup>Ie areruido Jesú Galileamo  
jaiacade. Felipena baillanona raite:  
—Cue llofuegamienra o jaillena, cue  
diga coco jaillesa, mai cue diga bi.  
<sup>44</sup>Felipedí Betsaida nairai imie. Andrés  
iaimaima Pedro diga daje nairai iaimaima.  
<sup>45</sup>Jesú naimiemo llua mei, Felipedí  
Natanaelna oni jenuaide. Higuera riilla  
riara anamo naimienra baillanona, raite:  
—Moisés micorí jaie cuegamienra jai  
baiticue. Jusiñamui lloraini micoriaidi  
naimienra jaie jiai cuetimaci. Naimiedi  
Jesú. Nazaret imie. Ie moodi José.

<sup>46</sup>Natanael naie nairaina uaitajanona  
raite:  
—Nainomo mare comedí iñede.  
Felipe dinena raite:  
—Naie o uiñollena, cue diga mai bi.  
<sup>47</sup>Jesúmona iaimaimaiai iaire ia, Jesú  
dinena llote:

—Ero, buna jifueñegamie billa.  
Nanoca Israel imie bite.  
<sup>48</sup>Natanael dinena uai ote:  
—¿Bu cuena llogao? ¿Niese cuena  
uiñotio?

Jesús uai ote:  
—Felipe ona aillí nia baiñenia, higuera  
riilla riara anamo o illana jai uiñoticue.  
<sup>49</sup>Jacinaillamona, Natanael dane uai  
ote:

—Maestro, odi Jusiñamui Jitudio. Cai  
comini illaimadio.

<sup>50</sup>Jesú dinena uai ote:  
—Amena anamo o illana cue uiñua  
jira, cuena iiñotio. Diga siño rafuena  
ciojito. Bie rafue baifemo finuana  
ciojito. <sup>51</sup>Jusiñamuimona billanona,  
iiñima jaidicue. Uanaicino omo lloticue.  
Mona ecorillana o cioia, Jusiñamui  
jaenínsai cue dine billena cioitio.  
Cuemona abido jaillena jiai cioitio.

### Jinuimona Jesú vino finua rafue

**2** <sup>1</sup>Menarui illanona, Galileamo  
Canámo iima ie ai uarfue ite.  
Rafue nama uaidua jira, nainomo Jesú  
ei jaide. <sup>2</sup>Jesú jiai uaidoga. Ie  
llofueoicaiganodicaí jiai uaidogacai.  
<sup>3</sup>Vino cueillamona, Jesú ei Jesúmo  
llote:

—Vino jai iñede.  
<sup>4</sup>Jesú dinena uai ote:  
—Quei, ¿bue ñellena iese cuemo  
llotto? Siño rafue cue finolle facaisesdi  
nia riñede.

<sup>5</sup>Iemei ie eidi rafue nama mullaiaimo  
llote:

—Naimie omoimo lluana fino.  
<sup>6</sup>Jinui nainomo eenollena, nainomo  
seis noficimona finoca llerodana  
raisoide. Naiemona jinuina ouidimaci.  
Marena illena, cai einamaci llua isoi,  
jofomo naimaci ria, naimaci abiaína  
lleruidimaci. Naga lleroda níbái cinco  
latas totaca. <sup>7</sup>Mullaiaimo Jesú llote:

—Naie llerodaiaina jinui diga oruita.  
—Pozomona jinui atiano, naie  
llerodamo toidimaci.

Iena finua mei,<sup>8</sup> Jesús naimacimo llote:  
—Llerodamona janore jisa uanona,  
rafue nama dine uiño.

<sup>9</sup>Naie facaiseconi naie jinuidi vinona  
jaide. Rafue nama naiena facade.  
Naimiedi ninomona naie vino uana  
uiñofede. Dani nainomo ite mullaiai  
uiñotimaci. Jirua mei, ai otimie  
uaiduano,<sup>10</sup>raite:

—Rafue bu finoia, eo caimaredede vino  
nano fecade. Comini ailluena jirua mei,  
janore caimaredede vino fecade; iadedi  
iese fecañedio. Eo mare vino jinafona  
fecadio —raite.

<sup>11</sup>Galileamo Canámo Jesúdi siño  
rafuena nano finode. Iemonia caina ie  
uai siñona uiñotade. Ie muidona naimie  
siño Jitonana iiñoticai.

<sup>12</sup>Rafue fuilla mei, Capernaumo Jesús  
ie ei diga, ie amatiai diga, ie  
llofueoicaiganodícai diga jaide. Nano  
nigarui nainomo iticai.

**Jusiñamui jofomona Jesúdi rana  
fecarainina dotaja rafue**  
(Mt. 21.12-13; Mr. 11.15-18;  
Lc. 19.45-46)

<sup>13</sup>Pascua railla rafue iaire iacana jira,  
Jerusalémo Jesús cai diga jaide.  
Egiptomona cai jaiagai jillobiliana  
comecillena, naie rafue ite.<sup>14</sup>Rillano,  
Jusiñamui jofomo diga rana fecarainina  
ciode. Ucube ollena, nainomo juraretaiai,  
toica llaudaiai, ucugiai fecauidimaci.  
Ucubena meidorainidí jiai itimaci.

<sup>15</sup>Naimaci ocainaiai diga naimaci jino  
jiullena, rao Jesús uanona, iena lleride.  
Naimaci ucubena judaide. Mesaiaina oni  
caitade.<sup>16</sup>Ucugiaina fecarainimo llote:

—Omoi ucugiaina jino uiño. Cue Moo  
jofomo ra feca-fecajana jitaiñedicue  
—llote.

<sup>17</sup>Iemo Jusiñamuina lloraini micoriai  
cuegafuiaina jai comecitícaí. Iese jaie  
cuega: “O jofona cue riuduamona, jiaino  
cuena meinetaitimaci”.<sup>18</sup>Nainomo ite  
judíuai illaicomini dinena raitimaci:

—¿Nie isoide uaido naimacina jino  
oredio? Siño rafuena fino, siño uai omo  
illana cai uiñollena.<sup>19</sup>Jesús uai ote:

—Bicona judai. Darui amani  
majijamona iena dane nillana fuidoiticue.

<sup>20</sup>Dane raitimaci:

—Cuarentiséis años bicomo  
majjidimaci, iena finollena. ¿Niese iena  
darui amani illanona, iena dane nillana  
fuidoitio?

<sup>21</sup>Iese raitimaci; ia Jesúdi Jusiñamui  
jofona ñaiñede. Dama ie abina ñaite.  
Fiotaillamona ie jilloillena ñaite.

<sup>22</sup>Jesús fiotaillamona naimie jillua mei,  
ie llofueoicaiganodícai bie lluacinona  
comeciticai. Ie jira naie cuegafuena  
iiñoticai. Jesús lluacinona jiai iiñoticai.

### **Jesúdi comini comeciaimo iticino lluana jitaiñena rafue**

<sup>23</sup>Pascua railla rafue facaiseconi  
Jerusalémo Jesús ia, diga siño rafuena  
finode. Ie jira ailluena comini naimie  
uaina iiñotimaci. Coniniri raitimaci:

—Naimiedi cai Jilloitaraima.

<sup>24</sup>—Naganomo comeciaína naimaci facaja  
jira, naie cominina naimie uiñuamona,  
Jesús naimaci motomo iacaiñede.

<sup>25</sup>Naimaci comeciaimo iticinuaina naimie  
eo raise uiñua jira, comini rafuena  
naimiemo bu lluana jitaiñede.

### **Nicodemo Jesús diga ñaia rafue**

**3** <sup>1-2</sup>Judíuai illaicomini mona damiedi  
Nicodemo. Naimiedi fariseo imie.  
Naiona Jesús dine billanona, raite:

—Maestro, cai cominina llofuelleña,  
Jusiñamui ona orede. Iena uiñoticue.  
Siño rafuena o finua jira, Jusiñamui uai  
omo illana uiñoticue.

<sup>3</sup>Jesús dinena uai ote:

—Raise lloitío; ia daje rafue omo lloiticue: Uanai omo lloiticue. Dane abido comonori o jeiciñenia, Jusiñamui ie cominina sedajanomo jaca initio.

<sup>4</sup>Nicodemo abido jicanote:

—¿Niese eimie ie ei jeraimo dane iite? Niese dane comonori jeiciite?

<sup>5</sup>Jesús uai ote:

—Uanai omo lloticue. Jusiñamui ie cominina sedajanomo o illena, dama o eimona jeiciñellio. Jusiñamui Joreñodo bu dane comonori comuitañenia, Jusiñamui ie cominina sedajanomo jaca iñeite. <sup>6</sup>Comemonia cai comuitaia, jaca comedicai; iadedi Jusiñamui Joreñodo cai comuitaiaidedi, Jusiñamui uruedicai. <sup>7</sup>Omo dane lloiticue: Comonori jeicia. Ieri raijicaiñeno. <sup>8</sup>Iena o raise cacaillena, jiae rafuedo iena lloiticue. Aifidi ie jitalla dine sairide. Iena cacadio; iadedi ninena billana uiñoñedio. Nine jaillana jiae uiñoñedio. Ie isoide. Niese Jusiñamui Joreñodo cominina comuitajana jiae uiñoñedio.

<sup>9</sup>Nicodemo dane jicanote:

—¿Niese biedi dane iite? Raise cacaiñedicue.

<sup>10</sup>Jesús uai ote:

—Jusiñamui rafuena omoi cominina llafuecabitio. Jusiñamui rafuena omo lloticue; ia iena raise cacaiñedio.

<sup>11</sup>Uanaicinona omo lloticue. Abi uiñuamona omo lloticue. Cue ciua rafuena lloticue; iadedi cue lluana iñonoñedio. <sup>12</sup>Bene ite rafuena cue lloia, iena iñonoñediota, monamo ite rafuena cue lloia, iena jiae raise iñonoñetio.

<sup>13</sup>Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoticue.

<sup>14</sup>Monamona biticue; ia amenamo fioldaiticue. Jofue iñenanomo Moisés

micori jaio joreño amenamo jaie cuinade. Jaioniai ainillamona comini fioldaiñellena iena cuinade. Comini ie isoi jilloillena, ie isoi cuena coraiitimiaci. <sup>15</sup>Cue fioldaillamona bu cue uaina iinoia, monamo jaca iite.

### Jusiñamuidi cominina eo isiruilla rafue

<sup>16</sup>Jusiñamuidi cominina eo isiruilla jira, comini díne ie damiede Jitona orede. Ie Jitona naimaci iñollena, naimiena orede. Naimiena iñuamona, monamo jaca iñtimaci. Jiae faifiñeitimiaci. <sup>17</sup>Naimacina duere finotallena ie Jitona oreñede; iadedi naimaci jeacynomona jilloillena, naimiena orede. <sup>18</sup>Jusiñamuidi Jesús uaina iñotínona jaca duere finoñete; iadedi ie dajede Jitona uaina naimaci iñonoñena jira, Jusiñamui duere finollicino anamo jai itimaci. <sup>19</sup>Comini comeciaína lligaiñollena, Jusiñamui Jito bite. Jeacino comeciaímo illana naimaci uiñollena, naimaci comeciaína lligaiñuaibite; iadedi naimaci comeciaítiiredinomo iacana jira, jearede rafue naimaci finua muidona, naimiena jitaiñedimaci. Ie jira Jusiñamui naimacimo duere finollicinona anamo jai itimaci. <sup>20</sup>Naimie finoca rafue bai raillano, naga jeacino finoraima ie comeci lligaiñuana jitaiñede; <sup>21</sup>ja Jusiñamui jitailacínona finodino naimaci finoca rafue baillena, lligaiñotimie díne marefodo bitimaci.

### Juan micoridi Jesúna dane ñaia rafue

<sup>22</sup>Digarui illanona, Jesús ie llafueoicaiganodicai diga, Judea railla eniruemona macaricana jaidicai. Nainomo diga irui fiebidicai. Llofuiamona iñotínona bautizacana uiticai. <sup>23-24</sup>Nia cárcelmo iñenia, ailluena jinui nainomo

illa jira, Enón railla nairaimo bautizajanomo Juan micori jiai ite. Salim railla nairai iairei ite.<sup>25</sup> Naie facaise Juan micori llofueoicaigano judíuai imie diga bautizajana siadotimaci.<sup>26</sup> Ie muidona Juan micori dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Alluena comini naimie dine jaioidimaci. O dine jai raise biñedimaci.

<sup>27</sup>Juan uai ote:

—Jusiñamui ie uai fecañedena, Jusiñamui facaina buna jaca buena finonide.<sup>28</sup> Cue lluana navui cacadomoi. Lloticue: “Cai comini Jilloitaraimañedicue. Cristoñedicue. Naimie billena cue llollena, Jusiñamuidi naimie uicomu cuena orede”.<sup>29</sup> Jiae rafuedo iena lloitcue. Damie ie aína ua mei, dama naimemo duide. Ie aína ua rafue facaise, naimie nabai iena ciuano, ieri jiai iobide. Ie isoide. Comini cue dine navui biñoidimaci. Birui Jesúmo jaioidimaci. Naimemo jai duidimaci. Iena cue cacajamona, ieri iobidicue.<sup>30</sup> Comini naimie uai siñona uiñuana jitaidicue. Comini cue jamai bue isoidimiena uiñuana jiai jitaidicue.

<sup>31</sup> Jamai comedicue. Ie jira eniruemo ite rafuena llocabiticue. Jusiñamui mona Jesús billa jira, cai baifemo faite.<sup>32</sup> Ie Moo illanomo ciua rafuena llote. Ie Moo illanomo cacaja rafue jiai llote; iadedi eo janore comini naimiena iñotimaci.

<sup>33</sup> Naimiena iñotimedi Jusiñamui uanaicinona lluana raise uiñote.

<sup>34</sup> Jusiñamuidi ie Joreño ie Jitomo caidiñeno fecaja jira, naimie Jusiñamui uaina llocabite.<sup>35</sup> Jusiñamuidi ie Jitona isiruite. Ie jira naga rafue naimemo fecade.<sup>36</sup> Bu Jusiñamui Jitona iñoia, Jusiñamui illanomo jaca iiite; iadedi bu

naimiena iñotimena, Jusiñamui illanomo jaca iñete. Jusiñamui riicallafue anamo jai ite.

### Galileamo Jesús jailla rafue

**4** <sup>1-2</sup>Naie facaise ailluena comini Jesúmona fueotimaci. Iemei naimie dibeido bautizadimaci. Naimacina naimie bautizallena, janore comini Juan dine jaide. Jesúdi bautizadíede. Dani ie llofueoicaiganodíai bautizadíaci. Fariseuái bie rafuena fidiano, iena Jesús uiñua jira,<sup>3</sup> Judeamona Galileamo Jesús cai diga dane abido jaide.

### Samaria iñaiño diga Jesús ñaia rafue

<sup>4</sup> Galileamo jaillena, Jesúdi Samaria railla enirue dibeido jaiacade.

<sup>5</sup> Samariamo cai ria, Sicar railla nairaimo iairei rillano, daje pozomo ridíaci. Naie pozodi Jacob micori jaie finoca. Jacob micori naie pozo illano ie jito José micorímo jaie fecade.<sup>6</sup> Jitoma naidai itemo, naie pozo fuemo cai rillano, Jesús ana raide. Are macarillanona, jafaici ote.<sup>7-8</sup> Jesús pozomo fiebicaila meinona, Sicarmo jaidíaci, guille ollena. Cai jailla mei, Samaria iñaiñodi jinui ollena, pozomo bite. Jesús naiñaiñomo jicade:

—Jinuina cue ine, cue jirolesa.

<sup>9</sup> Naiñaiñodi uai ote:

—Judío imedio. Samaria iñaiñodicue. ¿Niese cuemo jinuina jicadio?

—Naiñaiño iese raite, judíuai Samaria comini diga ñairainina jira.

<sup>10</sup> Jesús dinena dane uai ote:

—Jusiñamui omo feaca calle ra uiñotiodena, o diga ñaitimiena uiñotiona, cuemo jaca itataite jinuina cuemo jicadio. Iemei omo iena fecadicue.

<sup>11</sup> Naiñaiño uai ote:

—¿Niese bie pozomona jinuina oitio? Eo ana ite. ¿Ninomona jaca itataite

jinuina oitio? <sup>12</sup>Cai usuma Jacob micori bie pozo caímo jaie iñonocaiga. Naiemona naimie micori jaie jirode. Ie uruiai micoriai jiai naiemona jirodimaci. Ie ocainaiai dajemona jiai jirodimaci. Cai usuma micori baifemo faiñedio —raite.

<sup>13</sup>Jesús uai ote:

—Nagamiai bie jinui jirua mei, dane jiroacanite; <sup>14</sup>iadedi cue fecalle jinuina jirua mei, dane jiroacaiñenite. Cue fecalle jinui, torafo illa isoi, naimiemo jaca iiye. Jusiñamui dñe illena, naimiema jaca itataite.

<sup>15</sup>Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

<sup>16</sup>Jesús dinena uai ote:

—O jofomo mai jai. O ini diga abido bene bi.

<sup>17</sup>Naiñaiño uai ote:

—Innidicue.

Jesús dinena uai ote:

—Uanai llotio. Ua innidio. <sup>18</sup>Cinco diga inina jai faicadio. Birui o diga itimiedi jiai o iniñede. Uanaicinona ua llotio.

<sup>19</sup>Iemona abina uiñocaillamona, naiñaiño dinena uai ote:

—Odí Jusiñamui ie lloraimadio. Iena uiñoticue. <sup>20</sup>Cai jaiagai bai bene ite anedumo Jusiñamuina sedauidimaci. Ie jira nainomo Jusiñamuina nia sedadicai; iadedi omoi judíuaí dinena raitomoi: “Jerusalémo Jusiñamuina cai sedauilla”.

<sup>21</sup>Jesús dinena dane uai ote:

—Cuená iino. Jiairuido bai bene ite anedumo cai Moona sedañeitomoi. Jerusalémo naimiema jiai sedañeitomoi. <sup>22</sup>Raise uiñómeno Jusiñamuina biruido sedadomoí; iadedi cai nairaimona cai Jilloitaraima illa jira, naimiema raise uiñuana sedadicai. <sup>23</sup>Jiairuido, ua birui, cominidi: “*¿Ninomo Jusiñamuina*

sedaiticai?” raillamo comeciaina facañeitimaci. Naimaci comeciai jitailamona, naimaci illanomo Jusiñamuina ua sedaitimaci. Naie isoide comini naimiema sedajana Jusiñamui jitaide. <sup>24</sup>Jusiñamui comeñede. Naimiedi jafaici. Omoi comeciai jitailamona naimiema omoi sedajana jitaide.

<sup>25</sup>Riño uai ote:

—Cai Jilloitaraima billena uiñoticue. Naimiedi Cristo. Naimie bia, nana bie isoide rafuena caina raise uiñotaite.

<sup>26</sup>Jesús raite:

—Naimiedicue.

<sup>27</sup>Ieconi abido ridicai. Riño diga Jesús ñaia jira, raijicaidicai; iadedi: “*¿Buena naiñaiño jitaide?*” raillano jicanoñedicai. “*¿Buena ñaitomico?*” raillano jiai jicanoñedicai. <sup>28</sup>Ie Ileroda pozo ecimo rainanocaida, Jesús llua isoi, naie facaise naiñaiño ie nairaimo abido jaide. Nainomo abido rillanona, naiñaiño cominimo llote:

<sup>29</sup>—Ailli pozo fuemo cue jaca cioiraininamie diga dafaifidicue. Nana cue finouiga rafue diese cuemo llote. Mai, cai jibuisailli. Naimiedi pozo fuemo ite. Nibai naimiedi cai Jilloitaraima. Naimiedi nibai Cristo.

<sup>30</sup>Ie jira Jesús dñe ailluena comini bitimaci. <sup>31</sup>Naie riño ie nairai dñe jailla mei, abido cai dñe nia riñenia, Jesúna raiticai:

—Maestro, mai guíño.

<sup>32</sup>Naimie uai ote:

—Cuemo guille illana uiñóñedomoi.

<sup>33</sup>Coniniri siadoticai:

—Jai nibai bu ecajaibiga.

<sup>34</sup>Jesús uai ote:

—Jusiñamui cuena oretate. Naimie jitaila rafuena finocana jaidicue. Naimie rafuena cue lluamona, jai guiticue isoidicue. <sup>35</sup>Comecina facadomoí: “Jusiñamui uaina nia

lloñeiticaí. Ico iena lloiticaí”. Ie isoide. Illímo riara nia llisiñenia, comeciaína facadomoí: “Riara einaillena, naga amaga fivui fiebite. Naie facaise maijiiticaí”. Omoimo lloticue: Omoi ecimo eruai. Riara jai einaite isoide. Naimacimo Jusiñamui rafue llollena, iena naimaci iinollena, ailluena comini jai itímaci.<sup>36</sup>Naie llisillamo maijiitimiiedi ie ucubena feiñoite. Ie isoide. Jusiñamui rafuena damierie llocabillamona, comini iena cacadimaci. Jiaíno billamona, iena dane cacajamona, iena iinotimaci. Naie mare rafue lloraini ibana feiñoitímaci. Jusiñamui dibeimo naimaci dajena maijia jira, dajena iobitimaci.<sup>37</sup>Cai comini iena raicabitímaci: “Damie iduaína rite; ia jiaimie llisillana ote”.<sup>38</sup>Ie isoide. Omoína oredicue, comini cue dibeimo itatallena. Naimacimo cue uaina nano lloñedomoí; iadedi nano jiaíno naimacimo cue uaina llotímaci. Ie jira nana omoi llofuiamona cue uaina iinoitímaci.

<sup>39</sup>Samaria iñaiño lluamona, naiñaiño nairaimona ailluena comini Jesúna iinotimaci. “Naimiedi nana cue finoca rafuena cuemo llote” naimacimo naiñaiño llote. “Naimiedi cai Jilloitaraima” raillanona Jesúna iinotimaci.<sup>40</sup>Jesús dine naimaci rillanona, naimaci diga naimie fiebillena, Jesúmo jicanotimaci. Ie jira Jesú menarui naimaci dinomo fiebide.

<sup>41</sup>Naimie llofuiamona, jiae ailluena comini naimiena iinotimaci.<sup>42</sup>Riñomo llotímaci:

—Daño o lluamona, navui iinotimaci; iadedi naimie uaina cai cacajamona, birui raise iinotimaci. Naimiedi comini ua Jilloitaraima.

<sup>43</sup>Menarui illanona, nainomona Galileamo Jesú cai diga jaide.<sup>44</sup>Caimo llote:

—Jusiñamuina lloraimadi ie nairai illanomo ia, naie comini naimie lluamo cacarefiacaiñedimaci;<sup>45</sup>iadedi Galileamo cai rillanona, nainomo itino naimiena caimare feiñotimaci. Pascua raiilla rafue facaise Jerusalémo nana naimie finoca rafue navui naimaci ciua jira, naimiena caimare feiñotimaci.

### Jesúdi illacomini jitona jillotaja rafue

<sup>46</sup>Galileamo Jesú cai diga macaria, dane Canámo ridicai. Nainomo jinuimona vino navui finode. Nainomo cai ia, Capernaum railla nairaimo itímie jito duide. Duidimie moodi gobierno diga maijíuide.<sup>47</sup>Judeamona Galileamo Jesú illana naimie fidiano, Canámo bite. Jesú illanomo billena, ie jito jai fioldaiacana jira, ie jitona jillotallena Jesúmo duere jicanote.<sup>48</sup>Jesú naimiemo llote:

—Siño rafuena omoi cioiñenia, cuena iinoñedomoí.

<sup>49</sup>Uai ote:

—Maestro, cue diga bi, cue jito fioldaiñellesa.

<sup>50</sup>Jesú uai ote:

—Mai jai. O jito jai fioldaiñete —llote. Naie iima Jesú uaina iinuano, ie jofomo abido jaide.<sup>51</sup>Naisoná naimie jaidemo, ie mullaiai diga afeedo beici dafaifide. Llotímaci:

—O jito jai jillode.

<sup>52</sup>Ie jira naimie jicanote:

—¿Nino jitoma itemo, jillode?

Uai otímaci:

—Navui are jitoma oni lluai caidemo, abi cuarilladi fainonocade.

<sup>53</sup>Ie comeciná facade: “Navui are naie facaise Jesú cuemo llote: ‘O jito jai jillode’”. Ie mullaiai lluana cacajamona, naimiedi Jesúdi cai Jilloitaraimana iinote. Nana naimie jofomo itino jiai iinotimaci.<sup>54</sup>Judeamona Galileamo

Jesús abido billano, siño rafuena iese jai finode.

### **Joraibimo tisitaitimie jillua rafue**

**5** <sup>1</sup>Digarui illa mei, cai judíuai rafue iacana jira, Jerusalémo Jesús abido jaide. <sup>2</sup>Jerusalémo toica llaudaiai jaisoilla nase facaimo joraibi ite. Cai judíuai uaimona nai joraibi mamecidi Betesda. Naie jorai fuedo ite cinco jifocotiai. <sup>3</sup>Nainomo diga duidino biidimaci: uisinidimaci, ūju-ūjujacaidino, tisitaitino. Jinuina begollena sedadimaci. <sup>4</sup>Feide isoide mona dacaiño Jusiñamui jaienicidi jinuina begotallena bite. Iemei nai jinuimo nano jaidimie ie duicomona jillode. <sup>5</sup>Duidino motomo tisitaitimie ite. Treintiocho años duide. <sup>6</sup>Naimieno ciuano, naimie are duillana uiñuamona, Jesús naimiemo jicanote:

—¿Jilloiacadio?

7Duidimie uai ote:

—Jii; iadedi jinuina begoia, jaca buna ñeede cue canoiten. Ie jira jiaimiedi cue uicodo jinuimo jaide. Ie jirari nia jilloñedicie.

8Jesús uai ote:

—Mai naidacai. O biira ferinocaida macari.

9Ieconi naimie jillode. Ie biira ferianona oni jai macarite.

### **Sábadoruimo duidimie jilloitajana siadua rafue**

Sábadoruimo, judíuai jafaici ouillaruimo, naimie jillode. <sup>10</sup>Ie jira judíuai illaicominidi jillodimiemo lloote:

—Birui sábado. O biira abinocaida o ulla jira, Moisés micorí rairuica rana jai finodio. Sábadomo maijinidicai. Birui jafaici uaruimo jaca buena jetanidicai.

11Naimie uai ote:

—Cuenca jilloitativie cuemo lloote: “O biira mai ferinocaida macari”.

12Judíuai dinena jicanote:

—¿Bu iena omo lloote? —Naimie uiñoñena jira, uai oñede.

13Jesúdi comini motomo itabilla jira, ailluena comini illa jira, jai jillodimie ie jilloitativie uiñoñede. <sup>14</sup>Ie meinocomi dallu illanona, Jusiñamui jofomo Jesús dinena naimieno baite. Lloote:

—Jai jillodio. Abido dane eo duere o sefusa, dane jeacinona finoñeno.

15Ie mei judíuai illaicominidi jillodimie lluaide. Lloote:

—Jesús raillamie cuena jillotate.

16Sábadoruimo Jesús bie rafuena finua jira, judíuai illaicominidi naimieno duere finoacasite. <sup>17</sup>Jesúdi abina riiduano lloote:

—Cue Moodi ie jitaila rafue jaca finode. Ie isoi cue jitaila rafue finocana jaca jaidicue —lloote. <sup>18</sup>Sábadoruimo naimacimona Jesús maijia jira: “Jusiñamuidi cue Moo” naimie railla jira: “Jusiñamuidicue” naimie railla jira, judíuai illaicominidi naimie meinellena eo jitaidimaci.

### **Jesús ie Moo isoi finua rafue**

19Naimacimo Jesús lloote:

—Uanaicinona lloticue. Buena dama finonidicue. Cue Moo finua rafuena ciuano finocabidicue. Cue Moo finua isoi finodicue. <sup>20</sup>Cue Moo cuena isiruillanova, nana ie finoca rafuena cuena jai uiñotade. Naimie Jitona cue illa jira, bie iimana cue jilloitaja baifemo jiaie siño rafuena finoiticue, omoi raijicaillena. <sup>21</sup>Fiodaitinona jilloitallena, cue Moomo ie uai ite. Naie uai cuemo jiai ite. <sup>22</sup>Cue Moo juez isoi naimacimo juez isoi cue llollena, naimaci duere sefuillena, ie uai cuemo iga. <sup>23</sup>Omoi díne naimie cuena oretate. Naimiedi omoi cuena iobitajana jitaide, naimieno omoi iobitaja isoi. Cuenca

omoi iobitañenia, cue Moona jiai iobitañedomoi.<sup>24</sup> Uanaicinona lloticue. Cue uaina bu cacaia, cuena oretatimiéna bu iinoia, monamo jaca iiite. Jearede rafue naimie finua facaina duere sefuiñeite. Faifíñeite; ia monamo Jusiñamui diga jaca iiite.<sup>25</sup> Uanaicino lloticue. Jusiñamui Jitodicue. Ua birui cuena iinoñedino cue uaina cacareitimaci. Cuena cacajamona, cuena iinuamona, jaca itimaci.<sup>26</sup> Cominina jaca itatallena, cue Moomo uai ite. Comini jaca itatallena, cuemo ie uai jiai iga.<sup>27</sup> Cuena iinoñedino juez isoi cue llollena, naimemo cue duillamona, ie uai cuemo jiai iga.<sup>28</sup> Ieri raijicaiñeno. Jairuido nana jai fiodaitino diese cue lluana cacaitimaci.<sup>29</sup> Fiodaillamona naimaci abiai jilloitimaci. Ie mei cue jitillacinaona finodino jaca illena lloitice. Cue jitillacinaona finoñedino diese duere sefullena lloitice.

<sup>30</sup> Naimacimo cuena oretatimie jitaila isoi lloitice. Dama cue comecimo ite rafuela cue lloñena jira, bie lluacinodi uanaicino.

### Jusiñamui ie Jito uaina comini iinoñena rafue

<sup>31-32</sup> Jesús nia llote:

—Dama cue abina cue lloiaidedi, bu cuena jaca iinoñede; iadedi Jusiñamui cue facaina jiai llote. Naimie lluacino uanaicino. Iena uiñotice.<sup>33</sup> Naimienca cacareillena, Juan Bautista micori díne cominina navui oretatomoi. Abido naimaci bia, naimaci cacaja rafuela omoimo llollena, naimacina oretatomoi. Juan lluacinodi uanaicino.<sup>34</sup> Naimie micori cue rafuela llouide; iadedi naimie micori llogacinomo omoi comecio facajana birui jitaiñedicue. Cuena omoi iinollena, naimie mameciná jai llinoticue.<sup>35</sup> Lamparín raise lligaiñua isoi, ie rafuedo Juan micori omoi

comeciaimo iticinona raise uiñotade. Dallu ieri iobidomoi.<sup>36</sup> Cue finoca rafue Juan micori finoca rafue baifemo faite. Cue siño finoca rafuela ñaiticue. Cuena naimie oretajamona, cue Moo uaido iena finodicue. Ie jira naiemona naimie dinena cue billana jai uiñotomoi.<sup>37</sup> Cue finoca rafue muidona cuena uiñotomoi; iadedi naimie lluana jaca cacaiñedomo. Naimienca jiai jaca cioiñedomo.<sup>38</sup> Cuena omoi iinoñena jira, naimie uaina feiñoñedomo. <sup>39</sup> Jusiñamui díne omoi rillena, Jusiñamui facaina lloraini micoriai cuegafuaína facacabidomo. Naufuaídidi cuena ñaite;<sup>40</sup> iadedi Jusiñamui díne omoi rillena, cue uaina iinoiacaiñedomo. <sup>41</sup> Cuemo iobillacinaona omoi fecallena sedañedicue.<sup>42</sup> Jusiñamuina isiruiñedomo. Iena uiñotice.<sup>43</sup> Cue Moo mamecido cue billanona, cuena feiñoñedomo; iadedi dama ie mamecido jiaimie bia, naimienca feiñoñomoi.<sup>44</sup> Jaca iinoiacaiñedomo. Iobillacino coninimo fecadomo; iadedi ua Jusiñamuidi omoina “Mare” raillana jitaiñedomo.<sup>45</sup> “Cue Moomo omoi maraiñede finoca rafuela lloitice” raillanomo comeciaina facañeno. Moisés micori cuegafuaímo omoi llogiduafue jai ite. Moisés micori cuegafuaíai muidona Jusiñamui díne omoi jaca illemo ocuiridomo.<sup>46</sup> Moisés micori cuegafuaína iinotomoína, cuena naimie micori cuia jira, cuena jiai iinoñomoi.<sup>47</sup> Naimie cuegafuaína iinoñedomo. Ie jira cuena jiai iinoñetomo —llote.

Jesús cinco llomenicomona  
ailluena cominina ecaja rafue  
(Mt. 14.13-21; Mr. 6.30-44;  
Lc. 9.10-17)

**6** <sup>1</sup>Jairuido Galilea railla jorai ie ruica dibeimo Jesús ie llofueoicaiganodicaí diga jaide. Naie

joraidi jiai Tiberiana mamecirede.  
<sup>2</sup>Duidinona naimie jillotaullana  
 naimaci ciua jira, ailluena comini  
 naimiena racadimaci. <sup>3-4</sup>Naie  
 facaiseconi pascua railla rafuedi jai iaire  
 ite. Jesú cai diga anedumo a jaillanona,  
 dinomo ana raide. <sup>5</sup>Oni erodatemo,  
 ailluena comini naimie dine billana  
 ciode. Felipemo jicanote:

—Naimaci guillena, ¿nynomona  
 llomenicona oiticai?

<sup>6</sup>Naimena facacillena, iena jicanote;  
 iadedi Jesú ie finolle rana jai uiñote.

<sup>7</sup>Felipe uai ote:

—Janore naimaci guillena, doscientos  
 digarui ie maijia ucube diese llomenico  
 oticaina, baiñede.

<sup>8</sup>Naie facaise caimona damie iena  
 cacade. Naimiedi Simón Pedro ama.  
 Andréna mamecirede. Naimie raite:

<sup>9</sup>—Cinco cebadamona finoca jenide  
 llomenico daje uruemo bene ite. Mena  
 lliciai jiai naimiemo ite; ia ¿niese  
 nibaiitcai? Baiñeite.

<sup>10</sup>Jesús caimo llote:

—Cominimo llono, ana imaci raillesa.  
 Ie jira raitire illanomo ana raidimaci.  
 Cinco mil iñiai itimaci. <sup>11</sup>Llomenicona  
 Jesú ua meinoconi, Jusiñamuimo  
 iobillacinona fecajano, Jusiñamuimo  
 jiíde. Iemei cominimo caina naie  
 llomenicona fecataate. Comini jitaila  
 dierise lliciai daje isoi fecataate.

<sup>12</sup>Naimaci monillamona, caimo Jesús  
 llote:

—Buena jaca faifiñellena, fiebide  
 guille danomo irai.

<sup>13</sup>Ie jira iena iraidicai. Naie cinco  
 llomenicomona, comini guigamona  
 fiebidemona, doce cirgaiaimo  
 oruitaticai. <sup>14</sup>Jesús finoca rafuena naie  
 cominidi cianona, llotimaci:

—Jusiñamui facaina lloraini  
 micoriaidi cai Jilloitaraima ico billena  
 jaie llotimaci. Bimiedi naimie.

<sup>15</sup>Naimaci illaimana naimie illena,  
 naimena gaitaacadimaci. Iena naimie  
 uiña jira, iena naimie jitaiñena jira,  
 aneduaimo naimie oni jaide.

### Capernaumo Jesús abido jailla rafue

(Mt. 14.22-27; Mr. 6.45-52)

<sup>16</sup>Jitoma ana itemo, jai navuidemo, ie  
 llofueoicaiganodici joraimo jайдicai.

<sup>17</sup>Cai botemo cai jaillano, ruica  
 Capernaumo jaiacadicai; iadedi Jesú  
 nia biñede. Jesúna sedadicalmo, naimie  
 biñena jirari, jai jitirena facaiseconi jai  
 jaidicai. <sup>18</sup>Riire aifí illa jira, jorai eo  
 bagode. <sup>19</sup>Níbai cinco, níbai seis  
 kilómetros jaidicalmo, damie cai dine  
 jinui emododo billana ciodianca. Bote  
 dine naimie billana cianona,  
 jacinaitcai. <sup>20</sup>Jesús caimo llote:

—Jesúdicuesa. Jacinaiñeno.

<sup>21</sup>Iena cacajanona, botemo naimena a  
 billana jitadicai. Ieconi ruica dine cai  
 jaiacananomo ridicai.

### Comini Jesúna jenua rafue

<sup>22-24</sup>Cai jailla mei, daje bote nairuido  
 illa jira, jinafomo fiebidino Jesú cai  
 diga jaiñenana uiñotimaci. Cai Nama ie  
 Moomo iobillacinona fecajanomo,  
 cominimo guille fecajanomo,  
 Tiberiamona dajerie botes naie facaise  
 iaire bite. Monaidemo, Jesúna naimaci  
 cioiñena jira, cai jiai iñena jira, naie  
 botiaido Capernaumo Jesúna jenollena,  
 jaidimaci.

### Jesús: “Llomenicodicue” railla rafue

<sup>25</sup>Ruica dine Jesúna comini  
 baillanona, jicanotimaci:

—¿Niruido bene ridio? <sup>26</sup>Jesús uai  
 ote:

—Navui are omoina cue ecajamona,  
 iemonia omoi monillamona, cuena

jenodomoi. Siño rafuena cue finuana ciodomoi; iadedi cuena nia iinoñedomoi. <sup>27</sup>Guille raire cueicabide. Cueiruide ramo comeciaina eo facaño. Cueiruiñede ramo comeciaina eo faca. Jusiñamui diga omoi jaca illemo comeciaina eo faca. Cue Moo Jusiñamui, iimana cue jaillena, cuena oretate. Ie uai cuemo illanona, cue uaina omoi iinuamona, Jusiñamui diga jaca iitomoi.

<sup>28</sup>Jicanotimaci:

—Nia Jusiñamui dibeimo iticaina, ¿nie isoidifue finodicaína mare?

<sup>29</sup>Jesús uai ote:

—Naimie oretagamie uaina omoi iinuana jitaide.

<sup>30</sup>Naimaci dinena dane jicanotimaci:

—¿Nie isoide rafuena finoitio? iena cai ciuano, o uaina cai iinollesa. <sup>31</sup>Cai jaiagai jofue iñenamoto Jusiñamuimona bite guilla ra guisoidimaci. Moisés micori iena jaie cuega: “Jusiñamuimona bite guiga ra naimacimo nagarui fecauide”. Iemo jiai birui ocuridicai. Naie isoide siño rafuena o finuana jiai cioacadicai —llotimaci.

<sup>32</sup>Jesús uai ote:

—Uanai lloticue. Moisés micori naie guiga ra jaca fecañede. Cue Moo iena fecauide. Birui naimedi monamona bite ua llomenicona omoimo jai fecaacade.

<sup>33</sup>Jusiñamui fecaacalle llomenico monamona jai bite. Comini iena guillamona, jaca iitimaci.

<sup>34</sup>Llotimaci:

—Nagarui caimo bie isoide llomenicona feca.

<sup>35</sup>Jesús uai ote:

—Llomenico guillamona iticai. Omoi llomenico isoidicue. Cuena iinuamona, monamo jaca iitomoi. Cuena iinotimie dane aimetañeite. Cuena isiruitimie jaca dane jiroacaiñenite. —Iese llote; ia

naimaci comeciaina ñaite. Naimaci comeciai jitillacino naimacimo jaca illena ñaite—. <sup>36</sup>Cuena ciodomoi; iadedi cuena iinoñedomoi. <sup>37</sup>Nana cue dibeimo cue Moo itatallinodi cuena iinoñitimaci. Cuemona naimacina jaca oni dotañeiticue. <sup>38</sup>Cuena oretatimie ie jitaila rafuena finollena, monamona jai biticue. Dama cue jitaila rafuena finoiticuena biñedicue. <sup>39</sup>Cuena oretatimiedi cue dibeimo itatallinomona buna faifillana jitaiñede. Jusiñamui lluaruimo fiodaillamona nana naimaci abiaina cue jilloitajana jiai jitaide. <sup>40</sup>Jusiñamui Jitona cue illana bu iinoia, cuena bu iinoia, monamo jaca iite. Jusiñamui llolliruimo fiodaillamona naimie abina jillotaiticue. Iese cue Moo jitaide.

<sup>41</sup>Jesúdi: “Monamona bite llomenicodicue” railla jira, judíuai illaicominiidi naimie uaina jamaillano iinosiñede. <sup>42</sup>Raitimaci:

—Bimiedi Jesús. José jito. Ie moona uiñoticaí. Ie eina jiai uiñoticaí. ¿Niese naimiedi: “Monamona biticue” raite?

<sup>43</sup>Jesúdi uai ote:

—Iese omoi naiñeno. <sup>44</sup>Naimiena cue Moo iinotaiñenia, bu cuena iinonide. Cuena bu iinoñenia, Jusiñamui llolliruimo fiodaillamona naimie abina jillotaiticue. <sup>45</sup>Jusiñamuina lloraini micoriai jaie iena cuetimaci:

“Jusiñamudi nana cominina ico llofueite” cuetimaci. Birui naie rafue jai suide. Naga cue Moomona cacarefidimie, naga cue Moomona fueotimie cuena jiai iinoite. <sup>46</sup>Buna cue Moona jaca cioñede. Naimiemona cue billamona, dama cue ciua. <sup>47</sup>Uanaicinona lloticue. Cue uaina iinotimie monamo jaca iite.

<sup>48</sup>Jesús dane llote:

—Llomenico guillamona iticai. Omoi llomenico isoidicue. Cuena iinuamona, monamo jaca iitomoi. <sup>49</sup>Jofue

iñenanomo omoi jaiagai  
Jusiñamuimona bite rana guisoidimaci;  
iaidedi fiodaitimaci. <sup>50</sup>Birui jiaie guille  
ra ite. Monamona ite. Iena bu guia,  
monamo jaca iiite. <sup>51</sup>Bie llomenicodi  
cue. Monamo cominina jaca itatallena,  
monamona biticue. Bu bie isoide  
llomenicona guia, jaca iiite. Bie  
llomenicodi cue abi. Comini facaina  
fiodaiticue.

<sup>52</sup>Iena cacajano, judíuai illaicomini  
coniniri naiena siadotimaci. Raitimaci:  
—¿Niese bimie abina riiticai?

<sup>53</sup>Ie jira Jesús dinena raite:  
—Uanai lloticue. Cue abina omoi  
riñenia, cue diruena omoi riñenia, cue  
Moo diga jaca iñeitomoi. <sup>54</sup>Bu cue abina  
riia, bu cue diruena riia, cue Moo diga  
jaca iiite. Fiodaillamona naimie abi  
iirairuimo jillotaiticue. <sup>55</sup>Cue abidi ua  
rille. Cue diruedi ua rille. <sup>56</sup>Bu cue  
abina riia, bu cue diruena riia, cuena  
nabaide. Naimieno jiai nabaidicue.  
<sup>57</sup>Cue Moo cuena orede. Naimiedi jaca  
ite. Cue Moo jaca illa jira, cue jaca  
iticue. Daje isoide. Bu cue abina riia,  
cue illamona, naimie jiai iiite. <sup>58</sup>Bie  
isoide guille ra monamona jai bite.  
Omoi jaiagai jaie guiga ra isoñede. Jaie  
fiodaitimaci; iaodedi bie guille ra birui  
bu guia monamo jaca iiite. —Iese llote;  
iaodedi naimie fiodaillamona, naimieno  
comini iñnuamona, Jusiñamui diga  
naimaci jaca illena ñaite.

<sup>59</sup>Capernaumo judíuai ofiracomo  
Jesús bienda llote.

Jesús diga jaisoidino  
naimie lluana siadua rafue

<sup>60</sup>Jesús diga jaisoidino naimie lluana  
cacajano, coniniri siadotimaci:  
—Bie llua eo irirede. Bu iena  
cacañede.  
<sup>61</sup>Jesúdi naimaci iese siaduana uiñote.  
Ie jira llote:

—Cue lluana raise iñofiedomoi.  
<sup>62</sup>Jusiñamuimona iimana jaillena jai  
biticue. Monamo abido ico cue jaillena  
cioitomoina, iena jiai nibai raise  
iñoñeitomoi. <sup>63</sup>Cai joreño caímo  
illamona, iticai. Dani cai abi diga iñedicai.  
Ie isoide. Cue llogacino Jusiñamuimo  
duide. Iena omoi iñnuamona, jaca iitomoi;  
<sup>64</sup>ia omoimona nana iñofiedomoi —llote.  
Nano dofocoimonas Jesúdi naimieno  
iñoñedonona uiñote. Naimieno  
gaitataitimieno jiai uiñote.

<sup>65</sup>Jesús dane llote:  
—Ie jira omoimo lloticue: Cue Moo  
jitañenia, cuena jaca bu iñonide.

<sup>66</sup>Iena cacajano, Jesús diga  
jaisoidinomona, diga comini naimieno  
fainonocaidimaci. <sup>67</sup>Ie jira ie doce  
llofueicaiganodíacomo Jesús jicanote:

—¿Jiai cuena fainonocaida, abido  
jaitomoi?

<sup>68</sup>Simón Pedro uai ote:  
—Nama, o diga cai jaiñenia, ¿bu diga  
jaiticai? Jusiñamuimo cai rillena, o isoi  
Jillotaraíma iñede. Jiaímo jaca  
itatajaracínodi iñede. <sup>69</sup>O lluana jai  
iñoticai. Jusiñamui mare Jitodio. Iena  
uiñoticai.

<sup>70</sup>Jesús dane uai ote:  
—Doce digamie fetocaomoi; iaodedi  
omoimona damie Taifemo jainaiaide  
—llote. <sup>71</sup>Caimona Judas Iscariote  
micorina ñaite. Judas micori Jesúna  
gaitataiacadimie.

Jesús amatiai naimieno  
iñoñena rafue

**7** <sup>1</sup>Jiairuido Galileamo ite nairaiaimo  
Jesús macarite. Judíuai illaicomini  
naimieno meineiacana jira, Judeamo  
jaiñede. <sup>2</sup>Jifocotiaiai railla rafue iaire  
ite. Judíuai ie rafue. <sup>3</sup>Ie jira Jesús  
amatiai naimieno llote:

—O diga jaicabidino o finua rafuena  
raise cioillena, beno fainonocaida,

Judeamo jai. <sup>4</sup>Bu ie mameci are soriacanía, bainino maijirainina. Ie isoide. Siño rafuena o finoia, ailluena comini illa motomo iena fino.

<sup>5</sup>Jesús amatiai naimieno iinoñena jira, iese raite. <sup>6</sup>Jesús dinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai. <sup>7</sup>Comini omoina enoiñedimaci. Naimaci finoca jearede rafuena cue llua jira, cuena jaca enoidimaci. <sup>8</sup>Jerusalémo rafuemo jai. Cue jaillirui nia riñena jira, nia jaiñeiticue. <sup>9</sup>—Iese lluano, Galileamo naimie fiebide.

<sup>10</sup>Naimie amatiai rafuemo jailla mei, Jesúdi naimaci jinapona dama bainino jaide. <sup>11</sup>Nai rafuemo judíuai illaicomini Jesúna jenuano baiñenano, cominimo jicanotimaci:

—¿Ninomo naimie ite? —Uiñoñena jira, comini uai oñedimaci.

<sup>12</sup>Ninomo ailluena comini itimaci. Comini illa motomo naimieno anado siadoside. Jiaino dinena: “Naimiedi mare” raitimaci. Jiaino dinena: “Naimiedi cominina jifuete” raitimaci. <sup>13</sup>Judíuai illaicominiña iciana comini jaciruillanona, anado siadoside. Jesúna marefodo buna ñaiñede.

#### Sábadoruimo Jesús maijia rafe

<sup>14</sup>Jifocotiaiai railla rafue atuedo fuitemo, Jesús Jusiñamui jofomo jaillano, llofuete. <sup>15</sup>Illaicomini naimie llofuiamona rajicaidimaci:

—¿Niese naimie abi uiñote? Eo rafuena uiñotimiemonia jaca fueoñede —raitimaci.

<sup>16</sup>Jesús uai ote:

—Dama cuemona oñega cue llofuiacinoi. Cuena oretatimie ie.

<sup>17</sup>Jusiñamui jitaillacínona finoiacadimiedi ninomona cue llofuiacínona cue uana uiñoite. Jusiñamui mona cue uana uiñoite. Dama

cue comecimona cue oñenana jiai uiñoite. <sup>18</sup>Bu dama ie comecimona ie llofuiacínona uanona lloia, naimiedi comini naimieno iobillacínona fecajana jitaide; iadedi bu ie oretatimieno iobitaia, uanai llote. Maraiñedicinona finoñede. <sup>19</sup>Moisés micori Jusiñamui uaina jaie llote; iadedi birui naie llogacínua nia raise iinoñedomoi. Iena raise iinotomoídena, cuena niade meineiacaiñedomoi.

<sup>20</sup>Comini dinena uai ote:

—Nibai uairitaidio. ¿Bu ona meineiacade?

<sup>21</sup>Jesús uai ote:

—Dacaiño sábadoruimo damiena jillotaticue. Ie jira cue uaina uaitatomoi. <sup>22</sup>Sábadoruimo jiai maijicabidomoi. Moisés micori iisaiai abiai diana omoimo jaie llote; iadedi naimie micori naiena nano lloñede. Naimie micori usumatiái naiena nano llotimaci. Sábadoruimo iisana abi dellirui ia, detomoi. <sup>23</sup>Moisés micori llogacínona iinollena, sábadoruimo iisaiaina detomoi. Sábadoruimo iimana raise jillotaticuelo, ¿bue ñellenia cue diga iciritomoi? <sup>24</sup>Cominimo jamai eruailanona, naimacina jeare ñaiñeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

#### Jesúna comini siadua rafue

<sup>25</sup>Ie jira Jerusalémo itino coniniri siadotimaci:

—Illaicomini bimieno meineiacadimaci; <sup>26</sup>iadedi beno marefodo naimie llofuete. Jaca buena lloñedimaci. Illaicomini: “Bimiedi cai Jilloitaraima” raillano nibai comeciaina facadimaci. <sup>27</sup>Bimie ie billanona cai uiñua jira, naimiedi cai Jilloitaraimañedimie. Cai Jilloitaraima baireia, jaca budí naimie billanona uiñoñeite —siadotimaci.

<sup>28</sup>Ie jira Jesú Jusiñamui jofomo naimie llofuiano llote:  
—Cuena uiñotomoi. Ninenas cue billana jiai uiñotomoi. Cue jitaila jira biñedicue; iadedi jiaimie cuena oretate. Naimiedi uanai llote. Naimienas uiñoñedomoi. <sup>29</sup>Naimiemona cue billa jira, naimienas uiñoticue. Cuena oretate —llote.

<sup>30</sup>Ie jira illacomini Jesúna gaitaacadimaci; iadedi naimie fiodaille facaise nia riñena jira, buna naimienas gaitañede. <sup>31</sup>Nairui ailluena comini naimie uaina iñotimaci. Raitimaci:

—Cai Jilloitaraima bia, ¿niese naimiedi bimie baifemo jiae rafuena finoite?

#### Jesúna gaitaiacana rafue

<sup>32</sup>Fariseuaidi comini iese ñaiana cacajano, Jesúna gaitallena, Jusiñamui diga nanoca ñairainidi ailluena policiana orede. <sup>33</sup>Ie jira naimacina Jesú dínenra raite:

—Dallu omoi diga nia iiticue. Le mei cuena oretatimie díne abido jaiticue.

<sup>34</sup>Cuena jenoitomoi; iadedi cuena baiñeitomoi. Cue díne binitomoi.

<sup>35</sup>Ie jira nainomo ite illacomini dani siadotimaci:

—¿Nine jaite? ¿Niese naimienas baiñeiticaí? Judíuañedinona llofuelleña, jiae eniruemo cai comini díne nibai jaite. <sup>36</sup>¿Niese naimie raite: “Cuena jenoitomoi; iadedi cuena baiñeitomoi”? ¿Niese raite: “Cue díne binitomoi”? —iese siadotimaci.

#### Jesúdi Jusiñamui Joreñona ñaia rafue

<sup>37</sup>Jifocotiai railla rafue fuillaruimo, ua rafue ie nairuimo, Jusiñamui jofomo itinomo Jesú ado llote:

—Bu jiroacania, cue díne bi.

<sup>38</sup>Jusiñamui facaina lloraini micoriai

jiae cuega: “Naimienas iñotimie começimo jaca itatake jinui isoi ii te, torafomona jinui tonooilla isoi”.

<sup>39</sup>Jesúdi iese llote; ia Jusiñamui Joreñona ñaite. Jusúna iñotinomo Jusiñamuidi ie Joreñona ico illena ñaite. Jesú nia fiodaiñena jira, iena nia iñega.

#### Comini Jesúna dane siadua rafue

<sup>40</sup>Jesú lluana comini cacajano, raitimaci:

—Jisiñamui facaina lloraini micoriai Jusiñamui facaina lloraima ico billena jiae llotimaci. “Cristo nia baireñenia, naimie biite” llotimaci. Bimiedi naimie.

<sup>41</sup>Jiaino raitimaci:

—Naimiedi cai Jilloitaraima.

Naimiedi Cristo.

Jiaino raitimaci:

—Cai Jilloitaraima Galileamona biñete. <sup>42</sup>Jusiñamui facaina lloraima micori cuega: “Cai Jilloitaraimadi David micori jito. Belémo David micori illanomo jeicille”.

<sup>43</sup>Ie jira daje isoi naimie começiaína facañedimaci. <sup>44</sup>Jiaino naimienas gaitaacadimaci; iadedi buna naimienas jetañede.

#### Judíuaí illacomini Jesúna iñóñena rafue

<sup>45</sup>Ie mei policías naimaci illacomini díne abido jaidimaci. Fariseuai dinena jicanotimaci:

—¿Bue ñellena Jesúna atiñedomoí?

<sup>46</sup>Policías dinena uai ote:

—Naimie llofuija isoi jaca buna llofueñede. Iena jacinallanona, naimienas atiñedicas.

<sup>47</sup>Fariseuai dane llotimaci:

—Cominiña jifuia isoi, omoina jiae jifuete. <sup>48</sup>Cai illacomini dinena naimienas jaca iñóñedicas. Moisés micori llogacinodo raise jaidicai; <sup>49</sup>ia Jesú llofuiana cacadino Moisés micori

llogacinuaido jaca raise jaiñedimaci. Ie jira jaca faifitímacisa.

<sup>50</sup>Naie illaicomini mona Nicodemo raillamie ite. Naimie naiona Jesús díne navui jaide. Fariseo imie. <sup>51</sup>Jesúna riiduanona, naimie llote:

—Cai einamaci llocabitimaci: “Bu duere cai finoacanía, nano naimie lluamo cacarefiticai. Jearede rafue naimie finuana cacarellano, naimiena duere finoitícaí”. Iena cai cacaínenia, naimiena duere finoñeiticaí.

<sup>52</sup>Nicodemomo llotimaci:

—Galileamona bitino isoi ñaitio. Naimie llofuegamienä níbái jai jaiacadio. Jaie cuegafuiaina raise faca. Jusiñamui facaina lloraini micoriaidi cai nairaina Jilloitaraima Galileamona billena jaie cueñedimaci. Bie Jesús raillamiedi cai nairaína Jilloitaraimañedimie.

<sup>53</sup>Ie meinoconi damierie imaci jofomo jaidimaci.

### Le iniñede iima diga riñodi rafuetailla ie rafue

**8** <sup>1</sup>Naie facaise Jesúdi Olivos railla anedumo jaide. <sup>2</sup>Ie areruido jitiramo Jusiñamui jofomo abido dane jaide. Ailluena comini naimie dine billa jira, naimie ana raita, naimacina llofueté. <sup>3</sup>Naie facaise Moisés micori llogacinona llofueraiñimona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede iima diga naiñaiñona jai eidatimaci. Comini illa uicomó atiano, <sup>4</sup>Jesúmo llotimaci:

—Llofueraima, biñaiño ie iniñede iima diga eidaticai. <sup>5</sup>Moisés micori jaie cuega: “Bie isoidiñaiñodí nofici diga fairinoga, meinellena”. ¿Niese naiñaiñona o raitio?

<sup>6</sup>Naimiena facacillena, naimie raise uai oñenia, naimiena llogidollena, iese

jicanotimaci. Iena cacajano, Jesús ana jitadacaída, eniruemo ie onocai diga cuete. <sup>7</sup>Naimiemo diga icaiño jica-jicanuano, naimie naidacaída, naimacimo llote:

—Omoimona jeacino iñedimie naiñaiñomo nano noficina fairino.

<sup>8</sup>Dane ana jitadacaída, eniruemo dane cuete. <sup>9</sup>Naimie lluana cacajano, dajerie jino jaidimaci. Nano eo einamacidi jino jaidimaci. Ie mei conirueni jino jaidimaci. Nana comini tuua mei, nainomo Jesús fiebide, naie riño diga ñaillena. <sup>10</sup>Eruaillano naiñaiñomo jicanote:

—¿Ni nai o llogidotino?

<sup>11</sup>Naiñaiño uai ote:

—Jaca iñedimaci. Cuena jai llogidoiacaiñedimaci.

Jesús uai ote:

—Jiai ona duere finoñeitique. Mai jai. Jeacino dane finoñeno.

### Jesúdi comini comeciai lligaiñua rafue

<sup>12</sup>Jesúdi cominina dane llofuijanona, raite:

—Jeacino oni jaillena, comini comeciaina lligaiñoticue. Cuena iinotimie jitiredinomo jaca iñeite. Jeacino anamo jai iñedimie Jusiñamui diga ico jaca iiite.

<sup>13</sup>Fariseuai dinena uai otimaci:

—Dama o abina ñaitio. Ie jirari uanaicinona lloñedio.

<sup>14</sup>Jesús uai ote:

—Dama cue abina lloticue; iadedi uanaicinona lloticue. Ninena cue billanona uiñoticue. Nine cue jaillinona jiai uiñoticue. Ninena cue billanona uiñoñedomoi. Nine cue jaillinona jiai uiñoñedomoi. <sup>15</sup>Abí raise uiñoñeno cuena jeare ñaitomoi. Iese omoina naiñedicue; <sup>16</sup>iadedi omoina cue ñaia, uanaicinona lloticue. Dama cue uaina

omoina lloñedicue. Cuena oretatimie omoina jiai llote. <sup>17</sup>Moisés micori iena jiai jaie cuega: “Menamie daje isoi lloia, naie iaimaiā illuacindō omoi iinua” cuega. <sup>18</sup>Cue facaina lollena, menamie jai ite. Cue facaina lloticue. Cue Moo cue facaina jiai llote.

<sup>19</sup>Fariseuai dinena jicanote:

—¿Ni o moo?

Jesúdi uai ote:

—Cuena uiñoñedomo. Cue Moona jiai uiñoñedomo. Cuena uiñotomoina, cue Moona jiai uiñotomo.

<sup>20</sup>Jusiñamui jofomo ucube eenoracomo bixinona siadotimaci. Jesús fioldaille facaise nia riñena jira, jaca buna naimiena gaitañede.

**Jesúna comini iinoñenia, naie  
jeacino diga fiodailla rafue**

<sup>21</sup>Naimacimo Jesús dane llote:

—Ico oni jaiticue. Cuena jenoitomo; iadedi cuena baiñetomo. Na omoimo jeacino nia itemo, fiolditomo. Cue jaillinomo Jainitomo.

<sup>22</sup>Ie jira judíuai illaicomini dinena iena siadotimaci:

—Dama ie abina meineite.

“Cue jaillinomo Jainitomo” Jesús railla jira, iese siadotimaci.

<sup>23</sup>Jesúdi uai ote:

—Jusiñamumo ite rafuento duiñedomo. Naimemo ite rafuento duidicue. Naimie dibeimo iñedomo; ia naimie dibeimo iticue. <sup>24</sup>Cue Jusiñamui Jitonana omoi iinoñena jira, na omoi jeacino diga fiolditomo.

<sup>25</sup>Jicanoside:

—¿Budio?

Jesús uai ote:

—Nano omoi motomo cue illamona bumiedicuena omoina raicabiticue.

<sup>26</sup>Diga rafue omoimo lloiacadicue.

Maraiñede rafuena omoi finuana omoimo nia lloiacadicue; iadedi

omoimo cuena oretatimie uaina dama lloticue. Nai uaidi uanaicino —llote.

<sup>27</sup>Naimiedi ie Moo Jusiñamuina llote; iadedi cacaiñedimaci. <sup>28</sup>Ie jira Jesús llote:

—Cuena omoi meinia mei, bumiedicuena uiñoitomoi. Cue uaido dama lloñedicue; iadedi cue Moo cue llofuia uaido llocabiticue. <sup>29</sup>Cuena oretatimie cue diga ite. Naimie jitaille rafuena cue finuá jira, cuena fainonocaiñede.

<sup>30</sup>Iese Jesús llotemo, diga illaicomini naimie uaina como iinoiacadimaci.

### **Comini Taife anamo illa rafue**

<sup>31</sup>Jesúdi naimie uaina como iinoiacadino mo llote:

—Cue lluana iinocana omoi jaia, cue ua cominidomo. <sup>32</sup>Unaicinona uiñoitomoi. Ie mei jiaimie anamo dane iñeitomo.

<sup>33</sup>Uai otimaci:

—Abraham micori ie uruiaidicai. Jiaimie anamo jaca iñedimaci. ¿Bue ñellená llotio: “Jiaimie anamo iñeitomo”?

<sup>34</sup>Jesúdi uai ote:

—Uanai lloticue. Jeacino finocabidomo. Naga jeacino finoraima ie jeacino anamo jai ite. Omoi jeacino anamo omoi illana ñaiticue. <sup>35</sup>Jiaie rafuedo iena lloitue. Ie patrón anamo itímiemo ie patrón rafuedi duiñede; iadedi naie patrón jitomo ie rafuedi duide. <sup>36</sup>Ie isoide. Jusiñamui Jitona cue illamona, naimie rafuento duidicue. Ie jira omoimo cue lloia, omoi jeacino anamo ua iñeitomo. <sup>37</sup>Abraham micori ie uruiaidomo. Iena uiñoticue; iadedi cue lluana omoi raise iinoñena jira, cuena meineiacadomo. <sup>38</sup>Cue Moo diga jaie cue illamona, cue ciua rafuena llocabiticue. Omoi moomona cacaja rafuena finocabidomo.

<sup>39</sup>Uai otimaci:

—Cai moodi Abraham micori.

Jesús dane uai ote:

—Abraham micori uruiaidomoídena, Abraham micori finoca rafue isoi finodomoi. Abraham micori uruiañedomoi. Ie jira Abraham micori finoca rafue isoi finoñedomoi. <sup>40</sup>Uanai cue llua jira, cuena meineiacadomoí; iadedi Abraham micori iese finoacaiñede. Cue lluacino Jusiñamuima otiçue. <sup>41</sup>Jusiñamuia uruiaí finoca rafuena finoñedomoi; iadedi omoi moo finoca rafuena finocabidomoí.

Uai otimaci:

—Jamai nairai ie uruiañedicai. Cai Moodi Jusiñamui.

<sup>42</sup>Jesús dane llote:

—Jusiñamuidi omoi moodena, cuena isiruitomoí, naimiemona cue billa jira. Cue jitaila jira, biñedicue; iadedi cuena oretate. <sup>43</sup>¿Bue ñellena cue lluana cacaiñedomoi? Cacareirainidomoí. <sup>44</sup>Omoi moodi Taifena jira, cue lluana iñoñedomoi. Naimie jitaila rafuena finoacacabidomoí. Nano dofomona naimiedi comena meineraima. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llote. Naimiemona taino lluacinodi comuicabide. Naimie isoidomoí. <sup>45</sup>Uanai cue llua jira, cuena iñoñedomoi. <sup>46</sup>¿Nie isoide jeacino finodicue? Cuemo llono. Uanai cue llia, ¿bue ñellena cuena iñoñedomoi?

<sup>47</sup>Jusiñamuina mooredimiedi Jusiñamui uaina cascade. Jusiñamui uruiañedomoi. Ie jira cue lluana cacaiñedomoi.

<sup>48</sup>Naimieno jearuillanova, naie illaicomini dinena iese raitimaci: —Samaritano nairai imedio. Janaba illamiedio. Uairitaidio.

<sup>49</sup>Jesús uai ote:

—Janaba illamieñedicue. Cue finoca rafuemona cue Moona iobitadicue;

iadedi iese cuena omoi ñaimona cuena iobitañedomoi. <sup>50</sup>Omoimona iobillacina feiñollena, cue rafuena finoñedicue; ia cue Moo iena oiacade. Cuena omoi iñoñenia, cuemo iobillacina omoi fecañenia, cue Moo omoína duere finoite; <sup>51</sup>ia bu cue lluana ua iñoia, jaca ua fiodaiñeite.

<sup>52</sup>Naie illaicomini dinena uai otimaci:

—Janaba illamiediona jai uiñoticai. Abraham micori jaie fiodaite. Jusiñamuina lloraini micoriai jiai jaie fiodaitimaci; iadedi: “Bu cue lluana iñoiajadedi, fiodaiñeite” raitio. <sup>53</sup>Cai usuma Abraham micori baifemo faiñedio. Jusiñamuina lloraini micoriai baifemo faiñedio. ¿Bumediota?

<sup>54</sup>Jesúdi uai ote:

—Dama cue abina biriñedicue; ia cue Moo cuena marena ñaimona, cuena iobitate. “Cai Moodi Jusiñamui” raicabitomoí; <sup>55</sup>iadedi naimiena uiñoñedomoi. Naimieno uiñoticue. “Naimieno uiñoñedicue” cue raia, omoi isoi taino lloticue. Naimieno uiñoticue. Naimieno jiai iñoticue. <sup>56</sup>Omoi usuma Abraham micori eniruemo cue ico billena jaie uiñote. Iena uiñuamona, naimie iobide.

<sup>57</sup>Illaicomini dinena uai otimaci:

—Odi cincuenta años nia iñedio. ¿Niese Abraham micorina cioldio?

<sup>58</sup>Jesús uai ote:

—Abraham micori nia iñena facaiseconi jaca iticue.

<sup>59</sup>Iena cacajanona, naimie fairinollena, naie illaicomini noficina llinotimaci; iadedi Jesús reirillanova, Jusiñamui jofomona oni jaide.

Jesús uisnidimieno jillotaja rafue

**9** <sup>1</sup>Jairuido ie llofueoicaiganodícaí diga Jesús macaria, uisnidimieno ciode. Iese nanomona jaca naimiedi jeiciga. <sup>2</sup>Jesúmo jicanoticai:

—Llofueraima, ¿bue ñellena naimiedi iese jeiciga? ¿Nie isoide ra ie moo jetajamona, naimie iese jeiciga? ¿Nie isoide ra ie ei jetajamona, naimie iese jeiciga? Caimo llono.

<sup>3</sup>Jesús uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuiñede. Jusiñamui uai siñonana comini uiñollena, iese jeiciga. <sup>4</sup>Nia userena jira, cuena oretatimie ie jitaila rafuena finoacadai. Raire jitirenite. Ie mei bu jaca maijinite. <sup>5</sup>Eniruemo cue nia ia, comini comeciaína lligaiñoticue. —Iese Jesús llote; iadedi jiae rafuena ñaite. Naimie nia fiodaiñenia, Jusiñamui rafuena llocana naimie jaillana ñaite. Ie fiodaillirui jai iaire iacanana ñaite. Comeciaína lligaiñuana llote, jeacino oni jaillena.

<sup>6</sup>Iena lluanona eniruena tuajano, enirue idiai finuanona, uisnidimie uisina naie enirue diga riginote. <sup>7</sup>Raite:

—Siloé railla joraibimo mai noisai —raite. Siloé oni dobaiñuamona: “Oretarabi”.

Ie jira naimie noisaide. Uisi jai ciódromo, abido bite. <sup>8</sup>Billa mei, naimie ecimo itino, jiai naimena ciocabidino diga, naimie jilluana coniniri siadotimaci:

—¿Buuta naimiedi? Bene ucube jicallena raicabidimie isoide.

<sup>9</sup>Jiaino raitimaci:

—Jii, naimie.

Jiaino raitimaci:

—Ieñede. Naimena eruaide isoide.

Naimie dinena raite:

—Uisnidimiedicue; iadedi jai ciodicue.

<sup>10</sup>Naimiendo jicanotimaci:

—¿Niese jai birui cioldio?

<sup>11</sup>Uai ote:

—Jesús raillamie enirue idiai finuano, cue uisina riginote. Cuemo llote: “Siloé

railla joraibimo noisai”. Ie jira noisaidicue. Jai ciodicue.

<sup>12</sup>Jicanotimaci:

—¿Ninomo ite nai Jesús?

Naimie uai ote:

—Uiñoñedicue.

**Comini uisnidimie jai  
jilluana siadua rafue**

<sup>13</sup>Navui uisnidimie jai jillua mei, fariseuai dine comini naimiena uitimaci.

<sup>14</sup>Sábadoruimo Jesúdi naimiena jillotaja jira, <sup>15</sup>fariseuai naimiendo jicanotimaci:

—¿Niesenamona jai cioldio?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noisaidicue. Lemona jai ciodicue.

<sup>16</sup>Fariseuaimona jiaino raitimaci:

—Sábadoruimo bimiena Jesús jillotaja jira, caimona jai maijide isoide. Jesús maijia jira, Jusiñamuimona naimie biñede.

Jiaino raitimaci:

—¿Niese jearede ra finouidimiedi uisnidimieno jillotate? —Ie jira daje isoi comeciaína facañedimaci.

<sup>17</sup>Ie jira navui uisnidimieno dane jicanotimaci:

—Naimie ona jillotaja jira, ¿niese odi Jesúna raitio?

Uai ote:

—Naimiedi Jusiñamui uai lloraima.

<sup>18</sup>Naimie moo, naimie ei iaímaiaímo nia jicanoñenia, judíuái illaicomini nai iima jaca cíoñenano iinosiñede. Ie jira iaímaiaína uaiduanona, <sup>19</sup>jicanotimaci:

—¿Bimiedi omico jito? ¿Naimie jaca uisinino jeiciga?

<sup>20</sup>Uai otiaímaíai:

—Jii, bimie coco jito. Jaca uisinino jeiciga. Iena uiñoticoco. <sup>21</sup>Niese jai naimie uisina ciuana uiñoñedicoco. Bu naimiena jilloitajana jiai uiñoñedicoco. Naimiendo jicano. Naimiedi jai eimiesa. Dama ie facaina jai ñaite —uai otiaímaíai.

<sup>22</sup>Bie rafue nia suiñenia, judíuai illaicomini navui llotimaci: “Jesúdi cai Jilloitaraima bu lloia, cai ofiracomo naimiena fo billana rairuiticai”. Iena jaciruillanona, <sup>23</sup>llotiaaimaiai: “Naimie jai eimiesa. Naimiemo jicano”. <sup>24</sup>Ie jira illaicomini dane naimiena uaiduano, llotimaci:

—Jusiñamuimo iobillacinona feca. Jesúmo fecañeno. Naimie jearede rafuena finouidimieni uiñoticai.

<sup>25</sup>Uai ote:

—Naimie jearede rafuena finouillana uiñofedicue. Daje rafuena uiñoticue. Navuidi cioirainidicue. Birui jai ciódicue. Iena uiñoticue.

<sup>26</sup>Jicanotimaci:

—¿Niesede ra diga finuamona odi uisina ciódio? ¿Niese ona jillotate?

<sup>27</sup>Uai ote:

—Omoimo jai lloticue; iadedi cacaiaçaiñedomoi. ¿Bue ñellena omoimo dane lloitice? ¿Ie llofueganona jaiacadomoi?

<sup>28</sup>Riire uai otimaci:

—Naimie ie llofuegamedio. Caidi Moisés micori ie llofueganodai.

<sup>29</sup>Jusiñamui Moisés micorimo jaie lluana uiñoticai; iadedi bimiena uiñofedicai. Naimie ninena billana jíai uiñofedicai.

<sup>30</sup>Nai iima uai ote:

—Jadi, naimie ninena billana uiñofedomoi; iadedi cuena jillotate.

<sup>31</sup>Jusiñamuidi jearede rafuena finodino ñaia uaina cacarefiñede. Naie isoidino siño rafuena finoñenana uiñoticai; iadedi Jusiñamuidi naimiena sedadimie ñaia uaina cascade. Ie jitalla rafuena finodimie ñaia uaina cascade. Naie isoidino siño rafuena finuana uiñoticai.

<sup>32</sup>Enirue finua facaisemona jaca buna uisinino jeicigamieni jilloitañede.

<sup>33</sup>Jesúdi Jusiñamuimona biñedimiedena, jaca buena finonide.

<sup>34</sup>Uai otimaci:

—Jamai cai nairai imedio. ¿Niese caina llofueitio?

Ie jira naimaci ofiracomona naimiena jino dotadimaci.

**Jesús uisinidimie diga ñaia rafue**

<sup>35</sup>Uisinidimieni jino dotajana fidianona, Jesús naimiena jenode.

Baillano, jicanote:

—¿Omoi cominina Jilloitaraimana iinotio?

<sup>36</sup>Uai ote:

—¿Bumai naimie? Cuemo llono, naimiena cue iinollesa.

<sup>37</sup>Jesús uai ote:

—Naimieni ciódio. O diga ñaite. Cue.

<sup>38</sup>Caiñici ifodo rainadajanona, iobillacinona fecallena, uai ote:

—Nama, jai o uaina iinoticue.

<sup>39</sup>Jesús uai ote:

—Uisinidino cioitallena, eniruemo biticue. Jai uisina ciódino uisina cioitañellena biticue. —Iese Jesús raite; ia naimaci comeciaína ñaite. Jesús “Jai maraiñedicai” raitinona jillotajaibite. Jesús “Jai maredicai” raitinomo ite jeacino naimaci uiñollena bite.

<sup>40</sup>Naimie ecimo ite fariseuai iena cacajano, jicanotimaci:

—¿Uisinidomoi caina raitio?

<sup>41</sup>Jesús uai ote:

—Uisinidino isoi itomoina, omoimo ite jeacino omoi muidonañede; ia “Jai ciódicai” omoi railla jira, omoimo ite jeacino omoi muidona.

Iese raite; ia naimaci comeciaína ñaite. Jeacino naimacimo illana naimaci uiñoiacaiñena jira, iese ñaite. Naimaci jeacino oni dotajana jitaiñedimaci.

**Toica llaudaiai sedaraima rafue**

**10** <sup>1-2</sup>Jesús dane llofueté:

—Cue rafuena omoi raise uiñollena, toica llaudaiaina ñaiticue.

Llaudaiai jino uicabilla isoi, llaigafomo

nasedo fo jaidimiedi naie llaudaiai sedaraima; ia jinofebei dñenena bitimedi firiraima.<sup>3</sup> Llaigafo llaudaiai sedaraima fo jaillena, nase sedaraimadi nase econote. Llaudaiai naimie uaina uiñotimaci. Imaci mameciaido uaiduamona, llaigafomona jino bitimaci.<sup>4</sup> Nana ie llaudaiai jino bia, naimacina ifode. Naimie uaina uiñuanona, naimiena racadimaci.<sup>5</sup> Naimaci uiñoñegamienra racañedimaci; iadeti naimie uaina naimaci uiñoñena jira, naimiemona oni aisidimaci.

<sup>6</sup>Bie isoidicinona Jesús llofuite; iadeti naie comini iena cacaiñedimaci.<sup>7</sup> Ie jira Jesús dane llofuite:

—Llaigafo ie nase isoidicue.

<sup>8</sup>Damierie firirainina bitimaci. Ie jira llaudaiai naimaci uaina cacaiñedimaci.—Iese Jesús llofuite; ia naimiena iinotinona ñaite. Naimiena abi caitadínona ñaite. Naimie iinotino naimiena abi caitadino llogacinomo cacarefiñena ñaite.<sup>9</sup> Nia llofuite:

—Llaigafo isoidicue. Bu cue nasedo fo bia, jilloite. Llaudaiai isoi fo biite. Jino jaite. Mare guille baite isoite.—Iese llofuite; ia naimiena iinotino marena illana ñaite. Naimiemona naimaci jitilla rafuena uana ñaite.<sup>10</sup> Nia llofuite:

—Llaudaiaina fiñlena, meinellena, fafillena, firiraima bite; iadeti cominina jaca raise itatallena, biticue.<sup>11</sup> Llaudaiai marena sedaraimadicue. Mare sedaraimadi ie toiniae facaina riðuanona ie abina faifite.<sup>12</sup> Janallari bia, llaudaiai naimie ieñena jira, jamai majjidimedi, llaudaiaina fañonocaillano, ecimona aside. Llaudaiaina janallari gaitaacanamona, llaudaiai tuudimaci.<sup>13</sup> Jamai ucube oiacanano, isiruiñenano, jamai majjidimie aside.<sup>14</sup> Iese iñedicue. Mare sedaraimadicue. Cue llaudaiaina

uiñoticue.<sup>15</sup> Cue Moo diga conimana coco uiñua isoi, naimaci cuena jiai uiñotimaci. Cue llaudaiai facaina fiódaiticue. —Iese Jesús llofuite; ia naimiena iinotinona ñaite. Jamai majjidimie isoi naimacina sedañede. Naimacina raise riidote. Naimaci facaina jiai fiódaiacadé.<sup>16</sup> Nia llofuite:

—Jiaie llaigafomo jiaie llaudaiai cuemo ite. Naimacina jiai atiacadicue. Cue uaina cacaitimaci. Ie mei danomo nana cue llaudaiai iitimaci. Naimacina dama sedaiticue. —Iese Jesús llofuite; ia jiaie naíraíaimo naimiena iinotinona ñaite. Dajena naimacina sedajana ñaite.

### Jesús fiódaille rafue

<sup>17</sup> Jesús nia llofuite:

—Cue jai fiódaiacanamona, cue Moo cuena isiruite. Fiódallamona dane jilloiticue.<sup>18</sup> Cue jitaiñenia, jaca buna cuena meineñeite. Cue jitilla jira, fiódaiticue. Siñu uai cuemo illa jira, cue jitaiñiruimo fiódaiticue. Cuemo cue Moo siñu uaidi jai illa jira, dane jilloiticue.

<sup>19</sup> Jesús ie llofua jira, judíuia illaicomini daje isoi começiaina facañedimaci.<sup>20</sup> Jainodi:

—Naimiemo Janaba illamie —raitimaci.— Uairico. Naimiena cacareiacañedimaci —raitimaci.

<sup>21</sup> Jaino raitimaci:

—Bie isoidicinona Janaba illamie llofueñede. Janaba illamie uisínidimienra jillotanide.

### Jesús ie Moo diga daje isoí começi lloilla rafue

<sup>22</sup> Rollime facaise Jerusalémo Jesús ite. Naie facaiseconi Jusiñamui jofo ie finua começia rafue ite.<sup>23</sup> Salomón micori finotaga jofo abi ibirimo Jesús macarite.

<sup>24</sup> Naie facaise judíuia illaicomini naimie dine bitimaci. Jicanotimaci:

—¿Niruido caimo ona lloitio? Odi cai Jilloitaraimana, caimo marefodo llono.

<sup>25</sup>Jesús uai ote:

—Omoimo jai lloticue; iadedi iiñoñedomoi. Cue Moo mamecido cue finoca rafuemona cuena uiñotomoi.

<sup>26</sup>Cue toica llaudaiaimo omoi jainaiaiñena jira, cuena iiñoñedomoi.

<sup>27</sup>Cue toica llaudaiai cue uaina cacadimaci. Naimacina uiñoticue. Cuena racadimaci. <sup>28</sup>Naimaci jaca itataticue. Jaca abina faifiñeitimaci. Cue anamona jaca budi naimacina bairoñeite. <sup>29</sup>Cue Moo naimacina cuemo fecade. Naimacidi jiaño baifemo fajtimaci. Naimemona jaca budi naimacina baironide. <sup>30</sup>Cue Moo diga daje isoi comecina lloidicoco. —lese llote; ia naimena iiñotinona ñaite. Naie illaicomini naimemo jainaiaiñena jira, naimena iiñofedimaci. Iena Jesús ñaite.

<sup>31</sup>Jesús llofuiana cacajano, naie illaicomini noficina llnotinomaci, naimena meinellena. <sup>32</sup>Iena ciuanona, Jesús llote:

—Cue Moo uaido diga mare rafuena finodicue. ¿Nie isoide rafuena cue finua muidona, cuena meineiacadomo?

<sup>33</sup>Uai optimaci:

—Mare rafuena o finua muidona, ona meineñeitcai. Jamai iimadio.

“Jusiñamuidicue” o railla jira, ona meineitcai. Jusiñamui Joreñona jiai jeare ñaitio.

<sup>34-36</sup>Jesús dinena uai ote:

—Jaie cuegafuiaina jamainidicai. Nainomo Jusiñamuidi naimie uaina cacadinomo jaie llote: “Omoidi jusiñamullaídromo”. Jusiñamui ie uaina cacadinomo jaie iese lloiaide, ¿niese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreñona jeare ñaitio”

raitomoi. <sup>37</sup>Cue Moo isoi cue finoñenia, cuena iiñoñeno; <sup>38</sup>iadedi cuena omoi iiñoiacaiñenia, cue Moo isoi cue finoia, naie rafuena iiño. Iemei cue Moomo cue jainaiaillana uiñoitomoi. Cuemo cue Moo jainaiaillana jiai uiñoitomoi.

<sup>39</sup>Iena cacajano, naimena dane gaitaacadimaci; iadedi naimacimona jillode.

<sup>40</sup>Le mei Jesús Jordán railla ille ruica dibelmo jaide. Nainomo Juan micori cominina nano bautizade. Nainomo rillanona, nainomo Jesús fiebide.

<sup>41</sup>Ailluena comini Jesús díne bitimaci. Coninina raitimaci:

—Juan micori siño rafuena finoñede; iadedi nana Juan micori Jesúna lluacindri uanaaicino.

<sup>42</sup>Nainomo ailluena comindi Jesús naimaci Jilloitaraimana iiñotimaci.

### Betaniamo Jesús abido jailla rafue

**11** <sup>1</sup>Naie facaise Betaniamo Lázaro raillamiedi duide. Naimie miriñodi Marta, María iaiñuai. <sup>2</sup>Naie Maríadi jiairuido Jesús eillimo caimare soride rana totade. Le mei naiñaiño ie ifotie diga naimie eillina safenaillena dote. <sup>3</sup>Naie iaiñuai Jesús díne uaina orediaiñuai, naimie billena. Naimie jibuisaibillena llotatatiiaiñuai:

—Nama, o isiruigamie duide —llotatatiiaiñuai.

<sup>4</sup>Jesús naie rafuena fidiano, llote:

—Jamai fiodaillena naimie duíñede. Jusiñamui uaina siñonana comini uiñollena, naimie duide. Iemonia comini dinena: “Ua Jusiñamui Jitodio” cuena raitimaci.

<sup>5</sup>Jesúdi Lázaronra isiruite. Le miriño iaiñuaína jiai isiruite; <sup>6</sup>iadedi Lázaro duillana Jesús fidiano, naimie díne jaiñede. Naimie illanomo menarui nia fiebide. <sup>7</sup>Le mei ie llofueoicaiganodicaimo llote:

—Judeamo abido dane mai cai jailli.

<sup>8</sup>Uai oticai:

—Llofueraima, judíuai illacomini  
birui noficina ona fairinoiacadimaci.

¿Niese naimaci dine dane jaitio?

<sup>9</sup>Uai ote:

—Nagarui userede. Userenia bu  
macaria, raise ciua jira, eicaítaiñede;  
<sup>10</sup>iadedi bu naiona macaria, raise  
cioiñena jira, eicaitaide. —Iese llofuetu;  
ia naimie rafuedo jaillena ñaite. Raite:

—Cue rafue suicana jaite. Cue jitaille  
dinori nia llofueticue. Cue rafuedo omoi  
jaia, marena jaitomoi. Iedo omoi  
jaïñenia, duere sefuitomoi.

<sup>11</sup>Dane llote:

—Lázaro jai iniide; iadedi naimiena  
casitallena, jaiticue.

<sup>12</sup>Uai oticai:

—Nama, naimie jamai iniia, nia dama  
casite.

<sup>13</sup>Naimie jafaici uanona iniam  
comeciaina facadicai; iadedi Jesús  
naiena lloñede. Lázaro fiodaillana ñaite.  
<sup>14</sup>Ie jira Jesús caimo marefodo llote:

—Naimie jai fiodaite. <sup>15</sup>Nainomo cue  
iñena jira, cue siño uai omoi iñollena,  
omoi facaina iobidicue. Naimie dine  
mai cai jailli.

<sup>16</sup>Caimona Tomás caimo llote:

—Maiña. Naimie diga fiodaisaiticai  
—llote. Tomás mameci jiaicidi Dídimi.  
Naimiedi gorasa.

### Jesús Marta diga ñaia rafue

<sup>17</sup>Betaniamo cai ria, Lázaro raifomo jai  
nagaamagaru illana fididicai.

<sup>18</sup>Jerusalémona Betaniamo tres kilómetros  
dinori illa jira, <sup>19</sup>diga judíuai illacomini  
eedollena, Marta iaiñuai María dine  
bitimaci. <sup>20</sup>Jesús billana Marta fidiano, cai  
dine naisomo bite; iadedi jofomo María  
fiebide. <sup>21</sup>Jesúmo Marta llote:

—Nama, o bene itiona, cue iio  
fioldaiñede; <sup>22</sup>iadedi Jusiñamuimo

buena o jicaia, naimie iena finoite. Iena  
uiñoticue.

<sup>23</sup>Jesús dinena uai ote:

—O iio abido jilloite.

<sup>24</sup>Naiñaiño uai ote:

—Nana comini jilloilliruimo naimie  
jiai jilloite. Iena uiñoticue.

<sup>25</sup>Jesús uai ote:

—Fiodaillamona comini abiaina  
Jilloitaraimadicue. Jusiñamui diga jaca  
illena, cominina itataraimadicue. Bu cuena  
iñuanona, fioldaiadedi, iemonia ico jilloite.

<sup>26</sup>Cuena iñotimieno Jusiñamui illanomo  
jaca illena itataiticue. ¿Iena iñotio?

<sup>27</sup>Naiñaiño uai ote:

—Jii, Nama; odi cai Jilloitaraimadio.  
Odi Jusiñamui Jitodio. Jusiñamui  
dinena o billamo jaie ocuiridicai.

<sup>28</sup>Iese raillanova, jofomo Marta abido  
jaide. Ie euiñona uaiduano, anado llote:

—Llofueraima jai ride. Ona uaidote.

<sup>29</sup>Iena cacajano, rare cai dine María  
bite. <sup>30</sup>Marta diga ie ñaianomo Betania  
ecimo Jesús nia ite. <sup>31</sup>Jesús dine María  
nia jaiñenia, judíuai illacomini  
Maríana nia eedotimaci. María jino  
jaillana ciuano, racadimaci. “Raifomo  
eellena naiñaiño jaide” raillanova  
comeciaina facadimaci. <sup>32</sup>María Jesús  
dine rillano, naimiena duenaillano,  
cañici ifodo rainadacaída, llote:

—Nama, bene itiona, niadedi cue  
iñodi fioldaiñede.

### Jesús Lázarona jillotaja rafue

<sup>33</sup>María eiana Jesús ciuano, naiñaiño  
diga bitino eiana ciuano, naimie comece  
eo sunaite. Sunaillamona, jafaicina faite.  
<sup>34</sup>Jicanote:

—¿Ninomo Lázarona raitomoi?

Uai otimaci:

—Nama, mai jibuisaibi.

<sup>35</sup>Lázarona duenailanona, Jesús eede.

<sup>36</sup>Iena ciuanona, judíuai illacomini  
dinena llotimaci:

—Ero. Naimiena eo isiruite.

<sup>37</sup>Jiaino raitimaci:

—Navui uisiniñidímienna jillotate. ¿Bue nñellena bimieno jilloitañede, naimie nia fiodaiñenia?

<sup>38</sup>Iena cacajanona, ie siño uai finuana naimaci nia raise iinosiñena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiae noficina ibaica. <sup>39</sup>Jesús llote:

—Nofici oni ñuita.

Marta dñena naimie uai ote:

—Nama, naimie abi jai sorirede.

Nagaamagarui raiafomo jai ite.

<sup>40</sup>Jesús uai ote:

—Cueno o iinoia, Jusiñamui uai siñonana uiñoitio.

<sup>41</sup>Iemono cominidi noficina oni ñuitadimaci. Jesús monamo eruaillano, llote:

—Moo, cue uaina o cacaja jira, iobidicue. <sup>42</sup>Jaca cueno cacadio. Iena uiñoticue; iadedi cue diga bene itíno illa muidona, iese ado lloticue. Cueno o oretajana naimaci iinollena, o diga ado ñaiticue.

<sup>43</sup>Ie mei eo ado llote:

—Lázaro, jino bi.

<sup>44</sup>Nai fiodaitimie nia naimie abi nana ferinua ra diga jino bite. Jesúdi cominimo llote:

—Naimie abi ferinua oni suiñó. —Ie jira suiñodimaci.

<sup>45</sup>Ie muidona María diga bitinomona ailluena cominí Jesúna iinotimaci. Naimie finoca rafuena ciuanona, iinotimaci.

**Jesúna meinellena, illaicominí  
comeciaina facaja rafue**

(Mt. 26.1-5; Mr. 14.1-2; Lc. 22.1-2)

<sup>46</sup>Jesúna iinóñedinomona damierie Jesús finoca rafuena fariseuai dine lluaidimaci. <sup>47</sup>Ie jira Jusiñamui diga

nanoca ñairaini, fariseuai diga, danomo ofidimaci. Jesús rafuena siadotimaci:

—¿Niese naimiena nibaiñitací? Diga siño rafuena ua finocabide. <sup>48</sup>Naimiena niese cai nibaiñenia, nana comini naimieno iinotimaci. Nana comini naimie dibeimo jaia, naimaci illaimana naimie jaillana jitaitimaci. Iemei romanos soldaduái biitimaci. Jusiñamui jofona judaiaibitimaci. Cai nairaiaina jiai fuidoitimaci. Iena jitaiñediaci.

<sup>49</sup>Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñóñedomoi. <sup>50</sup>Iese cai nairaimo suiñellena, damie cai nairai facaina fiodaitena, mare. Iena nibai nia raise uiñóñedomoi.

<sup>51</sup>Ie comeciná dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimieno biena llotatate:

—Jesúdi cai comini facaina fiodaite.

<sup>52</sup>Cai comini facaina dama fiodaiñede; iadedi nana Jusiñamuina iinotimona facaina fiodaite. Diga nairaiaimo itímaci; iadedi naimiemo dajena nana naimaci duillena, naimie fiodaite.

<sup>53</sup>Caifás lluana naimaci cacajamona, judíuia illaicominí comeciaina nia facadimaci, naimieno meinellena.

<sup>54</sup>Ie jira Jesús judíuai illaicominí illa motodo mafredo macariñede. Jofue iñena dofodo jaidicai. Efraín railla nairai dine ridicai. Nainomo diga irui iticai. <sup>55</sup>Pascua railla rafue iaire iacana jira, ailluena cominí Jerusalémo naimaci nairaiaimona jaidimaci. Rafue nia taineñenia, naimacimo ite rafue oni jaillena, cai einamaci llua isoi finodimaci. <sup>56-57</sup>Jusiñamui diga nanoca ñairainidi fariseuai diga navui ñaitimaci:

—Bu Jesúna cíoia, naimieno cai gaitallená, caímo llono.

Rafuemo bitino illamona, Jesúna  
jenodímaci. Jusiñamui jofomo naimaci  
ia, coninimo jicanododímaci:

—¿Niese comeciaina facadomo?   
¿Jesús bene biite? Cai illaicomini llua  
jira, nibai jai biñeite. Illaicomini lluana  
fidiano, naimie biñeite.

**Betaniamo Lázaro jofomo**

Jesús guilla rafue

(Mt. 26.6-13; Mr. 14.3-9)

**12** <sup>1</sup>Pascua railla rafue rilledi seis  
digarui fiebidemo, Jesús cai diga  
Betaniamo jaide. Betania Lázaro illano.  
Jesús Lázarona fiodaillamona navui  
jillotate. <sup>2</sup>Jesúri iobillano, Lázaro ie guille  
rafuena finode. Marta guille bai jonega.  
Jesús diga guitino motomo Lázaro ite.  
Jesús llofueoicaiganodicaidi jai motomo  
guiticai. <sup>3</sup>Iemei Maríadi nardomona finoca  
caimare soride ra Jesús eillimo totade. Daje  
botella raifi totade. Safenallena naiñaiño  
ifotie diga ie eillina dote. Nai caimare  
soride ra eo raifide. Daje botella ite.  
Iemonia nana jofo jeraidi soride. <sup>4</sup>Caímona  
Judas Iscariote micorina mameciredimie  
ite. Jesúna gaitataitimie. Llote:

<sup>5</sup>—¿Bue fiellena bie soride radi fecañede,  
ucubena ollena? Fecacadena, trescientos  
digarui maijia ucube diese raifide. Ie mei  
nai ucube dueredinomo fecadena, mare  
—llote. <sup>6</sup>Dueredinona naimie duenaiñede;  
iadedi naimie cai ucubena sedade.  
Naimiedi fiiriraima. Naie ucubemona  
fiuilla jira, iese naimie llote.

<sup>7</sup>Jesús uai ote:

—Dama ite. Bie soride ra naiñaiño jai  
eenoga cue fiodaillirui iena. <sup>8</sup>Dueredino  
omoi diga jaca iitimaci; iadedi omoi  
diga jaca iñeticue.

**Ailluena comini  
Lázarona ciua rafue**

<sup>9</sup>Lázaro jofomo Jesús illana ailluena  
cai illaicomini fidiano, bitimaci. Navui

fiodaillamona Lázarona Jesús jillotaja  
jira, Jesúna dama cioiacainédimaci;  
iadedi Lázarona jiai cioiacadimaci. <sup>10</sup>Ie  
jira Jusiñamui diga nanoca ñairainidi  
Lázarona jiai meinellemo comeciaina  
facadimaci. <sup>11</sup>Lázaro muidona ailluena  
judíuai illaicomini naimaci illa díbei  
fainonocaida, Jesúna iinotinaci.

**Jerusalémo illaima isoi, Jesús**

**marena jaiilla rafue**

(Mt. 21.1-11; Mr. 11.1-11;  
Lc. 19.28-40)

<sup>12</sup>Pascua railla rafue illa jira, ailluena  
comini Jerusalémo itimaci. Egiptomona  
cai jaiagai jillobillana comecillena naie  
rafue ite. Jesús Lázaro diga guillarui ie  
areruido Jesús Jerusalémo billana naie  
comini fididimaci. Fiodaillamona  
Lázarona Jesús navui jilloitajana diga  
comini ciódimaci. Iena illocana uitimaci.  
Ie jira ailluena comini Jesús díne  
jaidimaci. <sup>13</sup>Raforona uanona, naimieno  
feiñollena, naimie uicomodo jaidimaci.  
Ado cuiiriisite:

—¡Cai Jilloitaraima billa! ¡Jusiñamui  
mamecido bitimie eo mare! ¡Cai Illaima  
eo mare! —cuiiriisite.

<sup>14</sup>Jesúdi ailli baiga burrito emododo  
jaide. Jusiñamui facaina lloraima micori  
jaie llua isoi jaide. Jaie llote: <sup>15</sup>“Jerusalén  
imaci, jacinaiñeno. O Illaima burrito  
emododo biite”. <sup>16</sup>Naie facaise bie  
rafuemo comeciaina facañedicai; iadedi  
Jesús jillua mei, bie rafuena comeciticai.

<sup>17-18</sup>Lázarona Jesús jillotaja jira, ailluena  
comini Jesús díne jaidimaci. <sup>19</sup>Iena  
ciuano, fariseuai coniniri ñaitimaci:

—Jaca buena birui finofiedicai. Ailluena  
comini Jesús díbeimo jai jaidimaci.

**Judíuaiñedino Jesúna  
cioiacana rafue**

<sup>20</sup>Judíuaiñedino Jusiñamuina  
sedallena, pascua railla rafuemo jiai

bitimaci.<sup>21</sup>Naie facaise cai dine  
bitimaci. Felipedí Galilea ie Betsaida  
nairai imienia jira, Felipe dine bitimaci.  
Felipemo llotimaci:

—Jesúna cioiacadicai.

<sup>22</sup>Felipe iena Andrémo llote. Ie mei  
Jesúmo lluaidiaimai. <sup>23</sup>Jesús uai ote:

—Monamona biticue; ia jai cue  
fiodaille facaise ride. Comini cue uaidi  
siñonana uiñua facaise jai ride. <sup>24</sup>Jiaie  
rafuedo iena lloitice. Ido rilla mei, naie  
ido sicoñenia, buena iñede; iadedi  
sicuamona, ailluena llisilladi iiite. Ie  
isoide. Cue fioldaiñenia, jaca bu  
jillobiñeite. Cue fioldillemona ailluena  
comini jillobitimaci. <sup>25</sup>Ie abimo ite  
rafuelmo começina dama bu facaia, ja  
muidomo faifite; ia cuemo ite rafuelmo  
começina bu facaia, monamo jaca iiite.  
<sup>26</sup>Cuena bu raise sedaacanía, cue  
rafuedo naimie jaite. Cue llofuegamien  
naimie jaillamona, cuemonia fueoite.  
Iemonia cue Moodi naimienia caimare  
itataite. <sup>27</sup>Cue começi jai rucaquerite;  
iadedi, ¿niese raiticue? Raiñeiticue:  
“Moo, cue fioldillemona cuena jillote”.  
Fiodaillena biticue. Ie jira raiticue:  
<sup>28</sup>“Moo, cominina o uai siñonana  
uiñota”.

Ieconi monamona Jusiñamui llote:

—Jai iena finodicue. Dane iena  
finoitice.

<sup>29</sup>Jusiñamui ñaiána nainomo ite  
comini raise cacaiñenano, raitimaci:

—Mona gurude.

Jiaino raitimaci:

—Naimiemo Jusiñamui jaienici llote.

<sup>30</sup>Jesús uai ote:

—Cue facaina naie lluana  
cacaiñedomoi; iadedi omoi facaina iena  
cacadomo. <sup>31</sup>Cuena uiñoñedino duere  
sefuilla facaise ja taineite. Taife anamo  
comini jai itimaci; ia Jusiñamui Taifena  
ja anafeftaite. <sup>32</sup>Cruzmo cue fiodaia,  
naimacina jilloitallena, ailluena

cominina cue dibeimo itataiticue.

<sup>33</sup>—Naimie fiodaillana naimaci  
uiñollena, iese llote.

<sup>34</sup>Naie comini uai otimaci:

—Jusiñamui facaina lloraini micoriai  
jaie cuega: “Cai Jilloitaraíma jaca  
fioldaiñeite”. ¿Niese raitio:  
“Jusiñamumona biticue; ia  
fioldaiticue”?

<sup>35</sup>Jesús dane uai ote:

—Cue llofua dinori omoi começaina  
nia lligaiñoticue. Cue lluamo cacarei.  
Omoi diga cue nia ia, cue llofuiamo  
cacarei. Jitiredemo bu macaria, nai  
illana raise uiñoñede. Ie isoide. Jeacino  
anamo itinodi jitiredinomo itimaci  
isoidimaci. Uanaicinona uiñoñedimaci.  
<sup>36</sup>Jeacino anamona omoi jilloillena, cue  
lligaiñoticue. Cue uaina iiino, cue  
cominina omoi jaillena.

Bie llua mei, Jesús oni jaillano,  
naimacimona reirite.

### Comini Jesús uaina iiinoñena rafue

<sup>37</sup>Jesús diga siño rafuena finode;  
iadedi ailluena comini: “Naimiedi cai  
Jilloitaraíma” raillana nia iiñosiñede.

<sup>38</sup>Iemonia Isaías micori jaie cuegafuiai  
suide. Naimie jaie cuega:

Jusiñamui, cai lluacinona  
cacadimaci.

O siño uaido o finoca rafuena jiai  
ciódimaci; iadedi iiñoñedimaci.

<sup>39-40</sup> Isaías micori dane cuega:

Naimaci cioi raillano, Jusiñamui  
naimacina uiñinidino isoi itatate.  
Naimaci começaimona abina uiñoi  
raillano, naimaci começaina  
feitate.

Naimienia iiñoi raillano, iese  
naimacina jai itatate.

Ie jira jai iiñonidimaci. <sup>41</sup>Jusiñamui ie  
ebirede rafuena naimie ciuamona, Isaías  
micori iena llote. Isaías micori Jesúna

llote. <sup>42</sup>Isaías micori iese llote; iadedi ailluena judíuia illaicomini Jesús uaina iiñotimaci. Fariseuaina jaciruillanona, iena janotimaci. Naimaci ofiracomona naimacina jino dotajana jaciruitimaci. <sup>43</sup>Comini naimacina iobitajana naimaci eo jitilla jira, dotajana jitaiñedimaci. Jusiñamuimo ite iobillacinona raise oiacaiñedimaci.

### Jesús ie Moona ñaia rafue

<sup>44</sup>Naie facaise Jesús eo ado llote:  
—Cuenca iiñotimie cuena oretatimieno jiai jai iiñote. <sup>45</sup>Cuenca ciódimie cuena oretatimieno jiai ciode isoide. <sup>46</sup>Comini comeciaína lligaiñollena biticue. Ie muidona naga cuena iiñotimie jitiredinomo jai iñede. Jeacino anamo jai iñede. <sup>47</sup>Cue uaina cacajano iiñoñedimieno juez isoi birui lloñedicue. Cominina duere finollena, biñedicue; iadedi naimaci jeacinomona naimacina jilloitallena biticue; <sup>48</sup>ia cuena bu iiñoñenia, cue uaina naimie iiñoñenia, ja muidona faifite. Cue uaina naimie iiñoñellemona, nana naimiena iiñoñedino janafefilliruimo Jusiñamuini naimiena ico duere finoite. Cuena jitaiñedimie, cue uaina jitaiñedimie comini janafefilliruimo janafefite. <sup>49</sup>Dama cue comeci facaja uaido lloñedicue. Cue Moo cuena oretaja muidona, cue Moo cuemo lloga uaido lloticue. <sup>50</sup>Cue Moo lloga uaidi naimie dibeimo cominina jaca itatare. Iena uiñoticue. Ie jira cue Moo cuemo lloga uaina jaca lloticue.

### Jesúdi ie llofueoicaigano eillaina jocua rafue

**13** <sup>1</sup>Pascua railla rafue riacana areruido ia, Jesús ie Moo dine abido jaiacanana uiñote. Naimaci diga naimie nia ia, ie cominina jaca eo isiruite. <sup>2</sup>Jesúna gaitatallena, naie

facaise Taifedi Judas Iscariote micori comecina feidote. Judas micori Simón jito. <sup>3</sup>Jesúdi ie uai ie Moomona feiñuana uiñote. Ie Moo dinena billana uiñote. Ie Moo dine abido jaillena jiai uiñote. <sup>4</sup>Nairuido Jesús cai diga guite. Guilla meinoconi, Jesús a naidacaída ie abimo ite iniroina duiñode. Abi dora diga ie moillina ferinote. <sup>5</sup>Janorede nogomo jinuina totaja mei, cai eillaina jicode. Safenaillena, ie dora diga dote. <sup>6</sup>Simón Pedro dine naimie ria, Pedro jicanote:

—Nama, ¿cue eillina jiai jocoitio?

<sup>7</sup>Jesús uai ote:

—Cue finoca rafuena birui uiñoñedio; iadedi jiairuido uiñoñitio.

<sup>8</sup>Pedro uai ote:

—Cue eillina jaca jocoñeitio.

Jesús uai ote:

—O eillina cue jocoñenia, cue facaina iñefitio.

<sup>9</sup>Pedro uai ote:

—Nama, dama cue eillina jocoñeno. O facaina raise cue illena, cue onollí, cue ifogi diga, jiai joco.

<sup>10</sup>Jesús uai ote:

—Nana o abina jocoñeitue. Da o eillina jocoitue. Jai noidimie mena icaiño noiñede. Ie abi jai jeanide. Dama ie eillina nibai dane jocoacade. Omoi comeciai jiai jai jeanide; iadedi omoimona damie comeci nia jearede.

<sup>11</sup>Naimiena gaitatacadimieno naimie uiñua jira, iese llote.

<sup>12</sup>Cai eillaina jocua mei, ie iniroi dane jitaja mei, dane ana rainadajanona, caímo jicanote:

—Omoimo ailli cue finoca rafuena nibai raise cacaiñedomoi. <sup>13</sup>Cuenca “Cai Nama” raicabitomoi. “Cai llofueraima” cuena jiai raicabitomoi. Iese cuena omoi raia, mare. Ie isoi iticue. <sup>14</sup>Omoi Namadicue. Omoi llofueraimadicue; iadedi omoi mullaima isoi iticuedena,

omoi eillaina jai jocodicue. Omoi jamai bue isoidinomona, omoi eillaina danirie jocua.<sup>15</sup>Cuemona fueo. Abi iedoñeno cue isoi omoi jai. Cue afemo iñedomoi.<sup>16</sup>Uanai omoimo lloticue. Mullaíma ie nama afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoi eillaina jocodicue. “Jíaimie afemo iticai” raillanomo comechina omoi facaño. <sup>17</sup>Bicino omoi uiñuamona, iese omoi finoia, cámare iitomoi. <sup>18</sup>Nana omoina iese ñaiñedicue. Nana cue fetocanona uiñoticue. David micori jaie llote: “Cue diga guitinomona damie cuena enoidimie ite”. <sup>19</sup>Bie nia suñenia, iena jai lloticue. Iena cuemo suilla mei, David micori llogacino raise iñoitomoi. <sup>20</sup>Uanai lloticue. Cue oretagamienra bu feiñoia, cuena jíai feiñote. Bu cuena feiñoia, cuena oretatimienra jíai feiñote.

#### **Jesús ie gaitataitimienra llua rafue**

(Mt. 26.20-25; Mr. 14.17-21;  
Lc. 22.21-23)

<sup>21</sup>Jesús iese llua mei, ie comeci sunaite. Llote:

—Uanai lloticue. Omoimona damie cuena gaitataite.

<sup>22</sup>Caimona ¿nimie naimienra gaitataite? raillanona, comechina facajano, coninimo eroridicai. <sup>23</sup>Cuena Jesús eo gaia jira, Jesús abimo iticue. <sup>24</sup>Cuena uaiduanona, Pedro cuemo llote:

—“¿Bu ona gaitataite?” Jesúmo jicanico.

<sup>25</sup>Ie jira Jesúmo jicanoticue:

—Nama, ¿bu ona gaitataite?

<sup>26</sup>Jesús uai ote:

—Bie llomenicona mutajanona, naimiemo fecaiticue —raite. Mutaja mei, Judas micorimo facade. Naimie micoridi Simón Iscarioite jito.

<sup>27</sup>Llomenicona guilla meinconi, Taife

anamo Judas micori illamona, Taife naimie comechina feidote. Jesús naimiemo llote:

—O finoacaga rana raire fino.

<sup>28</sup>Jesús Judas micorimo lluana raise uiñonédicai. <sup>29</sup>Judas micori ucubena sedaja jira, jíaino comechina facade: “‘Cai jitaille guille ibarisai’ Jesús naimiemo llote”. Iese lloñenia, “‘Janore ucube dueredinomo feca’ nibai naimiemo llote”. <sup>30</sup>Guilla mei, Judas micori jino jaide. Naie facaise jai jitireficaide.

#### **Jesús ie fiodaillena ñaia rafue**

<sup>31</sup>Judas micori jailla mei, Jesús llote:

—Jusiñamui mona billanona, iimana jaidicue; ia cue fioldaille facaise jai ride. Cue fioldallemona cominidi Jusiñamui uai siñonana uiñotimaci. <sup>32</sup>Iemona Jusiñamui uai siñonana comini uiñoia, Jusiñamuidi cominina cue siñó Jitona jíai uiñotaite. Iese ja finoite. <sup>33</sup>Cue comini, dallu omoi diga bene iticue. Jaiticue. Cue diga iacanitomoi. Judíuai illaicomínimo navui cue llua isoi, omoimo ja lloitue. Cue jaillinomo nia jaiñeitomoi. <sup>34</sup>Ie jira jíae rafuela omoimo ja lloitue. Omoina cue isiruilla isoi, coninina omoi isirui. <sup>35</sup>Coninina omoi isiruillamona, jíae cominidi cue cominidomoina uiñotimaci.

#### **Pedro Jesús diga ñaia rafue**

(Mt. 26.31-35; Mr. 14.27-31;  
Lc. 22.31-34)

<sup>36</sup>Naie facaise Pedro naimiemo jicanote:

—Nama, ¿nine jaitio?

Jesús uai ote:

—Cue jaillinomo cue diga ja jaiñeitio. Jiairuido jaitio.

<sup>37</sup>Pedro uai ote:

—Nama, ¿bue ñellena ja jaiñeticue? O jitaia, o facaina ja fioldaitue.

<sup>38</sup>Jesús dinena uai ote:

—Cue facaina fiodaiacadio. Uanai omo lloticue. Nia monaiñenia, iitava nia ñaiñenia, dacaño amani cuena janoitiosa.

### Jesús ie Moo dinomo rille rafue

**14** <sup>1</sup>Jesús ie llofueoicaiganodicaina nia llofuetē:

—Rucaiceriñeno uri i. Jusiñamuina iinocana jai. Cuena jiai iinocana jai. <sup>2</sup>Cue Moo illanomo diga comini illanuai ite. Iese iñedena, omoimo jai lloticue. Omoi illinuaña raise finollena, nainomo jaiticue. <sup>3</sup>Fuiduanona, dane abido biiticue. Omoina cue dine uillena, cue dine omoi illena, biiticue. <sup>4</sup>Cue jaillinona birui uiñotomoi. Nainomo omoi rillena jiai uiñotomoi.

<sup>5</sup>Tomás uai ote:

—Nama, o jaillinona uiñoñedicai. ¿Niese nainomo riiticai?

<sup>6</sup>Jesús uai ote:

—Omoi naiso isoidicue. Uanaicinona lloticue. Cue Moo dibeimo cominina jaca itataticue. Cue Moo dine joide naiso isoidicue. Jaca dasode cue Moomo duide naidi. Cue Moo dine o ria, cuena iino. <sup>7</sup>Cuena uiñotomoina, cue Moona jiai uiñotomoi. Biruidemona naimiena uiñotomoi. Naimiena jai ciodomoi.

<sup>8</sup>Felipe uai ote:

—Nama, o Moona caimo acata. Iemo jai macaibaite.

<sup>9</sup>Jesús uai ote:

—Felipe, are omoi diga iticue; iadedi cuena nia uiñoñedomoi. Cuena ciodomie cue Moona jiai jai ciode isoide. ¿Niese llotio: “O Moona caimo acata”? Cue Moona jai ciedio isodio. <sup>10</sup>Cue Moo diga daajedicoco. Iena nia iiñoñedio. Cue lluadi cue Moo uai. Cue lluadi cue comeci iuaiñede. Cue motodo naimie maijide. <sup>11</sup>Cue Moo diga daajedicocona iino. Cue uaina omoi iiñoñenia, siño rafuena cue finua jira, cuena iino.

### Jesús ie Moo Joreñona llua rafue

<sup>12</sup>Jesús nia llofuetē:

—Uanai lloticue. Cuena omoi iiñoia, cue finoca rafuena jiai finoitomoi. Cue Moo dine cue jailla jira, cue Moo Joreñona omoi dine cue oretaja mei, cue finua baifemo finoitomoi. <sup>13</sup>Cue Moo uai siñonana omoi uiñollena, buena cue dibeido cue Moomo omoi jicaia, nana iena finoiticue. <sup>14</sup>Cue dibeido omoi jicaia, iena finoiticue.

<sup>15</sup>Cuena omoi isiruia, cue llogacinuaina iiñoitomoi. <sup>16</sup>Ie Joreñō omoimo fecallena cue Moomo jiiiticue. Naie Joreñodi omoina canoite. Omoi diga jaca iite. <sup>17</sup>Uanaicinona llocabite.

Naimiena naimaci uiñoñena jira, cuena iiñoñedino naimiena feiñonidimaci; iadedi naimie omoi diga illa jira, naimiena uiñotomoi. Omoi diga jaca iite.

<sup>18</sup>Omoina fainonocaiñeiticue; ia dane biiticue. <sup>19</sup>Nano nigarui illanona, cuena iiñoñedino cuena nia cioitimaci. Ie mei cuena cioiñeitimaci; iadedi fiodaillamona cue jillua mei, cuena nia cioitomoi. Cue jaca illa jira, jiai jaca iitomoi. <sup>20</sup>Fiodaillamona cue jillua mei, cue Moomo cue duillana raise uiñotomoi. Cuemo omoi duillana jiai raise uiñotomoi. Omoimo cue duillana jiai raise uiñotomoi. <sup>21</sup>Cue llogacinuaina omoi isiruia, cuena isiruitomoi. Ie jira cue Moodi omoina jiai isiruite. Omoina jiai isiruiticue. Omoina cuena uiñotaiticue.

<sup>22</sup>Iscariotena mamecireñede Judas naimiemo jicanote:

—Nama, ¿bue ñellena dani caina ona uiñotaitio; iadedi jiaie cominina ona uiñotañeitio?

<sup>23</sup>Jesús uai ote:

—Cuena isiruitinona cue rafuena uiñotadicue. Bu cuena isiruia, cue llogacinuaina iiñoite. Cue Moo

naimiena isiruite. Iemona naimiena nabaitcoco. <sup>24</sup>Bu cuena isiruñenia, cue llogacinuaina iñonoñede. Cue llogacinodi cuejeñede. Cue Moo ie. Naimie cuena oretate. <sup>25</sup>Omoi diga nia cue illamona, bie llogaciuai omoimo jai lloticue. <sup>26</sup>Cue Moodi omoina canollena, naga rafuena omoina llofuelleña, cue facaina ie Joreñona omoimo oretaita. Omoina nana omoimo llogaciuaina comecitaita. <sup>27</sup>Cue Moo dine jaiticue; iadedi omoi comeciaina uri itataiticue. Cuena iñonoñedino omoi comeciaina iese itatanidimaci. Jarire iñeno. Jaciruiñeno. <sup>28</sup>Ailli cue lluana cacadomoi: “Cue Moo dine jaiticue; iadedi dane biiticue”. Cue Moo dine cue jailla jira, cuena omoi isiruia, cuerí iobitomoi. Cue Moo cue afemo ite. <sup>29</sup>Bie rafue cuemo nia suiñenia, uicodo omoimo iena jai lloticue. Naie suia, cuena fainonocaiñeno omoi jaillena jitaidicue. <sup>30</sup>Omoi diga are nia ñaiñeiticue. Cuena iñonoñedino anamo itímie cuena jai duere finoacade. Taifena ñaiticue. Naimie anamo iñedicue; <sup>31</sup>iadedi cue Moona cue isiruillana cuena iñonoñedino uiñollena, cue Moo cuemo llua isoi, finoiticue. Mai cai jailli.

#### Uvas railla riara ie rafue

**15** <sup>1</sup>Jesús nia llofueté: —Cue dibeímo marena omoi illena omoi raise uiñollena, jiae rafuedo iena llofueiticue. Uvas railla ua riaradicue. Cue Moodi uvas railla riara sedaraima. <sup>2</sup>Cue amena igaillañomoi. Llisiñede igai cue Moo cugaica. Eo llisillena, naga lliside igaina janore muido jaigaica. Ie isoide. <sup>3</sup>Cue llogaciuaido jaillamona, jai jaigaica isoidomoi. Iemoná omoi comeciai jai jeanide. <sup>4</sup>Cuena nabai. Ona jiai nabaitcue. Naie amenamo jai duiñena jira, daje dibegaise jaitaca igaidi jai

llisiñede. Ie isoide. Cuena omoi nabaicabiñenia, llisiñede igai isoidomoi. Ie jira cuena nabai. <sup>5</sup>Uvas railla riaradicue. Cue amena igaillañomoi. Cuemo omoi duiadedi, omoimo cue duiadedi, eo lliside isoidomoi; iadedi cuemo omoi duiñenia, jaca llisiñede isoidomoi. Cuemo omoi duiñenia, cue jitaila isoi mare rafuena jaca finoñeitomoi. <sup>6</sup>Jai duide igaillai safenaila mei, maraiñena jira, jobaillena, danomo ofitaticai. Cuemo duiñedimie jai duide igai isoide. Jusiñamuimona duere sefuite. <sup>7</sup>Cuena omoi nabaia, cue uaina omoi feitañenia, omoi jitaille rana jica. Ie mei feiñoitomoi. <sup>8</sup>Eo lliside omoi isoia, cue Moo iobide. Iese omoi ia, ua cue cominidomoi. —Iese Jesús llofueté; ia naimie dibeímo naimaci raise illena ñaite. Mare rafuena naimaci finocana jaillena ñaite.

<sup>9</sup>Nia llofueté:

—Cuena cue Moo isiruilla isoi, omoina isiruiticue. Cuena nabaicabi.

<sup>10</sup>Cue Moo llogacinuaina cue iñiuamona, naimie isiruillacino anamo iticue. Cue Moo llogacinuaina omoi iñiuamona, cue isiruillacino anamo itomoi. <sup>11</sup>Cue isoi omoi comeciai eo caimarellena, bicinuai omoimo lloticue.

<sup>12</sup>Dane bie rafuena lloitue. Omoina cue isiruilla isoi, coninina omoi isirui.

<sup>13</sup>Naimaci o isiruillamona, o nabaiñia facaina o fiodaia, naimacina eo ua isiruitio. <sup>14</sup>Cue llogacinuaina omoi iñonia, cuena nabaidomoi. <sup>15</sup>Omoina “Cue mullaiañomoi” jaca raiñedicue; iadedi omoina “Cue nabaiñiañomoi” birui raiticue. Mullañaí imaci patrón finoca rafuena uiñonédimaci. Ie jira nana cue Moomona cue cacaja rafuena omoimo jai lloticue. Ie jira nana cue rafuena jai uiñotomoi. <sup>16</sup>Cuena fetoñedomoi; iadedi omoina fetodicue.

Omoi lliside isoicabillana omoimo jai lloticue. Ie mei buena cue mamecido cue Moomo omoi jicaia, omoimo feacaite. <sup>17</sup>Coninina omoi isiruillena jai lloticue.

### Comini Jesúna enoilla rafue

<sup>18</sup>Jesús nia llofuet:

—Cuenca iinoñedino omoína enoia, nano cuena jai enoidimaci. Iena uiñotomoi. Omoína nia enoiñenia, cuena jai enoidimaci. <sup>19</sup>Naimacimo jaínaiaidomoína, omoína isiruitimaci; iadedi naimacimo omoi jaínaiaíñena jira, omoína cue fetua jira, omoína enoidimaci. <sup>20</sup>Omoímo jai lloticue. Illaíma duere sefuia, naimie anamo itino jiai duere sefuidimaci. Ie isoide. Cuenca comini duere finua isoi, omoína jiai duere finoitimaci. Cue llofuiacina naimaci iinua isoi, omoi llofuiacino jiai iinoitimaci. <sup>21</sup>Cuenca oretatimiena naimaci uiñoñena jira, cue muidona iese finoitimaci. <sup>22</sup>Naimacimo ite jeacínona naimacimo lloñedicuena, naimacimo ite jeacínona uiñoñedimaci. Cue rafuena naimaci cacajamona, naimacimo ite jeacínona jai uiñotimaci. Naimacimo jeacino nia ia, naimaci muidona. <sup>23</sup>Cuenca enoidimiedi cue Moona jiai enoide. <sup>24</sup>Eo siño rafuena naimaci motomo finodicue. Buna cue isoi jaca finoñede. Iena finoñedicuena, naimacimo ite jeacínona uiñoñedimaci. Cue siño finoca rafuena jai ciódimaci. Ie jira cuena enoidimaci. Cue Moona jiai enoidimaci. <sup>25</sup>Naimacina David mícori jaie llote: “Naimacimo buena finoñedicue; ia cuena enoidimaci”. Naie cuegafuiai jai suide.

<sup>26</sup>Cue Moo ie Joreño omoímo oretaita. Ie Joreño omoína canoite. Omoína uanaicinona uiñotaite. <sup>27</sup>Cue nano lluaruimona cue diga omoi illa jira, cue facaisena jiai raise lloitomoi.

Judíuaí illaicomini Jesús  
llofueoicaiganona duere finua rafue

**16** <sup>1</sup>Jesús nia llofuet:  
—Danomo abido omoi  
jaiñellena, cue uaina omoi  
faínocaiñellena, biciñuai omoímo ja  
lloitue. <sup>2</sup>Omoi ofiracomona illaicomini  
omoína dotaítimaci. Jiairuido omoína  
meiniamona: “Jai Jusiñamuina marena  
sedadicai”, comeciaína facaitimaci.  
<sup>3</sup>Cuenca naimaci iinoñena jira, cue  
Moona jiai naimaci iinoñena jira, iena  
finoitimaci. <sup>4</sup>Bie rafue omoímo suia,  
naie facaise cue lluana omoi  
comecillena, omoímo birui lloticue.  
Omoi diga cue illa jira, navui iena  
lloñedicue; iadedi omoímona birui oni  
jaiticue.

### Jesús Jusiñamui Joreñona llua rafue

<sup>5</sup>Jesús nia llofuet:

—Cuenca oretatimie dine ja jaíticue;  
iadedi omoímona buna: “¿Nine jaitio?”  
cuemo jaca nia jicanóñede. <sup>6</sup>Omoímo  
bie rafue cue llua jira, omoi comeciaí eo  
sure ite. Ie jira cue jaillinona  
jicanóñedomoí. <sup>7</sup>Uanai lloticue. Cue  
jaia, mare. Cue jaíñenia, omoína  
canoraima omoi dine biñeite. Cue jaia,  
omoi dine naimiena oretaiticue.  
Jusiñamui Joreñodi omoi canoraima.  
<sup>8</sup>Naimie bia, cuena iinoñedinona  
naimacimo ite jeacínona uiñotaite.  
Naimiedi Jusiñamui marena naimaci  
illana jitaillana uiñotaite. Naimiedi  
Jusiñamui naimacina duere finollena  
jiai uiñotaite. <sup>9</sup>Cuenca naimaci  
iinoñenia, naimacina naimacimo jeacino  
nia illana uiñotaite. <sup>10</sup>Cue Moo dine  
abido cue jaillinona, cuena  
cioñeitimaci; ia iemonia Jusiñamui  
Joreño cue uaina siñonana uiñotaite.  
<sup>11</sup>Fiodaillemona jilloiticue. Iemonia

cuena iinoñedino anamo itimiedi cue Moo janafefillacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafefillemona jilluana uiñotaite. <sup>12</sup>Diga rafue omoimo nia lloiacadicue; iadedi jai rairaifadomo. <sup>13</sup>Jusiñamui Joreño bia, omoimo nana uanaicinuaína llofueite. Dama ie facaina llorfueñeite; iadedi ie cacajacínodo llofueite. Jíairuido suille rafuena llofueite. <sup>14</sup>Omoina cue rafuena uiñotaite. Ie jira cuena iboitaite. Nana cue Moomo ite uaidi cueje. <sup>15</sup>Ie jira bie rafuena lloticue. Jusiñamui Joreño omoína cue rafuena raise uiñotaite.

### Sunaillamona caimare illa rafue

<sup>16</sup>Jesús nia llofuetate:

—Dallu illanona cuena cioiñeitomoi. Ie mei dallu illanona, cuena dane cioitomoi.

<sup>17</sup>—Ie llofueicaiganodicaimoná damierie dani coninimo jícanodosite: —¿Niese caímo lloote: “Dallu illanona, cuena cioiñeitomoi. Ie mei dallu illanona, cuena dane cioitomoi. Cue Moo dine jaiticue”? <sup>18</sup>¿Buena caímo lloote? Raise cacañedicai.

<sup>19</sup>Cai jicanuana Jesús uiñuanona, naimie jicanote:

—¿Cue lluana raise uiñoiacadomo? <sup>20</sup>Cuemo suille rafue suia, eo eeitomoi; iadedi cuena iinoñedino eo iobitimaci. Sunaitomoi; iadedi jíairuido caimare iitomoi. <sup>21</sup>Jíiae uaido iena lloiticue. Riño jocoacanía, naíñaiño jígico isirede. Jocua mei, naíñaiño urue jeiciamona, isirenadi feibicaide. Iemonia jai iobide. <sup>22</sup>Ie isoide. Ja sunaitomoi; iadedi dane omoína cioiticue. Fiodaillamona cue jillua mei, dane cuena cioitomoi. Ie mei caimare iitomoi. Iemonia omoína buna sure itatañeite. <sup>23</sup>Nairuimo cuemo buena jicañeno; iadedi cue Moomo jíca.

Ie mei cue muidona naimie omoímo feacite. <sup>24</sup>Cue mamecido cue Moomo buena jaca nia jicañedomoi. Jíca. Ie mei feiñoitomoi, omoí comeci eo caimare illena.

### Jíairuido Jesús marefodo llua rafue

<sup>25</sup>Jesús nia llofuetate:

—Jíiae uaido bicinona omoímo jai lloticue. Jíairuido iese llofueñeite. Omoína cue Moona marefodo lloiticue.

<sup>26</sup>Nairuimo cue Moomo omoí facaina jicañeticue. Cue mamecido cue Moomo omoí jitaillacínona dani jícaitomoi.

<sup>27</sup>Omoína naimie isiruillamona, omoímo fecajite. Cuena omoí isiruilla jira, cue Moomona cue billana omoí iñuua jira, cue Moo omoína isiruuite.

<sup>28</sup>Cue Moomona eniruemo biticue. Naimie dine abido jaiticue.

<sup>29</sup>Lloticai:

—Jai marefodo caímo llotio. O uaina meidocana jai uiñedio. <sup>30</sup>Nana rafuena o uiñuana uiñoticai. Cai comeciaímo iticinona o uiñuamona, caina raise uiñotio. Iemonia Jusiñamuimona o billana jai iñoticai.

<sup>31</sup>Jesús uai ote:

—Cuena jai iñotomoi. <sup>32</sup>Jíairuido, ua birui, omi tuuitomoi. Nagamiai jofomo omoí jaiilla mei, dama ifoconi fiebiticue; iadedi dama iñeiticue. Cue Moo cue diga iite. <sup>33</sup>Cuena omoí iñuano, omoí uri illena, omoímo bie lloticue. Eniruemo omoí ia, jaca duere sefuitomoi; iadedi omoí comeciaína ocuño. Omoína duere finodinona jai cue emodofilla jira, omoí comeciaína ocuño. Naimaci baifemo fáiticue.

Jesús ie Moo diga ñaia rafue

**17** <sup>1</sup>Jesús bicinona llua mei, monamo eruaillano, jiide: —Moo, cue fiodaiaçanarui jai ride. Cue uai siñonana uiñota. Iemei o uai

siñonana jiai uiñotaiticue. <sup>2</sup>Nana comini afemo cuena jai itatatio. Jímana cue jaillamona, nana comini afemo cuena jai itatatio. Comini comeciai iuaina o meidotajamona, cue fiodaillamona, ailluena comini o diga jaca iitimaci. <sup>3</sup>Ona nanoca Jusiñamuina uiñoitimaci. Jai cuena o oretajana jiai uiñoitimaci. <sup>4</sup>Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue. <sup>5</sup>Ore Moo, enirue nia iñena facaiseconi o diga iticue. Illaima isoi o ecimo dane ebire iacadicue. Dane cuemo ine, daje isoi coco illesa. <sup>6</sup>Comini comeciai iuaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemonia o rafuena iñocana jaidimaci. <sup>7</sup>Nana cuemo ite rafue omona feiñoticue. Iena jai uiñotimaci. <sup>8</sup>Nana cuemo o llogacinuaina naimacimo jai lloticue. Jai iñotimaci. Omona cue billana jiai jai iñotimaci. Cuena o oretajana jiai iñotimaci. <sup>9</sup>Naimaci facaina birui jiidicue. Naimacina cuena iñotadio. Ie jira omo jai duidimaci. Ona iñofedino facaina birui jiñedicue. <sup>10</sup>Nana o dibeimo itinodi cueje. Nana cue dibeimo itinodi oie. Nana naimaciri iobidicue. <sup>11</sup>Bene eniruemo fiebitimaci. Eniruemonia monamo jaíticue. O dine abido jaíticue. Ore Moo, jeacino naimaci finoi raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita. <sup>12</sup>Naimaci diga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraite. Jusiñamui lloraima micori cuegafuiai suillena, naimie ua faifite. <sup>13</sup>O dine ja jaíticue. Cue isoi naimaci comeciai eo caimare illena,

naimacimo ailluena rafuena jai lloticue. <sup>14</sup>O llogacinuaina jai lloticue. Ona iñofedino naimaci jainaiañena jira, ona iñofedino naimacina enoidimaci. Ona iñofedino naimaci jainaiañedicue. <sup>15</sup>Eniruemonia birui o naimacina uana jicanoeñedicue; iadedi Taifemona naimacina o sedajana birui jicanoticue. <sup>16</sup>Ona iñofedino jainaiañedimaci. Ona iñofedino naimaci jainaiañedicue. <sup>17</sup>O llogacinuaido naimacina marena itata. O llogacinuaidi uanaicino. O jitailiacinona naimaci finollena, o uai naimaci comeciaimo raise itata. <sup>18</sup>Bene cuena o oretaja isoi, ona iñofedino dine naimacina oretaticue. <sup>19</sup>Uanaicinona naimaci uiñuamona, naimaci comeciai marebicaillena, cuena iñotino facaina fiodaiacadicue. <sup>20</sup>Bimacina birui dane jiñedicue; iadedi bimaci cue rafuena ico lloia, jiae comini cuena iñotimaci. Cuena ico iñotino facaina birui jiai jiidicue. <sup>21</sup>Daajedicoco. Coco illa isoi, naimaci comeciaina daje isoi lloillena, nana naimaci facaina jiidicue. Daje isoi comeciai lloillaamona, cuena nia iñofedino iñotimaci. Iemonia cuena o oretajana iñotimaci. <sup>22</sup>Cuemo o iga uaidi ebirede. Naimaci comeciai lloillena, naimacimo o uai jai cue iga. <sup>23</sup>Naimaciri daajedicai. O diga daajedicoco. Naimaci comeciai daje isoi lloillana jitaidicue. Iemonia cuena iñofedino bene cuena o oretajana uiñotimaci. Cuena o isiruilla isoi, naimacina o isiruillana jiai uiñotimaci. <sup>24</sup>Ore Moo, naimaci cue dine illena jitaidicue. Enirue nia iñenia, illaima isoi o ecimo ebire jaie iticue. Dane ie isoi ebire birui cue ia, naimaci cuena ciuana jitaidicue. <sup>25</sup>Ore Moo, mareuidimiedio. Jiae comini ona uiñofedimaci; iadedi ona uiñoticue. Cue llofueoicaiganodí o cuena oretajana jai uiñotimaci.

<sup>26</sup>Naimacimo ona jai lloticue. O cuena isiruilla isoi coninina naimaci isiruillena, naimacimo nia lloitue —jiide.

**Jusúna gaitalle rafue**  
(Mt. 26.47-58; Mr. 14.43-54;  
Lc. 22.47-54)

**18** <sup>1</sup>Jiia mei, Jesús ie llofueoicaiganodica diga, Cedrón railla iconi enefebelimo ruica aceituna railla riaraia illanomo naiona jaide. <sup>2</sup>Jesús cai diga nainomo jaisoilla jira, Judas micori naie illanona jai uiñote. Jesúna gaitatallena nainomo Judas jaide. <sup>3</sup>Soldaduai diga policías diga jaide. Naimacina ifode. Jusiñamui diga nanoca ñairaima naimacina oredimaci. Fariseuai naimacina jai oredimaci. Soldaduaidi lamparíniairi bitimaci. Reinaiairi jiai bitimaci. Sidaniairi jiai bitimaci. Judas naimacina ifode. <sup>4</sup>Jesúdi nana naimiemo suille rafue uiñuanona, naimaci díne billano, jicanote:

—¿Buna jenodomoi?

<sup>5-6</sup>Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinaillamona, abido ñaijillamona, eniruemo uaidimaci. Jesúna gaitatallena, Judas micori naimaci diga ite.

<sup>7</sup>Jesús dane jicanote:

—¿Buna jenodomoi?

Uai otimaci:

—Nazaret ie Jesús.

<sup>8</sup>Jesús uai ote:

—Omoimo jai lloticue: “Imiedicue”.

Cuena omoi jenoia, cue diga itino oni jaillena rairuifeno.

<sup>9</sup>Naimie ie Moomo como lloga uai suillena, iese llote. Iese ie Moomo como llote: “Cuena o iinotaganomona jaca buna faifiñedicue”. <sup>10</sup>Ie daacaiño Simón Pedromi ie lloebi llinocaida, Jusiñamui diga nanoca

ñairaima mullaima jefona jaibonote. Naie mullaima mamecidi Malco. <sup>11</sup>Iena ciuanona, Jesús Pedromo llote:

—O lloebina eneo. Cue Moo jitaila isoi, fiodaiticue.

<sup>12</sup>Ie mei soldaduai, imaci capitán diga, judíuai imaci policías diga, Jesúna gaitajano, naimiena maitimaci. <sup>13</sup>Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima. <sup>14</sup>Navui Caifás judíuai illaicominimo llote: “Damie nana cai comini facaina fiodaitena, mare”.

**Pedro Jesúna nano janua rafue**  
(Mt. 26.69, 70; Mr. 14.66-68;  
Lc. 22.55-57)

<sup>15</sup>Simón Pedro Jesúna jinafo racade. Jiai racadicue. Cuena Jusiñamui diga nanoca ñairaima uiñua jira, ie nairaibírimo Jesús diga jaidicue; <sup>16</sup>iadedi Pedro nasemo fiebicaide. Ie jira jino abido jaillano, Pedro fo atillena, nasena sedaraiñomo jicanoticue. <sup>17</sup>Naiñaiño Pedromo llote:

—Jesús llofueoicaigano imiedio.

Pedro uai ote:

—Ieñedicue.

<sup>18</sup>Rosirena jira, naie jofo mullaiai, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiai ite.

**Jesús Anás díne illa rafue**

(Mt. 26.59-66; Mr. 14.55-64;  
Lc. 22.66-71)

<sup>19</sup>Ie facaise Anás Jesúmo ie llofueoicaiganodicaína jicanote. Ie llofuiaciuáina jiai jicanote. <sup>20</sup>Jesús dinena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusiñamui jofomo jiai jaca llofuecabiticue. Nainomo nana o comini oficabidomoi. Bainino buena jaca lloñedicue. <sup>21</sup>¿Bue ñellena birui cuemo

jicanotio? Cuena cacadinomo iena jicano. Cue llofuiana uiñotimaci.  
<sup>22</sup>Iese Jesús llua jira, daje policía naimie uiecona butade. Jesúmo jicanote:  
—¿Bue ñellena iese uai otío?  
<sup>23</sup>Jesús dínená naie uai ote:  
—Naimie uai jeare oticuena, cuemo llono. Jeare oñedicuemo, ¿bue ñellena cuena butadio?  
<sup>24</sup>Jesús uai oñede. Iemei Anásdi Caifás jofomo Jesús maianona orede.

**Pedro Jesúna dane janua rafue**  
*(Mt. 26.71-75; Mr. 14.69-72;  
Lc. 22.58-62)*

<sup>25</sup>Ie facaise Pedro irai ecimo nia agaide. Nainomo itino naimiemo llote:  
—Jesús llofueoicaigano imiedio.  
Pedro janote:  
—Ieñedicue.  
<sup>26</sup>Naie facaise daje mullaíma Pedromo llote:  
—Aceitunas railla riaraíai illanomo ona ciódice —llote. Jusúna soldaduai gaitaja facaiseconi Pedro naie mullaíma ie come jefona ailli jaibonote, soldaduai Jesúna gaitaja ie daacaiño. <sup>27</sup>Pedro dane janote. Ieconi iitava ñaíte.

**Jesús Pilato dine illa rafue**  
*(Mt. 27.1-2, 11-14; Mr. 15.1-5;  
Lc. 23.1-5)*

<sup>28</sup>Ie mei Caifás jofomona gobernador jofomo Jesús jitiramo uitimaci. Naie facaise gobernadordi Pilato. Naimiedi judíuainédime. Naimaci einamaci rairuilla jira, judíuainédime jofomo naie facaise fo jaiñedimaci. Fo jaiadedi, pascua railla rafue guilledi guiñega. <sup>29</sup>Ie jira Pilato jino bite. Naimacimo jicanote:  
—¿Nie isoide rafue muidona llogidotomoi?

<sup>30</sup>Uai otimaci:  
—Bimie maraiñede rafue finoñedena, o dine naimiena atiñedicai.

<sup>31</sup>Pilato llote:  
—Naimiena uiño. Omoi einamaci llogaciuado naimiena duere fino.  
Uai otimaci:  
—Come meinellena caimona rairuidomoi. Naimie coraíana jitaidicai —llotimaci. <sup>32</sup>Navui Jesúdi: “Cuenca cruzmo coraíitimaci” llote. Naie lluacino jai suisaise.  
<sup>33</sup>Pilato fo abido jaillano, Jesúna uaiduano, naimiemo llote:  
—Judíuai illaima raillamiedio.  
<sup>34</sup>Jesús dínená jicanote:  
—¿O comeciná dama iese facajano llotio? Iese comeciná o facañenia, jiaimie omo lloga.  
<sup>35</sup>Pilato uai ote:  
—Judío imieñedicue. O rafue raise uiñoñedicue. Omoi comini cuemo ona fecadimaci. Jusiñamui díga nanoca ñairaini cuemo jiai fecadimaci. ¿Nie isoide maraiñede rafuena finodio?  
<sup>36</sup>Jesús uai ote:  
—Eniruemo cominina sedañedicue. Judíuai illaicomini cuena gaitañellena, eniruemo cominina sedadicuedena, cue comini cue facaina fuiridimaci.  
<sup>37</sup>Pilato uai ote:  
—Ie jira odí illaimadio.  
Jesús uai ote:  
—Jaca railla. Uanaicino llollena, jeicigacue. Nana uanaicinona jitaidino cue lluana cacadimaci.  
<sup>38</sup>Pilatodi Jesús uaina uaitajamona, raite:  
—¿Nie uai naidí uaina?  
Ie mei dane jino billano, cominimo llote:  
—Jaca nicino naimiemo iñede.

**Jesúna coraíacana rafue**  
*(Mt. 27.15-31; Mr. 15.6-20;  
Lc. 23.13-25)*

<sup>39</sup>Pilato nia llote:  
—Naga año pascua railla rafue illa facaise, damie cárcelmona jino ollena,

cuemo jicanuaibisoidomoi. Bie año omoi jitaia, omoi illaima raillamiéna marena oreaiticue.

<sup>40</sup>Comini dinena cuiriidimaci:

—Dama ite. Bimiéna jitaiñedcai. Barrabásna cárcelmona marena jino oreta. —Iese cuiriidimaci. Barrabásdi firiraima.

**19** <sup>1</sup>Ie mei Pilato Jesúna oni uillanona, naimiena sechedotade. <sup>2</sup>Jifanodosillena, soldaduái eecuaimona finoca nuiciraina naimie ifogimo jitadimaci. Jiduirede iñiroina jitatajano raitimaci:

<sup>3</sup>—Judiúai illaimadió. —Iemei ie ueconá bucoídimaci.

<sup>4</sup>Pilato dane jino billano, raite:

—Naimie omoi díne jino ja biite. Naimiemo nicinodi iñede —raite.

<sup>5</sup>Ie facaise Jesúna jino bite. Eecuaimona finoca nuiciraina jitaca. Jiduirede iñiroina jitaca. Pilato naimacimo llote:

—Jadi, naimie.

<sup>6</sup>Jusiñamui diga nanoca ñairainidi, jiae illaicomini diga, naimiena ciuano, cuiriidimaci:

—Naimiena corai.

Pilato llote:

—Naimiemo nicinodi iñede; ia oni uillanona, naimiena omoi corai.

<sup>7</sup>Uai otimaci:

—Moisés micorí jaie cuega: “Bu Jusiñamuina jeare ñaijanona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitadimie. Caimona naimiedi maraiñede rafue jai finode.

<sup>8</sup>“Naimiedi Jusiñamui Jito” comini raillana Pilato cacajano, eo jacinaite.

<sup>9</sup>Jesúna dane fo uite. Jesúdi Jusiñamui Jitona naimie raise uiñollena, Jesúmo jicanote:

—¿Ninená bitio?

Jesús uai oñede. <sup>10</sup>Ie jira Pilato dane jicanote:

—¿Bue ñellena cue uaina oiacaiñedio? Uai cuemo ite, o marena oretallena. Uai cuemo ite, ona coraitallena.

<sup>11</sup>Jesús uai ote:

—O anamo Jusiñamui cuena itataja jira, o uai ite, cuemo llollena. Ie jira omo cuena fecadino o baifemo jeacino finodimaci.

<sup>12</sup>Ie facaimona Pilato Jesúna marena jino oretaiacade; iadedi judíuái illaicomini dinena cuiriisite:

—Bimie o jino marena oretaiá, cai nanoca illaima ie nabaiñedio. “Illaimadue” Jesúna lluamona, cai nanoca illaima dibeimo naimiedi iñede. Cai nanoca illaimadi César.

<sup>13</sup>Comini lluana cacajano, Pilato Jesúna jino atide. Le cominimo lloranomo raide. Naie illano nofinina mamecirede. Judíuái uaido Gabatana mamecirede. <sup>14</sup>Pascua rafue guilla finoraruimo jitoma naidai illanona, Pilato dinena llote:

—Jadi, omoi illaima.

<sup>15</sup>Iemoná cominidi cuiriisite:

—Naimie oni uillanona, naimiena meine! ¡Naimiena corai!

Pilato jicanote:

—¿Bue ñellena omoi illaimana coraiiticue?

Jusiñamui diga nanoca ñairaini uai otimaci:

—Cai illaimadi César. Jiae illaimadi caimo iñede. Jaca dallaimade cai illaimadi.

<sup>16</sup>Ie mei Pilato naimacimo naimiena fecade, coraillena.

**Jesúna coraíacana rafue**

(Mt. 27.32-56; Mr. 15.21-41;

Lc. 23.26-49)

Pilato llua jira, Jesúna uitimaci coraillena. <sup>17</sup>Jesúdi ie cruzna rocaoiceada sonode. Ifocoraina eruailla mamecirede illanomo jaidimaci. Judíuái

uaido naie illano Gólgotana mamecirede.<sup>18</sup> Nainomo naimiena coraídmaci. Naimie abimo menamie coraica. Damie Jesús nabeimo. Jiaimie jarifebeimo.<sup>19</sup> Cruzmo jonellena, Pilato rabicimo cuetataste: "Nazaret ie Jesús. Judíuai Illaima".<sup>20</sup> Judíuai uaido cuega. Romanos comini uaido jiai cuega. Griego uaido jiai cuega. Jesús coraiano Jerusalén ianori illa jira, ailluena comini iena ciodomaci.

<sup>21</sup>Iena ciuamona, naie rabicina meidollena, Jusiñamu diga nanoca ñairaini Pilatomo llotimaci:

—"Judíuai Illaima" raillano jai cuetatatio. Iena meiduana jitaidicai. Bimie dinena raisoide: "Judíuai Illaimadicue" raillanova, o cuetatajana jitaidicai

<sup>22</sup>Pilato uai ote:

—Jai cuetatacticue. Jiae rabicimo dane cuetatañeiticue.

<sup>23</sup>Jesúna coraia mei, soldaduai naimie iniroi uanona, naga soldado digamie jonega iniroi. Nagaamaga soldaduai ite. Ie camisa fiebide. Naie daje jamai nigaroi.<sup>24</sup> Ie jira daní coniniri ñaitimaci:

—Bie camisa cuaranoñeitacai, daní cai fecallena. Mai. Conima jabomaitacai, iena ollena. —Iese finuano Jusiñamuina lloraima micori cuegafuiai suide. Jaie cuega: "Cue iniroi daní naimacimo fecaitimaci; iadedi cue camisa ollena, conima jabomaitimaci". Iese finodimaci.

<sup>25</sup>Cruz abimo Jesús ei, ie euiño diga ite. Cleofas aidi ite. Naiñaiño mameci María. María Magdalena jiai ite.<sup>26</sup> Jesús ie eina ciode. Cuena naiñaiño ecimo jiai ciode. Cuena eo gaide. Ie jira ie eimo lloste:

—Jadi, o jito isoi itimie anamo iitio.

<sup>27</sup>Cuemoo lloste:

—Jadi, o ei isoidiñaiño anamo iitio. Naie dacaiño naiñaiñona cue jofomo uillanova, naiñaiñona sedadicue.

<sup>28</sup>Ie mei Jesús nana rafue jai fuillana uiñuano, lloste:

—Jiroacadicue. —Iese lluanona, Jusiñamuina lloraima micori jaie cuegafuiai jai suide.<sup>29</sup> Nainomo llerojimo vino ite. Radosimo fibecode rana joniano, vinomo faite. Iemei Jesúsimo fecade jaronollena.<sup>30</sup> Iena jaronuano, Jesús lloste:

—Cue maijia jai fuite. Jai macaibaite.

—Ie ifogi ana jitadacaida, fiodataite.

### **Jesús sida diga ducia rafue**

<sup>31</sup>Pascua railla rafue guille finuarui illa jira, judíuai illaicominí Pilato dine jaidimaci. Raire fiodaillena, coraicanoo idaiaina uellullena naimiemo jicanuidimaci. Sábado rafue ie nairuina illanova, sáboruji jai raire taineacana jira, coraicanoo cruzmo sáboruimo illana jitaiñedimaci.

<sup>32</sup>Soldaduai jaillano, Jesús ecimo coraica iaímaiai idaiaina uellude.

<sup>33</sup>Jesús dine billano, naimie jai fiodaillana ciodomaci. Ie jira naimie idaiaina uelluñedimaci;<sup>34</sup> iadedi daje soldado Jesús ciraigiconi sida diga ducide. Naifo diaide. Naifomona jinui jiai bite.<sup>35</sup> Nana iena ciodicue. Uanai lloticue. Omoi iinollena, iena lloticue.

<sup>36</sup>Soldaduai iese finuamona, jaie cuegafuiai jai suide. Jaie Jesús cuega: "Naimie illaicina tainoñeitimaci".<sup>37</sup> Jiae jaie cuega: "Judíuai dinena naimaci ducitagamiemo ico eruaitimaci".

### **Nofici ifomo Jesús raia rafue**

(Mt. 27.57-61; Mr. 15.42-47;  
Lc. 23.50-56)

<sup>38</sup>Naie facaise Pilato dine José raillamie jaide. Cruzmona Jesús abi oni ollena, Pilatomo jicanuaide. Josédi Arimatea nairai imie. Pilato fairiote. Ie jira José Jesús abi ana uanona, iena oni uite. Judíuai illaicominina naimie jaciruillanova, Jesús

bainino iinote. <sup>39</sup>Nicodemo jiai bite. Siorede rana atide. Mirra áloe diga jai tamiano atide. Níbai treinta kilos atide. Naimiedi Jesús dine naiona navui bite. <sup>40</sup>José, Nicodemo diga, Jesús abina useroina ferinottiaimai. Naimaci comini finouilla isoi, naie siorede radi iniroimo jonega. <sup>41</sup>Amenaiai iaire illanomo Jesúdi coraica. Nainomonofici ie raiafodi ite. Nia buna naifomo raiñenafo. <sup>42</sup>Naifo iaire illa jira, sábadorui jai riacana jira, jiae raiifojenollena abi juanina jira, nainomo naimiena Jonetiaimai. Nofici diga raiifo raise ibailla mei, jofomo jaidiaimai.

**Fiodaillamona, Jesús jillua rafue**  
(Mt. 28.1-10; Mr. 16.1-8; Lc. 24.1-12)

**20** <sup>1</sup>Domingo jitiramo nia monaiñenia, raiafomo María Magdalena jaide. Raifo ibailla nofici oni joillana ciode. Jesús abina ctoiñede. <sup>2</sup>Ie jira aisicana Pedrona jenuaide. Cuena jiai jenuaide. Baillano, llote:  
—Cai illaicomini cai Nama abina raiafomona otimaci. Naimiena Jonianona uiñoñedicue.

<sup>3</sup>Ie mei raiafomo jaidicoco. <sup>4</sup>Aisicana jaidicoco; iadedi riire cue aisicana jailla jira, nano ridicue. <sup>5</sup>Ana bitadacaída, fo erodaticuemo, useroi joillana ciodicue; iadedi fo jaiñedicue. <sup>6</sup>Ie mei Simón Pedro rillano, fo jaide. Useroi joillana jiai ciode. <sup>7</sup>Ie ifogimo ferinoga iniroi eneno illana ciode. Raise nacuana ciode. <sup>8</sup>Iemei jiai fo jaidicue. Iniroina ciuamona, Jesús jai jilluana iinoticue. <sup>9</sup>Jiae cuegafuiai llote: “Fiodaillamona jilloite”. Naie cuegafuiaina como raise iinoticoco. <sup>10</sup>Ie mei jofomo jaidicoco.

**Maria Magdaleno**  
**Jesús bairia rafue**  
(Mr. 16.9-11)

<sup>11</sup>Raiafomo abido billano, coco jailla mei, nainomo María fiebide. Eede. Ana

bitadacaída, fo erodatemo,  
<sup>12</sup>Jusiñamuimona mena jaienici jai billana ciode. Userede iniroi jitadiaimai. Jesúna navui jonianomo ana raidiaimai. Damie ifogi dibeimo raide. Jiaimie eilli dibeimo raide.

<sup>13</sup>Naiñaiñomo jicanotiaimai:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena Jonianona jai uiñoñedicue.

<sup>14</sup>Naie facaise jinafo dine erocaillanona, Jesúna ciode; iadedi naimiena uiñoñede. <sup>15</sup>Naiñaiño comechina facade; “Naimiedi bie illano sedaraima”. Jesús naiñaiñomo jicanote:

—¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie Jonianona cuemo llono. Ie mei naimiena oni uiticue.

<sup>16</sup>Jesús dinena uai ote:

—¡María!

Naimie dine naiñaiño como raise dobaicaide. Judíuaí uaido llote:

—¡Raboni! —Naie uai oni dobaiñuamona: “Llofueraima”.

<sup>17</sup>Jesús uai ote:

—Cuena lliñoñeno cuena faicai. Cue Moo dine nia a jaiñedicue. Cue amatiai dine mai jaillanona, cue rafuena lluui. Cue Moo dine jaiticue. Naimiedi cue Jusiñamui. Naimie jiai omoi Moo. Jiai omoi Jusiñamui.

<sup>18</sup>Ie jira María Magdalena Jesús llofueoicaiganodicaímo lluaíbile:

—Cai Namana jai ciodicue. —Iemei caímo naimie naiñaiñomo lluana llote.

**Jesús ie llofueoicaiganomo**  
**bairia rafue**  
(Mt. 28.16-20; Mr. 16.14-18;  
Lc. 24.36-49)

<sup>19</sup>Domingo naio Jesús llofueoicaiganodicaí jofomo ofidicai.

Judíuai illaicominina cai jaciruillamona, nasiai nana cai ībaica. Nase econoñeno ieconi Jesús cai motomo billanona, caina uaiduano, llote:

—Uri omoi i.

<sup>20</sup>Ie onollina acatate. Ie ciraigina jiai acatate. Cai Namana jai cai ciuari eo iobidicai. <sup>21</sup>Jesús dane llote:

—Uri omoi i. Cue Moo cuena oretaja isoi cue rafuena llollena, omoina oretaiticue.

<sup>22</sup>Ie facaise caina firañuanona, raite:

—Jusiñamui Joreñona omoi feñuana jitaidicue. <sup>23</sup>“O jeacínona jai dotade” bumo omoi lloia, Jusiñamui jai dotaca. “O jeacínona nia dotañede” bumo omoi lloia, Jusiñamui nia dotañega.

<sup>24</sup>Naie naio Tomásna mamecirede llofueoicaigamie cai diga iñede.

Dídimona jiai mamecirede. Naimiedi gorasa. <sup>25</sup>Naimiemo lloticai:

—Cai Namana aillí ciódicai.

Tomás uai ote:

—Clavo ifona naimie onolli jeraimo cue cioiñenia, naie ifona cuejetañenia, naimie ciraigí ifona cuejetañenia, iinoñeiticue.

### Jesús ie llofueoicaiganomo dane bairia rafue

<sup>26</sup>Ocho digarui illanona, Jesús llofueoicaiganodicai dane ofillano, Tomás cai diga ite. Nana nasiai ībaica; iadedi nase econoñeno ieconi Jesús cai motomo dane fo billano, uaiduano, llote:

—Uri omoi i.

<sup>27</sup>Iemei Tomásmo llote:

—Eroda cue onollimo. Naifo jeta.

Ciraigí ifona jiai jeta. Hinoñeno jaiñeno. Mai iño.

<sup>28</sup>Tomás uai ote:

—Cue Namadio. Cue Jusiñamudio.

<sup>29</sup>Jesús dane uai ote:

—Cuená o ciuá jira, cuena iñotio; iadedi cuena cioiñedino cuena iñonia, jiai caimare iitímaci.

<sup>30</sup>Jesús diga siño rafuena finode. Iena ciódicai. Nana naie rafuena bie rabenicomó cueñedicue; <sup>31</sup>iadedi dajerie cueticue. Jesúdi cai Jilloitaraimana omoi iñollena, iena cueticue. Naimiedi Jusiñamui Jitona omoi iñollena, iena jiai cueticue. Naimiena omoi iñuano, naimie diga jaca iitomoi.

### Jesús ie llofueoicaiganomo ane bairia rafue

**21** <sup>1</sup>Diga irui illanona, Tiberiana mamecirede jorai fuemo Jesús ie llofueoicaiganodicaimo dane bairede.

<sup>2</sup>Nainomo diese iticai: Simón Pedro, Tomás, Natanael, cue ama Jacobo, cue, jiaie iaimaiai. Tomás mamecijiaicidi Dídimu. Natanael Galilea ie Caná nairai imie. <sup>3</sup>Simón Pedro caimo llote:

—Lloiji faiaiticue.

Naimie uai oticai:

—O diga jaiticai. —Iese raillano, botemo jaidicai. Namona naio lloijina faíticai; ia jaca buena oñedicai.

<sup>4</sup>Monaiacademo, Jesús jorai fuemo bite; iadedi naimiena uiñoñedicai. <sup>5</sup>Jesús caimo jicanote:

—Caimaci, ¿nie diese lliciaina jai otomoi?

Uai oticai:

—Jaca oñedicai.

<sup>6</sup>Naimie dane uai ote:

—Omoi bote nabei díne omoi lloijina faíno.

Le jira faíticai. Ailluena lliciai naiemo jilla jira, a aiñonidicai. <sup>7</sup>Iena ciuamona, Pedromo lloticue:

—Cai motomo cai Namadi ite.

Pedro iena cacajano, naimie taimiena jira, ie iñiroi jitade. Jesús díne naimie raire rillena, jeraimo daiade; <sup>8</sup>iadedi botedo biticai. Enirue iaire illa jira, na lliciaimo sonocana, lloijina atidicai.

Nibai cien metros oni ite. <sup>9</sup>Jorai fuemo cai ria, coocimona bonoca iraina

ciodicai. Lliciai iraimo ruica jai ite.  
Llomenico jiai ite.<sup>10</sup> Jesús caimo llote:

—Omoi oga lliciamona janore ati.

<sup>11</sup>Ie jira Simón Pedro botemo jaillano, llojina llinuanona, eniruemo ari sonode. Ciento cincuenta y tres jemierie jitaticai. Ailluena ite; iadedi lloiji cuarariñede.<sup>12</sup> Jesús llote:

—Mai guisaibi. —Jesúna cai uiñua jira: “¿Budio?” jaca buna raiñeda.

<sup>13</sup>Jesúdi llomenico diga lliciaina caina ecade. <sup>14</sup>Fiodaillamona jillua facaisemona dacaiño amani caímo Jesús jai abina bairetate.

#### **Jesús Pedro diga ñaia rafue**

<sup>15</sup>Guilla mei, Jesús Simón Pedromo llote:

—Simón, odi Juan jitodio. —Jiai jicanote— ¿Nana o nabaiñiai baifemo cuena isiruitio?

Simón uai ote:

—Jii, Nama, ona cue isiruillana uiñotio.

Jesús uai ote:

—Toica llaudaiai uruiaína omoi raise sedaja isoi, cuena iinotinona raise seda. Naimacina cue rafuena raise llofue.

<sup>16</sup>Dane llote:

—Simón, odi Juan jitodio. —Dane jicanote— ¿Cuenca isiruitio?

Simón uai ote:

—Jii, Nama, ona cue isiruillana uiñotio.

Jesús dinena uai ote:

—Toica llaudaiai uruiaína omoi raise sedaja isoi, cuena iinotinona seda.

<sup>17</sup>Dane jicanote:

—Simón, ¿cuenca isiruitio? —Jesús naimiemo dane jicanua jira, “Jesús cue uaina iinoñede” raillanona, Pedro come ci sunaite.

Uai ote:

—Nama, naga rafuena uiñotio. Ona cue isiruillana uiñotio.

Jesús uai ote:

—Toica llaudaiai uruiaína omoi raise sedaja isoi, cuena iinotinona seda.

<sup>18</sup>Daje rafue omo nia lloitice. O nia conirue facai o iniroi dama jitadio. Ie mei o jitailanomo jaidio. O uaiciroma facaiseconi o onollí oni ñuitaitio. Ie mei jiaimie o iniroi ona jitajano, o jitaiñenanomo ona uite. Cue lluana iinocana o jai.

<sup>19</sup>Fiodaillena Pedro uiñollena, uicodo Jesús ieße llote. Cristo llua isoi, Cristo rafue muidona, illácomini Pedrona jiairuido meineticaci. Naimie fiodaillanona, Jusiñamuina iobitade.

#### **Jesús ie gaia llofueoicaigamiemo llua rafue**

<sup>20</sup>Pedro diga Jesús nia ñaia facaise, Pedro dobaicaillanona, cuena ciode. Iaímaiai jinafona racadicue. Jesús gaiamiedicue. Navui cai guia, Jesús nia fiodaiñenia, Jesús abimo cue ia, Jesús jicanoticue: “¿Bu gaitatallio?” <sup>21</sup>“Cuenca iinotinona seda” Pedromo Jesús llua mei, Pedro dobaicaillanona, cuena ciuano, Jesús jicanote:

—Nama, ¿niexe naimie fiodaite?

<sup>22</sup>Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue lluana iinocana o jai.

<sup>23</sup>Ie jira creyentiai naie lluana fidiano cuena raitimaci:

—Naimie fiodaiñeite. —Iese raitimaci; iadedi Jesús ieße raiñede. Jesús llote: “Naimie nia itemo, cue abido bia, dama iesede. Naimie rafuedi omo duiñede”.

<sup>24</sup>Nana rafuena ciuano lloticue. Iena cueticue. Uanaicinuaina cueticue.

<sup>25</sup>Jesús ailluena jiae rafuena finode. Nana ie rafue cuegadena, enirue baiñede, naie libros eenollena. Mai. Juandicue.

## JESUCRISTO ORETAGANODI NAIMIE RAFUE LLOCANA UILLA RAFUE

Jesús Jusiñamui Joreño  
billena llua rafue

**1** <sup>1</sup>Teofilo, o dine, ¿nigacino? ¿Nie isoidio? Omo jiae rabe birui dane oretaiacadice. Lucadicue. Navui jiae cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiai cueticue.  
<sup>2</sup>Monamo naimiena Jusiñamui nia uiñenia, Jesús ie llofueoicaiganona llofueuide. Ie llofueoicaiganona jaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaiganano naimie oretaganona mameciredimaci.  
<sup>3</sup>Naimie fiodaillamona ie jillua mei, naimacimo bairede. Naimie ua jilluana naimaci raise uiñollena, diga icaíño cuarenta digarui naimacimo baireuide. Naimacina Jusiñamui dibeimo ie comini jai illa rafuena llofueuide. Naimie jai suide rafuena llofueuide. Naimie nia suiñede rafuena llofueuide.

<sup>4</sup>Naimaci diga Jesús guilla facaise, naimie Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai lloticue. Naiena omoi feiñollena, Jerusalémo nia fiebi.  
<sup>5</sup>Naimie rafuena comini iinuamona, Juan Bautista micori jinui diga bautizade; iadedi cue rafuena omoi

iinuamona, nano nigarui illanona, cue Moo ie Joreñona feiñoitomoi —raite.

### Monamo Jesús jailla rafue

<sup>6</sup>Ie llofueoicaiganano diga Jesús dane ofillanona, naimiemo jicanotimaci:  
—Nama, ¿birui cai judíuái cominina jai sedaitio, David micori cai usumatiái micoriai jiae sedaja isoi?

<sup>7</sup>Naimie uai ote:

—Naie rafue suille facaiseconi jaca uiñoñetomoi. Naimie siñona illamona, dama cue Moo naie rafue suilliruina uiñote; <sup>8</sup>iadedi cue Moo ie Joreñona omoi feiñua mei, siñó uai omoimo iite. Ie jira Jerusalémo cuena lloitomoi. Judeamo, Samariamo, ua nana eniruemo ite nairaimo lloitomoi —raite.

<sup>9</sup>Naimie iena llua mei, Olivos railla anedumo jai jaidimaci. Nainomo itimacimo, naimaci eruaisítemo, monamo Jesús Jusiñamui uiga. Uillie illa jira, naimiena cioisiñede.

<sup>10</sup>Monamo nia eruaidemo, ieconi naimaci dine Jusiñamui jaienici, mena iima bairia isoi, bairediiamaiai. Naie iaimaiai iniroi userede.

<sup>11</sup>Raitiaimaiai:

—Galileo imaci, ¿bue ñellena monamo eruaidomoi? Omoi motomona Jesús monamo jaillana jai ciodomoi. Naimie jai jailla isoi, dane abido ico biite —raitiaimaiai.

### Matíana fetua rafue

<sup>12</sup>Naimacimo Jusiñamui jaienicí llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sáboruimo Moisés micorí lloga dinori macaritimaci. <sup>13</sup>Rillano imaci cuartomo jaidimaci. A díbebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiae Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiae Jacobo jito. Diese nainomo itimaci. <sup>14</sup>Naimaci jitallamona, Jusiñamuimo jiullen, nagaruui danomo ofidimaci. Jiullen, jiaino naimaci diga jiae ofisoidimaci. Diga riñoniai jiae ofisoidimaci. Jesús ei, María, jiae ofisoide. Jesús amatiai jiae ofisoidimaci.

<sup>15</sup>Comini ofilla motomo Pedro naudaita, rafuena llote. Níbaí ciento veinte comini nainomo itimaci. Pedro llote:

<sup>16</sup>—Amatiai, David micorí jiae lloga rafue birui jai suide. Jusiñamui Joreño jiae David micorina Judas micorina ñaitata. Salmos rabenicomu naie ñaiacinodi cuega. Iena uiñotícaí. Judas micorina uiñotícaí. Naimie Jesúna gaitadinona ifode. <sup>17</sup>Naimiedi da cai llofueoicaigano imie. Cai diga maijuiude. <sup>18</sup>Ie maraiñeno finoca rafuemona ucubena feiñua mei, ie comeci iuaina meiduanona, naie ucubena oni judaide. Judíuái illacomini naie ucube diga eniruena ibadimaci. Nainomo Judas micorí ie cimaio cuinajanona, ie abina dama meinete. Rifaillamona, ana uaillamona, ie jebegi bofcaillamona, nana ie jebegi jino uaide. <sup>19</sup>Nana Jerusalémo itino iena fididimaci. Ie jira cai uaido naie enirue mamecirede

Acéldama. Oni dobaiñuamona dirue toillanie. <sup>20</sup>Ero, Salmos rabenicomu Judas micorina iese David micorí jaie cuega:

Naimie illano taíno iite.

Buna jaca iemo iñeite.

Naimie maijille jiaimiemo iite.

Iese cuega. <sup>21-22</sup>Ie jira cai diga itinomona damiena fetoitícaí. Cai Nama Jesús cai diga illa facaiseconi, nagaruui diga iñiaí cai diga jaisoidimaci. Juan Bautista micorí Jesúna bautizaja facaisemona, Jesús monamo caimona jaillarui facaiseconi, naimaci cai diga jiae itimaci. Naimacimona damiena fetoitícaí, Jesús jilluana cai diga llollena. —Iese Pedro raite.

<sup>23</sup>Ie mei mena iimana fetodimaci. Damiedi José Barsabas. Jiaici mameci Justo. Jiaimiedi Matías. <sup>24</sup>Ie mei Jusiñamuimo jiidimaci:

—Nama, nana comini imaci comeciaña uiñotio. ¿Nie iimana jitaídio? Caina uiñota. <sup>25</sup>Naimiedi Judas ifo meidoite. Jesús ie oretagamiena naimie jaillamona, cai diga maijijite. Ie fiodaillamona Judas micorí ie maijiana jiae fainonocade —jiidimaci. <sup>26</sup>Ie jira conima jabomaside, uiñollena bu ille. Matíamo baite. Iemei jiae once diga oretagano isoi naimie ite.

### Cristo oretagano Jusiñamui Joreñona feiñua rafue

**2** <sup>1</sup>Pentecostés railla rafue irui ria, nana creyentiai diese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. <sup>2</sup>Danomo ia, ebena illacnomona monamona riire aifi billa isoi buena cacadimaci. Nana jofomo itino naiena jiae cacadimaci. <sup>3</sup>Iena naimacimo bairede. Iena ciodomaci. Irai boua isoi eruaide. Nana naimacimo baite. <sup>4</sup>Iese Jusiñamui

Joreñona feiñotimaci. Nana naimaci comeciaina namatade. Iemei diga nairai uaillaido ñaitimaci, Jusiñamui Joreño naimacina ñaitatajamona. Naimaci ñaia uaillaina uiñoñedimaci.

<sup>5</sup>Naie facaiseconi Jerusalémo Jusiñamui rafuedo eo jaide judíuaidi itimaci. Diga nairaiaimona bitimaci. <sup>6</sup>Creyentiai ñiana naimaci fidiano, ailluena comini jino tañomo ofidimaci. Nagamiaidi ie nairai uaina cacade. Ie jira jacinaitimaci. <sup>7</sup>Eo raijicaidimaci. Coninimo jicanotimaci:

—¿Buta ñaite? Nana Galileos imaci. <sup>8</sup>¿Niese naimacina cacadicai? Cai uaido dajerie ñiana cacadicai —raitimaci. <sup>9</sup>Diga comini imiai itimaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci, <sup>10</sup>Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritino jiai itimaci. <sup>11</sup>Judíuai itimaci. Judíuaindino jiai itimaci. Judíuau isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicai —raitimaci. <sup>12</sup>Nana eo raijicaidimaci. Danirie jicanododimaci:

—¿Bue ite?  
—Jiae comini jifanoduano, raitimaci:  
—Jifaidimaci. Ie jira iese ebena ñaitimaci.

<sup>14</sup>Ie facaise ie once nabaiñiai naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue lluamo cacarei. Naie rafuena lloitice. <sup>15</sup>Omoi comeciaina omoi facaja isoi, jifaiñedicas. Jitoma nia furi daidemo, bu jaca jifairainina. <sup>16</sup>Joel micori bie rafuena jaie llote. Joel micori Jusiñamui rafuena lloraima. Naimie jaie

lloga rafue birui caimo jai suide.

<sup>17</sup>Llote:

Jusiñamui caimo llote: “Jairuido bie rafue suite.

Cue Joreñona diga cominimo fecajiticue.

Iedo omoi uruiai cue lluana lloitimaci.

Iemonia omoi coniruiaina nicaíritaiticue.

Iemonia omoi einamacina jiai nicaíritaiticue.

<sup>18</sup>Ua nana cuena sedadinomo cue Joreñona fecajiticue.

Naimaci cue lluana lloitimaci.

<sup>19</sup>Monamo eo jacirede rafuena ico suiñotaiticue.

Eniruemo eo jacirede rafuena ico jiai suiñotaiticue.

Comini jobairillemnora, eniruemo comini diruedi eo iiite.

Naie facaise daje diese enirue boojite. Bouamona uillie eo iiite.

<sup>20</sup>Jitoma lligaiñoneite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

<sup>21</sup>iadedi birui cuemo bu jicaia, ie jeacínomona naimiena jillotaiticue” Jusiñamui llote.

Ie Joreño caimo birui illamona, Joel micori llogacino jai suide.

<sup>22</sup>Caimaci, bie uaina omoi cacarei.

Nazaret ie Jesúna ñaiticue. Jusiñamuidi omoi motomo naimiena siño rafuena jai finotate. Iena jai uiñotomoi.

<sup>23</sup>Jusiñamui comeci jaie facaja isoi, Jusiñamui jitaila isoi, Jusiñamui naimiena omoimo fecade. Jesúna coraitatomoi. Jusiñamuina iñnoñedinona naimiena meinetadomoi; <sup>24</sup>iadedi fiodaillamona naimiena Jusiñamui jillotajano, llegi ie cacajamona naimie

jillobide. Naimie fiodaite; iadedi fiodaillamona nainomo iñoiñede.

<sup>25</sup>David micori naimieno jaie llote:  
Jusiñamui cue diga jaca illana uiñoticue.

Cue ecimo naimie ite, cue comecin  
ocuiñotallenra.

<sup>26</sup> Ie jira cue comeci caimare ite. Eo  
iobidicue.

Cue marena illemo jai jiai  
ocuiridicue,

<sup>27</sup> raiafomo cue joreñona naimie  
fainonocaiñena jira,  
ie mare Jito abi rifaillana naimie  
jitaíñena jira.

<sup>28</sup> Naimie cuena jilloitallenra uiñoticue.  
Cue diga naimie illa jira, cue comeci  
caimare iiite.

<sup>29</sup>Caimaci, cai usuma David micorina  
marefodo ñaiticue. David micori ñaia,  
dama naimie facaina ñaiñede. Jesúna  
ñaite. David micori jaie fiodaite.  
Raiafomo jonega. Naifo bene nia  
illamona, naimiedi Jesúna ñiana  
uiñoticai. <sup>30</sup>Ie ia David micori Jusiñamui  
rafuena llote. Naimie micoridi Jusiñamui  
naimiemo uanaicinona lluana uiñote.

Jaie Jusiñamui naimiemo llote: "O  
uruiamona damie illaimana illanona, ie  
cominina sedajite" llote. <sup>31</sup>Cristona  
ñaite. David micori nia suiñede rafuena  
llote. Naimie micori Cristo jilloillena  
llote: "Raiafo Jusiñamui fiodaillanomo  
Cristo Joreño fainonocaiñete. Cristo abi  
rifaiñete" llote. <sup>32</sup>Jesúna ñaite.

Jusiñamui Jesúna jai jillotate. Nana cai  
ieno ciodicai. Ie jira iena lloticaí. <sup>33</sup>Ie  
ecimo Jesúna jai ie dane itatajanona,  
Jusiñamui naimieno iobitade. Ie Moo  
lluwa isoi, Jesús jai ie Moo Joreño caímo  
jai fecade, omoi birui ciua isoi, omoi  
birui cacaja isoi. <sup>34</sup>Naimie abi monamo  
jaiñena jira, David micori dama naimie  
facaina ñaiñede; ia Cristona ñaite. Ero,  
jaie David micori raite:

Jusiñamui Cristomo llote: "Cue  
ecimo ana rai.

<sup>35</sup> Ona iiñoñedínona o anamo  
itataiticue"

raite. David micori llua isoi, birui jai  
suide.

<sup>36</sup>Pedro nia ñaite:

—Jesúna coraidomoi; iadedi Jusiñamui  
naimieno cai Namana itatare. Naimieno  
cai Jilloitaraimana jai itatare. Nana  
judíuai comini naiena uiñuana jitadicue.

<sup>37</sup>Pedro lluana cacajano, naimaci  
comeciaimo riire baite. Pedromo iena  
jicanotimaci. Ie nabaiñiáimo jaii  
jicanotimaci:

—Caimaci, o lluana jai cacadicai.

¿Bue finoitacai?

<sup>38</sup>Pedro uai ote:

—Omoi comeciai iuaina meido. Iemei  
Jusiñamui omoimo ite jeaciuaina  
dotajite. Jesucristo facaina omoi  
bautizallomoi. Jusiñamui Joreñona jiai  
feiñoitomoi. <sup>39</sup>Omoimo ie Joreño  
fecallena navui llote. Omoi uruiaímo  
jiai fecaite. Jiaie nairaiia itinomo jiai  
fecaite. Ua nana Jusiñamui fetocanomo  
jiai fecaite.

<sup>40</sup>Diga uai naimacimo Pedro llote.

Raite:

—Ailluena comini maraiñede rafuena  
birui finocana jaidimaci. Faifitimaci.  
Naimaci isoi jaiñeno; iadedi cue lluana  
omoi cacajamona, iena iiño.

<sup>41</sup>Diga comini ie lloga uaina feiñuano,  
bautizadimaci. Nairuido nibai tres mil  
comini creyentiaina jaidimaci. <sup>42</sup>Cristo  
oretaganano llofuiana fueoidimaci. Cristo  
oretaganona eo nabaidimaci. Nagarui  
ofillanona, Jesús fiodaillana  
comeciuidimaci. Jusiñamuimo  
jiuidimaci.

**Cristona iiñotino illa rafue**

<sup>43</sup>Cristo oretaganodi diga siño rafuena  
finuamona, nana comini jacinaitimaci.

<sup>44</sup>Nana creyentiai damacina itimaci. Naimaci raruiai coninimo fecauidimaci. <sup>45</sup>Dueredino ia, naimacina canollena, raruiaredino naimaci raruiaina vendedimaci. Iemei naie ucube dueredinomo fecadimaci. <sup>46</sup>Jusiñamuina sedallena, nagarui Jusiñamui jofomo ofisoidimaci. Danirie imaci jofuemo Jusiñamuina jiai sedauidimaci. Nainomo danomo guillanona, Jesús fiodaillana comeciuidimaci. Caimare imaci comeciai illamona, caidiñeno guisoidimaci. <sup>47</sup>Jusiñamuimo iobillacinona fecacana jaidimaci. Nana cominidi naimacina: "Mare" raitimaci. Naimacina Jusiñamui itataja isoi, nagarui comini creyentiaina jaidimaci.

### Jusiñamui jofomo Pedro Iluacino

**3** <sup>1</sup>Jusiñamui jofomo jiia facaise Pedro iaimaiai Juan diga jaide. Jitoma ana ia, comini jiiuidimaci. <sup>2</sup>Iaimaiai jaiillanomo jiae comini tisitaitimieno atiana ciodiirmaiai. Tisitaitimieno naimie jaca jeiciga. Naimieno nagarui atiano, Jusiñamui jofo ie ebiredena railla nase fuemo rainaudimaci. Nainomo naimieno rainaudimaci, fo jaidinomona ucube jica-jicallena. <sup>3</sup>Iaimaiai fo jaiacanía, ucube jicallena, ie onolli ñuitade. <sup>4</sup>Iaimaiai naimiemo eruaillano, Pedro raite:

—Cocomo eruai.

<sup>5</sup>Ie jira iaimaiaimo eruaide. Ra feiñoitenia, oceanona sedade. <sup>6</sup>Pedro raite:

—Ucube cuemo iñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaiticue.

<sup>7</sup>Pedro naimie onollido llinuano, a naidanete. Ieconi naimie eillidi jillode. Ie taisicoñuaí jiai jillode.

<sup>8</sup>Daiacaillanona naidacaide. Macarillanona, iaimaiai diga fo jaide. Jusiñamuimo iobillacinona fecajano, daiacaillanona macarite. <sup>9</sup>Nana comini naimie macarillana ciódimaci. Naimie iobillacinona fecajana jiai cacadimaci. <sup>10</sup>Naimie nase fuemo ana raiosilla jira, naimieno uiñotimaci. Naimiemo jai suide rafuena eo raijicaidimaci.

<sup>11</sup>Naimiedi Pedro iaimaiai Juan diga nia llinuano, naimaci dñe Salomón micori finotaga jofo abi ibírimo comini aisidimaci. Raijicaidimaci. <sup>12</sup>Iena ciuano, Pedro naimacina raite:

—Caimaci, ¿bue ñellena biemo raijicaidomoi? ¿Bue ñellena caimo iese eruaídromo? "Daimaiai iaimaiai uaido naimieno jilloitate" raillanona cocomo eruaídromo. <sup>13</sup>Iena finoñedicoco; iadedi Jusiñamui iena finuano, ie Jito Jesúna iobitate. Cai usumatiái micoríai, Abraham, Isaac, Jacob, ua nana cai usumatiái micoríai bie Jusiñamuina sedadimaci; iadedi Jesúna birui fecadomoi, coraillena. Pilato naimieno jino marena oreatacana jira, Pilato ecimo naimieno llogidotomoi.

<sup>14</sup>Mareuidimieno jitaiñedomoi; iadedi come fatimieno cárcelmona jino billana jitaidomoi. Barrabás raillamieno jitaidomoi. <sup>15</sup>Jusiñamui dibeimo caina itatativieno meinetomoi. Naimie fiodaite; ia Jusiñamui naimieno jillotate. Iena ciodicoco. Ie jira iena lloticoco.

<sup>16</sup>Tisitaitimie jilluana jai ciodomoi. Naimieno uiñotomoi. Jesúna naimie iñua jira, Jesús naimieno maíritate. Naimieno raise jillotate. Iena jai ciodomoi.

<sup>17</sup>Caimaci, ero, omoi finoca rafuena abina uiñoñeno finodomoi. Omoi illaicomini jiai daje isoi finodimaci.

<sup>18</sup>Jae Jusiñamuidi ie facaina llorainina jiairuido suille rafuena llotatate. Naimacina Cristo llegi cacajana

llotatate. Birui naie llogacino suide.  
<sup>19</sup>Omoi comeciai iuallai meido. Jusiñamui díbeimo omoi comeciaina meido. Iemei Jusiñamui omoi jeacinona dotaite. Iena jaca feitaite. <sup>20</sup>Omoi uri illa facaise illena, Jusiñamui omoi diga illena, iena fino. Jusiñamui Jesucristona omoi díne dane oretallena, iena fino. Naimiedi omoi Jilloitaraima. <sup>21</sup>Jusiñamui facaina lloraini micoriai jaie lloga rafue suille dinori monamo naimie fiebiite. Jaie Jusiñamuidi ie mare lloraini micoriai uaido biena llote. <sup>22</sup>Moisés micori raite: “Omoi cominimona naimie rafue lloraímana jaillena, cai Nama Jusiñamui cue isoi damiena fetoite. Nana naimie omoimo lluana cacarei. <sup>23</sup>Bie lloraímana bu cacarefiñenia, Jusiñamui naimiena duere finoite. Lemona faifite”. <sup>24</sup>Nana Jusiñamui ie lloraini micoriaidi birui suille rafuena llotimaci. Samuel micori illa facaisemona naimaci biena llotimaci. <sup>25</sup>Jusiñamuidi cai usumatiái micoriaimo rafuena llote; ia bie rafue birui omoimo jiai duide. Jusiñamui Abraham micrimo jaie llote: “Nana cominidi o uruiai muidona caimare iitimaci”. <sup>26</sup>Ie rafue suiñollena, Jusiñamui ie Jitona omoi díne navui orede. Omoi caimare illena, nano omoi maraíñediginona fainonocaitallena, omoi díne naimiena nano jai oretate.

#### Cristo oretagamaiai llaicomini motomo illa rafue

**4** <sup>1</sup>Comini diga Pedro iaimaiai Juan diga ñaia facaise, Jusiñamui diga ñairainidi naie iaimaiai díne bitimaci. Jusiñamui jofona sedaraini illaíma diga, saduceuai railla comini diga jiai bitimaci. <sup>2</sup>Fiodaillamona Jesús jai jilluana llofuetiiaimaiai. Cominina iaimaiai llofuria jira, naie iaimaiai diga iciritimaci. <sup>3</sup>Iaimaiaina gaitajanona, jai

navuilla jira, cárcelmo jonetimaci, ie jitíramo naie rafuena siadollena. <sup>4</sup>Iese suide; ia Pedro llogacínona cacadínomona ailluena comini naiena iinotimaci. Cinco mil digamie creyentiaina jai itimaci.

<sup>5</sup>Ícoiti Jerusalémo nana judíuai illaicomini siadollena ofidimaci. <sup>6</sup>Anás jiai bite. Naimiedi Jusiñamui diga nanoca ñairaima. Caifás bite. Juan bite. Alejandro jiai bite. Nana Jusiñamui diga nanoca ñairaima cominidi ofidimaci. <sup>7</sup>Naimaci motomo Pedro iaimaiai Juan diga atianona, iaimaíamo jicanotimaci:

—¿Bu uai diga biena finodomico?

<sup>8</sup>Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoimo lloitue. <sup>9</sup>Tisitaitimie jilluana birui cocomo jicanotomoi. “¿Buemona naimie jillode?” raillanona cocomo jicanotomoi. <sup>10</sup>Jesucristo uai diga jillode. Omoi biena uiñuana, ua nana judíuai comini biena uiñuana jitaídicue. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoi uicomó Jesús muidona tisitaitimie jai benoconi naidaillana ciodomoi. <sup>11</sup>Omoi jofo finoraini isiodomoi. Omoi jitañede noficiidi jiaie nofici baifemo jai jaide. Jesúdi naie nofici isoide. Naimie rafuena omoi jitañena jira, naimiena meinetomoi. <sup>12</sup>Cai jeacinomona jiaimie caina jillotanide. Nana eniruemo ite cominimona jiaimie buna jaca jillotanide. Dama Jesús caina jillotaredé —llote.

<sup>13</sup>Jaciruiñeno marefodo llofuetiiaimaiai. Nainomo itino iena cacajano, comecina facadímaci: “Abina uiñóñediliaimaiai. Jamai bue isoidaímaiai”. Ie jira rajjicaidimaci; iadedi Jesús llofueoicaigaiaimaiaina

illana uiñotimaci. <sup>14</sup>Jilloitagamie iaímaiai diga naidaillana ciódimaci. Ie jira naimaci uai iñede. <sup>15</sup>Naie rafuena siadollena, naie illaicomini iaímaiaina bai oredimaci. <sup>16</sup>Coninimo jícanotimaci:

—¿Niese naie iaímaiaina nibaíticai? Nana Jerusalémo itino iaímaiai siño rafuena finuana jai fididimaci. Iena janonidicai. <sup>17</sup>Jiae comini iena fidii raillano, Jesús rafuena iaímaiai llofuiiana rairuiticai.

<sup>18</sup>Ie mei iaímaiaina naimaci dine dane uaidotimaci. Iaímaiaimo Jesús rafuena llofueñellena riire llotimaci. <sup>19</sup>Pedro iaímaiai Juan diga naimaci uai ote:

—Ie rafuena coco lollena Jusiñamui jitaide. Omoi uaina coco iinoia, Jusiñamui jitailla rafuena finoñeticoco. Cocomo llono. ¿Bu uaina iinoiticoco? ¿Jusiñamui? ¿Omoi? Cocomo iese llono. <sup>20</sup>Daimaiai coco ciúa rafuena lloticoco. Daimaiai coco cacaja rafuena lloticoco —raite.

<sup>21</sup>Iaímaiaina jacinaitajamona, iaímaiaina jino oretatimaci. Iaímaiaina duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinaña fecadimaci, tisitaitimie jai Jillua jira. <sup>22</sup>Jai jillodimieno cuarenta años baifemo ite. Siño uaido naimie Jillua jira, comini iobidimaci.

#### Naimacina Jusiñamui canollena, naiñemio jiíacino

<sup>23</sup>Iaímaiai jino jailla mei, iaímaiai nabaiñiai dine jaidiiaímaiai. Illaicomini iaímaiaimo lluana llotiiaímaiai.

<sup>24</sup>Naimaci iena cacajano, Jusiñamuimo damie llua isoi jiídimaci:

—Ore Moo, mona finodio. Eniruena finodio. Monaillaina finodio. Nana naiñemio ite rana jiae finodio. <sup>25</sup>Cai usuma David micorina raise uiñoticai. Naimiedi ona sedadimie. Naimieno bie

rafuena o Joreño jaie llotatajamona, naimie llote:

¿Bue ñellena Jusiñamui diga judíuafinedino iciritimaci?  
¿Bue ñellena Jusiñamuimo comini taínomo comeciaina facadimaci?

<sup>26</sup>Illaicomini ofidimaci, Jusiñamui diga fuirillena.

Jusiñamui facaisena iñedimaci.

Cristo facaisena jiae iñedimaci

llote. <sup>27</sup>Naie rafue birui bene suide. Bie nairaimo Herodedi, Poncio Pilato diga, judíuafinedino diga, judíuai comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci. <sup>28</sup>Naimaci

ofillamona, nana o jitaille rafuedi, o jaie lloga rafue diga, jai suide. <sup>29</sup>Nama naimaci jaciruitajacinaña jai uiñotio. Cai comeciaina ocuiñota, o rafuena jacitaiñeno cai lollesta. <sup>30</sup>Duidinona jilloita. O mare Jito Jesús uaido caña siño rafuena finota —jiídimaci.

<sup>31</sup>Jusiñamuimo jiíacino fuilla meinoconi, naimaci ofiracodi jaidisite. Jusiñamui Joreño nagamiai comecimo namatade. Iemonia Jusiñamui uai jacitaiñeno llocana jaidimaci.

#### Creyentiai damacina illa rafue

<sup>32</sup>Nana creyentiai damacina itímaci. Naimacimo raruiai ia, dajena naimacimo duide. <sup>33</sup>Naie facaise siño uaido naimie oretagano cai Nama Jesús Jilluana llofueuidimaci. Iemonia cominidi naimacina: “Mare” raitimaci.

Nagarui Jusiñamui naimacina eo canode. <sup>34</sup>Naimaci dine buna buena jaca jitaiñedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona, <sup>35</sup>Cristo oretaganomo fecadimaci. Ie mei dueredinomo imaci jitailla isoi fecauidimaci. <sup>36</sup>Naimaci motomo José

mameciredimie ite. Cristo oretagano jitaca mamecidi Bernabé. Ie mameci oni dobaiñuamona firadotimie. Naimie nairaidi levita. Naimiedi Chipre railla uiasi imie.<sup>37</sup> Jerusalémo naimie fecalle eniruedi ite. Iena feccajamona, ucube atiano, Cristo oretaganomo fecade.

**Ananías micori ie ai micori diga  
Jusiñamuina jifuia rafue**

**5** <sup>1</sup>Naie facaise Ananías ie ai diga iaimaiai eniruena jiai fecade. Ie ai mamecidi Safira. <sup>2</sup>Naie iba naimemo dabeí fiebide. Ie ai iena uiñote. Atuedo atianona, Cristo oretaganomo fecade, “Nana ucube atidicue” raillanona.  
<sup>3</sup>Jusiñamui Joreño Pedrona naie rafuena uiñotajamona, Ananíamo Pedro jicanote:  
—¿Niese Taife o comeximo namatade? Jusiñamui Joreñomo taino llotio, dabeí ucube omo fiebilla jira.  
<sup>4</sup>Enirue nia fecañenia, nia oie. Fecaja mei, naie ucubedi nia oie. ¿Bue ñellena o começina maraiñeno facadio?  
Cominimo taino llotio. Jusiñamuimo tainona jiai llotio.

<sup>5</sup>Ananías bie uaina cacajano ieconi fiodaillamona oni caide. Nana iena ciódino eo jacinaitimaci. <sup>6</sup>Iemei nainomo ite conirueniai naimiena feridimaci. Jino uillano, raiáfomo Jonetimaci.

<sup>7</sup>Naie rafue daje amani horas illanona, naimie ai ie ínimo suide rafuena uiñoñeno bite. <sup>8</sup>Pedro naiñaiñomo jicanote:

—¿Nie diese o fecaca o enirue?  
Cuemo llono.

Naiñaiño uai ote:  
—Jii, ie diese coco fecaca.  
<sup>9</sup>Pedro jicanote:  
—¿Bue ñellena Jusiñamui Joreñona jifuetomico? Ero, o ini raiáfomo Jonetino saisia jai nasemo cacade. Naimaci ona jiai jino ja uitimaci.

<sup>10</sup>Naimie ecimo ieconi naiñaiño fiodaillamona, oni caide. Conirueniai fo billano, naiñaiño fiodaillana ciódimaci. Jino uillano, ie ini abimo dafomo Jonetimaci. <sup>11</sup>Iena fidiamona, nana creyentiai eo jacinaitimaci. Nana bie rafuena fididinodi jiai eo jacinaitimaci.

**Cristo oretagano ailluena siño  
rafuena finodimaci**

<sup>12</sup>Comini motomo Cristo oretaganodi ailluena siño rafuena finoidimaci. Naie facaise nana naimacidi Jusiñamui jofomo Salomón micori finotaga jofo abi ibírimo ofisoidimaci. <sup>13</sup>Jiae cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

<sup>14</sup>Jaciruitimaci; iadedi creyentiaina ailluena comini jaidimaci. Ailluena iiñiai, ailluena riñoniai, díese creyentiaina jaidimaci. <sup>15</sup>Imaci biiramo duidinona jonecaida, naisomo atidimaci. Pedro nainomo macarillano, o llota naimie joreño naimacimo ibaillamona, “Jillorbitai” raillano, atidimaci.  
<sup>16</sup>Jerusalémo ie fuemo ite nairaíaimona comini biadedi, duidinona jiai atidimaci. Janaba anamo ite cominina jiai atidimaci. Nana jillodimaci. Ie isoi Cristo oretagano siño rafuena finoidimaci.

**Cristo oretagano  
duere sefuilla rafue**

<sup>17</sup>Cristo oretagano finoca rafueri Jusiñamui diga nanoca ñairaima eo uradoide. Nana naimie dibeimo itíno jiai eo uradoidimaci. Saduceuai railla cominimo duidimaci. <sup>18</sup>Eo uradoillamona, Cristo oretaganona gaitajano, cárcelmo Jonetimaci.  
<sup>19</sup>Naiona Jusiñamui jaienicidi cárcel nasena econote. Cristo oretagano jino atiano, naimacina raite:

<sup>20</sup>—Jusiñamui jofomo mai abido jai. Cominimo Jusiñamui díne naimaci ille rafuena llono.

<sup>21</sup>Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danomo ofillena illaicomina uaidote. Cárcelmo policíaiaina oretate, Cristo oretaganona atillena. <sup>22</sup>Cárcelmo jaidemo, naimacina cioñedimaci. Abido billanona, llotimaci:

<sup>23</sup>—Cárcel ie nase jaca ibaicana ciódicai. Raise llaveca. Nase fuemo jaca soldaduai itimaci; iadedi econoticaímo, jaca buna cioñedicai.

<sup>24</sup>Jusiñamui jofo nanoca sedaraíma, Jusiñamui diga ñairaini diga, bie lluana cacajano, uainicaidimaci. Comecina facadimaci: “¿Nie isoide rafue naimacimo jai suide?”

<sup>25</sup>Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

<sup>26</sup>Iena cacajano, Jusiñamui jofo nanoca sedaraíma ie policías diga jibuisaide. Cristo oretaganona atide. Fecuise atide, comini dinena policíaiaina noficiaido fairinoi raillano. <sup>27</sup>Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llote:

<sup>28</sup>—Omoímo Jesús rafuena llofuiiana rairuidicai; iadedi nana Jerusalén cominina jai llofuetomoi. Iese omoí llofuecabia, “Cai illaicomini Jesúna meineticimaci” llotomoí.

<sup>29</sup>Pedrodi jiae oretagano diga uai ote: —Jesús rafuena cai llofuiiana jai rairuidomoí; iadedi omoí llua baifemo Jusiñamuina iinoiacadicai. <sup>30</sup>Cai usumatai micoriai Jusiñamuina sedauidimaci. Naie Jusiñamuidi Jesúna

jai jillotate. Jesúna meinellena, cruzmo coraidomoí; ia Jesúna omoí meinia meí,

<sup>31</sup>Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiai jai itatate. Cai jidúuai comini comeciai iuai meidollena, naimaci jeacinuai dotallena, iese naimiena itatate. <sup>32</sup>Bie rafuena llofuecabiticaí. Jusiñamui Joreño uaido iena jiai llofueticaí. Jusiñamuina iinotinomo Jusiñamuidi ie Joreñona jai fecade —raite.

<sup>33</sup>Iena cacajano, illaicomini eo iciritimaci. Cristo oretaganona meineiacadimaci; <sup>34</sup>ia ieconi illaicomini motomo damie naidaide. Naimie mameci Gamaliel. Moisés micori llogacinona uiuicaide. Nana cominidi naimie uaina iinotimaci. Cristo oretaganona dallu bai oni oretajanona, naimie llote:

<sup>35</sup>—Caimaci, omoí bie cominimo omoí finolle rafuembo comeciaina raise faca. <sup>36</sup>Jaie Teudas micori illaimana jaiacade. “Jai uaina baitimediecu” raillano, naimie dibeimo cuatrocientos iñiai jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide. <sup>37</sup>Naimie micori illa meí, comini mameciaina cuiana gobernador llua facaise, Galileo ie Judas micoridí jobairiacade. Jiae comini naimie dibeimo illena fuemo faite. Naimie jiae fiodaite. Naimie micori dibeimo itino oni tuusite. <sup>38</sup>Ie jira ja omoímo lloitice: Bie cominina faínocai. Jamai cominimona naimaci llogacino iade, jamai cominimona naimaci finuacino iade, ieconi duite. <sup>39</sup>Jusiñamuimona bie rafue ia, jaca niese nibaiñeitomoi. Jusiñamuimona bie rafue ia, Jusiñamui diga omoí rafuedi iite.

Naimaci naimie lluana feiñuano, <sup>40</sup>Cristo oretagano fo atiano, naimacina

fatimaci. Naimaci Jesús rafuena llofuiana eo rairuide. Ie mei jino imacina oredimaci;<sup>41</sup> iadedi illaicomini illanomona Cristo oretagano caimare jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina riidoñena jira, jiai caimare itimaci.<sup>42</sup> Jusiñamui jofomo nagaruui Jesucristo rafuena llofuetimaci. Comini jofuemo nagaruui jiai llofuetimaci. “Jesúdi cai Jilloitaraíma” llofueuidimaci.

**Creyentiaína canollena,  
siete digamie diáconuaina illena,  
fetua rafue**

**6** <sup>1</sup>Naie facaise alluena comini creyentiaína jaidimaci. Uradoillamona griego uaido ñaite comini dinena, judúuai uaido ñaite cominina jeare ñaitimaci. Grieguái feciñuái judúuai feciñuái isoi nagaruí rana feiñoñena jira, jeare ñaitimaci.<sup>2</sup> Ie jira naie doce oretaganodi creyentiaí danomo ofillena, nana naimacina uaidotimaci. Naimacimo llotimaci:

—Jusiñamui uaina llollena, ra fecalle diga, abi juanide. Jusiñamui uaina llofuiana cai fainonocaiadeti, maraiñede. Ra jamai cai fecaiadeti, jiai maraiñede. <sup>3</sup>Ie jira, amatiai, omoimona siete digamiensa feto. Hinoganona feto. Jusiñamui Joreño nana comećimo namatadinona feto. Eo abi uiñotoninona feto. Ie isoide iiñiaína feto. Bie ra fecarainina maijiitimaci. <sup>4</sup>Ie mei caí abi juarenite, Jusiñamuimo cai jiíllena, Jusiñamui uaina cai llofuellena.

<sup>5</sup>Nana cominidi:

—Jee —raitimaci. Esteban micorina fetodimaci. Naimie Jusiñamuina eo iiñote. Jusiñamui Joreño nana naimie comećimo namatade. Jiai fetodimaci: Felipe, Prócoro, Nicanor, Timón,

Parmenas, Nicolás. Nicoládi Antioquía nairai imie. Judúuai comini isoi naimiedi Jusiñamuina iiñote.<sup>6</sup> Fetua mei, oretagano dine atidimaci. Jusiñamuimo oretagano jiai mei, fetocanomo imaci onolli jonetimaci, Jusiñamui naimacina marena itatallena.

<sup>7</sup>Naie facaise Jusiñamui uaidi cominido uiñotacana jaide. Jerusalémo ailluena comini creyentiaína jaidimaci. Jusiñamui diga ñairainimona creyentiaína ailluena jiai jaisite.

### Esteban micori ie rafue

<sup>8</sup>Esteban micori fue eo mare. Jusiñamui Joreño naimiena namatajamona, naimie uai eo siño. Comini motomo ailluena siño rafuena finouide. <sup>9</sup>Naie facaise daje judúuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiaide. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci;<sup>10</sup> iadeti naimaci uaitalle uaidi iñede. Naimacimo Esteban uai isoidiuaidi iñede. Jusiñamuimona ie uaina ua jira, Esteban abina uiñuano ñaite.<sup>11</sup> Ie jira jiai cominiimo bainino ibajano, naimienia llogidotadimaci. Raitimaci:

—Esteban Moisés micori jinafomo jeare ñaiana cacadicai. Naimiedi Jusiñamui jinafomo jeare ñaiana jiai cacadicai.

<sup>12</sup>Iese Iluamona, comini comećiaína feidocana jaidimaci. Illaicomini comećiaína feidocana jiai jaidimaci. Esteban dine billanona, naimienia gaitadimaci. Naie rafuena siadollena, naimaci ofiracomo naimie micorina uitimaci.<sup>13</sup>Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite. <sup>14</sup>Naimiedi Jesús bie jofona judaillena llote. Moisés micori caimo llogafuiai fañonocaillena jiai llote. Iena cacadicai.

<sup>15</sup>Iemo nana illaicomini naimiemo eruaídímacimo, naimie uieco Jusiñamui jaeníci isoi eruaide.

#### Esteban micori abi riidua rafue

**7** <sup>1</sup>Jusiñamui diga nanoca ñairaima Esteban micorimo jicanote:

—¿Ua ie isoi naimaci lluacino ite?

<sup>2</sup>Naimie uai ote:

—Caimaci, cacarei. Cai jaiagaimona cai fueollena, naimaci micoriaina lloitice. Jusiñamui maremiena jira, naimiedi cai eirue jitomo jaie bairede. Cai eirue jitodí Abraham micori. Mesopotamiamo naimie micori nia ia, Harámo naimie micori nia jaiñenia, Jusiñamuidi naimie micorimo bairiano <sup>3</sup>llote: “O eniruemona mai jai. O cominimona mai jai. Omo cue acatalle eniruemo jaitio”. <sup>4</sup>Le jira Caldea railla eniruemona naimie micori jaide. Harámo rillanona, diga iruillai nainomo ite. Naimie moo micori fiodailla mei, omoi birui illa eniruemo Jusiñamui naimie micorina oretate. <sup>5</sup>Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajiticue” raite. “O uruiaimo fecajiticue” jiai llote; iadedi naie facaise Abraham micori uruenide. <sup>6</sup>Jusiñamui jiai llote: “O uruiai jiaie comini eniruemo jaianiitimaci. Egipromo jaianiitimaci. Naimacina duere finoitimaci. Cuatrocientos años llegi cacajitimaci. <sup>7</sup>Naimacina maijitaite nairaina duere finoiticue. Ie mei o uruiai naie eniruemona biitimaci. Bie illanomo cuemo iobillacinona

fecajitimaci” llote. <sup>8</sup>Ie cominina naimaci jaillena, Jusiñamui Abraham micorimo iišaiai diese abina diana llote. Ie facaise Abraham micori Isaac micorina comuitate. Ie jeiciamona ocho digarui illamona, Abraham micori naimie micorina dete. Isaac micori Jacob micorina comuitate. Jacob micori doce uruiaina comuitate. Naimaci micoriaimona cai doce diga nairai comuidimaci.

<sup>9</sup>Caimaci, José micorina Jacob micori uruiai micoriai uradoillamona, Egipto cominimo naimiena fecadimaci;

<sup>10</sup>iadedi Jusiñamui naimiena eo sedade.

Ie llegi ie cacajamona naimiena jillotate. Naimiemo uiñoracínona fecade. Ie jira Faraón micori naimiena jiai gайде.

Faraón micoridi Egipto illaima. Ie muidona Faraón Joséna fetode, nana Egipromo itinona sedallena. Ie jofona jiai sedatare. <sup>11</sup>Naie facaiseconi nana Egipto comini aime guitimaci. Canaámo Jacob micori illanona, nana nainomo itino diga aime jiai guite. Eo duere sefuidimaci. Cai usumatiái micoriai naimaci illanomo guillena baiñedimaci.

<sup>12</sup>Egipromo guille illana Jacob micori fidiano, guille ollena, nano facaise ie uruiai micorina nainomo oretate. <sup>13</sup>Ie mei José ie amatiaina naimiena uiñotade. Faraóndi José comini illana fidide. <sup>14</sup>Ie jira Josédi ie moona uaidote.

Nana ie cominina uaidote. Setenta y cinco digamie ite. <sup>15</sup>Ie jira Egipromo Jacob micori jaide. Nainomo fiodaite. Ie uruiai micoriai nainomo jiai

fiodaitimaci. <sup>16</sup>Siquem railla nairai illanomo naimaci comini naimaci micoriaina uillano, nofici ie raiafomo jonetimaci. Siquemmo Abraham micori naifona Emmor uruiai micoriaimona jiae ibade.

<sup>17</sup>Caimaci, Jusiñamui Abraham micorimo lloga rafue suille iairei illa

facaiseconi, Egiptomo cai cominidi eo jebuidimaci. Abraham micorimo: “Egiptomona o uruiai biitimaci” Jusiñamui jaie llote. <sup>18</sup>Naie facaise jiae illaima Egiptona sedade. José micorina uiñoñede. <sup>19</sup>Ie jira cai cominina jifuiano maijitauide. Uruiai fioldaillena, naimacina imaci uruiaina fainonocaitate. <sup>20</sup>Ie facaiseconi Moisés micori jeiciga. Jusiñamui mona naimie micori eo ebire eruaide. Ie moo jofomo daje amani fivui ite. <sup>21</sup>Ie mei naimiedi fainonocaiga. Faraón jisa micoridi naimie micorina uanona, naiñaiño jito isoi naimie micorina uiuicaide.

<sup>22</sup>Naimie micori nana Egípto comini uiñuacinona fueote. Illaima uai isoi naimie uaidi ite. Eo abina uiñotimie.

<sup>23</sup>Caimaci, naimie micori cuarenta años illa facai, ie comini dine ie jaillemo ie comechina facade. Naimie cominidi cai judíuai comini. <sup>24</sup>Egípto imiemona damie llegi cacajana ciuano, naimiena riidote. Riidianona, Moisés micoridi Egípto imienia meinete. <sup>25</sup>Moisés micori comechina facade: “Cue muidona Egíptomona Jusiñamuidi cue cominina oreataite”. “Cue comini bieña uiñotimaci” raillana comechina facade; ie iadedi iena uiñoñedimaci. <sup>26</sup>Ie arediruido Moisés micoridi mena come iaímaiai fuirillana ciode. Iaimaaina marena itataiacade. Raite: “¿Bue ñellena conimana duere finoacadomico? ¿Bue ñellena o come diga fuiridomico?” <sup>27</sup>Duere finoacadimie naimiena oni ñuitade. Jicanote: “¿Bu odi cai illaimana jonegao? ¿Bu caimo ona llotatate juez isoi? <sup>28</sup>¿Na are Egípto imie o meinia isoi cuena jiai meineiacadio?” <sup>29</sup>Iena cacajano, come fajana naimie llinua jira, jacinaillana, Moisés micori aside. Madián railla eniruemo jamai ua illafuena ite. Dinomo ie aina ua mei, nainomo mena jitona comuitate.

<sup>30</sup>Caimaci, cuarenta años illa mei, jofue iñenanomo Moisés micori illanona, Jusiñamui jaienici naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede. <sup>31</sup>Iena ciuano, Moisés micori raijicaide. Naie iaireise naimie micori jibuisaide, naimiemo Jusiñamui llote: <sup>32</sup>“O usumatiái imaci Jusiñamuidicue. Abraham, Isaac, Jacob, imaci Jusiñamuidicue” llote. Jacinaillana Moisés micori abi docaide. Jaciruillana, eroñañede. <sup>33</sup>Jusiñamui naimiena raite: “Jamai bue o isoilla jira, o zapatona duiño. Benomo cue illa jira, o naidaillanodi eo marenó. <sup>34</sup>Egiptomo cue comini llegi cacajana raise ciodicue. Naimaci duere sefuillana uiñoticue. Ie jira omo bairedicue, naimacina Egíptomona jilloitallena. Mai jai. Egiptomo ona oreataiticue” llote; <sup>35</sup>iadedi comini dinena Moisés micorina jaie jitaiñenamona, naimiena raitimaci: “¿Bu illaimana odi jonegao? ¿Bu o juezna jonegao?” Comini dinena naimiena jitaiñedimaci; iadedi Jusiñamui naimiena illaimana itataate. Naimiena Egíptomona cominina jilloitaraímana jiai itataate. <sup>36</sup>Egiptomona Moisés naimacina atide. Egiptomo nia ia, diga siño rafuena finode. Jiairede monaillai fuemo naimaci rillana, siño rafuena jiai finode. Jofue iñenanomo cuarenta años siño rafuena finocana jaide. <sup>37</sup>Caimaci, Moisés micoridi cai judíuai cominimo llote: “Omoimona Jusiñamuidi damiena ie rafue lloraimana ico oreataite, naimie cuena oretaja isoi”. <sup>38</sup>Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiái micoriai diga naie jaienici facaina Moisés ñaite.

Caimo fecallena, naimiedi cominina itataate uaina feiñote; <sup>39</sup>iadedi cai usumatiā micorīai naimiena iinoiacaiñedimaci. Naimiena jitaiñedimaci. Egiptomo abido jaillemo naimaci comeciai facadimaci. <sup>40</sup>Ie jira comini dinena Aarón micorimo llotimaci: “Egipto eniruemona Moisés caina atide; iadedi naimie cai diga illana ja uiñoñediaci. Cai facaina Jusiñamuina eruaide jiraraina fino, Egiptomo abido caina ifollena”. <sup>41</sup>Iemo jurareta urue joreñona finodimaci. Iena sedallena, faga toica ocainaiaina fecadimaci. Naimaci finoca rafueri eo caimataidimaci. <sup>42</sup>Ie jira Jusiñamui naimacimona oni jaillanona, naimacina fainonocade. Lemona jitomana sedauidimaci. Fivuina jiai sedauidimaci. Ucuaina jiai sedauidimaci. Jusiñamui rafue lloraima ie rabenicombo biena jaie iese cuega:

Jusiñamui llote: “Judíuai imaci, cuarenta años jofue iñenanomo omoi ia, cuemo omoi faga toica ocainaiai fecañedomoi;

<sup>43</sup> iadedi cuemo omoi comeciaina facañeno Moloc railla jiraraina sedadomoi.

Refán railla ucuduna jiai sedadomoi.

Naimacina sedallena, jiraraina finodomoi.

Ie jira Babilonia nairai baifemo omoiña oreaiticue”

cuega. Naie facaise cai usumatiā micorīai Jusiñamuina jitaiñedimaci.

<sup>44</sup>“Caimaci, bie rafuena cai fueollena, cai usumatiā micorīai motomo Jusiñamui illana lloitice. Jofue iñenanomo cai usumatiā micorīai motomo daje jofo aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuega

noficidi naicomoe eenoga. <sup>45</sup>Josué diga bie eniruemo naimaci billa facaise, cai usumatiā micorīai naicona atidimaci. Bie enirue jiae nairaiaimo jainaiaide; iadedi Jusiñamui naie nairaiaina dotajano, cai usumatiā naie eniruena bairodimaci. Naico nainomo ite David micori facaisecon. <sup>46</sup>Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicanote: <sup>47</sup>“Salomón micoridi jofona Jusiñamui iena finode; <sup>48</sup>iadedi Jusiñamuidi iima finoca jofomo i-iñede. Jusiñamui facaina lloraima micoridi Jusiñamuina iese cuete:

<sup>49-50</sup> Cai Nama raite: “Monamo cue illamona, nana comini cue anamo itimaci.

Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitaiñedicue” raite.

<sup>51</sup>“Ero, omoi comeciai jaiairede. Omoi comeci iinoñede. Jefonidomoi isoidomoi. Ie jira Jusiñamui Joreño anamo iacaiñedomoi. Omoi usumatiā micorīai isoi itomoi. <sup>52</sup>Omoi usumatiā micorīaidi nana Jusiñamui rafue lloraima micoriaina duere finodimaci. Mareuidimie billena llotinona meineticaci. Mareuidimiena gaitatatomoi. Naimiena jai meinetomoi. Jesúna ñaiticue. <sup>53</sup>Jusiñamui jaieniciaimona Moisés micori llogacinona feiñotomoi; iadedi iena iinoñedomoi.

**Judíuai Esteban micorina meinia rafue**

<sup>54</sup>Esteban llofuiiana naimaci cacajano, eo iciritimaci. Icirillamona, isiduai muru-muru raite. <sup>55</sup>Jusiñamui Joreño nana Esteban micori comecimo namatajamona, monamo eruallano,

naimiedi Jusiñamui ebirenana ciode. Naimiedi Jusiñamui nabeimo Jesús naidaillana ciode.<sup>56</sup> Raite:

—Mona ecuaillana ciodicue. Jusiñamui Jito Jusiñamui nabeimo naidaillana ciodicue.

<sup>57</sup> Esteban Illuana cacajano, jefo oroisite. Eo cuiriillano, naimie dine aisicaidimaci.<sup>58</sup> Jerusalémona naimiena jino dotadimaci. Naimacimo ite emodomio itiroina duiñuanona, Saulo railla conirue ecimo iñiroina joneside. Iemei Estebana noficio diga fairinoside.

<sup>59</sup> Estebana noficio diga fairinuano, Estebadi Jusiñamuimo ado jiide:

—Cue Nama Jesús, cue joreño feiño.

<sup>60</sup> Ieconi caiñici ifodo rainadacaida ado jiide:

—Naimaci bie jeacino finua muidona, ibana oñeno.

Iese naimie jiai mei, fiodaite.

### Saulo creyentiaina duere finua rafue

**8** <sup>1-2</sup> Saulo dinena Esteban meiniana jiai jitaide. Cristo rafuena eo iñotinomona damierie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiai duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jiañodi Samaria railla eniruemo jaidimaci; iadedi Cristo oretagano nine jaiñedimaci.<sup>3</sup> Ie facaiseconi Saulodi creyentiaina eo duere finode. Diga jofomo jamai jaillano, iñiaina gaitade, cárcelmo jonellena. Riñoniaina jiai gaitade.

### Felipe Samariamo illa rafue

<sup>4</sup> Tuficaida jaidino naga illanomo Jesús rafuena llocana uitimaci.

<sup>5</sup> Samariamo Felipedí daje nairaimo jaide. Nainomo Cristo rafuena

llofueuide.<sup>6</sup> Ailluena cominidi Felipe llofuiana eo raise feiñotimaci, naimie siño rafuena finua jira.<sup>7</sup> Felipedí diga jananía anamo ite cominimona jananía oretate. Riire curioillano, jaidimaci. Ailluena tisitaitinona jillotate. Ailluena ñuja-ñujacaidinona jiai jillotate.<sup>8</sup> Ie jira naie nairaimo ite comini eo iobidimaci.

—Naie nairaimo Simóna mameciredimie ite. Naimie siño rafuena finouide. Iemonia Samaria cominina raijicaitade. Naimie raite:

—Siñomiedicue.

<sup>10</sup> Nana comini naimiena iñotimaci. Abina uiñóñedino iñotimaci. Abina uiñotino jiai iñotimaci. Raitimaci:

—Naimie uaidi Jusiñamui ie. Naimiedi siño jito —raitimaci.<sup>11</sup> Iese naimacina are jifuete. Naimaci raijicaila jira, naimaci naimiena cacadimaci.<sup>12</sup> Ie mei Felipe Cristo ie mare rafuena llote. Naimie anamo naimaci illana Jusiñamui jitaila jira, Jusiñamui díbeimo naimaci comeciai iuaina meiduana llote. Naimaci Felipe llofuiana iñotimaci. Hiuamona, Felipe naimacina bautizade. Hñiaina bautizade. Riñoniaina jiai bautizade.

<sup>13</sup> —Jiai iñoticue —Simóndi raite. Naimie bautizaja mei, Felipe diga jaoicaide. Felipedí diga siño rafuena finua jira, Simón naiena ciuano, raijicaide.

<sup>14</sup> Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaimaiai Juan diga, batine oredimaci.<sup>15</sup> Iaimaiai rillano, naimaci Jusiñamui Joreñona feiñollena Jusiñamuimo jiidiaimaiai,<sup>16</sup> naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreñona nia feiñóñedimaci.<sup>17</sup> Ieconi iaimaiai onollí naimacimo joniano, Jusiñamui Joreñona feiñotimaci.

<sup>18</sup>Naimaci Jusiñamui Joreño feiñuana Simóndi ciuano, ucubena iaimaiaimo fecaacade. <sup>19</sup>Raite:

—Cuelo omico uaina ine, bumó cue onollina cue joniamona, naimie Jusiñamui Joreñona feiñollena.

<sup>20</sup>Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadio; iadedi Jusiñamui naiena jamai fecade.

<sup>21</sup>Bie rafuedi omo duiñede.

Jusiñamuimona o comeci nia maraiñede. <sup>22</sup>O comeci iuai meido. Naimie o comecimo ite maraiñede facajaciuaina oni dotallen, cai Namamo jica. <sup>23</sup>Omo ailluena maraiñedicino illana uiñoticue. O comeci eo uradoide. Maraiñedicinona o comecimo namaredio.

<sup>24</sup>Simón uai ote:

—O llua cuemo suiñellena, o Nama diga cue facaina ñaino.

<sup>25</sup>Cristo rafuena iaimaiai llua mei, Jerusalémo abido bitiiaimaiai. Abido billano, Samariamo diga comini illanuaimo Jesús ie mare rafuena llocana bitiiaimaiai.

#### Etiopía imie creyentena jailla rafue

<sup>26</sup>Naie facaise Jusiñamui jaienisaimona damie Felipemo llote:  
—Beicido joide naido mai jai. Jerusalémona Gazamo joide naisonai jai —llote. Naie naiso jofue iñenanodo joide. <sup>27</sup>Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijiuide. Naiñaiño mamecidi Candace. Naimiedi nana naiñaiño gobierno ucubena sedade. <sup>28</sup>Naimie jai abido jaillano, ie carretamo raita, Isaías micori cuega rabenicona ado facade. <sup>29</sup>Jusiñamui Joreño Felipemo llote:  
—Naimie dine iaírei jai. Carreta díne jai.

<sup>30</sup>Naimie dine Felipedi aiscana jaillanona, rabe ado facajana cacade.

Felipe dinena naimiemo jicanote:

—¿O facaca rabenicona uiñotio?

<sup>31</sup>Naimie uai ote:

—¿Niese uiñoiticue, bu cuena canoñenia?

Felipemo jicanote, naimie diga a jaillano danomo raillena.

<sup>32</sup>Naimie facaca cuegafue iese raite:

Toica llauda fallena uilla isoi, naimiena uitimaci.

Toica llauda itirai garedino díne eeñena isoi, naimie ñaiñede.

Ie abina riidollena, uaina oñede.

<sup>33</sup>Marañede rafuena naimie finoñede; ia naimiena duere finodimaci.

Naimie uruiai iñeedi, ¿bu naimie rafuena lloite?

Meinia meinoconi, naimie jai iñede.

<sup>34</sup>Etiopía imie Felipemo jicanote:

—¿Bie lloraima bu iena llote? ¿Dama naimie iena llote? ¿Jiaimena iena llote?  
Cuelo llono.

<sup>35</sup>Iemei Felipedi bie cuegafuamona naimiemo Jesús ie mare rafuena llote.

<sup>36</sup>Naisonai jaidiiaimaiai, jinui illanomo ridiiaimaiai. Etiopía imie dinena raite:

—Ero, bie jinui itemo, ¿bue ñe cuedi bautizañellicue?

<sup>37</sup>Felipe uai ote:

—O comecimona o iinoia, cuemonai mare.

Naimie uai ote:

—Jesucristodi Jusiñamui Jitonana iñoticue.

<sup>38</sup>Naimie ie carreta jorodate. Iemei jinui dine jaidiiaimaiai. Felipedi naimiena bautizade. <sup>39</sup>Jinuimona iaimaiai bia, Jusiñamui Joreño Felipena oni uite. Etiopía imie Felipena dane cioñede; iadedi Etiopía imie iobicana jaide. <sup>40</sup>Jusiñamui Joreño Azotomo Felipena uite. Cesarea díne naimie

jaillanona, naga nairaaimo Jesús ie mare rafuena llocana uite. Ie mei Cesareamo ride.

**Saulo creyentena jailla rafue**

(Hch. 22.6-16; 26.12-18)

**9** <sup>1</sup>Naie facaise Saulo cai Nama Cristona iinotinona eo duere finoacade. Icirillamona, naimacina meineiacade. Ie jira Jusiñamui diga nanoca ñairaima dine jaide. <sup>2</sup>Judíua comini naie ñairaima anamo illamona, creyentiaina duere finollena, Saulo cartana naimiemo jicajaide. Damascomo ite judíua ofiracuaimo dajerie cartana uiacade. Naie ofiracuai sedaraini naimie canollena jitaide. Jesucristona iinotinona naimie baia, naimacina gaitajano, Jerusalémo atillena, naimiena canollena, cartana jitaide. Hñiai baia, riñoniai baia, naimacina Jerusalémo atiacade. <sup>3</sup>Cartana ua mei, naimie jaillano, Damascomo iaire ia, ieconi monamona damie naimie abina quetiñote. <sup>4</sup>Eniruemo naimie ana uaillano, monamona damie naimiemo lluana cacade:

—Saulo, Saulo, ¿bue ñellena cuena duere finodio?

<sup>5</sup>Naimie uai ote:

—¿Budio?

Monamona damie raite:

—Jesúdicue. Cuena duere finodio.

Iemona o abina duere finodio, riicaillamona raise maiga jurareta sruñoacana isoi. Ie isoidio.

Riicaillamona, cuena duere finoacadio.

<sup>6</sup>Naidacai. Damascomo mai jai.

Nainomo o finolle rafue omo lloitice.

<sup>7</sup>Saulo diga jaidinodi ñaiñeno naidaidimaci. Naie uaina cacadimaci; iadedi buna cioñedimaci. <sup>8</sup>IEconi Saulo naidacaide. Ie uisi ecoricaillamona, erodatemo, jai buena cioñede. Ie onollina llinocaída, naimiena

Damascomo uitimaci. <sup>9</sup>Darui amani cioñede. Jusiñamuimo comecin facajamona, guiñede. Jiai jiroñede.

<sup>10</sup>Damascomo Ananiana mameciredimie ite. Naimiedi creyente. Íniñenamona, Ananías nicairilla isoi cacaillena, Cristodi naimiemo rafuena llote:

—Ananías.

Naimie uai ote:

—Jii, bene iticue.

<sup>11</sup>Cai Nama Cristo naimiemo llote:

—Naidacai. Atona joide railla naison jai. Judas ie jofomo jai. Naicomodo Tarso ie Saulona jicano. Naimie cuemo jai jiide. <sup>12</sup>Naimie damiena jai nicairite isoide. Ananiana mameciredimienca nicairite isoide. Ona nicairite isoide. Naimie dine o jaillena ona nicairite isoide. Naimiemo o onollí joniamona, naimie dane ciuana nicairite isoide.

<sup>13</sup>Ananías uai ote:

—Nama, diga cominimona naimiena fididicai. Jerusalémo naimiedi maraiñede rafuena ona iinotinomo finode. <sup>14</sup>Jusiñamui diga nanoca ñairaima uai naimiemo ite, nana bene ite creyentiaina gaitallena.

<sup>15</sup>Cai Nama naimiemo llote:

—Mai. Naimie jai cue fetoca, judíuañedinomo cue rafuena llollena, illaicominimo cuena llollena, judíua cominimo cue rafuena jiai llollena.

<sup>16</sup>Cuena naimie jai iinua muidona, naimie nie isoi llegi cacajite. Naimiemo iena lloitice.

<sup>17</sup>Ie jira Ananías naie jofomo jaide. Ie onollí Saulomo joniano, raite:

—Saulo, jai cue amana jai itio.

Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o comeximo namatallena.

<sup>18</sup>IEconi Saulo uisimona illicia ico isoide ra uaide. Dane ciuana, naidaide.

Ie mei jai bautizaga. <sup>19</sup>Ie mei jai guite. Dane mairide. Diga irui Damascomo ite creyentiai diga naimie ite.

#### Damascomo Saulo illa rafue

<sup>20</sup>Judíuai ofiracomo naimie jaillanona, Jesús ie rafuena llofuetu. “Jesúdi Jusiñamui Jito” raillanona llofuetu.

<sup>21</sup>Nana naimienca cacadinodi raijicaide. Raitimaci:

—Bimie Jerusalémo Jesúna iinotinonadaure finouide. Naimacina gaitallena, Jusiñamui diga nanoca ñairainimo ullena, naimie bene bite; ia Jesús dibeimo jai ite.

<sup>22</sup>Saulo nagarui jacitaiñeno llofuiamo fibioicaide. Llofueuide:

—Jesúdi cai Jilloitaraima. —Naimie raise llofua jira, judíuai dinena iena uaitanidimaci.

<sup>23</sup>Digarui illa mei, judíuai comeciaina facadimaci, naimienca meinellena.

<sup>24</sup>Naimie aisii raillano, aremona nairai nasiaina sedadimaci. Naiona nasiaina jiai sedadimaci, naimienca meinellena; iadedi Saulo iena fidiano, <sup>25</sup>naiona creyentiai naimienca oni uitimaci. Naimie jillobillena, llaigafo jinofebeimo cirigaimo rainajanona, naimienca ana ñuitadimaci.

#### Jerusalémo Saulo illa rafue

<sup>26</sup>Jerusalémo naimie jaide. Naimieria, creyentiaina nabaiacade; ia naimienca jaciruitimaci. Creyentena naimie jaillana iiñoñedimaci. <sup>27</sup>Ie jira Bernabé naimienca Cristo oretagano dine uillano, naimacimo naiso motomo Saulo cai Namana ciuana llo. Naiso motomo cai Nama Saulomo lluana jiai llo. Damascomo naimie ia, Jesús jacitaiñeno llofuiiana jiai llo. <sup>28</sup>Ie jira Saulona nabaidimaci. Jerusalémo jaisoillanona, cai Nama ie rafuena

jacitaiñeno lloouide. <sup>29</sup>Iena cacajanona, griego uaina ñaite judíuaidi naimie llofuiiana uaitatimaci. Naimienca meineiacadimaci. <sup>30</sup>Creyentiai iena fidiano, Cesareamo Saulona uitimaci. Ie mei Tarsomo naimienca oredimaci.

<sup>31</sup>Judeamo, Galileamo, Samariamo nana creyentiai uri itimaci. Cai Namana iiñocana jaidimaci. Cai Namana jaciruoicaida jaidimaci. Jusiñamui Joreño naimaci comeciaina eo ocuiñotade. Ailluena comini creyentiaina jaidimaci.

#### Eneas jillua rafue

<sup>32</sup>Naie facaise diga illanuaimo Pedro macarite. Lidamo ite creyentiai dine ride. <sup>33</sup>Nainomo damie biiramo biidenia ciode. Naimiedi Eneas. Ocho años tisitaillamona biide. <sup>34</sup>Naimienca ciuano, Pedro naimiemo llo:

—Eneas, Jesucristo ona jai jillotate. Mai naidacai. O biira feri. —Ieconi naimiedi naidadate. <sup>35</sup>Nana Lidamo ite comini, nana Sarónmo ite comini diga, naimienca jilluana ciuanona, creyentiaina jaidimaci.

#### Fiodaillamona Dorcas jillua rafue

<sup>36</sup>Jopemo Tabitana mamecirediñaiño ite. Griego uaimona oni dobaiñuamona naie mameci Dorcas. Naiñaiño creyente. Ailluena mare rafuena finouide.

Ailluena duerede cominina canouide.

<sup>37</sup>Naie facaise naiñaiño duicotaide. Ie mei fiodaite. Naimaci einamaci finua isoi, ie nabaiñiai naiñaiño abina jocodimaci. Iemei aneba ie cuartomo naiñaiñona jonetimaci. <sup>38</sup>Lidamona Jope iaire ite. Pedro Lidamo creyentiai illana fidiano, menamie naimie dine oredimaci. Iaimaiaiña llotatatiñaci:

—Buena sedañeno cai dine raire bi.

<sup>39</sup>Ie jira Pedro naidacaida, naie iaimaiai diga jaide. Naimie ria, aneba ie

cuartomo naimiena uitimaci. Nana feciñuai Pedro ecimo eecana naidaidimaci. Dorcas finouiga iniroina naimemo acatatimaci.<sup>40</sup> Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raita, Jusiñamuimo jiide. Abido dobaicaida, naiñaiñomo erodate. Raite:

—Tabita, mai rainaicai.

Ieconi naiñaiño uisi oni erodate.

Pedrona ciuano, a rainadate.<sup>41</sup> Naiñaiño onolli llinuanona, a naidanete. Ie mei Pedroi feciñuaina, jiaie creyentiai diga, uaidote, naiñaiño jai cajenana naimaci cioillena.<sup>42</sup> Nana Jopemo ite comini naie rafuena fididimaci. Ie jira ailluena comini cai Namana iñotimaci.

<sup>43</sup> Jopemo Pedro diga irui Simón jofomo ite. Simondi ocaina igoina cuidoraima.

### Cornelio comeci iuai meidua rafue

**10** <sup>1</sup>Cornelio raillamiedi Cesareamo ite. Naimiedi capitán. Italiamoná bite soldaduai naimie anamo itimaci.<sup>2</sup> Naimiedi Jusiñamui llogacinodo jaide. Nana ie comini diga Jusiñamuina iñote. Judíuai cominimo ailluena rana jamai fecauide. Jusiñamuimo jiuide.<sup>3</sup> Jitoma ana ia, naimemo jai nicaírrilla isoi ite. Naimiedi Jusiñamui jaienicina naimie dine billana ciode. Jaienicidi uaidote:

—Cornelio.

<sup>4</sup>Naimiena Cornelio jaciruioicaida eruade. Jicanote:

—Nama, ¿buena jitadio?

Naimie uai ote:

—Jusiñamui o jiíaciuaina jai cacade. Jusiñamuidi duerede cominina o canuana jiai feitañede.<sup>5</sup> Mai, Jopemo damierie o mullaiaimona oreta, Simón raillamienra atillena. Naimie jiaie mamecidi Pedro.<sup>6</sup> Naimiedi igoi cuidoraima jofomo ite. Naie cuidoraima

mamecidi Simón. Monaillai fuemo naimie jofo ite.

<sup>7</sup>Jusiñamui jaienici jailla mei, Corneliodi ie mullaiaimona mena uaidote. Naimie anamo ite soldaduaimona damie jiai uaidote. Naie soldadodi Jusiñamuina jiai iñote.

<sup>8</sup>Nana naimemo Jusiñamui jaienici lluana naimacimo lluua mei, Jopemo oretate.<sup>9</sup> Ie are naimaci jaillano, Jopemo ianori riacanano, jitoma naidai ia, jofo emodomio Pedro jaide, Jusiñamuimo jiillena.<sup>10</sup> Naimie aimetaite. Guiacade. Guillena comini finodemo, naimemo nicaírrilla isoi ite.

<sup>11</sup>Mona oni econuana ciode. Aillue sábana isoi, buena ana billana ciode. Eniruemo naga muiduedo maigado ana bite.<sup>12</sup> Naiemo jiaforie eruade ocainaiai ite. Diga eniruemo jorode raniai ite. Diga nuiciniai jiai ite. Nana Moisés micori fimaídoga rille radi ite.<sup>13</sup> Naimiedi monamona damie lluana cacade:

—Pedro, naidacaída, fajano, biena rino.

<sup>14</sup>Pedro uai ote:

—Nama, dama ite. Moisés micori fimaídoga rille rana jaca riñedice.

<sup>15</sup>Monamona damie lluana dane cacade:

—Jusiñamui jai fimaidoñede. Ie jira iese lloñeno.

<sup>16</sup>Dacaiño amani iese suide. Ie mei naie radi monamo abido jaide.

<sup>17</sup>Pedro ie começina facade: “¿Niese illana ciodicue?” Ie daacaiño Cornelio oretagano bite. Simon illa jofo jicanuano, naie nasemo ride.<sup>18</sup> Simón Pedrona naie jofomo illana jicanotimaci.<sup>19</sup> Pedro ie nicaírriana isoidemo começina facajano, Jusiñamui Joreño naimemo llote:

—Ero, daje amani iima ona jenode.

<sup>20</sup>Naidacaída, ana jai. Naimaci diga

bueno sedaño eno mai jai. O dine naimacina oredicue.

<sup>21</sup>Pedrodi comini dine ana jaide. Raite:

—Omoi jenocamiedicue. ¿Bue ñiaibitomoi billa?

<sup>22</sup>Uai otimaci:

—Cornelio raillamie anamo iticai. Cornelio Jusiñamui jaienici birui llote: “Pedro dine damierena oreta, naimiena o jofomo atillena. Jusiñamui rafuena raise cacailena, naimiena ati” llote. Corneliodi capitán. Naimiedi mareuidimie. Jusiñamuina iñotimie. Nana judíuái comini dinena naimiedi mareuidimie.

<sup>23</sup>Iena Pedro cacajano, naimie jofomo iñillena naimacina fo uaidote. Le are naimaci diga jaide. Damierie Jopemo ite creyentiai naimie diga jiai jaidimaci. <sup>24</sup>Le are Cesareamo ridimaci. Cornelio naimaci billemo ocuride. Nana ie cominina jai uaidote. Le nabaiñiai jiai jai uaidote. <sup>25</sup>Pedro fo jaia, Cornelio dinena naimiena uaidote. Pedro anamo bitadate, Jusiñamui feaca isoi Pedromo iobillacinona fecallena.

<sup>26</sup>Pedrodi naimiena a naidanete. Raite: —Mai a naidada. Cue jiai jamai iimadicue.

<sup>27</sup>Naimie diga ñaiano fo jaidiiamaiai. Alluena comini ofillana ciode.

<sup>28</sup>Naimacimo llote:

—Moisés micori judío imie judíuñedimie nabairllana rairuide. Iena uiñotomoi. Judíuñedimie jofomo illana jiai rairuide. Ie areruido Jusiñamui nicaírrilla isoidifuna cuemo acatate. Lemona jai fueoticue. Jiaie nairai diga cue nabairllena, Jusiñamuima marenana jai uiñoticue. Jusiñamui omoína cue jearuillana jai jitaiñede. <sup>29</sup>Ie jira buena sedaño eno biticue, cuena o uaidua jira. ¿Bue ñellena cuena uaidotomoí? Cuemo llono.

<sup>30</sup>Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jiédicue. Ieconi Jusiñamui jaienici cuemo bairede.

Naimie iñiroi quenirede. <sup>31</sup>Cuena raite: “Jusiñamui o jíiana cacade. Naimiedi duerede cominina o canuana feitañede.

<sup>32</sup>Ie jira Jopemo damierena oreta, Simón Pedrona uaidollena. Jiaie Simón jofomo ite. Simón di igoi cuidoraima. Ie jofo monaillai fuemo ite”. <sup>33</sup>Iemona ona uaidoticue. O comeci marena jira, bene bitio. Jai nana bene iticai. Jusiñamui cai diga jiai ite. Cai Nama nana omo lluana cacareillena, bene iticai.

### Cornelio Pedro llua rafue

<sup>34</sup>Pedro uai ote:

—Jusiñamui nana comini naimie iñuana jitaillana jai uiñoticue. <sup>35</sup>Naga nairaimona Jusiñamuidi cominina jai jitaide. Bu naimiena iñonia, bu mare rafuedo jaia, Jusiñamui naimiena jai jitaide. <sup>36</sup>Cai judíuái cominimo Jesucristo lluamona, Jusiñamui dibeimo cai illena jai uiñoticai. Iemona Jusiñamui diga cai uri illana jai jiai uiñoticai. Jesúdi nana cai Nama. Bie rafuena navui janore fididomoi. <sup>37</sup>Nana Judeamo bie rafue llocana jai jaide. Juan micori bautizajana llua mei, Galileamo Jesús naimie llofuiiana tainede. <sup>38</sup>Jusiñamuidi ie Joreñona Jesúmo fecade. Jesúdi Nazaret imie. Naimemo ie uaina jiai fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itínona jillotate. <sup>39</sup>Judíuái eniruemo nana naimie siño finoca rafuena ciódicai. Iena birui llocabitacai. Cruzmo jonianona, cai illaicomini naimiena meineticaci; <sup>40</sup>iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, alluena comini naimiena ciódimaci. Cajedimienca ciódimaci. Jiai

ciodicai.<sup>41</sup> Nana comini naimienia cioñedimaci; iadedi Jusiñamui fetocano diese naimienia ciodimaci. Fiodaillamona naimie jillua mei, naimie diga guiticai. Naimie diga jamai jirodicai. Naimienia cai raise uifua jira, Jusiñamui caina fetode, naie rafuena llollena.<sup>42</sup> Cominimo bie rafuena lluana caimo llote. Jusiñamui Jesúna jai fetode, naimienia iiñoñedinona duere finollena. Nia fiodaifinedinona duere finoite. Jai fiodaitinona jiai duere finoite. Ie jira Jesú s rafuena llocana jaidicai.<sup>43</sup> Jesús muidona naga naimienia iiñotimie ie maraíñedicinodi Jusiñamui dotalle. Iena nana Jusiñamui facaina lloraini micoriai jaie llotimaci.

#### **Judíuaiñedino Jusiñamui Joreñona feiñua rafue**

<sup>44</sup>Pedro biena nia llofueia, Jusiñamui Joreño nana bie rafuena cacadino mor bite. <sup>45</sup>Iena ciuanona, Pedro diga bite creyentiai raijicaidimaci. Naimacidi judíuai comini. Judíuaiñede cominimo Jusiñamui ie Joreño jai fecaja jira, raijicaidimaci. <sup>46</sup>Jusiñamui Joreño naimacimo illamona, judíuaiñedinodi jiae naírai uaillaido ñaitimaci. Naie ñia uaillaína uiñoñedimaci. Jusiñamui m oibillacinona jai fecadimaci. Pedro diga bitino iena cacajano, raijicaidimaci. Iemei Pedro raite:

<sup>47</sup>—Cai feiñua isoi, Jusiñamui Joreñona jiae feiñotomoi. Omoi bautizallena jaca budí rairuiñete.

<sup>48</sup> Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitaila jira, diga irui nainomo fiebide.

#### **Jerusalémo Pedrodí naimiemo jai suide rafuena llote**

**11** <sup>1</sup>Judeamo ite Cristo oretagano, jiae creyentiai diga, judíuaiñede comini Jusiñamui uaina

feiñuana fididimaci. <sup>2</sup>Pedro Jerusalémo abido ria, judíuai comini naimienia icidimaci. <sup>3</sup>Jicanotimaci:

—¿Bue ñellena judíuaiñedino jofomo jaidio? ¿Bue ñellena naimaci diga gtitio?

<sup>4</sup>Pedro uai uanona, naimacimo naie rafuena nagacinauaña llote:

<sup>5</sup>—Jopemo navui cue ia, Jusiñamui mo cue jiiia, nícairilla isoi iticue. Aillue sábana isoi ana billana ciodicue. Monamona ana lloride, ie muiduai maiga diga. Cuemo ana ride. <sup>6</sup>Nainomo eruaidicuemo, diga rana ciodicue: ocainaiaina, eniruemo jorocana jaidinona, nuiciniaina. Iena ciodicue. <sup>7</sup>Monamona damie cuemo lluana cacadicue. Raite: “Pedro, naídacaillanona, fajanona, rino”. <sup>8</sup>Naie uai oticue: “Nama, dama ite. Moisés micori fimaídoga rille rana jaca riñedimacie”. <sup>9</sup>Monamona dane cuemo llote: “Jusiñamui iena jai fimaidoñede. Ie jira iese lloñeno”. <sup>10</sup>Dacaiño amani iese suide. Ie mei monamo nana abido dane jaide. <sup>11</sup>Ieconi daje amani iima cai illa jofomo ridimaci. Cesareamona cue dine damie naimacina orede.

<sup>12</sup>Jusiñamui Joreñodi naimaci diga buena sedañeno cue jaillena cuemo llote. Cue diga seis creyentiai jiae jaidimaci. Cuena uaidotimie jofomo jaídica. <sup>13</sup>Nainomo cai rilla mei, naimie ie jofomo Jusiñamui jaeníncina navui ciuana caimo llote. Naie jaenínci naimiemo llote: “Jopemo cominina oreta, Simón Pedrona atillena. <sup>14</sup>O jitaille rafuena omo lloite. Naie rafuena o cacajamona, jeacínomona jilloitio, nana o jofomo ite comini diga” llote. Ie jira naimie cuena uaidote. <sup>15</sup>Nainomo cue llofua facaiseconi, nano dofoconi caimo billa isoi, Jusiñamui Joreño naimacimo bite. <sup>16</sup>Iena cue ciuamona, cai Nama Jesú s lloga uaina comeciticue.

Naimie navui llote: "Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreñona birui feiñoitomoi".<sup>17</sup>Cai Nama Jesucristona cai iinuamona, Jusiñamuidi ie Joreñona caimo navui fecade. Naimacimo daje isoi birui fecademo, ¿niese Jusiñamui dibeimo iñeiticue?

<sup>18</sup>Iena Cristo oretagano cacajano, jai naimaci uaina uaitallicino iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judíuainede comini comeciai iuai meiduana jai jitaide. Naimie dibeimo naimaci illana jai jitaide. le jira naimieri iobidicai.

#### Antioquíamo ite creyentiai illa rafue

<sup>19</sup>Esteban micorina duere finua facaise, creyentiai tuficaida jaidimaci. Feniciamo damierie jaidimaci. Chipremo damierie jiai jaidimaci. Antioquíamo damierie jiai jaidimaci. Dani judíuai cominimo naimaci rafuena llotimaci;<sup>20</sup>iadedi tuficaidinomona jiajino Chripremona billanona, Cirenemona billanona, Antioquíamo rillano, judíuainedinomo cai Nama Jesús rafuena llotimaci.

<sup>21</sup>Cristo uai naimacimo illamona, alluena comini iinotimaci. Cai Nama dibeimo jaidimaci.<sup>22</sup>Jerusalémo ite creyentiai iena fidiano, Antioquíamo Bernabéna oretatimaci.<sup>23</sup>Naimie ria, naimaci marena illamona, naimiedi Jusiñamui naimacina dueruillana uiñote. Ie jira iobide. Imaci comeciai ocuiñocana iinocana jaillana naimacimo llote.

<sup>24</sup>Naimiedi marenie Jusiñamui Joreño nana naimie comecimo namatadimie. Jusiñamuina eo iinotimie. Naie facaise alluena comini creyentiaina jaidimaci.

<sup>25</sup>Ie mei Tarsomo Bernabé Saulona jenuaide. Naimiena baillanona, Antioquíamo naimiena uite.<sup>26</sup>Daje año creyentiai diga nabairillanona, naimacina llofuetiaimaiai. Antioquíamo creyentiaidi cristianona nano mameciredimaci.

<sup>27</sup>Iemei Jerusalémona Antioquíamo damierie Jusiñamui rafuena lloraini bitimaci.<sup>28</sup>Naimacimona Agabo raillamie ite. Jusiñamui Joreñodi naimiena llotata:

—Nana comini ico aime guitimaci.  
—Claudio illaímana illa facaiseconi iese jai suide.<sup>29</sup>Ie jira Antioquíamo ite creyentiaidi, Judeamo ite creyentiaimo, ucubena oretiacadimaci.<sup>30</sup>Nagamiiai imacimo illa dierise ucubena oredimaci. Creyentiaina llofuerainimo Bernabé diga, iaímaiai Saulo diga, naie ucubena oredimaci.

#### Herodes Agripadi creyentiaina duere finua rafue

**12** <sup>1</sup>Naie facaise Herodes railla illaimadi creyentiaimona damierena gaitatare, naimacina duere finollena.<sup>2</sup>Lloebi diga Jacobo cimaiona jaitatare. Jacobodi Juan ama.<sup>3</sup>Ieri judíuai illaicomini iobidimaci. Iena uiñuamona, Herodes Pedrona jiai gaitatare.<sup>4</sup>Naie facaiseconi judíuai comini llomenico guilla rafue ite. Naimiena gaitatajanona, cárcelmo jonete. Soldaduaina orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedauidimaci. Naie llomenico guilla rafue fuilla mei, comini illa uicomu naimiena meineiacade.<sup>5</sup>Ie jira Pedro cárcelmo fiebide; iadedi creyentiai naimie facaina eo jiidimaci.<sup>6</sup>Herodes naimiena meineiacanarui naio Pedro

soldaduai motomo ñide. Mena lloeo diga maiga. Soldaduai cárcel nasena jiai sedadimaci. <sup>7</sup>Ieconi cai Nama ie jaienicidi cárcelmo bairede. Cárcelmo lligaiñote. Naimiena casitallena, jaienici Pedro ciraigina jetade. Raite:

—Raire naidacai.

Le mei naimie onollimo ite lloeodi oni uaide. <sup>8</sup>Jaienici naimiena raite:

—O iniroina jita. O zapatona jiai jita—Iena jitaja mei, naie jaienici dane raite—. O iniroi o abimo ferino. Cue diga mai bi.

<sup>9</sup>Naie jaienici jinafona Pedro jino jaide. Pedrodì naie jaienici naimiemo finoca rafuena uiñonede.

—Nicairilla isoi comecina facadicue —raite. <sup>10</sup>Naga nasena sedade soldadomona jaide. Jino jaillena, nanoca nasemo ride. Nai nasedì lloema ie; iadedi nase dama ecoride. Jino jaidiaimaiai. Daje calle jaillanona, jaienici naimiena fainonocaide. <sup>11</sup>Iemonia Pedro naimiemo suide rafuena jai uiñocaide. Raite:

—Cue Nama ie jaienicina uanai oretate. Herodemona cuena jillobitade. Judíuaï illaicomini cue meinellena cue sedajamona cuena jillobitade.

<sup>12</sup>Iena jai naimie uiñuano, María jofomo jaide. Marfadi Juan Marcos ei. Jusiñamuimo jiillena, naicomo ailluena comini ofidimaci. <sup>13</sup>Rillanona calle fuemo ite nasena tute. Daje mullaiño bite. Naiñaiño mamecidì Rode.

<sup>14</sup>Naimie uaiduamona, naiñaiño Pedro uaina uiñote. Iobilla jira, nase econoñede; iadedi abido fo aside. Pedro nasemo illana llote. <sup>15</sup>Raitimaci:

—Odi uairico isoidios.

Naiñaiñodi:

—Pedrodì jaca ieseuide —raite.

Uai uamona:

—Naimie joreño ite —raitimaci.

<sup>16</sup>Pedro nasena nia tua jira, nasena econuaibitimaci. Econuamona naimiena

naimaci ciuamona, raijicaidimaci. <sup>17</sup>Fo jaillano, Pedro ie onollì jaide, naimaci lliicaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiae creyentiaimo iena jiai llono.

Ie mei Pedro jino jaillano, jiainomo jaide.

<sup>18</sup>Monaide, Pedro nainomo iñena jira, soldaduai raijicallanona, siadotimaci. <sup>19</sup>Herodes iena fidiano, naimiena Jenotate. Naimiena baiñenia, soldaduaimo jicanote. Baiñena jira, naimacina meinellena llote. Iemei Judeamona Cesareamo Herodedì jaide.

### Herodes micori fiodailla rafue

<sup>20</sup>Naie facaise Herodedì Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo majidimiedì Blasto. Blasto diga naie cominidi nabairite, naimaci dibeimo naimie illena. Herodes eniruemona naimaci guille billa jira, uri illena naimiemo jicanote. <sup>21</sup>Naie cominina Herodes feiñollena, ie ebirede iniroina jitade. Naimacina feiñollena, ie rairabicimo raide. Iemonia raita, rafuena are llote. <sup>22</sup>Iena cacajano, comini ado cuiridimaci:

—Jamai iimadi ñaiñena. ¡Jusiñamui ñiaia!

<sup>23</sup>“Jusiñamuiñedicue” naimie raiñena jira, ieconi cai Nama jaienici naimiena iracotaitate. Jusiñamuimo iobillacino naimie fecañena jira, aiai naimiena aite. Iemonia naimiedi fiodaite.

<sup>24</sup>Naie facaiseconi Jusiñamui uai llocana jaide. Ailluena comini iena iiñotimaci.

<sup>25</sup>Iaímaiai uiga ucube illanona, Bernabé, Saulo diga, Jerusalémoma Antioquíamo abido bitiaímaiai. Juan Marcos jiai atidíiaímaiai.

**Bernabéna, iaimaiai Saulo diga,  
fetua rafue**

**13** <sup>1</sup>Antioquíamo creyentiai motomo Jusiñamui facaina lloraini itimaci. Llofueraini jiae itimaci: Bernabé, Simón. Simóndi jiae mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enirue gobernador. Saulo jiae ite. <sup>2</sup>Naimaci Jusiñamuina sedajamona, guifénarauillai ia, Jusiñamui Joreño naimacimo llote:

—Bernabé iaimaiai Saulo diga feto, cuejena. Cue rafuena iaimaiai llollena, iaimaiaina jai fetodicue.

<sup>3</sup>Jusiñamuimo naimaci jiia mei, Jusiñamui iaimaiaina fetuana naimaci uiñuamona, naimaci onollí iaimaiaimo jonia mei, iaimaiaina naimacimona oni oretatimaci.

**Pablo, iaimaiai Bernabé diga,  
Chipremo illa rafue**

<sup>4</sup>Iaimaiaina Jusiñamui Joreño oretaja jira, Seleuciamo jaidiiaimaiai. Nainomona botedo Chipremo jaidiiaimaiai. Chipredi uiasi. <sup>5</sup>Chipremo ria, Salaminamo judíuoi ofiracuaimo Jusiñamui uaina llofuetiiaimaiai. Juan Marcos iaimaiai diga jiae jaide. <sup>6</sup>Nana naie uiasimo jaillanona, Pafos railla nairaimo ridimaci. Nainomo Barjesúna mameciredimena baitimaci. Naimie judío imie. Naimiedi aima. Naimiedi diga siño rafuena finoraima. “Jusiñamui rafuena lloticue” raite; iadedi taino lloraima. <sup>7</sup>Gobernador diga maijuide. Gobernadordi Sergio Paulo. Gobernadordi abina uiñotimie. Jusiñamui uaina cacaacana jira, naimie Bernabé iaimaiai Saulo diga uайдote. <sup>8</sup>Barjesús ie jiae mamecidi Elimas. Naie iaimaiai llofuiiana uaitate. Gobernador iiuana jitaiñede. <sup>9</sup>Saulodi jiae mameci

Pablo. Pablo dinena naimiena eo eruaillano, Jusiñamui Joreño nana Pablo comecimo namatajamona, <sup>10</sup>naimiemo llote:  
—¡Eo jifueraimadio! ¡Eo maraiñedio!  
¡Taife dibeimo itio! Nana mare rafue dibeimo iñedio. Cai Nama ie mare uanaaicinona dobairaidodio. <sup>11</sup>Cai Nama ie uaido ona ja iracotaitaiticue. Nano nigarui useredinona cioiñenie.

Ieconi naimie cioiñede. Cominina jenuaide, ie onollido llinocaida ie uillena. <sup>12</sup>Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaite.

**Jesús rafuena llocana jaidiiaimaiai**

<sup>13</sup>Pafomona botedo Pablo ie nabaiñiai diga jaide. Perge railla nairaímo ride. Perge Panfilia railla eniruemo ite. Juan Marcos iaimaiaina fainonocaida, Jerusalémo abido jaide. <sup>14</sup>Pergemona Antioquíamo jaidiiaimaiai. Pisidia railla eniruemo Antioquía ite. Sábadoruimo judíuai ofiracomo jaillano, ana raidiiaimaiai. <sup>15</sup>Moisés micori cuegafuena facaja mei, Jusiñamui facaina lloraini micoriai cuegafuena facaja mei, judíuai ofiraco sedadino iaimaiaimo llotimaci:

—Caimaci, cominimo bue omico lloiacania, mai llono.

<sup>16</sup>Pablo naidadajano, ie onollina jaide, comini lliicaillena. Raite:

—Jusiñamuina sedallena bene itomoi. Omoimona damerie judíuaidomoi. Jiae judíuaiñedomoi; iadedi judíuai isoi Jusiñamuina sedadomoi. Cue lluamo mai cacarei. <sup>17</sup>Iemona omoi fueollena, cai jaiagai rafuena lloitice. Cai judíuai comini Jusiñamuina birui sedadicai. Naimiedi cai jaiagaina jaie fetode. Egipromo naimaci ia, naimacina eo jebuitate. Nainomona ie siño uai diga naimacina atide. <sup>18</sup>Jofue iñenanomo

cuarenta años naimacina canode.

<sup>19</sup>Canaán eniruemo siete nairaina cuenode. Cai jaiagaimo, naimaci uruiai diga, naie eniruena fecade, naimaci iena.

<sup>20</sup>Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamudi jueces fetode, cai jaiagaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitaiñedimaci.

Samuel micoridi Jusiñamui facaina lloraíma.

<sup>21</sup>Illaimana naimaci jitaila jira, Jusiñamui Saúl micorina fetode. Naimiedi Cis micori jito. Naimie micori nairaidi Benjamín. Cuarenta años Saúl micori cai usumatai micoriaina sedade.

<sup>22</sup>Naimie ifo meidollena, naimaci illaimana illena, Jusiñamui David micorina fetode. Naimiedi Isaí micori jito. Jusiñamui naimie micorina llote: “Bimie eo cue comecido jaidimie. Nana cue jitaille rafuena finoite”.

<sup>23</sup>Jusiñamui llua isoi, David micori uruiaímona Jesúdi cai judíuai comini Jilloitaramana jaide.

<sup>24</sup>Jesús nia llofueñenia, Juan Bautista micori llofueuide. Juan micori cai cominimo llouide: “Omoi jeacinona fainonocaida, Jusiñamui dibeimo omoi comeciai iuaillai meido. Iena omoi meidoia, comini iena uiñotallena, mai omoi bautizallomoi”.

<sup>25</sup>Juan micori ie llofuia fuillamona, raite: “Omoi comeci facajamieñedicue. Cue ifomo jiaimiena meidoite. Naimie isoíñedicue. Jamai bue isoidicue. Jamai bue cue isoilla jira, naimiena cue canuana uiñoñedicue”.

<sup>26</sup>Caimaci, cai eirue jito Abraham micorímona comuidicai. Jusiñamuina birui sedadicai. Ie jira cai jeacinomona naimie jilloitalle rafue caimo duide. Jesúna ñaiticue.

<sup>27</sup>Jerusalémo itinodi, cai illacomini diga, Jesúna jaie

meinetimaci. Naga sábado Jusiñamui facaina lloraini micoríai cuegafuiaina facadimaci; iadedi iena raise cacaiñedimaci. Jesúna naimaci meiniamona, Jusiñamui lloraini micoríai cuegafuiaina jai suitatimaci.

<sup>28</sup>Jesús maraiñede rafuena finoñede; iadedi naimiena meinetimaci. Pilatomo jicanotimaci, naimiena meinellena.

<sup>29</sup>Nana Jusiñamui facaina lloraini micoríai cuegafuiaina suilla mei, cruzmona naimie ana uano, nofici ie raiafomo naimiena jonetimaci;

<sup>30</sup>iadedi fiodaillamona Jusiñamui naimiena jillotate.

<sup>31</sup>Galileamona Jerusalémo naimie diga jaidino naimiena diga icaiño ciódimaci. Iemei cominimo naimie rafuena jai llocabitimaci.

<sup>32</sup>Jusiñamui cai jaiagaimo jaie lloga rafue jai suide. Iena omoimo ja lloitcoco.

<sup>33</sup>Jusiñamudi cai jaiagaimo llogafue birui jai suide. Jesúna cai díne jai orede. Naiena salmos dosmo cuega: “Jusiñamui llote: ‘Cue jitodio. Birui ona Jilloitaramana itataticue’”.

<sup>34</sup>Fiodaillamona Jusiñamui naimiena jai jillotate. Ie abi jaca rifaiñede. Iena Jusiñamui jiai raite: “Davidmo cue llogacintona omoi facaina jaca finojiticue”.

<sup>35</sup>David micori jiae salmomo iena cuete: “O mareuidimie jaca rifailiana jitaiñedio” raite.

<sup>36</sup>Jusiñamui David micorina ñaiñede. Ie illa dinori David micoridi Jusiñamui jitaila rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide;

<sup>37</sup>iadedi Jusiñamui Jito abidi ie isoi rifaiñede.

<sup>38</sup>Caimaci, daje rafue omoimo lloiacadicue. Jesúna fiodailla jira, Jusiñamui omoi jeacino oni dotaacade. Moisés micori llogacintodí omoi maraiñedicinomona omoina jillotañede;

<sup>39</sup>iadedi Jesúna birui omoi hnoia, omoi

jeacino anamona jilloitomoi.<sup>40</sup> Abina omoi rairui, Jusiñamui facaina lloraini micoríai jaie cuegafuiai omoimo sui raillano. Jaie cuetimaci:

<sup>41</sup> Ero, Jusiñamui uaina jamaidomoi. Ieri raijicaidomoi; iadedi faifidomoi.

Omoi motomo siño mare rafuena birui finodice.

Bu omoimo iena iese lloia, bie rafuena iiñoñetomoi.

Ie isoi omoimo suiñellena, Jesúna birui omoi mai iiño.

<sup>42</sup> Je mei Pablo lliicaide. Iaimaiai jino jaide, comini iaimaiaiimo jicanotimaci, jiae sáboruimo bie rafuena naimacimo dane llollena.

<sup>43</sup> Comini jino jailla mei, ailluena comini Pablo, iaimaiai Bernabé diga, ñaicana jaidimaci. Judíuai iese jaidimaci. Naie judíuaindino iese jiai jaidimaci. Naie judíuaindinojudiáuai isoi Jusiñamuina iinotimaci. Pablo, iaimaiai Bernabé diga, ñaicana jaillanona, naimacimo llotiiaimai:

—Jusiñamui omoina duenallana omoi jai uiñua jira, Jesús rafuena mai omoi iiño.

<sup>44</sup> Jiae sáboruimo ailluena comini ofidimaci, Jusiñamui uaina cacareillena.

<sup>45</sup> Ailluena cominina ciuano, judíuai comini dinena eo uradoidimaci. Pablo joreñona ñaitimaci. Naimie llofuiaciuaina uaitatimaci;<sup>46</sup> iadedi Pablo, iaimaiai Bernabé diga, jacitaiñeno llofuetiiaimai:

—Omoimo Jusiñamui uaina nano lloiacadicoco. Iena jitaiñedomoi. Jusiñamui diga omoi jaca illena jitaiñedomoi. Ie jira judíuaindino díne jaiticoco.<sup>47</sup> Iese Jusiñamui jaie llote:

Judíuaindonomo ona oreaiticue, naimacimo cue rafue llollena, naga eniruemo ite cominimo jeacinomona jilluana llollena.

<sup>48</sup> Iena cacajano, judíuaindino ibidimaci.

—Jusiñamui rafue mare —raitimaci. Jusiñamui jaca illena fetocano díse Jesúna iiñotimaci.<sup>49</sup> Nana bie eniruemo cai Nama Jesús uaina llocana jaide;<sup>50</sup> iadedi judíuai dinena diga cominina fuemo faicana uitimaci. Jusiñamuina sedade riñoniaina fuemo faicana uitimaci. Naie riñoniai mameciai are soride. Illacomini fuemo faicana uitimaci. Ie jira Pablo, iaimaiai Bernabé diga, duere finodimaci. Naimaci illanomona iaimaiaina jino dotadimaci;<sup>51</sup> iadedi jioracuai iaimaiai eillimona jaidinotiiaimai, naimacimo ite jeacinuaina naimaci uiñollena. Ie mei Iconio railla naíraimo jaidiiaimai;<sup>52</sup> iadedi Antioquíamo ite creyentiai eo iocire itimaci. Jusiñamui Joreño nana naimaci comeximo namatade.

### Iconiomo Pablo, iaimaiai Bernabé diga, illa rafue

**14** <sup>1</sup>Iconiomo judíuai ofiracomo, iaimaiai Antioquíamo jailla isoi, jaidiiaimai, Cristo rafuena duere llotiiaimai. Ie jira ailluena comini creyentiaina jaidimaci. Judíuai cominimona ailluena iiñotimaci.

Judíuaindene cominimona ailluena jiai iiñotimaci;<sup>2</sup> iadedi iiñoñede judíuaidi judíuaindina fuemo faitimaci.

Naimacimo creyentiaina tainona llotimaci;<sup>3</sup> iadedi nainomo are fiebidiiaimai. Cai Nama facaisena jacitaiñeno llotiiaimai. Cai Nama Jesús iaimaiaina siño rafuena finotate.

Ie jira cominidi cai Nama Jesús naimacina duerullana fididimaci;

<sup>4</sup> iadedi nana comini naiena iiñoñedimaci. Comeciaina daje isoi lloisiñede. Damierie judíuai facaisena itimaci. Damierie naie iaimaiai facaisena itimaci.<sup>5</sup> Judíuaindino,

judíuai diga, naimaci illaicomini diga, naie iaimaiaina duere finoacadimaci. Noficina iaimaiaina fairigiiacadimaci. <sup>6</sup>Iena fidiano, Licaoniamo ite nairaimo aisicano jaidiiaimaiai. Listra railla nairaimo jaidiiaimaiai. Derbe railla nairaimo jiai jaidiiaimaiai. Naie nairai ecimo ite eniruemo jiai jaidiiaimaiai. <sup>7</sup>Nainomo Jesús ie mare rafuena llofuetiaimaiai.

#### Listramo iaimaaimo suilla rafue

<sup>8</sup>Listramo damie tisitaite. Nanomona naimie iese jeicia jira, jaca macariñede. <sup>9</sup>Pablo llofuiana naimie raise cacajamona, "Jusiñamui cuena jillotaredé" raillanova, tisitaitimie iinote. Pablo dinena naimiemo eruaillano, naimie iinuana uiñote. <sup>10</sup>Naimiemo ado llote:

—A naidada.

Iemei daiacaida naimie macarite.

<sup>11</sup>Ailluena comini Pablo finoca rafuena ciódimaci. Naimaci uaido ado curiidimaci:

—Hñiai isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiai sedauidimaci. <sup>12</sup>Ie jira Bernabé mamecidi jiaicina jonega Júpiter. Pablo mamecidi jiaicina jonega Mercurio, naimie ñairaimana illa jira. <sup>13</sup>Naie nairai nanoca nase ruica facai Júpiterna sedauilla jofo ite. Iaimaiaina sedallena, safia diga juraretaiaina abina finoduanona, Júpiter facaina ñairaima naimacina atide. Ailluena comini diga bite.

Juraretaiaina fallena, "Naie iaimaiaidi cai Jusiñamui" raillano, iaimaaimo feaacadimaci. <sup>14</sup>Iaimaiai iena ciuanona, "Comini maraiñede rafuena finoacade" raillano, iaimaiai iniroina cuaranotiaaimaiai. Comini motomo aisicana jaidiiaimaiai. Ado llotiaaimaiai:

<sup>15</sup>—Nabaiñiai, ¿bue ñellena cocomo iese finodomoi? Jamai iimadicoco. Omoi isoidicoco. Jusiñamuina omoi sedallena, jamai rana omoi sedañellena, mare rafuena omoimo jai lloticoco. Cajede Jusiñamuina sedadicoco. Naimiedi mona finode. Eniruena finode. Monaillaina jiai finode. Nana nainomo ite rana jiai finode. <sup>16</sup>Jaie Jusiñamuidi nana omoi judíuaiñedino omoi jitalla rafuena finuana rairuiñede; <sup>17</sup>iadedi naimie finoca rafuemona naimiena uiñoredomoi. Omoi facaina mare rafue naimie finocabide. Noci deitate. Omoi riara sictate. Omoimo guille itatate. Iemonia omoi comeciaina caimare itatate. Iemonia Jusiñamuina uiñoredomoi.

<sup>18</sup>Iese Pablo llote; iadedi iaimaaimo juraretaiaina fecajana jaca fañonocaiacaiñedimaci. <sup>19</sup>Nano nigarui illamona, Pisidiamo ite Antioquíamona judíuai comini bitimaci. Iconionoma jiai bitimaci. Judíuai dinena fuemo faiamona, naimaci dibeimo comini jaidimaci. Iemonia noficulo Pablona fairigite. Naie nairaimona naimiena sonocana uitimaci, fiodaitimieno naimie eruailla jira. <sup>20</sup>Naimieno iese fañonocilla mei, creyentiai naimie ecimo billamona, naimie a naidadate. Nai nairaimo abido jaide. Ie are Derbemo, Bernabé diga, jaide. <sup>21</sup>Naie nairaimo Jesús ie mare rafuena llotiaaimaiai. Diga comini creyentiaina jaidimaci. Ie mei Listramo abido jaidiiaimaiai. Iconomo abido jiai jaidiiaimaiai. Pisidiamo ite Antioquíamo jiai abido jaidiiaimaiai. <sup>22</sup>Creyentiai comeciaina ocuiñotadiiaaimaiai. Cristona nia iinuana llotiaaimaiai. Raitiaaimaiai:

—Jusiñamui dine cai nia riñenia, eo duere sefuiticai.

<sup>23</sup>Naga creyentiai illanomo creyentiaina sedarainina fetodiiaimaiai.

Guiñeno Jusiñamuimo jíia mei, guiñena facaise mei, naimiena naimaci jai iinua jira, caí Nama illa anamo naimacina fañonocaidiaimai.

**Siriamo ite Antioquíamo abido  
jaidiaimai**

<sup>24</sup>Pisidiamo jaillanoma, Panfiliamo ridiaimai. <sup>25</sup>Pergemo Cristo uaina llua mei, Ataliamo jaidiaimai. <sup>26</sup>Nainomona botedo Siriamo ite Antioquíamo abido ridiaimai. Nano naie iaimaiiai illanomo abido ridiaimai. Nainomona iaimaiiai navui nia jaiñenia, creyentia dinena Jusiñamui iaimaiaina duenallana uiñuamona, iaimaiaina oredimaci. Jusiñamui rafuena iaimaiiai lollena, iaimaiaina oredimaci. Naie maijia fuilla jira, jai abido bitiaimai. <sup>27</sup>Iaimaiiai rilla mei, creyentia ofitatiimai. Nana Jusiñamui iaimaiaimo finoca rafuena llotiaimai.

—Jusiñamuidi judíuaindino naimiena iinuana jai jitaide —llotiaimai. <sup>28</sup>Dinomo creyentia diga are itiaimai.

**Jerusalémo Moisés micori  
llogacinona siadua rafue**

**15** <sup>1</sup>Antioquíamo Jerusalémona janore comini billano, creyentiaina iese llofuetimaci:

—Moisés micori caimo llua isoi, omoi abina omoi detatañenia, jeacinomona jillobiñetomoi.

<sup>2</sup>Ie jira creyentiai uri iñedimaci. Pablo, iaimaiiai Bernabé diga, Jerusalémona bitino llofuiiana eo uaitatiimai. Ie muidona creyentia dinena iaimaiaina, jiae creyentia diga, Jerusalémo jaillena fetodimaci. Cristo oretaganodio, Jerusalémo ite creyentiaina sedaraini diga, bie rafuena siadoiacasite. <sup>3</sup>Creyentiai naimacina

oretaja mei, Fenicia railla enirue dibeido jaidimaci. Ie mei Samaria railla enirue dibeido jiai jaidimaci. Creyentiai illanuaimo llofuecana jaidimaci. Judíuaindino creyentiaina jai jaillana naimacimo jiai llotimaci. Ie jira naie creyentiai caimare itimaci.

<sup>4</sup>Jerusalémo ria, creyentiaidi naimacina feiñotimaci. Cristo oretaganodio, Creyentiaina sedaraini jiai itimaci. Naimacimo nana Jusiñamui iaimaiaimo finoca rafuena llotiaimai. Cristo rafuena iaimaiiai llofuiamona, judíuaindino Cristona iinuana llotiaimai. <sup>5</sup>Iena cacajano, fariseuai dibeimo ite creyentiaimona jiaino naidaita raitimaci:

—Moisés micori llogacinua iinuamona, judíuaindene creyentiai abina diana jitaide.

<sup>6</sup>Bie rafuena siadollena, Cristo oretaganodi, creyentiai sedaraini diga, danomo ofidimaci. <sup>7</sup>Iena are siadua mei, Pedro naidacaillano, raite:

—Amatiai, judíuaindinedi cuemona Jesús ie mare rafuena cacailena, jaie omoimona Jusiñamui cuena fetode. Iena uiñotomoi. Cue llofuiamona iñotimaci.

<sup>8</sup>Nana comini comeciaina naimie uiñuamona, judíuaindino naimiena iinuana Jusiñamuidi uiñote. Caimo fecaja isoi, ie Joreño naimacimo fecaja jira, Jusiñamuidi judíuaindinedina jitaillana jai uiñotacai. <sup>9</sup>Jusiñamuidi naimacina caí isoi jai feiñote. Naimiena naimaci iinua jira, naimie naimaci comeciaimona jeacinonona jai dotade.

<sup>10</sup>¿Bue ñellena Jusiñamuina iñoiacaiñedomoi? Jusiñamui jitaillacino omoi finoacaiñena jira, naimie omoina duere finuana jitaide. Cai jaiagai Moisés micori llogacinodo jaidimaci; iadedi iena raise iñonidimaci. Nana ie llogacinona jaca finonidimaci. Iedo jaie jiai jaidicai;

iadedi iena jiai finonidicai. ¿Bue ñellena ideo birui cai jaillana jitaidomoi?

<sup>11</sup> Jesucristo caina duenalla jira, cai jeacynomona jilloiticai. Judíuañedino cai isoi jilloitimaci.

<sup>12</sup>Iena cacajano, nana ofidino uai lliicaidimaci. Iemei Bernabé lluana cacadimaci. Pablo lluana jiai cacadimaci.

—Jusiñamui judíuañedino motomo cocona siño rafuena finotate —llotiaimaiai.

<sup>13</sup>Iaimaiai ñiaia mei, Jacobo raite:

<sup>14</sup>—Amatiai, cuemo cacarei.

Judíuañedinomo Jesús rafue Simón Pedro nano llua rafuena jai cacadicai. Creyentiaina naimaci jaillena, Jusiñamui naimacina jai fetode.

<sup>15</sup>Jusiñamui facaina llorañi micoriai iena jaie cuetimaci:

<sup>16-18</sup> Jusiñamui jaie llote: “David micorí illaima isoi illaimana illena, cue Jitona ico oretaiticue.

David jicorí jito illaimana birui iñede;

iadedi David micorí ifomo illaimana cue Jito iite.

Iemona judíuañedino cuena iiñoitimaci.

Naimaci cue cominina jaillena jiai jitaidicue.

Iena cue llua jira, iena finoiticue” llote.

<sup>19</sup>Ie muidona cue comeci raite:

Judíuañedinomona creyentiaina jaidinona duere finoñeiticai.

<sup>20</sup>Naimacimo rabena oreta, dama biena llollena: “Jiraraimo fecaca llicisina riñeno. O aiñede riño diga iñeno. O iniñede iima diga iñeno. Llerinoga rana riñeno. Diruena jiai riñeno”. <sup>21</sup>Jaimonaga sábado naga judíuañofiracomojudíuañi Moisés micorí cuegafuiaimona naie isoide lletarafuena cacadimaci. Ie jira naie isoide rafuedo nia jaiticai:

iadedi jiaie Moisés micorí lletarafuedo jaiñeiticai.

<sup>22</sup>Ie mei Cristo oretaganodí, creyentiaina sedaraini diga, comeciaina facadimaci, naimacimona cominina fetollena, Antioquíamo oretallena. Nana creyentiai comeciaina facajano: “Jee” raitimaci. Pablo, iaimaiai Bernabé diga, naimacina oretiacadimaci. Judana fetodimaci. Naimie mameci jiaicidi Barsabás. Silana jiai fetodimaci. Jiai comini baifemo rafuena baitadijaimaiai.

<sup>23</sup>Rabenca cuetimaci, iaimaiai diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoimo cueticai. Jerusalémo iticai. Cristo oretaganodicai. Creyentiaina sedarainidicai. Omoidi cai amatiai. Omoimo jai cueticai.

Judíuañediomoi; iadedi cai amatiaidomoi. <sup>24</sup>Cai motomona jiaie comini naimaci llofuiado omoína uri itatañenana fididicai. Omoí jeacynomona omoí jilloillena, Moisés micorí llogacinodo omoí jaillana jitaidimaci. Ie jirari omoí comeciai rucaicuerite.

Naimacina oretañedicaí. <sup>25</sup>Danomo cai ofilla mei, menamiena fetodicai, omoimo oretallena, Bernabé, iaimaiai Pablo diga. Bernabéna isiruiticai. Pablona jiai isiruiticai. <sup>26</sup>Iaimaiai cai Nama Jesucristo muidona navui niadedi fiodaitiaimaiai.

<sup>27</sup>Ie jira Judas, iaimaiai Silas diga, oretaiticai. Omoimo bie rabe cuia isoi lloitiaimaiai. <sup>28</sup>Jusiñamui Joreño caímo illamona, bie rafuena omoimo lloiticaí. Ailluena rafue omoí finuana lloñeiticai. Dani bie rafuena finojitomoí. <sup>29</sup>Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno. Iese omoí iñenia, marena iitomoí.

Macaibaite” cuetimaci.

<sup>30</sup>Ie mei Antioquíamo jaidimaci.

Ailluena cominina ofitaja mei,

naimacimo cartana fecadimaci. <sup>31</sup>Iena facajano, naie lluacinori iobidimaci.  
<sup>32</sup>Judas Jusiñamui facaina lloraima. Silas daje isoide. Diga rafuena creyentiaimo llofuetiaiamaiai. Naimaci comeciaina jiai ocuiñotadiiamaiai.  
<sup>33</sup>Diga irui nainomo illa mei, iaimaiaina oretatinomo creyentiai iaimaiaina marena abido oretatimaci.

<sup>34</sup>Nainomo Silas comecina facajano, fiebide. Ie jira Judas dama abido jaide.  
<sup>35</sup>Antioquíamo Pablo, iaimaiai Bernabé diga, cai Nama Jesús rafuena llofuelleña fiebidiaiamaiai. Diga comini jiai iese llofuetimaci.

#### Pablo jiae eniruemo ite creyentiai dine dane jailla rafue

<sup>36</sup>Diga irui illa mei, Pablo Bernabémo llote: p —Naga navui coco llua nairaimo creyentiai dine abido mai coco jai. Cai Nama ie mare rafuena dane lloitcoco. Nie isoi naimaci illana jibuiticoco.

<sup>37</sup>Bernabédi, naie iaimaiai diga, Juan Marcos uiacade. <sup>38</sup>Panfiliamo iaimaiaina navui Juan fainonocaide. Iaimaiai diga llofuelleña jaiñena jira, Pablo naimiena dane uiacaiñede. <sup>39</sup>Riire ñaitiaiamaiai. Comecina daje isoi lloñediiamaiai. Ie jira dajena jaiñediiamaiai. Bernabé Juan Marcona uillanona, Chipremo aillue botedo jaidiaiamaiai. <sup>40</sup>Ie mei Pablo Silana uite. “Jusiñamui omicona canoite” creyentiai dinena raillanona, iaimaiaina oredimaci. <sup>41</sup>Siria railla eniruemo Jesús rafuena llocana jaidiaiamaiai. Cilicia railla eniruemo jiai llocana jaidiaiamaiai. Creyentiai comeciaina ocuiñotacana jaidiaiamaiai.

#### Timoteo iaimaiai diga jailla rafue

**16** <sup>1</sup>Nano Derbemo Pablo, iaimaiai Silas diga, ridiaiamaiai. Lemona Listramo ridiaiamaiai. Nainomo Timoteo

railla creyente ite. Naimie eidi judía iñaiño. Jiai creyente. Ie moo micoridi griego imie. <sup>2</sup>Listramo ite creyentiai, Iconiomo ite creyentiai diga, naimien: “Mare” raitimaci. <sup>3</sup>Pablodi Timoteona uiacade, naimie diga jaillena. Timoteo moo micori griego imieno jira, naimie abina nia detatañede; iadedi nainomo ite judúuai illa jira, Moisés micori llua isoi, Pablo Timoteo ie abina dete. Judíuñedimie naimaci motomo ia, naimaci motomo inide. <sup>4</sup>Naga nairaimo naimaci jaillanona, Jerusalémo siadogacina creyentiaimo llote. Jerusalémo Cristo oretagano, creyentiaina sedaraini diga, navui naicinona siadotimaci. Creyentiai naie lluana iñollena, iena llocana jaidimaci. <sup>5</sup>Ie jira creyentiai iñocana jaidimaci. Nagarui ailluena comini creyentiaina jaidimaci.

#### Pablo nicaírilla ra isoídena ciua rafue

<sup>6</sup>Jusiñamui Joreño Asia railla eniruemo ie uaina naimaci llofuanra rairuilla jira, Frigia railla eniruemo macaricana jaidimaci. Lemona Galaciamo jaidimaci. <sup>7</sup>Misiamon naimaci rillano, Bitiniamo jaiacade; iadedi Jesús Joreño dane imaci jaillana rairuide. <sup>8</sup>Ie jira Misiamona ecido jaillano, Troas railla nairaimo jaidimaci. <sup>9</sup>Nainomo naie naiona Pablo nicaírilla ra isoídena ciode. Daje Macedonia imiedi uicomona naidaita naimiemo jica-jicanode. Raite: “Macedoniamon ruica o bi. Caina canuaibi”. <sup>10</sup>Naiena Pablo ciua mei, naie facaisemona Pablo diga jaidicue. Lucadicue. Ie jira bie rafuena raise uiñoticue, iena omo cuellena. Macedoniamon ruica dñe cai jaillé botena jenodacai. Comecina facadicai: “Jusiñamudi caña uaidote, nainomo ie mare rafuena cai llollena”.

### Filipomo illa rafue

<sup>11</sup>Ie jira Troamona Samotraciamo monaillaido atona ie mamedo jaídicai. Ie icoitidiruido Neápolis railla nairaimo ridicai. <sup>12</sup>Dinomona Filipomo duide naisodo jaídicai. Macedoniamo ite. Naie enirue facaise ie nanoca nairai Filips. Naie nairaidi Romamona bitino nairai. Diga irui nainomo iticai. <sup>13</sup>Sábdadoruido naie nairaimona nasedo jino jaídicai. Comecina facajamona: “Dinomo nibai comini oficabidimaci, Jusiñamuimo jiíllena”, ille fuemo jaídicai. Nainomo dañaiñorie riñoniai billanona, dinomo ana raidicai, naiñaiñuaimo Cristo rafuena llollena. <sup>14</sup>Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai iñaiño. Naiñaiñodi jiduirede iniruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie lluana feiñotade. Naie facaise creyentena jaide. <sup>15</sup>Naiñaiño ie jofomo itino diga bautizaja mei, caimo llote:

—Cuedi cai Namana cue jai iñuuna omoi uiñuamona, cue jofomo mai bi, nainomo omoi fiebillesa. —Duere caina uai-uaidode.

<sup>16</sup>Jusiñamuimo jiíranomo jiaíruido jaídicaimo, daje jitaiñomo dafaifidicai. Naiñaiñodi jiainomona ibacañaíño. Janaba anamo naiñaiño jiai ite. Lemona naiñaiño jiaíruido suille rafuena llouide. Naie rafuena lluana ibatajano, naiñaiño namaiaidi ailluena ucubena feiñoidimaci. <sup>17</sup>Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoimo llocabitimaci.

<sup>18</sup>Diga irui naiñaiñodi iese cuiri-cuirisoide. Icirillamona, Pablo

abido dobaidacaida, naiñaiñomo ite Janabamo llote:

—Cue Nama Jesucristo uaido naiñaiñomona oni jai. —Iemonia oni jaide.

<sup>19</sup>Naiñaiño lluamona ucubena jai oñenana naiñaiño namaiai jai uiñua jira, Pablo, iaimaiai Silas diga, gaitadimaci. Iaimaiaina plazamo illaicominí illanomo sonocana uitimaci. <sup>20</sup>Dinomo iaimaiaina illaicominí dine atidimaci. Iese iaimaiaina llogidotimaci:

—Naie iaimaiaidi cai nairaina uri itatañedidiaimaiai. Iaimaiai judíuai comini. <sup>21</sup>Romanuai cominina cai illa jira, iaimaiai llogacinuaina cai iñoina, iedo cai jaia, maraiñede.

<sup>22</sup>Iena cacajano, nana comini naie iaimaiaina fanaisitimaci. Illaicominidi naie iaimaiai iniroina cuaranuanona duiñode. Rasi diga, iaimaiaina diga icaiño fatatativaci. <sup>23</sup>Iaimaiaina eo faja mei, cárcelmo jonetimaci. Cárcelna sedaraimamo iaimaiaina raise sedallena llotimaci. <sup>24</sup>Iese llua jira, iaimaiaina llaveracomo fo iaimaiaina uite. Donoram oaimaiai eilliai ñuitajano, raise donode.

<sup>25</sup>Naiona daferui facai Pablo, iaimaiai Silas diga, Jusiñamuimo ifuerillacina ro-rodiiamaiai. Jiai jiidiamaiai. Jiaie llavecano naiena cacadimaci. <sup>26</sup>Jamai ebena illacnomona ñuisañodi suide. Cárcel illanodi jaidisite. Naie facaiseconi nana nasiaidi ecocorinaite. Ie dacaiño nana llavecano imaci donua radi oni ecoride. <sup>27</sup>Cárcelna sedaraima casidemo, cárcel ie nasiai ecocorinaillana ciode. “Llavecano jai aisdimaci” raillamo naimie comecina facade. Ie jira ie lloesi aiñocaida, dama abi faitaacade. “Illaicominí bia, ¿bue lloitice?” raillamona comecina facade; <sup>28</sup>iadedi Pablodi eo riire cuirioide:

—¡O abina dama meineñeno! Bene nana iticaisa.

<sup>29</sup>Lamparína atillena cárcelna sedaraima jicajanona, jarire fo jaide, Pablo iaimaiai Silas dine. Jacinaillano, naimie abidi docaillamona, iaimaiai uicomodo caifiñi ifodo ana rainadate.

<sup>30</sup>Iaimaiaina jino ua mei, nai iaimaiaimo jicanote:

—¿Buena finojiticue, cue jeacynomona cue jilloilla?

<sup>31</sup>Uai otiiaimaiai:

—Coco Nama Jesúna iino. Iese na o jofomo ite comini diga o jilloillesa.

<sup>32</sup>Iemei naimiena Jesús ie rafuena llofuetiiaimaiai, nana ie jofomo itino diga. <sup>33</sup>Naie facaise iaimaiai bofellañona jocode. Iemei naimiedi, nana ie comini diga, bautizaga.

<sup>34</sup>Guillena, ie jofomo naie iaimaiaina uite. Jusiñamuina jai iinua jira, na ie comini diga, naimie caimare ite.

<sup>35</sup>Le oni monaidemo, illaicominidi dajerie policiana cárcelmo oretatimaci, nai iaimaiaina jino orellena. <sup>36</sup>Cárcel sedaraimadi naie rafuena Pablomo llote. Raite:

—Ómico jaillena, illaicominidi omicona oredimaci. Mai marena jai.

<sup>37</sup>Iadedi policíamo Pablodi llote:

—Cocodi romanuai cominidicoco; iadedi cocomo ite rafuena raise uiñoñeno cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bi”.

<sup>38</sup>Illaicomínimo policías naiena lluaibitemo, illaicominidi naiena cacajanona, eo jacinaite, romanuai cominina iaimaiaina jira. Cai nanoca illaicominidi romanuai nairai cominina jamai ebena duere finuana rairuidimaci. <sup>39</sup>Le jira naie iaimaiai dine illaicominidi jaidimaci, iaimaiaina: “Dama dino isedes” raillena. Jino atia mei, nairaimona jino iaimaiai jaillena

oredimaci. <sup>40</sup>Cárcelmona jino billano, Lidia jofomo fo jaidiiaimaiai. Creyentiaina ciuano, naimaci comeciaina ocuiñotallena, naimacina dane llofuetiiaimaiai. Le mei oni jaidiiaimaiai.

Pablo, iaimaiai Silas diga,  
Tosalónicamo illa rafue

**17** <sup>1</sup>Anfípolis railla nairaimo macaritiiamaiai. Apolonia railla nairaimo macaritiiamaiai. Le mei Tosalónica railla nairaimo ridiiaimaiai. Dinomo judíuái ofiracodi ite. <sup>2</sup>Pablo fibilla isoi, nainomo fo jaide. Daje amani sáboruimo Jusiñamuina cuegafuiaimona naimacina llofueete.

<sup>3</sup>Iese naimacina llofueete:

—Cristo illegi cacaite. Fiodaillamona naimie jilloite. Naimiedi Jesús. <sup>4</sup>Naiena cacadinomona ailluena iinotimaci. Pablo, Silas iaimaiai dibeimo jaidimaci. Jusiñamuina iinote grieguaimona ailluena comini creyentiaina jaidimaci. Le emodoconi ailluena nanocañaiñuaidi creyentiaina jiai jaidimaci; <sup>5</sup>iadedi judíuaidi uradoillano, jamai itinomona eo maraiñede iiniaina uaiduanona, ailluena cominina ofitativaci. Le jira naie nairai uri iñedimaci. Iaimaiaina comini uicomodo uillena, Jasón jofomo binaisite. <sup>6</sup>Iaimaiaina baiñenano, Jesóna, jiae creyentiai diga, illaicominí illanomo aiñocaida uitimaci. Cuiriisite:

—Naga nairaimo cominina uri itatañediiamaiai. Benomo jai bitiijamaiai. Jai benomo billanona, Jasón ie jofomo iaimaiaina feiñote. <sup>7</sup>Cai nanoca illaima ie llogacinona jai iñoñedimaci. Le anamo jai iacaiñedimaci. Raitimaci: “Jiae illaima anamo iticai. Jesús raillamie anamo iticai”.

<sup>8</sup>Judíuái iese lluamona, cominidi uri iñedimaci. Illaicominidi jiai uri

iñedimaci. <sup>9</sup>“Naie iaimaiai dane biñeitíaimaiai” illaicomínimo creyentiai raillano, illaicominidí Jasón jiae creyentiai diga, jino oretatimaci.

**Bereamo Pablo, iaimaiai  
Silas diga, illa rafue**

<sup>10</sup>Naie naio creyentiaidi Pablona, iaimaiai Silas diga, Bereamo raire oretatimaci. Dinomo rillano, judíuai ofiracomo jaidiiaimaiai. <sup>11</sup>Nainomo ite judíuai eo mare. Tesalónicamo ite judíuai isoñedimaci. Bereamo itinodi Cristo rafuena iocire feñotimaci. Niedi uanaicinoni raillanona, nagarui Jusiñamuina cuegafuiaina facadimaci. <sup>12</sup>Ie jira naimacimona ailluena iiñotimaci. Judíuaindemonona ailluena nanocañaiñuai iiñotimaci. Ailluena iiñiai jiae iiñotimaci; <sup>13</sup>iadedi Bereamo Pablo Jusiñamui ie uaina jai lluana Tesalónicamo ite judíuaidi fidiano, dinomo jaidimaci. Cominina fuemo faillena, jaidimaci. <sup>14</sup>Naie facaise creyentiaidi Pablona oni oretatimaci. Monaillai fuemo duide naisonra oretatimaci. Silas, iaimaiai Timoteo diga, fiebibidíaimaiai. <sup>15</sup>Pablo uigamaci naimie diga Atenamo jaidimaci. Dane abido Bereamo jaidimacimo, naimacimo Pablo llote:

—“Silas, iaimaiai Timoteo diga, raire cue dine billesa” llono.

**Atenamo Pablo illa rafue**

<sup>16</sup>Atenamo iaimaiai rillena Pablo sedademo, naie nairaimo ailluena jiraraiaina ciode. Iena cianona, Pablo comecidi jeareficaide. <sup>17</sup>Naiena ciua mei, judíuai ofiracomo judíuai diga coniniri Jusiñamui rafuena siadote. Jusiñamuina jai iiñote judíuaindino diga coniniri iena jiae siadote. Plazamo nagarui jamai itino diga coniniri iena jiae siadote. <sup>18</sup>Jamai comecinia

facadimonona damierie naimie diga jiae ñaitimaci. Epicúreo railla rafuedo jaisoidimaci. Estoico railla rafuedo jiae jaisoidimaci. Damierie naimacimona raitimaci:

—¿Buena nai ñaillareuidimie caimo lloiacade?

Jiaino raite:

—Jiae náraí jusiñamuillaicaimo lloiacade isoide.

Jesús fiodaillamona jilluana Pablodi llouilla jira, iese raitimaci. <sup>19</sup>Ie jira naimieno naimaci siadouillanomo uitimaci. Naie illano Areópagona mamecirede. Jicanotimaci:

—¿Nie isoide o comocinui? Caimo llono, cai uiñollena. <sup>20</sup>Eo feiredicinuaina cacadicai. ¿Buena nai llofuiacindri llote? Iena uiñoiacadicai.

<sup>21</sup>Nana Atenamo ite comini, jiae illanomona bitino diga, jamai ailli como imaci fidia rafuena ñai-ñaidimaci. Jamai ailli fidia rafuena caca-cacadimaci. Jiae rafuena finoñedimaci.

<sup>22</sup>Jicanua mei, Areópago raiilla illanomo Pablo naidacaida llote:

—Atenas imaci, omoimo rafuena lloiacadice. Omoi jusiñamuillaína eo sedacabidomo. <sup>23</sup>Cue macarillamona, omoi jusiñamuillaína sedaja jiraraina ciódice. Daje jiraraí abimo iese cuega: “Uiñoñega Jusiñamuina sedadical” cuega. Uiñoñeno naimieno sedadomo. Ja omoimo naimieno lloitice.

<sup>24</sup>Jusiñamui biniena jaie finode. Ie emodoconi Jusiñamuidi nana biniemo itinona jiae finode. Naimiedi mona ie Nama. Enirue ie Nama. Ie jira iima finoca jofomo naimie iñede. <sup>25</sup>Naga jitaille rana naimieno illa jira, naimieno canonidicai. Naimie nana cominina comuitate. Jiae nagarui jafaici cai uadi caimo iga. Uanai nana rana caimo iga. <sup>26</sup>Damiedemona nana cominina jebuitate, nana eniruemo

naimaci illena. Naimaci illa dinori naimie jonega. Naimaci illanomo naimie jiai jonega.<sup>27</sup> Iese jonega, naimaci naimiena jenollena. Jenuano, nibai naimiena baitimaci. Caimona naimie are iñede.<sup>28</sup> Naimie jaca illa jira, cai jiai iticai. Jiai cajedicai. Ie isoi omoi rafue lloraini jiai illoñimaci: “Naimie ie uruaidicai”.

<sup>29</sup> Naimie caina comuitaja jira, Jusiñamuidi jiraraí isoiñedena uiñoticai. Jusiñamuidi oromona finoca ra isoiñede. Platamona finoca ra isoiñede. Noficimona finoca ra isoiñede. Hima ie onollí diga finoca ra isoiñede.  
<sup>30</sup> Cominidi abi uiñoñeno jeacino jaie finouidimaci. Jusiñamui naimacina nia janafeñede; iadedi jai birui Jusiñamuidi nana cominina naga illanomo naimaci comeaciai iuai meidlenna jitaide.  
<sup>31</sup> Naimaci comeaciai iuai naimaci meidoñenia, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúna naimie jai jilloitaja jira, iena uiñoticai.

<sup>32</sup> Fiodaillamona Jesús jilluana cacajano, damerie jaitsimaci. Ieconi jiañinodi raite:

—Jiairuido o lluana dane cacajitcai.

<sup>33</sup> Iemei naimaci motomona Pablo jino jaide. <sup>34</sup> Naie cominimona damerie naimie dibeimo jaidimaci. Hnotimaci. Naimacimona damie Areópagomo siadouidimie. Ie mamecidi Dionisio. Jiañaiño iñote. Naiñaiño mamecidi Dámaris. Daje facaiseconi jiaie cominidi iñotimaci.

### Corintomo Pablo illa rafue

**18** <sup>1</sup>Atenamona Corinto railla nairaimo Pablodi jaide.  
<sup>2</sup>Nainomo Aquila raillamienra balsaida.

Naimiedi judío imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiiaimaiai. Romamona Claudio nana judiuai cominina jai oretate. Ie jirari bitiiaimaiai. Roma ie nanoca illaimadi Claudio. <sup>3</sup>Pablo iaimaiai daje isoi maijia jira, Pablo iaimaiai jofomo fiebide. Iaimaiai conima diga maijide. Chivos itiraiai ie nilla iniroina tiforisoidimaci, naiemona jofona finollena. <sup>4</sup>Naga sábadoruimo judiuai ofiracomo llofueté, judiuaina iñotallena, judiuaiñedinona iena jiai iñotallena. <sup>5</sup>Macedoniamona Silas, iaimaiai Timoteo diga, bitemo, Pablodi nagarui Jusiñamui uaina llofuevide. Judiuaimo: “Jesúdi cai Jilloitaraima” llouide; <sup>6</sup>ia naimie uaina iñosiñedimaci. Jiai naimie jinafomo jeare ñaitimaci. Naimaci comeaciai jeare ciua jira, Pablo ie iniroina jaidinote, naimacina raillano:

—Dani omoi muidona Jusiñamui omoina duere finojite. Cue muidonañeite. Jai judiuaiñedino dine jaiticue, naimacina cue llofuellena.

<sup>7</sup>Iese raillano, oni jaide. Justo jofomo jaide. Naimiedi Jusiñamuiña iñouidimie. Ie jofo judiuai ofiraco ecimo ite. <sup>8</sup>Crispodi, nana ie jofomo itino diga, cai Nama Cristona iñote. Naimiedi judiuai ofiraco ie sedaraima. Ailluena Corintomo ite comini creyentiaina jaidimaci. Ie mei naimacidi bautizaga. <sup>9</sup>Daje naiona Pablo nicairilla isoidemona, Pablomo cai Nama Jesucristodi llote:

—Mai jaciruiñeno. Faicaiñeno cue rafuena llocana jai. <sup>10</sup>O diga iiticue. Budi ona maraiñeno finoñeite. Bie nairaimo ailluena cominidi cue dibeimo jaitimaci.

<sup>11</sup>Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

<sup>12</sup>Corinto railla nairaidi Acaya railla eniruemo jainaiaide. Naie facaise Acaya ie gobernadordi Galión. Naie facaiseconi damierie judíuai comini Pablona faiacadimaci. Galión dine naimiena uitimaci. <sup>13</sup>Raitimaci:

—Cai illaima llogacino isoi bimiedi cominina Jusiñamuina sedallena llafueñede.

<sup>14</sup>Pablo uai oiacademo, judíuaimo Galióndi llote:

—Judíuai, cacarei. Naimie maraiñede rafuena finodena, naimie omoina jifuetena, omoi lluamo nia cacarefidicue; <sup>15</sup>iadedi jamai naimie uaillai cuemo llotomoi. Omoi usumatai micoriai mameciai cuemo jiai llotomoi. Omoi einamací llogacinaua cuemo jiai llotomoi. Iena omoi coniniri siadotomo. Bie isoide rafuena siadoiacaiñedice.

<sup>16</sup>Iemona naimiedi nainomona naimacina oni orede. <sup>17</sup>Le mei Sóstenera gaitadimaci. Sóstenera ofiraco ie sedaraima. Naimiena gobernador uicomodo fanaisite; ia naifuena Galión niese nibaiñede.

#### Antioquíamo Pablo abido jailla rafue

<sup>18</sup>Naifue suilla mei, nainomo Pablo are fiebide. Le mei creyentiaina facaduano, Priscila iaimaiai Aquila diga, Siria railla eniruemo botedo jaide. Le uai raise finuana uiñollena, Moisés micori llua isoi, Cencreamo rillano, ie ifogina rijiruda garetate. <sup>19</sup>Efesomo rillanona, iaimaiaina fainonocaide. Judíuai comini Jusiñamui rafuena siadollena, Pablodi judíuai ofiracomo fo jaide. <sup>20</sup>Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeiticue— <sup>21</sup>Naimacina facaduano, llote—. Jerusalémo jaiticue; iadedi Jusiñamui jitaia, dane omoi dine

abido riiticue. —Iemei Efesomona jaide.

<sup>22</sup>Cesareamo sijiano, Jerusalémo macarite. Creyentiai dine jaide. Le mei Antioquíamo jiai macarite.

<sup>23</sup>Nainomo are fiebilla mei, Pablo dane jaide. Galaciamo macarite. Le mei Frigiamo macarite. Nana creyentiai imaci comeciaina ocuiñotacana jaide.

#### Apolos illa rafue

<sup>24</sup>Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie. Naimiedi Jusiñamui facaina lloraini micoriai cuegafuiai raise uiñote.

<sup>25</sup>Naimiedi Jesús ie rafuena navui jai cascade. Le comecimona iena eo llote. Jesús rafuena raise llofuetete; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuna jiai uiñoñede. <sup>26</sup>Judíuai ofiracomo naimie llofua, jacitaiñeno llofuetete. Priscila, iaimaiai Aquila diga, naiena cacadiiaimai. Le jira naimiena oni eneno uitiiaimai. Le uiñoñega rafuena eo raise naimiena llofuetiiaimai.

<sup>27</sup>Acayamo Apolodi jaiacana jira, creyentiaidi naimie comecinha ocuiñotajano, naimiena oresite. Acayamo ite creyentiaimo rabemo cuetimaci. Jusifínamui naimacina dueruilla jira, creyentiaina jai jaidimaci. Naimiena marena feiñollena iesen cuetimaci. Nainomo naimie rillanona, creyentiaina eo canode. <sup>28</sup>Judíuai diga marefodo jiai eo ñaite. Iemona naimaci uai ollinodi iñede. Naimiedi Jusiñamui cuegafuaimona Jesúdi cai Jilloitaramana llofuetete.

#### Efesomo Pablo illa rafue

**19** <sup>1</sup>Corintomo Apolo nia itemo, nairaiiai onifedo joide naido jailla mei, Pablo Efesomo ride. Dinomo

rillanona, creyentiaina baite.

<sup>2</sup>Naimacimo jicanote:

—¿Cristona omoi iinuaruimo Jusiñamui Joreñona feiñotomo?

Uai otimaci:

—Jusiñamui Joreñona nia jaca cacaiñedaci.

<sup>3</sup>Dane jicanote:

—¿Nie isoi omoi bautizagaomoi?

Uai otimaci:

—Juan micori lloga rafue facaina bautizagacai.

<sup>4</sup>Pablo uai ote:

—Mare. Juan llote: “Omoi comeciai iuaina meido. Iemei bautizallomoi”. Ie ifo meidoitimienna comini iinollena llote. Jesúna iinollena llote. Jesú rafuena omoímo raise lloitice.

<sup>5</sup>Iena cacajano, cai Nama Jesús dibeido bautizadimaci. <sup>6</sup>Naimacimo Pablo ie onollina joniamona, Jusiñamui Joreñona feiñotimaci. Ie mei naimaci uiñoñega naíraí uaido ñaitimaci. Jusiñamui Joreño naimacimo llua rafuena jiai llotimaci. <sup>7</sup>Nibai nana naimacidi doce iiñiai.

<sup>8</sup>Sábadoruimo judíuái ofiracomo fo jaillano, naimie anamo naimaci illana Jusiñamui jitaila jira, Jusiñamui dibeimo naimaci comeiciai iuaina meiduana Pablodi jacitaiñeno eo llouide. Nainomo daje amani fivui fiebide. <sup>9</sup>Naimacimona jiainodi Pablo uaina uaitatimaci. Jiai iiñoiacaiñedimaci. Naimaci iiñóñena ira, ofiracomo bitinomo: “Cristo rafuedi maraiñede” llouidimaci. Ie jira Pablodi creyentiai diga naimacimona eneno oni jaide. Tiranno ie lloracomo nagarui Pablodi llofueuide. <sup>10</sup>Mena fiemona iese llofueuide. Ie jira diga Asia railla eniruemo ite cominidi cai Nama ie uaina cacadimaci. Judíuái cacadimaci.

Judíuáiñedino jiai cacadimaci.

<sup>11</sup>Jusiñamuidi Pablona siño rafuena finotate. <sup>12</sup>Duidinomo cominidi naimie

jetaca pañueluaina uitimaci. Duidinomo naimie jetaca iniroina jiai uitimaci.

Naiena jetajamona, duidinodi jillodimaci. Janaba anamo itinodi jiai jillodimaci. <sup>13</sup>Naie facaise jamai macarisoidino ridimaci. Judíuái imaci. Naimacidi icoriraini. Jesús mameci llinuano, jananiai anamo itinomona jananiaina oni oreatacadimaci. Jananiaimo raitimaci:

—Pablo llua isoi, Jesús muidona bimacimona oni jai.

<sup>14</sup>Esceva ie siete jitotiaidi iese finoacadimaci. Escevadi Jusiñamui diga ñairaima. <sup>15</sup>Janabana oni oreatacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoína uiñoñedicue.

<sup>16</sup>Leconi Janaba anamo itimie naimaci emodomio daiacaide. Riire nana naimacina emodoficaide. Ie jira naie jofomona taimiñaina jino aisidimaci. Naimacidi bofellaiai diga jino aisidimaci.

<sup>17</sup>Nana Efesomo itino iena fididimaci. Judíuái, judíuáiñedino diga, naifuena fididimaci. Naifuena fidianona, eo jacinaitimaci. Iemonia cai Nama Jesús mamecidi are soride. Comini dinena: “Jesús uai eo siño” raitimaci. <sup>18</sup>Ie jira ailluena creyentiaidi billano, imaci navui maraiñede finoca rafuena Jusiñamuimo llotimaci. Icorilla rafuena finoidimaci. Iena marefodo llotimaci.

<sup>19</sup>Ailluena icorilla rafuiai illabiai atianona, marefodo jobaidimaci. Niga raifi rabiai jobaillana facadimaci. Cincuenta mil ucube diese facai rabiaina jobaidimaci. <sup>20</sup>Cai Nama Jesús uaina eo llocana jaide. Cominidi naie uai siñonana uiñotimaci.

<sup>21</sup>Naie rafue illa mei, Pablodi comecina facajano raite: “Macedoniamo cue macarillamona, Acayamo cue jiai

macarillamona, Jerusalémo riacadicue". Ie emodoconi naimiedi raite:  
"Nainomona Romamo jiai jaiacadicue".  
<sup>22</sup>Naimie nia Asiamo nano nigarui illanona, mena canoraimana Macedoniam oretate. Timoteona, iaimaiai Erasto diga, oretate.

**Efesomo ite comini maraiñede  
rafue finoacadimaci**

<sup>23</sup>Naie facaiseconi Pablo nia oni jaienia, Jesucristo rafue muidona Efesomo ite cominidi maraiñede rafuena comuitatimaci. <sup>24</sup>Demetrio raillamie platamona diga rana finouide. Naimiedi Diana ie jofo joreñuaina finouide. Naimie anamo ailluena maijiiuidimaci. Dianadi naimaci jusiñamui. <sup>25</sup>Naimie isoi maijiiuidinona Demetrio uaidote, nana naimaci danomo ofillena. Ie mei raite:

—Jai danomo ofidicai. Bie majjiamona cai ucubena uana raise uiñotomo; <sup>26</sup>iadedi Pablo raillamiedi diga cominina jai llofuite: "Comini finoca raniaidi jusiñamuillaiñede". Naie llofuiamona ailluena comini naimie dibeimo jaidimaci. Dama Efesomo iese suiñede; iadedi ua nana Asiamo iese suide. <sup>27</sup>Ie jira abina rairuacadicai, cai maijille faifi raillano, comini Diana jofona jiai sofei raillanona. Cominidi naiñaiñona ebiruillana feitaitimaci. Naiñaiñori raijicaiñeitimaci. Dianadi eo ebirede jusiñamui. Nana Asiamo ite comini naiñaiñona sedacabidimaci. Uanai nana bie eniruemo ite nairaidi naiñaiñona sedacabidimaci. Ie jira abina rairuacadicai.

<sup>28</sup>Iena cacajano, eo iciritimaci. Riire cuiriidimaci:

—Efeso ie Diana eo ebirede!

<sup>29</sup>Danirie siaduamona, nana comini eo failiñaidimaci. Iemo nana comini dajena naimaci ofiracomo fo raire

jaisite. Gayona, iaimaiai Aristarco diga, gaitajano uitimaci. Naie iaimaiaidi Pablo ie nabai iaimaiai. Iaimaiai comuillanodí Macedonia. <sup>30</sup>Pablo ofiracomo jiai fo jaiacade; iadedi creyentiaidi naimie fo jaillana rairuidimaci. <sup>31</sup>Illaicomiminoma damierie nabaiñiai naimiemo fo jaillana jiai rairuidimaci. <sup>32</sup>Fo itinomona damierie daje rafuena ebena cuiriidimaci. Jiaino jiaifuena ebena cuiriidimaci. Eo failiñaidimaci; ie iadedi bue ñellena naimaci ofillana raise uiñonédimaci. <sup>33</sup>Comini motomona judíuai dinena damie uicom oredimaci. Ie mamecidí Alejandro. Cominina lliicaitallena, ie onoll jaidianona, cominimo lloiacade; <sup>34</sup>iadedi naimie judío imiena naimaci uiñuanona, nana daacaiño cuiriidimaci. Mena horas raifi cuiri-cuiriidimaci:

—Efeso ie Diana eo ebirede!

<sup>35</sup>Iemei naie nairaí rabe cueraimadi cominina lliicaitatate. Naimaci lliicaila meinocomi, naimie lluacinona acadimaci. Raite:

—Cacare! Cai nairaidí Dianana sedacabidicai. Naiñaiño ebirediñaiño. Naiñaiñona eruaide jiraraidí monamona jaie uaide. Iena jiai sedacabidicai. Nana bie eniruemo ite comini iena uiñotimaci. Bu naiena uiñonédimieno jaca iñede. <sup>36</sup>Bu cue lluana jaca uaitañeite. Ie jira omoi lliicai. Comeciai facañeno buena finoñeno. <sup>37</sup>Bue ñellena Gayo iaimaiai Aristarco diga, benomo atidomoi? Iaimaiaidi cai jusiñamui joreñona ñaiñediiaimaiai. Naiñaiñona jeare finofiediaimaiai.

<sup>38</sup>Demetrio, ie maijiraini diga, iaimaiaina llogidoiacania, cominina llogidoraco ite. Diga jueces jiai ite. Coniniri nainomo iena siado; <sup>39</sup>iadedi jiai nicino omoimo ia, cai illaicomini ofia, biena siaduano, caimo lloitimaci.

<sup>40</sup>Birui bie rafue cai finua jira, illaicomini nibai caina duere finoitimaci. ¿Niese cai nibaille? Illaicomini caimo biena jicanoria, ¿niese raiticai?

<sup>41</sup>Naie llua mei, ofidinona jino orede. Iemei jai jono tuudimaci.

Macedoniamo Pablo  
dane jailla rafue

**20** <sup>1</sup>Efesomo ite rafue suilla mei, Pablodi creyentiaina uaidote. Naimaci comeciaina ocuiñotafuena llole. Iemei naimacina naimie facaduano, Macedonia railla eniruemo jaide. <sup>2</sup>Nainomo ite naíraíaimo macarite. Comecina ocuiñotallena, naimacina llofuecana jaide. Iese Macedonia mona Grecia railla eniruemo risaide. <sup>3</sup>Nainomo daje amani fivui illa mei, Siriamon botedo abido jaiacadé; iadedi judíuaidi naimieno meineiacanana Pablo fidiano, Macedonia abido macarite. <sup>4</sup>Jiaño naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaimaiai Segundo diga, jaide. Tesalónica nairai imie iaimaiai. Gayo naimie diga jiai jaide. Gayodi Derbe nairai imie. Timoteo naimie diga jiai jaide. Tíquico, iaimaiai Trófimo diga, jiai jaidiiaimaiai. Asia imie iaimaiai. <sup>5</sup>Coco uicodo naimaci jaillano, Troamo cocona sedadimaci. <sup>6</sup>Llomenico guillaruillai railla rafue fuilla mei, Filipomona jaidicoco. Monaillaido dabecuirorui coco jailla mei, Troamo naimaci diga dane danomo dafaifidicoco. Nainomo siete digarui fiebidicoco.

Troamo Pablo illa rafue

<sup>7</sup>Domingoruimo Jesús fiodaillana comecillena, danomo ofidicaimo, Pablodi caina llofuetete. Icoiti naimie

jaiacana jira, Pablo are ñaite. Naiona jitoma daferui illa facai nia ñaite. <sup>8</sup>Cai ofillanomo ailluena lamparíniai ite.

<sup>9</sup>Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai.

Nainomona eniruemo naimiedi uaide. Ana jibuisaibidemo, naimieno meniñocaidemo, naimie jai fiodaillana ciódimaci. <sup>10</sup>Ie jira Pablo ana jaide. Naimie emodomo jítadacaída, naimieno meniñote. Cominimo llole:

—Omoi rucaicueriñeno. Naimie cajede. Jafaicina nia faite.

<sup>11</sup>Abido a jaidimaci. Jesús fiodaillana comecillena, llomenicona tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide. <sup>12</sup>Nainomona conirue jai cajede uitimaci. Ie jira nana naimaci naimieri eo iobidimaci.

Miletó railla nairaimo  
Pablo jailla rafue

<sup>13</sup>Pablodi Troamona Asón railla nairaimo arido jaiacana jira, botedo jaidicai. Iese uicomó Asónmo jaidicai. Nainomona Pablona botedo uiacadai.

<sup>14</sup>Ie jira Asónmo naimieno cai baillanona, cai diga botemo bite. Ie mei Mitilene railla nairaimo jaidicai.

<sup>15</sup>Nainomona dane monaillaido cai jaillano, ie areruido Quío railla nairaimo ruicafellemo jaidicai. Dane ie areruido Samos railla nairai mamedo atona jaidicai. Ie areruido dane cai jaillano, Miletomo sijidicai. <sup>16</sup>Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. Asia railla

eniruemo naimie are iacaiñena jira, Pablo comecina facade: “Efeso ecido monaillaido jaiticai”.

**Efesomo ite creyentiai sedarainimo  
Pablo llua rafue**

<sup>17</sup>Creyentiaina sedarainina uaidollena, Miletomona Efesomo Pablo cartana orede. <sup>18</sup>Naimie dine naimaci rillanona, Pablo naimacimo lloete:

—Asiamo nano cue rillaruimona, niese omoi diga nagarui cue illana uiñotomo. <sup>19</sup>Cai Nama diga abina iedoñeno majjiuidicue. Eecana sure majjidicue. Judíuai cuena duere uiñodosia jira, ie facaiseconi dueredicue. <sup>20</sup>Cuemo ite marcenonoma omoimo jaca janofiedicue. Nana Jusiñamui rafuena omoimo jai lloticue. Omoi ofillanomo omoina llofueuidicue. Omoi jofuemo omoina jiai llofueuidicue.

<sup>21</sup>Judíuaina llofueticue.

Judíuainedenona daje isoi llofueticue. Jusiñamui dibeimo omoi comeciai iuaina meiduana lloticue. Cai Nama Jesúna omoi iiwuana jiai lloticue.

<sup>22</sup>Jusiñamui Joreñodi cuena jai jaicaitaja jira, Jerusalémo birui jaiticue. Nainomo ramo cue jirille rafuena uiñoñedicue; <sup>23</sup>iadedi Jusiñamui Joreñ naga nairaimo cuemo lloete:

“Llaveracomo ona gaitajano ona jonesiite. Duere sefutio”. <sup>24</sup>Cue ille dinori are illemo comecina facañedicue. Dama cue ille dinori fuidoacadicue. Cai Nama Jesúmona cue feiñoga maijiana fuidoacadicue. Mare rafuena omoimo lloiacadicue. Jusiñamui omoina duenaillana jiai lloticue. <sup>25</sup>Jusiñamui anamo omoi illa rafuena omoimo jai lloticue. Jai dane cue uiecona cioñeñitomo. Iena uiñoticue. <sup>26-27</sup>Cue uaina jaca janofiedicue; ia nana Jusiñamui uai omoimo lloticue. Ie jira cuemonia omoi diga cue comeci mare.

Jusiñamui uaido omoi jaiñenia, cue muidonañeite. <sup>28</sup>Mai omoi abí rairui. Jusiñamui Joreñodi omoina creyentiaina sedatare. Naimacina raise seda. Jusiñamui dibeimo itinona llofue. Naimie Jito fiódilla muidona, naimacina ote, naimie iena. <sup>29</sup>Naimacidi toica llaudaiai isoidimaci. Nia abina raise uiñoñedimaci. Cue jailla meinoconi, taíno llorainidi, janallari isoi, omoimo biite. Naimaci nana omoi sedaca comínina ramo faite, danomo abido naimaci jaillena, jiconiai llaudaiai gaitaja isoi. <sup>30</sup>Omoimona uanañediginona llorainidi iite. Creyentiaina ramo faitimaci, omoi lluacinona fainonocaillena, naimaci dibeimo illena. <sup>31</sup>Ie jira abina rairui. Bie rafuena feitañeno. Daje amani fiemonia nana omoina jai llofueticue. Naiona omoina llofueticue. Aremona omoina jiai llofueticue. Omoina cue duenallamona, eianona omoina llofueticue. <sup>32</sup>Mai. Cai Nama illa anamo omoina fainonocaiticue. Naimie uaimona naimie omoina duenallana jai uiñotomo. Naie uaidi omoina jiai ocuñotaite. Iemonia Cristona iiñocana jaitomoi. Nana naimie fetocano diga naimie illanomo ico jaca iitomoi. <sup>33</sup>Jiaino ie ucubena jaca nicidoñedicue. Bu ie iniroyllaiana jaca jiai oiacañedicue. <sup>34</sup>Cue jitaille rana dama cue maijiano oticue. Cue diga jaidino imaci jitaille rana jiai dama cue maijiano oticue. Iena nana omoidi uiñotomo. <sup>35</sup>Iese cue illamona omoina llofueticue. Iese maijiano duerede cominina canocana jaiacadicai. Cai Nama Jesús ie llogacinona uiñoticai. Naimie raite: “Raruiaina cai feiñoia, iobidicai; iadeci cai eo iobiacionia, jiañomo raruiaina fecadicai”. <sup>36</sup>Naie llua meino, naimaci diga cañici ifodo rainadajano, Jusiñamuimo jiide. <sup>37</sup>Nana naimacidi eo

eedimaci. Pablona caimaduanona, naimiena llibanolimaci.<sup>38</sup>“Cuena dana cíoñeitomot” naimacimo llua jira, eo sunaitimaci. Ieconi naimie diga botemo jaidimaci.

### Jerusalémo Pablo jailla rafue

**21** <sup>1</sup>Naimacina cai facadua meinoconi, suiñodícaí. Cos railla nairaimo atona jaidicai. Ie are Rodas railla uiasimo ridicai. Iemei Pátara railla nairaimo ridicai. <sup>2</sup>Nainomo Fenicia railla eniruemo jaiacade botena baiticai. Nai botemo cai jailla mei, suiñodícaí. <sup>3</sup>Chipre railla uiasina cai ciojia, cai nabeí dibeimo ite. Iemei Siria railla eniruemo jaidicai. Tiro railla nairaimo sjidicai. Botedo uiga raruiaína nainomo joneacadimaci. <sup>4</sup>Tiromo ite creyentiaí cai baillanona, siete digarui naimaci diga iticai. Jerusalémo naimiena judíuau meineñellena, nainomo naimie jaiñellena, Jusiñamui Joreño naimacina Pablomo llotatate. <sup>5</sup>Digarui illa meinomo oni jaidicai. Naie nairaimona nana naimaci cai diga jaidimaci. Riñonai, naimaci uruiaí diga, jaidimaci. Caiñici ifodo monaillai fuemo ana rainadajano Jusiñamuimo jiidicai. <sup>6</sup>Naimaci facadua meinoconi, botemo jaidicai. Naimaci imaci jofuemo abido jaidimaci. <sup>7</sup>Tiromona Tolemaida railla nairaimo jaidicai. Creyentiaína uайдуано, darui naimaci diga iticai. <sup>8</sup>Ie are jaillano, Cesareamo cai ria, Felipe jofomo jaidicai. Felipedi Jesucristo ie rafuena lloraima. Jerusalémo diáconuaina creyentiaí jaie fetua facaise, Felipena fetodimaci. <sup>9</sup>Naimie dinomo fiebidicai. Naimiemo cuatro jisa ite. Naiñaiñuau nia iima abina uiñóñede. Jusiñamui naiñaiñuaimo lluacinona llocabitimaci.

<sup>10</sup>Digarui nainomo cai illamo Judeamona damie bite. Naimie mameci

Agabo. Jusiñamui facaina lloraima.

<sup>11</sup>Caimo ria, naimiedi Pablo cinturóna aiñode. Naie diga ie eillina maite. Ie onollina jiai maite raillano:

—Jusiñamui Joreño raite:

“Jerusalémo judíuau illaicomini bie cinturón jaínaode iimana daje isoi maitimaci. Judíuauñedínomo naimiena fecajitimaci” raite.

<sup>12</sup>Naiena cai cacajano, naie comini diga, Pablona caididícaí, naimie Jerusalémo jaiñellena. <sup>13</sup>Pablo uai ote:

—¿Bue fiellena eedomoi? ¿Bue fiellena cue comecina ocuiñotañedomoí? Cue maiana jaca jitaidicue. Ua cue fiodaillana jaca jiai jitaidicue. Cue Nama Jesús muidona cue fiodaiaidedi, damamai fiodaiticue.

<sup>14</sup>Cai lloga uai naimie iinoñena muidona, raiticai:

—Cai Nama jitaille rafuena finuana jitaidicai. —Iemei lliicaidicai.

<sup>15</sup>Nano nigarui illanona, cai raruiaína finuano, Jerusalémo jaidicai.

<sup>16</sup>Cesareamo ite creyentiaímona jiaino cai diga jaidimaci. Mnasón jofomo caina uitimaci. Naimiedi Chipre railla uiasi imie. Naimiedi nano bie rafue tainiamona creyente.

### Jacobo diga Pablo ñaia rafue

<sup>17</sup>Jerusalémo cai ria, creyentiaídi caina caimare uaidotimaci. <sup>18</sup>Ie are Pablo, cai diga, Jacobo díne jaide. Nana creyentiaína sedaraini nainomo jai ofidimaci. <sup>19</sup>Uaidua mei, Pablo nagaciuaido Jusiñamui judíuauñedínomo finoca rafuena llote:

—Cue llofuiamona ailluena judíuauñedino creyentiaína jaidimaci —llote.

<sup>20</sup>Naie rafuena cacajano, Jusiñamuimo iobillacínona fecadimaci. Iemei naimiemo llotimaci:

—Ama, ero, judíuaimona ailluena comini jai creyentiaína jaidimaci; ia nana

naimaci Moisés micori llogacinodo eo jaidimaci.<sup>21</sup> O finoca rafuena jai fididimaci. Ona comini ñaiana jai fididicai. Jiaie nairai motomo ite judíuaina Moisés micori llogacinona fainonocailana llofuetio. Naimaci uruiai abina deñenana llofuetio. Moisés micori llogacinuaido jaiñellena llofuetio.<sup>22</sup> Ie jira ¿niese nibaiitícai? O rillana jai fididimaci.<sup>23</sup> Ie jira omo cai lluana fino. Cai ecimo cuatro iima jai ite. Nie isoide rafuena Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena, Jusiñamui fecallena, toica ocainaiaina naimaci facaina iba. Naie rafue omoi fuiduanona, omoi ifogina rijiruda gareitomoi. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadicai.<sup>25</sup> Judíuaindino Moisés micori llogacinodo jaillena lloñeitícai. Naimacimona creyentiaina jaidinomo navui cueticai: “Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iñinede iima diga iñeno” cueticai.

<sup>26</sup>Pablo “Jee” raillanona, nai cuatro iima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui lollena. Jusiñamui nagamiai rana fecajaruina jiai llote. Siete digarui illanona, Moisés micori llua isoi, naie rafuena fuidoicadimaci.

#### Pablona gaitaja rafue

<sup>27</sup>Naie siete iruillai fuiacanaruillaímo Asiamona damierie judíuaidi bitimaci. Jusiñamui jofomo Pablona ciuano, comini comeciaina feidocana uitimaci. Pablona gaitajanona,<sup>28</sup> cuiiriadimaci:

—Caimaci, caina cano. Bimie naga illanomo llofuiamona, cominina raise

itatañede. Moisés micori llogacinuaido jaiñede. Bifona raise sedañede. Judíuaindino bifomo atiano, bie mare jofo naimie jai jeare finode.

<sup>29</sup>Iese ite: Jerusalémo Trófimo diga Pablona ciodomaci. Trófimodi Efeso nairai imie. Judíuñedimie. Pablo naimiena Jusiñamui jofomo uillamo comecin facadimaci; iadedi uiñede. Judíuai cominimona judíuñedimie Jusiñamui jofomo jaillana maraiñede.<sup>30</sup> Asiamona bitino cuiriillamona, nana Jerusalémo ite comini icirinайдimaci. Aisicana Jusiñamui jofomo jarire ofidimaci. Pablona gaitajanona, naifomoná naimiena jino sonodimaci. Ie mei Jusiñamui jofona sedaraini nasena ibaidimaci.<sup>31</sup> Pablona meineiacania, soldaduai ie comandantedi nana comini ieillana fidide.<sup>32</sup> Ieconi naimiedi, ie soldaduai diga, nana ie illaicomini diga, comini dine aisicana bitimaci. Ie jira cominidi naimacina ciuano, Pablona fajana fainonocaidimaci.<sup>33</sup> Comandante naimiemo iaireicaia, Pablona gaitade. Naimiena mena lloeo diga maillena llote. Jicanote:

—¿Bu naimiedi? ¿Bue ñete?

<sup>34</sup>Nana ieidinodi jiaforie llotimaci. Ie jira naie rafuena naimie jaca uiñoñede. Ie muidona cuatelmo naimiena uillena llote.

<sup>35</sup>Cuartel tidabacuimo naimaci ria, comini jarire jailla jira, soldaduai Pablona uitimaci.<sup>36</sup> Ailluena comini racadimaci. Ocuioisite:

—¡Naimiena meine!

#### Pablo ie abi riidua llua rafue

<sup>37</sup>Cuartelmo jaiacania, Pablo comandantemo llote:

—O diga ñaiacadie.

Raijicailamona, naimie uai ote:

—Griego uaido ñaitio—<sup>38</sup>Jiai llote—. Egipto imieñedio. Navui jobaime

finodio. Jofue iñenanomo, cuatro mil cominina meinetenina uitio.

<sup>39</sup>Pablo uai ote:

—Naimieñedicue. Judío imiedicue. Ciliciamo ite Tarso railla nairaimona biticue. Naie nairai mamecidi are soride. Cominimo cue llollena, omo jicanoiacadicue.

<sup>40</sup>—Jee —raite. Pablo tidabacui muidomo naidaide. Cominina lliicaitallena, ie onollina jaidide. Comini lliicaila mei, Pablo judíuai uaido naimacimo llote:

**22** <sup>1</sup>—Caimaci, einamaci, cue abi riiduacinomo mai omoi cacarei.

<sup>2</sup>Naimie judíuai uaido lluana naimaci cacajano, lliicaimaci. Ie jira Pablo llote:

<sup>3</sup>—Judío imiedicue. Ciliciamo ite Tarso railla nairaimo jeicigacue. Bene omoi nairaimo escuelamo jaidicue. Gamalielmona fueoticue. Moisés micori llogacinuaina eo raise facadicue. Jusiñamui rafuedo birui omoi isoi jaidicue. <sup>4</sup>Jesucristo iinotinona jaie eo duere finodicue. Diga creyentiaina maianona, cárcelmo jonetique. Hiñiaina duere finodicue. Riñoniaina jiai duere finodicue. <sup>5</sup>Jusiñamui diga nanoca ñairaima cuena uiñote. Nana omoi illaicominí cuena uiñotimaci. Creyentiaina duere finollena, naimacimona dajerie cartana jaie feiñoticue. Damascomo ite judíuaimo cuetimaci. Damascomo jaidicue, nainomo ite creyentiai maiano, Jerusalémo atianona, naimacina duere finollena.

**Pablodi Jesúna iinuana llua rafue**  
(Hch. 9.1-19; 26.12-18)

<sup>6</sup>Omoimo bie rafuena lloitice. Jerusalémona jaidicue; iadedi Damascomo cue iaireicaia, jitoma naidai iacania, ieconi monamona damie

cue abina eo quetiñote. <sup>7</sup>Eniruemo ana uайдicue. Monamona damie cuemo lluana cacadicue: “Saulo, Saulo, ¿bue ñellena cuena duere finodio?” <sup>8</sup>Jicanoticue: “¿Budio?” Monamona damie uai ote: “Nazaret ie Jesúdicue. Cuena duere finodio”. <sup>9</sup>Cue diga itinodi cue quetiñua rana cioldimaci; iadedi cue diga ñaitimienca cacañedimaci.

<sup>10</sup>Raiticue: “Nama, ¿bue ñeiticue?” Cai Nama cuena raite: “Naidadajanona, Damascomo jai. Nainomo o finolle rafuena omo lloitice”.

<sup>11</sup>Cuena eo quetiñua jira, cioñedicue. Cue diga itino cue onollido llinocaída, Damascomo cuena uitimaci. <sup>12</sup>Nainomo Ananías raillamiedi ite. Jusiñamuina eo iinote. Moisés micori llogacinuaido eo jaisoide. Nainomo ite judíuaidi naimienca: “Mare” raitimaci. <sup>13</sup>Naimie cuemo bite. Cuemo llote: “Saulo, ama, mai oni eroda”. Ieconi dane erodajanona, naimienca ciódicue.

<sup>14</sup>Naimie raite: “Cai usumatai micoriai ie Jusiñamuidi ona fetode, naimie jitaille rafuena o uiñollena, ie mare Jitona o cioillena, naimie uaina o cacareillena. <sup>15</sup>Nana cominimo naimienca lloitio. Nana o ciúa rafuena lloitio. Nana o cacaja rafuena jiai lloitio.

<sup>16</sup>Mai cue lluana iino. Naidadajanona, o jeacino oni dotallena, Jusiñamuimo jica. Ie mei bautiza” raite.

### Judíuañedinomo Pablo jailla llua rafue

<sup>17</sup>Ie mei Jerusalémo abiðo cue billa mei, Jusiñamui jofomo Jusiñamuimo cue jiiia, nicairiticue isoidicue. <sup>18</sup>Cai Namana ciódicue. Cuemo llote: “Jerusalémona raire mai jai. Cominidi o cuena lluana feiñóneítimaci”. <sup>19</sup>Uai oticue: “Nama, naga judíuai ofiracomo ona iinotinona fauidicue. Cárcelmo naimacina joneuidicue. Nama,

Jerusalémo itino iena uiñotimaci.  
<sup>20</sup>Esteban micori fiodailla facaiseconi nainomo iticue. Naimie o facaina lloraima. Naimie fiodailla jira, iobidicue. Naimieno meinetino iniroina sedadicue"; <sup>21</sup>iadedi cue Nama cuemo llote: "Mai jai. Judíuañedinomo ona are oretaiacadicue".

#### **Comandante anamo Pablo illa rafue**

<sup>22</sup>Bie lloga dinori comini Pablo lluana cacadimaci. Iemei curiidimaci:

—Bie isoide iima illana benomo jitañedicai. ¡Naimieno meine!

<sup>23</sup>Cuirillamona naimaci iniroina jaidisite. Icirisiano eniruena jiai fadosite. <sup>24</sup>Judíuaui uaido cominimo Pablo llua jira, comandante iena cacaiñede; iadedi comini icirillana ciuanona, naimie llote:

—Naimieno cuartelmo uiño.

Naimieno fano. Naimieno ite rafuena caimo naimie llollena, naimieno duere fino.

<sup>25</sup>Naimieno maiano naimieno fallena, Pablodi nainomo ite capitámo jicanote:

—¿Juez nia lloñenia, romano nairai imieno fajana mare? Romano nairai imiedicue.

<sup>26</sup>Capitán iena cacajano, comandante dine jaide. Iena llote. Jicanote:

—¿Niese nibaíticai? Bimie romanuai nairai imie.

<sup>27</sup>Iena cacajano, comandante bite. Pablomo jicanote:

—¿O Romano nairai imedio?

Pablo uai ote:

—Jii.

<sup>28</sup>Comandante dinena raite:

—Romanuai nairai imieno cue jaillena, eo ibadicue.

Pablo uai ote:

—Romanuai nairai imieno jeicigacue.

<sup>29</sup>Ieconi naimieno duere finoacadino naimiemona raire oni jaidimaci. Pablo

romanuai nairai imieno jira, naimieno jai ebena maia jira, comandante jiai jacinaite. Comecina nibai facade: "Iese naimieno cue finua jira, ie ibana ollena, cue illaimamo cuena jiai llogidoite".

#### **Illaicomini motomo Pablo illa rafue**

<sup>30</sup>Comandantedi judíuaui Pablona llogiduana ua raise uiñoiacade. Ie jira ie are Pablona suiñollena llote. Jusiñamui diga nanoca ñairaini, nana judíuaui illaicomini diga, ofillena llote. Pablona atiano, naimaci motomo uillanona, naimieno naidanete.

**23** <sup>1</sup>Le abina riidollena, Pablo naie judíuaui illaicomini motomo ite. Naimacimo eruallano, Pablo raite:

—Caimaci, cuemono nana cue illa dinori Jusiñamui jitailla rafuena finocabidicue. Naimiemona cue comeci mare.

<sup>2</sup>Ananíadi Jusiñamui diga nanoca ñairaima. Pablo lluana naimie gaiñenamona, Pablo ecimo itinona Pablo fuena farotate. <sup>3</sup>Pablo dinena naimieno llote:

—Jusiñamui o fuena faroite. Mareuidimiena abina caitadio. Moisés micori llogacinuai muidona benomo itio, cuemo llollena; iadedi cue finoca rafuena raise o uiñóñeno cue fue ebena farollena llotio.

<sup>4</sup>Nainomo itino raite:

—Jusiñamui diga nanoca ñairaimamo jeare ñaítio.

<sup>5</sup>Pablo uai ote:

—Moisés micori iena jaie cuiana uiñoticue. "Illaicomina jeare ñaítieno" cuete. Caimaci, naimie Jusiñamui diga nanoca ñairaima illana uiñóñedicue. Uíñoticuedena, naimieno iena lloñedicue.

<sup>6</sup>Cominimo Pablo eruallamona, saduceuái raila comini nainomo illana ciode. Fariseuái raila comini nainomo

illana jiai ciode. Ie jira naimacimo ado lloote:

—Caimaci, fariseo imiedicue. Fariseo imie jitodicue. Fiodaillamona ico jlluacinomo ocuriritcue. Ie jira bene cuena llogidoiacadomo.

<sup>7</sup>Naimie iena lloia, naimaci comeciai daje isoi lloinédimaci. <sup>8</sup>Saduceuai comindí fariseuai comini isoi iinoñedimaci. “Fiodaillamona jilloñeitcai” saduceuai comini raillana iinoside. “Jusiñamui jaienisai iñede. Comini joreñuai iñede” raillana iinoside; iadedi fariseuai comini dinena nana naie rafue illana iñotimaci. <sup>9</sup>Ie jira eo failliñaidimaci. Fariseuai motomona jiaino naidadajanona, lloote:

—Bimiemo jeacino iñede. Jusiñamui jaienici naimiemo nibai jaie lluamona, bie rafue naimiemo ite.

<sup>10</sup>Naimaci iese riire failliñaidimaci. Naimaci Pablona llagui raillano, comandantedi soldaduaimo cuartelmo naimiena uillena lloote.

<sup>11</sup>Ie are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiai lloitio —raite.

#### Pablona meineiacana rafue

<sup>12</sup>Monaidemo, judúaimona jiaino comeciaina facadimaci: “Pablona nia cai meineñenia guíñeitcai. Jiroñeitcai”.

<sup>13</sup>Cuarenta baifemo ite comini iese comeciaina facadimaci. <sup>14</sup>Naimaci judúua iilaicomini dine jaillano, raitimaci:

—Dani comeciaina facadicai: Pablona nia cai meineñenia, jaca buena guíñeitcai. <sup>15</sup>Omoi dine Pablona atillena, naimiemo eo raise jicanua isoi, comandantemo jicano. Pablo iairei bia, naimiena cai meinellena, ocuidoitcai.

<sup>16</sup>Pablo enaise naie rafuena fidiano, cuartelmo jaide, Pablomo llollena.

<sup>17</sup>Iena cacajano, Pablodi capitána uaidote. Raite:

—Bie coniruena comandante dine uiño. Naimie diga ñaiacade.

<sup>18</sup>Ie jira naimiena uite. Raite: —Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

<sup>19</sup>Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

<sup>20</sup>Naimie uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judúuai dani comeciaina facadimaci. <sup>21</sup>Naimaci jitaila isoi finoñeno. Cuarenta digamie baifemo naimiena reiduano sedadimaci. Llotimaci: “Guíñeitcai, jiroñeitcai, Pablona nia cai meineñenia”. Naimacidi omo jicanolle rafuena o finollena sedadimaci.

<sup>22</sup>Comandante coniruena facaduano raite:

—Jaca bumó cuemo o lluana lloñeno.

#### Félix dine Pablo oretaja rafue

<sup>23</sup>Comandante mena capitána uaidote. Lloote:

—Doscientos soldaduaina uaido, imaci raruiai finollena, Cesareamo navuida baife imaci jaillena. Setenta caballuaido jaitino uaido. Doscientos ducirainina jiai uaido. <sup>24</sup>Jiae caballona ati, naie emodomó rainadacaida Pablo jaillesa. Félix railla gobernador dine naimiena raise uiño —lloote. <sup>25</sup>Cartana jiai cuete. Iese cuete: <sup>26</sup>“Félix, omo cueticue. Claudio Lisiasdicue. Cai mare gobernadordio. ¿Nigacino? Cue uai o dine oredicue. <sup>27</sup>Damie o dine oredicue. Judúuai naimiena meineiacana jira, soldaduai diga naimiena gaitataticue.

Naimiena gaitatajaja mei, naimiedi

romanuai nairai imienana fididicue. <sup>28</sup>Judíua illaicomini dine naimiena uiticue, naimaci llogiduacinona raise cue uiñollena. <sup>29</sup>Naimaci einamaci llogacinuai muidona naimiena llogidotimaci. Iena fididicue. Naimie jaca buena finoñede. Naimiena meinellena, naimie cárcelmo jonellena lloiacaiñedicue. <sup>30</sup>Jiaino naimiena dane meineiacanana fididicue. Ie jira o dine naimiena oretaticue. Ie llogidotino o dine jaillena jiai lloitice. Naimaci naimiena omo lloitimaci” cuete.

<sup>31</sup>Comandante llua isoi, soldaduai naiona Pablona Antípatrismo uitimaci.

<sup>32</sup>Ico are eillido jaide soldaduai cuartelmo abido bitimaci; ia Pablo caballuaido jaidino diga oni jaide.

<sup>33</sup>Cesareamo railla náraimo rillanona, gobernadormo cartana fecadimaci. Naimie dine Pablona jiai uitimaci.

<sup>34</sup>Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

<sup>35</sup>Gobernador dinena raite:

—O llogidotino bia, o rafuena cacajiticue.

Soldaduaimo jiai llote:

—Omoi anamo Herodes railla illaima micori jofomo naimiena seda.

### Félix dine Pablo riidua rafue

**24** <sup>1</sup>Dabecuirorui illa mei, Ananías bite. Naimiedi Jusiñamui diga nanoca ñairaima. Jiae illaicomini diga bite. Tértulo raillamie jiae bite. Naimiedi llogidoraima. Gobernadormo Pablona llogiduabitimaci. <sup>2</sup>Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloitice. Eo mareuidimedio. O muidona eo uri iticai. Cai nairaina canollena, diga mare rafuena finodio. <sup>3</sup>Iobillamona, nana cai

ienai feiñoticai. <sup>4</sup>Ona iciacaiñedicue; iadedi o fue maria jira, cue lluamo dallu cacarei. <sup>5</sup>Bimiedi eo cai abina aruire finode. Nana eniruemo ite judúaina uri itatañede. Naimiedi Jesús raillamie rafuedo jaidino illaima. <sup>6</sup>Jusiñamui jofona jeare naimie finoiacana jira, naimiena gaitadicai. Moisés micori llogacinuaido naimiena duere finoacadicai; <sup>7</sup>iadedi comandante Lisias ride. Caimona naimiena riire bairode. Naimiena cai llogidollena, o dine cai billena caimo llote. <sup>8</sup>Pablomo o jicanoiacanía, naimiemona bie rafuena uiñoitio. Nana naimiena cai llogiduacinona uiñoitio.

<sup>9</sup>Judíua illaicomini, Tértulo llua isoi, dacinodo llotimaci.

<sup>10</sup>Iemei gobernador dinena Pablomo llote:

—Mai o facaina o ñaino.

Ie jira Pablo ñaite:

—Diga años cai nairai o anamo iticai. Ie jira cue abina riiduacinona omo marefodo lloitice. <sup>11</sup>Doce digarui illanona, Jerusalémo como birui ridicue. Iena uiñoiacadiosa jiae cominímo jicano. Jusiñamuina sedallena, Jerusalémo iticue. <sup>12</sup>Bu diga conima uaina jaca uaitañedicue. Jusiñamui jofomo uaina uaitañedicue. Judíua ofiracuaímo uaina jiae uaitañedicue. Naisomo uaina jiae uaitañedicue. Cominina uri itatañenana llonñedicue.

<sup>13</sup>Nie isoide rafuena cue finuana cioiñedimaci. Ie jira cuena raise llogidonidimaci; <sup>14</sup>iadedi jiae rafuena lloitice. Cai usumatiái Jusiñamuina sedadimaci. Naimiena jiae sedadicue. Nana Moisés llogacinuaina iiñoticue. Nana Jusiñamuina lloraini micriai cuegafuiaína iiñoticue. Bimacimona jiae llogacinuaido jai jaidicue. Bimacimona uanañediginodo jaidicue. <sup>15</sup>Fiodaillamona comini ico jilloillena

iinoticue. Jusiñamuina iinotino jilloitimaci. Jusiñamuina iinoñedino jiai jilloitimaci. Beno itino iena jiai iinotimaci.<sup>16</sup> Ie jira marena iacadicue, "Maraiñede rafuena Pablo finode" comini lloñellena, "Maraiñede rafue Pablo finode" Jusiñamui lloñellena.<sup>17</sup> Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiai sedajaibidicue.<sup>18</sup> Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Cominina iciritañedicue.<sup>19</sup> Naie facaise Asiamona jiae judíuau bitimaci. Cuemo nicino ia, ¿bue ñellena naimaci bene biñedimaci, cuena llogidollena?<sup>20</sup> Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ia, maraiñede rafuena cue finuana lloñedimaci.<sup>21</sup> Navui naimaci motomo cue lloticue: "Fiodaillamona comini ico jilloitimaci". Iena birui ñaitimaci. Ie jira cuena llogidoiacadimaci.

<sup>22</sup>Félixdi Jesús dibeimo itino rafuena raise uiñua jira, Pablo rafuena nairuido siadoiacaiñede.

—Comandante Lisias bia, dane omoi rafuena siadoiticue —raite.<sup>23</sup> Félix capitámo Pablo cárcelmo sedajana llote. Naimiena maiñellena jiai llote. Naimiena canollena, naimie nabaiñiai naimie dine jaillena rairuiñede.

<sup>24</sup>Diga irui illa mei, Félix, ie aí diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiiana cacadiiamaiai. Jesúna iinuana cacadiiamaiai.<sup>25</sup> Jeacino finoñellena, dama ie jitaila rafuena finoñellena, jiairuido Jusiñamui riicaillafue anamo iñellena cacadiiamaiai. Pablo llofuiamona Félix jacinaite. Ie jira raite:

—Jai macaibaite. Cue abi juarelliruido ona dane uaidoiticue.

<sup>26</sup>Pablo jino jaille iballe ucubemo ocuride. Ie jira diga icaiño naimiena uайдote, naimie diga ñaillena.<sup>27</sup> Mena años illa mei, Porcio Festodi Félix ifo meidote. Félixdi judíuaina iobitaacana jira, cárcelmo Pablona fainonocaide.

### Festomo Pablo llua rafue

**25** <sup>1</sup>Naie provinciam darui amani rilla mei, Cesareamona Jerusalémo Festo jaide.<sup>2</sup> Nainomo Jusiñamui diga nanoca ñairainidi, jiae judíuai illaicomini diga, Festomo Pablona llogidotimaci.<sup>3</sup> Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci.<sup>4</sup> Festo uai ote:  
—Pablo Cesareamo fiebiite. Raire nainomo abido jaiticue.<sup>5</sup> Omoi illaicomimona damierie cue diga jaitimaci, nicino naimemo ia, naimiena llogidollena.

<sup>6</sup>Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena llote.<sup>7</sup> Pablo billa mei, Jerusalémona bite judíuai naimie ecimo ofidimaci. Diga fododicinona naimiena llogidotimaci; iadedi tainuaido llogidotimaci.<sup>8</sup> Pablo uai ote:

—Judíuau llogacinuaña jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

<sup>9</sup>Iena cacade; iadedi Festo judíuaina iobitaacana jira, Pablomo jicanote:

—¿Jerusalémo cue diga jaiacadio? Nainomo nana bie rafuena siadoiticue.

<sup>10</sup>Pablo uai ote:

—Llogidoracomo jai iticue. Cai nanoca illaima facaina cominimo llotio,

naimacina duere finollena. Benomo cue llole. Juduaimo jaca buena finoñedicue. Iena raise uiñotio.

<sup>11</sup>Romanuai railla nairai illacomini llogacinona cue iinoñenia, damamei jearede rafuena cue finoia, cue fiodallemo jaca ocuridicue; iadedi cuemo nicino iñenia, cuena meinellena bu cuena judíuaimo fecañeite. Cue rafue naimie siadollena, Romamo cai nanoca illaima dine jaiacadicue.

<sup>12</sup>Ie ecimo ite canoraini diga Festo ñaia mei, Festo raite:

—Cai nanoca illaima dine o jaiacana jira, nainomo jaitio.

#### Agripamo Pablo llua rafue

<sup>13</sup>Diga irui illa mei, Agripadi Festo dine, ie miriño Berenice diga, Cesareamo bitiiamaiai. Agripadi naie enirue illaima. <sup>14</sup>Diga irui nainomo itiiamaiai. Naimiemo Festodi Pablo ie rafuena llote:

—Félix Pablona cárcelmo bene faínonocaide. <sup>15</sup>Jerusalémo navui cue ia, Jusiñamui diga nanoca ñairaimadi, judíuai einamaci diga, naimiena llogidote. Naimiena duere finollena cuemo jicanotimaci. <sup>16</sup>Naimaci uai oticue: “Cai Romanos cominidi llogidogamienam jamai tainomo duere finoñedicai; iadedi llogidogamiedi ie llogidotino uai nano cacareitica. Ie mei ie abi riidollicinomo jiai cacareitica”.

<sup>17</sup>Ie jira naimaci cue dine benomo navui bia, ie are cominimo cue lloullanomo raidicue. Pablona cue dine uaidoticue. <sup>18</sup>Naimiena llogidotinodi lloia, naimiena maraiñede finoca rafue cue facaja isoi, llogidoñedimaci. <sup>19</sup>Dani naimaci iinuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite. <sup>20</sup>Bie rafuena raise cue uiñoñenia, naimiemo navui

jicanoticue: “¿Jerusalémo jaiacadio, nainomo bie rafuena siadollena?”;

<sup>21</sup>iadedi Pablo nainomo jaiacainede. Cai nanoca illaima dine jaillena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaima dine naimiena cue nia oretañenia.

<sup>22</sup>Agripadi Festomo llote:

—Naimie ñaiana cacaacadicue.

Festo uai ote:

—Ico are naimie ñaiana cacareitio.

<sup>23</sup>Ie jira ie are Agripa, iaimaiai Berenice diga, gobernador ofiracomo bitiiamaiai. Finobillano ebire bitiiamaiai. Soldaduai imaci illacomini jiai bitimaci. Naie nairaimo ite nanoca comini jiai bitimaci. Ofilla mei, Festo Pablona atillena llote. <sup>24</sup>Festo llote:

—Agripa, nana beno itino, bimiena ciodomoi. Jerusalémo ailluena judíuia naimiena llogidotimaci. Bene cue dine jiai bitimaci. Naimie meiniana eo jitaídímaci; <sup>25</sup>iadedi naimiemo nicinodi iñenana jai uiñoticue. Naimiema meinellena cue llollena, nicinodi naimiemo iñede. Augusto dine naimie jaillena naimie jicanua jira, naimiena oretaiticue. <sup>26</sup>Nicinodi nia iñede, cai illaimamo cue cuellena. Ie muidona omoi dine naimiena jai atidicue. Agripa, naimie ñaiamo raise cacarei. Naimiemo cai jicanua mei, nibai nicino naimiemo illana uiñoñitacai. Iemonia Augustomo cueitacai. <sup>27</sup>Augusto dine llavecamie cue oretaria, naimiemo nicino iñenia, cuemonia maraiñede.

#### Pablo ie abina dane riidua rafue

**26** <sup>1</sup>Naie facaise Agripa Pablomo llote:

—Mai llono. O abi riiduacinona cacaacadicue.

Pablo: “Jii” raillanona, ie onollí a ñuitade. Raite:

<sup>2</sup>—Agripa, bene o illa jira, cuemona mare. Cue fue baillafuedo o uicomó cue abina riidoiticue. Judíuái cominidi diga rafuena cuena llogidotimaci. <sup>3</sup>Nana cai judíuái rafuena raise uiñotio. Nana cai einamaci rafuena jiai uiñotio. Cuemo raise cacarei. <sup>4</sup>Jerusalémo naimaci motomo cue illa jira, diga judíuái cue coniruenamona cuena uiñotimaci. <sup>5</sup>Cuena naimaci lloiacania, fariseo imiena cue illana are uiñotimaci. Jiae comini baifemo fariseuaidi cai einamaci llogacinuaina iñotimaci. <sup>6</sup>Jusiñamuidi cai usumataí micoriaimo fiodaillamona comini ico jilloillena jaie llote. Ie suillemo jai ocuriridicue. Ie jira llogidoracomo birui jai iticue. <sup>7</sup>Nagarui Jusiñamuina naimaci eo sedajamona, cai doce naíraidi naie llogacino suillemo jiai nia ocuriridimaci. Ore illaima, bie ocurillacino muidona judíuái illaicomini cuena llogidotimaci.

<sup>8</sup>¿Bue ñellena Jusiñamuidi comini fiodaillamona jillotajana iñoiacaiñedomoi? <sup>9</sup>Jaie ie isoidicue. Nazaret ie Jesúna iñotinona diga jearede rafuena jaie finoacadicue. <sup>10</sup>Jerusalémo iena finodicue. Cárcelmo ailluena Jesúna iñotinona jonicue. Jusiñamui diga nanoca ñairaini uaido iena finodicue. Naimacina meinelle cai illaicomini raia: “Jee” raisoidicue. <sup>11</sup>Diga judíuái ofiracomo, diga icaíño, naimacina duere finodicue. Naimaci Jesúna jeare ñaiana jitaídicue. Naimaci diga cue eo icirilla jira, jiae eniruemo ite nairaimo jiai jaidicue, naimacina duere finollena.

**Pablodi Jesúna iñuana llua rafue  
(Hch. 9.1-19; 22.6-16)**

<sup>12</sup>Ie jira Damascomo jaidicue. Jusiñamui diga nanoca ñairaini uaido jaidicue. <sup>13</sup>Ore illaima, jitoma naidai ia, monamona quetiñotena ciodicue. Naidi

jitoma baifemo quetiñote. Cue abina quetiñote. Cue diga itíno abina jiai quetiñote. <sup>14</sup>Eniruemo cue ana uaia, damie lluana cacadicue. Judíuái uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, riicaillamona raise maiga jurareta suiñoacana isoi. Ie isoidio. Riicaillamona, cuena duere finoacadío”. <sup>15</sup>Uai oticue: “¿Budiota?” Cai Nama cuemo llote: “Jesúdicue. Cuena duere finodio. <sup>16</sup>Mai a naidacai. Cue rafuena o llofuellena ona fetodicue. O birui ciua rafuena lloitio. Ona cue uiñotalle rafuena jiai lloitio. <sup>17</sup>Naimaci ona duere finoia, omoi cominimona ona jillotaiticue. Judíuáiñedínomona ona jiai jillotaiticue; iadedi judíuáiñedino dine ona oretaiticue, <sup>18</sup>naimaci comeacia tainomo iñellena. Taife anamona Jusiñamui anamo naimacina itataitio. Jeacino anamo naimaci birui illa jira, jitiredinomo jai itimaci isoidimaci. Jusiñamuina uiñuamona, useredinomo iitimaci isoidimaci. Iemei Jusiñamui naimaci jeacinona dotajite. Cuena naimaci iñuamona, nana cuena iñotino diga cue illano ico jaca iitimaci”.

<sup>19</sup>Ore Agripa, monamona cue cacaja rafuena iñoticue. Jesúdi Jusiñamui Jitona iñoticue. <sup>20</sup>Damascomo itínomo iena nano lloticue. Ie mei Jerusalémo itínomo iena jiai lloticue. Diga Judeamo itínomo iena jiai lloticue. Judíuáiñedínomo iena jiai lloticue. Lloticue: “Omoi comeciaimo iticinona meido, Jusiñamui dibeimo omoi illena. Omoi comeciaimo iticinona omoi meidua mei, mare rafuena finocana jai”. <sup>21</sup>Ie jira judíuái illaicomini Jusiñamui jofomo cuena gaitadimaci. Cuena meineiacadimaci; <sup>22</sup>iadedi Jusiñamui cuena canode. Ie jira birui bene iticue.

Illaicominimo beno nia lloticue. Illaicominiñedinomo jiai nia lloticue. Dama Jusiñamui facaina lloraini micoriai ico suille cuegafuena birui lloticue. Dama Moisés micori ico suite cuegafuena jiai birui lloticue. Jiae rafuena lloñedicue. <sup>23</sup>Jiae cuetimaci: “Cristo llegí cacajite. Fiodaillamona jilloite. Naimiedi nano dofoconi jilloitimie. Iemonia cai judíuai comini jeacinomona jilloillena uiñoitimaci. Iemonia judíuafinedino jeacinomona jilloillena uiñoitimaci”. Ie jira bie rafuena llocana jaidicue.

**Creyentena Agripa jaillena  
Pablo jitaila rafue**

<sup>24</sup>Iese Pablodi abi riiduano, Festo riire llote:

—Pablo, odi uairico isoidio, eo começina o facaja jira.

<sup>25</sup>Pablo uai ote:

—Uairicoñedicue. Festo, odi cue illaimadio. Cue lluacинodi uanaicino. Ebena ñai-ñaiacaiñedicue. <sup>26</sup>Agripa cue lloga rafuena raise uiñote. Nana bie rafuena naimie jai uiñua jira, naimie diga maredodo ñaiticue. Bainino suiñede. <sup>27</sup>Ore Agripa ¿Jusiñamui lloraini cuegafuaina iinotio? omo jicanoticue. Iena o iñuana jai uiñoticue.

<sup>28</sup>Agripa dinena uai ote:

—Dallu o ñaiamona, cuena creyentena nibai itataiacadio.

<sup>29</sup>Pablo uai ote:

—Nibai dallu ñaiticue. Nibai are ñaiticue; iadedi cue isoi o jaillana jitaidicue. Ua nana cue ñaiiana cacadino cue isoi jaillana jitaidicue; iadedi omoi bie lloeo diga maiana jitaiñedicue.

<sup>30</sup>Iemonia Agripa naidacaide, Festo diga, Berenice diga. Nana raidino jiai naidacaídmaci. <sup>31</sup>Jino jaillano, Pablo joreñona siadotimaci:

—Bimie jaca buena finoñede, naimienca cai meiniana llollena. Buena finoñede, cárcelmo illena.

<sup>32</sup>Agripa Festomo llote:

—Naimie cai nanoca illaíma dine jaillana jicanoeñedena, niadedi naimie jino marena oreca.

**Romamo Pablo jailla rafue**

**27** <sup>1</sup>Italiamo Augusto dine Pablo oretajana Festo llua mei, Pablona jiae llavecano diga capitámo fecade. Naie capitádi Julio. Augustona mamecirede batallómo jainaiái. <sup>2</sup>Adramitiomona bite botemo jaidicai.

Naie bote Asia railla enirue igobiaimo sijicana jaiacade. Aristarco cai diga jaide. Macedonia enirue imie. Naimie nairáidi Tesalónica. Suiñodí. <sup>3</sup>Ie areruido Sidón railla nairaimo ridí. Nainomo Juliodi Pablona marena sedade. Ie nabaiñiai dine Pablo ari jaillana rairuiñede. Ie jira naimacimona ie jitaille rana ote. <sup>4</sup>Iemei nainomona suiñodí. Aifidi abido caina ati-atina jira, aifi raise iñenanomo, Chipre railla uiasí cai jarifebeimo illa ecido jaidicai. <sup>5</sup>Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla nairaimo ridí. Naie provincia mameci Licia.

<sup>6</sup>Naie bote Roma dine jaiñena jira, capitádi jiae botena jenode. Capitádi Alejandríamona bite botena baite. Naie bote Italiamo jaiacade. Ie jira naie botemo cai jonecaida, caina uite. <sup>7</sup>Diga irui fecuse sefure jaillano, Gnído railla nairai iairese ridí. Aifidi abido caina ati-atina jira, Creta railla uiasímo jaidicai. Aifi raise iñenanodo Salmón railla nairai dine jaidicai. <sup>8</sup>Uiasi iairese iese sefucana jaillanona, Maregobe railla illanomo ridí. Lasea railla nairai jiai ianori ite.

<sup>9</sup>Digarui cai faifilla jira, noci deisoilla facaise jai illa jira, jaillena eo jacirede. Ie jira botemo maijidinomo Pablo llote:

<sup>10</sup>—Nabaiñiai, cai jaillena eo jacirenana uiñoticue. Eo maraiñeno caimo sefuiticai. Cai raruaina nibai faifitacai. Botena jiai nibai faifitacai. Cai nibai jiai faifitacai —llote.

<sup>11</sup>Iese llote; iadedi naie bote piloto oni jaiacadade. Naie bote nama jiai oni jaiacadade. Capitán iaimaiai lluana Pablo lluana baifemo iiñote. <sup>12</sup>Igobe maraiñena jira, rollime facaise illa jira, alluena comini nainomona jaiacadimaci. “Fenice railla nairaimo niedi riiticai” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaide. <sup>13</sup>Beici dinena aifidi bia, “caí jitalla aifidi bite” raillanona, suiñodicaí. Creta iairei monaillai fuemo jaidicai. <sup>14</sup>Ie mei raire cai dine eo riire aifi bite. Naie aifi noci deisoilla dinena bite. <sup>15</sup>Botena oni uite. Botena atona eronendicai. Ie muidona jamai ebena jaidicai. Aifidi caina iese uite. <sup>16</sup>Janorede uiasi fuemo aifi raise iñenanomo jaidicai. Nai uiasi mameci Clauda. Faifiñellena bote ie janorede nocae sefuiro a aiñodicaí. <sup>17</sup>A aiñua mei, rao diga botena ruica maiticai. Sirte railla conillie illanomo cai joodai raillano, velaiaina duiñodicaí. Iemei aifi jamai uigacai. <sup>18</sup>Ie areruido aifi riire illa jira, cargana oni dotadicai. <sup>19</sup>Dane ie are bote ie rarui, cai onolli diga, oni dotadicai. <sup>20</sup>Diga irui jitoma bainide. Diga irui ucuai jiai bainide. Aifi eo riire nia ite. Cai jillobiñellemo jai ocuririñedicaí.

<sup>21</sup>Diga irui cai guíñena mei, Pablo naimacimo llote:  
—Nabaiñiai, cue uaina navui iiñotiomoidena, niadedi bie isoi sefuiñedicaí. Cretamo cai fiebidicaina, bie isoi sefuiñedicaí. <sup>22</sup>Omoi comeciaina ocuiño. Bie botedi faifite; iadedi caimoná jaca buna faifiñeite. <sup>23</sup>Jaiive

naiona Jusiñamui jaienicidi cuemo bairede. Jusiñamuimo jainaiaidicue. Naimiena sedadicue. <sup>24</sup>Naie jaienicu cuemo llote: “Pablo, jaciruiñeno. Romamo o nanoca illaima díne iitió. Jusiñamui ona duenaila jira, nana o diga jaidino jilloitimaci”. <sup>25</sup>Ie jira omoi comeciaina ocuiño. Cuemo llua isoi, naimiedi bie rafuena suitaite. Jusiñamui iena finuana iiñoticue. <sup>26</sup>Nibai uiasimo jutadaiticai.

<sup>27</sup>Catorce digarui naio illamona, Adria railla monaillaimo jamai cai jaia, naiona daferui facai marineraudi: “Enirue iaire ite” raillanona comeciaina facadimaci. <sup>28</sup>Ie jira ie aforedinona facadimaci. Veinte brasas aforede. Iemei nano nie dinori illamona, dane facadimaci. Quince brasas aforede. <sup>29</sup>Nofici illanomo naimaci bai raillano, fairillaillena, ie jillacimona cuatro lloelluna fajtimaci. Mona monaille sedadicaci. <sup>30</sup>Naie facaise marineraui botemona aisiacadimaci. Ie jira botemo ite nocaena ana monaillaimo dotadicaci, bote jillacimona lloelluna faia isoi.

<sup>31</sup>Iena ciuano, Pablo capitámo llote. Soldaduaimo jiai llote:

—Botemo bimaci fiebiñeniadeti, jilloñeitomoi.

<sup>32</sup>Ie jira soldaduaidi nocae maia raona jaitadimaci. Jai dinomo nocaena fainonocaidimaci. <sup>33</sup>Nia monaiñenia, Pablo nana caimo llote:

—Guíño. Catorce digarui illanona, jai guíñedomoi. <sup>34</sup>Ie jira guíño, omoi mairillesa. Ua faifiñeitomoi.

<sup>35</sup>Iese naimie raillanona, Jusiñamuimo iobillacinona fecade, nana comini illa uicomó. Llomenicona tairuano, guite. <sup>36</sup>Nana naimaci comeciai ocuiñocaida, jiai guitimaci. <sup>37</sup>Botemo doscientos setenta y seis diese iticai. <sup>38</sup>Cai monillamona, fiebide

trigona monaillaimo oni fadodicai, bote meenaiñellena.

<sup>39</sup>Ie oni monaidemo, erodatemo, naie eniruena uiñoñedicai. Igobemo conillici illana ciodicai. Nainomo jamai ebena sijiacadicai. <sup>40</sup>Ie jira lloelluna nainomo oni fañonocaidicai. Datarabe maiana suñodicai. Vela aifimo sebiñotcái. Monaillai fuemo enirue dine jai jaídicai. <sup>41</sup>Iemei jaiciridifomo ridicai. Eniruemo jodate. Bote muido eniruemo jaiaire jodate. Eo baguamona jillaci taicosite. <sup>42</sup>Naimaci iamona jillobi raillano, soldaduai llavecanona meineiacadimaci. <sup>43</sup>Pablona jillotaiacana jira, capitán iena rairuide. Llote:

—Nano iana uiñotino diese monaillaimo ana daia. Eniruemo jai. <sup>44</sup>Jiaino bote ie rabicido juicaida icana jai. Jiaino bote ie raruiado juicaida icana jai. —Iese eniruemo nana marena ridicai.

#### Maltamo naimaci illa rafue

**28** <sup>1</sup>Jai cai jillua mei, Malta railla uiasimo cai illana uiñoticaí. <sup>2</sup>Nainomo ite comini caina marena feiñotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci. <sup>3</sup>Pablo reiená ua mei, iraimo jonete. Joniamona, jaio usirenamoná, reigaimona jino bite. Naimiena ainide. <sup>4</sup>Jaio naimie onollido lliillana Malta comini ciuano, coniniri ñaitimaci:

—Nibai bimie comena meineticie. Monaillaimona jillobide; iadedi jai bu naimiemo ibadi oga.

<sup>5</sup>Jaiona ciuanona, Pablo iena iraimo dotade. Iemei naimiemo jaca bue isoide rafue suiñede. <sup>6</sup>Comeciaina facadimaci: “Naimie onollí raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi nibai Jusiñamui.

<sup>7</sup>Naie illanomona uiasi illaima enirue iaíre ite. Naimie mamecidi Publio. Caina marena feiñote. Darui amani ie jofomo caina marena itatare. <sup>8</sup>Publio moo duide biide. Abi cuaride. Jeraina feide. Ie jira naimie dine Pablo jaide. Jusiñamuimo jiia mei, ie onolli naimiemo joniano, naimiena jillotate. <sup>9</sup>Bie rafue suilla jira, naimie dine nana uiasimo ite duidino bi-bidimaci. Naimacina jillotate. <sup>10</sup>Ie jira caimo iobillacínona eo fecadimaci. Cai oni jaiadedi, cai jitaila ra caimo fecadimaci.

#### Romamo Pablo rilla rafue

<sup>11</sup>Daje amani fivui illa mei, Alejandríamona bite botedo jaídicai. Naie uiasimo nana rollime facaiseconi naie bote ite. Mena jusiñamui iaímaiai joreño bote muidomo ite. Damie Cástorna mamecirede. Jiainie Póluxna mamecirede. <sup>12</sup>Naie botedo oni cai jaillanona, Siracusamo sijidicai. Darui amani nainomo iticai. <sup>13</sup>Nainomona jaillano Regiomo sijidicai. Darui illa mei, aifi beici dinena billa jira, ie areruido Puteolimo ridicai. <sup>14</sup>Sijia mei, nainomo creyentiaina baiticai. Naimaci diga siete digarui cai illana jitaidimaci. Ie mei Roma dine jaídicai. <sup>15</sup>Romamo nia cai riñenia, nainomo ite creyentiai cai billana fididimaci. Cai dine bitimaci. Foro de Apio railla nairaimo damierie bitimaci. Jiaino Tres Tabernas railla nairaimo bitimaci. Naimacina ciuano, Pablodi Jusiñamuimo iobillacino fecade. Ie comeciná jiai ocuiñote. Cai diga Romamo jaídimaci. <sup>16</sup>Romamo cai ria, capitán llavecanona ie illaimamo fecade. Cárcelmo Pablona naie illaima oreñede; iadedi Pablo ie ibauiga jofomo eneno oni orede. Aisii raillano, daje soldado nainomo naimiena sedade.

**Romamo Pablo llofuaia rafue**

<sup>17</sup>Darui amani illa mei, Pablo

Romamo ite nanoca judúaia uaidote.  
Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamaci llogacinuaina jaca iiñoticue; <sup>18</sup>iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo iiñena jira; <sup>19</sup>iadedi judúaai: “Dama ite” railla jira, cai nanoca illaima dine jaillena jicanoticue; iadedi cue nairai diga jaca iciriñedicue. <sup>20</sup>Omoi diga ñaillena, omoina cioacadicue. Fiodaillamona ico comini jillollena cue llofuecabilla jira, bie lloeo diga maigacue.

<sup>21</sup>Uai otimaci:

—Judeamona jiaino ona cuega cartana jaca feiñoñedicaí. Caimo o rafuena llollena, jaca buna biñede. Bene jaca bu ona jeare ñaiñede. <sup>22</sup>Ie jira omona naie rafuena cacaacadicai. Naga illanomo comini o llofuaiana uaitajana uiñoticai. Creyentiaina jeare ñaitimaci. Iena fididicai. Ie jira caimo iena raise llono.

<sup>23</sup>Naimie dine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitalla jira, Jusiñamui dibeimo naimaci comeciai iuaina meiduana llofuet. Moisés micori llogacinuaimona, Jusiñamui facaina lloraini micoriai cuegafuaimona, Jesúna llofuet. <sup>24</sup>Jiaino naimie llofuaiana iiñotimaci. Jiaino iiñonñedimaci. <sup>25</sup>Nana naimaci

comeciaina daje isoi lloñedimaci. Iemonia oni jaidimaci. Nia jaiñenia, naimacimo Pablo llote:

—Jusiñamui Joreñodi Isaías micorina cai usumatiáimo raise llotatate. Omoi usumatiái micoriai illa isoi nia itomoi. Isaías micoridi omoina jai cuega rafue jai suide. Naimie micori cuete:

<sup>26</sup> Jusiñamui llote: “Bie comini dine mai jai.

Llono: ‘Cue rafuena cacaitomoi; iadedi iena cacaiñeitomoi. Rafuena cioitomoi; iadedi iena uiñoñeitomoi.

<sup>27</sup> Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisnidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi. Cue dibeimo iacaiñedomoi, omoina cue jilloitai raillanona”.

<sup>28</sup>Jusiñamui rafuena omoi iiñonëna muidona, judíuainédinodi Jusiñamui naimacina jilloitaiacanana jai fididimaci. Naimaci iena cacareitimaci.

<sup>29</sup>Iese naimie llua mei, judíuaidi coniniri siadocana abido jaidimaci.

<sup>30</sup>Mena años Pablo ie jofomo ite. Ie illa dinori naie jofona ibauide. Nainomo nana naimie dine bite cominina feiñote.

<sup>31</sup>Naimie anamo naimaci illana Jusiñamui jitalla jira, Jusiñamui dibeimo naimaci comeciai iuaina meiduana llofuet. Marefodo llofuet. Naimedi cai Nama Jesucristo rafuena llofuet. Jaca budí naimie llofuaiana rairuiñede. Teofilo, jaca digacino omo jai lloticue. Mai. Lucadicue.

# ROMAMO ITE CRISTONA HNOTINOMO PABLO ORETAGA RABE

Romamo ite creyentiaimo  
Pablo cartana orede

**1** <sup>1</sup>Romamo ite creyentiai, omoi dñe  
cartana oredicue. Pablodicue.  
¿Nigacino? Jesucristo dibeimo  
majidicue. Jusiñamui fetocamiedicue.  
Ie mare rafuena cue llollena, cuena  
orede.

<sup>2</sup>Jusiñamuidi naimie facaina lloraini  
micoriaido bie rafuena jaie llote.  
Naimaci micoriai iena jaie jiai cuega.  
Iemonia birui facacabidicai. <sup>3</sup>Bie rafuedi  
Jusiñamui Jitona llote. Naimie jaie ite  
usumadi cai illaíma David micori.  
<sup>4</sup>Naimie Jusiñamui Jitonana uiñoticaí.  
Jusiñamui Joreñodi siño rafuedo caina  
ienai uiñotade. Jusiñamui Jito  
fiodaillamona, Jusiñamuidi ie Jitona  
jillotate. Jusiñamui Jitodí Jesucristo.  
Cai Nama. <sup>5</sup>Caina duenaillanona, caina  
oretate, naga nairaiaina naimiena  
iinotallena, naimiena naimaci  
iobitallena. <sup>6</sup>Naimacimona itomoí.  
Naimiemo omoi duillena, Jesucristo  
omoína jai fetode.

<sup>7</sup>Romamo ite creyentiai, Jusiñamui  
isiruiganodomoi. Naimie isoi  
mareuidinona omoi illena,  
fetocanodomoi. Cai Moo Jusiñamui, cai  
Nama Jesucristo diga, omoína duenaita.  
Iena uiñocana mai omoi jai. Iaímaiai  
omoína uri jai itatattiaímaiai. Iena omoi  
uiñocana mai omoi jai.

Roma dine Pablo jaiacade

<sup>8</sup>Diga comini, diga illanuaimo,  
Jesucristona omoi iiunuana jai  
fididimaci. Ie jira nano dofoconi omoi  
facaina Jesucristomo iobillacónona  
fecaacadicue, Jusiñamuimo iena naimie  
fecallena. <sup>9</sup>Jusiñamuimo cue jiiia,  
omoíri jjidicue. Jusiñamui iena uiñote.  
Naimie Jito rafuena cue Iluanona, cue  
comecimona naimiena sedadicue.  
<sup>10</sup>Jusiñamuimo cue jiiia, naimiemo  
jicadicue, cuena canollena. Naimie  
jitaia, omoi dñe ja muidomo cue  
riiticue. Iena jicadicue. <sup>11</sup>Omoína eo  
cioacadicue. Jusiñamui Joreño uai  
cuemo illamona, omoi comeciaina  
ocuiñotaiacadicue. <sup>12</sup>Jesucristona omoi  
iiunuamona, naimiena cue iiunuamona,  
coninina caí comeciaina ocuiñotaiticai.

<sup>13</sup>Cue amatiái, diga icaiño omoi dñe  
jaiacadicue. Iena omoi uiñuana jitaídicue.  
Jaiacadicue; iadedi nia Jainidicue.  
Cuemonia Jesucristo rafuena cacajamona,  
dajerie jiaie nairaiai jai iiñotimaci. Omoi  
dñe Jesucristo rafuena lluaciadadicue, iena  
omoímona dajerie iiñollena. <sup>14</sup>Nana  
comini dñe Jusiñamui oretagacue. Ie jira  
griego uaido ñaitinomo Jesucristo rafuena  
lloiacadicue. Griego uaido ñaiñedinomo  
ienai jiai lloiacadicue. Abina uiñotinomo  
ienai jiai lloiacadicue. Abina uiñonedinomo  
ienai jiai lloiacadicue. <sup>15</sup>Ie jira omoímo  
Jesucristo rafuena eo lloiacadicue.

### Jesucristo rafue siño

<sup>16</sup>Jesucristo rafueri iobidicue. Naie rafuedi siño. Jusiñamuidi naga iena iinotinona naimaci jeacynomona jillotate. Judúaidino nano iena cacadimaci. Le mei judíuaindino iena jai cacadimaci. <sup>17</sup>Naie rafuemona Jusiñamui caina feiñuana uiñoticaí. Jusiñamui caina marebicaitajana uiñoticaí. Naimiena cai iiñuamona iena uiñoticaí. Jusiñamui facaina lloraíma micorí jaie cuega: “Jusiñamuina iiñuamona marebicaidimi Jusiñamui dibeimo ico jaca iite” cuega.

### Comini jeacinona finoiadeti, dani naimaci muidona

<sup>18</sup>Nana Jusiñamuina jitaiñedinodi naimie duere finollifue anamo jai itimaci. Iena uiñoticaí. Jusiñamui caina iena uiñotade. Maraiñede rafue naimaci finuanona, Jusiñamui ie uanaicinona jamaidimaci. <sup>19</sup>Jusiñamui naimacina naimiena uiñotaja muidona, imaci comeciaimona Jusiñamui illana uiñotimaci. <sup>20</sup>Enirue finua facaisemona naimie finoca ramona naimie illana uiñotimaci. Naimiena cionidimaci; iadedi naimie finoca ramona naimiena uiñotimaci. “Naimiena uiñotimaci” omoi raia, naimiedi bu. Naimie uai jaca siñonana uiñotimaci. Le jira: “Jusiñamuina uiñoñedicaí” rainidimaci. <sup>21</sup>Jusiñamui uiñotimaci; iadedi naimie uaina iiñoñedimaci. Naimiemo comeciaina facañedimaci. Naimiemo iobillacinona fecañedimaci; iadedi ebena comeciaina facacabidimaci. Naimaci comeciaí jai tainomo ite isoide. Jai marebificaiñedimaci. <sup>22</sup>“Abina uiñoticaí” raitimaci; iadedi abina uiñoñedimaci. Jamai ebe isoidimaci. <sup>23</sup>Jusiñamui jaca ite. Naimie uai siño. Naimiena sedaacaiñedimaci; iadedi jiae

rana sedaacadimaci. Fiodairuide iimana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina finodimaci. Jaiona eruaide jiraraina finodimaci. Naie isoide jiraraina sedauidimaci.

<sup>24</sup>Le jira Jusiñamui naimacina fainonocaide, naimaci jitaila jearede rafuena imaci finollena. Le mei conini diga eo meirede rafuena finouidimaci.

<sup>25</sup>Jusiñamui ie uanaicinona jitaiñedimaci. Uanaiñediginodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, dani Jusiñamuimo iobillacinona jaca cai fecacabillasa. Uanaicinona lloticue.

<sup>26</sup>Iese naimaci illa jira, naimaci jitaila meirede rafuena finollena, Jusiñamui naimacina fainonocaide. Coniñona aifuedotimaci. <sup>27</sup>Naimaci jitaila jira, conimana aifuedotimaci. Naimaci maraiñede finoca rafuemona duere sefullemona ibana feiñoitimaci.

<sup>28</sup>Jusiñamuina naimaci uiñocaiñena jira, maraiñede rafuemo naimaci comeciaí facallena, Jusiñamui naimacina fainonocaide. Naimaci finorainiga rafuiaina finocana jaidimaci.

<sup>29</sup>Naga isoide maraiñediginona finouidimaci. Naga isoide jearedicinona finouidimaci. Jiae comini rana nicidouidimaci. Jiae cominina duere finouidimaci. Jiaima raconi uradoisoidimaci. Cominina jaca meineticaci. Fuiriruidimaci.

Jifuerisoidimaci. Jiae cominina jeare finouidimaci. Eo ñaillaredimaci. <sup>30</sup>Jiae comini joreñona ñaioqidimaci. Jusiñamuina jaca gaiñedimaci.

Cominina jeare ñaioqidimaci. Abina iedouidimaci. Abina biriuidimaci. Diga jearede rafuemo comeciaina facauidimaci. Naimaci moo uaina iiñorainidimaci. Naimaci ei uaina

iiñorainidimaci. <sup>31</sup>Ebena itimaci. Naimaci lloga uaina finorainidimaci. Jiae cominina isiruirainidimaci. Naimacina jiai dueruirainidimaci. Iese jaisoidimaci. Iese nia jaicabidimaci. <sup>32</sup>Jusiñamuidi jiae llote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” llote. Jusiñamui lluana uiñotimaci; iadedi naie rafuena finocana jaidimaci. Iena jiae comini finoiadeti, iobillanona, “Macai mare iese imaci finua” raitimaci.

#### **Jusiñamuidi maraiñede rafuena finodinona duere finoite**

**2** <sup>1</sup>Ero, omoi judíuaimona damie começina nibai facade: “Bie isoide maraiñede rafuena finoñedicue. Iena finuamona, jiae comini Jusiñamuimona duere sefuitimaci. Cue duere sefuiñeiticue” raillamo naimie começina facade; iadedi naie isoide maraiñede rafuena naimie finua jira, Jusiñamui naimiena jiae duere finoite. <sup>2</sup>Jusiñamuidi uanaicinona uiñuamona, maraiñede rafuena finodimieno duere finoite. Iena uiñotici. <sup>3</sup>“Jusiñamui duere finollicino anamona jilloñeitimaci” começina facadio.

Naimacimo o começina o facaja isoi, naimaci isoi o finua jira, Jusiñamui ona jiae duere finoite. <sup>4</sup>Ona naimie duenallamona, ona naimie duere finoacaiñellemona, o começimo iticino marecinona meiduana naimie jitaide. Naimie dibeimo o illana naimie jitaide. Naiena jamaiñeno. <sup>5</sup>O começi jaiairena jira, o começi Jusiñamui dibeimo meidoiacaiñedio. Ie jira ico eo duere sefuitio. Ie riicaillifemonia Jusiñamuidi nana naimiena iñnoñedinona duere finoite. Iena Jusiñamui finoia, Jusiñamuimona mare. <sup>6</sup>Nagamiai imaci finua ille dinori Jusiñamui naimacina

duere finoite. <sup>7</sup>“Mare rafuena finocana jaidino cue illanomo jaca iitimaci” llote. Naimaci naimie isoi ebire iacania, naimiemona iobillacino naimaci jitaia, naimie illanomo naimaci jaca iacania, iese Jusiñamui lloite. <sup>8</sup>Maraiñede rafuedo jaidino Jusiñamui duere finollicino anamo iitimaci. Dani imaci abina isiruitimaci. Uanaicinona iñoñedimaci. <sup>9</sup>Jusiñamui naga jeacinona finodimieno eo duere finoite. Judíuai comini ua duere finoite. Judíuaiñedino cominina jiae duere finoite; <sup>10</sup>iadedi Jusiñamuidi naga mare rafuedo jaidimieno ebire itataite. Iobitaite. Uri itataite. Judfuaimo iese ua finoite. Judíuaiñedinomo iese jiae finoite, <sup>11</sup>naga nairaina daje isoi naimie finua jira.

<sup>12</sup>Judíuaiñedinodi Moisés micori llogacino anamo iñedimaci; iadedi jeacinona naimaci finua jira, Jusiñamui naimacina duere finoite. Judíuai Moisés micori llogacino anamo itimaci; iadedi iena naimaci iñnoñena jira, jiae jaca daje isoi duere sefuitimaci. <sup>13</sup>Moisés micori llogacina cacajamona, Jusiñamuimona jaca buna marebicañede; iadedi iena iñnuamona marebicaiade.

<sup>14</sup>Judíuaiñedinodi Moisés micori llogacino anamo iñedimaci; iadedi naimaci começiai facajamona, marecinona finuana uiñotimaci. Marecinodo jaillana jiae uiñotimaci.

<sup>15</sup>Moisés micori llogacino anamo naimaci illa isoi, naimaci começiaimona marecinona naimaci finoiadeti, iena uiñotimaci. Ie jira maraiñedicinona naimaci finoiadeti, iena jiae uiñotimaci.

<sup>16</sup>Bienal llofuecabiticue. Ico Jusiñamui llua jira, Jesucristodi cominimo imaci começiaimo iticinona juez isoi lloite. Maraiñedicinona finouidinomo duere finollicinona lloite. Marecinona finouidinomo duere finollicinona lloñeite.

**Moisés micori llogacinodo judíuai  
comini raise jaiñedimaci**

<sup>17</sup>Abina ieduamona, omoimona damierie raitomoi: "Judíuai imacídicai. Moisés micori llogacino anamo cai illa jira, duere finollicinomona jilloiticai. Jusiñamui cai diga ite" raitomoi. Iena omoi raillamona, abina iedotomoi.

<sup>18</sup>Naimie jitailla rafuena uiñotomoi. Moisés micori llogacinona omoi uiñuamona, marençinona finuana uiñotomoi. <sup>19</sup>Jusiñamuina uiñoñedinona llofueiacadomoi. Naimiena naimaci uiñoñena jira, jitiredinomo itimaci isoidimaci. Uanaicinona naimacimo omoi lluamona, naimaci comeciaina lligaiñoiacadomoi. Naimacina uanaicinona uiñotaiacadomoi. <sup>20</sup>Jusiñamuina raise uiñoñedinona llofueiacadomoi. Naimacina abina uiñotaiacadomoi. Naimie rafuena nia raise uiñoñedinona llofueiacadomoi. Moisés micori llogacinomo nana uiñuacino illa jira, naiemo uanaicino illa jira, iese iacadomoi. <sup>21</sup>Jiae cominina llofueiacadomoi; iadedi ¿niese omoi comeciaimo fueoiacainédomoi? "Rana fiñeno" llotomoi; iadedi fiidomoi.

<sup>22</sup>Omoi aíñede riño diga iñenana llotomoi; iadedi ie isoi finodomoi. Jusiñamuina eruaidé jiraraina gaiñedomo; iadedi naie ra illanuaimona naie jiraraina fiidomoi. <sup>23</sup>Moisés micori llogacinori abina iedotomoi; iadedi iena omoi iñoñena jira, Jusiñamuina jeare finodomoi. <sup>24</sup>Iena Isaías micori jaie cuete: "Omoi muidona judíuainédinodi Jusiñamuina jeare ñaitimaci" cuete.

<sup>25</sup>Jusiñamui dibeimo jai omoi illana jiae comini uiñollena, omoi abina detatatomoi. Moisés micori llogacinona omoi iñoiajedi, omoi abina detatajadi mare; iadedi naicinona omoi iñoñenia,

abina detatañedino isoi jai itomoi. Jusiñamui dibeimo iñedomoi. <sup>26</sup>Moisés micori llogacinona judíuainédino iñoiajedi, naimaci abina detatañenia, Jusiñamuimona naimie dibeimo ite judíuai isoidimaci; iadedi abina detatañedimaci. <sup>27</sup>Moisés micori llogacinuaina uiñotomoi. Omoi abiaina detatatomoi; iadedi Moisés micori llogacinona judíuainédinodi iñuua jira, Moisés micori llogacinua omoi iñoñena jira, Jusiñamuimona omoi baifemo uaidimaci. <sup>28</sup>Omoi jeiciamona Jusiñamui ua cominiñedomoi. Omoi abiaina detatajamona, Jusiñamui ua cominiñedomoi; <sup>29</sup>iadedi omoi comeciai marena illamona, Jusiñamui ua cominiñedomoi. Abi detataja jira, Jusiñamui cominiñedomoi; iadedi omoi comeciai marena illa jira, Jusiñamui cominiñedomoi. Raise naimiena iñotinodi cominimona iobillacina feiñuana jitañedimaci; iadedi Jusiñamuimona iobillacina jitañdimaci.

**3** <sup>1</sup>Bie cartana omoi feiñuanona, iena facallemona, damierie comecin facaite: "Judíuaidicai; ia naiemona, ¿niese jiae comini baifemo faiticai? Cai abiaina detataticai; ia naiemona jaca buena oñedicai". <sup>2</sup>Le jira omoimo lloiacadicue: "Judíuaina cai illana eo mare". Jusiñamuidi dani caímo ie rafuena llote. Jiae cominiimo lloñede. <sup>3</sup>Cai cominiñimona dajerie Jusiñamui rafuena iñóñedimaci; iadedi Jusiñamuidi ie lloga rafuena jaca finode. <sup>4</sup>Comini tainona llotimaci; iadedi Jusiñamuidi uanaicinona jaca llote. David micori iena jaie llote:

O lloga uaimona uanaicinona o lloullana uiñoticai.

O finoca rafuena jiae comini uaitaia, o dinena jaca anafenodio. Iena uiñoticai.

<sup>5</sup>Dane damierie comecin facaite: "Jusiñamuidi mareuidimie. Cai baifemo

uaide. Cai maraiñedicinona cai finuamona caina Jusiñamui jitaia, jiae cominidi Jusiñamui jaca mareuillana uiñoitimaci. Cai illa muidona Jusiñamuina iese uiñotimaci. Ie muidona naimiedi cai jeacino facaina caina duere finoñena, jiae cominina naimiena cai uiñotaja jira". Omoimona iese dajerie comeciaina facadimaci; <sup>6</sup>iadedi iese iñede. Cai jeacino facaina caina duere finoñeniadedi, Jusiñamuidi jiae cominina jiai duere finonite.

<sup>7</sup>Taino cue lloia, iena naimie oni datoria, naimiedi mare rafuena finuana cominidi uiñotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena. <sup>8</sup>Omoimona dajerie cuena ñaitimaci: "Bimie raite: 'Jusiñamui marcenona finuana raise cai uiñollena, maraiñedicinona finocana cai jailla'". Iese cue lloñena jira, Jusiñamui naimacina duere finoia, cuemonia mare.

#### Jeacinona nana cai finodicai

<sup>9</sup>Judíuaidicai; iadedi jeacinona nana comini finua jira, jiae nairai baifemo faiñedicai. Judíuaidicai; iadedi jeacinona finodicai. Judíuaiñedinodi jeacinona jiai finodimaci. <sup>10</sup>Jusiñamui facaina lloraini micoriai iena jaie cuete:

Marebicaidino jaca iñede. Nana comini maraiñedimaci.

<sup>11</sup>Jaca buna Jusiñamuina raise uiñoñedimaci. Naimiena raise uiñoiacaiñedimaci.

<sup>12</sup>Mare rafuedo nana jaiñedimaci. Maraiñedicinona finooidimaci.  
Jaca buna marcenona finoñedimaci.

<sup>13</sup>Jeare ñaicabitimaci. Tainona llocabitimaci.  
Naimaci ñaimona diga jearede rafue comuicabide.

<sup>14</sup>Naimaci fuiā eo borede.

<sup>15</sup>Icirillamona jiae cominina raire meineticaci.

<sup>16</sup>Nine naimaci jaia, diga maraiñede rafuena comuitatimaci.

<sup>17</sup>Uri illana uiñoñedimaci.

<sup>18</sup>Jusiñamuina jaciruiñedimaci jaie iese cuete. <sup>19</sup>Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, dani abi imaci riidolle uai iñede. Nana comini Jusiñamui duere finollicino anamo itimaci. Iena uiñoticai. <sup>20</sup>Moisés micori lloga uaina iiñuamona, Jusiñamui jitailla isoi, jaca buna marebicaiñeite; iadedi naie lloga uaina cai uiñuamona, jeacinona cai finuana uiñoticai.

#### Jesucristona cai iiñuamona jillobidicai

<sup>21</sup>Jusiñamuidi birui caina marebitatajana jai uiñotade. Moisés micori lloga rafuedo iena birui uiñoñedicai; iadedi Moisés micori iena jaie llote. Jusiñamui facaina lloraini micoriai iena jiai llotimaci.

<sup>22</sup>Jesucristona cai iiñuamona, Jusiñamuidi caina marebicaitate. Nana Jesucristona iiñotinona marebicaitate. Nie isoide cominina cai ia, caina marebicaitallena, caina daje isoi feiñoite. <sup>23</sup>Nana caidi jeacinona finodicai. Jusiñamui caina jitailla isoi, marena iñedicai. <sup>24</sup>Caina naimie duenallamona, naimie jitailla jira, Cristo Jesúna cai iiñuamona, caina marebicaitate. <sup>25</sup>Jesucristo nia biñena facaise ite cominimo jeacino facaina Jusiñamuidi ibana ofñede. Naimaci jeacino facaina Cristo Jesús fioldallena, cai facaina naimie fioldallena, Jusiñamui naimiena oretate. Naimiena birui cai iiñoia, caina duere finoñeite. Jusiñamuina mareuidimienra uiñoticai. <sup>26</sup>Naimiena iese oretajamona, Jesúna

iinotimieno Jusiñamuidi marebicaitaja jira, Jusiñamuina mareuidimieno uiñotici.

<sup>27</sup>Cai jeacinomona marena cai illena, buena finoñediaci. Ie jira cai finuamona abi ideoñediaci. Buena finoñediaci; iadeci Jesucristona cai iinuamona, jilllobidicai. Ie jira cai finoca rafueri abina ideoñediaci. <sup>28</sup>Moisés micori lloga uaina cai iinuamona, marebicañediaci; iadeci Jesucristona cai iinuamona marebicaidicai.

<sup>29</sup>Jusiñamuidi danu judíua imaci Mooñede; iadeci naimiedi nana comini imaci Moo. <sup>30</sup>Cai Moodi jaca damiena jira, naimieno naimaci iinua jira, judíuaña marebicaitate. Naimieno naimaci iinua jira, judíuañedinona jiai marebicaitate. <sup>31</sup>Cai iinuamona cai marebicailla jira, Jusiñamui facaina lloraini micoríja jaie lloga uaina caitañediaci; iadeci iena ua iinocana jaidicai.

#### Abraham micorímona fueoticaí

**4** <sup>1</sup>Abraham micori rafuena ja ñaia cadicue. Naimie marebicailla fuena omoímo lloiacadicue. <sup>2</sup>Ie finoca rafuemona naimie micori marebicaidena, naimie micori abina iedote; iadeci ie finoca rafuemona naimie micori marebicañede. Ie jira Jusiñamuimona naimie micori abina iedoiaçaiñede. <sup>3</sup>Iena Moisés micori jaie cuega: “Jusiñamuina Abraham micori iinua jira, Jusiñamuidi naimie micorina jeacinona jaca finoñedimieno isoitate. Naimie micorina marebicaitate” cuega. <sup>4</sup>Maijillena buna damie ocuiadeci, ibajana jamai fecañeite; iadeci maijia facaina feacate. <sup>5</sup>Ero, ie maijiamona jaca bu jeacinona jaca finoñedimieno isoiaçaiñede. Jusiñamuina naimaci iinua jira, Jusiñamuidi maraiñedinona marebicaitate. <sup>6</sup>Bie rafuena David micori jiai jaie cuega:

Ie maijiamona bu marebicañena jira, Jusiñamui marebicaitagamiedi iocire iite.

<sup>7</sup>Naimaci maraiñediginona Jusiñamui dotajamona, iocire iitímaci. Jusiñamui naimaci jeacinona dane abido ietañeite.

<sup>8</sup>Naie jeacinomo Jusiñamuidi começina dane facañeite. Naimiedi jai feitaite. Ie jira iocire iitímaci.

<sup>9</sup>Danu abina detatatiño iocire illena lloñede; ia abina detatañedinomo iena jiai llote. Jusiñamuina Abraham micori iinua jira, Jusiñamui naimieno marebicaitate. <sup>10</sup>Naimie micori abina nia detatañenia, naimie micori marebicaide. <sup>11</sup>Naimie micori marebicailla mei, Jusiñamui dinena Abraham micorimo abi detatajana llote. Abraham micori ie abina detatajamona, Jusiñamuina naimie micori iinuana uiñotici. Ie abina detatajamona, judío imieno jai jaide; iadeci Jusiñamuina iinuamona, naimie micori marebicaide. Ie jira Abraham micoridi nana Jusiñamuina iinotino moo. Nana comini abiaina detatañedimaci; iadeci naimaci iinua jira, Jusiñamui naimacina marebicaitate. <sup>12</sup>Cai comini abiaina detatatiñaci; iadeci cai moo Abraham micori isoi naimaci iinua jira, Abraham micori isoi marebicaidimaci. Ie jira Abraham micori nana naimaci moo.

#### Abraham micori iinuamona, Jusiñamui lloga uaidi suide

<sup>13</sup>Abraham micorimo Jusiñamuidi: “Nana enirue omo iiticue” llote. “O uruiaimo iena jiai iiticue” llote. Moisés micori llogacina Abraham micori iinua jira, iese Jusiñamui lloñede; iadeci Jusiñamui lloga uaina Abraham micori iinua jira, iese Jusiñamui llote.

Abraham micorí iinua jira, Jusiñamuidi naimiena marebicaitate. <sup>14</sup>Moisés micorí lloga uaina iinotinomo: “Nana eniruena omoimo iiticue” Jusiñamuidi llotena, Jusiñamuina iinotino taínona iinotimaci. Jusiñamui lloga uai jiai jai saide; iadedi iese iñede. Dani naimiena iinotinomo: “Nana eniruena omoimo iiticue” llote. <sup>15</sup>Moisés micorí lloga uaina naimaci raise iinoñenia, Moisés micorí lloga uaido jaidino Jusiñamui riicaillifue anamo itimaci; iadedi Moisés micorí lloga uai iñedena, Jusiñamuimona buna duere sefuiñeite.

<sup>16</sup>“Eniruena omoimo iiticue” naimiena iinotinomo Jusiñamuidi llote. Duenallamona llote. Nana Abraham uruiai micoriaimo iena llote. Dani Moisés micorí lloga uaido jaidinomo lloñede; iadedi Abraham isoi iinotinomo jiai llote. Abraham micorí isoi cai jailla jira, naimiedi cai moo. <sup>17</sup>Jusiñamui iena jaie llote: “Ona diga nairai imaci moona jai itataiticue” llote. Jusiñamui fiodaitinona jilloitarede. Nia iñede rana ie uaido jiai comuitate. Ie jira Jusiñamui Abraham micorimo illua isoi, suide. Jai fiodaitino illa isoi Abraham micorí abi illa jira, Jusiñamui naimie abina mairitate. Ie aí oiniñomo urue comuillena llote.

<sup>18</sup>Jusiñamui Abraham micorimo jiai llote: “Ailluena uruiai omo iite. Diga nairai omona jebuite” llote. Abraham micoridi naie iinorainiga rafuena iinote. <sup>19</sup>Jaca iinote; iadedi cien años naimie micorimo illamona, naimie jai eeiroma. Naimie micorí aidí, Sara micoridi, oiniñona jira, naiñaiño uruedi comuiñede. <sup>20</sup>Abraham micoridi Jusiñamui illuana iinote. Iinocana jaillano, iobillacina Jusiñamuimo fecade. <sup>21</sup>Abraham micoridi Jusiñamui lloga uaina finuana eo iinote. <sup>22</sup>Ie jira Jusiñamui naimiena marebicaitate.

<sup>23</sup>Naie rafue jaie cuega; iadedi dama Abraham micorimo duiñede; <sup>24-25</sup>iadedi caimo jiai duide. Jusiñamuina iinotinona marebicaitate. Cai Nama Jesús fiodaillamona, Jusiñamuidi naimiena jillotate. Cai jeacino facaina fiodaite. Caina marebicaitallená, naimiena jai jillotate.

#### Jai cai marebicaidicai

**5** <sup>1</sup>Jusiñamuina cai iinuamona cai marebicaila jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai. <sup>2</sup>Jesucristo muidona Jusiñamui caina duenallamona, caina marebicaitate. Naimie ebirena isoi cai illemo caimare ocuiridicai; <sup>3</sup>iadedi duere cai sefuiadedi, jiai iobidicai. Duere sefuillamona, cai comeciaí ocuiñocana cai jaillana uiñoticai. <sup>4</sup>Cai comeciaí ocuiñuamona facacifidicai. Facacifillamona, Jusiñamuimo ocuiridicai. <sup>5</sup>Jusiñamui caina isiruilla jira, taínomo ocuirñeitacai. Ie Joreñona caimo fecade. Ie Joreño cai comeciaimo illa jira, ie Joreñodo Jusiñamuidi caina naimie caina isiruillana uiñotade.

<sup>6</sup>Cai jeacimonoma daní jillonidicaimo, Cristo cairi fiodaite. Maraiñedicai; iadedi naie facaiseconi cairi fiodaite. <sup>7</sup>Maraiñedimie facaina caimoná jaca buna fiodaiacaiñede. Caímona nibai damie maremie facaina fiodaite; iadedi nana comini iese fiodaiacaiñedimaci. Maraiñedimie facaina jaca buna fiodaiacaiñede; <sup>8</sup>iadedi nia maraiñedicaimo, Jusiñamui caina isiruillamona, Cristo cairi fiodaite. <sup>9</sup>Cristo cairi fiodaillamona, jai marebicaidicai. Ie muidona Jusiñamui caina duere finuacínomona Cristodi caina jillotaite. <sup>10</sup>Cai dinena Jusiñamuina cai enoilla facaiseconi naimie Jito cairi fiodailla muidona, ie

Jito jillua muidona, Jusiñamui caina jai nabaide. Naimie caina nabailla jira, cai ico jilloillena raise uiñoticai.<sup>11</sup> Cai Nama Jesucristo muidona, Jusiñamuir iobidicai. Cristo muidona Jusiñamui diga uri iticai.

### Adán micori finoca rafue

<sup>12</sup>Bie rafue jai suide. Adán micori jeacinona finuamona, nana caimo jeacinodí jai comuide. Jeacino caimo illa muidona, cai jeacino ite diga nana fiodaicana jaidicai.<sup>13</sup> Moisés micori llogacino nia iñenia, jeacinona finodimaci; iadedi Moisés micori llogacino nia iñenia, Jusiñamuidí jeacino facaina ibana oñede.<sup>14</sup> Moisés micori llogacino nia iñenia, Adán micori facaisemona Moisés micori facaisemo naimaci jeacino ite diga nana comini fiodaicana jaidimaci. Adán micori isoi jeacinona finoñedimaci; iadedi fiodaicana jaidimaci. Adán micoridí Cristo isoiñede. Adán micori finoca rafuemona jeacino comuide. Cristo finoca rafuemona Jusiñamui cai jeacinona oni dotade.

<sup>15</sup> Adán micori finoca rafuedi Jusiñamui finoca rafue isoiñede. Adán finoca rafuemona cai jeacino ite diga nana cai fiodaicana jaidicai; iadedi Jusiñamui finoca rafue Adán micori finoca rafue baifemo faite. Jusiñamui jitaila jira, caina naimie duenaillamona, cai dine Jesucristona orede, nana cai jilloillena.<sup>16</sup> Dama Adán micori jeacinona finuamona, Jusiñamuidí nana caina duere finollicino anamo itatare; iadedi Jesucristo fiodaillacino, Jusiñamui jitaila jira, caina marebicaitate. Ailluena jeacinona finodicai; iadedi marebicaidicai.<sup>17</sup> Dama Adán micori jeacinona finuamona, cai jeacino ite diga nana cai fiodaicana jaidicai.

Jusiñamui caina eo duenaillamona, Jusiñamui caina marebicaillamona, dama Jesucristo muidona, Jusiñamui diga jaca iticai.

<sup>18</sup>Dama Adán micori muidona, nana comini duere finollicino anamo itimaci; iadedi dama Jesucristo finoca mare rafuemona Jusiñamui diga naimaci jaca illena, nana comini marebicairedimaci.

<sup>19</sup> Adán micori Jusiñamuina iñoñenamona, nana comini jeacinona finodimaci. Jesucristo Jusiñamuina iñuamona, ailluena comini marebicaitimaci.

<sup>20</sup> Jusiñamui Moisés micorimo rafuena llote. Iena comini iñoñenamona, diga jeacinona naimaci finuana uiñotimaci. Jeacino finocana jaidimaci; iadedi Jusiñamuidí naimacina eo duenaita.

<sup>21</sup> Jeacino anamo jaie nana cai illa jira, cai jeacino ite diga fiodaicana jaidicai; iadedi Jusiñamui duenaillacino anamo birui iticai. Ie jira cai marebicaillamona, cai Nama Jesucristo muidona, Jusiñamui diga jaca iticai.

### Jesucristomo cai duillamona, jeacino anamo jai iñedicai

**6** <sup>1</sup> Jeacino anamo jai iñedicai; iadedi omoimona damierie comeicina facaite: “Naga icaiño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uiñollena, jeacino eo finocana jaiticai. Lemona cai jeacinona oni dotajamona, naimie caina duenaillana eo raise uiñoiticai”.<sup>2</sup> Iese comeicina facañeno. Jeacino anamo jai cai iñena jira, jeacinona finocana cai jaiñena.<sup>3</sup> Biena uiñotomoí. Cristo Jesús dibeimo cai illamona, nana caidi bautizagacai. Cristo fiodailla jira, cai comeciaímo ite jearedicino anamo jai iñedicai.<sup>4</sup> Cristo fiodailla jira, raiafomo naimiena jonetimaci. Cristo

fiodaillamona ie Moo uaido jillode. Naimie dibeimo cai illamona, cai jeacino anamona jillodícaí. Cai comeciaimo jiae rafue birui illa jira, jiae rafuedo jai jaídicaí.

<sup>5</sup>Cristo fiodaite; iadedi naiemona jillode. Naimie dibeimo cai illanona, cai comeciaimo ite jearedicino anamona cai jillua jira, Cristo ie mare rafue anamo birui iticai. <sup>6</sup>Cristo fiodailla jira, cai comeciaimo ite jearedicino anamo jai iñedicaí. Caimo jai jainaiañena jira, jeacino finocana cai jaiñena. <sup>7</sup>Jeacino anamo jai cai iñena jira, jeacinona finocana cai jaiñena. <sup>8</sup>Cristo fiodaite; iadedi jillode. Naimie fiodailla jira, cai jearedicino anamo jai iñedicaí. Naimie jillua jira, jiae rafuedo birui jaídicaí. <sup>9</sup>Fiodaillamona Cristo jillua jira, naimiedi dane fiodañeite. Naimie fiodaitemo, cai jeacino facaina naimiedi jai fiodaite. Jai dane fiodañeite. <sup>10</sup>Jeacino facaina jeacinona oni dotallena, naimie dacaiño fiodaite; iadedi ie Moona jaca iobitajanona, naimie ie Moo dibeimo jaca iiite. <sup>11</sup>Ie jira jeacino anamo iñenanomo omoi comeciaina faca. Cristo Jesú dibeimo jai omoi illanona, Jusiñamui jitaila rafuena finollemo omoi comeciaina faca.

<sup>12</sup>Jeacino finocana jaiñeno. Omoi comeciai jeacinona finoacania, iena iñóñeno. <sup>13</sup>Jeacinona omoi finoñellena, omoi comeciaina ocuiño. Mare naimie jitailacina omoi finollena, Jusiñamuina iño. Jeacino anamo jaie omoi illa jira, naimiemo omoi nia duiñena jira, Jusiñamuimona fiodaitino isoidomoi; iadedi jeacino anamo birui omoi iñena jira, naimiemo omoi jai duilla jira, Jusiñamuimona fiodaillamona jai jillodíno isoidomoi. Jaie naimiemo duiñedomoi; ia birui naimiemo jai duidomoi. <sup>14</sup>Moisés

llogacinuaí anamo omoi jai iñena jira, jeacino anamo jai iñedomoi. Jeacinona finocana omoi jaiñellena, Moisés micori llogacinodo jaiñedomoi; iadedi jeacino omoi finoñellena, omoina Jusiñamui duenallamona, naimie omoina birui canocabide.

#### Patrón anamo itinomona cai fueolle

<sup>15</sup>Moisés micori llogacinoo anamo jai iñedicaí; iadedi omoimona damierie comeciná facade: "Moisés micori llogacinoo anamo cai iñenamona, jeacino cai finoia, Jusiñamui caína duere finoñeite". Iese comeciná facaño. Jeacinona finocana cai jaiñena. <sup>16</sup>Bienia uiñoticai. Patrón anamo bu ia, ie patrón comeci jitaila rana finode. Le ocuica rana iñote. Ie isoide. Jeacino anamo omoi ia, jeacinona finocana jaidomoi. Jeacino omoi finuamona omoi jeacino ite diga fiodaicana jaidomoi. Ie jira Jusiñamui illanomo ico iñetomoi. Jusiñamui anamo omoi ia, Jusiñamui jitaila rafuena finocana jaidomoi. Naimie illanomo ico iitomoi. <sup>17</sup>Jeacino anamo jaie itomoi. Iemei omoimo jiae comini Jesucristo rafuena jai llotimaci. Iena cacajanona, iena raise iñotomoi. Ie jira Jusiñamuimo iobillacina fecadicue. <sup>18</sup>Jeacino anamona jai jillobilamona, marecinona finocana jai jaidomoi.

<sup>19</sup>Cue Iluana omoi raise cacaillena, bie isoide rafuena lloticue. Omoi comeciai railla jira, jeacinona navui finodomoi. Maraiñedicinona finocana navui jaidomoi. Cristo dibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciai Jusiñamui jitaila isoi marena iitomoi.

<sup>20</sup>Jeacino anamo navui omoi ia, Jusiñamui jitaila isoi, marecinona finoñedomoi. <sup>21</sup>Jeacinona navui omoi

finuamona mare rafuena oñedomoi. Ie jira iena birui meiruitomoi. Jeacinona finocabidino fiodaillamona, Jusiñamui illanomo ico iñeitimaci. <sup>22</sup>Jeacino anamona jai jillobidomoi. Jusiñamui anamo omoi jai illa jira, naimie ocuica rafuena finodomoi. Iena omoi finuamona, Jusiñamui jitaila isoi, marecinona finocana jaitomoi. Ja muidomo naimie diga iitomoi.

<sup>23</sup>Jeacinona finocana omoi jaia, omoi jeacino ite diga fiodaitomoi. Jusiñamui illanomo ico iñeitomoi; iadedi cai Nama Jesucristona omoi iiñuamona, Jusiñamuidi omoina jaca itataite. Naimie illanomo ico iitomoi.

#### Ínirede riñomona cai fueolle

**7** <sup>1</sup>Cue amatiai, Moisés micori llogacinuaina uiñotomoi; iadedi iena nia raise cacaiñedomoi. Ie fiodailla mei, jaca buna Moisés micori llogacinuai anamo iñede. Ie fiodailla mei, jai iñena jira, nainomo duiñede. <sup>2</sup>Ie isoide. Nana naimie ille dinori, inirede riño ie ínimo duide. Iese Moisés micori jaie llote. Ie ini fiodailla mei, ie ínimo jai duiñede. Naimie anamo naiñaiño jai iñena jira, jiaimiena naiñaiño oia, ie inina illena, Jusiñamuimona mare. <sup>3</sup>Ie ini nia fiodaiñenia, jiaimie diga naiñaiño ia, ie ini abimo jeacinona jai finode, Moisés micori lloga uai naiñaiño iñonoñena jira. Ie ini fiodailla mei, naimie anamo naiñaiño jai iñena jira, jiaimiena ie inino naiñaiño oia, jeacinona jai finoñede.

<sup>4</sup>Ie isoide. Cristo fiodailla jira, Moisés micori llogacinuai anamo jai iñedicai. Iemo jai duiñedicai. Ie jira Cristomo jai duidicai. Jusiñamui jitaila rafuena finocana cai jaillena, fiodaillamona Cristo jai jillode. <sup>5</sup>Jusiñamuina nia cai iñonoñenia, cai jitaille rafuena finocana jaidicai. Moisés micori llogacinona

uiñoticai; ia cai maraiñede jitaila rafuena finocana jaidicai. Cai jeacino ite diga fiodaicana jaidicai; <sup>6</sup>ia Moisés micori llogacino jai saide. Caimo jai duiñede. Navui ie anamo iticai; iadedi birui ie anamo jai iñedicai. Jusiñamuina cai sedajamona, Jusiñamui Joreño rafuedo jai jaidicai. Moisés micori cuegafuiaido jai jaiñedicai.

#### Cue comecimo ite maraiñedicino

<sup>7</sup>“Moisés micori llogacino maraiñede” lloñeiticai; iadedi naie llogacino iñedená, jeacinona uiñonédicue. Jiaimíemo ite rana cue niciduana maraiñenana jaie uiñoñedicue. Moisés micori jaie llote: “Jiaimíemo ite rana nicidoñeno” llote. Ie jira nailemona niciduanana maraiñenana uiñoticue. <sup>8</sup>Naie llogacino muidona cue comeci jeacinona finoacade. Ie muidona rana nicidoticue. Naie llogacino iñedená, jeacino finuana uiñoiacaiñedicai. Naie llogacino iñedená, jeacino anamo iñedicai. <sup>9</sup>Moisés micori llogacinona nia cue uiñoñenia, caimare uri iticue. Naiena cue uiñuamona, jeacino cue finuana uiñoticue. Ico Jusiñamui diga cue iñenana uiñoticue. <sup>10</sup>Nano cue comecina facadicue: “Naiedo cue jaillamona, Jusiñamui diga ico jaca iiticue”. Iese cue comecina facadicue; iadedi naie llogacinona cue uiñuamona, Jusiñamui dibeimo cuena jaca itatañede. <sup>11</sup>Naie llogacino muidona cue comeci jeacinona finoacana jira, cue jitaila rafuena oñedicue. Ico Jusiñamui diga jaca cue illena oñedicue; iadedi duere cue sefuillcinciona oticue. Naimie dibeimo Moisés micori llogacino cuena itatañede; ia naimie dibeimona cuena itata.

<sup>12</sup>Iese ite; iadedi Moisés micori llogacinodi mare. Jusiñamuimona ite.

<sup>13</sup>Naie llogacino mare. Naie rafue

muidona fiodaiñiticue; ia jeacino muidona fiodaiticue. Jeacinona cue finua jira, Jusiñamui illanomo ico jaca iñeiticue. Naie mare llogacinomona jeacino cue finuana eo maraiñenana uiñoticue.

<sup>14</sup>Jusiñamui Joreño Moisés micorina naie llogacinona cuetataate. Ie jira naicino mare; iadedi cue jitaila rafuena cue finua jira, cuemo jeacino illa jira, jeacino finoraimana iticue. <sup>15</sup>Cue finua rafuena raise uiñoñedicue, cue mare jitaila rafuena cue finoñena jira. Cue gaiñena maraiñede rafuena finocabidicue. <sup>16</sup>Cue maraiñede finoacaiñega rafuena cue finoiaide, Moisés micori llogacino marenana uiñoticue. <sup>17</sup>Cue comeci iena dama finoñede; iadedi cue comecimo ite jeacino cuena finotate. <sup>18</sup>Cue comecimo marcino iñede. Mare rafuena finoacadicue; iadedi iena finonidicue. <sup>19</sup>Cue mare finoacaga rafuena finoñedicue; iadedi cue maraiñede finoacaiñega rafuena finodicue. <sup>20</sup>Cue finoacaiñega rafue cue finoiaide, cue comeci iena dama finoñede; iadedi cue comecimo ite jeacino cuena iena finotate. <sup>21</sup>Biese cuemo suicabide. Mare rafuena cue finoacaniadeti, jeacinona finocabidicue. <sup>22</sup>Cue comeci Jusiñamui lloga uaina gaide; <sup>23</sup>iadedi cue comecimo maraiñede rafuena illana uiñoticue. Cue comecinamataacade. Cuena jeacinona finotaiacade.

<sup>24-25</sup>Eo dueredicue. Jusiñamui lloga uaina cue comecimona finoacadicue; iadedi cue comecimo ite maraiñede rafue cuena jeacinona finotaiacade. Jeacino finocana cue jaia, duere sefuiticue. Jusiñamui illanomo ico jaca iñeiticue. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Ie jira Jusiñamuimo cue iobicabillasa.

### Jusiñamui Joreño cai comeciaina namatacana cai jailla

**8** <sup>1</sup>Cristo Jesúmo duidinodcai. Ie jira Jusiñamuidi caina duere finoñeite. <sup>2</sup>Jeacino anamo jai cai iñena jira, caina duere finoñeite. Jeacinona cai finuamona, Jusiñamui illanomo ico jaca iñeitica. Duere sefuiticai; iadedi naiemona Jusiñamui Joreño caina jai jillotate. Jesucirstomo cai duillanona, caina jaca itataite. <sup>3</sup>Moisés micori llogacinona cai raise iinoñena jira, jeacinomona danjilloniñicai. Ie jira Jusiñamuidi ie Jitona orede, iimana naimie jaillena. Cai isoi naimie jaide; iadedi naimiedi jeacinona finoñede. Jeacinona finorainidicai. Cai jeacino facaina fiotaillena, naimiena orede. Naimie uaidi cai jeacinona anafefitate. Ie jira jeacino anamona jai caina jillotate. <sup>4</sup>Iese finode, cai marena illena, Moisés micori llogacino llua isoi. Ie jira cai comecimo ite maraiñede jitaila rafuedo jai jaiñedicai; iadedi Jusiñamui Joreño jitaila rafuedo jai jaidicai.

<sup>5</sup>Cai comecimo ite maraiñede jitailacindo cai jaiadeti, naiemo cai comeciaina facadicai. Iena finodicai; iadedi Jusiñamui Joreño jitaila rafuedo cai jaiadeti, iemo cai comeciaina facadicai. Naimie jitaila rafuena finodicai. <sup>6</sup>Marañede jitaillicinomo comeciaina facacabidino Jusiñamui diga ico jaca iñeitimaci; iadedi Jusiñamui Joreño jitaila rafuedo jaidino Jusiñamui diga jaca iitímaci. Jiai jaca uri iitímaci. <sup>7</sup>Jiaino Jusiñamuina enoidimaci. Jusiñamui lloga uaina jitaiñedimaci. Iena iñonidimaci. <sup>8</sup>Iese itino Jusiñamuina iobitanidimaci.

<sup>9</sup>Iese iñedomoi; iadedi Jusiñamui Joreñomo jai duidomoi. Naimie omoimo ite. Bumo Jusiñamui Joreño iñenia, Cristomo nia duiñede.

<sup>10</sup>Jeacinona omoi finua jira, fiadaitomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebicaitaja jira. <sup>11</sup>Cristo Jesús fiodaillamona, Jusiñamuidi naimienia jillotate. Omoimo ie Joreño illa jira, omoi fiodaiaide, Jusiñamuidi ie Joreño uaido omoi abiaina jiai jillotaite.

<sup>12</sup>Cue amatiai, iese caimo suite. Ie jira cai comeciaimo ite maraiñedicinodo cai jaiñelli. <sup>13</sup>Naicinodo cai jaia, Jusiñamui illanomo ico jaca iñeiticai; iadedi Jusiñamui Joreñodi caina canuamona, naicino anamona cai jilluanona, Jusiñamui illanomo ico jaca iitcrai.

<sup>14</sup>Nana Jusiñamui Joreño namatadinodi Jusiñamui uruiai. <sup>15</sup>Jusiñamui Joreñona feiñoñedomoi, naimienia omoi jaciruillena; iadedi Jusiñamui uruiaina omoi jaillena, naimienia feiñotomoi. Duere sefuillacina navui jaciruitomoi; iadedi birui: "Cai Moo" raillanova, Jusiñamuina uaidotomoi. Ie jira naimienia jai jaciruiñedomoi. <sup>16</sup>Cai comeciaina Jusiñamui Joreño uiñotajamona, cai comeciaimona Jusiñamui uruiaidicaina jai uiñoticai. <sup>17</sup>Naimie uruiaidicaina jira, ie uruiaimo fecaacalle ra caimo jai duide, Cristomo jai duilla isoi. Naimie dibeimo cai illanona, Cristo isoi cai duere sefuiilla jira, naimie isoi ie Moo illanomo ico iiticai.

<sup>18</sup>Bienia uiñoticue. Bene birui duere sefuidicai; iadedi iemo cai comeciaina cai facañena, monamo ico eo marena jaca cai illena jira. <sup>19</sup>Iese cai illemo nana Jusiñamui finoca radi iocire birui ocurridimaci. <sup>20</sup>Nana eniruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico

dane marena naimaci illemo ocurridimaci, <sup>21</sup>naimaci rifaillamona ico naimaci jillua jira. Ie mei Jusiñamui uruiaidicaina isoi marena iitimaci. Dane fiodaiñeitimaci. <sup>22</sup>Bienia uiñoticai. Nana Jusiñamui finoca radi danomo eo duere sefuicana nia jaidimaci. Marena illemo nia ocurridimaci. <sup>23</sup>Dani naimaci duere sefuicana jaidimaci; iadedi jiai duere sefuidicai. Jusiñamuidi ie Joreño caimo fecaja jira, ico cai marena illena uiñoticai. Monamo Jusiñamui uruiaina ico cai illemo ocurridicai. Cai fiodaia, fiodaillamona cai abiaina jillotaite. Jiaifo eruaite cai abiaimo meidllemo ocurridicai. Ie mei cai abiai dane fiodaiñeitimaci. <sup>24</sup>Naiemo cai ocurillamona, cai jeacínomona navui jillobidicai. Bumo ie jitaille ra ia, iemo naimie ocurriñede. Ie feiñoñega ramo ocurride. Ie isoidemo ocurridicai. <sup>25</sup>Caimo suiñede rafuemo cai ocurilla jira, iemo fecuise ocurridicai. <sup>26</sup>Birui duere cai sefui, ico marena cai illemo ocurridicai. Jusiñamui Joreño caina jiai canode. Jusiñamuimo cai jiia, naimiemo cai jicanua rafuena cai raise uiñofenia, ie Joreño cai facaina ñaite. Naimiedi cai jino botanide uaina Jusiñamuimo llote. <sup>27</sup>Jusiñamui cai comeciaina uiñote. Naimie jitailacinona ie Joreño jiia jira, iena uiñote. Jusiñamui cominidicai. Ie Joreño cai facaina ñaiana cacade.

### Jusiñamui caina isiruite

<sup>28</sup>Jusiñamuina isiruitinodicai. Naimie jitalla jira, naimie caina fetode. Jusiñamuidi caimo suide rafuena marena suicana jaitate. Iena uiñoticai. <sup>29</sup>Caina isiruillanova, caina fetode. Nano dofocoñimona caina naimie Jito isoi cai illena itatare. Naimie Jitodi cai ama doforamienra. <sup>30</sup>Caina iese jaie itatajamona, birui caina uaidote. Caina

uaiduanona, caina jeacinona jaca finoñedino jai isoitate. Caina jeacinona jaca finoñedino jai isoitajamona, naimie illanomo ico cai ia, ebire iitcrai.

<sup>31</sup>Iese caina itataja jira, Jusiñamuidi cai facaina illa jira, bu cai facaina iñellená, damamai iesedicai.

<sup>32</sup>Jusiñamuidi ie Jitona duere sefuillamona jillotañede; iadedi namie jitaila jira, cai facaina ie Jitona orede, cairi fiodaillena. Ie muidona naimie dibeimo marena cai ille rafuena caimo jiai iite. <sup>33</sup>Jeacinona navui finodicai; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite. <sup>34</sup>Ie jira cai jeacino facaina jaca buna caina duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite.

<sup>35</sup>Cristo caina isiruite. Jaca buna Cristo caina isiruillacínoma baironide. Jiae comini duere caina finoia, caina jeare finoia, aime cai guia, cai iniroinia, jacirede rafue caimo ia, jiae comini caina meineia, Cristo caina nia isiruite. <sup>36</sup>Iena Jusiñamui facaina lloraima micori jaie cuega:

Jusiñamui muidona caina jaca  
meinetimaci, mercadomo toica  
llaudaiai fallena illa isoi

cuega. <sup>37</sup>Cristo caina isiruilla jira, caina naimie canuamona, naga bie isoide rafue caimo sua, cai comeciai ocuiñocana cai jailla. <sup>38</sup>Jusiñamui caina isiruite. Naimemonia jaca budi caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaidi, Taifedi, Janabadi Jusiñamui isiruillacínoma caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo sua, Jusiñamui

caina nia jaca isiruite. Jaca buna ie uaido Jusiñamui isiruillacínoma caina baironide. <sup>39</sup>Monamo ite radi Jusiñamui isiruillacínoma caina baironide. Eniruemo ite radi Jusiñamui isiruillacínoma caina baironide. Nana Jusiñamui finoca radi Jusiñamui isiruillacínoma caina baironide. Cai Nama Cristo Jesúmo cai duilla jira, Jusiñamui caina isiruillana uiñoticaí.

### Jusiñamuidi judíuai railla cominina fetode

**9** <sup>1-2</sup>Jiae rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comecinia uiñotajamona, iena uiñoticue. Cue cominiri sunaiticue. <sup>3</sup>Cue comini Cristo rafuena iiñoiacaiñedimaci. Ie muidona Jusiñamui riicaillifue anamo birui itimaci. Naiemona naimaci jilloillena, naimaci duere sefuillacino ifomo cue iticuedena, cuemonia mare. Naimacidi cue amatiai. <sup>4</sup>Israel railla cominidimaci. Jiaicidi judíuai railla cominidimaci. Jusiñamuidi naimacina fetode, ie uruiaina. Jusiñamui siño finoca rafuena ciodomaci. Iena naimaci iiñollena, Moisés micorimo Jusiñamuidi rafuena jiae llote. Naimiena sedallena jiae llote. Naimaci dine naimaci jilloitaramana oretallena jiae llote. <sup>5</sup>Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidicue.

<sup>6</sup>Cai cominimo Jusiñamuidi ie uaina llote; iadedi nana cai comini iena iiñóñena jira: “Jusiñamui ie lloga uaina finoñede” raiñeitcái. Jusiñamuina naimaci raise iiñóñena muidona, nana Israel micorimona comuide cominidi

Jusiñamuimo duiñedimaci. <sup>7</sup>Nana Abraham micorimona comuidinodi naimiemo duiñedimaci. Jusiñamui iena jaie llote: “Dama Isaacmona comuidinodi ua Abraham uruiai”. <sup>8</sup>Naie lluamona nana Abraham micorimona comuidinona ie uruiañenana uiñoticai. Jusiñamui lloga uaina iñnotinodi naimie ua uruiai. <sup>9</sup>Jusiñamuidi Abraham micorimo jaie llote: “Jiae año bie facaiseconi o dine abido biitucue. Naie facaiseconi o ai Saradí jitona jocoite” llote. Ie mei iese suide.

<sup>10</sup>Ie mei Isaac micoridi Rebeca micorina ote, naimie aína. Ie mei naiñaiño micoridi gorasana iaímaiai micorina jocode. Nano doforamiedi Esaú micori. Jiaimiedi Jacob micori. <sup>11-13</sup>Naiñaiño micori nia jocoñenia, Jusiñamuidi naiñaiño micorimo llote: “Nano doforamie ie ama anamo jaca iiite” llote. Jusiñamui facaina lloraima micori Jusiñamui lluana jiai cuete: “Jusiñamui llote: ‘Jacobna eo isiruiticue; iadedi Esaúna janore isiruiticue’ llote”. Naie iaímaiai micori nia jeiciñenia, iaímaiai micori marecinona nia finoñenia, iaímaiai micori maraiñedicinona nia finoñenia, Jusiñamuidi iaímaiai micorina iese llote. Ie finoca rafuemona Jacob micorina fetóñede; iadedi Jusiñamui jitalla jira, Jacob micorina fetode.

<sup>14</sup>“Jusiñamuidi dama Jacob micorina fetuana maraiñede” raiñeiticaí. Jusiñamuidi maraiñedicinona jaca finoñede. <sup>15</sup>Jusiñamui bie isoide rafuena Moisés micorimo llote: “Cue dinena cue jitallanona duenaiticue; ia cue dinena cue jitaiñenanona duenaiñeticue” llote. <sup>16</sup>Comini naimiena jitallamona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitalla jira, naimacina

duenaite. <sup>17</sup>Jusiñamuidi bie isoide rafuena Faraón micorimo llote. Moisés micori illa facaise Egípto railla enirue illaimadi Faraón micori. Naimiemo llote: “Ona illaimana jai itataticue. O uicomio siño rafuena finodicue, cue uai siñonana jiae comini uiñollena, nana cominido cue mameci sorillena”.

<sup>18</sup>Jusiñamui iese ite. Naimie dinena ie jitallanona duenaite. Naimie jitalla jira, jiae cominina naimieno iñnotañede.

<sup>19</sup>Níbai comeciaína facadomoi: “Cominina iese Jusiñamui itataia, ¿gueñellena naimacina duere finoacade?” <sup>20-21</sup>Iese comeciaína facañeno. ¿Niese nainona naimiemo ducaíitomo? Ero, jiñoramona nogona finodíñaiñodi ie jitalla dierise nogona finode. Dajerie ebirede nogona finode. Dajerie jamai nogona finode. <sup>22</sup>Ie isoide. Nana comini dajena eruañediaci. Ie jitalla isoi, jiaforie Jusiñamui caina comuitate. Jusiñamui ie jitalla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiai uiñotaacade; iadedi naimacina nia duere finoñede. <sup>23</sup>Cominina Jusiñamuidi jiai duenalla jira, naimacina ie siño uai ebirenana uiñotaacade. Naimie illanomo nanomona naimaci marena iitimaci. Iese naimie naimacina itatate.

<sup>24</sup>Jusiñamui caina iese itatate. Da judíuaina iese itatañede; ie iadedi judíuaiñedinona jiai iese itatate.

<sup>25</sup>Jusiñamui iena jaie lluana Oseas micori jaie cuete:

Cue cominiñedinodi cue cominina jaitimaci. Isiruiñeganona isiruiticue.

<sup>26</sup>Dane jiai cuete:

Navui cue cominiñedomoi; iadedi jiae comini omoina ico

lloitimaci: "Naimacidi jaca cajede  
caí Jusiñamui ie uruiaidimaci"  
lloitimaci

cuete. <sup>27</sup>Isaías micori railla lloraima jaie  
cuete: "Monaillai fuemo conillie eo ite.  
Ie isoi Israel micori uruiai eo  
jebuitimaci; iadedi Jusiñamuidi nana  
naimacina jillobitañeite. Dajeriena  
jillotajanona, <sup>28</sup>jiañomo ie lloga uaina  
raire finoite. Naimacina duere finoite"  
cuete. <sup>29</sup>Isaías micori jiai cuete:

Jusiñamuidi anamo nana ra ite.  
Jusiñamuidi Sodómamo ite comini  
micoriaina jaie cuenode.

Gomórramo ite comini micoriaina  
jiai jaie cuenode.

Naimaci micoriai isoi iñedici, nana  
caí cominina naimiedi duere  
finoñena jira.

#### **Judíuaidi Cristo rafuena jitaiñedimaci**

<sup>30</sup>Biemo comeciaina faca.

Judfuaiñedinodi Jusiñamui jitaila isoi,  
marena illana navui uiñoiacaiñedimaci;  
iadedi iena jai uiñotimaci. Jesucristona  
naimaci iiñuamona, marena illana jai  
uiñotimaci. <sup>31</sup>Jusiñamui jitaila isoi marena  
naimaci illena, judíuaidi Moisés micori  
llogacinodo jaidimaci; iadedi Moisés micori  
llogacinona naimaci raise iiñoñena jira,  
marena illana jaca uiñofedimaci.

<sup>32</sup>Naimaci finoca rafuemona marena  
iacadimaci. Marena naimaci illena,  
Jesucristona iiñoiacaiñedimaci. Naimie  
muidona marena iñeitimaci. <sup>33</sup>Isaías micori  
ieno jaie cuete:

Jusiñamui llote: "Ero, Jerusalémo  
cue Jitona oretaiticue.

Naimie muidona cominidi  
jilloñeitimaci.

Naimieno naimaci iiñoñenia,  
faifitimaci;

iadedi naimieno iiñotinodi tainona  
iiñoñeitimaci.

Suubicaiñeitimaci" llote.

**10** <sup>1</sup>Cue amatiai, judíuaí comini  
jilluana eo jitaidicue. Jusiñamui  
diga cue ñaia, iena jicadicue.

<sup>2</sup>Jusiñamui jitailacchinona eo  
finoacadimaci. Iena uiñoticue. Iena  
finoacadimaci; iadedi iena finuana raise  
uiñoñedimaci. <sup>3</sup>Jusiñamui naimacina  
marena itatallena uiñoñedimaci.

Naimaci finoca rafuemona marena  
iacadimaci. Jusiñamui llua isoi  
jaiacaiñedimaci. <sup>4</sup>Nana Cristona  
iiñotimedi Moisés micori llogacinodo  
naimie marena illena jai jaiñede.  
Cristona iiñuamona, Jusiñamui jitaila  
isoí, naimie marena jai ite.

<sup>5</sup>Moisés micori jaie cuete: "Naimie  
marena illena, cue lluado jaidimedi  
jaca iiite, cue lluana naimie raise iiñoña"  
cuete. <sup>6</sup>Iese jaie cuete; iadedi jaca buna  
iese iiñoñede. Cristona iiñuamona,  
marena Jusiñamui jitaila isoi, birui  
iticai. Jusiñamui uai llote: "Omoi  
comeciaina facañeno: 'Cristona cai  
baillena, naimieno bene cai atillena,  
monamo jaiticai. <sup>7</sup>Fiodaitino díne  
jaiticai, Cristona cai jillotallena'. Iese  
comeciaina facañeno" llote. Cristodi  
eniruemo jaie bite. Fiodaite; ia  
naiemona jai jillode. <sup>8</sup>Jusiñamui uai  
llote: "Naie rafue cai díne jai ite. Iena  
jai uiñoticai". Cai jilloillena Cristona cai  
iiñuana birui lloticai. <sup>9</sup>Jiaie cominimo:  
"Cristodi cai Nama" omoi lloia, Cristo  
fiodaillamona Jusiñamui naimie  
jillotajana omoi iiñoña, jilloitomoi. <sup>10</sup>Cai  
comecimona cai iiñua jira, Jusiñamui  
caina marena illana itataite. "Cristodi  
cai Nama" cai lloia, Jusiñamui caina  
jillotaite.

<sup>11</sup>Isaías micori iena jaie cuete:  
"Cristona iiñotinodi tainona  
iiñoñeitimaci. Suubicaiñeitimaci" cuega.

<sup>12</sup>Naie rafuedi nana cominina ñaite.  
Judíuaina ñaite. Judíuañedinona jiai  
ñaita. Jusiñamui anamo nana cominidi

itimaci. Nana naimiemo jicanotinona jaca duenaite.<sup>13</sup> Cristodi naga naimiemo jicanotimieno jillotaite; <sup>14</sup>iadedi Cristona naimaci nia iinoñenia, naimiemo jicanonidimaci. Cristo naimaci facaina fiodailla rafuena naimaci nia cacaiñenia, naimieno iionidimaci. Naimacimo naie rafuena jiae comini lloñenia, iena cacaiñeitimaci.<sup>15</sup> Jusiñamui ie rafue llorainina jai orede. Isaías micori iena jiae cuete: "Mare rafuena llotino cai dine billano, eo iobidicai" cuete.

<sup>16</sup>Iese cuete; iadedi ailluena comini naie rafuena nia jitaiñedimaci. Isaías micori iena jiae jiae cuete: "Jusiñamui, ailluena comini cai lluana iinoiacaiñedimaci" cuete. <sup>17</sup>Cai lluamona Cristo rafuena cacadimaci. Cristo rafuena cacajamona, damierie naimieno iionidimaci.

<sup>18</sup>Judíuaí comini naie rafuena jai cacadimaci. Jusiñamui facaina lloraima micori iena jiae cuete:

Naga eniruemo ite cominimo  
Jusiñamui lloraini micoriaidi naie  
rafuena jai llotimaci

cuete. <sup>19</sup>Judíuaí comini naie rafuena cacadimaci; iadedi iena iinoñedimaci. Moisés micori iena jiae cuete:

Jusiñamuidi llote: "Cue rafuena  
naimaci feiñua jira, judíuaíñedino  
diga uradoitomoi.

'Naimaci abina uiñoñedimaci'  
raitomoi;  
iadedi cue rafuena naimaci feiñua  
jira, naimaci diga iciritomoi" llote.

<sup>20</sup>Isaías micori marefodo jiae cuete:  
Jusiñamui llote: "Cueno jenoñedino  
cueno jai baitimaci.

Naimacina cue jilloitallenca cuena  
jicanofedinomo jai bairedicue"  
llote.

<sup>21</sup>Jusiñamui judíuaí cominina jiae llote:  
"Naimacina cue dine jaca uaidoticue;  
iadedi iinoiacaiñedimaci. Cueno  
jitaiñedimaci" llote.

### Judíuaí cominimona dajerie iinoñimaci

**11** <sup>1</sup>Jusiñamuidi judíuaína fañonocaillamo omoi comeciaina facañeno. Judío imiedicue. Abraham uruiai micoriaimona comuidicue. Benjamín railla nairai imiedicue.

<sup>2</sup>Naimacina jiae naimie fetua jira, Jusiñamui judíuaína fañonocañede. Elfámoo jiae ite rafuena uiñotomoi.

Jusiñamuimo naimiedi judíuaína llote:

<sup>3</sup>"Cue Nama, o facaina lloraini micoriaina meineticimaci. Ona cai sedajanona judaídrami. Dama cue fiebidicue. Cuena jiae meineiacadimaci". <sup>4</sup>Jusiñamui dinena uai ote: "Dama iñedio. Siete mil iñiai cue dibeimo nia eenoticue. Baal railla jiraraina jaca sedañedimaci. Cuena nia sedadimaci" llote. <sup>5</sup>Birui ie isoide.

Naimacina duenallamona, naimacina Jusiñamui fetua jira, dajerie Jusiñamui dibeimo itimaci. <sup>6</sup>Naimacina duenallamona, naimacina fetode.

Naimaci finoca rafue muidona naimacina fetoñede. Naimaci finoca rafue muidona naimacina fetodena, naimacina duenallamona naimacina fetoñede.

<sup>7</sup>Je jira iena iese lloitue. Ailluena judíuaidi marena Jusiñamui jitaila isoi illana oñedimaci; iadedi Jusiñamui fetocano iena otimaci. Ailluena comini iena iinoiacaiñedimaci. <sup>8</sup>Jusiñamui facaina lloraini micoriai iena jiae cuega: "Jusiñamuidi naimacina abina uiñotañede. Jusiñamui finoca rana naimaci cioia, iena uiñoñedimaci.

Jusiñamui rafuena naimaci cacajia, iena cacaiñedimaci. Birui iese nia itimaci" cuega. <sup>9</sup>David micori iena jiae llote: Naimacimo aillue ra illamona,

Jusiñamui naimacina duere finote.

<sup>10</sup>Naimaci comeciai Jusiñamui rafuena uiñoñeitimaci.

Naimaci finoca rafue anamo duere sefuicana jaca jaitimaci.

**Judíuañedonomona dajerie  
iinoitimaci**

<sup>11</sup>Naimie rafuena judíuaí comini jaitaiñena jira, Jusiñamui naimacina duere finode; iadedi naimacina sofeñede. Jusiñamuina judíuaí iinoñena jira, Jusiñamuidi judíuañedintonia jai jillotate. Naimacina jai jillotate, judíuaí dinena judíuañedintonia uradoillena. Uradoillamona Jusiñamuidi naimaci naimiena iinollena jitaide. <sup>12</sup>Cristona judíuaí jitaiñena jira, Jusiñamuimona judíuañedinodi diga mareninona birui feiñotimaci. Cristo dibeimo ico judíuaí ia, Jusiñamuimona judíuañedino ailluena feiñotimaci.

<sup>13</sup>Judíuañedino, omoimo rafuena lloiacadicue. Omoi dine Jusiñamuidi cuena orede. Cue maijari eo marena ñaiticue, <sup>14</sup>cue comini cuena uradoillena, Cristona dajerie iinotallena. <sup>15</sup>Cristona naimaci nia iinoñena jira, judíuañedino jai iinotimaci. Cristona ico judíuaí iinoia, Jusiñamui diga jaca iitimaci. <sup>16</sup>Janore jisa juilliruñu marenia, nana juilliruáidi mare. Riara ie Jainauai marenia, nana ie igaillai mare. Judíuaidi ie isoidimaci. Naimaci jaiagai micoriai Jainauai isoidimaci. Naimaci jaiagai marenia, naimacidi jiai mare. Birui ite judíuaidi igaillai isoidimaci.

<sup>17</sup>Taide igaillaidi ie amenamo jai duiñede. Ie isoidimaci. Naimacimona Cristona jiaíno iinoñena jira, Cristomo jai duiñedimaci. Sotaca riara isoi, naimaci ifomo itomoi. Ie jira Jusiñamuimona rafuena jai feiñocabitomoi. <sup>18</sup>Naimaci ifomo omoi illa jira, abina uradoiñeno. Igailaimona jainao cajellena, ie ijina oñede; iadedi iemo duilla jira, jainaomona igaillai cajellena, ie ijina ote. Ie isoide.

Naimiemo omoi duilla jira, Jusiñamuimona rafuena jai feiñocabitomoi.

<sup>19</sup>Comeciaina facadomoi: “Taide igaillai ifomo iticai isoidicai. Jusiñamui judíuaína oni dotade, caina fetollena”.

<sup>20</sup>Uanaicinona comeciaina facadomoi. Naimaci iinoñena jira, Jusiñamuidi naimacina oni dotade. Omoi iinua jira, naimaci ifomo itomoi. Ie jira abina uradoiñeno; iadedi Jusiñamuina omoi jacirui. <sup>21</sup>Naimiena naimaci iinoñena jira, judíuaína duere finode. Naimiena omoi iinoñenia, daje isoi omoina duere finoite. <sup>22</sup>Bieme comeciaina faca. Naimiena iinoñedintonia jai duere finode; iadedi omoina duenaite. Naimiena iinocana omoi jaia, naimie omoina nia duenaite. Iese omoi jaiñenia, naimie omoina dotaite. <sup>23</sup>Judíuaí Cristona iinoñeno navui jaidimaci: iadedi Cristona naimaci birui iinoia, naimie dibeimo Jusiñamui naimacina itatarede, igai riaramo sotaja isoi. <sup>24</sup>Ailli riaran cueticue. Naie amenamo nano duiñedomo. Judíuaí nainomo nano duidimaci. Jusiñamui jitalla jira, sotaca igai isoi, naimaci ifomo omoina jai itatare. Ie jira Jusiñamui jitalla, nainomo nano naimaci duilla jira, naimiedi judíuaína abido oite.

**Eo ailluena judíuaí jilloitimaci**

<sup>25</sup>Bie rafuena omoi uiñuana jitaídicue. Iena navui uiñoñedicai. “Judíuaí baifemo faíticai” omoi raiñellena, biena omoimo lloticue. Diga judíuaí Cristona birui iinoiacaiñedimaci. Jusiñamui jitalla díese judíuañedino jillua facaisena, iese iitimaci. <sup>26</sup>Ie mei eo ailluena judíuaí jilloitimaci. Jusiñamui facaina lloraini micoriai iena cuetimaci:

Jerusalémona cai Jilloitaraima biite. Jacob micori uruiaimona jeacinona dotaite.

<sup>27</sup> Naimaci jeacinona oni dotajanona, Jusiñamui jaie lloga uai suite.

<sup>28</sup> Cristona birui iinoiacaiñedimaci. Jusiñamuina enoidimaci. Jusiñamuina naimaci jitaiñena jira, naimie omoïna fetode. Ie jira jillodomoi; iadedi Jusiñamuidi judúaina nano jaie fetode. Naimaci jaiagai micoriaimo ie lloga uaina jira, naimacina nia isiruite. <sup>29</sup> Jusiñamui ie lloga uaina saiñede. Naimacina fetua jira, naimacina fainonocaiñeite.

<sup>30</sup> Jusiñamuina navui iinoñedomoi; iadedi Jusiñamuina naimaci iinoñena jira, Jusiñamui omoïna jai duenaite.

<sup>31</sup> Jusiñamuina jai iinoñedimaci; iadedi omoïna naimie duenalla isoi, Jusiñamuidi naimacina ico jiai duenaite.

<sup>32</sup> Jusiñamui nana cominina naimiena iinoñenana uiñotade, naimacina naimie duenallena. <sup>33</sup> Jusiñamui caina eo duenaite. Eo abina uiñote. Naga rana uiñote; ie iadedi naimie lloga uaina raise cacaiñedicai. Naimie finoca rafuena raise jiai uiñoñedicai. <sup>34</sup> Jusiñamui facaina lloraiña micori iena jaie cuete: "Jaca buna cai Nama Jusiñamui começi facajacinona uiñoñede. Jaca buna naimiemo ie finoca rafuena lloñede.

<sup>35</sup> Jiairuido ibana feiñollena, jaca buna naimiemo rana fecañede" cuete. <sup>36</sup> Naga ra naimiemo illa jira, naga ra naimiemona bite. Naga rana finode. Naimiemo iobillacinona cai fecacabillasa. Iena jitaidicue.

### Jusiñamui anamo raise omoï i

**12** <sup>1</sup>Cue amatiai, omoïmo bie rafuena lloitue. Jusiñamui caina duenalla jira, omoï jeanide comeciaimoná, naimie jitaille rafuena omoï finuamona naimie anamo raise omoï i. Naimie jitaila isoi omoï i. Naimiedi omoï iese illana gaide. Omoï comeciaimoná naimiena raise omoï seda. <sup>2</sup>Cristona uiñoñedino isoi omoï

iñeno; iadedi omoï comeciai uaina meiduanona, jiae rafuedo mai omoï jai. Ie mei Jusiñamui jitaila rafuena finuana uiñoitomoi. Mare rafuena finuana uiñoitomoi. Naimieno iobitajacinona jiai uiñoitomoi. Eo mare rafuedo jaillana uiñoitomoi.

<sup>3</sup>Jusiñamui cuena duenallamona, bie rafuena omoïmo cue llollena, naimie uai cuemo ite. "Jiae comini baifemo faiticue" raillamo o começina facañeno; iadedi: "Nie isoidimiedicue" o raillamo o começina raise faca. Jusiñamuimona o feiñoga diese iinuacínomo o começina faca. <sup>4</sup>Nagamie ie abimo diga ra ite. Ie onollí ite. Ie uisi ite. Ie jebe ite. Diga jiae ra ite. Rana cai finollena, naga ra cai abimo ite. Cai abimo jainaiaide. <sup>5</sup>Le isoide. Cristona jai iinoticai. Aillosiedicai; iadedi daajena naimiemo jainaiaidicai. Dani caimo jiai jainaiaidicai.

<sup>6</sup>Jusiñamuidi daje isoide uaina naimie dibéimo cai maijillena, caimo fecañede. Ie jitaila diese caimo fecade. Ie jira omoï feiñoga uaido naimie facaina maiji. Rafuena omoïmo Jusiñamui lloia, iena raise lloño. Roracomo omoï maijillena Jusiñamui lloia, nainomo raise maiji. Omoï llofuellena Jusiñamui lloia, naimie rafuena raise llofue. <sup>7</sup>Roracomo maijiacinona uiñotimiedi nainomo raise maijia. Llofuiacinona uiñotimiedi raise llofuria. <sup>8</sup>Começi ocuiñotajacinona uiñotimiedi comini comeciaina ocuiñotacana jailla. Rana fecajacinona uiñotimiedi rana caidiñeno fecaja. Cominina sedajacinona uiñotimiedi cominina raise sedaja. Dueredinona canodimiedi dueredinona iocire canua. Cristomo daajena cai jainaiaillamona, iese coninina canocana jaiticai.

### Cristo rafuedo cai jailla

<sup>9</sup>Omoï comeciaimoná nana cominina isirui. Maraiñedicinona gaiñeno; iadedi mare rafuedo omoï jai. <sup>10</sup>Coninina

isirui, omoi cominina omoi isiruilla isoi. Omoina jiaimie nia iobitañenia, naimiena raire omoi iobita.

<sup>11</sup>Cristo rafuena sefuiruiñeno finocana omoi jai. Cai Namana iocire seda.

<sup>12</sup>Naimie dine omoi illemo iocire omoi ocuri. Duere omoi sefua, omoi comeciaína ocuiño. Jusiñamui diga ñaicabillanona omoi jai.

<sup>13</sup>Jiae creyentiai rania, naimacina cano. Omoi jofuemo creyentiai ria, naimacina nafue.

<sup>14</sup>Jusiñamui dibeimo naimaci marena illena, omoina duere finodinona Jusiñamui ñii. Naimaciri marena ñaino. Naimacina faidoñeno.

<sup>15</sup>Ilobidino diga omoi nabairillena, omoi iobi. Sunaitino diga omoi nabairillena jiai omoi sunai.

<sup>16</sup>Daje isoi omoi comeciai lloillamona uri omoi i. Abina birioicaiñeno. Jamai bue isoidino diga nabairi. “Jiae comini baifemo uiñoticaí” raiñeno.

<sup>17</sup>Jiae comini omoina jeare finoia, naimacina daje isoi jeare finoñeno. ñvana oñeno. Omoi marena illana jiae comini uiñollena, marena omoi i. <sup>18</sup>Omoimona rafuena suiñóñeno. Nana comini diga uri omoi i. <sup>19</sup>Cue isiruigano, bu omoina jeare finoia, ñvana oñeno. Jusiñamui naimacina duere finoite. Moisés micori iena jaie cuete: “Cai Nama llote: ‘Cominina duere finodicue. ñvana oiticue’” cuete. <sup>20</sup>ñvana oñeno. Jusiñamui facaina lloraima iena jaie jiai cuela: “Omoi enoigamie aimetaia, naimiena eca. Naimie jiroiacania, naimiena jirote”. Ie mei naimie meire omoimo eruaita. <sup>21</sup>Jiae comini omoina jeare finoia, iciriñeno; iadedi naimacimo mare rafuena fino. Iese omoi finoia, naimacina omoi dibeimo itataitomoi.

**13** <sup>1</sup>Nana illaicominina naimaci ifomo Jusiñamuidi itataja jira, illaicominí lloga uaina nana cai ñinua.

<sup>2</sup>Illaicomini uaina bu iinoñenia, Jusiñamuina jiai iinoñede. Ie mei Jusiñamui naimiena duere finoite.

<sup>3</sup>Mare rafuena finodinodi illaicominina jaciruiñedimaci; iadedi maraiñede rafuena finodino naimacina jaciruitimaci. Omoina duere finoñellena, mare rafuena finocana omoi jai. Iese omoi jaia, omoina marena ñaitimaci. <sup>4</sup>Jusiñamui facaina omoina canodimaci. Maraiñede rafuena omoi finoia, naimacina jacirui. Omoina duere finollena, naimacimo uai ite. Maraiñede rafuena finodimieno Jusiñamui facaina duere finoitimaci. <sup>5</sup>Ie jira naimaci uaina iino, Jusiñamuimona omoi duere sefuiñellena. Omoina: “Mare” jiai raitimaci. <sup>6</sup>Gobierno omoina ibataia, Jusiñamui facaina naimaci maijia jira, iena ñiba. Naimaci raise maijillena, iena ñiba.

<sup>7</sup>Gobierno omoina ibataia, iena ñiba. Illaicominimo iobillacinona feca. <sup>8</sup>Ra omoi oia, ñibañeno jaiñeno; iadedi coninina omoi isirui. Jiae cominina isiruitimiedi nana Jusiñamui lloga uaina jai finode. <sup>9</sup>Moisés micori diga lletarafuena jaie cuete: “O aiñede riño diga iñeno. O iniñede iima diga iñeno. Jiaimieno meineñeno. Rana fiñeno. Jiaimiemo ite rana nicidoñeno” cuete. Jiae lletarafue ite: “Dani omoi abiaína omoi isiruilla isoi, jiae cominina omoi isiruilla”. Bie lletarafuena omoi iinoia, nana lletarafuena jai iñotomoi. <sup>10</sup>Jiae cominina omoi isiruia, naimacina jeare jai finoñedomoi. Jiae cominina omoi isiruia, nana Jusiñamui lloga uaina jai iñotomoi.

<sup>11</sup>Iena birui cai finua. Jesucristo billiruidi iairei jai ite. Naimiena cai nano ñinua facaiseconi, naimie billiruimo cai comeciaína facadicai; iadedi nagaruui naimie billirui iairei iñocaide. <sup>12</sup>Jesucristo nia dane biñena

jira, eniruemo cai illa jira, jitiredinomo iticai isoidicai. Naimie bia, naimie diga cai illemona, useredinomo raire ja iticai isoiticai. Ie jira jeacinona finocana cai jaillana mai cai fañonocailly. Jesucristo rafue anamo raise cai illesa. <sup>13</sup>Cai marena illana nana comini uiñollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai furiñena. Cai abina uradoiñena. <sup>14</sup>Iese cai iñena; iadedi naimie caína namatallena, cai Nama Jesucristona raise cai nabaili. Cai jearede navui jitaillacínona finoacanamo cai comeciaína facañena.

#### Jiae creyentena jeare ñaiñeno

**14** <sup>1</sup>Cristona iiñotimieno omoi dine biade, naimieno raise feiñó. Naimie Cristona nia raise iiñoenia, naimieno nafue; iadedi omoi isoi naimie iiñoenia, conima uina caitañeno. <sup>2</sup>Dajerie naga rana guitimaci; iadedi jiaimie difai guiga rana guite. Naimie riñede. Ie comeciná facade: “Cue riia, jeacinona jai finoiticue”. <sup>3</sup>Naga rana guifinedieno miiñeno. Naga rana guitimieno miiñeno. Jusiñamuidi naimacina jai feiñote. Ie jira miiñeno. <sup>4</sup>Omoi facaina maijñedimaci. Jusiñamuidi facaina maijidimaci. Jeacinona naimaci finoia, Jusiñamuidi naimacina duere finoite. Jeacinona finoia raillanona, Jusiñamuidi naimacina canoite.

<sup>5</sup>Dajerie creyentiaí comeciaína facadimaci: “Judíuai rafue finuaruillai Jesuñamuina sedajiticaí, nairuillai jiairuillai baifemo uailla jira”. Jiaino raitimaci: “Nagarui daje isoide” raitimaci. Nagamie ie comeciná raise facajamona, <sup>6</sup>cai Namana iobitallena, nagamie ie jitaillaruimo cai Namana sedaite. Naga rana guitimie

iobillacínona Jusiñamuimo fecajano, cai Namana iobitate. Naga rana guifinedieno iobillacínona Jusiñamuimo fecajano, cai Namana jiai iobitate.

<sup>7</sup>Cristomo cai duilla jira, daní cai jitalla rafuena finonidicai. Cai fiodailliruina jiai llonidicai. <sup>8</sup>Naimiedi cai finolle rafuena ocuide. Cai fiodailliruina jiai lloite. Naimieno cai duilla jira, iese iticai. <sup>9</sup>Cristodi fiodaite. Ie mei jillode. Ie jira naimie anamo iticai. Cai cajenia, naimie anamo iticai. Cai fiodaia, naimie anamo jiai iticai.

<sup>10</sup>Naimie baifemo omoi iñena jira, jiae creyentena miiñeno. Naimie uaina caitañeno. Naimiedi Cristo dibeimo ite. Jusiñamui uicomó nana ico iticai. Jusiñamuidi maraiñediono duere finoite. Maredinona duere finoñete.

<sup>11</sup>Isaías micori jaie iena cuete:

Jusiñamuidi lloote:

“Cue jaca illa jira, nana comini cue uicomó cuena sedajanona, cuemo iobillacínona fecaitimaci” lloote.

<sup>12</sup>Nainomo Jusiñamuimo nana cai finouiga rafuena lloiticai. Ie jira jiae creyentiaí diga marena omoi i.

#### Jiae creyentena jeacino finoí raillano, mare rafuedo cai jailla

<sup>13</sup>Ie jira jiae cominina cai miiñena; iadedi mare rafuedo cai jailla. Jiaimieno jeacinona cai finotai raillano, mare rafuedo cai jailla. <sup>14</sup>Cai Nama Jesúmo cue duilla jira, naga riga radí cuemoná mare. Iena raise uiñoticue. Iena cue riia, jeacinona finoñedícue. Iena uiñoticue; iadedi jiaimie comeciná facade: “Biená cue riia, jeacinona jai finodicue”. Naimie comeciná iese facajamona, iena naimie riia, naimiemona jeacinona jai finode.

<sup>15</sup>O riga ra muidona jiae creyente comeci maraiñeno jaia, naimieno jai isiruiñedio. Cristo naimieri fiodaite. Ie jira naie isoide rana riñeno, naimieno

Jusiñamuina fainonocaitañellena. <sup>16</sup>Ie jira o jitaila rana finoñeno. Jiae comini ona miiñellena, naie rana riñeno.

<sup>17</sup>Jusiñamui cominina cai illamona, cai guille ramo cai comeciaina cai eo facañaña; iadedi marena cai illamo cai comeciaina cai facaja. Uri cai illamo cai comeciaina jiai cai facaja. Iocire cai illamo cai comeciaina jiai cai facaja. Jusiñamui Joreño caimo illa jira, iese caina itataite. <sup>18</sup>Iese cai jaia, Cristona raise sedadicaí. Jusiñamuina iobitadicai. Jiae comini caina marena jiai ñaitimaci.

<sup>19</sup>Ie jira uri icana cai jailla. Dani cai comeciaina ocuiñocana cai jailla. <sup>20</sup>Omoi riacaga ra muidona, jiae cominina Jusiñamuina fainonocaitañeno. Naga radi mare, rillena; iadedi bue isoide omoi ria muidona, jiaimie Jusiñamuina fainonocaya, jeacinona jai finodomoi. <sup>21</sup>Bue isoide omoi ria muidona, jiaimie jeacino finoi raillanova, iena riñeno. Bue isoide omoi jirua muidona, jiaimie jeacino finoi raillanova, iena jiroñeno. Bue isoide omoi finua muidona, jiaimie jeacino finoi raillanova, ie isoide omoi finoñeno. Naimiedi Cristomo jai duide.

<sup>22</sup>Mare ra omoi finoa, omoi comeciaimona iena uifñotomoi. Jusiñamudi omoi comeciaina uiñua jira, iena marefodo lloñeno. Omoi comeciaimona jeacinona omoi finoñenana uifñotomoi. Ie jira iocire itomoi. <sup>23</sup>“Nie isoide ra cue riia, jeacinona finodicue” raillanomo bu iese comecina facaia, iena naimie riñena. Iena naimie riia, Cristona naimie raise iñóñena jira, jeacinona jai finode. Jiaimena jeacinona cai finotai raillano, mare rafuedo cai jailla.

#### Jiae creyentena cai canua

**15** <sup>1</sup>Cristo rafuedo raise jaídicaí; iadedi jiaino Cristo rafuedo cai isoi nia jaiñedimaci. Naimacina cai

canua. Ie jira dani cai jitaille rafuena finoñeitai; <sup>2</sup>iadedi Cristo rafuedo naimaci raise jaillena, jiae cominimo cai comeciaina cai facaja, naimacina cai canollena. <sup>3</sup>Eniruemo navui naimie ia, Cristo ie jitaila rafuena jiai finoñede; iadedi Jusiñamui jitaila rafuena finode. Naimiedi duere sefuide. Jusiñamui facaina lloraima micori Cristo ñaiana jiai cuete: “Jusiñamuina jeare ñaacadimacimo, cuena jiai jeare ñaitimaci” cuete. <sup>4</sup>Naiemona cai fueollena, naiemona cai comeciai ocuiñotallena, Jusiñamuina jiae cuegafuiaídi caimo ite. Naiemona Jusiñamui illanomo cai illemo ocuridicai. <sup>5</sup>Jusiñamui cai comeciaina ocuiñotade. Naimie coniniri omoína uri itatajana jitaidicue. Cristo Jesús Ilua isoi, omoi uri illana jitaidicue, <sup>6</sup>daje isoi omoi comeciai lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaidicue.

#### Judíuainédinodi Cristo rafuena jiai cacadimaci

<sup>7</sup>Jiae illanomona creyente omoi roracomo bia, Cristo caina feiñua isoi, Jusiñamuina iobitallena, naimena raise omoi feiño. <sup>8</sup>Iena nia lloitacie. Judíuaina canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiagai micoriaimo ico suille rafuena jaie llote. Eniruemo billanona, Cristo iena fuiduaibite. <sup>9</sup>Judíuainédino Jusiñamuina iobitallena, Jusiñamui naimacina duenalla jira, Cristodi bite. David micori Cristo lluana jiae cuete:

Judíuainédino motomo cue illamona ona iobitaitimaci.  
Ruamona cue muidona ona jiai iobitaitimaci.

<sup>10</sup>Moisés micori jiai cuete:

Judíuañedino, Jusiñamuimo duide  
comini diga iobi.

<sup>11</sup>David micorí jiai cuete:

Nana judíuañedino, Jusiñamuimo  
iobillacina feca.

Nana comini naimiemo  
iobillacina fecacabillas.

<sup>12</sup>Isaías micorí cuete:

Isá micorí uruiaimona damie  
comuitajamona, naimiedi  
judíuañedinona sedaite.

Naimie naimacina jillobitallena,  
naimiemo ocuiritimaci.

<sup>13</sup>Jusiñamui iemo omoina ocuiritate.  
Naimiena omoi iiuanona, naimie  
omoina caimare itatajana jitaidicue. Uri  
itatajana jiai jitaidicue. Iemei Jusiñamui  
Joreño naimie siño uai diga omoi  
jilluamo omoina ocuirtaita.

<sup>14</sup>Cue amatiai, omoina uiñoticue. Eo  
maredomoi. Cue lloga rafuena eo  
uiñotomoi. Coninina llofueredomoi.

<sup>15</sup>Iena omoi comeccilla, dafuerie  
rafuena omoimo marefodo cueticue.  
Jusiñamui cuena fetuanona, ie rafuena  
cue llollena, cuena orede.

<sup>16</sup>Judíuañedinomo Jusiñamui ie mare  
rafuena cue llollena, Cristo Jesús  
facaina maijidicue. Jusiñamui dibeimo  
naimacina cue itatajanona, Jusiñamui  
naimacina feiñollena, naimacimo  
lloticue. Jusiñamui Joreñodi naimacina  
jiai maretaita.

<sup>17</sup>Jusiñamui dibeimo cue maijia jira,  
Cristo Jesús muidona cue maijia  
iobidicue. <sup>18</sup>Cue maijiana marefodo  
lloticue. Judíuañedinona Jusiñamuina  
iinotallena, Cristodi cuena canode. Cue  
lluana cacadimaci. Cue illana ciódimaci.

<sup>19</sup>Cristodi cuena siño rafuena finotate.  
Jusiñamui Joreño uaido cuena finotate.  
Iemei Cristona jai iiñotimaci.  
Jerusalémona Ilírico railla enirue

dinomo Cristo ie mare rafuena ailluena  
cominimo raise jai lloticue. <sup>20</sup>Nainomo

Cristona nia uiñoñedino dine navui cue  
jaiacana jira, nainomo Cristo rafuena  
lluaidicue. Jai cacadiño illanomo cue  
jaiacaiñena jira, nainomo lluainédicue.

<sup>21</sup>Isaías micorí biena jaie cuete:  
Cristo rafuena nia cacaiñedinodi  
ienca cacaitimaci.

Naimiena uiñoñitimaci  
cuete.

### Romamo Pablo jaiacadé

<sup>22</sup>Nainomo cue maijiacana jira,  
Romamo omoi dine nia jaiñedicue.

<sup>23</sup>Diga naíraimo Cristo rafuena bene jai  
cue llua jira, cue maijille bene jai ifñede.  
Diga años omoi dine cue jaiacana jira.

<sup>24</sup>Españamo cue jaia, omoi dine jaiticue.  
Omoi diga nano nigarui caimare  
ñaiticue. Ie mei Españamo cue jaillena,  
cuena canoitomoi. <sup>25</sup>Omoi dine jaiticue;  
iadedi Jerusalémo ite creyentiaina cue  
canollena, nainomo nano jaiticue.

<sup>26</sup>Macedoniammo ite creyentiaidi  
ucubena ofitativaci. Acayamo ite  
creyentiaidi ucubena jiai ofitativaci.  
Jerusalémo ite duerede creyentiaina  
canoacadimaci. Jerusalémo ite  
creyentiaina canollena, iena birui  
uiticue. <sup>27</sup>Iena feacaacadimaci.

Judíuañedimaci; iadedi judíuaina  
canoacadimaci, naimacimo Cristo  
rafuena navui judíuai llua jira. Ie jira  
naimacina birui canodimaci.

<sup>28</sup>Naimacimo bie ucubena raise cue  
fecaja mei, Españamo cue jaillemona,  
omoi dine nano jaiticue. <sup>29</sup>Omoi dine  
cue ria, naimie rafuena cue llollena,  
Cristo cuena raise canoite.

<sup>30</sup>Cue amatiai, cai Nama Jesucristomo  
omoi duilla muidona, Jusiñamui Joreño  
coniniña omoina isiruitaja muidona,  
Jusiñamuimo omoi jiiia, cue facaina jiai  
omoi jii. <sup>31</sup>Judeamo ite  
creyenteñedinomona cue jillobillena,  
Jerusalémo ite creyentiaimo cue

feacaacalle ucubena naimaci raise feiñollena, cue facaina omoi jii.  
<sup>32</sup>Jusíñamui jitaila isoi omoi dine iocire cue rillena, iese omoi jii. Iemei omoi diga cue illemona, jafaicina oiticue.  
<sup>33</sup>Jusíñamui omoina uri itatajana jitaidicue.

Romamo itinomo  
Pablodi ie uaina oredde

**16** <sup>1</sup>Febe raillañaiño omoi dine jaite. Naiñaiñona omoi uiñuana jitaidicue. Naiñaiñodi creyente. Cencrea railla nairai iñaiño. Cristo dibeimo maijiano, nainomo ite creyentiaina canocabide. <sup>2</sup>Cristomo omoi duilla muidona, jiae creyentiaina cai feiñoiacacobilla isoi, naiñaiñona raise feiño. Diga cominina naiñaiño canua jira, naiñaiño jitaille diese cano. Curna jiae canode.

<sup>3</sup>Priscila dine cue uaina oredicue. Naiñaiño ini Aquila dine cue uaina jiae oredicue. Cristo Jesús facaina cue diga maijidiiamaiai. <sup>4</sup>Cue facaina niadeti fioldaitiamaiai. Ie jira iaimaiai iobidicue. Diga nairaimo judiuainede creyentiai itimaci. Cuemona Cristo rafuena cacadimaci. Cue facaina iaimaiai niadeti fioldailla jira, iaimaiai jiae iobidimaci. <sup>5</sup>Iaimaiai jofomo rollena bitino dine cue uaina oredicue. Epeneto dine cue uaina jiae oredicue. Cue isiruigamie. Asia rafuena eniruemo itinomona naimiedi Cristona nano iiñotimie.

<sup>6</sup>María dine cue uaina oredicue. Omoina canollena, omoi motomo maijide. <sup>7</sup>Andrónico dine cue uaina oredicue. Junias dine cue uaina oredicue. Naie iaimaiaidi cue comini. Cárcelmo danomo navui iticai. Jesucristo oretaganodi iaimaiaina marena ñaitimaci. Naimiena nia cue iiñoñena facaise Cristona iiñotiaimaiai.

<sup>8</sup>Amplias dine cue uaina oredicue. Cristomo naimie duilla jira, naimiedi cue isiruigamie. <sup>9</sup>Urbano dine cue uaina oredicue. Cristo facaina cai diga maijicabide. Estaquis dine cue uaina oredicue. Cue isiruigamie. <sup>10</sup>Apeles dine cue uaina oredicue. Cristomona naimiedi mare rafuedo jaicabide. Aristóbulo jofomo itíno dine cue uaina oredicue. <sup>11</sup>Herodión dine cue uaina oredicue. Naimiedi cue comini. Narciso cominimona dajerie iiñotimaci. Naimaci dine cue uaina oredicue. <sup>12</sup>Trifosa dine cue uaina oredicue. Trifosa dine cue uaina oredicue. Cai Nama facaina maijidiiiañuai. Pérsida dine cue uaina oredicue. Cue isiruigañaiño. Cai Nama facaina eo maijide. <sup>13</sup>Rufo dine cue uaina oredicue. Cai Namana eo raise iiñote. Naimie ei dine cue uaina jiae oredicue. Naiñaiñodi cue ei isoide. <sup>14</sup>Asíncrito dine cue uaina oredicue. Flegonte dine cue uaina oredicue. Hermas dine cue uaina oredicue. Patrobas dine cue uaina oredicue. Hermes dine cue uaina oredicue. Naimaci illanomo ite creyentiai dine cue uaina oredicue. <sup>15</sup>Filólogo dine cue uaina oredicue. Julia dine cue uaina oredicue. Nereo dine cue uaina oredicue. Naimie miriño dine cue uaina oredicue. Olimpas dine cue uaina oredicue. Nana naimaci illanomo ite creyentiai dine cue uaina oredicue.

<sup>16</sup>Conini caimare omoi uaido. Diga nairaimo creyentiai itimaci. Nana naimacidi omoi dine naimaci uaina oredimaci.

<sup>17</sup>Cue amatiai, daje rafuena nia lloiticue. Omoi comeciai daje isoi lloitañedino diga nabairiñeno. Uai uitacabidino diga nabairiñeno. Omoi jai cacaja rafuena lloñedimaci; iadeti jiae rafuena llotimaci. Naimaci diga nabairiñeno. <sup>18</sup>Cai Nama Jesucristo

facaina maijiñedimaci; iadedi dani naimaci jitailla rana maijicabidimaci. Mare isoide lluamona abina raise uiñoñedinona jifuetimaci.<sup>19</sup> Ailluena cominidi Cristona omoi iiñuana uiñotimaci. Ieri iobidicue. Marecinona finuana raise omoi uiñuana jitaidicue. Maraiñediginona omoi finuana jitaiñedicue.<sup>20</sup> Jusiñamuidi omoina uri itatare. Naimie omoina canoite, Taifena anafefitallena. Cai Nama Jesucristo omoina duenaillesa.

<sup>21</sup>Omoi dine Timoteo ie uaina orede. Cue diga jiai maijicabide. Lucio ie uaina jiai orede. Jasón ie uaina jiai orede. Sosipater ie uaina jiai orede. Naimacidi cue comini.

<sup>22</sup>Terciodicue. Pablo facaina bie cartana omoimo cueticue. Cai Namamo cue duilla jira, omoimo cue uaina oredicue.

<sup>23</sup>Gayodi ie uaina jiai orede. Naimie jofomo ricabidicue. Creyentiaidi naimie jofomo rocabitimaci.

<sup>24</sup>Erasto ie uaina orede. Naimiedi bie nairai ie ucube eenoraima. Cuarto ie uaina orede. Naimiedi jiai creyente.

### **Jusiñamuimo iobillacinona jaca cai fecajasa**

<sup>25</sup>Cue mare rafue llua isoi, Jusiñamui omoi comeciaina ocuiñotarede. Jesucristo rafuena llocabiticue. Jusiñamuidi cominimo naie rafuena jaie uiñotañede;<sup>26</sup> iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini iiñollena, nana cominido bie rafuena llocana birui jaide. Jusiñamuidi jaca ite.

<sup>27</sup>Jusiñamuidi naga rana uiñote. Naimiemo Jesucristo mamecido iobillacinona jaca cai fecajasa. Mai. Macaibaite. Pablodicue.

# CORINTOMO ITE CRISTONA HNOTINOMO PABLO NANO ORETAGA RABE

Corintomo ite creyentiaimo  
Pablo cartana orede

**1** <sup>1-2</sup>Corinto railla nairaimo ite creyentiai, ¿nie isoidomo? Pablodicue. Carta omoimo oredicue. Jusiñamui jitaila jira, Jesucristo rafuena cue llollena, cuena fetode. Sóstenes cue diga illa jira, omoi dine coco uaina oredicoco. Jesucristo dibeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoina jai marebicaitate. Jusiñamui omoina fetode, naimie iena. Ua nana cai Nama Jesucristona sedadinodicaidi Jusiñamui iena. <sup>3</sup>Cai Moo Jusiñamui, cai Nama Jesucristo diga, omoina jai duenaita. Iena uiñocana mai omoi jai. Iaimaiai omoina uri jai itatatiiaimai. Iena omoi uiñocana mai omoi jai.

Cristo muidona Jusiñamuimona  
ailluena feiñoticaí

<sup>4</sup>Jusiñamui diga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoina jai duenaita. Ie jira naimemo omoi facaina iobillacinona jaca fecadicue. <sup>5</sup>Jusiñamui omoina duenallamona, ie rafuena omoi llollena, naimemona ailluena uaina feiñotomoi. Cristomo omoi duillamona, naga icaiño Cristo rafuena omoi jino lloia, omoina

eo canode. Omoina naimemo ite rafuena raise uiñotade. <sup>6</sup>Ie muidona Cristo rafuena raise iinotomoi. Cristo rafuena cai jino lluamona, naimemo raise iinofidomoi. <sup>7</sup>Ie muidona Jusiñamuimona omoimo jaca buena fiebiñede, naimie dibeimo omoi raise maijillena. Naimie dibeimo omoi raise maijamona, naimie dibeimo jiae creyentiaina raise itatacana jaidomoi. Cai Nama Jesucristo abido billemo iocire omoi ocurillanona, Jusiñamuimona ailluena rafuena feiñotomoi. <sup>8</sup>Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Cai Nama Jesucristo abido bia, nicino omoimo iñena muidona, omoina duere finoñeite. Naimie bia, naimacimo jeacino nia illa jira, naimiena iinoñedinona duere finoite. <sup>9</sup>Jusiñamui ie lloga uaina jaca finoite. Naimie iinogamie. Naimie Jitona omoi nabaillena omoina fetode. Naimie Jitodi cai Nama Jesucristo.

Naimaci comeciai daje isoi  
lloinedimaci

<sup>10</sup>Cue amatiai, omoimo rafuena lloitice. Cai Nama Jesucristomo omoi duilla jira, iena lloitice. Omoi comeciai daje isoi lloillana jitaidicue. Daje isoi omoi comeciai facajana jitaidicue.

<sup>11</sup>Cloé raillamie cominimona bie

rafuena cue fidia jira, iese omoimo lloticue. “Omoi comeciai daje isoi iñedomoi” naimie llote. <sup>12</sup>Omoimona damierie raitomoi: “Dani Pablo llofuia dibecinodo jai jaidicai”. Damierie raitomoi: “Dani Apolos raillamie llofuia dibecinodo jai jaidicai”. Damierie raitomoi: “Dani Pedro llofuia dibecinodo jai jaidicai”. Damierie raitomoi: “Dani Cristo llofuia dibecinodo jai jaidicai” raitomoi. Nana iese itomoi. Iemonia omoi comeciai daje isoi iñedomoi. Cloé cominimona iese fididicue. <sup>13</sup>Ero, diga omoi Jilloitaraini iñede. Omoi jeacinomona omoi jillobillena, dama Cristo illa. Omoi facaina cruzmo cuedi fiodaiñedicue. Cue dibeimo omoi illena cue bautizañegaomoi. <sup>14</sup>Omoina cue bautizañena jira, omoimo ite rafue cuemonia comuiñena jira, iobidicue. Dama Crispóna bautizadicue. Gayona jiai bautizadicue. <sup>15-16</sup>Estéfanas jofomo ite cominina bautizadicue. Jiai cominina cue bautizajana comeciñedicue. Ie muidona: “Pablo facaina bautizadicai” llonidomoi. Daje isoi omoi comeciai lloíñenia, cue muidonañede. <sup>17</sup>Ailluena cominina cue bautizallena, Cristodi cuena oretañede; iadedi naimie rafuena cue llofuelleña, cuena oretate. Eo abina uiñoraima isoi omoimo cue llofueticuedena, cue lloga rafuemo omoi comeciaina facañedomoi. Ie jira eo abina uiñoraima isoi omoimo llofueñedicue. Cristo fiodaillamona, omoi jeacinomona naimie omoina jillotate. Iena omoi feitañenana jitaidicue.

### Cristo finoca rafuemona Jusiñamui uai siñonana uiñoticai

<sup>18</sup>Cristona iñóñedynomona cruzmo Cristo fiodailla rafuedi jamaifue. Naimacidi faificana jai jaidimaci.

Jusiñamuimona naie rafue illa jira, caímona naie rafuedi siño. Naie uaidi diga comini comeciai meidorede. Caidi naie rafuena iñotinodici. <sup>19</sup>Ero, Jusiñamui facaina lloraima micori Cristona iñóñedinsona jaie cuete:

Jusiñamui llote: “Abina uiñoraini imaci uiñuacinona saitaiticue. Abina baitadino imaci baitajacínona saitaiticue” llote.

Ie muidona naie isoide comini jilloñenana jai uiñoticai.

<sup>20</sup>Naie isoide comini uiñuacinomona jaca jillonidici. Abi uiñoraima uiñuacinodi Cristo fiodailla rafue baifemo faiñede. Moisés micori cuegafuena uiñoraima uiñuacinodi Cristo fiodailla rafue baifemo faiñede. Uaina uaitatimie birui ite uiñuacinodi Cristo fiodailla rafue baifemo faiñede. Jusiñamuidi naimieni uiñóñedino imaci abi uiñuacinona jai jamaitate. Iena naimie jamaitajamona, naimaci uiñuacinodo naimaci jilloñenana jai uiñoticai. <sup>21</sup>Ie jitillacino diese Jusiñamui finua jira, naimaci abi uiñuacinomona naimieni iñóñedimaci. Ie jira naimie mare jitillacino mona, naimieni iñotinona jai jillotate. Naimaci jeacinomona naimacina jai jillotate. Cristo rafuena cai lluamona iñotimaci. Jusiñamuina iñóñedindodi naie rafuena: “Jamaifue” raitimaci.

<sup>22</sup>Siño rafuena naimaci cioacana jira, judíuai railla comindi iese raitimaci: “Siño rafuena Jusiñamui finoia, omoi lloga rafuena iñoticai” raitimaci. Grieguái railla comini dinena raitimaci: “Omoi lloga rafuena cai abina uiñuacino ie isoi itena, iena iñoticai” raitimaci; <sup>23</sup>iadedi Cristo rafuena llocana jaidicai. Cruzmo naimie jai fiodaillana lloticai. Ie jira judíuai cai lloga rafue muidona iciritimaci. Naiena oiacañenano iciritimaci. Damie naimaci illaimana

jaillemo ocuridimaci. Naimaci ocurillamie fiodaillamo naimaci comeciaina facañedimaci. Cristo fiodailla jira, raitimaci: "Naimedi cai ocuririfénamie" raitimaci. Judíuañedino dinena raitimaci: "Omoi lloga rafuedi jamaifue" raitimaci. Ailluena comini cai lloga rafuena jitaiñedimaci; <sup>24</sup>iadedi Jusiñamui damierie judíuaína jai fetode. Dajerie judíuañedinsona jiai jai fetode. Cruzmo Cristo fiodaillamona, jeacino anamona naimaci jillua jira, naie fetocano dinena Jusiñamui uai siñonana uiñotimaci. Cristo finoca rafuedi naimaci jilluamona, Jusiñamui abina uiñuana jiai uiñotimaci. <sup>25</sup>Jusiñamui Cristona oredé, cai jeacino facaina naimie fiodaillena. Jusiñamuina iñoñedinsonoma Cristo finoca rafuedi jamaifue. Ebinidifue. Caimona Cristo finoca rafuedi Jusiñamui iñoñedino uiñuacino baifemo faite. <sup>26</sup>Cue amatiai, Jusiñamui omoina navui fetode; iadedi ¿nie isoidomoi? Jamai bue isoidomoi. Omoi comeciaina iemo faca.

Jusiñamuina iñoñedinsonoma abina uiñoñedomoi. Omoi creyentiai dibeimo eo abi uiñotino raise iñedimaci. Omoi creyentiai dibeimo illaicomini raise iñedimaci. Omoi creyentiai dibeimo ucuberedino raise iñedimaci. Jusiñamui ie isoidinona eo fetofñede; <sup>27</sup>iadedi abina uiñoñedino raillanodomoina fetode, eo abina uiñotino dinena meidaillena. Illaicominiñedinona jiai fetode, illaicomini dinena meidaillena. <sup>28</sup>Jamai bue isoidinona fetode, jamai bue isoñedino baifemo faillena. Jusiñamuimona jamai bue isoñedinojamai comini. <sup>29</sup>Ie muidona jaca buna Jusiñamui uicomo abina iedoñena.

<sup>30</sup>Caina ie cominina Jusiñamui jaitaja jira, Jesucristomo duidicai. Cristomona Jusiñamuina uiñoticai. Cristo fiodailla jira, Jusiñamui cai jeacinona feitate.

Iemonia jeacino cai finoñellena, caina canocabide. Jusiñamuidi jeacino anamona caina jiai jai Jillotate. <sup>31</sup>Jusiñamui facaina lloraima micori iena jaie cuete: "Bu abina iedoiacania, nana Cristo finoca rafue diga naimie abina iedua" cuete.

### Pablodi cruzmo Cristo fiodailla rafuena llocabite

**2** <sup>1</sup>Cue amatiai, omoi dine navui cue rillamona, Jusiñamuimona cue feiñoga rafuena llofueticue. Omoi baifemo eo abina uiñoticuedena, iese niade llofueñedicue. <sup>2</sup>Daje rafuemo cue comecin facacabidicue. Ie jira omoimo dama Jesucristo rafuena llofueiacadicue. Cruzmo naimie fiodailla rafuena llofueiacadicue. <sup>3</sup>Omoi motomo navui cue ia, meiruioicaillamona jacinaioidicue. Jusiñamui facaina cue raise jino llofeni raillano jaciruoidicue. <sup>4</sup>Comini abi uiñuacinodo omoimo llofueñedicue; iadedi omoi jeacinomona omoi jilluamona, Jusiñamui Joreñodi omoina cue lloga rafue siñonana uiñotade. <sup>5</sup>Jusiñamuidi cue iese llofuiiana jitaide. Comini abina uiñuacinona omoi cacajamona, Cristona iñoñedomoi; iadedi Jusiñamui omoina Jillotaja jira, jai iñotomoi.

### Jusiñamui Joreñodo bie rafuena uiñoticai

<sup>6</sup>Comini abi uiñuacinodo llofuecabibñedicue; iadedi Jusiñamuimona ite abi uiñuacinodo llofueticue. Cristona raise iñofidinomona abi uiñuacinodo llofueticue. Cristo facaina llorainidi cue isoi jiai llofuecabitímaci. Cominimo jai ite uiñuacinodo llofueñedicai. Illaicomini uiñogacinodo llofueñedicai. Ico faifitimaci. Ico jiai uainicaitimaci. Ie jira naimaci uiñogacinodo llofueñedicai;

7 iadedi Jusiñamuimona abi uiñuacinona cai feínuamona, iedo llofueticai. Nano dofoconi, enirue nia finoñenia, naimie comeci iena uiñote. Monamo naimie ebirede illanomo ico cai illena jitaide. Iena jaie cai uiñoñedicai. Jusiñamui jaca buna iena jaie uiñotañede. <sup>8</sup>Birui ite illaicominiði Jusiñamuimo ite rafuena nia uiñoñedimaci. Iena uiñotimacida, cruzmo cai ebirede Namana meineñedimaci. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñoñedimaci; iadedi Jusiñamui caina iena uiñotade. <sup>9</sup>Jusiñamui facaina lloraima micori iena jaie cuega:

Jaca buna naimieni ñinotino facaina  
Jusiñamui finoca rafuena  
cioiñede.

Jaca buna iena cacaiñede.

Jaca buna iemo comecina facañede cuega. Jusiñamui rafuena uiñoñedino naie rafuena jaca uiñoñeitimaci; iadedi naimieni sisiruitino naie rafuena uiñotimaci. <sup>10</sup>Birui Jusiñamui caina iena uiñotade. Ie Joreñodo caina uiñotade. Ie Joreño naga rafuena uiñote. Nana Jusiñamui comecimo iticinona jiai uiñote.

<sup>11</sup>Jaca budi jiaimie comecimo iticinona uiñoñede. Dama naimie iena uiñote. Ie isoide. Jaca budi Jusiñamui comecimo iticinona uiñoñede. Dama naimie Joreño iena uiñote.

<sup>12</sup>Jusiñamuimona ie Joreñona jai feínoticai. Jiae cominimona naie Joreñona feíñoñedicai. Jusiñamui Joreñodi caina Jusiñamui caimo caidiñeno fecaca rafuena uiñotade.

<sup>13</sup>Omoimo naie rafuena llofuecabitica. Cominimona fueoga uaido llofueñedicai; iadedi Jusiñamui Joreño caimo llofuiua uaido llofueticai. Ie jira Jusiñamui Joreño ite cominimo naie rafuena llofuecabitica. <sup>14</sup>Jusiñamuina

iinoñedinodí Jusiñamui Joreñomona iticinona feíñoñedimaci. Naimacimona naie rafue jamaifue. Iena cacaiñedimaci. Iena jiai uiñoñedimaci. Dani Jusiñamui Joreño illa cominidi naiemo cacarefidimaci. <sup>15</sup>Nana Jusiñamui jitailla rafue diese cacadimaci. Jusiñamuina iinoñedindodí Jusiñamui Joreño illa comini illa rafuena jiai raise uiñoñedimaci. <sup>16</sup>Jusiñamui facaina lloraima micori iena jaie cuega: "Jaca buna Jusiñamui comecimo iticinona uiñoñede. Budi naimieni jiai llofuenide" cuega. Ero Cristo comecimo iticinona cai uiñua jira, Jusiñamuina iinoñedindodí caina raise uiñoñedimaci. Caina jiai llofuenidimaci.

### Danomo Jusiñamui dibeimo maijidimaci

**3** <sup>1</sup>Cue amatiai, Jusiñamui Joreño anamo itinona omoi raise itomoídena, omoina llofueñedicue. Omoi jitaillacino ñia omoi jaiilla jira, omoina llofueticue. Cristo rafuedo janore jai jaidomoi. Jusiñamui uruiaina jai jaidomoi; iadedi monoi ijina jirode urue isoidomoi. Jusiñamuimona ñia moonaiñedomoi isoidomoi.

Creyentiaina omoi jaiilla mei, Cristo rafuedo eo jaiñedomoi. <sup>2</sup>Feinide rafuena navui llofueticue. Eo feirede rafuena omoimo llofueñedicue. Omoina iena ñia llofueñedicue. Omoi uruiain janore moonaila mei, guitimaci. Ie isoide. Cristona cai ñiuua mei, naimie rafuena ñinocana cai jaiilla; iadedi omoi raise jaiñena jira, Jusiñamuimona ñia moonaiñedino isoidomoi. <sup>3</sup>Nia omoi jitaillacino jaidomoi. Jusiñamui Joreño anamo ñia raise iñedomoi. Coninina abina uradoidomoi. Omoi comeciai daje isoi lloíñedomoi. Jusiñamuina iinoñedino isoi ñia itomoi. Jamai ebe isoi ñia itomoi. <sup>4</sup>Omoimona

damierie: “Pablo llofua dibecinodo jaidicai” raitomoi. Jiaino: “Apolos raillamie llofua dibecinodo jaidicai” raitomoi. Iese omoi raia, Jusiñamuina iinoñedino isoi itomoi. Ie jira iese raiñeno.

<sup>5</sup>Jamai bue isoidicue. Apolos jiajamai bue isoide; iadedi Jusiñamui dibeimo coco maijiamona, Cristo rafue coco llofuiamona, iena iinotomoi. Jusiñamui cocomo llua isoi, ie rafuena lloticoco. <sup>6</sup>Naie rafuena cue llofuiamona nano iinotomoi. Ie mei Apolos iena dane llofuite. Iese llofueuidicoco; iadedi dama Jusiñamui omoina naie rafuena iinotacana jaide. <sup>7</sup>Ie muidona naiemona cai fueua. Jamai bue isoidicoco. Jusiñamui coco baifemo faite. Ie jira naimie omoina iinocana jaitate. <sup>8</sup>Daje uaina Apolos diga maijidicue. Coco maijia diese Jusiñamuimona coco ibana feiñoticoco. <sup>9</sup>Jusiñamui facaina maijidicoco; iadedi naimiedi omoina iinocana jaitate. Naimiedi omoi comeciaína marena itatacana jaitate. <sup>10</sup>Jusiñamui cuemo llua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoimo navui llofueticue. Cue lluamona Cristona iinotomoi. Birui jiaimie omoina naie rafuena jai llofuite. Omoi comeciaímo naie rafue raise itabillena, omoina llofuite. Bu omoina llofueia, omoi comeci marena illacinomo naimie comecin facajanona, omoina naimie llofuecabilla. <sup>11</sup>Omoi jeacynomona omoi jilloillena, jaca daje rafue ite. Jiaie rafuedi iñede. Iena omoimo jai llofueticue. Naie rafuedi Jesucristona ñaite. <sup>12</sup>Iena raise atona bu llofueia, uanaicinona jaca llofuiamona, cominina Cristona iinocana jaitate. Naie rafuedi naimaci comeciaímo raise itabide. Iena raise atona bu llofueñenia, uanaicinona

jaca llofueñenia, cominina Cristona iinocana jaitañede. Naie rafuedi naimaci comecimo raise itabiñede.

<sup>13</sup>Jusiñamuidi nagamie ie llofuiacinona ico lloite. Jesucristo abido bia, Jusiñamui nie isoidicinodo naga naimie facaina maijidino lluana lloite. Naimaci llogacinona eo facaciite. <sup>14</sup>Ie mei Cristo rafuena raise atona llotinodi Jusiñamuimona ibana feiñoitimaci.

<sup>15</sup>Cristo rafuena raise atona llofinedinodi Jusiñamuimona ibana feiñoeitimaci. Naimaci niade jiai faifitimaci; iadedi faifiñeitimaci. Jusiñamui diga jaca iitimaci; iadedi tainomo majidimaci.

<sup>16</sup>Jusiñamui ie illano omoi comeciaímo illana uiñotomoi. Naimie Joreño omoimo illa jira, Jusiñamui ie illanodi omoi creyentiai. <sup>17</sup>Cristo dibeimona omoi creyentiaina bu abido danomo itataia, Jusiñamui naimiena duere finoite. Jusiñamui omoimo jai illa jira, naimemo jai duidomoi. Ie jira naimie dibeimona omoina itatatiemien duere finoite.

<sup>18</sup>Bie rafuedo omoi raise jaillena, dani omoi abiaina jifueñeno. Creyenteñedino uiñuacinodo jaiñeno. Omoimona bu iedo jaiacania, naimemo llono: “Naie isoide rafuedo o jaiñeno”. Iedo naimie jaia, creyenteñedinomona abina uiñoite; ia Jusiñamuimona abina uiñoñete. Jusiñamuimona abina uiñotinona omoi jaillena, creyenteñedino uiñuacinodo omoi jaiñeno. <sup>19</sup>Jusiñamuimona naimieni iinoñedino uiñuacinodi jamaifue. Jusiñamui facaina lloraima micori jiae cuega: “Jusiñamuidi comini abi uiñuacinona uiñuanona, naimacina jai emodofide. Naimacina jai duere finode”. <sup>20</sup>Jiai cuega: “Jusiñamuidi abi uiñotino railla comini imaci comeciaí facajacino jamaifuena uiñote”. <sup>21</sup>Ie jira omoi llofuerainiri abi iedoñeno. Jusiñamuimona nana rafue omoimo jai

illa jira, naimaci abi uiñuacinodo abina iedoñeno. <sup>22</sup>Marena omoi comeciai illacino jitai raillano, Cristo omoi dine caina oretate. Cuena oretate. Apolona oretate. Pedrona oretate. Naiemona omoi ra ollena, omoi jitai raillano, eniruedi ite. Omoi jitai raillano, birui nana omoimo ite rafuedi suide. Omoi jitai raillano, jiairuido nana omoimo iite rafuedi suite. Nia omoi fioldaiñenia, Cristo omoima canoite. Omoi fioldaia, naimie dine jaitomoi. Naiemona marena omoi comeciai illacino jitai raillano, ua nana rafue omoimo jai ite. <sup>23</sup>Cristomo omoi jainaiailla jira, naimie anamo itomoi. Jusiñamuimo Cristo jainaiailla jira, naimie Jusiñamui jitailla rafuela jaca finocabide. Le jira naimie jitaillacinona finocana omoi jai.

**Cristo fetocano naimie  
dibeimo maijide**

**4** <sup>1</sup>Caimo omoi comeciaina faca. Cristo dibeimo maijidicai. Jusiñamui rafuela llocana jaidicai. Iena jaie uiñoñedicai; iadedi naimie caina uiñotaga rafuela birui llofueticai. <sup>2</sup>Ero, naga patródi naimie dibeimo maijidino naimie lloga uaina iiuana jitaide. Le isoide. Jusiñamuidi ie facaina lloraini naimiena naimaci iiuamona naimie rafuela raise lluana jitaide. <sup>3</sup>Cue uaina omoi uaitañenia, iena omoi uaitaia, jiaino iena uaitaia, iemo comecin facañedicue. <sup>4</sup>Cuemo nicino ia, iena uiñoñedicue; iadedi Cristomona cue comecimo jeacino nibai ite. Ia, naimie cuemo lloite. Lemona cuena duere finoite. <sup>5</sup>Ie jira: “O lluacino mare” cuemo lloñeno. “O lluacino maraiñede” cuemo jiai lloñeno. Cai Nama nia abido biñenia, iena cuemo omoi lloñeno. Naimie bia, nana comini comeciaimo ite rafuela uiñotaite. Naimaci comeciaimo ite jitaillacinona uiñotaite. Lemona

naimaci majia dinori Jusiñamuimona iobillacinona feiñoitimaci. Naie facaise cuemo ite rafuela lloite. Ie jira nia cuemo lloñeno.

<sup>6</sup>Cue amatiai, naie rafuela omoi raise uiñollena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina cuegafue llua isoi, omoi illana jitaadicue. Omoi llorainiri tainomo iobiñeno. Omoi Cristo facaina llorainimona damie jiae lloraima baifemo faiamo omoi comeciaina facañieno. <sup>7</sup>Nana omoi llofuerainidi daje isoidimaci. Jusiñamuimona nana naimacimo ite uaina feiñotimaci. Dani naimaci comeciaimon aien naimaci oñena jira, ie diga abina iedoñeno.

<sup>8</sup>“Nana Jusiñamuimona iticinona jai feiñoticai. Jusiñamuimona nana cai jitaillacinona caimo jai ite. Jusiñamui sedajanomo illainina isoi jai iticai” omoi comeciaina facadomo; iadedi nia iese iñedomo. Nainomo itomoidena, nainomo coco jiai illa jira, cuemono eo mare. Nainomo iticocodena, cuemono eo mare; iadedi jiae rafuelo cue comecina jai facadicue. <sup>9</sup>Jusiñamuidi nana omoina cue baifemo faitatare raillanomo cue comecina facadicue. Cristo rafuela llorainidicai; iadedi cue baifemo omoi faiamo cue comecina facadicue. Omoimona jamai bue isoidicai. Nana comini duere cai illamo raise eruaidimaci. Jusiñamui jaienisaidi duere cai illamo jiai eruaidimaci.

<sup>10</sup>Cristo rafuela cai llua muidona, omoimona ebe isoidicai. “Cristo rafuela raise iiuanona, iedo raise jaidicai” raillanomo omoi comeciaina facadomo; iadedi Jusiñamuimona iese iñedomo. Omoimona cai uaidi raise baiñede. “Cai uaidi caimo raise baite” raillanomo omoi comeciaina facadomo; iadedi Jusiñamuimona iese iñedomo.

Omoimona jamai bue cai isoilla jira, cairi jaisitomoi. "Jiae comini cairi iobidimaci" raillanomo omoi comecin facadomoi; iadedi Jusiñamuimona iese iñedomoi. <sup>11</sup>Cai guille buedi jaca iñede. Íniroinidicai. Jiae comini caina duere finodimaci. Jofonidicai. <sup>12</sup>Cai ra ollena, cai onollí diga duere maijidicai. Comini caina jeare ñaitimaci; iadedi ibana oñedicai. Naimaci diga marena ñaiticai. Caina duere finodimaci; iadedi uai oñeno ibana oñedicai. <sup>13</sup>Cai joreñona jeare ñaitimaci; iadedi cai dinena naimaci diga marena ñaiticai. Naimacimona jamai bue isoidicai. Iese caimo naimaci comeciai nia facadimaci; ia Cristo dibeimo ie rafuena nia llocana jaiacadicai.

<sup>14</sup>Bie carta cue cuiamona, omoina meiruitaiaçaiñedicue; ia omoina nia llofueiacadicue. Isuruiga uruiaídromo isoidomoi. Ie jira bie rafuena omoi raise uiñuana jitaidicue. <sup>15</sup>Omoina Cristo rafuena llofuelleña, diga lloraini omoimo ite; iadedi cuemonia Cristo rafuena omoi nano cacaja jira, omoi moo isoidicue. Cue uruiaina jai jaidomoi isoidomoi. <sup>16</sup>Ie jira omoimo cue llogacinodo mai omoi jai.

<sup>17</sup>Iedo omoi jaillena, omoina canollena, omoi dñe Timoteona jai oredicue. Naimiena isiruiticue. Naimiedi Cristo ie iñogamie. Cuemonia Cristo rafuena naimie cacajanona, iena iñote. Ie jira naimiedi cue jito isoide. Creyentiai illanomo cue ia, Cristo rafuena jaca llofueticue. Naie rafuedo cue jitaila isoi, iedo omoi raise jaillena, naimiedi omoina llofuete. <sup>18</sup>"Pablo caina jaciruilla jira, naimie cai dine biñeite" raillanomo omoi comeciaina facajamona, omoimona damierie jai abina biridomoi. <sup>19</sup>Iese comeciaina facadomoi; iadedi Jusiñamui jitai, omoi dine raire jaiticue. Ie mei nie

isoide uai naie abina biridinomo illana uiñoiticue. Naimaci ñaiacínodo iena uiñoñeiticue; iadedi naimaci finoca rafuemona iena uiñoiticue. <sup>20</sup>Ero, jamai ñaiamona, Jusiñamui anamo naimie jitaila isoi iñedicai; iadedi naimie finoca rafuedo cai jaillamona, naimie jitaila isoi iticai. <sup>21</sup>Omoi dñe ico cue ria, ¿niese omoi diga ñaiticue? Cuemo llono. Cue lluana omoi iñoenia, omoimo riire lloitue. Cue lluana omoi iñoina, omoina cue isiruillamona, omoimo fecuise lloitue. Ie jira cuemo llono.

### Pablo eo jearede rafuena finodimieni riire llote

**5** <sup>1</sup>Jiae rafuena omoimo lloitue. Eo jearede rafue omoi motomo jai illana jai fididicue. Jusiñamuina iñoenidino naie isoide rafuena finoñedimaci; iadedi omoimona damie ie eicañona ote, ie aina. <sup>2</sup>Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellená sunaiñedomo? Omoi rocabilacomo naimie bia, naimie fo billana rairui. <sup>3</sup>Omoi dñe iticuedena, bie rafue daní omoi siadollena, omoi danomo ofillena llotue. Omoi dñe cue iñena jira, cue comecidí omoi dñe ite. Bie rafuemo cue comecin facaoidicue. Bie rafue omoi diga are siadoñeiticue; iadedi naie rafuena finodimieni cue ñaiana jai uiñoticue. <sup>4</sup>Cai Nama Jesús facaina cue ñaiamona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoina canollena, cai Nama Jesucristo omoi diga ite. <sup>5</sup>Taifemo jearede rafuena finodimieni sofe. Taife anamo naimie jai illa jira, duere sefuite; iadedi naiemona fueoite. Duere sefuijamona, Cristo dibeimo dane iite. Cristo ico

abido bia, naimiedi Cristo dibeimo dane raise illa jira, Cristo naimiena duere finoñeite.

<sup>6</sup> Jearede rafue omoi motomo illa jira, ¿buena abina iedotomoi? Janorede siritate ra juilliruaimo fajamona, nana naie juilliruai sircana jaitate. Iena uiñotomoi. Ie isoide. Janorede jearede rafuemona, eo ailluena jearede rafuena oni jaide. Omoimo ite jearede rafuemona oni omoi i, naiemona jearede rafuedo omoi jaisa. <sup>7</sup>Judíuai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitilla isoi omoi illena, omoi comeciaimo ite jeacinona fainonocai. Jeacino anamo omoi jai illa jira, iena fainonocai. Pascua rafue facaiseconi juduui cominidi toica llaudaiai fajamona, naimaci jeacino facaina Jusiñamui ibana oñede. Cai facaina Cristo jai fiodailla jira, cai jeacino facaina Jusiñamui ibana oñeite; iadedi iemonia naimiena nabaidicai. Ie jira jeacinona finocana cai jaiñeno. <sup>8</sup>Cai facaina Cristo fiodailla jira, cai jeacinona fainonocaillanona, Jusiñamui jitilla isoi mai cai i. Jeacinona finocana cai jaiñelli. Uanaicinodo mai cai jailli.

<sup>9</sup>Jiae cartana omoimo navui oredicue. Imaci aiñede riñoniai diga itino diga nabairiñellena lloticue. Naiñaiñuai iniñede iiñiai diga itiñaiñuai diga nabairiñellena lloticue. <sup>10</sup>Nibai iena raise cacaiñedomoi. Ie jira iena dane lloiticae. Cristona iinoñedinona ñaiñedicue. Naimaci aiñede riñoniai diga ia, naiñaiñuai iniñede iiñiai diga ia, naimaci rana nícidioa, rana naimaci fiia, jiraraina naimaci sedajia, naimaci diga omoi nabairiñenana ñaiñedicue. Iena rairuiñedicue. Iena cue rairuidicuedena, naganomo

Jusiñamuina uiñoñedino illa jira, ¿nñomo niadedi iticai? <sup>11</sup>“Cristona iiñoticai” raitinona ñaiticue. Naimaci aiñede riñoniai diga naimaci ia, naiñaiñuai iniñede iiñiai diga naiñaiñuai ia, rana naimaci nícidioa, jiraraina naimaci sedajia, jiae cominina naimaci jeare ñaia, naimaci jifaicabia, rana naimaci fiicabia, naimaci diga nabairiñeno. Naie isoidino omoi jofuemo feiñoñeno. <sup>12-13</sup>Cristona iinoñedinona ñaiñedicue. Naimaci rafue cuemo duñede; iadedi maraiñediginona naimaci finoia, Jusiñamui naimacina duere finoite; iadedi Cristona iiñotino maraiñediginona finoia, naimacimo riire llono. Omoi motomo ite jearede rafuena finodimiena omoi rocabillacomo bia, naimie fo billana rairui.

### Cristona iinoñede juezmo jiae creyentena llogidoñeno

**6** <sup>1</sup>Jiae omoi finoca rafuena fididicue. Jiae creyentedimie diga omoi nícinia, ¿bue ñellena jiae creyentiai dine jaiñedomoi, naicinona siadollena? ¿Bue ñellena Cristona iinoñede juez dine naimiena meiruiñeno llogidotomoi? <sup>2-3</sup>Jesucristo abido bille mei, Cristona iiñotinodicaidi Cristona iinoñedinona duere sefuillena lloitica. Taife comini duere sefuillicinona ico jiae lloitica. Iena uiñotomoi. Naimacimo omoi ico llua jira, ¿bue ñellena birui omoimo ite rafuena daní omoi raise finonidomoi? <sup>4</sup>Nicino omoimo ia, ¿bue ñellena Cristona iinoñedino dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uiñoñedimaci. <sup>5</sup>Omoi meidaillena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena. <sup>6</sup>Iese finocabiñedomoi; iadedi

nicino omoi creyentiaimo ia, Cristona iinoñedimemo jiae creyentena llogidocabitomoi.

<sup>7</sup>Jiae creyentena omoi llogidoia, Cristo dibeimo raise iñedomoi. Naicino raise omoi finoñenia, uai oñeno anamo ee. Naimemona omoi duere sefuiá, dama ite. <sup>8</sup>Iese iñedomoi; iadedi dani conini jiae creyentiaina duere finocabidomoi. Naimaci rana fiodomoi. Omoi amana duere finodomoi.

<sup>9</sup>Jusiñamui sedajanomo naimiena iinoñedino duiñeitimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede iima diga itino, jiraraina sedacabidino, daje isoide iima diga conima aifiedotino, daje isoide riño diga coniño aifiedotino, <sup>10</sup>rana bainino fiicabidino, rana niciocabitino, jifaicabidino, jiae cominina jeare ñaicabítino, cominimona rana bairodino. Nana naie isoidino Jusiñamui ie cominina sedajanomo duiñeitimaci. <sup>11</sup>Omoimona dajerie iese jiae itomoi; iadedi jiae rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai feitate. Ie Joreño uaido omoina ie cominina jai jaitate. Ie muidona naimemona jai marebicadomoi.

#### Jearede rafuemona abina rairui

<sup>12</sup>Cristo dibeimo omoi illa jira, ¿niese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiai iena finorede; iadedi dajerie Jusiñamui rairuiñega rafuena cai finoñelli, naimemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo

rafue anamo cai illi. <sup>13</sup>Raitomoi: “Nie isoide guille cai guiacania, nie isoide rafue cai finoacania, caimoná mare” raitomoi. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite. <sup>14</sup>Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaia, ie uaido na cai abiai diga caina ico jillotaite. Cai abi jaca illa jira, jearede rafuena birui cai finoñena.

<sup>15</sup>Cristomo Jainaiāidicai. Iena uiñotomoi. Omoi ainiñede riño diga omoi ia, naiñaiñuaímo jai duidomoi. Cristo naie isoide riñomo jaca duiñena jira, nañaiño diga iñeno. <sup>16</sup>Ie aiñede riño diga bu ia, ie aí illa isoi, jai dajena jaidiaimaiai. Ie jira Jusiñamui jaie llote: “Riño diga iima illa jira, jai dajena jaidiaimaiai” llote. <sup>17</sup>Cai Nama Cristomo bu duia, dajena jai jaidiaimaiai. Jusiñamui Joreño iaimaiáimo illa jira, iaimaiái comeci daje isoi jai lloide.

<sup>18</sup>Ie jirari naie jearede rafuemona abina rairui. Iesede bu finoia, jearede rafue ie abimo jai finode. Caimanide rafue ie abi diga finode. Jiae maraiñede rafue bu finoia, naimie abimo jearede rafue finoñede. <sup>19</sup>Naimimo omoi duillanona, Jusiñamui Joreño omoimo illana uiñotomoi. Ie illanodi omoi creyentiai. Jusiñamuimo jai Jainaiāidomoi. Ie muidona omoi jitaillacinodo jaiñeno. <sup>20</sup>Omoi jeacino

facaina Cristo fiodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

**Pablodi iima ie aina  
ua rafuena ñaite**

**7** <sup>1</sup>Dajerie rafue cuemo jicanollena, carta cuemo navui oredomoi. Iena ja ñaiticue. Hima ie aina uana jicanotomoi. Faidaima jaca dama iacania, cuemona mare. Faidaiño jaca daño iacania, cuemona jiai mare; <sup>2</sup>iadedi jeacino omoi finoi raillano, nagamie ie aina otena, jiai mare. Nagañaiño ie ñinina otena, jiai mare. <sup>3</sup>Naga ini ie ai diga iniacania, naimiemona naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena. <sup>4</sup>Naiñaiño abi dañoñede; iadedi daño ie ini abimo jiai duide. Naimie abi damañede; iadedi dama ie ai abimo jiai duide. <sup>5</sup>Ie jira: “Danomo iníñeitcoco” lloñeno. Jusiñamui diga o raise ñaillena, naimiemo o comechina raise o facallena, iemo omico comeci daje isoi lloillamona, diga irui illamona danomo omico iniacaiñenia, jiai mare. Naie facaise fuilla meinomo riño diga o iacanamona, dane danomo ini, Taife omicomodo ramo fai raillano.

<sup>6</sup>Dane lloitice. Jeacinona omoi finoi raillano, nagamie ie aina otena, mare. Nagañaiño ie ñinina otena, jiai mare. Iese omoimo lloticue; iadedi iese ocuiñedicue. <sup>7</sup>Ainidicue. Cue illa isoi omoi illana jitaidicue; iadedi daje isoñedicai. Jusiñamui caina itataja diese iese iticai. Dajerie ainidimaci. Dajerie airedimaci. Dajerie ininidimaci. Dajerie iniredimaci.

<sup>8</sup>Nia ainidinomo lloitice. Nia ininidinomo lloitice. Feciñuaimo jiai lloitice. Ainidicue. Cue illa isoi omoi

iacania, cuemona mare; <sup>9</sup>iadedi omoi ocuiñeniadedi, aina ono. Jiae riño diga illemo o comechina facañellena, daje riñona ono, o aina. Jiae iimamo o comechina facañellena, daje iimana ono, o ñinina.

<sup>10</sup>Creyentiaimo nia lloitice.

Airedinomo lloitice. Ñiniredinomo jiae lloitice. Cue uaido lloñedicue; iadedi cai Nama jaie llote: “Riño ie ñinina sofeñeno. <sup>11</sup>Hima ie aina sofeñeno” llote. Iese llote; iadedi nie riño ie ñinina sofeia, jiae iimana naiñaiño oñena. Himana naiñaiño oiacania, ie ini diga dane abido illasa.

<sup>12</sup>Nia lloitice. Cai Nama biena jaie lloñede; iadedi iena birui cue lloitice. Omoi nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñona dotañeno” naimiemo llono.

<sup>13</sup>Omoi nairaimona creyentena dañaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania:

“Naimiena dotañeno” naiñaiñomo llono.

<sup>14</sup>Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona finoñede. Naie creyente muidona, naie iaimaiiai uruiaina, jiae creyente iaimaiiai uruiai isoi, omoi roracomo feiño. <sup>15</sup>Ie ñinina creyenteñede ai sofeiacania: “Naiñaiñona dotañeno” naimiemo llono. “Naiñaiño jaillena rairuiñeno” naimiemo llono. Ie aina creyenteñede ini sofeiacania: “Naimiena dotañeno” naiñaiñomo llono. “Naimie jaillena rairuiñeno” naiñaiñomo llono. Sofeia mei, jai dajemo duiñediiaimaiiai.

Jusiñamui naga creyente uri illana

jitaide; <sup>16</sup>iadedi ie ini diga ie ai fiebia, ie ini creyentenamona, naiñaiño nibai creyentena jaite. Ie ai diga ie ini fiebia, ie ai creyentenamona, naimie nibai creyentena jaite.

<sup>17</sup>Iena lloticue; iadedi Jusiñamuimona ie feiñoga uaido nagamie jailla. Creyentiaína omoi jailla facaiseconi, omoi maijiuilla ramo nia raise omoi maiji. Naga creyentiaí illanomo biena llofuecabiticue. <sup>18</sup>Nia creyentiaína omoi jaiñenia, judíuái isoi omoimona dajerie omoi abiaína detatatomoi. Naie detatafuemo omoi comeciaína birui facañeno. Omoimona dajerie omoi abiaína nia detatañedomoi. Iemo omoi comeciaína birui facañeno; <sup>19</sup>iadedi Jusiñamui uaina omoi iinuamo omoi comeciaína birui faca. Jiae rafue baifemo faite. <sup>20</sup>Creyentiaína omoi jailla facaiseconi, omoi maijiuilla ramo nia raise omoi maiji. <sup>21</sup>Creyentiaína omoi jailla facaise omoimona dajerie patrón anamo itinodomoi. Nia patrón anamo itino isoi omoi jai. Iemo omoi comeciaína jarire facañeno. Jiairuido omoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai. <sup>22</sup>Cristona omoi iinua facaise, patrón anamo omoimona damierie navui itomoí; iadedi Jusiñamui omoina fetode. Naimiená omoi iinuamona, omoi jeacino anamo jai iñedomoi. Patrón anamo omoimona damierie navui iñedomoi; iadedi Jusiñamui omoina fetode. Ie jira naimie anamo jai itomoí. <sup>23</sup>Omoi jeacino facaina Jesucristo fiodailla jira, Jusiñamui omoi jeacino oni dotade. Iena jai feitate. Naimie cominina jai jaidomoi. Ie jira comini jitailaccino anamo iñeno; iadedi Jusiñamui jitailaccino anamo i. <sup>24</sup>Cue amatiai, creyentiaína omoi jailla facaiseconi omoi maijiuilla ramo nia

raise omoi maiji. Jusiñamui omoina canuanona, jearede rana omoi maijínenia, nie isoide rana omoi maijíia, Jusiñamuimona mare.

<sup>25</sup>Navui cuemo cartana oredomoí. Faidaiñuái illa rafuena uiñoiacadomoí. Cai Nama naie rafuena jaie lloñena jira, iena birui lloitice. Naimie cuena duenalla jira, naimie uaina iñotice. Ie muidona comini iñogamiedicue. <sup>26</sup>Birui duere omoi sefuilla facaise illa jira, omoi illa isoi omoi i. <sup>27</sup>Omoimona bu airenía, naiñaiñona dotañena. Bu ainia, dama ainide. Riñona oñena; <sup>28</sup>iadedi o aina illena iñinide riñona o otiodena, jeacinona finoñedio. Omoimona o iñina illena ainide iimana o otiodena, jeacinona finoñedio; iadedi aina bu ua mei, iñina bu ua mei, eo duere maijíi. Iese omoi duere sefuiñellena, omoimo iena lloticue.

<sup>29</sup>Cue amatiai, biemo omoi comeciaína faca. Jesucristo abido dane billirui iairei ite. Naimie jitailla rafuena omoi raise finollena, omoi ainiaímo ite rafuemo omoi comeciaína facaja; iadedi Cristo rafuemo omoi comeciaína eo facaja. <sup>30</sup>Omoimona damierie sunaia, damierie caimare ia, iemo omoi comeciaína eo facañeno. Damierie raruiaina iñaia, naieri eo iobiñeno. <sup>31</sup>Omoimona damierie bene ite rana ebiruitimaci; iadedi iemo omoi comeciaína eo facañeno. Iemo omoi comeciaína eo facaia, abi juanide, Cristo rafuena omoi finollena. Cristo rafue nano finuamo omoi comeciaína eo faca.

<sup>32</sup>Omoi comeciaína jarire iñenana jitaidicue. Nia ainidimie abi juarede, dama Cristo rafuena maijillena. Naimiená iobitaiacade; <sup>33</sup>iadedi airedimie bene ite rafuemo ie comeciná facade. Ie aina iobitaiacade. Naiñaiñomo ite rafuemo naimie comeciná facade. Cristo rafuemo ie

comecina jiai facade; <sup>34</sup>iadedi mena rafuemo ie comecina eo facallemo abi juanide. Ìniniðiñaiño abi juarede, daño Cristo rafuena maijillena. Nana naiñaiño comecimona naimiena iobitaiacade; iadedi inirediñaiño bene ite rafuemo comecina facade. Ie ìnina iobitaiacade. Naimiemo ite rafuemo naiñaiño comecina facade.

<sup>35</sup>Aina uana rairuiñedicue. Ìnina uana jiai rairuiñedicue; iadedi omoi raise illena, naie rafuena lloticue. Cristo rafuedo omoi raise marena jaillana jitaídicue. Dani Cristo rafuemo omoi comeciaína facajana jitaídicue.

<sup>36</sup>Ero, omoimona naiñaiño oiacaga iiimamo ie moo, ie jisa caidiñeno fecaca. Naiñaiño jai moonailla jira, naiñaiño jitailla jira, naiñaiñona feca. Fecaia, ie moo jeacinona finofede; <sup>37</sup>iadedi ìnina naiñaiño oiacañenia, naimie comeci lluamona, ie comecina eo facajamona, ie jisa feacaaiñenia, jiai mare. <sup>38</sup>Iejisana fecaia, mare. Cristo rafuena naiñaiño eo maijillena, ie jisa feacañenia, jiai mare.

<sup>39</sup>Jiae rafuena lloitue. Riño ie ini nia fiodaiñenia, naiñaiño naimiemo jaca duide. Ie ini fiodaille mei, jiae iimana ie ini ifomo naiñaiño oiaciona, mare; iadedi creyentidímena naiñaiño ua. <sup>40</sup>Naie feciñodi iimana ie ìnina oñenia, naiñaiño abi juarenite, Cristo rafuena eo maijillena. Ie muidona inirediñaiño baifemo caiñare iiite.

### Jusiñamuina eruaide jiraraimo llicisi fecaja rafue

**8** <sup>1</sup>Cuemo cartana navui oredomoí. <sup>2</sup>Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoí. Iena ja ñaiticue. Naie jiraraina naimaci navui sedaja jira, omoimona damierie naie isoide llicisi riana: "Maraiñede"

raitimaci. Creyentiaímona Jusiñamuina eruaide jirarai jamai rana illa jira, damierie naie llicisi riana: "Mare" raitimaci. Bu iese uiñoria, mare; iadedi iena uiñuamona naimie abi iedoia, naimie comecina raise facañede. Iena naimie riia, jiae creyentiaimo comecina facañede. Jiae creyentiaina bu isiruia, naimacimo ie comecina facade. Cristo rafuedo jiae creyentiai raise jaillana jitaide. <sup>2</sup>"Eo abina uiñoticue" ie comecina bu facaia, nia eo raise abina uiñofede; <sup>3</sup>iadedi Jusiñamuina ua cai isiruillamona, jiae creyentiaina cai isiruia, jai abina uiñoticai. Jusiñamui dinema caina jiae uiñotaacade.

<sup>4</sup>¿Niese Jusiñamuina eruaide jiraraimo fecaca llicisina ñaíticai? "Jusiñamuina eruaide jirarai jaca cajeñenana uiñoticai" raitomoi. "Jusiñamui jaca dajede. Iena uiñoticai" raitomoi; <sup>5</sup>iadedi "Monamo diga sedalle ra ite" dajerie comini raitimaci. Jitomana sedacabidimaci. Fivuina sedacabidimaci. "Eniruemo diga sedalle ra ite" dajerie comini raitimaci. Taifena sedacabidimaci. Janabana sedacabidimaci. <sup>6</sup>Iena sedacabidimaci; iadedi cai dani Jusiñamuina sedacabidicai. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina Jillotate. Naimiema cai sedallena, Jusiñamui caina finode.

<sup>7</sup>Jusiñamuina eruaide jiraraidi jamai rana nana creyentiai uiñofedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci riia: "Naie jirarai sedadicai" naimaci comeciaína facadimaci. Naie rafue naimaci raise uiñofena jira: "Jeacinona finodicaí" raitimaci. <sup>8</sup>Ero, nie isoide llicisi cai riamona, llicisi cai riñenamona,

Jusiñamui caina feiñoñede. Naimiena cai iiñuamona caina feiñote. Buena cai riñenia, buena cai riia, jeacinona finoñedicai. Naiemona marecinona jiai finoñedicai. <sup>9</sup>Naie llicisina riredomoi; iadedi omoi ama nibai Cristo dibeimo raise iñede. Naie llicisi omoi riia, naimiemona jeacinona jai finodomoi. “Jusiñamuina eruaide jiraraína omoi nia sedadomoi” raillanomo naimie começina facaite. Iena naimie começina facajanona, Cristo dibeimo raise jaiñeite. Abido danomo naimie dane jaite. <sup>10</sup>Nibai abina uiñotomoi; iadedi Jusiñamuina eruaide jiraraí illanomo omoi guillena omoi jailla jira, omoina nia Cristo dibeimo raise iñedimie cioia, nainomo jiai guisaite, começina facajano: “Cue ama Jusiñamuina eruaide jiraraina nia sedaja jira, naiena jiai nia sedaiticue”. <sup>11</sup>Omoi ama abido danomo jaia, omoi muidona. Cristo naimie facaina fiodaite; iadedi omoi finoca rafue muidona, omoi ama abido danomo jaite. <sup>12</sup>Iese omoi finoia, omoi amana jeacinona finotatomoi. Naimie começina ocuiñotañedomoi. Ie muidona Cristomo jeacinona jiai finodomoi. <sup>13</sup>Cristomo jeacino cue finoi raillano, Jusiñamuina eruaide jiraraímo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

**Cristo facaina llorainidi naimaci  
jitailla rana jamai feiñua**

**9** <sup>1</sup>Cue jitaillacina finoredicue; iadedi Jesucristo jai oretagamienca cue illa jira, naimie jitaillacina finoacadicue. Cuena jaie fetua facaise cai Nama Jesúna ciodicue. Creyentiaina omoi jailla jira, cai Nama facaina cue maijiana uiñotomoi. <sup>2</sup>Jiae comini Jesucristo oretagamiedicuenia nibai uiñoñedimaci; iadedi omoi iena

uiñotomoi. Cristona omoi iiñua jira, Jesucristo cuena oretajana uiñotomoi.

<sup>3</sup>Cue llofuiacinona bu uaitaia, iese cue llofuiacinona riidotucue. <sup>4</sup>Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jiae rafuena cue maijijenä motomona cuemo jamai omoi illa. <sup>5</sup>Cue ai cuemo itena, omoi dine naiñaiño cue diga macaria, coco jitaila rana cocomo jamai omoi illa. Omoi dine jiae Jesucristo oretagano naimaci ainiñairi macaria, omoi dine Jesucristo amatiai macaria, omoi dine Pedro macaria, naimaci jitaila rana naimacimo jamai fecauidomoi. Ie jira, ȝniese cue jitaila rana cuemo jamai fecaeñitomoi? <sup>6</sup>Jiae llorainimo naimaci jitaila rana jamai fecacabidomoi; iadedi cue onollí diga cue maijiana nibai nia jitaidomoi. Bernabé ie onollí diga naimie maijiana nibai nia jitaidomoi. <sup>7</sup>Ero, soldadodi ie guille iñañede. Iena jamai feiñote. Naga illimo maijijuidimie ie illimo maijide, naiemona naimie guillena. Naga toinianina sedauidimiedi naimacina sedade, naimacimona ucube ie ollena. Omoi motomo cue maijia jira, cuena omoi nafuia, omoimo Cristo rafuena llocabiticue. <sup>8</sup>Jamai comini uaido naiena llofueñedicue; iadedi Moisés micori cuegafuiaimona iena fueoticue. <sup>9</sup>Naimie micori jaie cuega: “Jusiñamui llote: ‘Jurareta trigo oni juillena saisiia, iemonia ie guillesa, ie fuena maiñeno. Maiñenia, ie maijia fuemonia guite’ llote”. Ie isoide. Omoi motomo cue maijia fuemonia cue jitaille rana cuemo jamai omoi illa. Iena Jusiñamui lloia, dama juraretamo ie começina facañede; iadedi caimo ie começina ua facade. <sup>10</sup>Cristo rafuena cue llofuecabilla jira, cue llua fuemonia cue jitaille rana jamai cue feiñua. Iemo ocuiridicue. Ie isoide.

Ie illimo bu maijia, naiemona riara ollena, nainomo majide. Iemo ocuriride. <sup>11</sup>Omoi motomo Cristo rafuedo omoi raise jaillena, navui llofueticue. Ie jira cue jitaila raruiai omoimona jamai cue ua. <sup>12</sup>Omoimona raruiaina jiae lloraini feiñocabilla jira, cuemona Cristo rafuela nano omoi cacaja jira, cue jamai jiae feiñua; iadedi omoimona raruiaina jicañedicue.

Cue jitaila raruiai cue ollena, cue onollí diga duere maijidicue. Ie jira nana cue jitaila raruiaina oñedicue. Cristo rafuela omoi cacaiacaiñeni raillano, omoimona raruiaina jicañedicue. Raruiaina cue jicaia, omoi comeciaina nibai facaitomoi: "Raruiai oiacanano Cristo rafuela naimie llocana uite". Ie mei Cristo rafuela cacaiacaiñetomoi. Ie jira omoimona raruiaina jicañedicue. <sup>13</sup>Ero, Jerusalémo judíuai comini Jusiñamuina sedauilla jofo ite. Nainomo naie comini toiniaina atiuidimaci, Jusiñamuimo fecallena. Moisés micori jaie llua isoi, naimaci jeacino facaina toiniaina fajanona fecadimaci. Nainomo maijuidino comini atica toiniaimona naimaci rillena, ibajanona ocabitimaci. Iena uiñotomoi. <sup>14</sup>Ie isoide. Cristo rafuela llorainidí naimaci rafuela iiñotonomona naimaci jitaila rana imaci ua. Cristo iena jai llote. <sup>15</sup>Omoimona raruiaina jaca jicañedicue. Raruiai birui cue ollena, bie cartana jiae cueñedicue. Dama cuemo ite ra diga iiticue. Omoimona iena feiñoticuedena, meiruoicaida feiñoticue. Omoimona cue feiñóena jira, omoi facaina Cristo rafue cue lluamona, abina iedoticue. Raruiai cuemo jamai omoi fecaia, ¿niese abina iedoñiticue?

<sup>16</sup>Jiae lloraini rana feiñua isoi cue feiñoia, Cristo rafuela cue lluamona abina iedoñeticue. Jusiñamui cuena

oretaja jira, naie rafuela lloticue. Iena cue lloñenia, Jusiñamui cuena duere finoite. <sup>17</sup>Dama cue comeci jitailamona Cristo rafuela cue lloiacania, Jusiñamuimona ibana feiñoticue. Dama cue comeci jitailamona lloñedicue; iadedi Jusiñamui cuena oretaja jira, iena llocana jaidicue. <sup>18</sup>Ie jira, ¿niese ibana feiñoticue? Ebana nibai feiñoticue; iadedi omoimo Cristo rafue cue lloia, cuemonamare. Omoimona cue jitaila rana cue oñenia, cuemonamare.

<sup>19</sup>Omoimona raruiaina cue feiñóena jira, omoi anamo iñedicue; iadedi dama cue jitailacinodo jaiñedicue. Creyenteñedino diga cue nabairillena, Cristo rafuela naimaci raise cacailena, nana naimaci mare finocana uiga rafuedo jaidicue. Iese jaidicue, ailluena cominina Cristo dibeimo cue itatallena. Iese jaiñedicuedena, eo janore comini Cristo dibeimo nibai jai itataticue. <sup>20</sup>Judíuai comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo dibeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo iñedicue. <sup>21</sup>Judíuaiñedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jiae jaiñedicue. Naimaci mare finocana uiga rafuedo jaidicue; iadedi Jusiñamui lloga uaido jiae jaidicue. Cristo lloga uaido jiae jaidicue. Naimacina Cristo dibeimo itataiacadicue. <sup>22</sup>Naimaci diga cue nabairillena, Cristo rafuela nia raise iiñonédino diga cue ia: "Omoi baifemo Cristo rafuela uiñoticue" raiñedicue. Naimacina iciacaiñedicue, naimacimo jeacinoa cue finoi raillano. Naimacina cue isiruillamona, naimacina canoacadicue. Naimacina Cristo rafuela

raise iinuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue comecina facadicue: “Cue muidona damierie Cristona nibai iiñoitimaci”.

<sup>23</sup>Cristo rafuena ailluena comini iiñollena, iese jaidicue. Iena llocana jaidicue. Naimaci iiñua jira, iobidicue.

<sup>24</sup>Ero, daní cai jitallacinoðo cai jañena. Iemonia omoi fueollena, jiae uaido lloitice. Riire aisia rafuena omoi comini jifanoia, raire uicodo ridimie rana ote. Ailluena comini aisidimacimona, damie naie rana ote. Ie isoide. Cristo rafuena iiñocana mai cai jailli, ico Jusiñamui illanomo monamo ibana nana cai feiñollena. <sup>25</sup>Naga aisidimie riire aisillena, ie abina mairitallena, ie abina eenote. Mairillena, ie abina nagarui jiai facatacabite. Ibana feiñollena, iese finode. Ibana bu oia, dallu iobide. Ero, jeacinona cai finoi raillano, cai abiaina cai eenua. Naimie jitalla isoi cai illena, Cristo rafuemo jiai cai facacabilla.

Monamo cai rillanona, ibana cai feiñollemo, jaca iobitica. <sup>26</sup>Riire aisiacadimie ebena aisiñede. Onolli diga mena iaimaiai jamai jifanoia, jafaicina jamai ducoñedaimaiai; iadedi conimana ducoñedaimaiai. Ie isoide. Cristo rafuedo raise cue jaiacania, jamai ebena jaiñedicue; iadedi nana cue comecimona iedo jaidicue. <sup>27</sup>Cue comecina raise sedadicue. Dama Cristo rafue anamo iacadicue. Dama iena iiñoiacadicue. Ja muidomo ibana cue feiñollena, iese finodicue. Jiae cominimo Cristo rafuena llofuecabiticue; iadedi monamo ibana cue feiñollena, cue comecina raise sedadicue. Iemonia omoi fueua.

#### Jiraraina sedañena rafue

**10** <sup>1</sup>Cue amatiai, bie rafuena feitañeno. Cai jaiagai micoriai finoca rafuemona fueoiticai. Egipio

railla eniruemona naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede railla monaillai ruica naimaci jaiacania, Jusiñamuidi naie monaillai oni ñajitate, safefodo nana naimaci ruica jaillena.

<sup>2</sup>Naie isoide rafue nana naimacimo suillanona, Moisés micori dibeimo raise duidimaci. Naimie anamo itabidimaci. <sup>3</sup>Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci.

<sup>4</sup>Nainomo jinui jiai iñena jira, Jusiñamui llua jira, Moisés micori noficina butajamona, toide jinuina nana jirodimaci. Naimaci nine macaria, Cristona cioñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide; <sup>5</sup>iadedi Jusiñamuina naimaci iiñóñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaina fiodaitade.

<sup>6</sup>Cai jaiagai finoca rafuemona cai fueua. Maraiñede jearede rafuena naimaci finua isoi ebiruñeno. Abimo omoi oñeno. <sup>7</sup>Jusiñamuiñedimiena sedañeno. Cai jaiagaimona damierie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo guitimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oñeno. Jusiñamuiñedimiena omoi sedañeno. <sup>8</sup>Naimaci jearede rafuena finodimaci. Naimacimona damierie naimaci aiñede riñoniai diga itimaci. Ie jira naimacimona daruidemo veintitrés mil comini fiodaitimaci. Jusiñamui

naimacina fiodaitade. Naimaci finoca rafue isoi abimo cai oñeno. <sup>9</sup>Cai jaiagaimona damierie Jusiñamui Joreñona ñaitimaci. Naimaci guisoiga radí Jusiñamuimona bite. Naiena ñiamona, Egiptomó ite guillelmo comeciaina facadimaci. Ie muidona naimiena riicaitadimaci. Ie jira Jusiñamuidi jaionaina naimacina ainitate. Iemoná ailluena fiodaitimaci. Naimaci finoca rafue isoi abimo cai oñeno. Jusiñamuina riicaitaño. Cristona cai nia iinoñena facai finoca rafuemó cai comeciaina facañeno. <sup>10</sup>Cai jaiagaimona damierie Jusiñamui facaina lloraíni joreñuaina ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oñeno. Jusiñamui facaina lloraíni joreñuaina cai ñaiñeno.

<sup>11</sup>Nana naie rafue naimacimo suide. Cai facaina Moisés micori iena jaie cuete. Iemoná birui cai fueua, naimaci isoi cai finoi raillanona. <sup>12</sup>Naie isoide rafue omoimo suiñellena, omoi abiaína rairui. Omoi comeciaina nibai facadomoí: “Cristona cai eo raise iinua jira, iena finoñeitícaí” comeciaina facadomoí; iadedi omoi abiaína omoi rairuiñenia, jeacinona finoitomoí. <sup>13</sup>Taife ramo omoimo faicabilla isoi, nana jiae creyentiaímo ie isoi ramo faicabite. Iena feitañeno. Jusiñamuidi iinogamie. Ie muidona omoi comeciai ocuillacino baifemo Jusiñamuidi Taife omoimo ramo faiana rairuite. Naiemoná omoi jilloillena, Taife uai omoi iinoñellena, Jusiñamuidi omoína canoite.

<sup>14</sup>Cue amatiaí, Jusiñamui omoína canuamona, Jusiñamuiñedimie facaina finoca rafuemona oni i. <sup>15</sup>Abina uiñotomoí. Ie jira omoimo cue lluacínona omoi cacaja mei, iemo omoi

comeciaina omoi faca. <sup>16</sup>Ero, Cristona cai sedallena, roracomo danomo oficabidícaí. Naimie fiodailla rafuena cai comecillena, janore vino jiruanona, janore llomenicona guiticai. Jusiñamuimo iobillacínona nano fecadícaí. Ie mei janore vino jirodicai. Iena cai jiruamona, Cristona cai nabaillana uiñoticai. Cruzmo Cristo fiodailla jira, naimiena nabaídicaí. Naie facaise llomenicona cai tairuñuamona, naimiena cai nabaillana uiñoticai. Cristo fiodailla jira, iese iticai. <sup>17</sup>Diga creyentiaídicaí; iadedi daje llomenicomona jaca guiticai. Daje llomenicomona cai guilla jira, dajena Cristomo cai duillana uiñoticai.

<sup>18</sup>Ero, judíuái railla cominimona cai fueua. Naimaci jeacino facaina iba oñellena, toiniaina faja mei, Jusiñamuimo fecacabidimaci. Ie mei iena ritímaci. Iena naimaci riamona, Jusiñamuina nabaídimaí. Jusiñamuina iobitadímaci. <sup>19</sup>Omoi illanomo Jusiñamuina iinoñedinodí Jusiñamuina eruaide jiraraímo guillena fecacabidimaci. Cai creyentiaídicaímona naie guilledi jamai guille. Naie jiraraídi jamai ra. Cajeñede; <sup>20</sup>iadedi Jusiñamuina iinoñedinomona jamai rañede. Naimacimona nanoca ra. “Iemo rille cai fecajia, cai moona sedadícaí” raitimaci; iadedi naie ramo naimaci comeciaína facañedimaci; iadedi imaci moomo comeciná facadimaci. Ero, Jusiñamuñedimie comeciná fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoi jaia, Taife diga jai nabairitomoí. Taife diga omoi nabairillana jitaiñedicue. Taifemo omoi duillana jitaiñedicue. <sup>21</sup>Rollena omoi ofia, Cristo fiodaillana omoi comecillena, nainomo omoi jiruamona,

nainomo omoi guillamona, Cristona nabaidomoi. Comini rafue dine omoi jaillamona, Taifena nabaidomoi. Cristo diga, Taife diga, daje facaina nabairinidomoi. Iese omoi finoia, maraiñede. <sup>22</sup>Iese omoi finoia, Jusiñamuina jai iciritaitomoi. Naimiena omoi iciia, ¿niese naimie riicaillafuemonia jilloitomoi? Jaca jilloñeitomoi.

**Jiae creyentiaina  
canocana cai jailla**

<sup>23</sup>Ero, Jusiñamui dibeimo omoi illa jira, ¿niese dani omoi jitailacindo jaiacadomoi? Diga Jusiñamui rairuñega rafue ite. Creyentiai iena finorede; iadedi dajerie Jusiñamui rairuñega rafuena cai finoñelli, naiemonia bue cai oñena jira. Iena cai finoia, cai amana Cristo dibeimo itatañedicali. Iena cai finoia, cai amana Cristo rafuena iñotacana jaiñeiticai. Naimiena ramo faicana uitataticai. <sup>24</sup>Omoimona nagamie dama naimiemo ite rafuemo comecinia facañena; iadedi naga jiae creyentemo ite rafuemo ie comecinia jiae facaja.

<sup>25</sup>Ero, ninena o llicisina omoi ibaia, Jusiñamuñedimie naie llicisina fecajana jícanoñeno; iadedi jicanómeno iena jaricitaiñeno rino. <sup>26</sup>Iena David micori jaie cuega: “Jusiñamui bie eniruena finode. Nana rana finode. Cai guillena, cai guille rana nana comuitaga” cuega. Le jira ¿niese fimaíticai? Naimie mare finoca rana cai riia, jeacinona finoñedicali.

<sup>27</sup>Ero, naimie diga o guillena Cristona iñonédimiedi ona uaidoia, naimie dine o jaiacanía, naimie dine guisai. Nana omo ecaja guillena guíño. Jamai uainino guíño. “¿Ninena ibadio bie llicisina?” jicanómeno. O comeci jarire finoñeno; <sup>28</sup>iadedi Cristona raise

iñonédimie nainomo jiae guitemo, omo lloia: “Bie llicisidi Jusiñamuñedimie jai fecaca llicisi”, iena o riñeno. Iena o riia, Cristona raise iñonédimie comecinia facaite: “Jeacinona finodio. Taifemo fecaca llicisina ritio. Creyentimie iena riñede” comecinia facaite. O isoi naie llicisimo naimie comecinia facañede. O raitio: “Naie llicisidi jamai llicisi” raitio; iadedi naimie raite: “Naie llicisi Taife ie” raite. Ie jira naie creyentena o canollena, naiena riñeno. <sup>29</sup>Naimie comecinia facajacindo cai jaiñenamona, nana Jusiñamui comuitaga guillena guiredicai; iadedi Cristona nia raise iñonédimie mona nana guinidicai; iadedi naimie comecinia facajacindo jaiñedicali. <sup>30</sup>Cai guia, Jusiñamuimona naie guille comuitaja jira, Jusiñamuimono iobillacina fecadicai; iadedi cai guillamona damierie cai joreñona ñaiamona, iena guíñeiticai. <sup>31</sup>Omoimie iena nia lloitice. Nie isoide rana omoi guia, nie isoide rana omoi riia, nie isoide rana omoi jiroia, nie isoide rafuena omoi finoia, naieri Jusiñamuina iobita. <sup>32</sup>Jusiñamuina nia iñonédino canocabi, naimie uaina naimaci cacailena. Jusiñamuina jai iñnotinona jiae canocabi, naimaci abido danomo uaiñellena. <sup>33</sup>Buena cue finoia, nana cominimo cue comecinia facadicue. Ie jira nagarui cue jitailacindo jaiñedicue; iadedi Cristo rafuena naimaci iñollena, nana cominina canocana jaidicue.

**11** <sup>1</sup>Cristo lloga rafuedo jai jaidicue. Cue isoi omoi jai.

**Roracomo riñoniai illa rafue**

<sup>2</sup>Cuena nia feitañedomoi. Cristo oretagano jaie llogacina omoina llofueticue. Cue llofueuillacindo nia jaidomoi. Ie jira omoiri iobidicue;

<sup>3</sup>iadedi jiae rafuena nia lloiacadicue. Cristo ie Moo anamo ite. Naga iima Cristo anamo jiai ite. Nagamie ai ie ini anamo ite. Omoi afemo itino uaina omoi iinoñenia, maraiñede. <sup>4</sup>Roracomo omoi comini oficabia, ie ini anamo ie ai illa jira, omoi comini finocabilla isoi, naga riño ie ifogimo iniroina bieuano jailla. Iese naiñaiño bicoñenia, ie ini anamo naiñaiño iñede isoi eruaide. Jusiñamui diga nie iima ñaia, Jusiñamui uaina nie iima jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitajia, Cristo afemo itena eruaide. <sup>5</sup>Nie riño Jusiñamui diga ñaia, Jusiñamui uaina nie riño jino lloia, ie ifogimo iniroina bicoñeno jaia, iima isoi naiñaiño iacana jira, ie ini afemo illana eruaide. Ie ini anamo iacaiñena jira, ie inino meidaitade. <sup>6</sup>Nie riño ie ifogimo iniroi bicoñeno jaiacania, iima isoi eruaillena, ie ifogidi rijiruda gareca. Iemonia naiñaiño meidaillamona, ie ini anamo illamona, ie ifogimo iniroina bieuano naiñaiño jaite. <sup>7</sup>Jusiñamui diga naimie ñaia, Jusiñamui anamo naimie illa jira, iima ie ifogi icona jitañena. Jusiñamui naga iimana comuitate. Timana naimie finuamona, naimiena cai iobitajamona, Jusiñamui cai afemo illana uiñoticaí. Ie inina iobitajamona, naiñaiño afemo ie ini illa jira, riño ie ifogimo iniroina bieuana jailla. <sup>8</sup>Ero, Eva micorimona Adán micori comuiñede; iadedi ie ini micorimona ie ciraiofemona naiñaiño micori comuide. <sup>9</sup>Naiñaiño anamo illena naimie comuiñede; iadedi naimie anamo illena naiñaiño comuide. Naimie uai iinollena, naimiena canollena, naiñaiño comuide. <sup>10</sup>Ie ini anamo naiñaiño illa jira, riño ie ifogimo iniroina bieuano jailla. Naiñaiño iese ia, naiñaiñona naimaci ciuanona, Jusiñamui jaienisaimona jiai

mare. <sup>11</sup>Naga riño ie ini anamo ite; iadedi Cristona cai iinua jira, riño baifemo iimadi faiñede. Hima baifemo riño jiai faiñede; iadedi daimaiai conimana iaimaiai canua. Cristo naga iimana, naga riñona daje isoi feiñote. <sup>12</sup>Naga comini Jusiñamui comuitaga. Nano facaiseconi Adán micorimona Eva micorina jiae comuitate; iadedi birui naga iima riñomona comuide.

<sup>13</sup>Biemo omoi comeciaína omoi faca: Omoi roracomo Jusiñamui diga nie riño ñaia, omoi einamaci finocabilla isoi, ie ifogina bicoñeno jaia, ¿niese omoi comeciaídi raite? Cue comeci: “Maraiñede” raite. Ie ini anamo naiñaiño iñedena eruaide. <sup>14</sup>Nana omoi biesedena raicabitomoi: “Nie iima ie ifotirai eo areniadedi, cai cominimona maraiñeno ciode; <sup>15</sup>iadedi nie riño ifotie eo arenia, mare” raicabitomoi. Naiñaiñuaí ieri iobidimaci. Jusiñamui iena sicutajamona, naiñaiño ifotie ie ifogina raise ibaide. <sup>16</sup>Iena jaca llofuecabiticue. Jiae creyentiai illanomo cue isoi comeciaína lloidimaci. Omoimona bu cue llogacinona uitaiacania, damamei ite.

### Cristo fiodailla rafuena raise comeciñedimaci

<sup>17</sup>Jiae rafuena lloitice. Omoi maraiñede finocabilla rafuena jai fididicue. Cristona sedallena omoi oficabia, Cristo rafuena iinocana jaiñedomoi; iadedi naiemona maraiñede rafue comuide. <sup>18</sup>Rollena omoi oficabia, omoi comeciaína daje isoi lloínenana jai fididicue. ¿Bue ñellenia omoi comeciaína daje isoi lloiacaiñedomoi? Naie rafuena omoi diga ja ñaiacadicue. Omoi oficabia, nagamiiai guillena aticabidomoi. Mare; iadedi danomo guíñedomoi. Omoimona damierie ucuberena jira, dueredino diga

guiacaiñedomoi. Omoi guille caididomoi. <sup>19</sup>Omoi iese illana jitaiñedicue; iadedi daje isoi omoi comeciaina lloíñenamona, Jusiñamui dibeimo raise itinodi uiñoga. Omoimona damierie danomo omoi guillamona, Jusiñamuina omoi isiruillana uiñoticai. <sup>20</sup>Cristona sedallena omoi oficabia, guitomoi; iadedi vino jiruanona, llomenicona guillanona, cai Nama fiodailla rafuena raise comeciñedomoi. Maraiñede rafuena omoi finua jira, iena nia lloitice. <sup>21</sup>Nagamiiai guillena aticabidomoi. Dani coniniri raise guiñedomoi. Danirie omoi atica guillena guitomoi. Jiaínona guillena iñedomoi. Damierie omoimo ailluena guille ite. Damierie omoimo guille raise iñede. Jiaínona guillena omoi iñena jira, damierie jaca aimetaitimaci; iadedi jiaíno monidimaci. Damierie guilla motomo jiaí jifaidimaci. Conini nabaiñedomoi. Ie jirari Cristo fiodailla rafuena raise comecindomoi. <sup>22</sup>Ero, omoi jofue ite, jamai guillena. Omoi oficabia, ¿bue ñe guillaredomoi? ¿Bue ñe jiaínomo guille feacaacaiñedomoi? Jiaí creyentiaina omoi isiruíñenamona, Jusiñamuina jiaí isiruíñedomoi. Janore guille itinona duere finodomoi, naimacina omoi ecaacaiñena jira. Iese omoi illa jira, omoiri ibiñedicue.

#### **Cristo fiodailla rafuena llofuiacino**

<sup>23</sup>Navui omoina biena llofueticue; iadedi omoi raise iñonoñena jira, iena dane llofueticue. Cai Nama iena cuemo jaie llote. Cai Nama Jesús ie gaitatatarjui facaiseconi, ie llofueoicaigano diga ia, naimaci guia, llomenicona llinote. <sup>24</sup>Iena llinuanona, Jusiñamuimo ibillacinona fecade. Ie mei iena tairuanona raite: “Mai, biena guño. Bie llomenicodí omoi guillamona, cue

fiodaillana omoi comeci. Cue fiodallemona omoi jeacynomona jilloitomoi. Biena omoi guillamona cuena comeci. Bie llomenicodí cue abi facai ie. Cue llua isoi iena omoi finocabi” raite. Ie mei iena guitimaci. <sup>25</sup>Ie mei jiroracomo jai totaca vino Jesús llinuanona, Jusiñamuimo ibillacinona fecade. Ie comecin facade: “Adán micori facaisemona cominina imaci jeacino facaina Jusiñamui duere finoñellena, toinianina atiuidimaci, naimiemo fecallena”. Iemo ie comecin facajano, raite: “Cue fiodallemona, dama cue diaillemona, Jusiñamuidi omoimo jiaie rafuena birui llote. Omoi jeacinsona oni dotajana llote. Bie vinodi naie rafue facai ie. Cue llua isoi, bie vinona omoi jiruamona, cuena comeci. Mai, iena jiro” raite. Ie mei jirodimaci. <sup>26</sup>Naga icaiño Cristo facaina llomenicona omoi guia, Cristo facaina vinona omoi jiroia, omoi jeacino facaina cai Nama fiodaillana uiñotomoi. Naimie nia abido dane bille dinori naiena comeci.

#### **Cristo fiodailla rafuena raise comeciacadícaí**

<sup>27</sup>Cristo fiodailla rafuena raise comeci. Naie llomenicona Cristo rafuedo raise jaiacaiñedimie ebena guia, Cristo rafuedo raise jaiacaiñedimie naie vino ebena jiroia, iena jamaide. Naimie jeacynomona Cristo naimie jilluana naimie iñonoñena jira, Cristomo jeacinsona finode. <sup>28</sup>Jeacino omoi comeciaimo illamo omoi comeciaina faca. Jeacino omoi comeciaimo ia, iena guíñeno. Iena jiroñeno. Jeacino omoi comeciaimo iñenia, iena guíño. Iena jiro. Jeacino ia, Jusiñamuimo iena llono. Jiaimie diga nicino ia, iena raise fino. Ie mei iena guíño. Iena jiro. <sup>29</sup>Jeacino naimie comecimo nia

illamona, iena guia, iena jiroia, maraiñede. Naimie jacino facaina Cristo fiodailla jira, Cristo fiodaillana naimie jai jamaide. Ie muidona Jusiñamui naimiena duere finoite.<sup>30</sup> Ie muidona omoimona ailluena irareside. Ie jira omoimona damierie fiodaite. <sup>31</sup> Cai comeciaina raise cai facajamona, jacinona cai fainonocaia, Jusiñamui caina duere finoñeite.<sup>32</sup> Jusiñamui caina birui duere finoia, caina naimie dibeimo raise illena itataiacade. Jesucristo abido bia, naimiena iiñoñedinona duere finoite. Naimaci diga cai duere sefuiñellena, birui caina duere finode.

<sup>33</sup> Cue amatiai, Cristo fiodailla rafuena omoi comecillena omoi ofia, daacaiño omoi guillesa, jiaíno riñedinenona seda. <sup>34</sup> Bu eo aimetaia, jofomo nano guilla. Guillanona omoi ofillinomo bi. Dani coniniri raise omoi guiacaiñenia, Jusiñamui omoina duere finoi raillano, jofomo guiño. Nana naie rafuena nia lloñedicue; iadedi omoi díne dane cue ia, iena lloitue.

**Cristo facaina raise maijillena,  
Jusiñamui Joreño naga  
creyentena canode**

**12** <sup>1</sup> Cue amatiai, jiaie rafuena cuemo jai jicanotomoi. Iena ja ñaiticue. Jusiñamuimona diga uaina feiñoticai. Naimiemona naimie facaina maijia uaina feiñoticai. Naimie facaina cai maijillena, jiaie creyentiaina cai canollena, naimiemona cai ogá uaina ñaiticue. Iena omoi raise uiñuana jitaidicue.

<sup>2</sup> Ero, Cristona nia omoi iiñoñenia, Jusiñamuiñedimiede jiraraína sedauidomoi. Iedo jaie taínodo jai-jaisoidomoi. Taife iedo omoina jifuete. <sup>3</sup> Ie jira biena omoi raise uiñuana jitaidicue. Jusiñamui Joreño

uaido nie creyente ñaia, Jesús Joreñona jeare ñaiñeite. “Jesúdi Jusiñamui Jitoñede” raiñeite; iadedi Jusiñamui Joreño uaido nie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese raiñedinona cacareñeno.

<sup>4</sup> Jusiñamui Joreño caimo jai illa jira, Jusiñamui Joreñomona cai maijia uaina otícaí. Naga creyente daje isoi oñedicali. <sup>5</sup> Naga creyente Cristo facaina daje isoide uai diga maijifidicali; iadedi Cristo facaina nana maijidicali.

<sup>6</sup> Jusiñamuidi diga uai llua motomo naga creyentena maijitate, naimie jitailla rafuena naimaci finollena.

<sup>7</sup> Jusiñamui Joreño naga creyentemo jai illanona, naga creyentemo ie uaina itata. Conini naga creyentena naimaci canollena, ie uaina itata. Iemonia Jusiñamui Joreño caimo jai illana uiñoticali. <sup>8</sup> Damierie creyentemo Cristo rafue jino lolle uaina itata. Damierie creyentemo Cristo rafue llofuelle uaina itata. <sup>9</sup> Damierie creyentemo Jusiñamui siño rafue finuana iiñotaja uaina itata. Damierie creyentemo duidinona jillotaja uaina itata.

<sup>10</sup> Damierie creyentemo siño rafuena finua uaina itata. Damierie creyentemo jino lolle uaina itata. Naimacimo Jusiñamuidi ie rafuena llocabite, jiañomo jino lollena. Dajerie creyentemo uaina itata, nie isoide uaido Cristo rafuena railla lloraima lluana uiñollena. Jusiñamui Joreño uaido nie lloraima lloia, iena uiñote. Taife uaido nie lloraima lloia, iena jiai uiñote. Damierie creyentemo naimaci uiñóñega uaido ñaia uaina itata.

Damierie creyentemo naie uiñóñega uai oni dobaiñolle uaina itata, comini iena raise uiñollena. Iena naimaci nia dobaiñoñenia, iena jiai raise

uiñofedimaci. <sup>11</sup>Naga creyentemo itatate uaina Jusiñamui Joreñomonabite. Naimie jitaila isoi, naga creyentena ie uaina itatate.

### Cristomo dajena duidicai

<sup>12</sup>Cai abimo diga ra ite. Cai jefo ite. Cai uisi ite. Cai onollí ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaidicai; iadedi dajena Cristomo duidicai. <sup>13</sup>Dama Jusiñamui Joreñodi dajena Cristomo nana creyentiaidicai duidicai. Dajerie judfuaidicai; dajerie judfuaiñedicai; dajerie patrón anamo iticai; dajerie patrón anamo iñedicai. Diga nairaiaidicai; iadedi dajena Jusiñamui Joreñona nana feiñoticai.

<sup>14</sup>Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidicai; iadedi Cristo facaina dajena maijidicai. <sup>15</sup>Ero, cai abimona cai eilli nibai facaite: “Onollí isoiñedicue. Onollí cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Onollí eilli baifemo faiñede. Dafocoñi ite. <sup>16</sup>Ero, cai jefo nibai facaite: “Uisi isoiñedicue. Uisi cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Uisi jefo baifemo faiñede. Ie isoide. Dajena Cristomo omoi duilla jira: “Jiaimie baifemo iticue” raiñeno. Jiae creyentena abina uradoñeno. <sup>17</sup>Ero, dama uisi cai abimo itena, cai jefo iñedenä, jiae ra cai abimo iñedenä, ¿niese rana cacaiticai? ¿Niese niadedi ra sorillana cacadicai? Ie isoide. Dajena Cristomo omoi duilla jira, naga creyentena jitaidomoi, Cristomo dajena iñocana omoi jaillena. Jiae creyentena uaitañeno. <sup>18</sup>Jusiñamui cai abimo diga rana comuitate. Naimie

jitailla isoi, cai abimo naga rana comuitate. <sup>19</sup>Cai abimo diga ra iñedenä, ¿buedo cajeniticaí? <sup>20</sup>Diga ra cai abimo ite; iadedi jaca dajede cai abi.

<sup>21</sup>Rana cai cioillena, cai uisi ite; iadedi cai onollí iñedenä, cai ciua rana llinonidicai. Ra feitañellena, cai comeci ite; iadedi cai eilli iñedenä, macarinidicai. Ie isoide. Cristomo dajemo cai duilla jira, naga creyentena dajena iñocana jaillana jitaidicai. Jiae creyentemona abina ideoñeno. <sup>22</sup>Naga cai abimo ite rana jitaidicai, raise cai illena. Naga cai abimo ite ra jiae ra baifemo iñede. Nana daje isoi itena, mare; <sup>23</sup>iadedi dajerie ra ebire eruaillena, cai abi jifollena, iniroina jitadicai. Meiruiñellena, cai abi bainillena, iniroina jiae jitadicai. <sup>24</sup>Cai uiecomo meiredino iñena jira, iena jifoñedicai. Ero, Jusiñamui cai abina finode. Dajerie ra jiae ra baifemo iñede. <sup>25</sup>Jusiñamuidi naga cai abimo ite ra dajena maijiana itatate. Dajena maijicana jaide. <sup>26</sup>Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidicai. Ie isoide. Cristomo dajena duidicai. Jiae creyente duere sefua, naimiena cai canoia, Cristo dibeimo caimare marena iticai. Naimiena cai canoñenia, caimare marena iñedicai.

<sup>27</sup>Ero, caidi naimie cominina jira, Cristomo dajena nagasaiai duidicai. <sup>28</sup>Ie jira Jusiñamuidi naimiena iñotinomona damieriena nano fetuanona, Cristo naimacina oretate, ie rafuena llollena. Ie mei jiaínona fetode, naimacimo ie rafuena llua mei, jiaínomo ie rafuena jino llollena. Jiaínona fetode, ie rafuena llofuellena, cominina ie rafuena raise uiñotallena. Jiaíno ie uaina itatate, naimie facaina naimaci maijillena, jiae creyentiaina naimaci canollena.

Damierie creyentemo siño rafuena finua uaina itataste. Damieriemo duidinona jilloitaja uaina itataste. Damieriemo jiae cominina canua uaina itataste. Damieriemo jiae cominina sedaja uaina itataste. Ja muidomo damieriemo naimaci uiñoñega uaido ñaia uaina itataste. Iese omoina fetode, naimie facaina dajena nana omoi maijillena. <sup>29</sup>Ero, Jusiñamui nana omoina fetoñede, ie rafuena jino llollena. Damieriena fetode. Nana omoina fetoñede, ie rafuena llofuellella. Damieriena fetode. Nana omoina fetoñede, siño rafuena finollena. Damieriena fetode. <sup>30</sup>Nana omoina fetoñede, duidinona jilloitallen. Damieriena fetode. Nana omoina fetoñede, omoi uiñoñega uaido ñaillena. Damieriena fetode. Nana omoina fetoñede, naie uiñoñega uai jino dobaiñollena. Damieriena fetode. <sup>31</sup>Naga creyentemo Jusiñamuidi ie majjia uaina itataste; iadedi damierie uai jiae uai baifemo ite. Iena omoimo illena, Jusiñamuimo jiae; iadedi jiae rafuena omoi ollena, omoimo lloiticue. Nana jiae rafue baifemo ite. Jiae cominina omoi isiruillena lloiticue.

### Nana jiae cominina cai isiruillafue

**13** <sup>1</sup>Cai uiñoñega uaido ñaia uaina cai ñaia, Jusiñamui jaienisaí isoi cai ñaia, cominina cai isiruñenia, jamai ñaiafuena ñaiticai. <sup>2</sup>Jusiñamui rafue jino llolle uaina caímo ia, nana Jusiñamui caina uiñotaga rafuena cai uiñoia, nana Jusiñamuimo ite rafuena cai uiñoia, Jusiñamui siño rafuena finuana cai eo iinoia, cominina cai isiruñenia, Jusiñamuimona jamai bue isoidicai. <sup>3</sup>Jiae cominina cai canollena nana caímo ite rana cai feacaia, Cristo rafuena cai llollena cai niadi fiodaiacania, cominina cai isiruñenia, jaca buena oñedicai. Jusiñamuina jaca iobitañedicai.

<sup>4</sup>Cominina cai isiruia, naimaci diga raire iciriñedicai. Naimacina canocabidicai. Naimaciri abina uradoiñedicai. Abina birioicaiñedicai. <sup>5</sup>Cominina cai isiruia, abina iedoñedicai. Naimacimo cai comeciaina facacabidicai. Cai rana caidicabiñedicai. Naimaci diga icircabidiñedicai. Naimaci caina jeare finoia, ibana ocabiñedicai. <sup>6</sup>Cominina cai isiruia, naimaci jeare finoca rari iobicabidicai. Naimaci uanai mare finoca rari iobicabidicai. <sup>7</sup>Cominina cai isiruia, naimaci caina duere finoia, ibana ocabiñedicai. Cai joreñona bu ñaia, caina taino lloia, iena iinocabiñedicai. Cai marena illamo ocurridicai. Cai comeciaina ocuiñocana jaídicaí.

<sup>8</sup>Jusiñamuidi cominina jaca cai isiruilla jitaide; iadedi caímo ie rafuena jino llolle uaina jaca itatañeite. Naie uaidi ico saite. Caímo cai uiñoñega uaido ñaia uaina jaca itatañeite; iadedi naie uai ico saite. Caímo ie llofuelle uaina jaca itatañeite; iadedi nai uai ico saite. <sup>9</sup>Nana Jusiñamui caina uiñotagacina nia raise cacaiñedicai. Nana Jusiñamui rafuena nia raise jino lloñedicai; <sup>10</sup>iadedi Jesucristo dane abido bia, Jusiñamui Joreño caímo itataja uaidi saite. Naimie diga cai illemona naimienra raise uiñoiticai. Naimiemo ite rafuena jiae raise uiñoiticai.

<sup>11</sup>Jiae rafuedo iena llofueticue. Jaie nia cue uruenia, urue isoi ñaiticue. Urue isoi comeicina facadicue; iadedi eimienra cue jaillamona, urue isoi jaiñedicue. Cue uruenamona ite rafuena fañonocaidicue. Eimie comeicina facajacinodo birui jaídicaue. Urue isoi Jusiñamui rafuena birui janore uiñoticai; iadedi monamo cai ia, eimie isoi iena raise uiñoiticai. <sup>12</sup>Ero, jiae acaranimona cai joreñodí raise bainide.

Ie isoide. Jusiñamuimo ite rafuena nia raise uiñoñedicai. Iena raise cacaiñedicai; iadedi Cristona ico citoitícai. Naimemo ite rafuena birui janore cacadicue; iadedi naimie dine cue ria, Jusiñamui cuena jai uiñua isoi, jiai raise uiñoñiticue.<sup>13</sup> Ja muidomo lloitícue. Jesucristo billanona, Jusiñamui Joreñomona caimo ite uaidi saite; iadedi Jusiñamui llogacínodo jai abina iiñotícai. Naimie llogacino suillemo jai ocuridicai. Jusiñamuina cai isiruillamona, jiae cominina jiai isiruitícai. Naie isiruillacino jiaicino baifemo faite. Le jira coninina isiruicana omoi jai.

**Omoi uiñoñega uaido  
omoi ñaia rafue**

**14** <sup>1</sup>Nana cominina isiruicana mai omoi jai. Jusiñamui Joreñomona bite maijia uaina uana omoi nícido. Jusiñamui rafuena jino lolle uaina ua nícido. <sup>2</sup>Ero, omoi uiñoñega uaido ñaia uaina omoi ñaicabia, jaca buna omoina cacaiñena jira, cominina canollena ñaiñedomoi; iadedi Jusiñamuina iobitallena ñaitomoi. Omoi uiñoñega rafuena omoi comeciaimona ñaitomoi. <sup>3</sup>Jusiñamui rafuena jino omoi lloia, cominina canodomoi. Naimacina Jusiñamuina iiñotadomoi. Naimie dibeimo raise itatatomoi. Naimaci comeciaina ocuiñotadomoi. <sup>4</sup>Nana creyentiaina canodomoi; iadedi naie uiñoñega uaido omoi ñaia, dani omoi comeciaina canodomoi.

<sup>5</sup>Rollena omoi oficabia, naie uiñoñega uaido omoi ñaia, cuemonia mare; iadedi Jusiñamui rafuena jino omoi lloia, cuemonia ua eo mare. Naie jino llua uaidi naie uiñoñega uai baifemo faite. Naie uiñoñega uaido omoi ñaia, nana creyentiai iena raise cacareillena, iena

omoi oni dobaiñoia, cuemonia jiai mare. Ie mei naie ñaiamona, Jusiñamui rafuena naimaci cacajamona, creyentiaina canodomoi. <sup>6</sup>Cue amatiai omoi dine cue jaiacanana uiñotomoi. Omoi dine cue ria, cue uiñoñega uaido cue ñaiticuedena, omoina canoñedice; iadedi Jusiñamui cuemo jai lloga rafuena omoimo cue lloticuedena, omoina canodicue. Jusiñamui rafuena raise cue jai uiñua jira, omoina cue llofueticuedena, omoina jiai canodicue.

<sup>7</sup>Ero, quena jamai tainuaido bu fia, ie figana uiñoñedicai. Guitarra bu jamai tainuaido taia, ie taillana uiñoñedicai. <sup>8</sup>Ejércitomo trompetana jamai tainuaido fia, soldaduai majillena raise uiñoñedimaci. <sup>9</sup>Ie isoide. Cai cacaiñena uaido omoi ñaia, omoi ñaiana uiñoñedicai. Iese omoi ñaia, jamai tainona ñaite isoi cacadicai. <sup>10</sup>Eo ailluena nairaijai ite. Naga nairai ie uai ite dani naimaci ñaillena; <sup>11</sup>iadedi nie nairai ie uaina cue uiñoñenia, naimacimona jiae nairai imiena eruaídigue. Cuemonia naimaci jiae nairaina eruaídumaci. Conini diga ñaiana cacaiñedicai. <sup>12</sup>Ie isoide. Jusiñamui Joreñomona bite ñaia uaina omoi eo jitailanona, diga uaina Jusiñamuimo jica, dani conini Cristo rafuena iiñocana omoi jaillena. Jusiñamui Joreñomona dani daje uaina nícidonoñeno; iadedi nana nícido.

<sup>13</sup>Ie jira ie uiñoñega uaido bu ñaia, ie oni dobaiñua uaina naimemo illena, jiae creyentiai iena cacailleña, Jusiñamui jicaja. <sup>14</sup>Jusiñamui diga cue uiñoñega uaido cue ñaia, Jusiñamui Joreño cuena ñaitataje; iadedi iena cacaiñedice. Iena uiñoñedice. <sup>15</sup>Ie jira, ¿niese cue nibaillé? Jusiñamui diga cue ñaia, cue uiñoñega uaido ñaiticue; iadedi comini cue ñaiana raise uiñollena, Jusiñamui diga jamai cue

uaido jiai ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñollena, Jusiñamuimo jamai cue uaido jiai roiticue. <sup>16</sup>Iobillacinona Jusiñamuimo omoi fecajano, omoi uiñoñega uaido omoi ñaianona, ¿niese omoina cacaíñedino: “Jee” raitimaci?

<sup>17</sup>Iobillacinona Jusiñamuimo raise fecadomoi; iadedi omoina cacaíñedino Jusiñamuina uiñotañedomoi. Ie jira omoi uiñoñega ñaia uaina oni dobaiñotimie omoi roracomo iñenia, naie uaido ñaiñeno. <sup>18</sup>Cue uiñoñega uaido cue ñaicabilla jira, Jusiñamuimo iobillacinona fecadicue. Omoi baifemo naie uaido cue ñaiana uiñoticue; <sup>19</sup>iadedi roracomo cue ia, cominina raise cue llofuelleña, janore cue ñiaidí, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemonia maraiñede.

<sup>20</sup>Cue amatiai, omoi uiñoñega ñaia uaido dani jai jaidomoi; iadedi jiaie Jusiñamui Joreño itataja uaimo omoi comeciaína facañedomoi. Omoi abina jai uiñuamona, jiaie uaimo omoi comeciaína faca. <sup>21</sup>Jusiñamui facaina lloraima micori jaie cuega: “Jusiñamui lloite: ‘Cue comini dine jiaie nairaína cue oretajamona, cue cominina cuena iñotallena, naie jiaie nairaí uaido cue cominimo lloitue; iadedi iena jitaiñeitimaci. Cuena jaca uiñoñeitimaci’ lloite”. <sup>22</sup>Ie isoide. Uiñoñega uaido omoi ñaianona, Cristona iñonérdino iena raise cacaíñedimaci; iadedi Cristona iñotino iena cacadimaci. Lemona fueotimaci. Jusiñamui rafuena omoi llofuiamona, Cristona iñonérdino iena cacajamona, Cristona iñonérdimaci; iadedi Cristona iñotinona canodomoi. <sup>23</sup>Danomo nana omoi ofia, omoi uiñoñega uaido nana

omoi ñaia, Cristona iñonérdino iena cacajanona, omoina; “Uairico” raitimaci; <sup>24</sup>iadedi omoi ofia, Jusiñamui rafuena omoi jino lloia, iena Cristona iñonérdimie cacajamona, naimiedi jeacino naimie comecimo illana uiñoite. Naie rafue naimiemo riire baite.

<sup>25</sup>Naimie comecimo ite jearede rafue naimie uiñuamona, Jusiñamuimo ie jeacino illuanona, Jusiñamuina iñointe. Ie muidona raite: “Uanai, Jusiñamui omoi motomo ite”.

### Roracomo omoi ia, raise marena omoi i

<sup>26</sup>Cue amatiai, rollena omoi oficabia, ¿niese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uiñoñega uaido ñaite. Jiaimie naie uaina oni dobaiñote. Cristo dibeimo creyentiaina raise itatallena, nana omoi finua rafuena raise fino. <sup>27</sup>Uiñoñega uaido bu ñaia, damie amani naiedo ñaite. Damierie ñaite. Jiaimie ñaillé ifomo jiaimie ñaite. Ie mei damie naie ñaiana oni dobaiñote. <sup>28</sup>Naie ñaiana oni dobaiñotimie iñenia, naie uiñoñega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia. <sup>29</sup>Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie lluacino billana uiñuanona llua. <sup>30</sup>Jusiñamui rafuena bu nia lloia, naimie ecimo jiaimienra rafuena Jusiñamui Joreño llotataia, nano llotimie raire lliicailla. Iemei jiaimie lloite. <sup>31</sup>Iese damierie nana lloitomo, naie lluamona Jusiñamui rafuena raise omoi uiñollena, omoi comeciaí jiai ocuiñollena. <sup>32</sup>Naga llotimiedi ie uiñua diese lluana uiñote.

Ie jira jiaimie nia lloia, iena cacarei. Iemei jiaimie llua.<sup>33</sup> Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitaila jira, omoi uri illena Jusiñamui jitaila jira, cue lluacinodo omoi jai.

<sup>34-35</sup> Jiae creyentiai illanuaimo isoi omoi roracomo riñoniaidí uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micori jaie llua isoi, naiñaiñuai ini anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, maraiñede, nainomo ite jino lloraima uaina naiñaiñuai raise cacaiñena jira.

<sup>36</sup> ¿Niese cue lluacinodo jaiacaiñedomoi? Jusiñamui rafue omoimona comuiñede. Dani omoimo naie rafue duiñede; iadedi nana creyentiaimo duide. Dani omoimo Jusiñamui ie rafuena lloñede. Nana creyentiaimo iena llote.

<sup>37</sup> “Rafuena Jusiñamui cuemo llo” omoimona ie comechina bu facaia, “Jusiñamui Joreño ie ñaia uaina cuemo itata” ie comechina bu facaia, “Cai Namamona ite uaina omoimo cueticue” naimiedi uiñote;<sup>38</sup> iadedi naimie iese uiñoñenia, Jusiñamui Joreñomona naimie uai iñenana uiñoitaci.

<sup>39</sup> Cue amatiai, Jusiñamui omoimo ie rafuena llua uaina naimemo jica; iadedi naimaci uiñoñega uaido jiae creyentiai ñaia, iena rairuiñeno.<sup>40</sup> Omoi ofia, cue llua isoi, Jusiñamuina raise marena seda.

### Fiodaillamona Cristo jai jillode

**15** <sup>1</sup>Cue amatiai, iena omoi feitañellena, bie rafuena dane lloiticue. Cristo ie mare rafuena omoina

navui llofueticue. Fiodaillamona Cristo jilluana llofueticue. Cue llofuiacínona feiñotomoi. Iena iñocana jaidomoi.

<sup>2</sup>Naiena omoi iñuamona, Jusiñamui omoi jeacínomona omoina jillotate. Naiedo nia omoi jaia, iena raise omoi iñoia, jai jillobidomoi.

<sup>3</sup>Nanoca rafuena omoina llofueticue. Jiae creyentiaimona biena jai cacadicue. Jusiñamui facaina lloraini micoriai jaie cuegafuiai isoi cai jeacino facaina Cristodí fiodaite.<sup>4</sup> Raiafomo naimiedi jonega. Darui amani illanona naiemona Jusiñamuidi naimiena jillotate, Jusiñamui facaina lloraini micoriai jaie llua isoi.<sup>5</sup> Ie mei Pedro naimiena ciode. Ie mei ie once llofueicaigano naimiena ciódimaci.<sup>6</sup> Ie mei quinientos naimiena iñotino naimiena daruido ciódimaci. Naimacimona damierie jai fiódaitimaci; iadedi ailluena nia fiódaiñedimaci. Cristo jilluana uiñotimaci.<sup>7</sup> Ie mei Jacobo naimiena ciode. Ie mei nana ie oretagano naimiena ciódimaci.

<sup>8</sup> Ie mei naimiena jiai ciódicue. Ie jira fiodaillamona naimie jilluana uiñoticaí. Ie doce llofueicaigano fetua mei, diga años illanona, naimiena nia cue uiñoñeña facaise cuena fetode. Ie mei ie rafuena cue llollena, cuena oretate.<sup>9</sup> Ailluena creyentiaina jaie cue duere finua jira, nana jiae Cristo oretagano cue baifemo faítimaci. Jamai bue isoidicue; iadedi Cristo cuena fetode.

<sup>10</sup> Jusiñamui cuena duenallamona, Cristo oretagamieno jaidicue. Jusiñamui cuena jamai tainomo duenaiñede. Nana jiae Cristo oretagano baifemo Cristo rafuena llofuecabiticue. Dama cue comecimona llofuecabidié; iadedi Jusiñamui cuena canuamona, iese llofuecabiticue.<sup>11</sup> Jiae oretagano Cristo rafuena llofuecia, iena cue llofuecia, daje isoide rafuena llocana jaidicai. Naie

rafuena omoi cacajamona, iena  
iinotomoi.

**Fiodaillamona nana  
creyentiai ico jilloitimaci**

<sup>12</sup>Fiodaillamona Jusiñamui Cristona  
jillotajana llofuecabiticai; iadedi  
omoimona dajerie raitomoi:  
“Fiodaillamona, nana comini imaci  
abiai diga ico jilloñitimaci”. <sup>13</sup>Ero,  
omoi llua isoi fiodaillamona comini ico  
jilloñedena, ie isoi Cristo jiai nia  
raiafomo ite. Niade jilloñede. <sup>14</sup>Cristo  
jilloñenia, Cristo rafuena jai tainona  
lloticai. Naie rafuena jiai tainona  
iinotomoi. <sup>15</sup>Cristo fiodaillamona  
Jusiñamuidi naimiena jillotajana  
llofuecabiticai. Fiodaillamona  
creyentiaina ico Jusiñamui jillotañenia,  
Cristona jiai niade jillotañede.  
Jusiñamui rafuena tainona jai  
llofueticai. <sup>16</sup>Fiodaillamona nana  
creyentiai ico jilloñenia, Cristo jiai jaie  
jilloñede. <sup>17</sup>Cristo nia jilloñenia,  
naimiena tainona iinotomoi. Jusiñamui  
omoi jeacinona niadedi oni dotañede.  
<sup>18</sup>Cristona iinuanona jai fiodaitinodi jiai  
jai faifidimaci. Jusiñamui illanomo jaca  
iileitimaci; iadedi iraimo jaca iitimaci.  
<sup>19</sup>Nana cai ille dinori dani Cristo caina  
jilloitallemo cai ocuriria; iadedi naimie  
jilloñenia, jai duere iticai. Jai tainomo  
ocuridicai.

<sup>20</sup>Ero, tainomo ocuririñedicai; iadedi  
fiodaillamona Jusiñamui Cristona jai  
jillotate. Naimie jillua mei, naimiena  
ciodicai. Ailluena fiodaitino jai iitimaci;  
iadedi Cristo jai jillode. Ie jira nana jai  
fiodaite creyentiai jiai jilloitimaci.  
<sup>21</sup>Adán micori jeacinona finua jira,  
fiodaite. Fiodaillamona jilloñede.  
Jeacino naimie finua jira, fiodaicana jiai  
jaidicai; iadedi fiodaillamona Cristo jai  
jillua jira, fiodaillamona ico jiai  
jilloitimaci. <sup>22</sup>Adán micorimona cai

comuilla jira, nana fiodaicana jaidicai;  
iadedi Cristomo cai duilla jira, jilloiticai,  
naimie diga jaca cai illena. <sup>23</sup>Cristo jai  
jillode. Cai fiodailla mei, naimiemo cai  
duilla jira, ico dane abido naimie bille  
facaise jilloiticai. <sup>24-25</sup>Ie mei naimie  
dinena nana naimie dibeimo iñedinona  
anafeftaite. Nana naimie dibeimo iñede  
joreñuaina jiai anafeftaite. Illaimana  
Cristo illamona, nana naimie dibeimo  
iñedinona anafeftaite. “O uai cuemo o  
illamona, nana o jitaila rafuena jai  
fuidodice” ie Moomo lloite. <sup>26</sup>Nana  
naimie dibeimo iñedino naimie anamo  
jai illa mei, Cristo muidona naimie  
comini jai jilluamona dane  
fioldaiñetimaci. <sup>27</sup>Jusiñamuidi nana  
cominina Cristo anamo itataite. Ie  
muidona creyentiaidicai dane  
fioldaiñetitcái; iadedi Cristo anamo  
Jusiñamui iñete. Cristona oretaja jira,  
Cristo anamo Jusiñamui iñede. <sup>28</sup>Naga  
ra Cristo anamo illa mei, ie maijia fuilla  
mei, Jusiñamui ie Moona jira,  
Jusiñamui anamo Cristo jiai iite.  
Jusiñamui nanocamienna jira, nana  
naimie finoca ra naimie anamo iite.  
Nana comini naimie anamo iitimaci.  
<sup>29</sup>Cristo jilloñedena, fiodaillamona  
jilloñetomoidena, ¿niese  
bautizagaomoi? Fiodaillamona omoi  
jilloñenia, ¿bue ñellena bautizagaomoi?  
Tainomo jai bautizagaomoi; iadedi iese  
iinoñedomoi. Dajerie creyentiai marena  
illamona, omoimona dajerie  
creyentiaina jaidomoi. Naimaci jai  
fiodaitimaci; iadedi fiodaillamona ico  
jilluana iinotimaci. Iena omoi  
iinuanona, bautizagaomoi. <sup>30</sup>Cristo  
jilloñenia, cue jilloñedicedena, ¿bue  
ñellena nagarui Cristo rafuena cue  
llofuiamona, eo jacirede ramona niadedi  
fiodaibiticue? <sup>31</sup>Cue amatiai, cai  
Nama Jesucristomo omoi duilla jira,  
omoiri iobidicue; iadedi nagarui niadedi

fiodaicabiticue. Cristo rafuena omoimo cue llocabilla jira, jiae comini iciritimaci. Icirillamona, cuena meineiacadimaci. <sup>32</sup>Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue lluamona jaca buena oñeiticue. Ie muidona fiodaillamona cai jaca jilloñeiticaidenia, Cristo rafuena fainonocaida, ico raire jamai cai fiodailla jira, jamai ua jai jaicaillafuena cai jaiaicaiticai. Ie ia iese iñede. Cristo jai jillode.

<sup>33</sup>Ie jira omoi abiaina jifueñeno. “Jilloñeiticaí” railla comini diga omoi nabairia, naimaci llogacinodo jiai jaitomoi. Ie muidona naimaci diga nabairiñeno. <sup>34</sup>Ie jira raise abina uiñuanona, mai jai. Jeacinona finocana jaiñeno. Omoimona dajerie Jusiñamuina raise uiñoñena jira: “Jusiñamuidi cominina jillotañeite” raitimaci. Omoi meidaillena, omoimo iese lloticue. Jusiñamui rafuedo raise mai omoi jai.

### ¿Niese creyentiaí jilloitimaci?

<sup>35</sup>Omoimona damie nibai jicanote: “¿Niese fiodaillamona creyentiaídcai jilloiticaí? Naimaci abiai nibai jai rifaídmaci. ¿Nie isoide abiai diga dane iiticaí?” <sup>36</sup>Iese bu jicanoa, raise começina facañede. O illimo buena o ria, janore sicua meinconi, o riga radi jai abidi rifaide. <sup>37</sup>Nie isoide icoñona o ria, nie isoide ijina o ria, nie isoide idona o ria, naie ra sicua mei, jai jiaifo eruaide. O riga rana eruaiñede. <sup>38</sup>Naga riara daje isoi eruaiñede. Jusiñamui jitalla isoi, jiaforie eruaide. Ie isoide. Naga fiodaitimie jillua mei, Jusiñamui jitalla isoi, ie abina jiaforie itataite. <sup>39</sup>Diga isoide cai abiaina Jusiñamui jai comuitate. Naga abi isoide ite. Cai

majillena, comini abi ite. Eniruedo macarillena, ocaina abi ite. Fellenia, sillia abi ite. Jinuimo illena, llisiai abi ite. Ua diga isoide abi ite. Jusiñamuidi cai jiaforie eruaite abiaina finorede.

<sup>40</sup>Jusiñamui dine ico cai ia, cai abiai iiite, nainomo cai illena. Bene cai abiai jiai ite, bene cai illena. Monamo cai ia, ebireniticaí. Bene cai ia, jiai ebire iticai; iadedi daje isoi ebire iñedicaí.

<sup>41</sup>Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucuaí isoi lligaiñoñede. Naga ucuaí daje isoi lligaiñoñede. Monamo cai ico illena, naimie jitalla diese cai abiai caimo iiite.

<sup>42</sup>Ie isoide. Fiodaillamona cai jillua mei, cai abiai jiaifo eruaite. Cai fiodaillamona cai abiai rifaide; iadedi cai jilluamona, cai abiai dane jai rifaíñeite. <sup>43</sup>Cai fiodaillamona cai abiai jai ebinide; iadedi cai jilluamona, cai abiai ebirenite. Fiodaicana cai jailla jira, cai abiai birui raise mairiñede; iadedi ico cai jilluamona, cai abiai mairite.

Nana Jusiñamui jitalla rafuena finoreniticaí. <sup>44</sup>Cai fiodaia, come abiai isoi caimo birui ite; iadedi cai jilluamona monamo ico caimo cai abiai jiai iiite. Enirue iena cai abiai birui caimo ite. Ie jira monamo cai jiaifo eruaite abiai caimo iiite.

<sup>45</sup>Adán micori comuilla rafuena Moisés micori jaie cuega: “Jusiñamuidi nano comuidimie dofomo jafaicina firaiñuamona, naimie micori comena jaide” cuega. Naimiemona cai comuilla jira, fiodaiticai. Fiodaillamona Cristo jillua jira, ico cai jiai jilloille jira, caina jiaifo eruaite abiaina ico itataite.

<sup>46</sup>Eniruemo birui cai illa jira, caimo birui ite abiai diga iticai. Fiodaillamona ico cai jillua mei, monamo cai ia, jiaifo eruaite abiai diga iiticaí. <sup>47</sup>Adán micoridí enirue ie. Imuicimona

Jusiñamuidi naimiena finode. Cristodi eniruemo billanona, iimana jaide; iadedi Jusiñamui dñena monamona naimie bite.<sup>48</sup> Imuicimona Adán micori finua jira, naimie fiodailla mei, dane imuicina jaide. Naimiemona cai comuilla jira, cai fiodaia, jiai imuicina jaiticai; iadedi Cristomo jiai duidicai. Cai jillua mei, naimie isoi ico iiticai.<sup>49</sup> Adán micorimona cai comuilla jira, naimiena eruaidicai. Eniruemo Cristo jaie ia, naimie abi ite. Fiodaillamona naimie jillua mei, naimiemo jiaifo eruaite abi naimiemo ite. Cai jillua mei, Cristona eruaiticai.

<sup>50</sup>Cue amatiai, biena lloticue. Caimo jai ite abiai diga monamo Jusiñamui ie cominina sedajanomo iñeitacai. Cai abiai rifailla jira, cai fiodailla facaise naie isoide abiai diga nainomo jaca iñeitacai.<sup>51</sup> Ero, Jusiñamui cuena uiñotaga rafuena omoimo ja lloitacue. Iena navui jaca uiñoñedicai. Nana creyentiaidicai fiodaiñeitacai; iadedi Jusiñamui cai abiaina jiaifo meidotaite.<sup>52</sup> Omoi uisi jarire cuiorilla isoi, iena ua raire meidotaite. Ie trompeta fillanona, jai fiodaite creyentiaina Jusiñamuidi jillotajanona, naimaci abiaina meidotaite. Nia fiodaiñedinodicai cai abiaina jiai meidotaite. Dane fiodaiñeitacai.<sup>53</sup> Cai abiai birui rifaiacade. Ie jira birui fiodaicana jaídicai. Jusiñamuidi cai abiaina ico meidoite. Ico monamo jiaifo abiai caimo ia, cai abiai rifaiñeite. Fiodaiñeitacai.<sup>54</sup> Iese caimo suia, Jusiñamui facaina lloraima micori jaie cuega uai jiai suite. Cuega: “Nairuimona creyentiai jaca fiodaiñeitimaci”.<sup>55</sup> Cai jaca illa jira, fiodaicana jaiñeitacai. Fiotaillana jacinriñeitacai, dane cai fiodaiñeiticaina jira.<sup>56</sup> Jeacino illa jira, birui fiodaicana jaídicai. Moisés micori jaie llogacino illa jira, iena cai raise finonina jira,

jeacino caimo illana uiñoticaí;<sup>57</sup> iadedi cai jeacino facaina cai Nama Jesucristo fiodailla jira, jeacino anamo jai iñedicai. Cai fiodailla mei, dane fiodaiñeitacai. Jusiñamui caina iemona jai jillotate. Ie muidona naimieri cai iobillas.

<sup>58</sup>Cue amatiai, fiodaillamona nana creyentiai ico jillua jira, Cristo rafuena iñocana jai. Naganomo iñeno; iadedi Cristo rafuena llocana omoi jai. Naimie jitailla rafuena finocana omoi jai. Naimie facaina omoi maijia, tainona maijijñedomoi. Naiemona diga mare rafue comuite. Iena jai uiñotomoi.

### Jerusalémo itinomo ucubena oredimaci

**16** <sup>1</sup>Jiae rafuena cuemo jicanotomoi. Jerusalémo ite creyentiaimo ucubena oretaiacadomoi. Galaciamo ite creyentiaimo cue llua isoi, omoimo lloitacue. <sup>2</sup>Naga domingo omoi ucubemona daje diese eneno oni eeno. Omoi maijia bailla diese ucubemona cue bille dinori iena eeno. Iese naga domingo omoi eenoñenia, ico cue bia, ¿niese dacaiño ofrendamo ailluena ucubena joneitomoi? <sup>3</sup>Omoi dine cue rilla mei, omoi eenoga ucubena uillena, Jerusalémo ite creyentiaimo omoi fetocanona oretaitacue. Cartana jiai oretaitacue, omoi fetocano mareuidinona Jerusalémo itino uiñollena. <sup>4</sup>Jerusalémo cue comeci jiai jaiacania, cue diga jaitimaci.

### Pablo jai macariacade

<sup>5</sup>Macedonia railla eniruemo nano jaiticue. Creyentiaina cioillena, dajerie nairaimo jaiticue. Ie mei omoi dine jaiticue. <sup>6</sup>Diga irui omoi diga nibai iiticue. Nana rollime facaise omoi diga nibai iiticue. Nibai daje amani fivui iiticue. Ie mei cuena omoi canollemona oni jaiticue.

Omoi dinomona cue jaia, cue jaillinona nia uiñoñedicue. <sup>7</sup>Omoi dine birui nia jaiñeiticue. Omoi dine birui cue jaia, dallu omoi diga iiticue; iadedi jiairuido omoi dine cue jaia, cai Nama jitaia, omoi diga are iiticue. <sup>8</sup>Beno Efesomo nia iiticue. <sup>9</sup>Beno diga comini Cristo rafuena cacaacadimaci. Naimacimo iena llofueiacadicue. Diga comini cue lluana uaitatimaci. Cue lluana jitañedimaci Ie jira bene nia lloiacadicue. Pentecostés railla rafue fulle mei, jaiticue.

<sup>10</sup>Omoi dine Timoteo ria, naimiena raise marena nafue. Cue isoi cai Nama facaina naimie maijicabide. <sup>11</sup>Ie muidona naimie lluacinona jamaiñeno. Omoimona naimie jaiacanía, cue dine abido naimie raise rillena, naimiena raise cano. Naimie jaiacanía, naimie caimare caimaduano oreta. Jiaie creyentiai diga naimie billemo ocuridicue.

<sup>12</sup>Apolona jicanotomoi. Jiaie creyentiai diga omoi dine naimie jaillana naimemo lloticue; iadedi naimie comeci nia jaiacaiñede. Jiairuido abi juarenia, omoi dine jaite.

### Fuiduacino

<sup>13</sup>Jeacynomona abina rairui. Cristo rafuena iinocana omoi jai. Eimie isoi omoi comeciaina ocuiño. <sup>14</sup>Jiaie cominina omoi isiruillamona, nana omoi finoacalle rafuena fino.

<sup>15</sup>Cue amatiai, Acaya railla eniruemo Estéfanadi, ie comini diga, nano

creyentiaidimaci. Iena uiñotomoi. Naimaci jitaila jira, jiaie creyentiaina canocabidimaci. <sup>16</sup>Naie isoidino lloga uaina cacarei. Naga Cristo dibeimo maijidino uaina cacarei. Iedo omoi jai. <sup>17</sup>Omoimona cue dine Estéfanas bite. Fortunato diga, Acaico diga naimie billa jira, iobidicue. Cue dine iñedomoi; iadedi naimaci billa jira, omoi isoi cuena canodimaci. <sup>18</sup>Naimaci billamona cue comeci caimataide. Omoi comeciai jiai caimataide. Naie isoidinomo: "Marena maijidomoi" omoi railla.

<sup>19</sup>Diga creyentiai Asia railla eniruemo itimaci. Imaci uaina oredimaci. Aquila, ie ai Priscila diga, ie uaina jiai orediaimaiai. Iaimaiai jofomo dajerie creyentiai rocabitimaci. Cristomo naimaci duilla jira, omoina isiruillanona, nana naie creyentiai imaci uaina jiai oredimaci. <sup>20</sup>Nana bene ite creyentiai imaci uaina oredimaci. Nana creyentiaina eo caimare uaido.

<sup>21</sup>Omoimo cue uaina jiai oredicue. Cuena canollena, naimemo cue llu isoi, jiaimie bie carta cuega; iadedi cue mameci bene dama cueticue. Nana iena iino. Pablodicue.

<sup>22</sup>Omoimona Cristona bu isiruiñenia, Jusiñamui naimiena duere finollesa. Cai Nama abido dane billesa.

<sup>23</sup>Cai Nama Jesús omoina duenallasa. <sup>24</sup>Jesucristomo cai duilla jira, omoina cue isiruillana omoi uiñuana jitaidicue. Mai. Macaibaite.

# CORINTOMO ITE CRISTONA HNOTINOMO IE EMODOMO PABLO ORETAGA RABE

Corintomo ite creyentiaimo  
Pablo cartana orede

**1** <sup>1</sup>¿Nigacino? ¿Nie isoidomoi?  
Pablodicue. Corintomo ite  
creyentiai, omoi dine bie carta oredicue.  
Nana Acaya railla eniruemo ite  
creyentiaimo bie carta jiai oredicue.  
Jusiñamui jitailacino omoi finocana  
jaillana jitaídicue. Cueno naimie  
fainonocaiñellena, cue isoi omoi duere  
sefuria, omoina ocuiñotaredicue. <sup>7</sup>Cue  
isoi omoi duere sefuria, cue isoi Cristo  
omoi comeciaína ocuiñotaite. Iena raise  
uiñoticue.

Pablo ie duere  
sefuilla rafuena cuete

<sup>3</sup>Cai Moo Jusiñamuimo iobillacinona  
cai fecacabilla, naimiedi cai Nama  
Jesucristo ie Moo illanona. Jusiñamui  
cai Moo illanona, caina jaca duenaite.  
Cai comeciaína jaca ocuiñotade. <sup>4</sup>Nie  
isoide rafuemona cue duere sefuria, nie  
isoide ramo cue jiria, naimie cue  
comecina jaca ocuiñotade. Ie jira  
jiaínona canoredicue. Nie isoide  
rafuemona naimaci duere sefuria, nie  
isoide ramo naimaci jiria, Jusiñamui  
caína ocuiñotaja isoi, naimaci  
comeciaína ocuiñotaredicue. <sup>5</sup>Cristomo  
jai cue duilla jira, naimie isoi cue duere

sefuria, naimie cue comecina ocuiñotade.  
Iemono jiaíno comecina ocuiñotajana  
raise uiñoticue. <sup>6</sup>Duere cue  
sefuillamona, omoina canoredicue.  
Jusiñamui jitailacino omoi finocana  
jaillana jitaídicue. Cueno naimie  
ocuiñotajamona, Cristona omoi  
fainonocaiñellena, cue isoi omoi duere  
sefuria, omoina ocuiñotaredicue. <sup>7</sup>Cue  
isoi omoi duere sefuria, cue isoi Cristo  
omoi comeciaína ocuiñotaite. Iena raise  
uiñoticue.

<sup>8</sup>Cristomo cai duillamona, cue amatiai  
isoi itomoi. Asia railla eniruemo jaie eo  
duere sefuidicue. Iena omoi raise  
uiñollena, ie rafuena dane omoimo  
lloiacadicue. Eo duere cue sefuilla jira,  
cue comeci niadedi ocuiñoñedicue.  
Niadedi fioldaiticue. <sup>9</sup>“Naie facaise  
fioldaiticue” raillanomo cue comecina  
facadicue. Cue finoca rafuemona dama  
jillonidicue; ia Jusiñamui uai siñona  
jira, naimie cuena jillotate. Fioldaitinona  
naimie jillotarede. Niadedi fioldaitinona  
jiai jillotarede. Naimiedi naimie cuena  
jillotajana cue iiñuana jitaide. <sup>10</sup>Naie  
facaise eo duere sefuillamona cuena  
jillotate. Ico cue duere sefuria, iemono  
dane cue jilloillena iinoticue. <sup>11</sup>Iena cue  
facaina omoi jiicabi. Jusiñamui fairiu  
meinomo, ailluena comini cue facaina  
Jusiñamuimo iobillacinona fecaitimaci.  
Cueno Jusiñamui canua jira,  
iobillacinona fecaitimaci.

### Pablo Corintomo navui jaiñede

<sup>12</sup>Cuena gaiñedino cuena nibai jeare ñaitimaci; ia daje rafueri abina iedoticue. Cue comecimona iena uiñoticue. Cristona iiñoñedinona marena finodicue. Omoina marena finodicue. Jusiñamui jitallacino finocana jaidicue. Jusiñamuimona jeacinona finoñecana jaidicue. Cue comecina facajacinomona iese jaiñedicue; ia Jusiñamui cuena canuamona, iese jaidicue. <sup>13</sup>“Iese cuetio; iadedi o comecimo jiaie rafue ite diga caimo cuetio” raitomoi. Omoina jifueiacaiñedicue. Cue cuega cartaiaina jai facadomo. Cue cuega rafue omoi raise cacajana jitaidicue. <sup>14</sup>Cuena nia eo raise uiñoñedomoi; ia cuena uiñocana omoi jaillanona, cuerí omoi iobillana jitaidicue. Cai Nama Jesús abiðo bia, omoiri cue iobilla isoi, cuerí omoi iobillana jitaidicue. <sup>15</sup>Omoimo iese cue comecina facajamona, omoi dine navui jaiacadicue. Macedoniamo cue jaiacadicuemo, raise omoina cue iobitallena, omoi dine nano navui jaiacadicue. <sup>16</sup>Macedoniamona cue abido bia, omoi dine navui dane jaiacadicue. Judeamo cue diga jaillena, omoimona damieriena omoi oretajana jitaidicue. Iese cue jaillemo navui comecina facadicue. <sup>17</sup>Omoi dine cue jaiñena jira, cue comeci naganomo illa isoi, comeciaina facadomo. Damierie ie lloga uaina jaca finoñedimaci. Dani naimaci rafuemo comeciaina facadimaci. “Jii” raitimaci; ia: “Dama ite” comeciaina facadimaci. <sup>18</sup>Iese iñedicue. Jusiñamui uanaicinona jaca llua isoi, cue comeci naganomo iñede. Omoimo cue lloga uai finodicue. <sup>19</sup>Jusiñamui Jito Jesucristo rafuena omoimo navui lloticue. Cristo ie llogacinona jaca meidoñede. Silvano

ienai jiai llofuete. Timoteo iena jiai llofuete. Nagarui daje isoide rafuena llofueticai. Jiairuido jiaie Cristo rafuena llofueñedicai. <sup>20</sup>Nana Jusiñamui jai lloga uai Cristo finoca rafuemona suicabide. Jusiñamuina cai sedaia: “Cristo ie rafuena raise finode” cai lloia, Jusiñamuina iobitadicai. <sup>21</sup>Jusiñamui Cristo dibeimo caina jai itata. Ie rafuena cai llollena, caina jai fetode. <sup>22</sup>Ie cominina caina itata. Iena cai uiñollena, ie Joreño caímo jai itata. <sup>23</sup>Jusiñamuidi cue uanaicinona lluana uiñote. Uanaicinona cue lloñenia, Jusiñamui cuena duere finuana jitaidicue. Omoi finoca rafue jai cue uiñuamona, omoimo cue riire llo raillano, omoi dine navui dane jaiñedicue. <sup>24</sup>Cristona jai omoi iiñuana uiñoticue. Cristona iiñocana omoi jailla jira, omoi finolle rafuena lloñedicue; ia omoi iocire illana jitaidicue.

**2** <sup>1</sup>Omoi dine nia cue jaiñellemo comecina facadicue. Omoi dine navui cue ia, iocire coniniri iñedicai. <sup>2</sup>Omoina jai icidicue. Cuerí omoi iobillana jitaidicue; ia omoina cue dane iciia, coniniri iocire iñeiticas. <sup>3</sup>Omoimo cartana navui oredicue. Omoi dine ite rafuena raise finollena, iena oredicue. Cuena iobitajana uiñotomoi. Omoi dine ite rafuena omoi raise finoia, coniniri iocire iñicas. “Cuena iobitaitomoi” raillanomo cue comecina facadicue. <sup>4</sup>Cue comeci eo sunaillamona, cue comeci eo eiamona, carta navui oredicue. Omoina iciacaiñedicue; ia omoina cue eo isiruillana omoi uiñuana jitaidicue. Ie jira omoi dine ite rafuena raise fino.

### Maraiñede rafuena finodimie rafuena feita

<sup>5</sup>Maraiñede rafue navui damie finua jira, sunaiticai. Naimie muidona cue

comecido duere jaide; ia daje isoi omoi comeciai jiai duere jaide. <sup>6</sup>Omoi nabei dine ite cominimona naimie jai duere sefuilla jira, dama iesede. Naimiena dane duere finoñeno; <sup>7</sup>ia naimie finoca rafuena mai feita. Iena dane llinoñeno. Naimie comecinha ocuiñota. Naimiena iese omoi canoñenia, omoimona duere sefuillamona, abido danomo jaite. <sup>8</sup>Ie jira: “Ona nia isiruiticai” naimiemo llono. Iena eo jitaidicue. <sup>9</sup>Nana cue lluana omoi iñuana cue facacillena, carta omoi díne navui cueticue. <sup>10</sup>Naimie finoca rafuena omoi feitaia, iena cue jiai feitaiticue. Cristo rafuena omoi iñocana jaillana cue jitaila jira, naimie rafuena feitaiticue. Cristo cuena uiñuamona, iena feitaiticue. <sup>11</sup>Taife ramo cai faiana uiñoticai. Cristo rafuedo cai raise jaiñellena, naimie jitailana uiñoticai. Cristo dibeimona caina Taife itatañenia, omoi motomo itimie finoca rafuena feitaiticai.

#### **Troamo navui Pablo ia, uri iñede**

<sup>12</sup>Troamo navui jaidicue. Cristo rafuena cue llollena jaidicue. Cai Nama comini comeciaina jetajamona, naimie dibeimo cue maijamona, ie rafuena lloticue. <sup>13</sup>Tito nainomo cue cioñena jira, uri iñedicue. Naimiedi cue ama isoide. Ie jira nainomo ite creyentiaina facaduanona, Macedoniamo jaidicue.

#### **Jusiñamuidi Cristo dibeimo iñedinona anafeftaite**

<sup>14</sup>Jusiñamui fue eo mare. Cristo dibeimo iñedinona naimie anafeftajanona, Cristo cominina cai illamona, naimie rafuena uicana jaidicai. Ie rafuena cai lloia, iena comini iñioia, Jusiñamui naimacina jai caímare itatate. <sup>15</sup>Cristomo cai duillamona, ie rafuena cai lloia, Jusiñamuina iobitadicai. Cai lluamona, damierie

jillodimaci. Iena jitaiñenamona, damierie fafidimaci. <sup>16</sup>Iena cacajamona, damierie faificana jaidimaci. Jusiñamui illanomo jaca iñeitimaci. Iena cacajamona, jiaino Jusiñamui illanomo jaca iitimaci. Jamai bue isoidicue; ia bie rafue llocana jaidicue. <sup>17</sup>Damierie Jusiñamui rafuena lluamona, ucubena oiacadimaci. Omoimo comecinha facañedimaci; ia iese llofueñedicue. Omoimo cue comecinha facajanona, bie rafue cue lluamona, buena oñedicue. Jusiñamuimona cue llogacinona oticue. Jusiñamui cuena ciua jira, Cristomo cue duilla jira, uanaicinona jaca lloticue.

#### **Cristo caímo lloga rafuedo birui jaidicai**

**3** <sup>1</sup>Omoi díne damierie llofueraini jaia, cartaiaina uicabitimaci. Naimaci cartaiaimo jiainodi: “Bie llofueraini mare” raillanona cuetimaci. Omoimona jiaino cuega cartaiaina: “Bie comini mare” raillana jitaiñedicue. Cuemona jiaino cuega cartaiaina: “Pablo mare” raillana jiai jitaiñedomoi. <sup>2</sup>Omoi marenana jai uiñoticue. Cue maremienana jai uiñotomoi. Carta isoidomoi. Jusifñamui dibeimo omoi comeciai meiduamona, cue comecimona omoina raise uiñoticue. Omoi birui illamona, omoina fidiamona, nana comini omoina raise uiñotimaci. Ie jira jiainodi: “Bie comini mare” raillana omoimona jitaiñedicue. <sup>3</sup>Cristo rafuena omoimo lloticue; ia Cristo omoi comeciaina jai meidotaja jira: “Omoi mare” raillanona naimie jai cuegadena, nana comini uiñotimaci. Tinta diga naimie cuénde. Jusiñamui Moisés micorimo jaie lloga rafue jamai noficimo cuega. Cai cajede Jusiñamui birui iese cueñede; ia naimie Joreño uaido omoi comeciaina birui meidote.

<sup>4</sup>Cristomo cue jai duilla jira, Jusiñamuina cue iïnuamona, omoina iese lloticue. <sup>5</sup>Cue finoca rafuema iese lloñedicie; ia Jusiñamui uai cuemo illamona, iese omoimo lloticue. <sup>6</sup>Jiae rafuedo birui cue jaillena, Jusiñamui cuena fetode. Ie uai cuemo illamona, cuemo lloga rafuena llocabiticue. Moisés micorimo lloga rafuena birui lloñedicie. Moisés micorimo lloga rafue iïnuamona, Jusiñamui illanomo jaca buna itatañede. Jusiñamui Joreño llotataga rafuena birui llocabiticue. Iena cai iïnuamona, Jusiñamui Joreño Jusiñamui illanomo caína jaca itata.

<sup>7</sup>Moisés micorimo lloga rafuedo jaillamona, Jusiñamui dine buna jaca iñena. Noficimo Jusiñamui cuega. Moisés micorimo Jusiñamui llua mei, Jusiñamui uai ebirena jira, Moisés micorí ueco eo quenirecaide. Jusiñamuimona naimie abido bia, Israel comini Moisés micori uecomo eruaínidimaci. Nagarui Jusiñamui diga naimie ñaíñenia, naimie micorí ueco ja muidomo queninide. <sup>8</sup>Jusiñamui Moisés micorimo jaie lloga uai ebirede; ia Jusiñamui Joreño birui caímo lloga uai baifemo ebirede. <sup>9</sup>Moisés micorí rafuedo bu jaia, faificana jaide; ia naie rafue ebirede. Birui ite rafuedo bu jaia, Jusiñamuimona marebicaide. Ie muidoma birui ite rafue jaie ite rafue baifemo ua eo faite. <sup>10</sup>Moisés micorí rafue jaie ebirede; ia jiae rafue birui illa jira, Moisés micorí rafue jai birui ebinide. <sup>11</sup>Birui ite rafue jaca saíñena jira, ua eo ebirede.

<sup>12</sup>Iena cai uiñuamona, bie rafuena marefodo jaciruiñeno lloticue. <sup>13</sup>Ínroi diga, Moisés micorí isoi cue uecona ibaiñedicie. Naimie micorí ie ueco ibaide, ja muidomo ie ueco quenirena feioicaillana comini cioíñellena; ia cue lloga rafuena marefodo llocabiticue.

<sup>14</sup>Moisés micorí comini Jusiñamui rafuena jaca iïnoñedimaci. Naimaci comeciajítaiñena jira, iïnoñedimaci. Moisés micorí rafuena birui judúai comini facaia, iena nia raise cacaiñedimaci. Dani Cristona iïnuamona, naimaci comeciaj raise cacareitimaci. <sup>15</sup>Cristo rafuena birui naimaci iïnoñena muidona, Moisés micorí rafuedo nia jaidimaci. <sup>16</sup>Cai Nama dibeimo bu jaia, naimie comeci raise cascade. Moisés micorí rafuedo naimiedi cai jaiñenana raise uiñote. <sup>17</sup>Cai Nama Joreñona lloitice. Cristo dibeimo cai jaia, naimie Joreño caímo jiai ite. Cristona cai nabailamona, jeacino anamo jai iñedicaí. Moisés micorí rafue anamo jai iñedicaí.

<sup>18</sup>Cristomo jai cai duilla jira, naimiencaí comeciaimona raise uiñua jira, ie ebirede uaina uiñotici. Acaranimo cai erauilla mona, cai abina ciódicai. Ie isoide. Cai illamona jiae comini Cristona uiñotimaci. Cai Nama Joreño caina canuamona, naimie ebirena isoi cai illena, icana jайдicai.

**4** <sup>1</sup>Jusiñamui cuena duenallamona, cue comeicina ocuiñocaida, Cristo rafuena llocana jaidicue. <sup>2</sup>Meirede rafuena llofueñedicie. Iena bainino llofueñedicie. Jifuanona omoina llofueñedicie. Omoiri iobitallená, Jusiñamui rafuena meidoñedicie. Jusiñamui cuena ciuana cue uiñuamona, naimie rafuena uanaicinona llofuecabiticue. Cue llofuiana bu raise cacaia, uanaicino cue llofuecabillana uiñote. <sup>3</sup>Faificana jaidinodí cue mare lloga rafuena raise cacaiñedimaci. <sup>4</sup>Taife anamo naimaci illamona, naimie naimacina cacareftañede. Cristo uai ebirede. Jusiñamui isoi naimie ite. Taifedi Cristo rafuena naimaci raise uiñuana jitaiñede. <sup>5</sup>Cue finoca rafuena llofueñedicie; ia Jesucristodi cai

Namanana llofuecabiticue. Naimie dibeimo cue maijamona, omoina canollena, naimie rafuena llofuecabiticue. <sup>6</sup>Enirue finua facaise Jusiñamui llote: "Jitiredino nana eniruemo iñellena, useredino mai iite". Naimiena cue nia uiñoñenia, jeacino anamo cue illamona, cue comeci jitiredinomo ite isoide. Naimiena cuena naimie jai uiñotaja jira, cue comeci useredinomo jai ite isoide. Jesucristo monamo illanona jaie cue cianona, Jusiñamui uai ebirede siñonana llofueticue.

**Cai comeciai ocuiñocaida  
iinocana jaidicai**

<sup>7</sup>Enirue ie imuicimona comuidicue; ia Cristo ie mare ebirede rafue cuemo jai ite. Iemonia cue lloga rafue cuemonia iñenana uiñotomoi; ia ie uai siñonana illamona, Jusiñamui illana uiñotomoi. <sup>8</sup>Bie mare rafue cue llofuiamona, navui duere sefuidicue; ia nia llofuecana jaidicue. Iena sefuruiñedicue. Naga cuemo suide rafuemo raise cacareñeno comechina ocuiñocana jaidicue. <sup>9</sup>Damierie cuena duere finodimaci; ia Jusiñamui cuena fainonocaiñeno cuena canode. <sup>10</sup>Eniruemo jaie Jesús ia, duere sefuillamona, ja muidomo fiodaite. Jesús isoi duere sefuicana cue jaia, naiemonia niadeti nagarui fiodaíticue. Iemonia cuena naimie jillotaja muidona, Jesús siño uaina uiñocana jaidicue. <sup>11</sup>Jesús rafuena cue llua muidona, nagarui damierie cuena meineiacade. Iemonia cue jillacabilla jira, Jesús siño uaina uiñotomoi. <sup>12</sup>Naimie rafue cue llua muidona, cuena meineiacadimaci; ia bie rafuena omoi iiñuamona, Jusiñamui illanomo jaca iitomoi. <sup>13</sup>Jusiñamui facaina lloraima jaie cuega: "Cue iiñua jira, iena llofueticue". Naimie isoi cue iiñua jira, bie rafuena

jiai llofuecabiticue. <sup>14</sup>Jesús fiodaillamona Jusiñamui naimie jaie jillotate. Iena cue uiñuamona, cai fioldaille mei, caina jiai jillotaite. Jesúmo cai duilla jira, naimie illanomo danomo caña ico itataite. <sup>15</sup>Omoi facaina nana cue rafue finodicue. Cristo rafuena comini uiñollena, duere sefuidicue. Iemonia Jusiñamui naimacina duenaillana uiñoitimaci. Jusiñamui dibeimo naimaci illamona, naimiemo iobillacinona fecacabitimaci. Ieri naimiena iobitaitimaci. <sup>16</sup>Ie jira iena sefuruiñedicue. Cue mairici fuiciana nagarui jaide; ia cue comeci nagarui iiñocana ocuricana jaidicue. <sup>17</sup>Birui duere sefuidicue; ia iemo cue comecina eo facañedicue. Cristo rafue muidona birui duere cue sefuria, Jusiñamui illanomo ico cue ia, nainomo ebire marena iiticue. Iemo cue comecina eo facadicue. <sup>18</sup>Cuemo birui suide rafuemo comecina eo facañedicue. Jusiñamui illanomo cue nia cíoñeña rafuemo comecina eo facadicue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga iocire jaca iiticue.

**5** <sup>1</sup>Caimo ite abi rifaillemona, Jusiñamui illanomo cai illemona, Jusiñamui jiaie isoide abi caimo itataite. Nainomo cai abi jaca rifaiñeite. <sup>2</sup>Birui cue duere sefuillamona, Jusiñamui cuemo ico itatalle abina eo oiacadicue. <sup>3</sup>Cue fioldilla mei, Jusiñamui cue joreñomo jiaie isoide abina itataite. <sup>4</sup>Cue jiaie isoide abi cuemo illena, cue jamai fiodaicaiñedicue; ia iena eo oiacadicue. Jusiñamui cuemo jiaie isoide itataiacade abina eo oiacadicue. Cue fioldaille abi ifomo jaca ille abina cuemo iite. <sup>5</sup>Jusiñamuidi ie Joreño caimo itatajamona, cai abiaina iese jiai itatajana uiñoticai. <sup>6</sup>Iena cue

uiñuamona, nie isoide rafue ia, iinocana jaca jaidicue. Nia cue fiodaiñenia, cai Nama illa ecimo nia iñedicue.  
<sup>7</sup>Naimiena birui cioiñedicue; ia naimiena iinocana jaidicue. <sup>8</sup>Iese jaidicue. Cue Nama diga cue illena, fiodaiacadicue; <sup>9</sup>iadedi nia cue fiodaiñenia, naimiena jaca iobitaiacadicue. Cue fiodaia, naimiena jiai jaca iobitaiacadicue. <sup>10</sup>Naimie llua jira, Cristo uicomodo ico nana iitícaí. Cai bene finoca rafuena uiñotaite. Maraiñede rafuena cai bene finua diese, naimiemonia ibana feiñofeiticai. Mare rafuena cai bene finua diese, naimiemonia ibana feiñoticai. Ie muidona naimie jitailacina jaca finoacadicue.

#### Jusiñamui diga cai uri illafue

<sup>11</sup>Cue Nama uicomodo ico cue illemona, iena cue jaciruillamona, naimie dibeimo cominina jai itatacana jaidicue. Jusiñamui cue illana raise uiñote. Cue illana raise omoi uiñuana jitadicue.  
<sup>12</sup>“Cuedi maremiedicue” lloñedicue; ia cue abi facaina omoi riidollena, bie rafuena lloticue. Omoi motomo damierie llofueraini naimaci llofuiacino diga abina iedotimaci; ia naimaci comeciaimo iticino diga abina ideoñedimaci. <sup>13</sup>“Naimiedi uairico” cuena raitimaci. Iese cue iticuedena, Jusiñamui facaina iese iticue; ie iadedi uairicoñedicue. Omoina llofuellena, omoi facaina maijidicue.  
<sup>14</sup>Nie isoidicuena, Cristo cuena isiruillana cue uiñuamona, jaca llofueiacadicue. Nana comini facaina damie fiodaillana jai iiñoticue. Naimaci jeacino ifomo naimie jai fiodaite. <sup>15</sup>Nana cai facaina naimie fiodaite. Fiodaillamona Jusiñamui naimiena jai jilloitate. Naimiena nia cai iinoñenia, daní cai comeciaimo ite rafue diga iobidicai; ia naimiena jai cai iinua mei, daní cai comeciaimona naimiena cai

ibitatjana naimie jitaide. Ie jira cue illana jai uiñotomoi.

<sup>16</sup>Damierie llofuerainidi jiañomo eruaillamona, naimaci comeciaina facajamona: “Naimaci mare” raitimaci. Jiaicaiñ: “Naimaci maraiñede” raitimaci; iadedi Cristona cue iinua facaisemonia iese cominimo eruaíñedicue. Naimiena nia cue iinoñenia, Cristona jaie raise uiñofedicue. “Naimiedi jamai iima” raillamo comecina facadicue; ia iese naimiemo birui comecina facañedicue. <sup>17</sup>Cristona cai iinua mei, naimiemo jai cai duillamona, cai comeciai iuaina meidoticaí. Jai jiaie isoidicai. Jiaie rafuedo jai jaidicai. Jaie caimo ite rafuedo jai jaiñedicai. <sup>18</sup>Jusiñamui cai comeciai iuaina meidotade. Cristo fiodaillamona, Jusiñamui dibeimo caina itata. Lemona naimiena jai nabairedicai. Naimacimo ie rafuena llollena, cuena fetode, jiaie cominina ie dibeimo itatallena. <sup>19</sup>Cristo finoca rafue muidona, Jusiñamui dinena cominina nabaiacade. Naimaci jeacino facaina ibana jai oiacaiñede. Bie rafuena llollena, cuena jai fetode. <sup>20</sup>Cristo cuena oretajamona, naimie facaina llofuecabiticue. Cue llogacinomona Jusiñamui uiñotomoi. Omoimona naimiena bu nia iinoñenia, Cristo facaina cue illa jira, Jusiñamuina omoi nabaillanona, naimie diga uri i. <sup>21</sup>Cristo jeacino jaca finoñede; ia cai jeacino facaina, Jusiñamui jitaila jira, jeacino finodimie isoi jaide. Naimiemo cai duillamona, Jusiñamui jitaila isoi, jai marebicaidicai.

**6** <sup>1</sup>Bie rafuena nia lliacadicue. **6** Jusiñamui facaina cai maijamona, naimie dibeimo cominina itataticai. Naimie caina duenallana uiñoticue. Iena omoi iinocana jaillana jitaidicue. <sup>2</sup>Jaie Jusiñamui cuetata:

Cue jitaila facaise omoi  
jitaillacina jai cacadicue.  
Omoi jilloillena, omoina jai  
canodicue.  
Ero, Jusiñamui birui omoina  
cacaacade. Birui omoina canuanona,  
omoina jillotaiacade. Ie muidona  
naimiena iinocana jai. <sup>3</sup>Bie rafuena  
omoi iinoñellena, cue llofuiacinona  
omoi jamaiñellena, bu diga rafuena  
comuitaiaçaiñedicue. <sup>4</sup>Jusiñamui  
dibeimo cue maijiamona, nie isoide  
rafuemona ramo cue jiria, cue illamona  
naimiedi: "Mare" cuena raillana  
jitaídícué. Eo duere sefuidicue. Diga  
icaiño damierie cuena duere finodimaci.  
Diga icaiño ramo jiridicue. <sup>5</sup>Damierie  
cuena fatimaci. Cárcelmo cuena  
jonetimaci. Naimaci illanuaimona  
cuena riire dotadimaci. Eo cue maijia  
jira, diga icaiño eo raise iniñedicue.  
Aime guisoidicue. <sup>6</sup>Jearede rafuena  
ebiruiñedicue. Cristo rafuena uiñocana  
jaidicue. Iciriñedicue. Jiañona  
canocabidicue. Jusiñamui Joreño  
anamo iticue. Cominina raise isiruiticue.  
<sup>7</sup>Uanaicinona llocabiticue. Jusiñamui  
uai cuemo illamona, llofuecabiticue.  
Cue comecinia riidollena, Taifena  
emodofillena, Jusiñamui jitaila isoi,  
marecinona finocana jaidicue.  
<sup>8</sup>Damierie cuena marena jai ñaitimaci.  
Jiaño cuena jeare nia ñaitimaci.  
Damierie cuerí jai iobidimaci. Jiaño  
cue joreñona jai ñaitimaci. Damierie:  
"Caina jifuetio" cuena raitimaci; ia nia  
uanaicinona llocabiticue. <sup>9</sup>Damierie:  
"Jamai bue isoidio" cuena raitimaci; ia  
jiaño cuena raise uiñuamona, naimaci  
dinena jamai bue isoiñedicue. Nagarui  
niadedi fiodaicabiticue; ia nia iticue.  
Duere sefucana jaidicue; ia Jusiñamui  
cue comecinia ocuiñotacana nia jaidicue.  
<sup>10</sup>Sunaiticue; ia iocire jaca iticue.  
Dueredicue; ia ailluena comini

comeciaina eo caimaretadicue.  
Buenidicue; ia Jusiñamuimona ailluena  
marecinona feiñoticue. Iese jaca  
jaidicue. Cue illamona: "Naimiedi  
mare" cuena omoi railiana jitaidicue.

<sup>11</sup>Corintomo itino, cue nabaiñiai, cue  
comecimo ite rafuena marefodo jai  
lloticue. Cue comecimona omoi diga  
marena iacadicue. <sup>12</sup>Cuemona omoina  
raise isiruiticue; ia omoi dinena nia  
cuena eo isiruiñedomoi. <sup>13</sup>Cue uruiai  
omoi isoilla jira, omoi diga ñaiticue.  
Omoina cue isiruilla isoi, cuena omoi  
isirui.

### Jusiñamui cai comeciaimo illanodicaí

<sup>14</sup>Creyentedimemo jearede ramo  
faitatai raillano, daje isoide rafuedo  
iaimaiai jaiñena jira, daje isoi rafuena  
iaimaiai comeci lloñena jira, creyente  
creyentefiedimie diga daje rana  
namatañena. Aina illena, creyentena  
iñediñaiñona creyentedimie oñena.  
Ínina illena, creyentena iñedimien  
creyentediñaiño oñena. Marecinodo  
jaiacadimiedi maraiñedicinodo  
jaiacadimie daje isoi diga nabairinide.  
Jusiñamuina uanaicinona uiñotimiedi  
useredinomo jai ite isoide. Jeacino  
anamo nia itimie jitiredinomo nia ite  
isoide. Cristo rafuena naimie uiñoñede;  
ia Cristo rafuena omoi uiñuamona,  
useredinomo jai itomoi isiodomoi.

<sup>15</sup>Cristodi Taife diga jaca nabairinide.  
Creyentemiedi creyenteñedimie diga  
daje isoi inide. Daje isoi comecinia  
facañede. <sup>16</sup>Creyenteñedimiedi  
Jusiñamuina sedafiede; ia jiraraina  
sedade. Creyente comecimo Jusiñamui  
illamona, Jusiñamuina sedade. Nana  
creyentiai comeciaimo Jusiñamui ite.  
Iena jaie Jusiñamui llore:

Comini motomo iiticue.  
Naimacina nabaiticue.

Naimaci Jusiñamuiniticue. Cue comininitimaci.

<sup>17</sup> Ie muidona cuena iinoñedino diga daje rana namatañeno.

Naimaci jearede jetaca rafuena abimo oñeno.

Iemonia omoina raise feiñoticue.

<sup>18</sup> Omoi Moona iiticue. Cue uruiaina jaitomoi.

Siño jitodicue.

**7** <sup>1</sup>Cue isiruiganodomoi. Bie llogacino Jusiñamui caímo jai llua jira, naga maraiñede rafuena fainonocaida, cai jailla. Naga cai comeciaína jearetade rafuena fainonocaida, mai cai jailla. Jusiñamuina cai jaciruillamona, nana naimie jitailacinona finocana mai cai jailla.

Pablo cartamo cuegacino  
diese finodimaci

<sup>2</sup>Omoi comeciaímona cuena raise feiñó. Buna jeare finoñedicue. Buna jifueñedicue. <sup>3</sup>Maraiñede rafuena jai omoi finuana lloñedicue. Omoímo cue comeicina nagarui facadicue. Iena ailli lloticue. Nia cue ia, raire cue fiodaia, omoina jaca uibiñocabiticue. <sup>4</sup>Cue lluacínona omoi iinuana raise uiñoticue. Omoíri iobidicue. Omoi diga jai uri iticue. Duere sefuidicue; ia iocire iticue.

<sup>5</sup>Macedoniamo navui cue jaidicuem, cue comeciuri iñede. Cue dibeimo iñedinomona nagarui duere sefuillamona, cue comeci jarire ite. Cristo dibeimona creyentiaína naimaci itatallemo cue comeci jarire ite.

<sup>6</sup>Comeciaína ocuiñedinona Jusiñamui ocuiñotacabilla isoi, Tito billamona, Jusiñamui cue comeicina ocuiñotade.

<sup>7</sup>Cue dine naimie ria, iocire iticue. Omoímo ite rafue cue cacajamona, jiai iocire iticue. Cuena omoi cioacanana llote. Cue comeci jarire illari sunaitomoi. Cuena riidoiacadomoí. Iena

cue cacajanona, iocire iticue. <sup>8</sup>Carta omoi dine navui oredicue. Iena omoi feiñua mei, sunaitomoi; ia iena cue oretajari birui sunaiñedicue. Navui ieri sunaiticue; ia iena omoi feiñua mei, iemonia dallu omoi sunailla jira, jai iocire iticue. <sup>9</sup>Omoi sunaillana jitaiñedicue; ia iemonia Jusiñamui dibeimo omoi comeci iuai omoi meidua jira, iocire iticue. Cue cuega carta muidona iciriñedomoi; ia Jusiñamui jitailla isoi sunaitomoi. <sup>10</sup>Jusiñamui jitailla isoi, ie jeacino facaina bu sunaillamona ie comeci iuai Jusiñamui dibeimo meidoia, sunaiñede; ia bu jamai sunaillamona ie comeci iuai Jusiñamui dibeimo meidoñenia, fafite. Jusiñamui diga jaca iñeite. <sup>11</sup>Jusiñamui jitailla isoi omoi sunaillamona, omoi comeciaína raise finodomoí. Maraiñede rafue dibeimo iacaiñedomoi. Iena eo jitaiñedomoi. Jusiñamui duere sefuitallicino anamo iacaiñedomoi. Cuena dane cioacadomoí. Jusiñamui jitailacinona eo finoacadomoí. Jusiñamui dibeimo naimie illena, maraiñede rafuena finodimien duere finodomoí. Nana bie rafuena raise fuidodomoi. <sup>12</sup>Carta navui omoi dine cue oretaria, maraiñede rafuena finodimieno cue comeicina eo facañedicue. Naimiemona duere sefuidimieno cue comeicina eo facañedicue. Cuemo omoi comeciaína facajana omoi uiñollena, navui cueticue. Jusiñamui iena uiñote. <sup>13</sup>Ie jira cue comeicina ocuiñoticue. Tito jiai iocire illa jira, dane iobidicue. Naimie comeicina caimare omoi itataja jira, iobidicue. <sup>14</sup>Omoi dine Tito nia jaiñenia, naimiemo omoina lloticue. “Naimaci ona feiñotimaci. Naimaciri iobidicue” naimiemo navui lloticue. Iese naimieno omoi feiñua jira, ieri meidaiñedicue. Omoímo uanaicinona jaca lloticue.

Naimiemo cue llua isoi jiai suide.  
<sup>15</sup>Naimie llofuiacino omoi iinoiacana jira, naimie omoina birui raise isiruite. Meiruioicaida, comeciaj jarire illamona, naimiena feifotomoi. <sup>16</sup>Omoina raise uiñoticue. Cristo iinocana omoi jaillana raise iinoticue. Omoiri iocire iticue.

**Creyentiai Jusiñamui  
ucubena fecaja rafue**

**8** <sup>1</sup>Cue amatiai, omoimo jiae rafuena lloiacadicue. Jusiñamui naimacina canuamona Macedoniamo ite creyentiaina omoi uiñuana jitaidicue. <sup>2</sup>Eo duere sefuidimaci. Jiae eo dueredimaci; ia iocire illamona, jiae creyentiaimo ucubena caidiñeno fecacabidimaci. <sup>3</sup>Naimacimo ite ucube diese fecadimaci. Iena uiñoticue. Naimaci jitaila jira, naie baifemo fecadimaci. Naimacimo iese fecajana jaca lloñedicue. <sup>4</sup>Naimacimo iese lloñedicue; ia iena naimaci eo feacaacana jira, jiae creyentiaina canollena, cuemo iena eo jicanotimaci. Ucube diga jiaino creyentiaina naimaci canuana cue lluana eo jitaidimaci. <sup>5</sup>Cue comecina facaja isoi, fecañedimaci. Ucubena fecadimaci; ia: “Cai Nama dibeimo maijiacadicaí” jiae llotimaci. Nie isoide rafuena naimaci finuana cue ocuillena, Jusiñamui jitaila isoi, jitaidimaci. <sup>6</sup>Omoi dine Tito dane jaillena jitaidicue. Omoi dine naimie navui ia, ucube omoi uana naimie canode. Iemonia janore tainedomoi. Jiae creyentiaina omoi canuana raise fuiduana jitaidicue. <sup>7</sup>Cristona iinocana jaidomoi. Iena jiañomo llocabitomoi. Cristo rafuena raise uiñotomoi. Cristo jitailacinona eo finocana jaidomoi. Cuena jiae isiruitomoi. Ie muidona omoi ucube diga, jiae creyentiaina omoi raise canuana jiae jitaidicue. <sup>8</sup>Omoina iese riire lloñedicue. Macedoniamo ite creyentiaina eo canuana omoi

uiñuamona, jiae creyentiaina omoi canoia, Cristona omoi isiruillana uiñoiticai. <sup>9</sup>Cai Nama Jesucristomona cai fueua. Naimie caina duenaillana uiñotomoi. Ie Moo ecimo naimie nano illamona, naga ra naimiemo ite; ia eniruemo ie billamona, caina canollena, iimana jaillanona, duere ite. Iemonia Jusiñamui rafuena cai cacaja jira, duere iñedicai. <sup>10</sup>Ie jira omoimo bie rafuena lloiacadicue. Navuidi año ucube eenuana tainedomoi. Iena finoacadomoi. Ie fuiduana jai jitaidicue. <sup>11</sup>Omoi jitaila jira, omoimo ite ucube diese omoi fecaia, Jusiñamui mona mare; <sup>12</sup>ia omoi jitaila rana omoi ollena, omoi ucube iñeni raillano, omoi jitaila baifemo omoi fecajana lloñedicue. <sup>13</sup>Jiae creyentiaimo ra birui raise iñena jira, naimacina omoi canuana jitaidicue. Omoi ra ico iñenia, naimaci dinena omoina canuana jitaidicue, nana omoimo daje isoi omoi ra illena. <sup>14</sup>Moisés micori illa facaise ite cominimona cai fueua. Naimacina jiae iese cueva: “Jusiñamui oretaga guiga ramona ailluena guillena, nagaru damierie iraiuidimaci. Jiaino janore guillena, iraiuidimaci; ia coniniri fecajamona, imaci jitaila diese nagaru nana guitimaci”. Ie muidona omoimo ite ucubemona naimaci jitaila ra illena, jiae creyentiaimo omoi fecajana jitaidicue.

**Pablo Titona ñaite**

<sup>16</sup>Omoi dine Tito dane oretaiacadicue. Cue isoi naimie omoimo comecina facade. Omoina canoacade. Naimie comecina Jusiñamui iese itataja jira, Jusiñamui iobidicue. <sup>17</sup>Omoi dine jaillena naimiemo lloticuemo, naimie dinena: “Jee” raite.

Naimiemo nia ieſe cue lloñenia, omoina naimie eo canoiacana jira, naimie omoi dine jaillemo ie comecin facade. Omoi dine raire jaite.<sup>18</sup> Naimie diga jiaimie oretaiticue. Naga nairaimo ite creyentiaidi: "Cristo rafuena eo raise llofuecabite" naimiena raitimaci.<sup>19</sup> Cue diga jaillena, naimiena fetodimaci. Dueredinomo omoi ucubena cue uillena, cue diga naimie jaite. Iemonia cai Namana iobitaiticai. Iemonia nana creyentiaidi naimacina cue canuana uiñotimaci.<sup>20</sup> Omoi ucubena raise cue sedajana jitaídicue. Iemonia: "Pablo cai ucube fiide" omoi lluana jitaíñedicue. "Iena Pablo raise fecañede" omoi lluana jitaíñedicue.<sup>21</sup> Iena raise marena sedaacadicue. Jusiñamui iena uiñote. Nana creyentiai iena uiñuana jiai jitaídicue.<sup>22</sup> Iaimaiai diga jiaimiena jiai oretaiticue. Naimie Cristona eo iñocana jaillana raise uiñoticue. Omoi rafuena naimie fidiano, jiae creyentiaina omoi canuana naimie iñuanona, omoi dñe naimie eo jaiacade.<sup>23</sup> Omoimo Titona bu jicanoa, naimacimo naimiena raise llono. Danomo Cristo dibeimo majidicoco. Cue diga omoina canode. Jiae iaimaiaina bu jicanoa: "Jiae creyentiai iaimaiaina fetuamona bitiáimaiai" llono. Cristona iobitaiacadiaiamaiai.<sup>24</sup> Cuena omoi isiruillamona: "Omoi mare" omoina cue lluamona, naimacina raise nafue. Nana cue jitailla rafuena omoi finuana naimaci uiñuana jitaídicue. Omoi ucubena eenuana raise fuiduana jitaídicue. Iena omoi finuamona, abido naimaci bia, naimacina oretaga creyentiaimo iena lloitimaci.

**Jiae creyentiaina canollena,  
omoi ucube olle rafue**

**9** <sup>1</sup>Bie rafuena omoi jai uiñua jira, iena dane lloñeticue. <sup>2</sup>Ucubena omoi jai feacaacana uiñoticue. "Benomo

Macedoniamo ite creyentiaimo omoiri iobidicue" llocabiticue. "Navuidi añomona feacaacadomoi" llocabiticue. "Acaya railla provinciamo ite creyentiai feacaacadimaci" llocabiticue. Iese omoi illamona, bene ite creyentiai jiaino creyentiaina jiai canoacadimaci.<sup>3</sup> Iese uiñoticue; ia omoina cue canollena Titona oretaiticue, cue jitaillacino omoi raise fuidollena. Ucubena dajena uana raire jitaídicue. <sup>4</sup>Omoi dñe Macedoniamo ite creyentiai diga cue rillanona, omoi ucube dajena nia iñenia, ieſe omoina cue lluaconi meidaiticue. Omoidi jiai meidaitomoi.<sup>5</sup> Ie muidona Tito idai jaillana jitaídicue. Ucube dajena uana omoi llua isoi, omoina canoite. Omoi ucube dajena uana lloiacaiñedicue; ia omoi comeciaimona jiaino creyentiaina canuana omoi jitailla jira, iena jitaídicue.<sup>6</sup> Jiae rafuedo iena lloitue. Janore iduaína bu ria, janore llisillana oite. Ailluena iduaína bu ria, ailluena llisillana oite. Cue llua jira, omoi ucube dajena oia, eo caimare iñetomoi; ia omoi comeciai jitaillamona omoi ucubena dajena oia, eo caimataitomoi.<sup>7</sup> Ucube dajena omoi oia, nagamie ie comecin facajamona fecaja. Naimie jitaiñenia fecañena. Naimie jitailla jira, naimie fecaja. Jiaimie omoina ñai raillano, "Cai ucubena fecaiticai" raiñeno; ia o jitaillamona iena feca. Comeciai iocire illamona omoi fecaia, Jusiñamuina iobitadomoi. Iena Jusiñamui jitaide.<sup>8</sup> Jusiñamui omoi jitailla baifemo omoimo fecarede. Nana omoi jitailla ra omoimo naimie illamona, jiañomo omoi fecaia, naimacina canorenitomoi.<sup>9</sup> Jusiñamui facaina lloraima micori iena jaie cuega: "Jusiñamuina iñotimie dueredinona canocabide. Mare rafuena finocana jaide". Ie omoi finollemo, Jusiñamui omoina canoite.<sup>10-11</sup> Ero,

illimo majirainimo Jusiñamui iduaina itataste. Iena sicuamona, monaillamona, nainomo majirainidí naiemona guicabite. Ie isoide. Omoimo Jusiñamui nana omoi jitalla rana jaca itataite. Iemonia jiae creyentiaina raise canorenitomoi. Omoi ucubena cai uia, iena jiae creyentiai feiñoia, Jusiñamuimo iobillacinona eo fecaitimaci.<sup>12</sup> Ucubena omoi oreataia, duerede creyentiaina canodomoi. Omoi muidona naimaci Jusiñamuimo iobillacinona jiae fecadimaci.<sup>13</sup> Iemonia Cristona omoi raise iinuana uiñoitimaci. Ieri Jusiñamuimo iobillacinona fecaitimaci. Omoi iga ucube facaina iobillacinona Jusiñamuimo fecaitimaci. Naimacina canoitomoi. Iemonia nana jiae creyentiaina canoitomoi.<sup>14</sup> Omoi facaina Jusiñamuimo jiitimaci. Omoina naimaci isiruillamona, Jusiñamui omoina eo canuana naimaci uiñuamona, omoi facaina jiitimaci.<sup>15</sup> Jusiñamui caína eo canua jira, iobillacinona naimiemo cai fecallena, cai uai raise iñede. Uainicaidicai. Naimie eo mare. Naimieno cai iobillasa.

**Cai Nama Pablona fetua jira,  
ie uai Pabloite**

**10**<sup>1</sup> Jiae rafuena lloiacadicue. Omoimona damierie llotimaci: “Cai dine Pablo ia, naimiedi caina jaciruite. Riire caimo naimie rafuena lloñede; ia cai dine naimie iñenia, riire caimo naimie rafuena llote” llotimaci. Ero, Cristo icircabiñena isoi iacadicue. Naimie isoi omoimo lloiacadicue.<sup>2</sup> Riire omoimo lloiacaiñedicue. Omoimona damierie cuena raitimaci: “Pablodi Cristona iñonédimie isoi icabite”. Naimaci iese nia lloia, omoi dine cue ria, naimacimo jaciruiñeno riire lloitice.<sup>3</sup> Comena iticue; ia comini diga cue rafue iñede. <sup>4</sup>Taife dibeimo itino

diga cue rafue illa jira, jamai cue uai diga naimacina lliicaitañeiticue; ia Jusiñamui uai diga naimacina lliicaitaiticue.<sup>5</sup> Cristo uai diga Jusiñamui dibeimo iñedino lluacinoconi uainicaitaticue. Abina iedotimaci; ia Jusiñamuina uiñoiacaiñedinona uainicaitaticue. Naimaci comeciaina facajacinona uainicaitaticue, naimacina Cristo rafuena cue iñotallen. <sup>6</sup> Cristo anamo omoi raise ia, cue lloga uaina omoi raise iñocana jaia, omoimona raise iñonéedinona duere finoiticue. <sup>7</sup> Cominimo jamai eruaiñlamona: “Naimaci mare” raitomoi. Jiaicaiño: “Naimaci maraiñedimaci” raitomoi; ia naimaci comeciaina uiñonédomo. Omoimona damie nibai comecin facade: “Cristomona cue uai illamona, Pablo baifemo fáiticue”. Cue dinena raiticue: “Cristomona cue uai illamona, daje isoidicoco. Cue baifemo naimie faiñede”. <sup>8</sup> Abina iedonédicue; ia cue abi iedoia, ieri meidaiñedicue. Cristomona cue uai illa jira, cue uai ite, naimie dibeimo omoi raise itatallen. Omoina cue canollena cue uai ite. Cristo dibeimona omoina itataiacaiñedicue. <sup>9</sup> Omoimo riire llollena cue uai ite; ia cue carta diga omoina jacinaitaiacaiñedicue. Omoina canoiacadicue.<sup>10</sup> Omoimona damierie cuena raitimaci: “Cartana Pablo cueia, eo riire caimo llote; ia cai motomo naimie ia, ie uai riñide. Cristo rafue raise lluana raise uiñonéde”. <sup>11</sup> Iese iñedicue. Omoi motomo cue ia, cartana cue cueia, daje isoi llofuecabiticue. <sup>12</sup>Omoimona damierie coniniri raitimaci: “Maredicai”. Iese coniniri naimaci comeciaina facaia, abina uiñonédimaci. Naimaci isoi cue illemo cue comecin facañedicue.<sup>13</sup> Jusiñamui cue maijiana cuemo llote. Naimie llua baifemo jaiñeiticue. Omoi dine ie rafue

cue llofuelleña, naimie jitaillanona, omoi dine navui jaídicue. <sup>14</sup>Jusiñamui jitailla rafue baifemo jaiñedicue. Cristo rafuena omoi motomo nano llofueraimadicue. <sup>15</sup>Jiaie llofueraini llofuiamona buena oiacaíñedicue. Cristo rafuena omoi iinocana jaillamona, omoi motomo cue illamona, Jusiñamui jitailla diese omoína canoacadicue. <sup>16</sup>Jiaie nairaiai illanuaimo Cristo rafuena nia lloiacadicue; ia nainomo jaie llofueraima llofuiamona buena oiacaíñedicue. <sup>17</sup>Bu abina iedoacanía, cai Nama finua rafueri naimie abina iedua. <sup>18</sup>Je llofuia diga bu abina iedoia, Jusiñamui naimie llofuiacínona: "Mare" raiñeite; ia Jusiñamui finoca rafueri bu abina iedoia, Jusiñamui naimiená: "Mare" raite.

**Pablodi Cristo oretaganona abi caitadinona llote**

**11** <sup>1</sup>Abina cue raise uiñóñenia, cue diga iciriñeno. Cue lluamo nia cacareí. <sup>2</sup>Omoimo Jusiñamui comeecina facaja isoi, omoimo comeecina facadicue. Cue muidona Cristo rafuena omoi cacaja jira, Cristona uiñotomoi. Hima diga nia iñediñáño, ie ñinina illena, ie jitaillamiemo ie moo fecaja isoi, Cristomo omoína feacaacadicue. Omoimo jeacino iñena isoilla jira, omoína Cristomo feacaacadicue. <sup>3</sup>Jiaie rafuem omoi comeciaína facacana omoi jaillamo jacinaiticue. Jaie jaiona erauillamona, Taife Eva micorina jifuete. Jiai llofueraini Cristo rafuedo omoi raise jaiñenana itatajamo jacinaiticue. <sup>4</sup>Diga llofuerainina feiñotomoi. Jesús rafuena jiaforiedo llofuecabitímaci. Cristo rafuena cue isoi llofuecabíñedimaci. Jusiñamui Joreño omoímo illana cue isoi llofuecabíñedimaci. Cue mare lloga rafue isoi llofuecabíñedimaci; ia

naimacina jaca feiñotomoi. Ie jira Cristo dibeimona omoi jaillemo jacinaiticue. <sup>5</sup>"Cristo oretaganodícai" raitimaci; ia naimaci cue baifemo faíamo cue comeecina facaíñedicue. <sup>6</sup>Naimaci isoi rafuena jino lluana eo uiñóñedicue; ia Cristo rafuena eo raise uiñoticue. Nana cue finoca rafuemona omoína iena diga icaiño uiñotadícué. Uanaicinona omoína jaca llofuecabíticue. <sup>7</sup>Omoimo Jusiñamui rafuena navui cue lloia, omoína ibataíñedicue. Omoimona ucubena jícaíñedicue. Cue ucube ollena, dama jiaie rana maijídicue. Iese cue illa jira, damieriemona maraiñede rafuena finodicue; ia cuemoná eo mare rafuena jai uiñotomoi. Iemoná abina jai uiñotomoi. <sup>8</sup>Omoína cue canollena, jiaie creyentiaímona ucubena feiñoticue. Omoi facaina naimacimona feiñoticue. <sup>9</sup>Rana cue jitailla facaise omoimona ucubena jícaíñedicue; ia Macedoniamona bite creyentiaí cuena canodimaci. Omoimona navui ucubena cue oñena jira, birui cue oñena jira, cuemoná ibana oñetomoi. <sup>10</sup>Cristo cue illana uiñuamona, naimie uanaicinodo cue jaillamona, nana Acaya railla provinciamoná iena jaca lloitícué. <sup>11</sup>Omoína cue isiruilla jira, ucubena omoína jícañeitícué. Jusiñamui cue comeecina raise uiñote. <sup>12</sup>Abina ieduamona omoi motomo damierie: "Pablo isoi llofuetícai" raitimaci. Ucubena omoimona feiñotimaci. Naimaci isoi iacaiíñedicue. "Daje isoi maijídicai" naimaci raiñellena, ucubena omoimo jaca jícañeitícué. <sup>13</sup>Cristo oretaganona abi caitadinodimaci. Cristo dibeimo raise maijíñedimaci. "Cristo caina oretate" raicabítimaci; ia Cristo naimacina oretañede. Jifuecana jaidimaci. Cristo oretajanona itimacina jaidimaci. <sup>14</sup>Ieri rajjicaiñedicue. Cominina jifuellená, Taifedi Jusiñamui

jaienicina abi caitadimena jaicabide.  
<sup>15</sup>Taife dibeimo itinodí Jusiñamui ie  
 mare rafuena llofuerainina  
 jaicabidimaci. "Cai lloga rafuedo omoi  
 jaia, Jusiñamuimona mirebicaitomoi"  
 llofuecabitimaci. Naimaci finolle rafue  
 diese Jusiñamuimona duere sefuitimaci.

**Cristo oretagamiена naimie illa  
 jira, Pablo duere sefuide**

<sup>16</sup>"Pablo abina uiñoñedimie" raillamo  
 omoi comeciaina facafieno; ia iese  
 cuena omoi comeciaina facaia, cue  
 lluamo nia cacarei. Omoi motomo ite  
 llofueraini abina iedua isoi,  
 iacaiñedicue; ia janore cuemo iticino  
 diga abina iedoticue. <sup>17</sup>Abina  
 ieduamona cue lloia, caí Nama Cristo  
 isoi lloñeiticue. Naimie cuemo llua jira,  
 iena lloñeiticue; ia abina uiñoñedimie  
 isoi lloitue. <sup>18</sup>Omoi dine damierie  
 llofueraini naimaci illa diga abina iedua  
 isoi lloitue. <sup>19</sup>Abina uiñoñedimaci; ia:  
 "Abina eo raise uiñoticaí" omoi  
 lluamona, naimaci llofuiacinona  
 cacacobidomoi. <sup>20</sup>Naimaci anamo  
 omoina itataiacadimaci. Omoimo  
 ucubena jicacobidimaci. Omoina  
 ocucacobidimaci. Icirillamona, omoi  
 uiecuaina bofedimaci. Iese omoina  
 finocabidimaci; iadedi buena  
 naimacimo finoñedomoi. Ñbana  
 oñedomoi. <sup>21</sup>Iese omoimo finoñedimie,  
 omoina cue jaciruilla jira.

Cue illana omoimo ja lloitue. Nibai  
 abina raise uiñoñedimie; ia naie  
 llofueraini isoi cue illa diga abina  
 iedoiticue. <sup>22</sup>Omoi motomo ite damierie  
 llofuerainina ja lloitue. Judúuai uaido  
 ñaitimaci. Iena jíai ñaiticue. Judúuai  
 nairai imaci. Daje isoidicue. Judúuai  
 nairai imiedicue. Abraham micori  
 uruiaidimaci. Jíai naimie micori  
 uruedicue. <sup>23</sup>"Cristo dibeimo maijídicaí"  
 raitimaci. Abina uiñoñedimie isoi

lloticue; ia naimaci baifemo Cristo  
 dibeimo maijídicaí. Naimaci baifemo  
 duere sefuidicue. Diga icaiño cárcelmo  
 iticue. Diga icaiño fajamona duere  
 sefuidicue. Diga icaiño niadedi  
 fiodaicabiticue. <sup>24</sup>Judúuai comini cinco  
 digacaiño cuena fatimaci. Naga icaiño  
 treinta y nueve digacaiño rao diga  
 cuena jicuidimaci. <sup>25</sup>Dacaiño amani  
 radosi diga cuena fatimaci. Nofici diga  
 cuena dacaiño fairinotimaci. Dacaiño  
 amani bote diga namo anabaiticue.  
 Darui naio monaillaimo botedo jamai  
 furi baiticue. <sup>26</sup>Eo jacirede illedo  
 jaicabidicue. Fiiriruidino eo illa jira,  
 jaciruoicaida jaicabidicue. Cue judúuai  
 cominimona duere sefuicabidicue.  
 Judúuaiñedinomona duere  
 sefuicabidicue. Naimaci illanuaimo cue  
 ia, diga icaiño duere sefuidicue. Naisodo  
 cue macaria, duere sefuicabidicue.  
 Monailaido cue jaia, duere  
 sefuicabidicue. Cristo rafuena llorainina  
 abi caitadinomona jíai duere  
 sefuicabidicue. <sup>27</sup>Cue ucube ollena,  
 duere maijicabidicue. Diga icaiño raise  
 iniñedicue. Diga icaiño aime guiticue.  
 Rollimemona duere sefuicabidicue.  
 Ñiroininamona jíai duere sefuidicue.  
<sup>28</sup>Diga jíiae rafuemona duere  
 sefuicabidicue. Duenaillaomona naga  
 creyentiai illanuaimo cue comechina  
 nagarui eo facadicue. Iemo nagarui cue  
 comechina cue faceaia, duere  
 sefuicabidicue. <sup>29</sup>Nie creyente Cristo  
 rafuedo nia raise iinoñenia, naimiemo  
 cue comechina eo facadicue. Nie  
 creyentena jíaimie jeacino finotaia,  
 naimiemo cue comechina facadicue.  
<sup>30</sup>Cue abina iedoicania, jamai bue  
 isoidimediuena lloiacadicue. <sup>31</sup>Cai  
 Nama Jesús Moona Jusiñamui illanona,  
 Jusiñamuimo jaca cai iobillasa.  
 Naimiedi uanaicinona cue lluana uiñote.  
<sup>32</sup>Cue illana nia lloiacadicue.

Damascomo jaie creyentena cue jailla facaise cuena gaitatallena, Aretas railla illaima anamo ite gobernadordi nairai llaiga nasena sedata; <sup>33</sup>iadedi llaigafo ecimo ite jofo a ite ventanamona cirigai isoide diga ana jaillanona, naiemona jillodicue.

**Pablo nicairilla isoide  
rafuena ciode**

**12** <sup>1</sup>Abina iedoicaiñedicue; ia cue illana janore nia lloitice. Lemona bue oñeiticue; ia cue illa abina riidoiacadicue. Cristo cuemo acataga rafuena lloiacadicue. Cristo cuemo jai llua rafuena jiai lloiacadicue. <sup>2-3</sup>Cristomo cue duillamona, catorce años jaie illanona, monamo naimie illamona, naimie dine Cristo cuena uite. Nicairilla isoi cue joreño, cue abi diga, uillana raise uiñoñedicue. Nibai dama cue joreñona uite. Dama Jusiñamui iena uiñote. Naimie mare illanomo iticue. <sup>4</sup>Nainomo cue ñainina rafuena cacadicue. <sup>5</sup>Ie diga abina iedoñeiticue. Cue jamai bue isoidimie diga abina iedoiticue. <sup>6</sup>Uanaicinona cue lluamona cue abina iedoicania, tainona abina iedoñeiticue. Omoi cuena ciuamona, cue lloga rafuena omoi cacajamona, cuena uiñotomoi. Ie baifemo cuena omoi comeciaina facajana jitaiñedicue. <sup>7</sup>Naimie rafuena cuemo acataja jira, bie rafuena cue cacaja jira, ie diga eo abina cue iedoñellena, tagairede ra cuemo illa isoi Jusiñamui cuemo illamona, duere sefuidicue. Taife jaienici cuena duere finua isoi, duere sefucabidicue. <sup>8</sup>Cuemona iena naimie oni oretallena, cai Namamo dacaiño amani jiñdicue; <sup>9</sup>ia cuemo llote: “Ona jillotañeiticue; ia cue ona duenallacinodo jaca ocuiñoitio. O abi eo maíriñenia, ona cue canuana raise uiñoitio” llote. Cue abi eo maíriñenia, ieri iocire iobiticue. Naimie

uaido cue jaillamona, cuena naimie canuana raise uiñoiticue. <sup>10</sup>Cristo muidona duere cue sefuria, cue comecinha ocuiñoiticue. Cue jamai bue isoia, cuena bu jeare ñaia, bumona duere cue sefuria, cuena bu duere finoia, cue comecinha ocuiñoiticue. Cue duere sefuria, cue Nama cuena eo canode.

**Pablo Corintomo ite creyentiaimo  
comecinha eo facade**

<sup>11</sup>Abina uiñoñedimie isoi iticue. Cue illana cue cuia jira, abina uiñoñedimie isoi iticue; ia iese cuena itatatomoi. Cuena riidoñedomoi; ia jiaño eo mare raila llofuerainina raise feiñotomoi. Jamai bue isoidicue; ia naimaci cue baifemo faiñedimaci. <sup>12</sup>Omoi motomo siño rafuena cue finua jira, Jusiñamui cuena oretajana uiñotomoi. Cristo rafuena sefuiruiñeno omoi motomo iticue. <sup>13</sup>Cuemona duere sefuiñedomoi. Jiae creyentiai omoi baifemo faiamon cue comecinha facañedicue. Nibai iese omoi comeciaina facadomoi. Omoimo ucubena cue jicañena jira, jiae creyentiai isoiñedomoi. Iena omoi gaiñenia, iena feita. Cue diga iciriñeno.

<sup>14</sup>Menacaiño navui omoi dine jaidicue. Omoi dine dane jaiacadicue. Omoimo ucubena jicañeiticue. Omoi rana jitaiñedicue; ia Cristo dibeimo omoi illana, naimieno omoi raise iiuana jitaidicue. Cue uruiai isoidomoi. Rana eenoñedomoi, omoi mootiai iena; ia omoi mootiai rana eenotimaci, omoiena. Ie isoide. Cue uruiai isoi omoi illamona, omoimona rana jitaiñedicue; ia omoimo rafuena iacadicue. <sup>15</sup>Nana cuemo ite ra omoimo fecaacadicue. Nana cue comecimo iticinona omoimo jiae iacadicue. Omoina eo isiruiticue; ia cuena janore isiruitomoi. <sup>16</sup>“Caimona ucubena jicañedio; ia jifuecana caimona otio” raicabitomoi. <sup>17</sup>Ero, omoi dine

menamiena cue oretajamona,  
omoimona ¿nie isoide rana otiaaimaiai?  
¿Niese omoina jifuetiaaimaiai? <sup>18</sup>Omoi  
dine Titona oretaticue. Jiaisie creyente  
imiena Tito diga oretaticue. ¿Niese Tito  
omoina jifuet? Omoimo coco comecin  
daje isoi facadicoco. Daje rafuedo jaca  
jaadicoco. Omoina jaca jifueñedicoco.  
¿Niese omoi comeciaina raitomoi?  
<sup>19</sup>“Caimona ie abina riidote” cuemo  
nibai comecin facacabidomoi.  
Jusiñamui cuena uiñuamona, Cristomo  
cue duillamona, bie rafuena lloticue.  
Cue isiruiganodomoi. Cristo dibeimo  
omoi raise illena, naimiena raise omoi  
iñollena, bie rafuena llocabiticue.  
<sup>20</sup>Omoi dine cue ria, cue jitaila isoi  
omoi iñenamo jacinaiticue. Iese omoi ia,  
omoi diga cue illana jiai nibai  
gaiñeitomoi. Ieri cue comeci jarire ite.  
Nibai nia uaina uaitatomoi. Nibai nia  
abina iedotomoi. Nibai nia  
icíricabitomoi. Nibai nia omoi rana  
caídocabidomoi. Nibai nia jiaínona jeare  
ñaicabitomoi. Nibai nia jiaíno joreñona  
ñaicabitomoi. Nibai nia abina  
uradoidomoi. Nibai daje isoi comeciaina  
nia lloíñedomoi. Omoi iese illari cue  
comecidi jarire ite. <sup>21</sup>Omoi dine dane  
cue ria, omoi muidona Jusiñamui cuena  
meidaitajamo jacinaiticue. Cristo  
dibeimo omoi raise iñenia, sunaiticue.  
Jearede rafuena omoi nia  
faínnonocaiñenia, omoi aíñede riño diga  
illana omoi faínnonocaiñenia, omoi  
iniñede iima diga illana omoi  
faínnonocaiñenia, sunaiticue.

### Iraicaiño Pablo naimacina llofueté

**13** <sup>1</sup>Menacaiño omoi dine navui  
jaadicue. Omoi dine dane  
jaiticue. Coninimo omoi rafue ia, iena  
raise fino. Moisés micori jaie llote:  
“Mena iaimaiai daje isoi lloillamona,  
daje amani daje isoi lloillamona,

maraíñedicinona finodimien duere  
finua”. <sup>2</sup>Maraiñede rafue finodinomo  
navui riire lloticue. Nana omoimo riire  
lloticue. Omoi dine navui cue illa isoi,  
iena dane riire lloiacadicue. Omoi dine  
cue ria, naimaci comeciai uiui nia  
meidoñenia, naimacina duere finoiticue.  
<sup>3</sup>Iemona Cristo uai cuemo illana  
uiñoitomoi. Naimiena omoi iñuamona,  
naimie uai siñonana uiñotomoi. Jamai  
uaido naimie omoina jillotañede; ia ie  
siño uaido omoina jai jillotate. <sup>4</sup>Jamai  
bue isoidimie isoi cruzmo naimie  
fiodaite; ia fiodaillamona Jusiñamui  
uaido jillode. Cristomo cue duillamona,  
jamai bue isoidimien iticue; ia  
Jusiñamui uai cuemo illamona, omoimo  
ite rafuena raise finoiticue. <sup>5</sup>Cristona  
iñocana omoi raise jaillemo omoi  
comeciaina faca. Cristo jitailacino omoi  
finollemo comeciaina faca. Cristomo  
omoi duillamona, Cristo omoi diga  
illana uiñotomoi. Cristomo omoi  
duiñenia, naimie omoi diga nia iñede.  
<sup>6</sup>Cristo omoi diga illana omoi  
uiñuamona, Cristo uai cuemo illana jiai  
uiñoitomoi. <sup>7</sup>Maraiñedicino omoi  
finocana jaillana jitaiñedicue.  
Jusiñamuimo iena jiñiticue. Omoi  
comeciai uiui omoi meidoñenia, Cristo  
uai diga omoina duere finoacaiñedicue.  
Omoi comeciai uiui meiduana jitaidicue;  
ia Cristo uai diga omoina cue duere  
finoñenia, Cristo uai cuemo illana nibai  
uiñoneitomoi. <sup>8</sup>Cristomona cue uai  
illana omoi uiñollena, maraiñedicino  
omoi finuana jitaiñedicue. Mare rafuena  
omoi finocana jaillana jitaidicue. Iena  
finocana jiai jaiacadicue. <sup>9</sup>Cristo  
rafuena iñocana omoi raise jaia,  
iobidicue. Omoimo cue riire lloñenia,  
iobidicue. Cristo jitailacino eo raise  
finocana omoi jaillena jiicabidicue.  
<sup>10</sup>Birui bie rafuena cueticue. Omoi dine  
iñedicue; ia bie cartana omoi feiñua

mei, omoi comeciaina raise finuana jitaídicue. Cai Namamona cue uaina feiñotícue. Iedo omoimo riire lloiacaiñedícue; iaddedi iedo naimie dibeimo omoi raise itataiacadícue.  
<sup>11</sup>Cue amatiai, bie carta cuiana jai fuidoacadícue. Marena omoi i. Omoi comeciaina raise fino. Cue lloga rafuemra raise cacarei. Nana omoi creyentiai comeciai daje isoi lloicana jai. Coniniri uri omoi i. Iemonia

Jusiñamui omoina isiruillana uiñoitomoi. Jusiñamui omoina uri itatajana uiñoitomoi. <sup>12</sup>Nana creyentiaina eo caimare uaido. <sup>13</sup>Nana cue diga ite creyentiai imaci uaina oredimaci. <sup>14</sup>Cai Nama Jesucristo omoina jaca duenaita. Jusiñamui omoina jaca isiruilla mona, coninina omoi isirui. Naimie Joreño omoimo illamona, coninina omoi nabai. Iese jitaidicue. Mai. Macaibaite. Pablodicue.

## GALACIAMO ITE CRISTONA HNOTINOMO PABLO ORETAGA RABE

### Uaiduacino

**1** <sup>1-2</sup>Galaciamo ite creyentiai, omoi  
dine bie carta oredicue. Pablodicue.  
¿Nigacino? ¿Nie isoidomoi? Omoimo  
cue uai oredicue. Nana cue diga ite  
creyentiaidi imaci uaina jiai oredimaci.  
Jesucristo fetocamiedicue. Cai Moo  
Jusiñamui jiai fetocacue. Jesucristo  
fiodaillamona, Jusiñamuidi naimiena  
jillotate. Mare rafuena cue llollena,  
cuena orediaaimaiai. Comini cuena  
oreñedimaci. Cue lloga uaina  
cominimona jiai oñedicue. <sup>3</sup>Cai Moo  
Jusiñamui, cai Nama Jesucristo diga,  
omoina jai duenaite. Iena uiñocana mai  
omoi jai. Omoina uri jai itatatiaimaiai.  
Iena omoi uiñocana mai omoi jai. <sup>4</sup>Cai  
Moo Jusiñamui jitilla isoi, birui ite  
maraiñedicionoma cai jilloillena, cai  
jeacino facaina Cristo fiodaite. <sup>5</sup>Cai  
Moona jaca cai iobillasa. Iena jitaidicue.

### Pablo lloga rafuedi jaca dajede

<sup>6</sup>Jusiñamuina raire omoi  
fañonocaillari rajicaidicue. Cristo  
dibeimo omoi illena, omoina Cristo  
duenaillamona, Jusiñamui omoina jai  
uaidote; iadedi omoi jeacinomona omoi  
jilloillena, jiae rafuedo jai jaidomoi.  
<sup>7</sup>Jiae mare rafue jaca iñede; iadedi  
Cristo rafuena jiaforiedo llofuiamona  
dajerie omoi comeciaina uri  
itatañedimaci. <sup>8</sup>Jesucristo rafuena

omoimo jaie lloticai. Jiae rafuena  
lloticaidena, Jusiñamui riicaillafue  
anamo nia cai illasa. Jusiñamui jaienici  
jiae rafuena llotena, Jusiñamui  
riicaillafue anamo jiai naimie illasa.  
<sup>9</sup>Omoimo jaie iese lloticue. Dane ja  
lloiticue. Cai llua isoi Cristo rafuena  
omoimo bu lloñenia, Jusiñamui  
riicaillafue anamo naimie illasa.  
<sup>10</sup>Comini cuer iobillana jitaiñedicue;  
iadedi Jusiñamui cuer iobillana  
jitaidicue. Cominina iobtaiacadicuena,  
Cristo dibeimo nia maijifñedicue.

### Ie oretagamieno jaillena, Cristo Pablona fetua rafue

<sup>11</sup>Cue amatiai, cue lloga rafuena omoi  
raise uiñuana jitaidicue. Omoi  
jeacinomona omoi jilluana jaie lloticue.  
Bie rafuena comini comeciai  
facajacionoma oñedicue.

<sup>12</sup>Cominimona oñedicue. Bu jaca cuena  
iena llofueñede; iadedi Jesucristo cuena  
uiñotade. <sup>13</sup>Jesucristona nia cue  
iinoñenia, cue judíuai einamaci lloga  
rafuedo cue jaillana jai fididomoi.

Cristona iñotinona jaie eo duere  
finodicue. Naimacina fuidoacadigue.

<sup>14</sup>Cue einamaci jaie llua isoi,  
Jusiñamuina raise iñoticue. Naimaci  
llogaciuaido eo duere cue jailla jira,  
daje facai cue diga itino baifemo  
iñoticue; <sup>15</sup>iadedi nia cue jeiciñenia,  
Jusiñamui cuena fetode, naimie iena.

Cuena duenaillanona, cuena uaidote. <sup>16</sup>Omoi judíuafíñedomoímo naie Jito rafuena cue llollena, cuemo ie Jitona jiae bairetate. Naie facaise cuemo jai suide rafuena bu diga ñaíñedicue; <sup>17</sup>ia Arabia railla eniruemo jaidicue. Nainomo comini iñena jira, cuemo jai suide rafuemo comeccina facadicue. Jerusalémo Jesucristo nano oretaganó dine jaiñedicue. Cuena Jesucristo nia oretañenia, naimacina orede, ie uai llollena. Arabia railla nairaimo abido jaidicue. <sup>18</sup>Cristo cuemo bairia facaise tres años illamona, naimiena cue uiñollena, Jerusalémo Pedro dine jaidicue. Naimie dinomo quince digarui iticue. <sup>19</sup>Naie facaiseconi nana Jesucristo oretaganona cíoñedicue. Pedrona ciódicue. Jacobona jiai ciódicue. Naimiedi cai Nama ie ama Jiaínona cíoñedicue. <sup>20</sup>Omoímo nana cue cuegacínodi uanaicino. Tainona cueñedicue. Taínona cue cueia, Jusiñamui cuena duere finuana uiñoticue. <sup>21</sup>Jerusalémo cue illa mei, Siria railla eniruemo jaidicue. Cilicia railla eniruemo jiai jaidicue. <sup>22</sup>Judeamo ite Cristona iñotinodí cuena nia cíoñedimaci. <sup>23</sup>Cuena iese fididimaci: “Navui caina duere finocabidimiedi Jesucristo rafuena jai llote. Jesucristona cai iñuana navui jitaiñede. Caina fuidoacade”. Jiae cue finoca rafuena fidíñedimaci. <sup>24</sup>Ie fidiamona, cuer Jusiñamuimo iobillacínona jai fecadimaci.

#### Jerusalémo Pablo jailla rafue

**2** <sup>1</sup>Catorce años illanona, Jerusalémo dane jaidicue. Bernabé cue diga jaide. Titona uiticue. <sup>2</sup>Jusiñamui cuemo llua jira, nainomo ite creyentiaimo jaidicue. Judíuaiñedino Cristo rafuena jai iñuana cue llollena, jaidicue. Cue

llofuiiana naimaci raise uiñollena, creyentiai illaicomínimo anado nano lloticue. Cue llofuiiana: “Mare” naimaci raillana uiñoiacadicue. Tainona Cristo rafuena cue lloí raillanona uiñoiacadicue. Naimaci diga cue ñaia mei, cue llofuiiana: “Mare” raitimaci. <sup>3</sup>Tito cue diga ite. Naimiedi judío nairai imieñede; iadedi naimaci abina detacabilla isoi, creyentiai illaicomini dinena naimie abi detatajana lloñedimaci. <sup>4</sup>Creyentiaina abi caitadino billa jira, Tito abina detatajana siadoticai. Naimacina cai uaidoñeno bitimaci. Moisés micorí llogacinuai anamo cai iñenana naimaci uiñollena, bitimaci. Cristo Jesús cai iñuana jira, Moisés micorí llogacinuaido jai jaiñedicai. Moisés micorí llogacinuai anamo caina dane itatallena, iena uiñoiacadimaci. <sup>5</sup>Cai mare rafuena jiaienai jaca meidoñellena, naimaci ñaiana dallu cacareíñediaci. Uanaicinona omoi uiñuana jitaidicai. <sup>6</sup>Naie creyentiai illaicomini omoímo llollena, cuemo jiae rafuena lloñedimaci. Illaicomínina raillanodimaci; iadedi cuemonia jamai bue isoidimaci. Jusiñamui nana comini daje isoi feiñua jira, naimaci uai cue uai baifemo faiñede. <sup>7-9</sup>Cue llofuiiana rairuiñedimaci; iadedi creyentiai illaicomini cuena Bernabé diga marena feiñotimaci. “Daje isoi comeccaina facadicai” raillamona, cue llofuiiana: “Jai mare” raitimaci. Creyentiai illaicomini Jacobo, Pedro, Juan digamie. Judíuai dine Pedrona Jusiñamui oretaja isoi, cue lluamona judíuafíñedino dine Jusiñamui cuena oretajana uiñotimaci. Pedro lluamona Jusiñamuidi ailluena judíuaina creyentiaina itatate. Cue lluamona, Jusiñamuidi ailluena judíuafíñedinona creyentiaina jiae itatate. Lemona

Jusiñamui uai cuemo illana jai uiñotimaci. Judíuainédinomo Jesucristo rafuena llocana nia coco jaillana jitaidimaci; iadedi judíuaimo Jesucristo rafue llocana nia jaidimaci. <sup>10</sup>Daje rafue cocomo llotimaci. “Duerede creyentiaina canocabi” llotimaci. Iena iocire finoacadicue.

### Antioquíamo suide rafue

<sup>11</sup>Antioquíamo cue jailla mei, Pedro nainomo jiai jaide. Nainomo Pedro bia, maraiñedifue naimie finua jira, naimie uecomo naimiemo riire lloticue. <sup>12</sup>Nainomo Pedro nano rilla mei, nana creyentiai diga nainomo naimie guisoide. Judíuai creyentiai diga, judíuainéde creyentiai diga, danomo guisoide. Iemei Jacobo dinena damierie bitimaci. Moisés micori llogacinodo jaisoidimaci. Moisés micori llogacinodo Pedro jai jaiñede; iadedi naimaci billa mei, naimacina naimie jaciruilla jira, judíuainéde creyentiai diga Pedro jai guiñede. Ie iinoga rafuedo naimie jai jaiñede. <sup>13</sup>Naimie iese illamona, judíuai creyentiaidi judíuainéde creyentiai diga jai jiai guiñedimaci. Pedro illa isoi, Bernabé ideo jiai jaide. <sup>14</sup>Naimaci iese illa jira, Jesucristo rafuedo raise jaiñedimaci. Uanaicinodo jaiñedimaci. Iena cue uiñua jira, nana comini uicom Pedromo lloticue: “Judío naíraí imiedio; iadedi o jeacynomona o jilloillena, cai einamaci lluacinodo birui jaiñedio. Ie jira, ¿bue ñellena judíuainédino cai einamaci lluacinodo jaillana jai jitadio?”

**Judíuaidi creyentiaína jailla mei,  
Moisés micori llogacinuaido jai  
jaiñedimaci**

<sup>15</sup>Nia lloitice: Judíuainédinodi Moisés micori lloga uaina jaie uiñoñedimaci. Caidi judíuaina

jeicigacaí. Ie muidona Moisés micori llogacinuaí anamo jaie jeicigacaí. <sup>16</sup>Iese iticai; iadedi Moisés micori llogacinuaido jaillamona, Jusiñamui jitaila isoi, jaca bu marebicaiñede. Jusiñamui jitaila isoi, Jesucristona iinuamona marebicaidicai. Iena uiñoticai. Ie jira Cristo Jesúna iinoticai, cai marebicaillena. Cai marebicaillena, Moisés micori llogacinuaina iinonoñedicai. Moisés micori llogacinuaina iinuamona, jaca buna marebificainide. <sup>17</sup>Jusiñamui mona cai marebicaiacallena, Cristona cai iinuamona jeacino finorainiñedicai. “Cuena iinuamona, marebicaítomoi” Cristo iese llofueuide. Naimie llua isoi cai marebicaiñenia, cai jeacynomona nia cai jilloñenia, Cristo muidona; iadedi iese iñedicai. <sup>18</sup>Moisés micori llogacinuaí jai jamaiñocaídigue. Ie jira naicinuaí dane abido cue oia, iena birui cue iinonoñena jira, jai jeacino finoraimedicue. <sup>19</sup>Iemonia cue marebicaíñena jira, Moisés micori llogacinuaí cuemo jai duiñede. Ie anamo jai iñedicue. Ie muidona Jusiñamui llogacinuaido jai jaidicue. Cristo anamo jai iticue. <sup>20</sup>Naimie dibeimo jai iticue. Cristo cuemo ite. Cristo cuena namatade. Jusiñamui Jitona cue iinocana jai jaidicue. Cuena isiruillamona, naimie jitaillamona, cuerí fiodaite. <sup>21</sup>Jusiñamui caína duenallana jamaiñedicue. Jusiñamui jitaila isoi, Moisés micori llogacinuaina cai iinuamona marebicaidicaina, Cristo tainomo niade fiodaite.

**Jesucristona iinuamona judíuaidi  
Jusiñamui Joreñona feiñotimaci**

**3** <sup>1</sup>Gálatas imaci, abina jai uiñoñedomoi. Jiaíno omoina birui jifuete. Omoimo Jesucristo cruzmo fiodailla rafuena jaie marefodo lloticue. Iena raise cacadomoí. <sup>2</sup>Ie jira omoimo

bienā jicanoiacadicue: ¿Niese Jusiñamui Joreñona jaie feiñotomo? Moisés micorí llogacinuaido jaillamona iena feiñoñedomo. Jesucristo rafuena omoi cacajamona, iiñotomoi. Ie mei Jusiñamui Joreñona feiñotomo. ¿Niese birui abina uiñoñedomo? <sup>3</sup>Omoi marebicaillena, Jusiñamui Joreño omoimo jai ite; iadedi Moisés micorí rafuena dane omoi jaiacanamona, omoi jiaie finolle rafuemona jai marebicaiacadomo. <sup>4</sup>Jusiñamui Joreñomona diga marecinuaina feiñotomo; iadedi iena jai jitaiñedomo. Iese omoi illana iiñofedicue. <sup>5</sup>Dane jicanoitice: ¿Niese Jusiñamuíd i e Joreño omoimo fecade? ¿Niese siño rafuena omoiri finode? Moisés micorí llogacinuaido omoi jaillamona ie Joreño omoimo fecañede. Moisés micorí llogacinodo omoi jaillamona, siño rafuena omoiri finoñede; iadedi Jesucristo rafue omoi cacajamona, iena omoi iiñua jira, ie Joreñona fecade. Iemonia siño rafuena omoiri jiai finode.

#### **Abraham micorí Jusiñamuina iiñua muidona marebicaide**

<sup>6</sup>Abraham micorí ie rafuena lloitice. Naimie micorimona fueoiticai. Moisés micorí naimiena cuete: "Abraham micorí Jusiñamuina iiñua jira, Jusiñamuimona naimiedi marebicaide". <sup>7</sup>Iena cai cacajamona, Abraham micorí isoi cai iiñuamona, naimie ua cominina cai illana uiñotcái. <sup>8</sup>Jusiñamuíd judíuainéokino marebicaillena jaie uiñote. Naimiena ico naimaci iiñollena jaie jiai uiñote. Iena uiñuamona, Jusiñamuíd ico suille rafuena Abraham micorimo jaie llote. Mare rafue naimiemo llote: "Nana cuena o isoi iiñotinona marebicaititicue" llote. <sup>9</sup>Abraham micoridi iiñote. Jusiñamui naimiena marebicaitate. Ie isoide. Nana

Jusiñamuina iiñotinona marebicaitate; <sup>10</sup>iadedi nana Moisés micorí llogacinuaido jaidino jai faidobidimaci. Moisés micorí iena jaie cuega: "Nana cue lloga uaido jaiñedino jai faidobide". Buna nana naie lloga uaido jaiñena jira, nana faidobidicai. <sup>11</sup>Bienā uiñotcái. Moisés micorí llogacinuaido jaillamona, Jusiñamuimona jaca buna marebicaiñede. Jusiñamui facaina lloraíma iena jaie cuete: "Jusiñamuina iiñuamona marebicaidimaci. Ie mei jaca iitimaci". <sup>12</sup>Moisés micorí llogacinuai daje isoñede. Nana Moisés micorí llogacinuaina finuamona comini marebicaide. Moisés micorí iena jaie cuega: "Cue lloga uai finuamona, marebicaidimaci. Iemei jaca iitimaci". Jusiñamuina iiñuana lloñede: ia ie lloga uai finollena cominimo llote. Nana ie lloga rafuena finuamona, comindí marebicaidimaci.

<sup>13</sup>Moisés micorí llogacinuai anamo jaie cai illa jira, faidobidicai; iadedi cai facaina naimie fiodailla jira, Cristodi iemona caina jillotate. Cruzmo Cristo cuinaja jira, cai facaina naimie jai faidobide. Moisés micorí iena jaie cuega: "Cruzmo cuinacamie Jusiñamuimona jai faidobide".

<sup>14</sup>Jusiñamuina naimie iiñua jira, Abraham micorí jaie marebicaide. Jesucristo fiodailla muidona, naimiena judíuainéokino iiñuamona, Abraham micorí isoi marebicaidimaci. Jusiñamuíd ie Joreñona caimo fecallena jaie llote. Ie muidona Jesucristona iiñuamona, Jusiñamui Joreñona birui feiñotcái.

#### **Jusiñamui lloga rafue**

<sup>15</sup>Cue amatiái, bie rafuemu comeciaína faca. Nie isoide rafuena menamie finoacanía, naie rafuena feitañellena, rabemo cuetiaímaiai.

Iaimaiai mamecina nainomo cuia mei, jiairuido damie naie rafuena jiaifo dama meidonide. <sup>16</sup>Ie isoide. Jusiñamuidi Abraham micorimo ico suille rafuena jaie llote. Iena naimie llua jira, iena meidonide. Ie uruiaimo ico suille rafuena lloñede; ia daje uruemo ico suille rafuena llote. Cristona ñaite. <sup>17</sup>Biena lloiacadicue. Naimie jilloillena, Jusiñamuina naimie iïnuamona, Jusiñamui Abraham micorimo rafuena llote. Cuatrocientos treinta años illanona, Moisés micorimo Jusiñamuidi jiaie rafuena llote; iadedi Abraham micorimo jiae lloga rafuena meidoñede. <sup>18</sup>Jusiñamui llua jira, Abraham micori jillode; iadedi Moisés micori llogaciuaido cai jaillamona, cai jilloiaidedi, Abraham micori isoi jilloñedicai. <sup>19</sup>Iese itena, ¿bue ñellena Jusiñamui Moisés micorimo jiae rafuena llote? Naiemona jeacinona cai uiñollena, iena llote. Naie rafue ite, Cristo eniruemo nia biñenia. Jusiñamuidi Abraham micorimo lloga rafue Cristomo duide. Naimie billamona Moisés micorimo lloga rafuena oñedicai. Jusiñamuidi ie jaienisaimo naie rafuena llote, Moisés micorimo iena llollena. Ie mei Moisés naie rafuena cominimo llote; <sup>20</sup>iadedi Jusiñamuidi Abraham micorimo ie rafuena atona llote. Jiaimíemo iese lloñede, Abraham micorimo iena llollena.

<sup>21</sup>Moisés micorimo Jusiñamui rafuena llote; ia naiemona Abraham micorimo llogacino nia sañede. Cai jilloillena, cai jaca illena, Moisés micorimo Jusiñamuidi rafue finuana llotena, naie rafuena cai finuamona marebicaidicai; <sup>22</sup>iadedi Moisés micori cuegafuiaidi nana comini jeacino anamo illana llote. Moisés micori llogaciuaido jaillamona, jeacino anamona jilloñedicai. Jesucristona cai iïnuamona Jusiñamui

llua isoi, jeacino anamona jillodicai. <sup>23</sup>Jesucristona iïnuana nia cai uiñoñenia, Moisés micori llogaciuai anamo iticai. Jesucristo billamona, naimiena iïnuana uiñoticai. <sup>24</sup>Moisés micori llogaciuaidi cai lletarafue. Cristo dibeimo cai illena caina lletade. Cristona cai uiñuamona, naimiena cai iïnuamona, marebicaidicai. <sup>25</sup>Naimiena iïnuana jai cai uiñuamona, naie lletarafuena jai oñedicai.

### Abraham micori ua uruiai

<sup>26</sup>Cristo Jesúna iïnuamona, nana omoi Jusiñamui cominidomoi. <sup>27</sup>Cristo dibeimo omoi illamona, bautizaomoi. Iemonia naimie Moodi jiai omoi Moo. <sup>28</sup>Jusiñamuimona dajena itomoi. Naimiedi nana cominina feiñote. Judúaina omoi illamona, omoina feiñote. Judúaiñedinona omoi illamona, omoina feiñote. Mullaiaina omoi illamona, omoina feiñote. Mullaiaiñedinodomoidena, omoina feiñote. Ñiñiaina omoi illamona, omoina feiñote. Riñoniaina omoi illamona, omoina feiñote. Jesucristona omoi iïnua jira, jaca damacidomoi. <sup>29</sup>Cristomo omoi jai duiadedi, Abraham micori cominidomoi. Ie jira Jusiñamui Abraham micorimo lloga rafuemo jiai jainaiaidomoi.

### Jusiñamui uruiaina jaidicai

**4** <sup>1</sup>Moisés micori llogacina dane lloitice. Jiae rafuedo iena lloitice. Riai uruiai moo fiodailla mei, ie moo raruiaidí nano doforamiemo fiebide. Naie nano doforamie uruenia, naimie mamecido naimiemo jiide. Naimiemo nia raise jiiñede. Naimiedi nia jamai ite isoide. Naimie ie jofomo mullaiai isoi ite. <sup>2</sup>Naimie moo llua dinori jiaino anamo naimie ite. Ie moo raruiai jiaino anamo naimie ite. Naimie jai

eimiena illemona naimie moo raruiaidi naimiemo raise jai duite. <sup>3</sup>Jaie daje isoidicai. Uruiai isoidicai. Cai jaiagai llogacinuai anamo iticai; <sup>4-5</sup>iadedi ie jitalliruimo Jusiñamuidi ie Jitona orede, naicinomona caina jilloitallen. Jusiñamui uruiaina cai jaillena, ie Jitodi naicino anamo riñomona jeiciga. <sup>6</sup>Naimie uruiaidicaina jira, Jusiñamuidi ie Jito Joreño cai comeciaimo orede. Naimena cai feiñuanona, naimiedi caina Jusiñamuina: “Cai Moo” raitatate. <sup>7</sup>Ie jirari jiaíno anamo jai iñedomoi; iadedi Jusiñamui uruiaidomo. Jusiñamui uruiaidomoina jira, nana naimie lloga rafue omoimo jai duide.

**Moisés micori llogacinuai anamo omoi jaia, danomo abido jaidomoi**

<sup>8</sup>Jaie Jusiñamuina nia omoi uiñoñenia, ua jusiñamuillaiñede ra anamo itomoi. Naie isoide rana sedauidomo. <sup>9</sup>Jusiñamuina jai uiñotomoi. Naimie omoina jai uiñote. ¿Bue ñellena omoina marebicaitañede rafuedo dane jaiacadomo? Omoina jilloitañede rafue anamo dane iacadomo. <sup>10</sup>Judíuai comini rafuena finocabillarumo jiai finocabidomoi. Lemona: “Marebicaiticai” raillanona iese finocabidomoi. <sup>11</sup>Cue lloga uai omoi finoñena jira, omoimo tainona jai lloticue. Nibai jai tainomo maijidicue.

**Pablo naimaci diga illana ubiñote**

<sup>12</sup>Cue amatiai, omoi dine nano cue jaia, Moisés micori llogacino anamo iñedomoi. Naie llogacino anamo jaie iticue; ia birui ie anamo iñedicue. Birui cue illa isoi omoi illana jiai jitaídicue. Omoi dine cue nano ia, cuena raise feiñotomoi. <sup>13</sup>Cristo rafuena omoimo nano cue llua facaiseconi duidicue. Iena uiñotomoi. <sup>14</sup>Cue duico omoimona jacire eruaide; iadedi cuena

jearuíñedomoi. Jusiñamui jaienici omoi dine billa isoi, cuena feiñotomoi. Jesucristo omoi dine billa isoi, cuena jiai feiñotomoi. <sup>15</sup>Jaie caimare iticai. ¿Niese birui cue diga caimare iñedomoi? Cuena omoi canoiten, cuemo fecallena, omoi uisi jaie jino juiconiacadomoi. <sup>16</sup>Omoimo jicanoiacadicue: ¿Uanaicinuai omoimo cue llua jira, omoi enoillamiena jai jaidicue? <sup>17</sup>Moisés micori llogacinuaido jaidino omoina eo nabairitimaci; iadedi mare rafuena finoacaiñedimaci. Naimaci diga omoi nabairillena, cue diga omoi nabairillana jai jitaíñedimaci. <sup>18</sup>Mare comeciaímona cuena omoi jaca jitaia, eo mare. Omoi dine cue ia, iese omoi jitaia, mare. Omoi dine cue iñenia, iese omoi jitaia, jiai mare. <sup>19</sup>Cue uruiai, Cristo omoi comeciaína raise namataja dinori, omoiri cue comeci eo duere dane llicidaite. <sup>20</sup>Omoi diga ja iacadicue, omoi diga atona raise ñaillena. Omoimona are cue illa jira, dane raise cai nabairillena, omoimo cue lluana raise uiñoñedicue.

**Jesucristo rafue Moisés micori llogacinuai baifemo faite**

<sup>21</sup>Moisés micori llogacinuai anamo iacadino, omoimo daje rafuena jicanoiacadicue: ¿Moisés micori cuegafuiaina raise cacadomo? <sup>22</sup>Moisés micori jaie cuega: “Abraham micorimo mena jito ite. Daje jito ie mullaíñomona comuide. Jiaie jito ie mullaiaiñediñaiñomona comuide. Naiñaiñodi ie nanoca ai. <sup>23</sup>Abraham micori jitalla jira, ie mullaíño jitona comuitate; iadedi ie mullaiaiñediñaiño jito comuide, Jusiñamui llua jira”. <sup>24-25</sup>Naie rafuemona cai fueolle. Ie iaiñuaidi mena jai lloga rafue isoidiañua. Abraham micori mullaíño mameci Agar micori. Naiñaiñodi Sinaí railla

anedumona lloga rafue isoide. Arabia railla eniruemo Sinaímona Jusiñamuidi Moisés micorimo rafuena llote. Naiñaiño mullaiñona jira, ie urue mullaimana jeiciga. Ie nama anamo jaca ite. Ie isoide. Moisés micorimo llogacinuaido jaidinodi naie rafue anamo itimaci. Jerusalémo itino Moisés micori llogacinuai anamo jai nia illa jira, Agar micori Jerusalén railla nairai isoide.<sup>26</sup> Jaiñaiñodi jiae lloga rafue isoide. Naiñaiño Abraham micori ai. Naiñaiñodi Sara micori. Naiñaiñodi monamo ite Jerusalén isoide, naiñaiño mullaiñoenäna jira. Nainomo jainaiaidicai, Moisés micori llogacinuai anamo jai cai iñena jira.<sup>27</sup> Isaías micori iena jaie cuete:

Oiniño, mai iobi.

Urue nia jocoñediñaiño, ado iobi.

Inirediñaiño baifemo eo uruiairenitio. Lemona Moisés micori llogacino anamo iñedinomona Cristona iñnotinona alluena jaillana uiñoticaí.

<sup>28</sup>Cue amatiaí, bie rafue omoímo duide. Jusiñamui llua jira, Abraham micori jito Isaac micori comuide. Ie isoide. Jusiñamui llua jira, caídí ie uruiaina jaidicai. <sup>29</sup>Ero, mullaiño jitodí mullaiaiñediñaiño jitona jaie duere finouide. Daje isoi Moisés micori llogacinuai anamo itinodi. Jusiñamui Joreño anamo itinona birui duere finocabidimaci. <sup>30</sup>¿Niese cai nibaille? Moisés micori Sara micori lluana jaie cuete: “Mullaifiona, naiñaiño jito diga, oni dota. Ie moo fiodailla mei, mullaiño jito ie moo raruiaina feiñoñeite. Dama mullaiaiñaiñoñede jito ie moo raruiaina feiñoite’ llote”. <sup>31</sup>Ie jira mullaiño urue isoñedicai Moisés micori llogacinuai anamo jai cai iñena jira, mullaiaiñediñaiño urue isoidicai.

¿Nie isoide rafuedo jaitomoí?

**5** <sup>1</sup>Moisés micori llogacinuai anamona Cristodi caina jai jillotate. Ie jira omoí comeciaina ocuiño. Jaie

omoí illa isoi, dane jaiñeno. Omoí marebicaitañede rafue anamo jaie itomoí. Ie jira Moisés micori llogacinuai anamo iñeno. Lemona marebicaiñetomoi. <sup>2</sup>Jeacinomona omoí jillobilena, Moisés micori llogacinodo omoí jaiacanamona, omoí abiaína omoí detataia, Cristo rafuena jai jitaiñedomoi. <sup>3</sup>Dane lloitice: Jeacinomona omoí jillobilena, naga abina detatagamie nana Moisés micori llogacinuaína iñuua. Nana iena iñoenia, naimie jilloñeite. <sup>4</sup>Moisés micori llogacinuaína iñuamona omoí marebicaiacania, Cristo rafuena jai duiñedomoi. Jusiñamui caina duenallamona, Cristona jaie cai dine orede. Moisés micori llogacinodo omoí jaiacania, Cristo rafuena jai jitaiñedomoi. <sup>5</sup>Moisés llogacinuaína iñuamona marebicaiñedicali; iadedi Jesucristona cai iñuamona, Jusiñamui Joreño caina canuamona, cai marebicaillemo iocire ocuridicai.

<sup>6</sup>Abina detatagamona, cai jeacinomona jilloñedicali. Abina cai detatañenamona, jai jilloñedicali. Dama Cristona cai iñuamona jillobidicali. Naimena cai iñuua jira, nana cominina isiruicana jaidicai. <sup>7</sup>Cristo rafuedo navui marena jaidomoi; ia damierie uanaicinona omoí iñuua jai jitaiñedimaci.

<sup>8</sup>Jusiñamumona naimaci uaina oñedimaci. Jusiñamui omoína navui uайдote, naimie dibeimo omoí illena.

<sup>9</sup>Jiae rafuedo iena lloitice: Janore jisa siritate ra ifecimo joneia, jai nana siritate. Ie isoide. Damie jiae rafuedo jaia, diga cominina jifuerede, naimie jailla dibeido jaillena. <sup>10</sup>Jiae rafuedo omoí jaiñellemo cue comeciná jai facadicue. Cai Nama cue iñuua jira, cue lloga uaido omoí jaillemo cue comeciná jai facadicue. Omoí comeciaína naganomo itatatiñienäna uiñoenedicue; iadedi Jusiñamui naimena duere finoite.

<sup>11</sup>Cue amatiai: “Abina detataja” omoimo cue lloiadedi, cuena jai duere finoñedomoi, omoi jilloillena Jesucristo fiodailla rafuena jai cue lloñena jira.

<sup>12</sup>Omoi comeciai naganomo itatatinodi raitimaci: “Janore jisa abina detatajamona, cai jeacinomona jillobidicai”. Iese itena, Jusiñamui uiñoñedino finua isoi, namienda naimaci abiai diana jiai jitaadicue.

<sup>13</sup>Moisés llogaciuai anamona Jusiñamui omoina jai jillobitade; iadedi maraifñede rafuena omoi finollena jillobiñedomoi. Omoi jillobilla jira, naimacina omoi isiruilla jira, jiae cominina cano. <sup>14</sup>Moisés micori iena jiae llote: “O abi o isiruilla isoi, o ecimo itinona isirui”. Iena omoi finoia, nana Moisés micori llogaciuaina jai finodomoi. <sup>15</sup>Iese omoi finoñenia, conima diga omoi riire iciria, jaca danomo iñeitomoi.

#### Jiae cominina omoi isiruilla rafue

<sup>16</sup>Omoimo nia lloitice. Jusiñamui Joreño omoi comeciaimo namatajano omoi i. Omoi comeciaimo ite maraifñedicinodo omoi jaiñeno. <sup>17</sup>Cai comeciaimo ite maraifñedicinodi Jusiñamui Joreño jitaillacinodo daacinodo jaiñede. Conima abido jaide, cai jitailla ra cai finoñellena; <sup>18</sup>iadedi Jusiñamui Joreño anamo omoi raise ia, naimie lluana omoi raise iinoia, Moisés micori llogacina jai jitañedomoi.

<sup>19</sup>Ero, maraifñede comeciaimo iticinodo omoi jaia, bie isoidicinona finocabidomoi: aiñede riño diga illacina, iniñede iima diga illacino, jeare ñaiacino, diga eo jeareda rafuena finuacino, <sup>20</sup>jiraraina sedajacino, aimra finuacino, comena enoillacino, uaina uaitajacino, abina uradoillacino, icirillacino, dama ie abi ramo comecin facajacino, nana cominina uaitaillacino,

damacina iñenacino, <sup>21</sup>dama abina uradoillano, rana bairuacino, comena meiniacino, jifaillacino, aifuerillacino, ie isoidicino. Omoimo jaie lloitice. Dane lloitice: Bie isoide rafuena bu finocabia, naimie cominina naimaci iñena jira, Jusiñamui ie cominina sedajanomo jainaiañeite. <sup>22</sup>Jusiñamui Joreño omoi comeciaimo namataia, bie isoidicinona finocabidomoi: nana comini isiruillacino, comeci caimare illacino, uri illacino, raire icirirainacino, duenaillacino, jiae cominina canuacino, ie lloga uaina finuacino, <sup>23</sup>uai oñenacino, abina eenuacino. Moisés micori llogaciuai bie isoidicinona ñaiñede. <sup>24</sup>Cristo Jesúmo jainaiaidinodí naimaci maraifñede comeciai jitaillacino anamo iñedimaci. <sup>25</sup>Jusiñamui Joreño caimo illa jira, naimie cai comeciaina namatajacinodo cai jaillesa. <sup>26</sup>Iemonia abina cai biriñellesa. Abina jiai cai iedoñellesa.

#### Jiae llofuiacino

**6** <sup>1</sup>Cue amatiai, omoimona damie ebena jamai jeacinona finoia, dane Jusiñamui dibemio naimie raise illena, naimiemo fecuise iciñeno llono. Omoi cominimona Jusiñamui Joreño comeciaimo raise namatadinodi iese naimiemo llofuellesa. Jeacino finoi raillano, nagamiiab iabi rairuillesa. <sup>2</sup>Bu duere sefuria, bu Taife ramo faia, coninina cano. Iese omoi canoia, Cristo llogaciuaina jai iñotomoi. <sup>3</sup>“Cuemo iese suiñeite. Dama abina sedadicue. Jamai bue isoñedicue” comecin facadimie dama abina jifuete. Naimie jamai bue isoide. <sup>4</sup>Maraiñeni raillano, ie finoca rafueconi iobillena, nagamiiab ie finoca rafuena abido facaja. Dama ie maijia rafuedi naimiemo duide. Jiaimiemo ite

maiđia rafuedi naimiemo duiñede.  
<sup>5</sup>Naimie finoca rafuemona nagamie  
jeacinona finoia, dama naimie muidona.  
<sup>6</sup>Naga Jesucristo rafuena fueotimiedi ie  
llofuegamiemo mare ra fecalle. <sup>7</sup>Dama o  
abina jifueñeno. Budi Jusiñamuina  
jifuenide. Jeacinona bu finoia,  
Jusiñamui ibana jaca oite. Marecinona  
bu finoia, Jusiñamuimona iba feiñoite.  
<sup>8</sup>Ie comecimo ite maraiñede jitailacino  
finodimiedi ie abina faifite. Fiodaite;  
iadedi Jusiñamui Joreño jitailacina  
finodimiedi monamo jaca iite.  
Faifíñeite. <sup>9</sup>Jusiñamui Joreño  
jitailacina finuana sefuiruiñeno. Cai  
comeciai cai ocuiñoia, Jusiñamui jitaila  
facaiseconci ibana feiñoitaci. <sup>10</sup>Ie jira  
nana cominina canocabi. Nana  
creyentiaina ua eo canocabi.

#### Facaduacino

<sup>11</sup>Ero, jerie cuiano omoimo bie  
facaimo cueticue. <sup>12</sup>Jiae cominimona  
iobillacina omoi abiaina detatajana  
jitaídino feiñoiacana jira, omoi abiaina  
detatajana jitaídmaci. Cristo rafue  
lloticainadedi: “Cristo rafuena

uiñoñedinodi niade duere caina  
finodimaci” raillanomo comeciaina  
facajamona, iese jitaidimaci. <sup>13</sup>Omoi  
abiaina detatajana jitaidinodi Moisés  
micorí llogacinodo raise jaiñedimaci.  
Nana iena iinoñedimaci. Omoiri abina  
iedoiacana jira, omoi abiaina detatajana  
jitaidimaci; <sup>14</sup>iadedi Jusiñamuidi jiae  
rafueri abina cue ieduanana jitaiñede.  
Dama Cristo cuerri fiodailla rafueri abina  
iedoticue. Ie jira Jusiñamuiñede  
rafuemo jañaiañedicue. Naie rafue  
anamo jai iñedicue. <sup>15</sup>Abina diamona  
cai jeacynomona jilloñedicaí. Abina  
deñenanomona jaca jilloñedicaí; iadedi  
Jusiñamui Joreño caina comonori  
comuitajamona jillobidicai.  
<sup>16</sup>Jusiñamuidi nana bie illuacindo  
jaidino uri itatatesa. Naimie naimacina  
duenaillasa. Jusiñamui cominidi ua jaca  
iese illasa.

<sup>17</sup>Bie isoide rafue illamona, cuena  
duere finoñeno. Jesucristo rafuena cue  
llua jira, diga icaiño cue abimo  
bofellañona jai oticue.

<sup>18</sup>Cue amatiai, cai Nama Jesucristo  
omoina duenaillasa. Mai. Pablodicue.

## EFESOMO ITE CRISTONA HNOTINOMO PABLO ORETAGA RABE

Efesomo ite creyentiaimo  
Pablo cartana orede

**1** <sup>1</sup>Efeso railla nairaimo ite creyentiai,  
Pablodicue. Bie carta omoi dine  
oredicue. Ie rafue llollena, Jusiñamui  
jitailla jira, Jesucristo oretagamiedicue.  
Naimiemo omoi jai jainaiailla jira,  
Jesucristona iñocana jai jaidomoi. <sup>2</sup>Cai  
Moo Jusiñamui, cai Nama Jesucristo  
diga, omoína duenaicabillana uiñocana  
mai omoi jai. Iaimaiai omoi comeciaina  
uri itatajacabillana uiñocana mai omoi  
jai.

Cristomo jai cai jainaiailla jira,  
Jusiñamui marena itatajacinona  
feiñoticaí

<sup>3</sup>Cristomo cai jainaiailla jira,  
Jusiñamui caina eo marena itataite. Ie  
jira cai Moo Jusiñamuimo iobillacina  
cai fecacabillasa, naimiedi Cai Nama  
Jesucristo ie Moo illanona. Cristomo cai  
jainaiailla jira, cai comeciai marena  
itatajacinona Jusiñamuimona jai  
feiñoticaí. <sup>4</sup>Iena ja lloitice. Enirue nia  
iñenia, Jusiñamui nana naimiena  
iñotinona jaie fetode. Cai facaina Cristo  
ico fiodaillena naimie uiñuamona, caina  
jaie fetode. Naimiemona cai  
marebicailena, jeacinona cai  
finoñellena, caina fetode. <sup>5</sup>Caina  
isiruillamona caina fetode. Naimie eo  
jitailla jira, naimie uruiaina cai jaillena,

caina fetode. Jesucristo fiodaillamona  
Jusiñamui uruiaina jaidicai. <sup>6</sup>Naimie  
caina fetuamona, naimie caina  
duenaillana jai uiñoticaí. Iemon  
naimiedi eo mareuidimienna jiai jai  
uiñoticaí. Ie isiruiga Jitomo cai  
jainaiaillamona iena uiñoticaí.  
Naimiemo buena cai finoñenia, caina  
duenaite. Naimieno cai iobitallená,  
caina fetode. <sup>7-8</sup>Caina eo duenaillanona,  
ie Jito fiodailla jira, Jusiñamuidi jeacino  
anamona caina jai jillotate. Cai jeacino  
oni dotajamona, ibana jiai oñeite.  
<sup>9</sup>Naimieno cai raise iñollena, caina  
abina jai uiñotade. Jusiñamui caina  
naimie nana caina birui jilloitaiacanana  
jai uiñotade. Cai cominidi iena jaie  
uiñoñedimaci; iadedi Jusiñamui jitailla  
diese Cristo finoca rafuedo caña iena  
jai uiñotade. <sup>10</sup>Naimie jitailla  
facaiseconi, nana caimo ie finoacalle  
rafue fuiduanona, Cristo anamo naimie  
nagamienna raise itataite. “Cristo cai  
Nama” raitimaci.  
<sup>11</sup>Ie jira naga suide rafue suicana  
jaide, Jusiñamui jitaillacina  
fuidollena. Nana naimie jitailla diese,  
naimie comeci jitailla jira, nana iena  
finode. Nano facaiseconi naimie  
cominina cai jaillana naimie uiñuanona,  
caina jaie fetode. Ie muidona naimie  
cominina jai jaidicai. <sup>12</sup>Naimie caina  
fetuanona Cristona jaie iñoticaí. Naimie  
diga ico jaca cai illemo birui ocuridicai.

Naimiena cai iobitallena caina fetode. “Naimie fue eo mare” cai raillena caina fetode. <sup>13</sup>Cristona jai birui iiñotomoi. Uanaicino rafue omoi jai cacajamona, naie mare rafue omoi cacajamona, omoi jeacinomona jai jillobidomoi. Jusiñamui Joreño omoimo illano, navui Cristo llua isoi, naimie dibeimo omoi illana uiñotomoi. <sup>14</sup>Jusiñamui Joreño caimo jaca illa jira, Jusiñamui diga ico cai jaca illena uiñoticai. Jusiñamuidi caina ie cominina jai jaitate, naimiena cai iobitallena. “Naimie fue eo mare” cai raillamona, naimiena iobitaiticai. Naimiemo cai jañaialla jira, naimiemonia nana cai comeciai marena itatajacinona feiñoticai.

### Naimaci facaina Pablo jiide

<sup>15</sup>Cai Nama Jesúna omoi iiñuana jai fididicue. Nana jiae creyentiaina omoi isiruillana jiai fididicue. <sup>16</sup>Ie jirari Jusiñamuimo cue jiiia, omoina feitañedicue. Omoi facaina naimiemo iobillacinona jaca fecadicue. <sup>17</sup>Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue jianona, omoi facaina jicanoticue. Naimie Joreño uaido naimie rafue raise uiñocana omoi jaillena jicanoticue. Naimienra raise uiñocana omoi jaillena jicanoticue. Iese omoi facaina jicanocabiticue. <sup>18</sup>Naimie dibeimo omoina naimie jai uaidua jira, naimie diga ico jaca omoi illemona, iena omoi raise uiñuana jitaidicue. Naimie cominina omoi jai jailla jira, naimie illanomo ico eo marena iocire iitomoi. Iena omoi raise uiñuana jitaidicue. <sup>19</sup>Naimie uai ua eo siñonana omoi uiñuana jitaidicue. Naimienra cai iiñua muidona, ie uaido naimie caina canorede. Iena omoi raise uiñuana jitaidicue. <sup>20</sup>Fiodaillamona Cristona ie uaido Jusiñamui jai jillotaja jira, naimie

uai siñonana uiñotomoi. Fiodaillamona Cristo jillua mei, monamo Cristo abido jailla mei, ie ecimo Jusiñamuidi Cristona illaimana dane itatate. <sup>21</sup>Ie jira Cristo nana Jusiñamui jaienisai afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaimaiai isoide joreñuai afemo naimie ite. Birui iese ite. Ico iese nia iiite. <sup>22</sup>Jusiñamuidi naga ra Cristo anamo ua jai itatate. Cristona nana creyentiai imaci illaimana jiai ua jai itatate. <sup>23</sup>Cristomo daajena nana cai creyentiaidicai duidicai. Naimie anamo cai illanona, naimie nana caina ocuicabide. Ie jira marena cai illena naimie jitaila isoi, naimie nana caina birui canocabide.

Jusiñamui caina isiruilla jira, cai  
jeacinomona jai jillobidicai

**2** <sup>1</sup>Jusiñamuina jaie omoi nia iiñogenia, naimiemo omoi duíñena jira, naimiemonia fiodaitino isoidomoi. Jeacino anamo omoi illa jira, naimiemonia fiodaitino isoidomoi. Jeacino finocana jaidomoi.

Maraiñedicinona finocana jaidomoi.

<sup>2</sup> Jeacinona ebiruitomoi Jusiñamui dibeimo iñedino rafuedo jaidomoi. Taife dibeido jai jaisoidomoi. Jusiñamuina oiacaiñedino Taife jitaila rafuedo jaisoidimaci. <sup>3</sup>Naimaci isoi jaie nana iticai. Cai comeciaimo ite jearede jitailacina finodicai. Iedo jai jaisoidicai. Ie jira Jusiñamui riicaillafue anamo jaie iticai. Iese jaie nana iticai.

<sup>4-5</sup> Jeacinona jaie cai finua jira, jeacino anamo iticai. Jusiñamuina iiñogenidicai; iadedi Jusiñamui caina eo duenallanona, caina eo isiruillamona, naimie diga ico jaca cai illena, naimie dibeimo caina itatate. Fiodaillamona Cristona Jusiñamui jillotaja jira, jeacino anamona caina jai jillotate. Ie muidona monamo ico iiticai.

<sup>6</sup>Cristona jillotaja mei, Jusiñamui ie ecimo naimiena dane itatate. Cristomo cai jai jainaiailla jira, Jusiñamui nainomo caina jiai jainaiaitatem. <sup>7</sup>Cristo finoca rafuemona caina iese jai itatate. Caina iese jai itatajamona, nana cominidi Jusiñamui caina eo duenaillana uiñoitimaci. <sup>8</sup>Naimie caina duenaillanona, caina jai jillotate. Jaca buena cai finuamona jillobiñedicai; iadedi naimie jitaila jira, naimie caina jai jillotate. <sup>9</sup>Cai jilloillena jaca buena cai finoñena jira, abina ideoñedicai.

<sup>10</sup>Jesucristomo cai jainaiaillamona, ie cominina cai jaillamona, cai illa isoi naimie caina itatate. Iese cai illamo Jusiñamui comecei jaie facajano, mare rafuena finocana cai jaillena, naimiedi cai comeciaina marena itatate.

**Cristomo jai cai duilla jira, jiae nairaiñai diga birui uri iticai**

<sup>11</sup>Omoi jaie isoillana uiñotomoi. Iena comecitomoi. Jusiñamuina jaie uiñoñedomoi. Judíuañedinona omoi jeiciñena jira, cai judíuai comini isoi abiaína detatañedomoi. Ie jira cai cominimona maraiñedomoi. <sup>12</sup>Omoi jeacimonona Cristo omoina jilloitaiacanana naie facaiseconi uiñoñedomoi. Cai judíuai nairaimo jainaiaiñedomoi. Ie muidona Jusiñamui cai judíuai cominimo jaie lloga rafuena uiñoñedomoi. Jusiñamuina nabailana uiñoñedomoi. Jusiñamui diga omoi ico jaca illena uiñoñedomoi. Jusiñamuina omoi uiñoñena jira, naimiena sedañedomoi. <sup>13</sup>Naimie dibeimo jaie jaiñedomoi; iadedi Jesucristomo birui duidomoi. Jusiñamui jaie iinoñedomoi; iadedi Cristo jai fiodailla jira, naimiena birui iñotomoi. Naimiena omoi jai iñuamona, cai diga naimie dibeimo jai itomoi. <sup>14</sup>Naimie omoi comeciai jai uri itatate. Cai comeciai jiai jai uri itatate.

Cai judíuaímona omoina jaie jearuiticai. Iese jaie iticai; iadedi Cristo muidona dani cominina nana birui nabaidicai.

<sup>15</sup>Cristo fiodaillamona Moisés micori jaie llogacino anamo jai iñedicai. Naie llogacino dani cai judíuaímo duilla jira, Jusiñamui dibeimo jaie iñedomoi; iadedi Cristo finoca rafue muidona, birui daajena jaidicai. Omoina jaie cai gaiñena jira, omoina jaie nabaiñedicai; iadedi Cristomo daajena cai duilla jira, birui nabairedicai. <sup>16</sup>Cruzmo Cristo fiodailla jira, Jusiñamui dibeimo cai illamona, mena nairaimona caina daje nairaina jai itatate. Ie jira daje nairaina uri iticai.

<sup>17</sup>Cristo jaie billanona, mare rafuena llote. Omoi judíuañedinomo, cai judíuaímo, comeciai uri illana llote. Nana caina jilloitaiacanana llote.

<sup>18</sup>Naimie muidona Jusiñamuina jai nabairedicai. Jusiñamui Joreño caina canuamona, naimie diga birui nabairedicai. <sup>19</sup>Jusiñamui cominina omoi jai illa jira, nana naimiena iñotino diga Jusiñamuimo daajena duidomoi. Caimona birui jiae cominiñedomoi.

<sup>20-22</sup>Jofo isoidicai. Jofona cai finoacanía, naie ibiri nano finodicai. Ie mei diga rana cai atiamona, iena niticai. Ie isoide. Diga jiae isoide cominiaina iticai; iadedi Cristomo daajena jai duidicai. Naimiedi birui nana cai Nama. Cristo facaina llorainimona naimie rafuena jai cacadicai. Jusiñamui Joreño caina canuanona iena iñoticai. Iena cai iñuamona, naimie jitaila isoi, mare rafuena finocana jaidicai. Cai diga Cristomo omoi jai duillamona, Jusiñamui Joreño nana cai comeciaimo jai ite.

**Judíuañedinomo Pablo Cristo  
rafuena llofueute**

**3** <sup>1</sup>Jesucristo rafuena omoi judíuañedinomo cue llofueulla jira, cárcelmo iticue. <sup>2</sup>Omoina naimie

duenaillanona, omoina llofuelleña, Jusiñamui cuena oretate. Iena jai uiñotomoi.<sup>3</sup> Jusiñamui cuemo jaie uiñoñega rafuena jai llote. Naie rafuena janore como jai cueticue.<sup>4</sup> Bie carta omoi facaia, Cristona jaie uiñoñega rafuena cue jai uiñuana uiñotomoi.<sup>5</sup> Jusiñamuidi cominimo iena jaie raise uiñotañede; iadedi ie Joreñodo Cristo facaina llorainina iena birui jai uiñotade.<sup>6</sup> Iena lloitice. Judíuaiñedomoi; iadedi Jusiñamui cuemo jaie llote: "Judíuaiñedino Cristona iiuanona, omoi judíuai isoi jilloitimaci" llote. Omoi facaina Cristodi fiodaite. Naimiena omoi iiñoia, omoina ie uruiaina caí isoi jai itatate. Naimiedi nana caí Moo. Jai daje nairaídai. Cristomo daajena duidicai. Cristo rafuena omoi iiuanona, naimie jai llua isoi, Jusiñamui diga ico jaca iitomoi. Jusiñamui cuena iena jaie uiñotade.<sup>7</sup> Jusiñamui jitilla jira, cuena naimie duenaillanona, naimie uai cuemo illamona, naie mare rafuena llofuecabiticue.<sup>8</sup> Creyentena nia cue jaiñena facaiseconi, creyentiaina jaie cue duere finouilla jira, jamai bue isoidicue. Nana jiae creyentiai cue baifemo faitimaci; iadedi Jusiñamui cuena duenaillanona, ie rafuena cue lollena, cuena oretate. Cristo caina eo raise marena canocabillana llofuecabiticue.<sup>9</sup> Naie jaie uiñoñega rafuena nana comini birui uiñollena, cuena oretate. Jusiñamui naga rana finode; iadedi naimie jitilla jira, naie jaie uiñoñega rafuena jaca buna jaie raise uiñotañede. Nana comini iena birui raise uiñollena, cuena oretate.<sup>10</sup> Judíuaiñedino judíuai diga creyentiaina jaillamona, Jusiñamui jaénisai naimie uai siñonana uiñotimaci. "Naimie fue eo mare" raitimaci.<sup>11</sup> Jusiñamui jaca jitilla isoi,

naie rafue suicana jaide. Cai Nama Jesucristona naimie oretajanona, cai facaina Cristo fiodaite. Iemona Jusiñamui jitilla rafuedi suide.<sup>12</sup> Cristona cai iihua jira, Jusiñamui diga jaciruiñeno birui jai ñairedicai. Naimie caina cacajana jiae uiñoticai.<sup>13</sup> Cristo rafuena omoimo cue llua jira, birui duere sefuidicue. Cárcelmo cue duere sefulla jira, Cristo rafuedo jaillena omoi comeciai sefuiruisiñeno; iadedi Cristo rafue omoimo cue lluanona cue duere sefuria, iobicana omoi jai.

### Cristo caina eo isiruite

<sup>14</sup>Cai Moo Jusiñamui caina eo canocabillanomo cue comeicina facaia, naimiemo jiidicue.<sup>15</sup> Naimiedi nana creyentiai imaci Moona jira, naimiemo jiidicue.<sup>16</sup> Naimiemo cue jiianona, omoi facaina jiidicue. Naimiemo eo ebirede siño iticino illamona, ie Joreñodo naimie omoi comeciaina raise ocuiñotallenja jicanoticue.<sup>17</sup> Cristona omoi iiuanona, naimie omoi comeciaina raise namatallena jicanoticue. Jusiñamuina omoi isiruicana jaillana jiidicue. Jiae cominina omoi isiruicana jaillana jiae jiidicue.<sup>18-19</sup> Cristo caina jaca eo isiruillana, nana jiae creyentiai diga jaca eo isiruillana, omoi eo raise uiñuana jiidicue. Naimie caina eo isiruillacino caí comeciai facajacino baifemo uailla jira, naimie caina eo isiruisoillacinciona jaca raise uiñoñedicai; iadedi iena janore caí uiñuamona, Jusiñamui omoi comeciaina namatallena jiidicue. Iese omoi facaina jiicabidicue.

<sup>20</sup>Ie jira Jusiñamuimo iobillacino cai fecajasa. Ie uaido caí comeciai marena icana jaitate. Naimiemo caí jicajacino baifemo naimie fecarede. Cai comeciai facajacino baifemo naimie jiae finorede.

<sup>21</sup>Ie muidona naimiemo iobillacinona nana cai creyentiaidicai fecacabillasa. Jesucristo finoca rafue muidona iobillacinona jiai cai fecacabillasa. Mai.

**Jusiñamui Joreño jai caimo illa jira,  
cai comeci daje isoi lloide**

**4** <sup>1</sup>Cárcelmo nia cue illamona, omoimo rafuena nia lloitice. Cristo rafuena cue llofuria jira, cárcelmo iticue. Creyentiaina omoi jai jailla jira, Cristo jitaila isoi omoi i. **Jusiñamui** omoina jai fetode naimie jitaila rafuena omoi finollena. <sup>2</sup>Ie muidona abina jaca iedoñeno. Raire iciriñeno. Jiaimie ona duere finoia, ibana oñeno; iadedi uai oñeno naimiena jaca isirui. <sup>3</sup>**Jusiñamui** Joreño omoimo illamona, omoi comeciai daje isoi lloicana jai. Daje isoi omoi comeciai lloillamona, omoi jitallamona dani uri omoi i. <sup>4</sup>Iena nia lloitice. Cristona cai iiñuamona, daajena naimiemo jainaiaidicai. **Jusiñamui** Joreño nana caimo illamona, dani omoi comeciai lloicana omoi jai. **Jusiñamui** caina jai fetode. Ie muidona naimie diga jaca cai illena, naimie isoi cai illemo ocurridicai. <sup>5</sup>Jaca dajede Nama sedacabidicai. Caina jilloitallena, da naimiena iiñoticai. Dama naimie facaina bautizaganodicai. <sup>6</sup>Cai Moo **Jusiñamui** jaca dajede. Jaca dajede **Jusiñamuina** nana cai creyentiaidicai sedadicai. Naimie anamo nana iticai. Naimie jitallacinciona cai finollena, caina canocabide. Caina canollena, naimie Joreño caimo jaca ite.

<sup>7</sup>Naimie jitaila diese, caina fetuanona, naimie facaina cai maijillena, ie uai caimo fecade. Jiae creyentiaina naimiemo iiñotacana jaillena, ie uai caimo fecade. <sup>8</sup>Iena cai raise uiñollena, David micori jiae cuegafuemona fueoitacai. Naimie cuega: “Monamo abido naimie jaillanona,

illaimana naimie illamona, ie cominina naimie ifuanona, naimacimo rana fecade”. Cristona ñaite. Iemonia Cristo cai maijiacino caimo illana uiñoticai.

<sup>9</sup>Biemo omoi comeciaina faca. Monamo abido naimie jailla jira, monamona eniruemo Cristo nano billana uiñoticai.

<sup>10</sup>Eniruemo bite; iadedi monamo abido jaide. Nana cominina birui sedade. Naimie baifemo jaca buna iñede. <sup>11</sup>Ie jira caimo ie uai jai fecajanona, caimonia ie llofueoicaiganona fetuanona, ie rafue raise llofuelleña, naimacina oretate. Damierimo ie facaina ie rafuena jino llollena, ie uaina fecade. Ie rafuena nia iiñoeñedonomo llollena, damierimo ie uaina fecade.

Creyentiaina ie rafuena llofuelleña, damierimo ie uaina fecade. <sup>12</sup>Iese ie uaina fecade, naimie facaina raise cai maijillena, nana jiae creyentiaina cai canollena, Ie mei Cristo rafuena daajena iiñocana jaiticai. <sup>13</sup>Iena cai iiñuamona, **Jusiñamui** Jitona raise uiñocana jaiticai. Cai comecidí daje isoi lloicana jaiticai. Naimie jitallacincodo raise jaiticai.

Naimie marena icana illa isoi jaiticai.

<sup>14</sup>Cai uruiai facaise cai comeciai naganomo ite. Naie facaise nie isoide rafuena cai cacajia, iena raire iiñoticai.

Cristo iiñocana cai jaillamona, uruiai isoi cai iacaiñena. Damierie naga llofueraima uaido jaidimaci. Damierie llofuerainidi Cristo rafuena raise llofueñedimaci; iadedi jifuetimaci. Tainona llotimaci. Iedo cai jaiñena; <sup>15</sup>iadedi jiae cominina cai

isiruillamona, uanaicinodo cai jailla. Cristo isoi icana cai jaillamona, abina uiñoticai. Cristodi cai illaimana jira, caina ocuide. <sup>16</sup>Naga creyente naimiemo jainaiaide. Aillosiedicai; iadedi daajena naimiemo jainaiaidicai. Daajena naimiemo cai jainaiaillamona, naimie jitallacino cai finoia, naimiena

iinocana jaiticai. Iemona dani coninina isiruicana jaiticai. Daajena naimiemo cai jainaiailla jira, cai comeciai daje isoi lloicana cai jailla.

**Cristomo jai cai duilla jira, naimie rafuedo birui jaidicai**

<sup>17</sup>Omoimo nia lloitice. Cai Namamo cue duilla jira, biena lloitice. Jusiñamuina iinoñedino isoi dane omoi ñieno. Jaie naimaci isoi itomoi. Naimaci comeciaidi tainomo jai jaide isoide. Cacarefiacaiñedimaci. <sup>18</sup>Jusiñamui rafuena uiñoñedimaci. Iena cacaiñedimaci. Abina naimaci uiñoñena jira, Jusiñamui dibeimo illana jaca uiñoñedimaci. Uanaicinona uiñoiacaiñedimaci. <sup>19</sup>Jearede rafuena naimaci finoia, meiruñedimaci. Naimaci comeciai oiacana rafuedo jai jaidimaci. Naga jearede isoide rafuena eo finocana jaidimaci; <sup>20</sup>iadedi Cristo rafuena omoi cacajamona, naimiena omoi raise uiñuamona, naimaci isoi omoi illena fueñedomoi. Cristo rafuena omoi cacajamona, jiaiena illena jai fueotomo. <sup>21</sup>Naimiena cacajanona iena iinotomo. Naimiena cue llofuiamona, naimiena Cristo facaina lloraini llofuiamona, danomo omoi roracomo omoi ofia, Cristo uanaicinona cacadomoi. <sup>22</sup>Bieno omoina llofuecabiticue. Cristona jaie nia omoi uiñoñena isoi, omoi jaiñeno. Omoi comeciaimo jaie iticinodo jaiñeno. Naga jearede rafue omoi comeciai oiacanamona faificana jaie jaidomoi. Iedo birui jaiñeno; <sup>23</sup>iadedi Cristo dibeimo omoi jai illanona, naimiemo omoi comeciai facajano, Jusiñamui omoina canuamona, omoi comeciai iuailaina meidocana jai. <sup>24</sup>Cristo rafuena birui iinotomo. Naimie jitaillicinodo omoi mai jai. Jusiñamuidi jeacino finocana omoi jaiñenana jitaide.

Naimie marena isoi, marena icana omoi jaillana jitaide. <sup>25</sup>Ie jira tainona lloñeno. Cristomo daajena jai jainaiailla jira, coninimo uanaicinona jaca omoi llono. Jiaínona omoi jifueñeno.

<sup>26</sup>Maraiñedycinona bu finoia, naimiemo riire llono; iadedi ie se o lloia, naimiena jeare ñaiñeno. Jiaimie ona iciia, naimiena jeare ñaiñeno. Naimie diga o rafue ia, naie rafue nairuido marena fino, <sup>27</sup>Taife ramo o fai raillano. Bu diga o nicino ia, iena raire marena o finoñenia, ibana oiacanitio. Naie raire o feitañena jira, Taife ona jeacinona finotaite. Iese suiñellena, naicino raire marena fino. Iena feita. Iena dane abido llinoñeno. <sup>28</sup>Naimiemo ra illena, fíiamona omoimona navui bu ia, creyentena naimie jai jailla jira, naimie dane fíiñena; iadedi ra naimie jitaia, naimie majiite. Ie maijiamona ie ra ollena, ucubena feiñote. Ie mei dueredinona naimie jiai canoite. <sup>29</sup>Jeare ñaiñeno; iadedi nie isoide rafue ia, marecinona ñaino. Ie mei naiemona jiae cominina canoitomoi, Jusiñamui dibeimo naimaci raise illena. <sup>30</sup>Jusiñamuimo omoi jai jainaiailla jira, jeacinona finoñeno. Jeacino omoi finoia, Jusiñamui Joreñodi sunaite. Naimiena sunaitañeno. Naimie caimo illamona, caina jillotajana uiñotcái. Cristo dane abido billemona, naimie dine cai jaca illena, caina jai jillotate. <sup>31</sup>Jiae cominina iciñeno. Iciriñeno. Uaina uaitañeno. Jiae cominina jeare ñaiñeno. Naimacina duere jeare finoñeno; <sup>32</sup>iadedi coninina canua. Jiae cominina duenai. Jiaimie diga omoi nicino ia, naimie finoca rafuena feitajanona, naimie diga marena ñaino. Naie rafuena dane abido llinoñeno. Cristo finoca rafue muidona, Jusiñamui omoi jeacinona jai feitaja isoi, jiae diga omoi rafue ia, naifuena omoi feita.

**Jusiñamui cominina jai cai  
illamona, naimie jitailacínona  
finoiticaí**

**5** <sup>1</sup>Jusiñamui isiruiga uruiaidomoí. Naimie marecinona finua isoi, omoi fino. <sup>2</sup>Cristo caína isiruilla isoi, coninina isiruicana omoi jai. Naimie jitaila jira, caína isiruilla mona, caí facaina naimie fiodaite. Cai jeacino oni dotallena naimiedi fiodaite. Naimie iese fiadilla jira, Jusiñamuina eo iobitade.

<sup>3</sup>Jusiñamui cominidomoí. Omoi aiñede riño diga iñeno. Omoi iniñede iima diga iñeno. Rana nicidoñeno. Jearede rafue finuamo omoi comeciaina facañeno.

<sup>4</sup>Jearede rafuedo jaiñeno. Jamai ebena ñaiñeno. Meiredicinona ñaicana jaiñeno. Naie isoide rafuedo creyentedi jaiñena; iadedi Jusiñamuimo iobillacínona fecacana omoi jai. <sup>5</sup>Le aiñede riño diga icabitimedi Jusiñamui illanomo duiñede. Cristo ie cominina sedajanomo duiñede. Le iniñede iima diga icabitíñaiñodi Cristo ie cominina sedajanomo jiai duiñede. Le rana Jusiñamui ifomo naimie sedaja jira, rana nicidocabitimedi Cristo ie cominina sedajanomo duiñede. Cue lloga rafuela jai raise cacadomoí.

<sup>6</sup>“Creyente naie isoide rafuela finorede” bu lloia, naimie omoina jifueiacade. Naimie iese lluana iñóñeno. Jusiñamui naie jeacinona finocana jaidinona duere finoite. <sup>7</sup>Le jira naimaci jearede finoca rafuedo jaiñeno. Naimacina nabaiñeno. <sup>8</sup>Jusiñamuina jaie omoi uiñoñena jira, jitiredinomo itomoí isoidomoí; iadedi caí Namamo omoi duillamona, uanaicinona iñocana omoi jai.

<sup>9</sup>Jusiñamuina omoi jai uiñoia, jeacinona omoi fainonocaia, Jusiñamui jitailacínona finocana jaitomoi. Uanaicinona llocana jaitomoi. <sup>10</sup>Buena o finoacania, Jusiñamui jitailacínona o

finuacínomo o comecina nano faca. Cai Nama jai lloga uaido omoi jaicabillamona, naimie jitailacínodo jaca jai. <sup>11</sup>Jitiredinomo nia itino finoca rafuedo omoi jaiñeno. Naimaci finoca rafuemona marecinodi jaca comuiñede. Naimacimo: “Maraiñede” llono. <sup>12</sup>Iena cue meidailla jira, naimaci jearede bainino finoca rafuela ñaiacaiñedicue. <sup>13</sup>Marecinona omoi jaca finuamona, jiaé comini naimaci finoca rafue eo maraiñenana raise uiñotímaci. <sup>14</sup>Cai ofia, naiena rocabiticaí:

Mai casi. Iniñeno.  
Jai fiadaitino isoidomoí;  
iadedi omoi comeciaina Cristo jai  
lligaiñote.

<sup>15</sup>Le jirari omoi marena illena, abina rairuicana omoi jai. Jusiñamuina iñóñedino ebena jaicabidimaci. Naimaci isoi jaiñeno. <sup>16</sup>Diga maraiñede rafue birui comuicabilla jira, cominina Cristo dibeimo raise omoi itatajallen, nagarui Cristo jitailacínona finocana omoi jai. <sup>17</sup>Le jira ebe isoi jaiñeno; iadedi Cristo jitailacínona uiñocana omoi jai. <sup>18</sup>Iocire omoi iacania, naiemona diga maraiñede rafue comuilla jira, jifaiñeno; iadedi omoi comeciaina naimie namatallena, Jusiñamui Joreño anamo raise omoi mai i. Iemei naiemona diga mare rafue comuite. Iocire jiaí iitomoi. <sup>19</sup>Danomo omoi ofia, nana omoi comeciaimona diga isoide ruana iocire ro-rona. Omoi ruamona jiaé creyentiai comeciaina ocuiñota. Cai Namamo omoi ruamona, omoi fillamona, omoi taillamona, naimiena iobitatomoi. <sup>20</sup>Cai Nama Jesucristomo omoi duillamona, nie isoide rafue omoimo ia, cai Moo Jusiñamuimo iobillacínona jaca feca.

**Cristomo jai caí duilla jira, caí  
comini diga marena iacadicai**

<sup>21</sup>Cristo anamo omoi illa jira, jiaé creyente baifemo omoi faiacinomo omoi

comeciaina facañeno; iadedi coninina nagamiaina cano.

<sup>22-23</sup>Inirediñaiñuaí, omoimo rafuena lloiacadicue. Cai Nama Cristomo omoi jainaiailla jira, naimie jitaila jira, omoi iniñiaí anamo raise omoi i. Naimaci uaina raise iino. Cristo nana creyentiaí afemo illamona, naimacina naimie sedaja isoi, naga ini ie aí afemo illamona naiñaiñona sedaja. Cristodi nana creyentiaí imaci jeacinomona jillotajamona, naimie anamo itimaci.

<sup>24</sup>Cristo anamo nana creyentiaí illa isoi, naiñaiñuaí iniñiaí uaina jaca iinua.

<sup>25</sup>Aíredino, omoimo jiai lloitice. Nana creyentiaina Cristo isiruilla isoi, omoi ainiaina isirui. Nana caina naimie isiruillamona, naimie jitaila jira, cai facaina naimie fiodaite. Ie isoi omoi ainiaina omoi isirui. <sup>26</sup>Nana creyentiaí marena illena naimie fiodaite.

Jusiñamui jitaila isoi, caina marebicaitate. Cristo fiodailla jira, Cristo jai lloga rafuena cai iinuamona, cai jeacinomona jai jillobidai.

<sup>27</sup>Fiodaite, nana cai creyentiaí comeciai marena illena. Cai comeciai jeaninana jitaidé. Cristo abido bille facaisemo, Jusiñamui jitaila isoi cai marenana jitaidé. <sup>28</sup>Naimie abi naimie isiruilla isoi, naga ini ie aina isiruilla. Iaimaiaí daajena jira, ie aina isiruitimiedi ie abina jiai isiruite. <sup>29</sup>Jaca bu ie abina enoiñede; iadedi ie abina sedade.

<sup>30</sup>Naimiemo nana cai creyentiaí duilla jira, Cristo caina isiruillamona, caina sedade. Ie isoi nagamie ie aina isiruilla. <sup>31</sup>Bie jaie lloga uaimona iena uiñoticaí. Moisés micori Jusiñamui lluana jaie cuega: “Ie aina ollena, iima ie moona, ie ei diga fainonocaite. Iemei dajena iittiaimaiia”. <sup>32</sup>Naie llofuiacínomona jiai rafuena fueoiticaí. Cristona ñaiticue. Creyentiaína ñaiticue. Naimiemo cai duillamona, daajena iticai. <sup>33</sup>Dane

lloticue: Ie abina isiruilla isoi nagamie ie aina isiruilla. Nagañaiño ie ini uai uaitañeno iinua.

**6** <sup>1</sup>Uruiaí, omoimo rafuena lloiacadicue. Cai Nama jitaila jira, omoi eiñiaí uaina iino. Omoi mootiaí uaina jiai iino. Jusiñamuimona marenana jira, iaimaiaí uaina iino.

<sup>2-3</sup>Moisés micori Jusiñamui lloga uaina jaie cuega: “O moo uai iino. O ei uai iino. Marena o illena, raire o fioldaiñellena, iaimaiaína o isiruillamona, iaimaiaí uaina iino” cuega. Jusiñamui diga lletarafuena llote; iadedi bie nanoca rafuena llote.

<sup>4</sup>Mootiaí, omoimo lloitice. Omoi uruiaina jamai iciñeno; iadedi naimacina cai Namana naimaci uiñollena llofue. Naimaci iinoiacaiñenia, abina naimaci uiñollena, naimacina isiruillamona, naimacina duere fino.

<sup>5</sup>Patrón anamo itino, omoimo lloitice. Omoi patrones ocuica uaina iino. Omoi majiana naimaci ocuia, naimacina iobitallena, jaciruioicaida raise maiji. Omoi comeciaimona naimaci jitaila rana maiji. Cristo iedená, naimaci ocuica uaina iino.

<sup>6</sup>Omoimo naimaci eruiaí, naimacina iobitallena, marena maiji; iadedi omoimo naimaci eruaiñenia, naimacina iobitallena, nia marena maiji. Naimacina iobitallena maiji; iadedi Cristomo omoi duilla jira, Jusiñamui jitaila jira, omoi comeciai maiji

raillamona, marena omoi maiji. <sup>7</sup>Patrón facaina majiacinomo dani comeciná facañeno; iadedi iocire maiji, cai Nama facaina omoi majidomoídena. <sup>8</sup>Biená uiñoticaí: Marena bu majiia, cai Nama Cristomona ibana ico feiñonte. Patrón anamo itino iena feiñoitimaci. Patrón anamo iñedino iena jiai feiñoitimaci.

<sup>9</sup>Patrones, omoimo lloitice. Omoi Nama Cristo monamona omoimo

eruailla jira, Cristo monamona naimacimo jiai eruailla jira, omoi anamo itinona marena fino. Naimacina riire ocuiñeno. Naimacina jeare finoñeno. Cristo nana naimie cominimo daje isoi comecina lloide. Ie jira omoi anamo itinona marena fino.

**Cristomo jai cai duilla jira, naimie  
cai comeciaina ocuiñotaite**

<sup>10</sup>Ie muidona nia lloitice. Cai Namamo omoi duilla jira, naimiedi omoi canocabillamona, omoi comeciaina ocuiñotacana omoi jai.  
<sup>11-12</sup>Ero, Taife caina ramo jifueoicaida faite. Caina anafefitaiacadade. Naimie isoidino caina jiai anafefitaiacadimaci. Naimacidi aillosie. Naimaci anamo nana Jusiñamuina iinoñedino jai itimaci. Jitiredinomo naimaci illanona, Jusiñamui dibeimo iñedimaci. Beno eniruemo itimaci. Jusiñamui illanomo duiñedimaci. Cominina ñaiñedicue. Taifena, Janabana, Dofina, jananiaina, Dusisiñona ñaiticue. Naimaci isoide joreñuaina ñaiticue. Cai dibeimo iñedimaci. Naimacimona abina omoi rairui. <sup>13</sup>Jobaime illa facaiseconi, soldaduai imaci ra diga imaci abiaina riidotimaci. Cinturón jitadimaci. Lloemamona finoca ra jogobemo jitadimaci. Zapatona jitadimaci. Uico riidollena, naimaci uico riidua rana llinotimaci. Ifogi icona jitadimaci. Lloebina llinotimaci. Ie isoide.  
<sup>14</sup>Cristomo omoi comeciai facajanona, uanaicinona jaca llono. Jusiñamui jitaila isoi, marecinona finocana omoi jai. <sup>15</sup>Cristo rafuemona omoi comeciai uri itatajamona, iena meiruiñeno llocana uiño. <sup>16</sup>Taifemona nana jearede

rafuedi comuide. Naimiedi ramo faiacana jai jaide. Cristona omoi iinuamona, Taife ramo faiacinona jamai. <sup>17</sup>Jusiñamui caina jai jilloitajana jai uiñotomoi. Iena omoi uiñuamona, Taife ramo faiacinona iinoñeno. Taifena anafenollena, Jusiñamui Joreñodo Jusiñamui uaimona fueo. <sup>18</sup>Jusiñamui Joreñodo omoina canuamona, Jusiñamui diga ñaicabi. Taife ramo omoimo faia, iena omoi iinoñellena, Jusiñamui omoina canoite. Iese abina omoi rairuia, Taifena anafefitaitomoi. Taife ramo faiacino naimaci iinoñellena, nana jiae creyentiai facaina jiai jiicabi. <sup>19</sup>Cue facaina jiai omoi jii. Marefodo nana Cristo ie rafuena cue lluana omoi jii. Cristo nana cominina jilloitaiacanana nia lloiacadicue. <sup>20</sup>Naie rafue cue llollena, Cristo cuena oretate. Naie rafuena cue llua muidona, cárcelmo iticue. Cue jitaila diese iena marefodo cue lluana mai omoi jii.

<sup>21-22</sup>Tíquico omoi dine oretaiticue. Naimiedi cue isiruiga ama. Naimiedi iinogamie. Cristo rafue facaina cuena canocabide. Omoimo cue illana lloite. Cue finoca rafuena lloite. Naimiemona cue rafuena fidiitomoi. Iena cacajamona omoi comeciai ocuiñoitomoi. <sup>23</sup>Cai Moo Jusiñamui, cai Nama Jesucristo diga, omoina uri itatajamona, Cristona jai omoi iinuamona, coniniri uri icana jaillana jitaidicue. Iaimaiai omoina isiruillamona, iaimaiaina omoi iinuamona, nana jiae creyentiaina isiruicana omoi jai. <sup>24</sup>Cai Nama Jesucristona omoi eo isiruilla jira, Jusiñamuidi omoina duenallasa. Mai. Pablodicue.

## FILIPOMO ITE CRISTONA HNOTINOMO PABLO ORETAGA RABE

Uaiduacino

**1** <sup>1-2</sup>Filipomo ite creyentiai,  
Jesucristomo jai omoi duillamona,  
bie carta omoi dine oredicue.  
Pablodicue. Timoteo cue diga ite.  
Naimie cominina coco illamona,  
Jesucristo dibeimo majicabidicoco.  
Omoimo coco uaina oredicoco. Omoi  
creyentiai illaicominimo coco uaina ua  
oredicoco. ¿Nigacino? ¿Nie isoidomoi?  
Cai Moo Jusiñamui, cai Nama Jesucristo  
diga, omoina jai duenaita. Iena  
uiñocana mai omoi jai. Iaimaiai omoina  
uri jai itatate. Iena omoi uiñocana mai  
omoi jai.

**Jusiñamuimo iobillacino fecade**

<sup>3</sup>Naga icaiño omoina cue comeciai,  
Cristo rafuedo omoi jailla jira,  
Jusiñamuimo iobillacinona fecadicue.  
<sup>4</sup>Naga icaiño Jusiñamui diga cue ñaia,  
omoi facaina caimare jiidicue,  
<sup>5</sup>Jesucristo rafuela cue lluana cuena  
omoi canua jira. Nano bie rafuela omoi  
cacajamona, cuena canodomoi. Cuena  
nia canodomoi. <sup>6</sup>Jusiñamuidi omoi  
comeciaina jaie marena itataja  
facaiseconi mare rafuela tainede. Omoi  
comeciaimo mare rafue illicinona  
tainede. Cristo Jesús dane billiruimo  
Jusiñamui bie rafuela fuidoite. Iese  
fuidollemo ocuiridicue. <sup>7</sup>Omoimo iese  
cue comecina cue facajia, omoina cue

isiruilla jira, cuemonia mare. Cárcelmo  
cue illamona, Jesucristo rafuela cue  
riiduano, Jesucristo rafuedi uanaicino  
cue lluano, Jusiñamui cuena  
canocabide. Iemonia naimie caina  
duenaillana jai uiñoticai. <sup>8</sup>Cuena  
omoina Cristo Jesús isiruitajamona,  
nana omoina isiruiticue. Jusiñamuidi  
uanaicinona cue lluana uiñote. <sup>9</sup>Jiae  
cominina eo isi-isruicana omoi jaillena,  
Jusiñamuina raise omoi uiñollena, nie  
isoide rafue omoimo ia, abina raise  
omoi uiñollena, Jusiñamuimo  
jiicabidicue. <sup>10</sup>Iese omoina jitaidicue.  
Mare rafuedo omoi jaiacanana  
jitaidicue. Jiairuido Cristo abido biite.  
Ie jira omoi comeciai jeanillena  
jitaidicue, Jusiñamui jitaila isoi omoi  
comeciai marena illena. <sup>11</sup>Jusiñamui  
jitaila isoi omoi illamona, mare rafuela  
jaca omoi finuana jitaidicue.  
Jesucristona omoi iiñuamona, naimie  
omoina iena finotaredi. Iese omoi  
finocana omoi jaia, Jusiñamuina eo  
iobitaitomoi.

**Cárcelmo Pablo illamona, diga  
comini Jesucristo rafuela  
cacadimaci**

<sup>12</sup>Cue amatiai, bie rafuela omoi  
uiñuana jitaidicue. Cárcelmo cue  
illamona, diga comini Jesucristo  
rafuela cacadimaci. <sup>13</sup>Cai illaima  
jofomo itino cacadimaci. Nana bene

itino jiai cacadimaci. Jesucristo rafuena cue llua jira, cárcelmo iticue. Iena jai uiñotimaci.<sup>14</sup> Cárcelmo iticue; ia jaciruiñeno Cristo rafuena nia lloticue. Iemonia diga creyentiai naimaci comeciaina ocuiñuanona, Jusiñamui uaina jaciruiñeno marefodo birui cue isoi llotimaci. Navui jaciruitimaci.

<sup>15</sup>Cuena uradoillamona, cue afemo iacanamona, damierie Cristo rafuena llofuetimaci. Jiae llofueraini marceninona finuacanamona llofuetimaci.<sup>16</sup> Cuena naimaci isiruilla jira, llofuetimaci. Cristo rafuena cue riiduamona, cárcelmo cue illana uiñotimaci.<sup>17</sup> Cue afemo iacadino mare comeciaimona llofueñedimaci. Iemonia cuena duere finoacadimaci.<sup>18</sup> Iese itimaci; iadedi uradoillamona naimaci llofua, marceninona finuacanamona naimaci llofua, cuemona damamei iesede. Cristo rafuena llocana jaidimaci. Iena jai iobidicue. Nia iobiticue.<sup>19</sup> Cueri Jusiñamuimo omoi jiíano, Jesucristo Joreño cuena canuano, nana cuemo ite rafuemona jilloiticue. Iena cue uiñuamona, nia iobiticue. Jesucristo Joreño ie Moo diga daje.<sup>20</sup> Cue finolle rafuemona cue meiruiñellena eo jitaidicue. Jaie cue finocabilla isoi, Cristona marefodo birui iobitaiacadicue. Cue nia fiodaiñenia, naimienia iobitaiacadicue. Cue fioldailemonia naimienia jiai iobitaiacadicue. Iemonia jiae creyentiaidi Jusiñamuimo iobillacinona fecaitimaci.<sup>21</sup> Nia cue fioldaiñenia, Cristo rafuena nia lloitice. Mare; iadedi cue fioldaia, naimie dine cue illena jiai eo mare.<sup>22</sup> Nia cue fioldaiñenia, diga cominimo Cristo rafuena nia lloitice. Ie jira nie isoide cue illana cue comeci niese rainide.<sup>23</sup> Nia raise uiñoñedicue. Jiaicaiño fioldaiacaiñedicue. Jiaicaiño fioldaiacadicue. Cue comeci Cristo dine

jaiacade. Nainomo cue illena cuemona eo mare;<sup>24</sup> iadedi omoina cue canollena, nia fioldaiacaiñedicue. Cue nia fioldaiñenia, omoina nia canoacadicue.<sup>25</sup> Cue comecina jai facajano, raite: "Nia fioldaiñeiticue. Omoi diga nia cue illana uiñoticue". Cristona omoi iinotacana omoi jaillana jitaidicue. Omoi iinuamona, caimare omoi illana jiae jitaidicue.<sup>26</sup> Iemei omoi dine dane cue illa jira, cuerí Cristomo iobillacinona eo fecaitomoi.

<sup>27</sup> Cue fioldaia, cue fioldaiñenia, Cristo ie mare rafuedo omoi jai. Omoina cue cioia, omoina cue cioiñenia, mare rafuena omoi finuana fidiacadicue. Cristo rafuena iinocana omoi jaillana, omoi comeciai daje isoi lloillana, Cristo rafuena omoi riiduana fidiacadicue.<sup>28</sup> Omoi dibeimo iñedinona omoi jaciruiñenana fidiacadicue. Iese omoi ia, Jusiñamuidi omoi dibeimo iñedino faifillana uiñotaite; iadedi naimiedi omoina omoi jilluana uiñotaite. Naimie diga omoi jaca illena, omoina jai jillotate.<sup>29</sup> Jusiñamui Cristona omoi iinollena omoina fetode; iadedi Cristori omoi duere sefuillena omoina jiae fetode.<sup>30</sup> Omoi nairaimo cue nano illa facaise Cristona iinofiedinomona duere sefuidicue. Iena ciodomoi. Cárcelmo birui cue illamona, naimacimona iese nia birui duere sefuidicue. Iena birui fididomoi. Naimacimona cue isoi birui jiae duere sefuidomoi.

### Jiae creyentiai diga raise omoi illacino

**2** <sup>1</sup>Jiae creyentiai diga omoi marena illena, dajerie rafuena lloiacadicue. Cristomo omoi duilla jira, coninina omoi comeciai ocuiñotajamona, Cristo omoina isiruillana omoi uiñuamona, Jusiñamui Joreño nana omoina nabaitajamona, coninina omoi comeciai

eo duenaillacino illamona, <sup>2</sup>cue comecina caimare itata. Omoi comeciai daje isoi lloillamona, coninina omoi isiruillamona, daje uaido omoi comeciai lloillamona, cue comecina caimare itata. <sup>3</sup>Jaca buena finoñeno, jiaimie afemo jamai omoi illena. Abina ieduamona buena finoñeno. Abina iedoñeno jiaimacimo comeciaina faca: "Naimaci cue baifemo faite". <sup>4</sup>Omoi abimo ite rafuemo omoi comeciaina faca; iadedi jiaimaci abimo ite rafuemo comeciaina jiai faca. <sup>5</sup>Cristo Jesús illa isoi omoi illa. Ie rafuemo comecina janore facade; iadedi naimacina canollena, jiae cominimo ite rafuemo naimie comecina eo facade. <sup>6</sup>Naimedi jaca Jusiñamui; iadedi naimedi Jusiñamui diga danomo jaca illana jitaiñede. Naimie comecina iemo facañede; <sup>7</sup>iadedi iena faínnonocaida, ie Moo ocuica rafuena finollena, iimana naimie jaide. <sup>8</sup>Jamai bue isoidimiena jaide; iadedi ie Moo uaina iinote. Ie Moo jitilla jira, fiodaite. Maraiñede rafue finodimie isoi, cruzmo fiodaite. <sup>9</sup>Ie jira, naimiena iobitallena, Jusiñamui naimie ecimo naimiena abido ote. Nana jiae mameci baifemo faite mamecina jitade. <sup>10</sup>Jesúna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisai naimiemo iobillacinona fecaitimaci. Nana comini naimiemo iena fecaitimaci. Fiodaitino jillobillamona, naimiemo jiae fecaitimaci. <sup>11</sup>Nana lloitimaci: "Jesucristodi cai Nama". Iese naimaci llua jira, cai Moo Jusiñamuina iobitaitimaci.

#### **Maraiñedino comeciaina lligaiñotomoi**

<sup>12</sup>Cue isiruiga amatiaidomoi. Ie Moona Jesucristo iinua jira, cue lluana

nia iinocana omoi jai. Jaie omoi diga cue ia, Cristo rafuena raise iinotomoi. Birui omoi diga iñedicue; iadedi Jusiñamuina omoi iinua jira, naimie jitilla rafuena jaciruoicaida, finocana omoi jai. <sup>13</sup>Ie jitilla rafuena omoi finollena, Jusiñamui omoi comeciaina birui marena itatate. Naimie omoina iena finotaiacade. Naimie mare jitaillicinomona, omoina iena finotaite. <sup>14</sup>Nana omoi finolle rafuemo abi jafueoicaiñeno fino. Uai uaitañeno fino, <sup>15</sup>jiae comini omoiri ñai raillanona, Jusiñamui uruiaina omoi illa jira, omoi comeciai jeanidemona marena omoi i. Maraiñede comini motomo itomoi. Naimaci comeciai jearede. Naimaci comeciaina lligaiñotomoi, naimacimo ite jeacinona uiñotallena. <sup>16</sup>Jesucristo rafuena llocana uitomoi. Iena naimaci iinuamona, bie rafue Jusiñamui dine cominina jaca itatate. Cristo dane billirui omoiri cue iobiacana jira, omoi dine: "Tainona jaie lloticue" cue raillano, Jesucristo rafuena llocana nia omoi jai. <sup>17</sup>Jusiñamuina omoi iinua jira, naimiemo ailluena ucubena caidiñeno fecadomoi. Ie baifemona cue fiodaillana Jusiñamui jiae jitila, iobiticue. Omoi diga jiae caimataitue. <sup>18</sup>Ie muidona caimare iitomoi. Cue diga caimataitomoi.

#### **Pablo Timoteona orede**

<sup>19</sup>Cai Nama Jesús jitila, omoi dine Timoteona raire oretaiacadicue. Cue dine abido naimie bia, omoi rafuena cue fidiano jiae iobiticue. <sup>20</sup>Cue dine jiaino naimie isoi iñede. Dama naimie omoi ite rafuemo comecina facade. <sup>21</sup>Jiaino dani naimacimo ite rafuemo comeciaina facadimaci. Jesucristo rafuemo comeciaina facañedimaci. <sup>22</sup>Timoteodi mareuidimiena uiñotomoi. Cue jito isoide diga, Cristo rafuena lloticoco.

<sup>23</sup>Cárcelmo cue illa rafuedi nia fuiñede. Iena cue uiñollemona, naimie omoi díne raire oretaiacadicue. <sup>24</sup>Cárcelmona cue jino jaillena cai Nama jitaia, omoi díne jiai raire jaiacadicue.

#### Pablo Epafroditona abido orede

<sup>25</sup>Epafroditodi cue ama isoide. Danomo Cristo rafuena lloticoco. Danomo Cristo rafuena riidotococo. Naimiena oredomoi, cuena canollena. Naimiena omoi díne abido oretaiacadicue, <sup>26</sup>omoi díne naimie illemo naimie comeccina facaja jira. Naimie navui duillana omoi fidia jira, naimie uri iñede. <sup>27</sup>Navui niadedi fiodaicacanamona jillode, Jusiñamui naimiena duenalla jira. Naimie fiodaillamona, eo cue duere sefuiñellena, Jusiñamui cuena jiai duenaita. <sup>28</sup>Ie jira Epafroditona eo raire oretaiacadicue, naimiena omoi ciuanona omoi iobillena. Iemei jiai uri iiticue. <sup>29</sup>Cai Nama mamecido naimiena eo caimare feiño. Jiae naimie isoidinona omoi díne ia, naimacina iobita. <sup>30</sup>Cristo facaina navui naimie llofuiamona, omoi facaina cuena canollena, niadedi fiodaite. Omoi facaina naimie cuena canuano, cue díne omoi iñena jira, cue muidona niadedi naimie abina faifitate.

#### Moisés micori llogacinuaido jaidinomona abina rairui

**3** <sup>1</sup>Cue amatiai, omoimo nia lloitice. Cai Namamo omoi duilla muidona, iobi. Omoi bie rafuena dane cue cueia, cuemonia sefuinide. Iena dane omoi cacajamona, omoina canoite. <sup>2</sup>Jeareda rafue finode cominimona abina rairui. Jiconiai isoidimaci. Jillobilena abi diana llofuetimaci; iadedi cuemonadedi jamai ebena tuquica isoidimaci. Naimaci abiaina detatirimaci; iadedi naimaci comecciai nia raise

finoñedimaci. <sup>3</sup>Cai abiaina detatajamona, cai comecciai raise finobiñede. Cai comecciai raise finuamona, Jusiñamui Joreñodi caña Jusiñamuina raise sedataate. Cristo Jesúri iobidicai. Cai jillobilena, cai abiaina detatañedicai. <sup>4</sup>Buena cai finuamona cai illamona jillobidicaidená, cue jilluana raise uiñoticue. Cue cominimona jamai bue isoñedicue. <sup>5</sup>Iena ja ñaiticue. Cue jeiciamona ocho digarui illamona, cue abina degacue. Cue eirue jitodi Israel micori. Benjamín isie imiedicue. Cue cominidi judíuai imacina jira, cue uruenamona judíuai uaido ñaiticue. Fariseo cue imienia jira, Moisés micori llogacinuaido fainonocaiñeno iedo eo jaidicue. <sup>6</sup>Iena eo cue jitailla jira, Cristona iinotinona duere finodicue. Nana Moisés micori llogacinuaido eo raise jaidicue. Iena raise finodicue. <sup>7</sup>Iese jaie iticue. Cue comeci iena: “Mare” raite; iadedi Cristona jai cue iinua jira, birui nana bie rafuedi cuemonia ieñedincinuai. Naie isoide rafue cuemo illamona, cue jeacina mona jilloñedicue. <sup>8</sup>Dane lloticue: Cue Nama Cristo Jesúna cue uiñoiacana jira, jiae rafue cuemonia ieñedincino. Naimiena cue uiñuacinodi nana jiae rafue baifemo faite. Jeacuai isoi jai maraiñena jira, naimie muidona cue jiae illacinona jai sofecaídicue. Iena sofeticue, Cristo dibeimo raise cue illena, <sup>9</sup>naimiemo raise cue duillena. Moisés micori llogacinuaido cue jillamona marebicañedicue; iadedi Cristona cue iinuamona marebicaidicue. Cristona cue iinua muidona, Jusiñamui cuena jai marebicaitate. <sup>10</sup>Cristona raise uiñoiacadicue. Naimie fiodaite; ia iemonia jillode. Naiemona cue comecci marena illena, naimiena jillotate uaina uiñoiacadicue. Naimie rafuena cue lluamona, naimie isoi duere sefuiticue.

Iemona nibai fiodaiticue. <sup>11</sup>Cue fiodaille mei, fiodaillamona naimie isoi cue jilloillemo ocuridicue. Ie jira naimiena uiñocana jaiacadicue.

### Pablo jitailacino

<sup>12</sup>Jusiñamui jitaila isoi, nia raise marebicaiñedicue. Nia fiebidicue; iadedi nia jai jaicadicue, iena illena. Iena cue illena, Cristo Jesús cuena jaie uaidote. <sup>13</sup>Cue amatiai, iena nia ifinedicue; iadedi jaie cue finoca rafuemo comecina facañedicue; iadedi cuemo nia suiñede rafuemo birui eo ocuridicue. <sup>14</sup>Cue risaillinomo iocire jaidicue, ibana cue feiñollena. Ieri Cristo Jesúdo Jusiñamui cuena uaidote, monamo cue illena. <sup>15</sup>Caimona Cristo rafuena raise abina uiñocaidino, bie rafue diga cai comeciai lloicana mai cai jailli. Dajerie jiaforie comecina lloia, Jusiñamui naimacina uanaicinona raise uiñotaite; <sup>16</sup>iadedi caimo jai ite uiñuacinodo mai cai jailli.

### Pablo illa isoi cai illa

<sup>17</sup>Cue amatiai, Cristona cue iinua isoi, naimie rafuedo cue jailla isoi, nana omoi jiai jai. Cai illa isoidinomo omoi eruai, naimaci isoi omoi illena. <sup>18</sup>Jaie omoimo llouidicue. Cue sunaillamona dane lloitice. Ailluena comini Cristo fiodailla rafuena birui jitaiñedimaci. <sup>19</sup>Ja muidomo faifitimaci. Naimaci Jusiñamuidi imaci guille, dani guille ramo naimaci comeciai facaja jira. Jearede rafue finuamona, meiruiñeno naie rafueri iobidimaci. Naimaci ecimo ite ramo comeciaina facadimaci. Naimaci isoi cai iñena. <sup>20</sup>Monamo ite Jusiñamuimo cai jainailla jira, monamona cai Jilloitaraima abido dane billemo ocuridicai. Cai Nama Jesucristodi cai Jilloitaraima. <sup>21</sup>Naimie bia, cai fiodaille abina meidoite, naimie ebirede abi isoi cai illena. Nana ra

naimie anamo itatare uaido caína iese meidoite.

**4** <sup>1</sup>Ie jira Cristo rafuena iinocana nia omoi jai. Cue amatiai, omoina isiruiticue. Omoina cioacadicue. Omoiri iobidicue. Cue lluamona Cristona jaie iinotomoi. Ie rafuedo omoi jailla jira, iobidicue. <sup>2</sup>Evodia raillañaiñomo rafuena lloiacadicue. Síntique raillañaiñomo jiai lloiacadicue. Cai Namamo iaiñuai duilla jira, iaiñuai comeci daje isoi lloillana jitaidicue. Coniño diga icirillana jitaiñedicue. <sup>3</sup>Cue mare nabai, omo jicanoticue, iaiñuaina canollena, coniño diga iaiñuai dane marena ñaillena. Cristo rafuena cue diga llotiaiñuai. Clemente diga llotiaiñuai. Cue diga llofueuidino diga llotiaiñuai. Monamo ite rabenicomono nana naimaci mameciai jai cuega. Jusiñamui diga monamo jaca ii te comini mameciai diese cuega.

### Iobillacino, uri illacino diga

<sup>4</sup>Cai Namamo omoi duilla jira, jaca iobi. Dane lloitice: Iobi. <sup>5</sup>Omoi riiniana nana comini uiñuana jitaidicue. Cai Nama dane abido billirui iairei ite. <sup>6</sup>Ie jira buemo omoi comeciaina facajanona, jaca llicidaiñeno. Naga omoi jitailacino Jusiñamuimo llono. Naimiemo jica. Naimiemo omoi jiiia, naimiemo iobillacina jiai feca. <sup>7</sup>Iemei Jusiñamui omoi comeciaina uri itataite. Omoi comeciai facajacino baifemo omoina uri itataite. Cristo Jesús omoi iinuano, omoi comeciaina eenoite. <sup>8</sup>Cue amatiai, ie muidomo daje rafuena nia lloitice. Uanaicinomo comeciaina faca. Iinogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca.

Nana bie isoide rafuemo comeciaina faca. <sup>9</sup>Nana cuemonia omoi fueoga rafuedo omoi jai. Nana cuemonia omoi feiñoga rafuedo omoi jai. Nana cuemonia omoi cacaja rafuedo omoi jai. Nana cue finoca rafuena omoi ciua rafuedo omoi jai. Iemei omoi comeciaina uri itatajanona, Jusiñamui omoi diga iite.

**Filipomo ite comini  
Pablona eo canodimaci**

<sup>10</sup>Cai Namari iobidicue, diga irui illamona dane cuena omoi comeicia jira. <sup>11</sup>Cuello comeciaina facadomoi; iadedi bu jaca binide, ucubena cue dine atillena. Bumo cue jitaillacina lloñedicue. Janore ra cuemo ia, ailluena ra cuemo ia, caimare jai iticue. Cuemo ite ra diga caimare illana jai uiñoticue. <sup>12</sup>Duere cue illana jiai uiñoticue. Duenino cue illana jiai uiñoticue. Nie isoi cue ia, uri cue illana jai uiñoticue. Cue monia, cue aimetaia, janore ra cuemo ia, ailluena ra cuemo ia, jaca uri iticue. <sup>13</sup>Nie isoide rafue cuemo ia, Cristo cue comeicina ocuiñotaja jira, naga rafuena finocana jaiticue. <sup>14</sup>Cue duere sefuillamo cuena omoi duenallamona, cuena omoi canua jira, cuemonia mare. <sup>15</sup>Omoimo Cristo rafuena nano cue lluamona, cuena canodomoi.

Macedoniamona cue jailla mei, jiae creyentiai cuena canoñedimaci. Dani omoi cuena canodomoi. Iena uiñotomoi. <sup>16</sup>Tesalónicamo nia cue ia, diga icaiño ucube cuemo oredomoi; <sup>17</sup>iadedi omoi ucubena nicidoñedicue; iadedi cuena omoi canuamona, Jusiñamuimona ibana omoi feiñuana jitaidicue. <sup>18</sup>Nana cue jitaille rana jai feiñoticue. Ailluena cuemo ite. Epafroditomona cuemo omoi oretaga rana feiñoticue. Jusiñamuimo fecadomoi isoide. Jusiñamui dibeimo cue majjia jira, mare rana finodomoi. Ie jira Jusiñamui iena gaide, caimare soride rana cai gaia isoi. Naimie iena jiai feiñote. <sup>19</sup>Naimiemo ailluena ite ramona cue Jusiñamui nana omoi jitaille rana fecaite, Cristo Jesúmo cai duilla jira. <sup>20</sup>Cai Moo Jusiñamuimo iobillacino jaca cai fecacabillasa. Iena jitaidicue.

**Fuiduacino**

<sup>21</sup>Cristo Jesús mamecido cue facaina nana creyentiaimo cue uaina llono. Cue diga amatiai imaci uaina jiai oredimaci. <sup>22</sup>Nana benomo ite creyentiai imaci uaina oredimaci. Cai illaima César jofomo maijidino imaci uaina ua oredimaci. <sup>23</sup>Cai Nama Jesucristo omoi comeiciaina jaca caimare itatajana jitaidicue. Mai. Pablodicue.

## COLOSAMO ITE CRISTONA HNOTINOMO PABLO ORETAGA RABE

Colosamo ite creyentiaimo  
Pablo carta orede

**1** <sup>1-2</sup>Colosas railla nairaimo ite  
creyentiai, Pablodicue. <sup>3</sup>Nie  
isoidomoi? Bie carta omoi díne  
oredicue. Timoteo cue diga ite. Coco  
uaina oredicoco. Cristomo naimie jiai  
duilla jira, naimiedi cai amana eruaide.  
Jusiñamui jitalla jira, ie rafue lollenna,  
Jesucristo oretagamiedicue. Naimiemo  
jai duidomoi. Naimiena raise iinocana  
jaidomoi.

Naimaci facaina Pablo jiide

<sup>3</sup>Cai Nama Jesucristo Moodi  
Jusiñamui. Omoi facaina Jusiñamuimo  
coco jiiia, naimiemo iobillacinona jaca  
fecadicoco. <sup>4</sup>Jesucristona nia omoi  
iinuana coco fidia jira, nana  
creyentiaina nia omoi isiruillana coco  
fidia jira, iobillacinona jaca fecadicoco.  
<sup>5</sup>Jusiñamui dine ico omoi illemo omoi  
ocurilla jira, iese icana jaidomoi.  
Jesucristo rafuena nano omoi  
cacajamona, Jusiñamui dine illemo  
ocuridomoi. Omoi jai cacaja rafuedi  
uanaicino. <sup>6</sup>Diga illanomo, diga comini  
ienai jiai jai cacadimaci. Iena iinuamona  
Cristo dibeimo naimaci comeciai jai  
meidoga. Iena iinuamona marcenodo  
jai jaidimaci. Ie isoidomoi. Jusiñamui  
omoina duenaillana jai uiñotomoi.  
Uanaicinona omoi raise uiñuamona,

iedo jaidomoi. Ie marecinona finocana  
jaidomoi. <sup>7</sup>Epafras lluamona naie  
rafuena cacadomoi. Naimiena isiruiticai.  
Jesucristo dibeimo coco isoi, naimie jiai  
llofuiana maijide. Omoi motomo cai  
iñena jira, Cristo dibeimo cai facaina  
naimie raise maijiuide. <sup>8</sup>Naimiemona  
omoimo ite rafuena fididicoco.  
Jusiñamui Joreño omoina canuamona,  
jiae creyentiaina omoi isiruillana  
fididicoco.

<sup>9</sup>Ie jirari omoi facaina jaca jiadicoco.  
Omoi rafuena coco fidiamona,  
Jusiñamuimo omoi finolle rafuena omoi  
eo raise uiñollena jiadicoco. Nana  
naimiemo ite abi uiñuacina omoi eo  
raise uiñuana jitaadicoco. <sup>10</sup>Cai Nama:  
“Mare” omoina raillana jitaadicoco.  
Naga mare rafue omoi finocana jaillana  
jitaadicoco. Jusiñamuina raise omoi  
uiñocana jaillana jitaadicoco. <sup>11</sup>Nie  
isoide ramo omoi jiria, nana naimie siño  
ebirede uaido naimiedi omoi  
comeciaina ocuiñotajana jitaadicoco.  
Iocire omoi illana jitaadicoco. <sup>12</sup>Caina ie  
cominina naimie jai itataja jira, nana ie  
comini diga naimie illanomo ico jaca  
iiticaí. Ie muidona naimiemo  
iobillacinona omoi fecacabillasa.  
<sup>13</sup>Jeacino anamo navui cai illa jira,  
jitiredinomo iticaí isoidicai. Jeacino  
anamona caña Jusiñamui jai  
jillotajamona, caina ie isiruiga Jito  
cominina itata. <sup>14</sup>Naimie Jito muidona

cai jeacinomona jillobidicai. Naimiedi caí jeacinona oni dotajamona, naiena jai feitate. Naiena ico abido llinoñeite.

**Cristo muidona Jusiñamui  
riicaillifue anamo iñedical**

<sup>15</sup>Jusiñamuina cionidicai; iadedi Cristomona naimiena uiñoticai. Jaca bue nia iñenia, Crsito nano jaca ite. <sup>16</sup>Cristo uaido Jusiñamui nana rana finode. Monamo ite rana finode. Eniruemo ite rana finode. Cai ciua rana finode. Cai cioiñena rana finode. Cominina finode. Ie jaienisaina finode. Janabana finode. Dofina finode. Taifena finode. Cristo uaido nana rana finode. Cristona iobitallena, nana rana finode. <sup>17</sup>Nano dofoconi Cristo jaca ite. Naimie uaido naga ra marena icana jaide. <sup>18</sup>Naimiedi nana creyentiai imaci illaima. Fiodaitinomona naimie nano jillodimiena jira, cai fiodaia, ico jiai jilloiticai. Naimiedi naga ra baifemo faite. Naimiedi nana comini baifemo jiai faite. <sup>19</sup>Jusiñamui isoi naimie ite. Jusiñamui jitalla jira, Cristomo nana Jusiñamuimo ite siño uайди ite. <sup>20</sup>Cristo finoca rafue muidona, Jusiñamuidi nana cominina naimie dibeimo itataiacade. Ua nana naimie dibeimo iñedinona naimie dibeimo itataiacade. Cruzmo Cristo fiodailla jira, Cristo diaillamona, Cristona cai iiñoia, Jusiñamui riicaillifue anamo jai iñedical. <sup>21</sup>Jusiñamui dibeimo navui iñedomoi. Naimiena nabailana jitaiñedomoi. Omoi comeciaímona naimiena enoidomoi. Maraiñedicinona finouidomoi; <sup>22</sup>iadedi cruzmo naimie abi illanona, nainomo Cristo fiodailla jira, naimiedi naimie dibeimo omoina itata. Jusiñamuimona mareuidinona omoi illena, omoimo nicino iñellena, Jusiñamui dñe ico omoi ia, naimie dibeimo omoina jai itata. <sup>23</sup>Naimiena

raise iinocana omoi jaia, danomo abido omoi jaiñenia, iese iitomoi. Cristo rafuena navui cacadomoi. Ie jira Cristo dine omoi illemo ocuiridomoi. Diga comini naie rafuena jai cacadimaci. Naie rafuena llocana jaidicue.

**Pablo Cristo rafuena llofuecabite**

<sup>24</sup>Omoimo Cristo rafue cue llua muidona, duere sefuidicue; iadedi iocire nia iticue. Omoi creyentiai facaina Cristo isoi duere sefuidicue. <sup>25</sup>Jusiñamui cuena oretaja jira, naimie rafuena ailluena cominimo eo raise cue llollena, omoi creyentiai facaina llofueticue. <sup>26</sup>Cai jaiagai bie rafuena uiñóñedimaci; iadedi Jusiñamuina iinotinodi iena birui uiñotimaci. <sup>27</sup>Jusiñamui naimacina iena uiñotade. Naie rafuedi eo ebirede. Judúaiñéndinodomoi; iadedi bie rafue omoimo jai duide. Omoi comeciaímo Cristo illana jai uiñoticai. Ie jira naimie ebirede illanomo ico omoi jaca illemo ocuiridomoi. <sup>28</sup>Cristo rafuena llofueticai. Nana cominimo Cristo dibeimo naimaci iacanana lloticai. Cristona naimaci eo raise iiñollena, Cristo isoi naimaci marebicailena, naimaci abi uiñuana lloticai. <sup>29</sup>Ie jira bie rafuena llofuecabiticue. Nana Cristo cuemo iga uaido eo llofuecabiticue.

**2** <sup>1</sup>Omoimo eo comeicina facadicue. Iena omoi uiñuana jitaidicue. Laodicea railla nairaimo jiai eo comeicina facadicue. Diga comini cuena nia cioiñedimaci. Naimacimo jiai eo comeicina facadicue. <sup>2</sup>Omoi comeciaína ocuiñotallena, iese omoimo comeicina facadicue. Dani omoi isiruillamona, ni Jusiñamui rafuena omoi eo raise marena uiñollena, omoimo comeicina facadicue. Naie rafuedi Cristona llote. <sup>3</sup>Cristodi nana rafuena uiñote. Eo abina uiñote. Naimie rafue raise cai uiñollena, naimie caina canocabide. <sup>4</sup>Naimaci

ñaiamona omoina bu jifuei raillanova, biena omoimo lloticue. <sup>5</sup>Omoi dine iñedicue; iadedi cue comecidí omoi dine ite. Omoimo cue comecina facadicue. Danomo omoi marena illa jira, Cristona omoi raise iñocana omoi jailla jira, iobidicue. <sup>6</sup>Cai Nama Jesucristona omoi iñuamona, naimie lloga rafue finocana omoi jai. <sup>7</sup>Naimie dibeimo raise icana omoi jai. Naimena iñocana omoi jai. Omoi lloraini omoina llofuia isoi, naimena iñocana omoi jai. Jusiñamuimo iobillacino eo fecacana omoi jai.

#### **Cristona cai iñuano, cai illa rafue**

<sup>8</sup>Jiae comini naimaci jamai comeciaí facajacínomona omoi jifuei raillanova, abina omoi rairui. Uanaiñedicinomo comeciaína jamai facadimaci. Naimaci einamacimona iena otimaci. Naie rafuedo omoi jaillana jitaídimaci. Cristo rafuedo omoi jaillana jitaiñedimaci.

<sup>9</sup>Ero, Cristomo nana Jusiñamui uai ite. Eniruemo billanona, Cristo iimana jaide. Naimemonia Jusiñamuina uiñoticaí. <sup>10</sup>Cristomo omoi jainailla jira, naimemonia nana omoi jitaillacina oitomoi. Nana comini naimie anamo itimaci. Nana illaicomini naimie anamo itimaci. Taife naimie anamo ite. Janaba naimie anamo ite. <sup>11</sup>Cristomo omoi duilla jira, omoi comeciaímo ite jeacino anamona omoína naimie jillotate. Omoi abiaína detatajamona naimie iena finoñede; iadedi omoi comeciaímo ite jearede iuá meiduamona jillobidomoi. Naimie iena finode. <sup>12</sup>Naimie dibeimo cai illamona, jai bautizagacai. Naimie dibeimo cai illamona, cai jeacino anamo jai iñedical. Cristo fiodaite; iadedi fiodaillamona Jusiñamui naimena jillotate. Jusiñamuina omoi iñua jira, jeacino anamo jai iñedomoi. Naie anamona

Jusiñamui omoina jiai jillotate.

<sup>13</sup>Jeacino anamo jaie omoi illamona, naimemonia fiodaitino isoidomoi. Omoi maraíñede jitaillacino anamo jaie itomoi. Cristomo omoi jai duillamona, omoi jeacinona oni dotajamona, naie anamona Jusiñamui omoina jai jillotate. Cristo dibeimo omoina itatate. <sup>14</sup>Moisés micori jaie llogacinona jaie cai iñoñena jira, Jusiñamui riicailifue anamo iticai; iadedi cruzmo Cristo fiodailla jira, naie llogacino anamo jai iñedical. Ie muidona Jusiñamui caimo ibana oñeite. <sup>15</sup>Cruzmo Cristo fiodailla facaiseconi Taifedi anafefide. Janabadi anafefide. Dofidi anafefide. Dusisiñodi anafefide. Naimie siño rafuena finuamona, Cristo uai naimaci uai baifemo uaillana uiñoticaí.

#### **Cristomo ite rafuedo omoi jai**

<sup>16</sup>Cristo rafuedo omoi jailla jira, omoi guiga rana bu fimaia, naimaci ñaiamo cacarefiñeno. Judíuai einamací rafue dine omoi jaiñenia: “Omoi mareiñedomoi” bu raia, naimaci ñaiamo cacarefiñeno. <sup>17</sup>Naie isoide rafuedo jaie jaidicai; iadedi ideo birui jaiñedical. Cristo rafuedo birui jaidicai. <sup>18</sup>Dajerie llofueraini jiae rafuedo jaidimaci. “Abina ideoñeno” raitimaci. “Jusiñamui jaienisaina seda” raitimaci. Nicairillacino jaidimaci. Naimaci isoi omoi jaiñenia: “Maraiñedomoi” omoina naimaci raia, naimaci ñaiamo cacarefiñeno. Naimaci illa isoi iñeno. Naimaci lluacino anamo iñeno. Naimaci lluacino omoi jaia, omoi jitaillanomo Cristo dine riñeitomoi. Naimaci comeciaí jearena jira, jamai buena uiñoñenano abina iedotimaci. <sup>19</sup>Cristo rafuedo jaiñedimaci. Cristomo cai duilla jira, naimie caina ocuicabide. Naimemonia cai illena Jusiñamui jitailla isoi, fueoticai. Jusiñamui jitailla isoi,

naimie dibeimo cai raise illena,  
naimiena cai raise iiollenna,  
naimiemona fueoticaí. Cristomo cai  
duilla jira, dani coninina nabaidicai.  
<sup>20</sup>Cristo fiodaillamona, jiae rafue  
anamo jai iñedicaí. Naimiena  
iinoñedino rafue anamo jai iñedicaí;  
iadedi naie rafuedo nia jaidomoi.  
Damierie llofuerainidí diga rana  
fimaidimaci. <sup>21</sup>“Biena jetañeno. Biena  
guiñeno” raitimaci. <sup>22</sup>Ero, naie fimaica  
guille ra ite, cai guillena. Iena cai guilla  
mei, jai buena iñede. Naimaci  
fimaiduacino cominimona otimaci.  
Jusiñamuimona oñedimaci. <sup>23</sup>Naie  
fimaiduacinodi eo abi uiñuacino isoide.  
Naiedo bu jaia: “Jusiñamuina eo raise  
sedadicai” raitimaci. “Abi iedoñedicaí.  
Cai abina isiruiñedicaí” raitimaci; iadedi  
naie isoide lluacinodo bu jaia, naimie  
comecimo ite jeacynomona jilloñede.  
Naimiedi jeacino finocana nia jaide.

**3** <sup>1</sup>Jeacino anamo jaie itomoi.  
**3** Fiodaillamona Cristo jillua jira,  
jeacino anamona jai jillobidomoi. Ie jira  
Cristomo ite rafuedo omoi jai. Monamo  
Jusiñamui ecimo Cristo ite. Jusiñamui  
naimieri iobilla jira, naimie ecimo ite.  
<sup>2</sup>Cristomo ite rafuelo omoi comeciaína  
facacana jai. Bene ite maraiñede  
rafuelo omoi comeciaína facañoño.  
<sup>3</sup>Bene ite maraiñede rafue anamo jai  
iñedomoi; iadedi Jusiñamui ecimo  
naimie jai illa jira, Cristomo omoi duilla  
jira, naimie finoacaga rafuela omoi  
finollena, omoina naimie canoite.  
<sup>4</sup>Cristomo jai duidomoi. Naimie abido  
bia, naimie bairenia, naimie cominina  
omoi illa jira, naimie diga jaca iitomoi.

#### Omoi comeciaímo ite jeacinsona fainonocai

<sup>5</sup>Cristomo omoi jai duilla jira, omoi  
comeciaímo ite jeacinsona fainonocai.  
Omoi aiñede riño diga iñeno. Omoi

iñinede iima diga iñeno. Jeare finoca  
rafuelo omoi comeciaína facañoño.  
Omoi maraiñede jitailacínodo omoi  
jaiñeno. Rana nicidoñeno. Rana omoi  
nicidoia, Jusiñamuina raise  
sedañedomoi; iadedi naimie ifomo rana  
sedadomoi. <sup>6</sup>Naie isoidicinona comini  
finua jira, naimiena naimaci iinoñena  
jira, Jusiñamuidí naimacina duere  
finoite. <sup>7</sup>Naie isoide rafuedo jaie  
jaidomoi. <sup>8</sup>Nana bie isoide rafuedo  
jaiñeno. Iciriñeno. Omoi ecimo itinona  
jeare finoñeno. Jiae cominina jeare  
ñaiñeno. Jearede rafuela ñaiñeno.  
<sup>9</sup>Tainona lloñeno. Omoi comeciaímo ite  
jeacino anamo jaie itomoi. Naicino  
anamo omoi jai iñena jira, naicinodo  
jaiñeno; <sup>10</sup>iadedi jiae rafuedo birui  
jaidomoi. Bie rafue omoi comeciaína  
marena itatate. Omoi comeciaímo bie  
rafue itatacana jaillamona, Jusiñamui  
rafuela uiñocana jaidomoi. Naimie isoi  
omoi illena, naimie omoi comeciaína  
iese itatate. <sup>11</sup>Cristo rafuedo birui omoi  
jailla jira, Jusiñamuimona nana  
creyentiaidomoidí daje isoidomoi.  
Dajerie judúuai itinodomoi. Dajerie  
judúuaiñedinodomoi. Dajerie judúuai isoi  
abina detatatinodomoi. Dajerie abina  
detatañedinodomoi. Dajerie abina  
uiñotinodomoi. Dajerie abina  
uiñoñedinodomoi. Dajerie patrón anamo  
itinodomoi. Dajerie patrón anamo  
iñedinodomoi. Cominimona iese itomoi;  
iadedi Jusiñamuimona daje isoidomoi.  
Cristo dibeimo omoi illa jira, jai  
amatiaína eruaidomoi. Cristomo omoi  
duillacino jiae rafue baifemo faite.  
<sup>12</sup>Jusiñamui omoina fetode. Omoi  
comeciaína maretate. Omoina isiruite. Ie  
jira jiae cominina duenai. Jiae  
cominina cano. Abi iedoñeno. Abi  
biríñeno. Iciriñeno. <sup>13</sup>Dani omoi ibana  
oñeno; iadedi bu diga omoi icirillafue ia,  
naiena raise fino. Iena raise finuanona,

abido ietañeno. Iena feita. Ie mei naimie diga marena ñaino. Ero, cai Nama omoi jeacina oni dotade. Ie muidona omoi ecimo itino diga icirillafue omoi finoia, iena feita.<sup>14</sup> Coninina omoi isiruicana jai. Isiruillacino nana jiae lluacino baifemo faite. Coninina omoi isiruia, danomo marena iitomoi.<sup>15</sup> Jusiñamui omoina fetua jira, Cristomo daajena jai duidomoi. Cristo omoi comeciaina uri itatajamona, nana comini diga uri i. Omoi comeciaiuri illamona, Jusiñamuimo iobillacinona feca.<sup>16</sup> Cristo rafuena omoi eo iinuana jitaidicue. Naie rafuena coninimo omoi llofue. Iena raise uiñollena, coninina omoi cano. Nie isoide Jusiñamui rafuena omoi roia, Jusiñamuimo iobillacinona fecajanona, nana omoi comeciaimona iocire rono. David micori cuega salmos omoi roia, Jusiñamui Joreño omoina birui cuetataga ruana omoi roia, omoi comeciaimona iocire rono.<sup>17</sup> Buena omoi lloia, buena omoi majiiia, cai Namamo omoi comeciaaina facajano, iena fino. Cai Nama muidona, cai Moo Jusiñamuimo iobillacinona jiae feca.

#### Coniniri creyentiai illa rafue

<sup>18</sup> Inirediñaiñuai, omoimo rafuena lloiacadicue. Cai Namamo omoi jainaiailla jira, naimie jitaila jira, omoi iniñiai anamo raise omoi i. Naimaci uaina raise iino.

<sup>19</sup> Airedino, omoimo jiae lloiacadicue. Omoi ainiaina isirui. Naiñaiñuai diga icircabiñeno. Naiñaiñuaimo riire lloñeno.

<sup>20</sup> Uruiai, omoimo rafuena lloiacadicue. Nana omoi mootiai uaina iino. Nana omoi eiñiai uaina iino. Iena omoi iinoia, cai Nama eo iobite.

<sup>21</sup> Mootiai, omoi uruiaina jamai iciñeno. Naimacina omoi jamai iciia,

comecina facaitimaci: “¿Niese cai mootiai uaina raise iinoitcai? Iena eo sefuiruitcai”. Ie muidona omoi uaina raise iinoñeitimaci.

<sup>22</sup> Patrones anamo itino, nana omoi patrones ocuica uaina iino. Omoimo naimaci eruaiñenia, omoi patrones facaina raise maiji. Cai Namana omoi iinua jira, cai Namana raise omoi iobitaiacana jira, omoi patrones facaina raise maiji.<sup>23</sup> Buena omoi majiiia, omoi comeciaimona maiji. Dani comini facaina majijiñedomo; iadedi cai Nama facaina majijidomo. Ie jira raise maiji.<sup>24</sup> Naimie jai llua isoi, cai Namamona ibana ico feiñoitomoi. Cai Nama Cristo facaina omoi majijidomo;<sup>25</sup> iadedi Jusiñamui raise majijidedinona duere finoite. Jusiñamuimona naga majijidimie ie majia diese feiñote.

**4** <sup>1</sup> Patrones, omoimo lloitice. Naimaci omoi anamo illa jira, omoi diga majjidinona raise iba. Naimacina jifueñeno. Omoi Nama monamo illamona, omoimo eruaidé. Naimie anamo omoi illa jira, omoi anamo itinona marena raise fino.

<sup>2</sup> Jusiñamui diga ñaicana jai; iadedi omoi comeciaaina facajanona omoi jii. Naimiemo iobillacinona feca.<sup>3</sup> Cristo rafuena llocana cue jailla jira, cárcelmo birui iticue; iadedi naie rafue nia lloiacadicue. Jusiñamui nana comini Cristo dibeimo jai jitailana lloiacadicue. Ie jira cai facaina omoi jii. Jusiñamuidi comini comeciaaina jetajana omoi jii. Naimaci comeciaaina Jusiñamui jetajamona, naimacimo naie rafuena lloiacadicue.<sup>4</sup> Naimaci iena raise cacaillena, naie rafuena raise lloiacadicue.<sup>5</sup> Creyentiaiñedino motomo omoi ia, marena omoi i. Naimacimo Cristo rafuena llono.<sup>6</sup> Bu diga omoi ñaia, caimare ñaíno. Nie isoide Cristo rafuena omoimo bu jicaneria, raise marena fairio.

### Damierie ie uaina orede

<sup>7</sup>Tíquicodi nana cuemo ite rafuena omoimo lloite. Naimiena isiruiticai. Naimiedi Cristona eo iinote. Cristo rafuena eo raise llocabite. Cai Nama facaina cue diga eo maijide. <sup>8</sup>Cai illana omoi uiñollena, omoi dine naimiena oredicue. Omoi comeciaina ocuiñotaite. <sup>9</sup>Naimie diga Onésimo jiai oredicue. Naimiedi creyente. Cristo rafuedo raise jaide. Naimiena jiai isiruiticai. Naimiedi omoi comini imie. Nana bene jai suide rafuena omoimo lloitiaaimaiai.

<sup>10</sup>Cárcelmo Aristarco cue diga ite. Omoimo ie uaina orede. Marcos ie uai jiai orede. Naimiedi Bernabé ama. Omoimo naimiena navui lloticue. Omoi dine naimie ria, naimiena feiño. <sup>11</sup>Jesús ie uai jiai orede. Naimie mameci jiaicidi Justo. Judíuaimona dani naimaci cuena canode. “Naimaci jeacinona naimaci fainonocaillamona, Jusiñamui ie dibeimo cominina jai jitaide” naimaci lluamona, cue comeccina ocuiñotadimaci. <sup>12</sup>Epafras ie uaina jiai orede. Naimie omoi comini imie. Jesucristo dibeimo naimie maijide.

Jusiñamui diga naimie ñaia, omoi facaina jaca duere jiicabide. Jusiñamui rafuedo raise omoi jaillena, ie omoimo raise itabillena, Jusiñamui jitaillacinona omoi raise finollena, omoi facaina jiicabide. <sup>13</sup>Omoi facaina naimie eo maijide. Laodiceamo itino facaina eo maijide. Hierápolismo itino facaina jiai eo maijide. <sup>14</sup>Cai médico Lucas ie uaina jiai orede. Naimiena isiruiticai. Demas ie uaina jiai orede. <sup>15</sup>Laodiceamo ite creyentiaimo cue uaina cue oretajana llono. Ninfasmo cue uaina cue oretajana llono. Naiñaiño jofomo oficabide creyentiaimo cue uaina cue oretajana llono. <sup>16</sup>Bie cartana omoi facaja mei, Laodiceamo ite creyentiaina bie cartana facata. Naimacimo jiae cartana jiai oredicue. Iena omoi jiai faca.

<sup>17</sup>Arquipomo llono: “Cai Nama fetocamedio. Naimie rafuena llocana raise o jai” llono. <sup>18</sup>Cue uaina omoimo oredicue. Dama bie uaina cueticue; iadedi nana bie carta cuemonia illana uiñotomoi. Cárcelmo cue illana cue facaina feitañeno omoi jii. Jusiñamui omoina duenaoillas. Mai. Cue cuega rafue jai fuite. Pablodicue.

# TESALÓNICAMO ITE CRISTONA HNOTINOMO PABLO NANO ORETAGA RABE

## Uaiduacino

**1** <sup>1</sup>Tesalónicamo ite creyentiai,  
omoimo cartana cueticue.  
Pablodicue. ¿Nigacino? ¿Nie isoidomoi?  
Silvano cue diga ite. Timoteo cue diga  
jiai ite. Iaimaiai uaina orediaaimaiai.  
Cai Moo Jusiñamuimo, cai Nama  
Jesucristomo jai jaínaiaidomoi. Ie jira  
iaimaiiai omoi duenaillana uiñocana  
omoi jaillana jitaidicai. Iaimaiai omoi  
uri itatajana omoi uiñocana jaillana jiai  
jitaidicai.

## Tesalónicamo ite creyentiai Jusiñamui uaina raise iinotimaci

<sup>2</sup>Jusiñamuimo cai jiiia, naimiemo  
omoi facaina iobillana jaca  
fecacabidicai. Omoi facaina jiicabidicai.  
<sup>3</sup>Cai Moo Jusiñamuimo cai jiiia, omoina  
comeciticai. Jusiñamuina iinotomoi.  
Naimiena isiruitomoi. Ie jira naimie  
facaina duere majidomoi. Cai Nama  
Jesucristo billemo eo ocuridomoi. Iese  
omoina comeciticai. <sup>4</sup>Omoina naimie  
isiruillamona, Jusiñamui omoina  
fetuana uiñoticai. <sup>5</sup>Jamai cai uaido  
Cristo rafuena omoina llofueñedicai; ia  
siño uaido iena llofueticai. Jusiñamui  
Joreño uaido iena llofueticai. Naie  
rafuena iinuanona llofueticai. Omoi  
diga cai jaie ia, nie isoi cai illana raise  
uiñotomoi. <sup>6</sup>Cai illa isoi ificaidomoi. Cai  
Nama illa isoi ificaidomoi. Lemona

duere sefuidomoi; ia Jusiñamui Joreño  
omoina iocire itatajamona, Jusiñamui  
uaina iocire feiñotomoi. <sup>7</sup>Ie jira nana  
Macedoniammo ite creyentiai omoimona  
fueotimaci. Nana Acayamo ite  
creyentiai omoimona jiai fueotimaci.  
<sup>8</sup>Omoimona Macedoniammo ite comini  
cai Nama uaina fididimaci. Acayamo ite  
comini jiai fididimaci. Ailluena nairaiai  
Jusiñamuina omoi iinuana jai  
fididimaci. Ie jira naimacimo Cristo  
rafuena omoi iinuana jai lloñedicai.  
<sup>9-10</sup>Omoi dine nano cai ria, caimare  
caina feiñotomoi. Cristo rafuena omoi  
cacajamona, jiraraina sedajana  
fañonocaída, cajede nanoca  
Jusiñamuina jai sedadomoi. Jusiñamui  
Jito abido billemo birui jiai  
ocuiridomoi. Iese jiae creyentiai  
omoina birui ñaicabitimaci. Cristo  
fiodaillamona Jusiñamui naimiena jaie  
jillotate. Naimiena cai iinuamona,  
Cristo Jusiñamui riicallifuemona caína  
jai jillobitade.

## Pablo Tesalónicamo llofuria rafue

**2** <sup>1</sup>Cue nabaiñiai, omoi diga jaie cai  
ia, tainomo jaiñedicai. <sup>2</sup>Omoi dine  
cai nia riñenia, Filipomo iticai.  
Nainomo itinodi caina jeare finodimaci.  
Iena jai uiñotomoi. Caina jeare  
finodimaci; ia cai comecina Jusiñamui  
ocuiñotajamona, Jusiñamui rafuena  
omoina llofueticai. Ailluena comini iena

jitaiñedimaci; ia iena llofueticai.  
<sup>3</sup>Uanaiñediginona jaca llofueñedicai.  
 Jearedicinona jaca llofueñedicai.  
 Jifuerillacinona jaca llofueñedicai;  
<sup>4</sup>iadedi Jusiñamui uiñoganodicai. Ie jira  
 caina naimie oretajamona, ie rafuena  
 llofueticai. Cominina iobitallena  
 llofueñedicai; iadedi Jusiñamuina  
 iobitallena llofueticai, Jusiñamui cai  
 comecina raise uiñua jira. <sup>5</sup>Cai  
 llofuiacino diga omoina bifueñedicai.  
 Omoimona ucube ollena, iese  
 llofueñedicai. <sup>6</sup>Cominimona  
 iobillacinona jitaiñedicai. Omoimona  
 jitaiñedicai. Jiañomona jiai jitaiñedicai;  
 iadedi Cristo oretaganona cai illa jira,  
 cai jitaia, omoimona iobillacinona  
 jicaredicai. <sup>7</sup>Uruiaína raise sedaraíño  
 isoi, fecuise omoina llofueticai.  
<sup>8</sup>Jusiñamui rafuena omoi raise  
 uiñollena, omoina cai eo isiruillamona,  
 niadeti omoi facaina fiodaiacadicai.  
<sup>9</sup>Omoi motomo cai ucube ollena, jiaie  
 rana maijuidicai. Omoina cai duere  
 finoñellena, nagarui iese maijuidicai.  
 Iena raise uiñotomoi. Iese Jusiñamui  
 rafuena omoina llofueticai.  
<sup>10</sup>Omoi motomo cai illana raise  
 uiñotomoi. Jusiñamui jitaila isoi,  
 nainomo iticai. Maraiñede rafuena  
 finoñedicai. Mare rafuedo jaca jaidicai.  
 Iena uiñotomoi. Jusiñamui iena jiai  
 uiñote. <sup>11</sup>Omoi uruiai omoi llofuiia isoi,  
 omoina llofueticai. Omoimo diga icaíño  
 Jusiñamui rafuena llofueticai.  
<sup>12</sup>Jusiñamui jitailacínona omoi  
 finollena, iena llofueuidicai. Monamo ie  
 cominina sedajanomo omoi jaca illena,  
 naimie omoina jai fetode. Nainomo ie  
 siño uai anamo jaca iitomoi.  
<sup>13</sup>Jusiñamuimo cai jiia, omoi facaina  
 iobillacinona fecacabidicai. Jusiñamui  
 rafuena caimona omoi jaie cacajamona,  
 iena raise feiñotomoi. Cominimona cai  
 oga rafue isoi feiñonédomoi; ia

Jusiñamuimona cai oga rafuena  
 feiñotomoi. Cai lloga rafue omoi  
 comeciai iuai meidocana jaide. Ie jira  
 Jusiñamuimo iobillacinona  
 fecacabidicai. <sup>14</sup>Judeamo ite creyentiai  
 isoi duere sefuidomoi. Omoi  
 cominimona duere sefuidomoi. Naimaci  
 judíuaí cominimona duere sefuidimaci.  
<sup>15</sup>Judíuaí comini cai Nama Jesúna jaie  
 meineticaci. Jusiñamui facaina lloraini  
 micoríaina jiai jaie meineticaci. Caina  
 jiai birui duere finodimaci. Jusiñamuina  
 iobitañedimaci. Jusiñamui rafue  
 dibeimo jiai iñedimaci.  
<sup>16</sup>Judíuaíñedinomo Cristo rafuena cai  
 lluana jitaiñedimaci. Jusiñamui  
 judíuaíñedinona jillotajana  
 jitaiñedimaci. Iese jeacino finocana nia  
 jaidimaci; ia ja muidomo Jusiñamui  
 riicaillifue anamo jai itímaci.

### Tesalónica comini dine Pablo abido jaiacade

<sup>17</sup>Omoimona cai billa mei, nigarui  
 illanona, omoina dane cioacadicai.  
 Omoina cioiñedicai; iadedi omoimo  
 comecina facadicai. Omoi dine eo  
 jaiacadicai. <sup>18</sup>Ua eo jaiacadicue. Diga  
 icaíño jaiacadicai; ia Taife cai jaillana  
 jitaiñede. <sup>19-20</sup>Caina omoi jaca iobitaja  
 jira, omoina cioacadicai. Jesús abido  
 bia, naie facaise omoiri eo iobiticai.  
 Iemo ocuridicai. Caina iocire  
 itataitomoi. Omoi muidona iobiticai.

**3** <sup>1</sup>Cai comeci jarire illamona, Atenas  
 railla nairaimo fiebidicoco; <sup>2</sup>iadedi  
 Timoteo omoi dine oredicoco. Naimiedi  
 coco ama isoide. Cristo rafuena cai diga  
 Jusiñamui facaina llofuecabite. Cristo  
 rafuena omoi raise iñotallena, omoi  
 comeciaña ocuiñotallena, naimien  
 oretaticoco. <sup>3</sup>Duere sefuillamona bu bie  
 uai sefuiruillana jitaiñedicai.  
 Creyentena cai illamona, jaca duere cai  
 sefuillana uiñotomoi. <sup>4</sup>Omoi motomo

jaie cai ia, iena llofueticai. Omoi birui duere sefuillamona cai lluana raise uiñotomoi. <sup>5</sup>Cue comeci jarire illamona, Cristona omoi iiuana raise uiñoiacadicue. Omoina Taife ramo faicabillamona, tainomo cai maijiana jacinaiticai. Ie jira Timoteona oredicoco. <sup>6</sup>Omoimona Timoteo jai abido billamona, omoie mare rafuena cocomo llote. Cristona iinocana jaidomoi naimie llote. Coninina isiruitomoi. Cocona caimare comecitomoi. Omoina coco cioacana isoi, cocona dane cioacadomoi naimie llote. <sup>7</sup>Birui duere sefuidicai; iadedi omoie rafuena cai cacajano, cai comeci marena ite. <sup>8</sup>Cristo rafuena iinocana omoi jaillana jai cai uiñuamona, cai comeci marena ite. <sup>9</sup>Omoiri eo caimare jai iticai. Ie jira Jusiñamuimo iobillacinona eo feacaacadicai. <sup>10</sup>Omoina dane cai ciollena, naimiemo nagarui jiñicai. Naimiena nia omoi raise iiñoñenia, omoina naimiena raise iinotaacadicai. Ie jira omoina cioacadicai. <sup>11</sup>Iese omoi facaina, cai Moo Jusiñamuimo, cai Nama Jesúmo jiicabidicai. Omoi dine caína naimie oretajana jiñicai. <sup>12</sup>Cai Nama coninina isiruitacana omoi jaillana jitaidicai. Caina omoi isiruilla isoi, nana jiañona omoi isiruillana jiñicai. <sup>13</sup>Omoi comeciai ocuiñollena, omoi comeciai Jusiñamu jitilla isoi, marena illena jiñicai. Nana ie comini diga cai Nama Jesús abido bia, Jusiñamu dine omoi ia, omoi comeciai marena illena jitaidicai. Iese omoi facaina jiicabidicai.

#### Naimaci marena illena llofueté

**4** <sup>1</sup>Jiae rafuena lloiacadicue. Cai Nama Jesúmo omoi jai duilla jira, Jusiñamu jitilla isoi omoi illana jitaidicai. Iese birui itomoi; ia nagarui iese omoi illana jitaidicai. Ie jira cai llua

isoí, omoi jai. <sup>2</sup>Cai Nama Jesús jitilla jira, navui iena llofueticai. <sup>3</sup>Jusíñamu jitilla isoi omoi marena illena, omoi aiñede riño diga iñeno. <sup>4</sup>Nagamiiai riñona ie aina otena, mare; ia maraíñede rafuena finoñeno. Nagamiiai dajena daje riño uana Jusiñamu jitade. Dañaiño diga iaimaiai jionaillena jiai jitade. <sup>5</sup>Naimiena iiñoñedino isoi, omoi aí uana jitaiñede. Naiñaiñua abina jamai cioillena riñona otimaci. <sup>6</sup>Jiae creyentemo jeacinona finoñeno. Naimie aina jamai aifiedoñeno. Naie isoide rafuena bu finoia, cai Nama naimiena duere finoite. Iena navui omoimo lloticue.

<sup>7</sup>Jearede rafuena cai finollena, Jusiñamuidi caína fetoñede; iadedi mare rafuena cai finollena caína fetode. <sup>8</sup>Bie llofuiacino nie creyente iiñoñenia, cue llofuiacina jamaide; ia Jusiñamu Joreño naimiemo illamona, Jusiñamu llofuiacina jiai jamaide. <sup>9</sup>Jiae creyentiaina omoi isiruillana omoimo eo lloñeiticue. Jusiñamu omoina coninina isiruillana jai uiñotade. <sup>10</sup>Nana Macedoniamo ite creyentiaina jai isiruitomoi; iade nia isiruicana omoi jai. <sup>11</sup>Uri omoi i. Dani omoimo ite rafuena omoi uiuicai. Jiañonomona ucubena jicañeno; ia omoi ucube ollena, omoi onollis diga rairuioicaiñeno omoi maijí. <sup>12</sup>Ie mei omoi jitilla ra iite. Lemona Cristona iiñoñedino omoina jiai mameriñeitimaci.

#### Jesucristo dane abido billena llote

<sup>13</sup>Omoi raise uiñollena, daje rafuena lloiticue. Omoi creyentiaimona dajerie jai fiadaitimaci. Jesúna iiñoñedinomona bu fiodaia, fiodaillamona jilluamo naimaci ocuririñena jira, sunaitimaci; iadedi naimaci sunailla isoi, omoi illana jitaiñedicue. Fiodaillamona jilluamo jai ocuridomoi. <sup>14</sup>Jesús fiodaillamona

naimie jilluana iinotifcaí. Ie jira Jesús abido billa facaise, jai fiodaite creyentiaina Jusiñamui jilloitajana jíai jai iinotifcaí. <sup>15</sup>Cai Nama llofuia isoi, bie rafuena lloitice. Jesús abido bia, jai fiodaite creyentiai, nia fiodaiñede creyentiai diga, daacaiño naimie díne a jaíticai. <sup>16</sup>Cai Nama Jesús abido bia, Jusiñamui díne naimie billanona, caina jidaite. Ie jaeníci caina uaidoite. Jusiñamui ie trompeta daacaiño jíai fiite. Jai fiodaitino nano jilloitimaci. <sup>17</sup>Iemei nia fiodaiñedinodi como jillodino diga uillie motomo naimiemo dafaifllena, Jesús caina uite. Iemei naimie diga jaca iiticai. <sup>18</sup>Bie llofuiacino diga conini comeciaína omoi ocuiño.

**5** <sup>1</sup>Bie rafue suillruina uiñóñedicaí. Bie rafuena omoi jai uiñua jira, iena dane eo cueñeitice. <sup>2</sup>Cai Nama abido billana jai uiñotomoi. Fiiredimie naiona ebena billa isoi, naimie abido biite. <sup>3</sup>“Uri iticai. Marena iticai” Cristona iiñoñedino raia, naie facaise naimacimo duere sefuillfue suite. Urue riño jigicomos casilla isoi, ebena suite. Naiemona jilloñeitimaci. <sup>4</sup>Naie facaise suia, Cristo billena omoi jai uiñuamona, fiiredimie naiona ebena billa isoi, jacinaiñetomoi. Cristona iiñoñedino isoi, iñedomoi. <sup>5</sup>Uanaicinona omoi jai uiñuamona, Cristo ie cominina jai jaidomoi. Jeacino anamo omoi jai iñena jira, Cristona iiñoñedino dibeimo jai duiñedomoi. <sup>6</sup>Ie jira abina sedacana omoi jai. Abina rairuoicaida omoi jai. Jifaidino isoi ebena omoi jaiñeno. <sup>7</sup>Cristona iiñoñedino abina sedacana jaiñedimaci. Rairuoicaida ebena jaidimaci. <sup>8</sup>Cristo ie cominina jai cai illa jira, ebena cai jaiñena. Imaci abina riidollena, soldaduai jogobe icodi ite. Imaci ifogi icodi jíai ite. Ie isoide. Cai comeciaína eenollena, Cristona iiñocana mai cai jailli. Jíaino isiruicana mai cai

jailli. Jusiñamui díne ico cai illemo ocuircana mai cai jailli. <sup>9</sup>Caina duere finollena, Jusiñamui caina fetoñede; iadedi cai Nama Jesucristo finoca rafue muidona, duere finollemona cai jilloillena, caina fetode. <sup>10</sup>Cristo cai facaina jai fiodaite. Ie jira birui cai fiodaia, naimie bille facaise nia fiodaiñedinona cai ie, naimie diga jaca iiticai. <sup>11</sup>Ie jira coninina ocuiñotacana omoi jai. Cristo dibeimo coninina itatacana omoi jai. Iese birui jaidomoi; ia nia iese omoi jai.

### Omoi creyentiaina llofueraini uaina iiño

<sup>12</sup>Cue amatiai, jiaie rafuena lloitice. Omoi creyentiaina llofueraini uaina iiño. Cristo jitalla jira, omoi afemo itimaci. Cristo dibeimo omoina raise itatallena, omoi facaina llofuetimaci. <sup>13</sup>Omoina naimaci canua jira, naimacina isiruillanona, naimaci uaina raise omoi iiño. Coniniri uri omoi i. <sup>14</sup>Omoi motomona majjiacaiñedinona imaci majjillesa ocui. Duere sefuillamona jai comechina ocuiñota. Raise iiñollena, Cristona nia raise iiñoñedinona jíai cano. Fecuisse naimacina ui-uillanona, naimacina cano. <sup>15</sup>Omoina jíaimie duere finoia, ibana oñeno; iadedi naimiemo mare rafuena fino. Nana cominimo mare rafuena fino. <sup>16</sup>Nie isoide rafue omoimo ia, caímare omoi i. <sup>17</sup>Jusiñamui nagarui jíi-jíi. <sup>18</sup>Nie isoide rafue omoimo ia, Jsuiñemui jitalla jira, naimiemo iobillacina feca. Jesucristomona Jusiñamui jitallacina jai uiñoticai. <sup>19</sup>Jusiñamui Joreñona jamaiñeno. <sup>20</sup>Jusiñamui Joreño uaido lloraini llofuiiana jamaiñeno; <sup>21</sup>iadedi Jusiñamui Joreño uaido naimaci llofuiiana facaci. Mare rafuedo jaca

omoi jai. <sup>22</sup>Nana maraiñede rafuemona eneno oni omoi i. Naie isoide rafuena omoi abimo omoi oñeno. <sup>23</sup>Ie jira Jusiñamuimo omoi facaina jiiiticue. Naimie omoina jai uri itatate. Naimie omoina nagarui marena itatacana jaillana jitaidicue. Iese omoi jaia, cai Nama Jesucristo dane abido bille facaise, naimie jitaila isoi, omoi

comeciai marena iite. <sup>24</sup>Jusiñamuidi iinogamiена jira, iece omoina finoite.

<sup>25</sup>Cue amatiai, Jusiñamuimo cai facaina omoi jiicabi. <sup>26</sup>Cue facaido nana creyentiaina caimare uaido. <sup>27</sup>Cai Namamo cai duilla jira, naimie jitaila jira, bie cartana nana creyentiai uicomofaca. <sup>28</sup>Cai Nama Jesucristo omoina duenaillasa. Mai. Pablodicue.

# TESALÓNICAMO ITE CRISTONA HNOTINOMO PABLO IE EMODOMO ORETAGA RABE

## Uaiduacino

**1** <sup>1-2</sup>Tesalónicamo ite creyentiai,  
omoimo cartana cueticue.  
Pablodicue. ¿Nigacino? ¿Nie isoidomoi?  
Silvano cue diga ite. Timoteo cue diga  
jiai ite. Iaimaiai uaina orediaimaiai.  
Cai Moo Jusiñamuimo, cai Nama  
Jesucristomo jai jaínaiaidomoi. Ie jira  
iaimaiiai omoi duenaillana uiñocana  
omoi jaillana jitaídica. Iaimaiai omoi  
uri itatajana omoi uiñocana jaillana jiai  
jitaídica.

## Cristo dane abido bia, naimiena iinoñedinona duere finoite

<sup>3</sup>Jusiñamuimo cai jiiia, omoi facaina  
naimie iobillacina feacabidicai.  
Cristona iinocana raise jaidomoi.  
Coniniri isiruicana raise jaidomoi. <sup>4</sup>Ie  
jira marena omoi illana jiae creyentiai  
illanomo llocana uiticai. Duere  
sefuidomoi; iadedi danomo abido  
jaínedomoi. Cristona iinocana jaidomoi.  
Iena llocana uiticai. <sup>5</sup>Jiañomona birui  
duere sefuidomoi; ia iinocana jaidomoi.  
Iemonia Jusiñamui omoi facaina illana  
uiñoticai. Omoi duere sefuillamona,  
fueocana jaidomoi. Iemonia naimie  
jitailla isoi, ja muidomo monamo ie  
cominina sedajanomo iitomoi.

<sup>6</sup>Jusiñamui omoina duere finodinona  
ico duere finoite. Omoi facaina ibana  
oite. Iese naimie finoia, naimiemona

mare. <sup>7</sup>Cai Nama Jesús abido bia, duere  
sefuillamona jilloiticai. Monamona ie  
siño jaienisaí diga biite. Irai boua isoi  
ana biitimaci. <sup>8</sup>Jusiñamuina  
iinoñedinona díese duere finoitimaci.  
Cai Nama Jesús rafuena naimaci  
iinoñena jira, naimacina duere  
finoitimaci. <sup>9</sup>Iinoñena jira, jaca  
faifitimaci. Jaca llegí cacaitimaci.  
Jusiñamui illanomo jaca iñeitimaci. Ie  
ebirede uaina uiñoneitimaci. <sup>10</sup>Cristo  
bille facaise naimie iobillacina feacabidicai.  
Naimieri nana naimiena  
iinotino rajjicaitimaci. Omoimo cai  
lloga rafuena omoi jai iinua jira, iese  
iitomoi.

<sup>11</sup>Ie jira omoi facaina jiicabidicai.  
Naimie jitaila isoi, omoina naimie  
marena itatajana jiidicai. Omoina  
naimie fetuamona, ie uaido mare  
rafuena finocana omoi jaillana jiidicai.  
Ie uaido naimienia iinocana omoi  
jaillana jiidicai. <sup>12</sup>Iese omoi jaillemona,  
naimie abido bille facaise naimienia  
iobitatomoi. Omoiri naimie jai iobite.  
Jusiñamui, cai Nama Jesucristo diga,  
caina duenaillamona iese iiticai.

## Jesucristo abido bille rafue

**2** <sup>1</sup>Cai Nama Jesucristo abido billena  
lloiacadicue. Naimie ico cai  
dafaifillena jiai lloiacadicue. <sup>2</sup>“Cai  
Nama jai abido bite” raillana omoi  
cacaia, raire jarire iñeno.

Rucaicueriñeno. "Jusiñamui Joreño iena cuemo jai llote" damie raia, iena iinoñeno. Nie lloraima iena lloia, iena iinoñeno. "Pablomona cue feiñoga carta iena llote" damie raia, iena iinoñeno. <sup>3</sup>Naie isoide rafue diga omoina jiaino jifueiacania, iena iinoñeno. Cai Nama nia biñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite; <sup>4</sup>iadeti nano jiae rafuena finoite. Taife dinena naimie billanona, jiraraí baifemo iacanite. Jerusalémo Jusiñamui jofomo illanona, "Jusiñamuidicue" raite. <sup>5</sup>Omoi dine navui cue ia, bie rafuena omoimo lloticue. <sup>6</sup>Jusiñamui Joreño naimie nia billena rairuillana jai uiñotomoi. Jusiñamui jitaillirui facaise naimie biite. <sup>7</sup>Taife maraiñede rafuena birui bainino finotate. Jusiñamui Joreño naimiena maraiñede rafuena birui marefodo finuana rairuide. Jusiñamui Joreño naimie rairuiñena mei, <sup>8</sup>Taife dinena maraiñedimie biite; ia cai Nama Jesús abido ebire bia, firaiñumona naimiena meineite. <sup>9</sup>Cai Nama Jesús nia abido biñenia, comini jifuellenia, Taife uaido bie maraiñedimiedi diga siño rafuena finoite. <sup>10</sup>Cominina eo maraiñedicinodo jifueite. Naie comini ico faifitimaci. Jusiñamui ie uanaicinona naimaci iinoñena jira, jilloiacaiñeitimaci. <sup>11</sup>Je jira Jusiñamui naimacina tainocinona iinotaite. <sup>12</sup>Jusiñamui ie uanaicinona naimaci iinoñena jira, maraiñede rafuena naimaci ebiruilla jira, Jusiñamui naimacina duere finoite.

#### **Jusiñamui omoina jai fetode**

<sup>13</sup>Jusiñamuina iinoñedino isoi Jusiñamui omoina duere finoñeite. Naimie omoina jai fetua jira, naimiemo iobillacinona jaca fecacabidicai. Omoi jilloillena, nano dofoconi omoina fetode. Ie Joreño uaido naimie

jitaillacinona omoi finollena, naimie uanaicinona omoi iinuamona, omoina fetode. <sup>14</sup>Ie rafuena cai lluamona, Jusiñamui omoina jai jillotate. Iemonia cai Nama Jesucristo ebirede illanomo jaca iitomoi. <sup>15</sup>Ie jira, Cristona iinocana omoi jai. Cai llogacinodo omoi jai. Iena caimonia jai cacadomoi. Cai cartamona iena jiai cacadomoi. <sup>16</sup>Omoi facaina cai Nama Jesucristomo, cai Moo Jusiñamuimo, jiicabidicai. Naimie caina isiruite. Cai comeciaina jaca ocuiñotade. Caina duenallamona naimie lloga rafue suillemo raise ocuridicai. <sup>17</sup>Naimie omoi comeciaina nia ocuiñotallenia jiidicai. Nie isoide rafuena omoi finoia, naie rafue omoi marena finollena jiidicai. Buena omoi ñaia, omoi marena ñaillena jiai jiidicai.

#### **Cai facaina omoi jiiana jitaidicai**

**3** <sup>1</sup>Daje rafue nia lloiacadicue. Cai facaina omoi jiiana jitaidicai. Cai Nama rafue llocana jaillana jitaidicai. Omoi iinua isoi, jiaino iinuana jiai jitaidicai. <sup>2</sup>Maraïñedinomona cai jillobillena, omoi jiiana jitaidicai. Ailluena comini Cristona iinofiedimaci; <sup>3</sup>ia cai Nama jaca iinogamie. Omoi comeciaina ocuiñotaite. Maraïñedicinomona omoina eenoite. <sup>4</sup>Cristomo cai duilla jira, cai llogacinona omoi jai iinuana jai uiñoticai. Iena nia iinoitomoi. <sup>5</sup>Cai Nama Jesús omoina Jusiñamui omoina isiruillana uiñotajana jitaidicue. Cristo duere sefuide; iadeti ie Moo jitalla rafuena sefuruiñeno finocana jaide. Iese Jusiñamuimo omoi facaina jiiticue.

#### **Maijiuillas**

<sup>6</sup>Cai Nama Jesucristo jitailla jira, jiae rafuena nia lloitice. Jiae creyente maijiacaiñenia, naimie diga eo nabairiñeno. Iena navui omoimo

lloticue; ia damierie iese ia, naimaci diga eo nabairiñeno. <sup>7</sup>Caimona fueo. Navui omoi motomo iticai; ia cai ucube ollena, jaca maijidicai. <sup>8</sup>Guillena ibañeno guiñedicai; ia nagarui eo majjidicai, omoina duere cai finoñellena. <sup>9</sup>Cristo facaina cai maijia jira, omomona ra jamai cai jicallena, caimo uai ite; iadedi caimona omoi fueollena iese jicañedicai. Omoi ra ollena, omoi maijiana jitaidicai. <sup>10</sup>Navui omoi motomo cai illa facaise lloticai: “Bu maijacaiñenia, guiñena”. <sup>11</sup>Omoi motomo damierie jai maijínenana jai fididicai. Maijiñeno jai itimaci. <sup>12</sup>Cai Nama Jesucristomo cai duilla jira, naie isoidinomo maijillena lloticai. Uainino maijamona ucube naimaci uana

jitaidicai. <sup>13</sup>Cue amatiai, nie isoide mare rafuena finollena sefuiruñeno. <sup>14</sup>Cue jai cuega cartamo ite rafuena bu iinoñenia, nana creyentiaina naimiena uiñota. Naimie meidaillena, naimie diga nabairiñeno. <sup>15</sup>Naimieno enoiñeno; ia creyentena naimie nia illamona, naimieno fecuise llofue.

### Fuiduacino

<sup>16</sup>Cai Nama omoi jaca uri itatajana jitaidicai. Naimie omoi diga jaca iiite. <sup>17</sup>Cuena canollena, naimemo cue llua isoi, jiaimie bie carta cuega; iadedi cue mameci buene dama cueticue. Nana cartamo iese cue mamecina cueticue. Pablodicue. <sup>18</sup>Cai Nama Jesucristo nana omoina duenaillassa. Mai. Macaibaite.

## TIMOTEOMO PABLO NANO ORETAGA RABE

Pablo Timoteona uaiduacino

**1** <sup>1-2</sup>Timoteo, bie carta omo cueticue.  
¿Nigacino? ¿Nie isoidio?  
Pablodicue. Cristo Jesús  
oretagamiedicue. Ie rafue llollena,  
naimie cuena orede Naimiena cue  
cioillena, naimie isoi cue illena, naimie  
abido billemo ocuridicue. Jusiñamui  
cuena jiai orede. Naimiedi cai  
Jilloitaraima. Cue llofuiacynomona  
Cristona o raise iinua jira, cue jito isoi  
cue mamecao. Cai Moo Jusiñamui, cai  
Nama Jesucristo diga, ona jai duenaite.  
Iena uiñocana mai o jai. Ona jai uri  
itatatiaimai. Iena uiñocana mai o jai.

Cristo rafuena taínona llofueraini  
llofuiacinodo jaiñeno

<sup>3-4</sup>Macedoniamo jaie jaidicuemo,  
Efesomo o fiebicallena omo lloticue.  
Nainomo dajerie Cristo rafuena raise  
llofueñedimaci; iadedi jiaiforie  
llofuetimaci. Diga iigaiaina  
faca-facadimaci. Imaci usumatiai  
mamecido siadocabitimaci. Iemonia  
conini uaina uaitaside. Jusiñamui  
jitailla isoi comini marena illana  
llofueñedimaci. Jusiñamuina cai  
iinuamona, marena iticai. Iena  
llofueñedimaci. Ie jira naimaci uaina  
lliícaita. <sup>5</sup>Jusiñamuina comini  
isiruillena, jiae cominina jiai naimaci  
isiruillena, Jusiñamui uaina llofueticai.  
Naimaci comeciai jeaninana jitaidicai.

Jusiñamuina raise naimaci iinuana jiai  
jitaidicai. Ie jira Jusiñamui rafuena  
llofuecabiticai. <sup>6</sup>Dajerie llofueraini iese  
llofueñedimaci; iadedi jamai ñaitimaci.  
<sup>7</sup>Moisés micori jaie llogacinuaido  
llofueiacadimaci; iadedi iena llofuiana  
uiñoñedimaci. Naie llogacinuaina ua  
uiñoñedimaci.

<sup>8</sup>Iena raise llofuegana, Jusiñamuina  
uiñoñedinona naimiena uiñotallená,  
mare. Iena uiñoticai. <sup>9-10</sup>Moisés micori  
llogacinuaidi mareuidinomo  
jainaiaiñede. Jainomo jainaiaide:  
Jusiñamui uaina iinoñedinomo lloga  
uaina iinorainidinomo, Jusiñamuina  
jitaíñedinomo, jeacino finorainimo, jeare  
ñaicabitinomo, Jusiñamuina enoidinomo,  
eina meineticromo, moona meineticromo,  
jiae cominina meineticromo, aiñede riño  
diga itinomo, iniñede iima diga  
itiñaiñuaimo, daje isode iima diga conini  
aifuedotinomo, comena fiidinomo, taíno  
llorainimo, taino lluana jifueridinomo,  
uanai rafue facaisena iñedínomo. Nana  
Cristo rafue facaina iñedínomo Moisés  
micori llogacinuaidi ua jainaiaide; <sup>11</sup>ia naie  
rafue cuemo jai jainaiaiñede. Ie mare  
rafuena cue llollena, Jusiñamui cuena jai  
orede. Maremienia Jusiñamui illamona,  
naimie rafue jiai eo ebirede.

Jusiñamui caina duenalla jira,  
Pablodi iobide

<sup>12</sup>Cuena fetua jira, cai Nama Cristo  
Jesúri iobidicue. Naimienia cue iinollena,

naimie cuena uiñuamona, cuena fetode, naimie rafue cue llollena. Iena llollena, cue comeccina jiai ocuiñotade.<sup>13</sup> Jaie naimiena jeare ñaiticue. Naimiena iiñotinona jiai duere finodicue. Abina cue uiñoñena jira, naie facaiseconi naimiena nia cue iiñóñena jira cuena duenallamona, naimie cuena fetode.<sup>14</sup> Cuena eo duenaita. Lemona naimiena iiñoticue. Naimiena jiai isiruiticue.

<sup>15</sup>Bie lluadí mare cue uiñuamona, nana comini biña iñuana jitaídícue. Maraiñedínona naimaci jeacínomona jilloitallen, eniruemo Jesucristo bite. Ero, nanoca jeacínona finoraimadicue; <sup>16</sup>iadedi Jesucristo cuena duenaita. Naimiena cue iñuamo jaie fecuse ocuride. Nana jeacínona finorainimo fecuse ocuride, naimiena iñollena. Naimiena cai iñuamona, Jusiñamui diga jaca iñitaci. Cuena duenalla jira, biruimona naimiena iiñotinodi naimie naimacina duenallana uiñotimaci.<sup>17</sup> Jusiñamuidi nanocamie. Jaca fiódaiñeite. Naimiena cionidicai. Naimie damiede. Jiaienai iñede. Naimiena jaca iobicabillasa. Iena jitaídícue.

<sup>18</sup>Ero, Timoteo, cue jito, omo rafue lloiacadicue. Nano o llofueraimana jaiacana facaise ailluena Cristo rafuena llofuerainidi ona jaie llotimaci: "Naimie raise marena llofueite" llotimaci. Iena comeccianona, o começi ocuiñocana o jai, Cristo rafuena riidocana o jaillena. <sup>19</sup>Cristona iñocana o jai. O comeccina marena finocana o jai. Dajerie naimaci comeciai iuaimo comeciaína facañedimaci. Ie jira Cristona jai iiñóñedimaci. <sup>20</sup>Iese ite Himeneo. Alejandro jiai jai daje isoide. Jai iiñóñediaímaiai. Ie mei iaimaíaina Taife anamo jai itabicaítaticue, duere sefuillena. Iaimaiai fueollena, Jusiñamuina jeare ñaiñellena, iese itabicaítaticue.

### Nana comini facaina jiiiticaí

**2** <sup>1</sup>Diga rafue omo lloitícue; iadedi daje rafue motomo ite. Nanoca rafue. Iena omo lloitícue. Jusiñamui diga omoi ñaia, nana comini facaina jii. Naimaciri iobillacínona Jusiñamui feca. <sup>2</sup>Uri cai illena, Jusiñamuina raise cai sedallena, Jusiñamui jitaila rafuena cai finollena, illaicomini facaina cai jii. <sup>3</sup>Iese cai jiiia, Jusiñamui mona mare. Naimiedi cai Jilloitaraima. <sup>4</sup>Naimiedi nana comini naimaci jeacínomona jilluana jitaide. Uanaicínona naimaci uiñuana jiai jitaide. <sup>5</sup>Nana nairaiai imaci Jusiñamuidi jaca dajede. Comini diga Jusiñamui facaisena ñairaima jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaima jaca dajede. Naimiedi Cristo Jesús. Naimie iñimanánona, comini facaisena ñairede. Ie muidona comini diga Jusiñamui jai nabairede. Jusiñamui diga comini jiai jai nabairedimaci. <sup>6</sup>Cai jeacínomona cai eneno illena, Jesucristo nana cai facaina jai fiodaite. Naimie jitaila facaiseconi Jusiñamuidi cominina bie rafuena jai uiñotade. <sup>7</sup>Bie rafue cue llollena, Jusiñamui cuena fetode.

Judíuaíñedínomo cue llollena, bie rafue naimaci iñollena, uanaicínona naimaci uiñollena, cuena orede. Tainona lloñedícué.

<sup>8</sup>Ie jira naga roracomo ite iiñiai, cai comini onolliai a ñuitacabilla isoi, comeciaímo jeacino iñenanomona, Jusiñamui jii ana jitaídícue. Naimaci comeciaímo icirillacino iñedemo, Jusiñamui jii. Naimaci comeciaímo uaitajacino iñedemo, Jusiñamui jii. <sup>9-10</sup>Riñoniaímo jiai lloitícue. Roracomo omoi jaia, abi ieduamo comeciaína facañenamona, omoi ifotieno fino. Jamai ebinai raillano, abi ieduamona

abina finora jitañeno. Jamai ebinaí raillano, abi ieduamona eo raifide iniroina jitañeno; iadedi mare rafuena omoi finuamona, ebinaitomoi. “Jusiñamuina iinoticaí” omoi raillanona, naimie jitaila isoi, marena omoi finolle. <sup>11</sup>Rollena comini ofia, ñaiñenamonoma, uaitañenamona omoi fueo. <sup>12</sup>Omoi ofia, omoi iiniaina llofuiiana jitañedicue. Nainomo omoi ñaiñena. Iñiai omoi anamo illana jitaiñedicue. Iese omoi riñoniaimo lloiacadicue. <sup>13</sup>Jusiñamui Adán micorina nano finua jira, iese lloticue. Adán micori finua mei, Eva micorina jiai finode. <sup>14</sup>Taifedi Adán micorina jifueñede; iadedi Eva micorina jifuetue. Le mei naie riño jeacinona finode. <sup>15</sup>Ilemona jilloite; iadedi uruiai jococana jaite. Riñoniaidi Jusiñamuina iinoia, jiaie cominina isiruia, Jusiñamui jitaila rafuena finoia, ie abina eneoia, jilloitimaci.

#### Creyentiaina sedaraini illa rafue

**3** <sup>1</sup>Bicinodi uanaaicino. Creyentiaina llofueraimana bu jaiacadania, naimie começimo mare jitaillacino ite. <sup>2</sup>Bie isoide llofueraimana jaiacadimieno jitaidicue. Naga comini naimie mare raillamie. Dañaiñona airedimie. Abi eenotimie. Ebena iñedimie. Ñinogamie. Jiaie comini naimie jofomo riadeti, raise nafüecabitimie. Jusiñamui uaina raise llofuecabitimie. <sup>3</sup>Jifairuiñedimie. Fuirainidimie. Raire icirirainidimie. Ucubena nidoñedimie. <sup>4</sup>Naimie cominina raise sedadimie. Naimie anamo naimaci illanona, naimie uruiai ie uaina raise iñotadimie. Ie isoidimie llofueraimana jaillana jitaidicue. <sup>5</sup>Iese naimie iñenia, ie anamo itinona naimie raise sedañenia, ¿niese jiae creyentiaina raise sedaite? <sup>6</sup>Como creyentena jaidimieno creyentiaina

llofueraimana fetoñeno, naie diga naimie abi iedoí raillano. Abi ieduamona, Taife isoi jeacino finoite.

<sup>7</sup>Llofueraimana jaiacadimieno creyenteñedino: “Mare” raiñenia, naimieno fetoñeno. Iese naimieno raiñenia, naimie joreñona jeare ñaitimaci. Iemei Taife ramo jiai faite, naimie abido danomo uaillena. Ie muidona naimie uaina jaca cacarefiñeitimaci.

#### Diáconuai illa rafue

<sup>8</sup>Diáconuai creyentiai llofueraini isoi marena illa. Ñinouiganona illa. Jifairaeñena. Ucubena nicidoñena.

<sup>9</sup>Naimacidi Cristona cai iinua rafuena jeanide começiaimoná iinua. <sup>10</sup>Bu omoi fetoacanía, naimacina nano facaci. Roracomo jiaie rana nano maijita. Iena raise finoia, diáconuaina jaite.

<sup>11</sup>Diáconuai ainiái jiai iñogañaiñuaina illa. Jiaie comini joreñona ñaiñena. Jirorainina. Naga rafuena marena raise finua. <sup>12</sup>Nana diáconuai aidi

dañaiñoriede. Diáconuai uruiai naimaci uaina raise iinua. Diáconuai imaci anamo itinona raise sedajana uiñua.

<sup>13</sup>Diáconuai marena maijia, comini naimacimo iobillacina feacitimaci. Cristo Jesúna iinuano, naimieno marefodo jiai lloitimaci.

#### Jusiñamuina iinotino

<sup>14</sup>Timoteo, raire o dine jaiacadicue; iadedi uicodo bie rafuena omo cueticue.

<sup>15</sup>Are cue riñenia, dani omoi creyentiai diese ofia, Jusiñamui ie cominina marena omoi illana omoi uiñollena, omo cueticue. Cajede Jusiñamuina jai sedadicai.

Uanaicinona riidoticaí. <sup>16</sup>Jusiñamui caina Cristona jai uiñotagafuedi jiaie rafue baifemo faite. Iena cai uiñuanona, raiticai:

Eniruemo Cristodí iimaná jai  
bairede.

Jusiñamui Joreñodi caina naimie  
uai siñonana uiñotade.  
Jusiñamui jaienisaí naimiena jiaí  
ciódimaci.  
Jiaíe nairaiaimo naimiena lloticai.  
Iena cacajamona, ailluena cominidi  
diga nairaimona naimiena birui  
iiñotimaci.  
Monamo naimie abido jai jaide.

#### **Jiaínodi jiaforie rafuena lloitímaci**

**4** <sup>1</sup>Jusiñamui Joreño caimo raise llote: “Jesucristo nia abido biñena facaiseconi damierie creyentiaí Cristona faínnonocaitímaci. Taife dibeimo ite lloraini lluana cacarefillamona, Janabamona ite lluacinodo jaitimaci. Taifemona ite lluacinodo jaitimaci”. <sup>2</sup>Naie llorainidi: “Uanaicinona lloticai” raitimaci; iadedi taino llocabiitímaci. Naimaci comeciaí jai tainomo iiite. <sup>3</sup>Iima riño ie aina ollena rairuitimaci. Riño iima ie inina ollena rairuitimaci. Dajerie guille rana fimaidoitímaci. Jusiñamui iena fimaidoñede; ia creyentiaí uanaicinona uiñanona, iobillanona guillena, naimiedi naga rana finode. <sup>4</sup>Nana Jusiñamui comuitaga guille radi mare. Iobillano iena cai feiñuanona, guiticai. <sup>5</sup>Jusiñamui llua jira, Jusiñamuimo cai jiiia, nana guille radi jai mare. Iemonia maraíñede rafue jaca caimo comuiñeite.

#### **Jesucristo rafuedo raise iñocana jai**

<sup>6</sup>Timoteo, cue lluana creyentiaimo o lloia, Jesucristo dibeimo raise maijidio. Cristo uaina iñocana o jailla jira, mare llogacínodo o jailla jira, raise maijidio. <sup>7</sup>Jamai rafuemo, jamai iigaiáimo o comecinia facañeno; iadedi Jusiñamui jitaila rafuena finocana o jai. <sup>8</sup>Mairillena o abi llarocaiadeti, mare; iadeti Jusiñamui rafuena o facajia, eo

mare. Abi llarocaja baifemo Jusiñamui uaidi eo faite. Jusiñamui rafuedi o comecinia birui ocuiñotaite. Jusiñamui dine jiairuido o jaillena, o comecinia marena jiaí raise finotaite. <sup>9</sup>Bie lluacínodi uanaicino. Ie jira iena cai iinua. <sup>10</sup>Cai jillobilena, cajede Jusiñamuimo ocuridicai. Ie jira duere sefuillano maijidicai. Jeacínomona Jusiñamuidi nana cominina jillobitaacade. Naimiena iiñotinona jai jillotate.

<sup>11</sup>Nana creyentiaimo cue lluana raise llofue. <sup>12</sup>Naimacina o llofueia, coniruena nia o illamona: “O afemo iticai” naimaci raiadeti, damamai iese raitimaci. Mare illacínodo o jai. Ie mei iese raiñetimaci. Marena o ñaímona, marena o illamona, jiaíe cominina o isiruillamona, Jusiñamuina o iñuamona, o jeanide rafuena o finoñenamona, naimaciði fueoitímaci. <sup>13</sup>O dine nia cue riñenia, creyentiaí ofia, Jusiñamuina cuegafuiaina ado faca. Iena llono. Iena llofue. <sup>14</sup>Creyentiaína llofueraini navui ofidemo, Jusiñamuimona o baitajacínona o feiñollena, naimaci onolliaí o ifogimo jonetimaci onolliaí o ifogimo jonetimaci. Naie facaiseconi Jusiñamui naimacina naicinona ona llotataate. Naicinona birui faínnonocaiñeno. <sup>15</sup>Iena eo uiuicai, nana comini Cristona iñocana o jaillana uiñollena. <sup>16</sup>O comecinia raise eeno. Marena raise llofue. Cristo uaina iñocana o jai. Iese o jaia, jeacino finuamona jilloitio. Iese ona cacadino jiaí jilloitímaci.

#### **Timoteo afemo itino diga ie illa rafue**

**5** <sup>1-2</sup>Eimiiaína illamona, o afemo itinona riire llofueñeno; iadeti o moomo o llua isoi, naimacina fecuisse llofue. O anafemo itinona o amatiaímo

o llua isoi, llofue. O afemo itiñaiñuaina o eimo o llua isoi, llofue. O anafemo itiñaiñuaina o miriñotaimo o llua isoi, llofue. Naiñaiñuaimo jeare comecina facañoeno. <sup>3</sup>Naiñaiñuaina canollena, feciñuai comini iñenia, naiñaiñuaina cano. <sup>4</sup>Feciñomo uruiai ia, naimaci naiñaiñona canua, naiñaiñon aaimacimo duilla jira. Einamacina illamona, iemona naiñaiñodi ibana oite. Iese itena, Jusiñamuimona mare. <sup>5</sup>Feciñomo uruiai iñenia, da Jusiñamuimo naiñaiñon ocuride, naimie naiñaiñona canollena. Jusiñamuimo nagarui jiicabite. Bie isoide feciñuaina cano; <sup>6</sup>iadedi Jusiñamuimo duiñede rana ebiruiga feciñona canoñeno. Jusiñamui anamo naiñaiñon jai raise iñenamona, Jusiñamuimona naiñaiñodi jai fiodaitiñaiñon isoide. Fiodaite cominina jaca canoñedical. <sup>7</sup>Ie jira creyentiaimo biena llono, feciñuaina jeare bu ñai raillanona.

<sup>8</sup>Ie cominina canoñedimie Cristo uaina jai fainonocaide. Naimiedi Cristona iñnoñedimie baifemo eo jearedimie. <sup>9</sup>Creyentiaina sedarainina canolle feciñuai mameciaina o joneia, iese jone: Jai jionaidiñaiñuai diese mameci jone. Dajede inirediñaiñuai mamecia jone. <sup>10</sup>Mare rafue naiñaiñuai finocabilla jira, jiae cominidi naiñaiñuaidi mareñaiñuai raillañaiñuai. Ie uruiai raise sedadiñaiñuai. Cominina nafuelcabitiñaiñuai. Jiae creyentiaina abina iedoñeno canocabidiñaiñuai. Duidinona canocabidiñaiñuai. Diese mare rafuena finocabidiñaiñuai mameci jone. <sup>11</sup>Feciñuai diese mameci o joneia, nia jionaiñede feciñuai mameciaina joneñeno. Naiñaiñuai nano llotimaci: “Inina dane oñeiticaí. Da Cristona sedaiticai” llotimaci. Ie mei uri iñenanomona, iimana niciduamona,

inina jitaitimaci. Ie jira naiñaiñuai mameci joneñeno. <sup>12</sup>Naiñaiñuai navui lluacinona jai fainonocalla jira, jiae comini naiñaiñuai joreñuaina ñaitimaci. <sup>13</sup>Naiñaiñuai diga jofomo macariruullamona, rairairedimaci. Eo ñaillaredimaci. Naiñaiñuai ñaiñenacinaido ñaitimaci. <sup>14</sup>Nia jionaiñede itiñaiñuai iese iñellena, naiñaiñuai inina dane uana jitaidicue. Ie mei uruiairenitimaci. Naiñaiñuai jofona sedaitimaci. Ie mei budí naiñaiñuaina jeare ñaiñete. <sup>15</sup>Cristona dajerie fainonocaida, Taife dibeimo jai jaidimaci. <sup>16</sup>Creyente cominimona feciño iade, da naimie naiñaiñona canua. Jiae creyentiaimo naiñaiñona canolle rana jicafena. Ie muidona comininide feciñuaina canorenitimaci.

<sup>17</sup>Creyentiaina llofueraini marena maijia, raise ibauiga. Naimaci lloia, naimaci jiai llofueia, eo raise ibauiga. <sup>18</sup>Moisés micori jaie cuegafuia iena llote: “Trigo oni juillena jurareta saisiia, ie fuena maiñeno, ie guillena”. Guillamona ibana jai ote. Cristo jaie llote: “Maijidimiedi ibauiga”. <sup>19</sup>Creyentiai llofueraimana damie llogidoia, iena cacarefiñeno. Mena comini, nibai daje amani comini iese naimiena llogidoia, iemo cacarei. <sup>20</sup>Creyentiai llofuerainimona bu jeacina finocabia, nana creyentiai uicomu naimiemo riire llono, jiae creyentiai daje isoi iñellena. <sup>21</sup>Dacinodo naga jeacino finoraimamo llono. Nagamiemo riidoñeno llono. Fecuisse damiemo llofeno, naimiedi o nabaina jira. Jusiñamui caina ciode. Jesucristo caina ciode. Jusiñamui fetoca jaienisai caina jiai ciodomaci. Ie jira dacinodo llono. <sup>22</sup>Jeacino naimiemo ia, naimie jeacino facaisena o iñellena, creyentiai llofueraimana jaillena, buna raire fetoñeno. Jeacynomona oni eneno o i.

<sup>23</sup>Eo o duia, da jinuina jiroñeno. O duicabilla jira, janore vino jiro, o jebe manollena. <sup>24</sup>Jeacino dajerie finoia, iena uiñoticaí, juez isoi Jusiñamui iena nia lloñenia. Jeacino jiaíno finoia, iena uiñoñedicaí; iadedi jiairuido Jusiñamui lloia, iena uiñoiticaí. <sup>25</sup>Ie isoide. Mare rafue bu finoia, iena uiñoticaí; iadedi birui iena cai uiñoñenia, jicarena finoñena jira, jiairuido iena uiñoiticaí.

**6** <sup>1</sup>Jusiñamuina iinote maijirainidi naimaci patrones eo iinua. Ie mei Jusiñamuina iinoñedino Jusiñamuina jeare ñaiñeitímaci. Cai llofuiacina jamaiñeitímaci. <sup>2</sup>Jesucristona naimaci patrones iinoia, maijiraini naimaci uaina jiaí iinua. Naimaci comeciai facañena: “Patrón creyentena illa jira, daní conima cai isiruilla jira, raise maijiñeiticaí”; ia: “Raise maijiiticaí” comeciaina facaja.

#### Uanaiñedicionona Iluacino

<sup>3-4</sup>Cai llogacinodi uanaicino. Cai Nama Jesucristona lloticai. Bie llogacinomona naimie jitaille isoi cai illanona, raise uiñoticaí. Jiaicinodo bu llofueia, abí iedote. Abí uiñoñede. Uai eo uaitaiacade. Ie meinoconi comini abina uradoidimaci. Daajena comeciaina lloíñedimaci. Jiaié comini joreñona ñaitímaci. Cai fienna bitímaci. <sup>5</sup>Uai uaitatímaci, naimaci comeciai maraiñeno illa jira. Uanaicinona jai uiñoñedimaci. “Cristo uai lluamona, ailluena ucubena oiticai” raillanomo comeciaina facadimaci. “Iemoná caimare iticai” raillanomo comeciaina facadimaci. <sup>6</sup>Ie iadedi iese iñede. Cristona eo raise cai iinuamona, caimo diese ite ra diga caimare iticai.

<sup>7</sup>Cai jeiciia, jaca buenidicai. Cai fiodailla mei, cai rana uiñeiticaí. Cai radi benomo fiebicaite. <sup>8</sup>Ie jirari, cai guille ia, cai iniroi ia, caimare bene cai illa. <sup>9</sup>Eo ucuberedinona jaiacadinona

Taife eo ramo faite. Taife uaina iinuanona ucube ollena, ucuberedinona jaiacadinodi diga maraiñede rafuena finodimaci. Ja muidomo imaci abí faifitimaci. <sup>10</sup>Ucubena ebiruillanona, ucuberedinona jaiacadino naga jeacinona finocabidimaci. Ucube ollena, dajerie Cristona jai fainonocaidimaci. Ie muidona eo duere sefuidimaci.

#### Jusiñamui uaina iinocana jai

<sup>11</sup>Ero, Timoteo, odí Jusiñamui fetocamedio. Nana cue como lloga rafuemona oni eneno o i. Mare rafuedo o jai. Jusiñamui jitailla rafuena finocana o jai. Jesucristona iinocana o jai. Jiaié cominina isirui. Mare rafue dibeimo o comecinina jone. Riicinodo cominina llofueñeno. <sup>12</sup>Jeacino dibeimo o iñellena, Jesucristona iinuanona, llocana o jai. Jaca itatajacina marena raise iino. Jusiñamui ona fetode, o jaca illena. Navui diga cominimo Jesucristona o iinuana marefodo llotio. <sup>13</sup>Ie isoide Jesucristo. Poncio Pilato dine jaie naimie itemo, marefodo: “Imiedicue” llote. Jusiñamuidi nana rana cajetade. Naimie caina jaca ciode. Jesucristo caina jiaí jaca ciode. Ie jira uanaicinona omo lloticue. <sup>14</sup>Cai Nama Jesucristo nia abido biñenia, nana omo cue llogacinua iino. Jearedo rafuena finoñeno, jiaié comini naie llogacinuaína uaitañellena. <sup>15</sup>Naimie jitaillirui Jusiñamuidi eniruemo Jesucristona dane oretaite. Jusiñamuidi maremie. Nanocamie. Cai nanoca cai moto illaima. Cai nanoca Nama. <sup>16</sup>Da jaca naimie fiodaiñeite. Eo isire lligaiñote ra dinomo naimie ite. Nainomo jaca bu iaírei rinide. Bu naimiena jaca cionide. Naimiedi jaca siñonasa. Naimemo iobillacínona jaca cai fecacabillasa. Iena jitaídicue.

<sup>17</sup>Eo ucuberedinomo llono: “Abina iedoñeno. Ucubedi fuirede. Ie jira

ucubena uamo ocuiriñeno; iadedi Jusiñamuimo ocuiri". Cai comeciai jaísillena, naimiedi caímo rana eo raise fecacabide.<sup>18</sup> Ucuberedinomo jiai llono: "Omoi ucube diga mare rafuena fino. Jiaie cominimo ucubena caidiñeno fecajana cano".<sup>19</sup> Le muidona iese naimaci finoia, monamo naimaci isiruiga rana iiite, jiairuido iena. Iese naimaci jaia, jaca itatajacinona marena raise ua uiñoñitimaci.

### Fuiduacino

<sup>20</sup> Timoteo, cue omo llogacinona faiñeno raise uiuicai. Jamai rafuemo cacarefiñeno. "Uanaicinona eo uiñoticaí" dajerie raitimaci; iadedi uiñoñedimaci. Naimaci ñaiana cacarefiñeno.<sup>21</sup> Dajerie iena cacajano, Cristona nia uiñoñedimaci. Jusiñamui ona duenallasa. Jaca dinori omo rafuena lloticue. Mai. Pablodicue.

## TIMOTEOMO PABLO IE EMODOMO ORETAGA RABE

### Uaiduacino

**1** <sup>1-2</sup>Timoteo, carta omo dane cueticue. ¿Nigacino? ¿Nie isoidio? Pablodicue. Jusiñamui cuena jitaila jira, Cristo Jesús oretagamiedicue. Cominimo jaca itatajacinona llollena, cuena oretate. Cristo Jesús cai iiñuamona, naimie diga jaca iiticai. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiiaimai. Iena uiñocana mai o jai.

### Jusiñamuimo iobillacinona fecade

<sup>3</sup>Mare cue comecimona cue usumatai micoriai isoi, Jusiñamuina sedadicue. Timoteo, nagarui Jusiñamuimo cue jiiia, o facaisena iobillacinona fecadicue. <sup>4</sup>Cue comeci caimareficaillena, ona eo cioacadicue. Navui cue o facadoia, o eiana comeciticue. <sup>5</sup>Cristo Jesús o iiñuana dane jiai comeciticue. O usuño Loidadi iiñote. O ei Eunicedi jiai iiñote. Ie mei iiñotio. Naimieno o iiñuana jai uiñoticue.

<sup>6</sup>Ie jira o comecina dane ocuiño, Jusiñamui uai o llofuelleña. Cue onolli o ifogimo navui joneticue, ona fetollena, naimie uaina o llollena. Jusiñamuimona o baitajacinona naie facaiseconi feiñotio. <sup>7</sup>Jusiñamuidi cominina o jaciruillana jitaiñede. Cai comeciaina

ocuiñotajanona, caina jiae cominina isiruitallena, cai comeciaina eenotallena, ie Joreño caimo fecade. <sup>8</sup>Ie jira cai Nama rafuena o lluana meiruiñeno. Cárcelmo cue illa jira, cuena jiae meiruiñeno. Cristo Jesús rafue muidona duere sefuidicue. Naie rafue muidona duere o jiae sefua, rairuioicañeno i. Jusiñamui o comecinha ocuiñotaite. <sup>9</sup>Naimie isoi cai marena illena, caina fetuano, jeacínomona caina jillotate. Cai finoca rafue muidona caina jillotañede; iadedi naimie jitaila jira, caina jillotate. Enirue nia finoñena facaiseconi caina jaie duenaite. Cristo Jesús caina iena jai uiñotade. <sup>10</sup>Cai Jilloitaramadi Cristo Jesús. Caimo Jesús jai bairia jira, Jusiñamui caina duenallana jai uiñoticai. Fiodaillamona naimie jai jilode. Iemonia jiae jilloiticai. Naimie mare rafuemona naimie caina Jusiñamui dibeimo jaca illacinona jai uiñotade. <sup>11</sup>Bie rafuena llollena, cuena fetode. Cuena oretaja jira, biena llofueticue. <sup>12</sup>Ie jira duere sefuidicue; iadedi cue illana meiruiñedicue. Cue iiñogamieno cue uiñua jira, naimie bille dinori naimiedi nana cuemo naimie jai iga rafuena cue llofuelleña, cuena raise enoite. <sup>13</sup>Cue llua isoi o i. Uanaicinona lloticue. Cristo Jesús iiñocana o jai. Jiae cominina isiruicana o jai, Cristo Jesús o jaínaiailla jira. <sup>14</sup>Jusiñamui Joreño caimo illa jira, omo naimie lloga

uanaicinona fainonocaiñeno uuiucai. Uanaicinona o fainonocaiñellená, naimie ona canoite.

<sup>15</sup>Diga Asiamo ite cominidi cuena fainonocaidimaci. Naimacimona Figelo cuena fainonocaide. Hermógenes cuena jiai fainonocaide. <sup>16</sup>Onesíforo daje isoiñede. Diga icaiño naimie cue comeicina ocuiñotade. Cuena meiruiñede. Cai Namadi Onesíforo jofomo itino duenaillasa. <sup>17</sup>Romamo Onesíforo navuria, cuena isire jenuano, cuena baite. <sup>18</sup>Efesomo jaie cue ia, naimie cuena jiai canode. Iena raise uiñotio. Cai Nama ico abido bia, cai Namamona naimie iba feiñuana jitaadicue.

### O maijia rafuena raise fuido

**2** <sup>1</sup>Cuena fainonocaidino isoi iñeno; iadedi cue jito, Cristo Jesús ona canuano, Cristo dibeimo o comeicina ocuiñocana jai. <sup>2</sup>Diga cominimo cue lluana navui cacadio. O uaina iñotinomo cue lluana llono, iena jiaie cominina naimaci llofuellella. <sup>3</sup>Cristo Jesús rafue muidona duere o sefua, rairuioicaiñeno i. Cai Nama rafuena o riiduamona, naimie soldado isoidio. <sup>4</sup>IE illaima uai naimie iñoiacanía, soldadodi soldadoñede rafuena maijiaçaiñena. Ie illaima iobitallena, ie illaima oculica rafuena finoacanite. Ie isoide. Da Cristo Jesús rafuena o fino, naimienia iobitallena. <sup>5</sup>Reglamentos llua isoi naimie raise jifanoñenia, jifonoraimadi bue isoide rana cioñede. Ie isoide. Ibana o feiñollena monamo o jaia, Cristo Jesús lluado raise o jai. <sup>6</sup>Illimo duere maijiraimadi maijia jira, naiemona naie guilledi oga. Ie isoide. Duere o maijii, ibana feiñollena. <sup>7</sup>Cue lluamo o comeicina facacabi. Cai Nama ona canoite, iena uiñollena.

<sup>8</sup>Jesucristo fiodailla mona jillode. Iena comeci. Naimie usumadí David micori.

Jesucristona cue llua jira, <sup>9</sup>maraiñedimie isoi cárcolmo duere jai sefuidicue; iadedi Jesucristo rafue nia llocana jaide. <sup>10</sup>Ie jira Jusiñamui fetocano facaina duere sefuidicue, Cristo Jesús naimaci iñuamona naimaci jilloillena, monamo naimaci jaca illena. <sup>11</sup>Bie lluacinodí uanaicino:

Naimie dibeimo cai jaillamona,  
naimie diga jaca iiticai.

<sup>12</sup> Naimie muidona cai duere sefua,  
naimie diga iiticai, ie cominina  
naimie sedalle facaiseconi.  
Naimiena cai janoia, naimie caina  
jiai janoite.

<sup>13</sup> Naimie raise cai iñonoñenia, naimie  
uai meidoñena muidona,  
naimiedi nia iñogamie.

### Timoteo illa rafue

<sup>14</sup>O cominimo biena dane llono, iena comecillena. Jusiñamui facaina naimacimo llono: Uaina jamai uaitañeno, mare rafuena naicinomona comuiñena jira, naicinona cacadino comeciaina mareañaena jira. <sup>15</sup>Marena maiji, Jusiñamui ori iobillena. O meiruiñellena, naimie o maijia jibuya, marena maiji. Uanaicino o uiñuamona, naimie uaina marena raise llofue.

<sup>16</sup>Jamai ñaiana cacarefiñeno. Comini jamai ñainoicaia, Jusiñamui jitalla rafuena finocana jaiñedimaci. <sup>17</sup>Diga rafue naiemona comuide. Mocollonatare duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiai jaide.

<sup>18</sup>Uanaicinona fainonocaidiaimai. Coco iñua isoi, llofueñediiaimai. “Cai fiodaia, cai abi ico jilloñeite” llofuetiiaimai. “Cristona cai iñua facaise jai jillodici. Cai fiodaia, cai joreño jaca iiite” llofuetiiaimai; iadedi cai abi ico jillollena iñoñediiaimai. Llofuetiiaimai. “Cristona cai iñua facaise jai jillodici. Cai fiodaia, cai joreño jaca iiite” llofuetiiaimai; iadedi cai abi ico jillollena iñoñediiaimai.

<sup>19</sup>Ie ia Jusiñamui comini jaca iñocana

jaidimaci. Ie cominimo Moisés micori jaie lluamona, iaimaiai finoca rafuena jiai ñaite: "Jusiñamuidi ie cominina uiñote. 'Jusiñamuina iinoticue' raitimiedi maraiñede rafuemona eneno illasa" llote. Ie jira iaimaiaimona eneno o i.

<sup>20</sup>Ero, ucuberedimie jofomo diga guillirue joneuilla ra jai ite. Eo jitairede rana jai ite. Janore jitairede rana jiai jai ite. <sup>21</sup>Ie isoide. Jusiñamui dibeimo itinomona naga isoide comini ite; iadedi jeacynomona eneno bu ia, Jusiñamui naimiena fetoite, ie eo jitaille rafuena finollena. Jusiñamui dibeimo raise maijiite. <sup>22</sup>Ie jira conirueni comeciai jitailla maraiñede rafuemona eneno o i. Marena i, Jusiñamui jitailla isoi. Jesucristona iinocana jai. Nana cominina isirui. Uri i. Mare comeciaimona nana cai Namana sedadino diga iese i. <sup>23</sup>Jamai ebena rafuemo iñeno. Naiemona icirillacinodi comuide. Iena uiñotio. <sup>24</sup>Jusiñamui facaina llofueraimadi raire iciriñena. Nana cominina nabairilla. Marena fecuise llofuega. Riicaiñena. <sup>25</sup>Naimie uaina jitaiñedinona fecuise llofuega. Ie mei Jusiñamui naimaci comeciai uaina nibai meidotaite, uanaicino dibeina uiñollena. <sup>26</sup>Ie mei abi uiñuanona, Taife anamona jilloitimaci. Taifedi naimacina ie anamo jai itatate.

### Jusiñamui dibeimo iñedinomona abina rairui

**3** <sup>1</sup>Bie lluacinomo comecinra raise faca. Jesucristo abido bille facaise iairei ia, creyentena illena eo sefurenenite. <sup>2</sup>Naie facaiseconi comini dani imaci abina isiruitimaci. Ucubena ollena eo nicidoitimaci. Abina iedoitimaci. Abina biriitimaci. Jusiñamuina eo jeare ñaitimaci. Naimaci moo uaina, naimaci ei uaina

iinoñeitimaci. Jiae cominimo iobillacina jaca fecañeitimaci. Jusiñamuina jaca jitaiñeitimaci. <sup>3</sup>Jiae cominina duenaiñeitimaci. Comeciaina jaiairenitimaci. Jiae comini joreñona eo jeare ñaitimaci. Naimaci comeciaina eenoñeitimaci. Ebe isoi naga rana duere finoitimaci. Mare rafuena jitaiñeitimaci. <sup>4</sup>Naimaci nabaiñiaina janóñeitimaci. Jiae cominimo comeciaina facañeitimaci. Eo abina iedoitimaci. Naimaci comeciai jitailla rafuena finoacanitimaci. Jusiñamui rafuena isiruiñeitimaci. <sup>5</sup>"Jusiñamuina sedadica" raitimaci; iadedi Jusiñamui uaina jamaitimaci. Bie isoide comini diga nabairiñeno. <sup>6</sup>Naimacimona dajerie jiae jofuemo macaritimaci, naie jofuemo ite riñoniaina jifuijanona llofuelleña. Diga jearede rafuena finuano, naie riñoniai ebena itimaci. Naimaci comeciai iuaillai raire meidocana uitimaci. <sup>7</sup>Naga lloraima lluamo naiñaiñua cacareidimaci; iadedi uanaicinona jaca uiñoñedimaci. <sup>8</sup>Naimaci comeciai eo maraiñede. Jusiñamui uaina iinoñedimaci. Jannes, Mambres diga, Moisés micori lloga uai jaie uaitatiamaiai. Ie isoi bie comini uanaicinona birui jiai jitaiñedimaci. <sup>9</sup>Nana comini naimaci rafue jamai ebe isoi finoca rafue uiñuamona, Jannes iaimaiai Mambres rafue jaie fuilla isoi, naimaci rafue raire fuite.

### Timoteo uanaicinona iñuanona jailla

<sup>10</sup>Timoteo, cuena uiñotio. Cue llofuiiana uiñotio. Cue illana uiñotio. Cue jitailla rafuena uiñotio. Cristona cue iñuanana uiñotio. Iciriñeno fecuise lloticue. Cominina isiruiticue. Duere cue sefuija, cue comecinra ocuiñoticue. Iena uiñotio. <sup>11</sup>Antioquiamo, Iconiomo, Listramo cuena duere finodimaci. Duere

sefuidicue; iadedi nana naiemona cue Nama cuena jillobitade.<sup>12</sup> Jusiñamui jitailla rafuena finuano, Cristo Jesús uaido jaidinodi duere sefuitimaci.<sup>13</sup> Ie facaiseconi maraiñedinodí maraiñede rafuena finocana jaitimaci. Jifueraini daje isoi jifuericana jaitimaci. Naimacidi abido naimacina jiai jifueitimaci. Iese jaitimaci;<sup>14</sup> iadedi cue llofua uaido iinocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jaie iiñotio.<sup>15</sup> O uruenamona Jusiñamuina mare cuegafuiaina cacadio. Naie cuegafuiai cai jilluana caimo llote. Cristo Jesúna cai iiñuamona, jillobidicai. Iena caimo jai llote.<sup>16</sup> Comini nana naie cuegafuiaina cuetimaci; iadedi Jusiñamui jitailla isoi, naga cuetimie cuete. Ie jira nana naie cuegafuiai Jusiñamuimona ite. Comiminoma iñede. Ie jira naie cuegafuiaimona uanaicinona uiñoticai. Cai maraiñedicinona caimo llote. Cai comeciai marena illena, Jusiñamui jitailla isoi, caimo llote.<sup>17</sup> Iese llote, naimiemo cai duillamona, nana Jusiñamui rafuena cai raise uiñollena. Raise uiñuamona, Jusiñamui rafuena raise llofuerenitica. Naga Jusiñamui jitailla rafuena jiai raise fioreniticai.

**4** <sup>1</sup>Jiairuido Cristo Jesúdi illaimana eniruemo abido biite. Illaima isoi ie cominina sedajite. Naimiena iiñoñenamona nia cajedinona duere finoite. Jai fiodaitinona jillotajanona, naimiena iiñoñenamona, naimacina duere finoite. Jusiñamuidí birui caina jaca ciode. Cristo Jesús birui caina jaca ciode. Iena cue uiñuamona, bie uai omo lloitice.<sup>2</sup> Naimiena iiñoñedinona Cristo duere finoñellena, naimie rafuena naimacimo jaca llono. Comini o dafaifia, comini ofia, comini o dine ria, naimacimo iena lloitiosa. Naimaci jitaia,

llono. Jitaiñenia, jiai llono. Jeacinona bu finoia, naimacimo llono. Marena naimaci illena, naimacimo llono. Fecuise jaca llofue.<sup>3</sup> Jiairuido dajerie uanaicinona jitaiñeitimaci. Jiaifuena jitaitimaci. Naimacimo dani naimaci cacaacana rafuena lollena, diga llofuerainina jenoitimaci.<sup>4</sup> Uanaicinona fainonocaida, iigaiai icinuaido facajitimaci.<sup>5</sup> Timoteo, o comecináeno. Duere o sefua, rairuioicaiñeno i. Jesucristo rafuena llocana o jai. O llofuiacina marena fuido.

<sup>6</sup>Jai iairei ite cue meinellirui.<sup>7</sup> Cai Nama rafuena llocana cue jaillano, iena marena jai riidotice. Cue illa dinori jai fuiacade. Cai Namana fainonocaiñedicue.<sup>8</sup> Cai Namamona marena cue illa jira, monamo ibana feiñoticue. Iemo jai ocuridicue. Iena cai Nama cuejena eenote. Naimie abido billiruimo iena feiñoticue. Caina raise uiñuamona, dama cuemo fecañeite; iadedi nana naimie abido billena jitaideynomó ibana jiai feacaite.

### Pablo damieriena ñaia rafue

<sup>9</sup>Timoteo, raire cue dine bi.<sup>10</sup> Biniemo ite rafuena Demasdi eo ebiruilla jira, Tesalónicamo naimie jaillano, cuena fainonocaida. Galaciamo Crescentedi jai jaide. Dalmaciamo Tito jai jaide.<sup>11</sup> Dama Lucas cue diga ite. Marcos o diga ati. Cuena canollena, naimiena jitaidecue.<sup>12</sup> Efesomo Tíquicona oredicue.<sup>13</sup> O bia, cue fiebide iniroina ati. Troasmo Carpio jofomo fiebide. Cue libros ati, cue rabiai diga.<sup>14</sup> Alejandro raijamie navui cuena jeare finode. Naimiedi lloemona rana finoraima. Cai Nama naimiemo iba oite.<sup>15</sup> Naimiemona o abi rairui. Naimie cue lluana eo jitaiñede. Iena uaitate.<sup>16</sup> Illaicominí dine cue rafue nano cue riidoia, jaca

buna cue facaina riidoñede. Nana cuena fainonocaidimaci. Jusiñamuidi naimacimo iiba uana jitaiñedicue. <sup>17</sup>Cai Nama cue facaina ite. Cue comecina ocuiñotade, nana judíuaiñedinomo naimie uai raise cue llollena. Naimie muidona cue fioldaisaillanomona jillobidicue. <sup>18</sup>Cai Nama naga maraiñede rafuemona cuena eenoite, monamo ie cominina sedajanomo cue raise rillena. Iobillacino naimiemo jaca fecacabillasa. Iena jitaidicue.

### Fuiduacino

<sup>19</sup>Diga cominimo cue uai oredicue: Priscamo, Aquilamo, Onesíforo jofomo itinomo. <sup>20</sup>Corintomo Erasto fiebide. Miletomo Trófimo duide fainonocaidicue. <sup>21</sup>Rollime nia iñenia, cue dine bi. Diga cominí omo naimaci uai oredimaci: Eubulo, Pudente, Lino, Claudia, ua nana creyentiai.

<sup>22</sup>Cai Nama o comeci ocuiñotajasa. Naimie nana omoña duenaillasa. Mai. Pablodicue.

## TITOMO PABLO ORETAGA RABE

### Uaiduacino

**1** <sup>1</sup>Tito, omo cartana oretaiacadie. ¿Nigacino? ¿Nie isoidio?  
Pablodicue. Naimie cominina cue illamona, naimie jitaila rafuena cue finuamona, Jusiñamui anamo llofuecabiticue. Ie rafuena llofuelleña, Jesucristo ie oretagamiedicue. Jusiñamui fetocanona iinotallena, naimacina uanaicinona uiñotallena, Jusiñamuina naimaci raise sedallena, cuena oretate. <sup>2</sup>Naimie diga jaca cai illemo cai ocurilla jira, Jusiñamuina sedadical. Enirue nia iñena facaiseconi, Jusiñamuidi cai jaca illena jaie llote. Naimie taino jaca lloñede. <sup>3</sup>Iemei naimie jitailarui caina ie rafuena jai uiñotade. Naie rafuena cue llollena, naimie cuena oretate. Naimedi cai Jilloitaraima. <sup>4</sup>Tito, bie carta omo cueticue. Cue isoi o iinua jira, cue jitona cue mamecao. Coco Moodi Jusiñamui. Coco Jilloitaraimadi Jesucristo. Iaimaiai ona jai duenaitiaimai. Iena uiñocana mai o jai. Ona uri jai itatatiáimai. Iena uiñocana mai o jai.

### Creyentiaina sedaraini illacinuai

<sup>5</sup>Nainomo ite rafue o fuidollena, Creta raiilla uiasimo ona fainonocaidue. Creyentiaina sedallena, naga nairai illanomo llofuerainina o fetuana navui omo lloticue. <sup>6</sup>Creyentiaina llofuerainina o fetoia, nagamie bie

isoidimieno feto: Nana comini naimie mare raillamie. Dañaiñona airedimie. Nana naimie uruiai creyentiaina itimie. Nana comini naimie uruiai mare raillamie. Naimie uruiai ie uaina iinotimie. <sup>7</sup>Jusiñamui facaina naimie maijia jira, creyentiai sedaraimadi maremiena illa. Abina iedoñena. Raire iciriñena. Jifairuiñena. Fuiriruiñena. Ucubena nicidoñena. <sup>8</sup>Ie jofomo cominina raise feiñua. Mare rafue cinona isiruilla. Ie comechina eenua. Marena illa. Jusiñamui jitaila rafuena finua. Ie abina eenua. <sup>9</sup>Naie uai raise llofuiamona comini comeciaina ocuiñotallena, naimie uaina uaitatinona liiçaitallena, cai llofua isoi uanaicinona iinocana naimie jaila.

<sup>10</sup>Ie isoidinona feto, ailluena comini Cristo rafuena raise iinofiena jira. Tainocinuaina ñaicabitimaci. Cominina jifuecabitimaci. Judíuai creyentiaimona diga comini iese itimaci. <sup>11</sup>Ie jira naimacina lliicaita. Naimacidi diga cominina uri itatañedimaci.

Uanaiñedicinona llofuetimaci, ucube bifuiano ollena. <sup>12</sup>Naimacimona comini rafuena lloraima navui raite: “Cai Creta cominidi jaca tainona llouidimaci.

Naimaci comeciaidi jico comeci isoide. Jearedimaci. Guillaredimaci. Rairaiedimaci” raite. <sup>13</sup>Naimedi uanaicinona llote. Ie jira creyentiaimo riire llono, naimaci Jusiñamui uaina raise iinollesa. <sup>14</sup>Judíuai iigaiaina

naimaci iinoñellena, comini lletarafuena naimaci iinoñellena, naimacimo riire llono. Damierie uanaicinona jitaiñedimaci. <sup>15</sup>Ero, mareuidinomona naga ra mare. Jusiñamuina iinoñedimonoma naga ra jearede. Naimaci comeciaidi jai jearena jira, jearerie comeciaina facacabidimaci. <sup>16</sup>“Jusiñamuina uiñotaci” raitimaci; iadedi Jusiñamuina uiñoñedimaci. Naimaci finoca rafuemona iena uiñotaci. Jusiñamui naimacina eo gaiñede. Buena iinoñedimaci. Ie jira mare rafuena finuana uiñoñedimaci.

**Creyentiai marena illena,  
uanaicinona llofue**

**2** <sup>1</sup>Tito, Jusiñamuina iinoñedino isoi iñeno. Odí uanaicino llofue, naimaci marena raise illana uiñollena. <sup>2</sup>Uaicismaaina llofue. Canamacina jiai llofue: Jifaiñeno. Hinogamiensa jai. Uairico isoi iñeno. Jusiñamui uaina raise iino. Omoi ecimo itinona isirui. Duere omoi sefuia, omoi comeciaina ocuiño. <sup>3</sup>Uaiciñuaína llofue. Cañaiñuaína iese jiai llofue: Marena omoi i, Jusiñamui jitailla isoi. Jiae comini joreñuaína ñaiñeno. Jifaiñeno. Mare rafuedo omoi jaillamona, omoi anafeiñaiñuaí mare rafuedo jaitimaci. <sup>4</sup>Naiñaiñuaí ñinina isiruillena, naiñaiñuaí uruiaina jiai isiruillena, <sup>5</sup>uairico isoi iñellena, jearede rafuena finoñellena, jofomo raise maijillena, cominina duenaillena, naiñaiñuaí ñiníñiaí uaina iñollena, jiae comini Jusiñamui uaina jamaiñellena, naie cañaiñuaímona fueoitimaci. <sup>6</sup>Einamacimo llono. Coniruenimo jiai llono: Iefede ramo omoi comeciaina facañeno. Uairico isoi iñeno. <sup>7</sup>Tito, naga rafue o finua diese, mare rafuedo o jai. O llofua, uanaicinona llono. Jamai ebe isoi llofueñeno. <sup>8</sup>Marena llofue. Marena o

llofua, ¿niese comini o uai uitaitimaci? Uaitañeitimaci. Iemei o dibeimo iñedino meidaitimaci, caimo jearede rafue iñenia. Ie jira cairi ñaiñeitimaci. <sup>9</sup>Patrón anamo itinomo iese llono: Omoi patrón uaina iino. Naimie jitailla rafuena raise fino. Naimie uaina oñeno. <sup>10</sup>Rana fiiñeno. Naimie raruiai raise seda. Iese naimaci ia, naimaci raise maijiiia, naimaci patrón: “Jusiñamui uai mare” raite. Jusiñamuidi cai Jilloitaraima.

<sup>11</sup>Jusiñamui caina duenaillana jai cai uiñua jira, naicinona llofue. Naimiedi nana cominina jillotaiacade. <sup>12</sup>Naimie uai caimo llote: “Cue dibeimo iñede rafuena eneno fainonocai. Maraiñede rafuena jitañeno. Uairico isoi iñeno. Omoi ecimo itinomo, jiae cominimo taino lloñeno. Naimaci rana fiiñeno. Jusiñamui uaina iinocana jai”. Iese cai illana Jusiñamui birui jitaide. <sup>13</sup>Jiae caimo llote: “Jesucristo abido billemo caimare ocuiri. Naimiedi ebire biite. Ie uai siño. Naimiedi cai Jusiñamui. Jiae cai Jilloitaraima”. <sup>14</sup>Cairi naimiedi fiodaite, cai jearedicinomona cai jilloillena. Naimie cominina cai illena, mare rafuena iocire cai finollena, cai comeciaina marena dote. <sup>15</sup>Naie rafuena llofue. Maraiñede rafue comini finoia, naimacimo llono. Illaima uai isoi llono. Cominidi o uaina jamaiñellena, raise llofue.

**Creyentiai illaciuai**

**3** <sup>1</sup>“Omoi illacomini uai anamo i” creyentiaimo dane llono. Omoi illacomini lluacinona iino. Mare maijille ia, iena raise fino. <sup>2</sup>Jiae cominina jeare ñaiñeno. Fuiriñeno. Fecuise uiuicai. Nana comini diga marena ñaino. <sup>3</sup>Jiae cai jiae ebe isoidicai. Jusiñamuina iinoñedicai. Taife caina jifuete. Dani cai comeciai

jitaillacino railla isoi finouidicai. Diga ie jearede rafuena finouidicai. Jiae cominina jeare finouidicai.

Marairainidicai. Abina uradoisoidicai. Cominidi caina enoisoidimaci. Coninina jiai enoisoidicai.<sup>4</sup> Ie ia Jusiñamuidi marenienana jai fididicai. Naimie caina isiruillana jiai fididicai.<sup>5</sup> Ie mei Jusiñamui caina jillotate. Mare rafuena cai finoñedicai; iadedi caina duenaillamona, caina jillotate. Cai jeacinona oni dotajanona, cai comeciaina dote. Ie jira naimie dibeimo cai comeciaina dobaiñoticai. Jusiñamui Joreño cai comeciaina marena finode.<sup>6</sup> Ie Joreño caimo raise fecade, Jesucristo finua muidona. Jesucristo cai Jilloitaraima.<sup>7</sup> Ie jira naimiemona marebicaidicai. Caina duenaillamona, marebicaidicai. Caina ie cominina itataste. Iemonia naimie diga jaca illemo ocuriridicai.

<sup>8</sup>Tito, cue lluacinodi uanaicino. Jusiñamuina iiñotino marena majillena, cue lluacinona llo-llocai. Cue lluacino mare. Ie jira nana cominidi iena cacacobillasa.<sup>9</sup> Ebena ñaiñeno. Omoi usumatiái mameciaina jamai sia-siadoñeno. Moisés micori

llogaciuaina uaitañeno. Naicino diga buena oñedicai, Jusiñamui jitaillacina cai finollena.<sup>10</sup> Roracomo comini comeci jiaifocaitatimie ia, naimiemo llono: "Iena finoñeno". Dacaiño o lluamona naimie iiñoñenia, dane llono. Ie mei iiñoñenia, naimie diga omoi ñaiñeno. Naimie diga omoi nabairiñeno.<sup>11</sup> Uanaicinodo naimie jai jaiacaiñede. Jeacinona jai finode. Naimie iena jai uiñote.

### Fuiduacino

<sup>12</sup>Artemas o dine cue oretaia, Tíquico o dine cue oretaia, Nicópolis railla nairaimo are sedañeno raire bi. Nainomo rollime facaiseconi cue comeci illana jitaide.<sup>13</sup> Zenas railla abogado Apolos iaimaiai diga cano, iaimaiai oni jaiacana jira. Iaimaiai jitaille rana feca.<sup>14</sup> Dueredino ia, naimacina canollena, creyentiaimo: "Marena maji" jiai llono. Naimaci jamai iñellena, iese llono.

<sup>15</sup>Cue diga itíno naimaci uaina omo oredimaci. Jesucristona cai iiñua jira, caina isiruitinomo cue uaina llono. Jusiñamui nana omoina duenaillana uiñocana omoi jaillana jitaídigue. Mai. Pablodicue.

# FILEMÓMO PABLO ORETAGA RABE

## Filemómo Pablodi carta orede

<sup>1</sup>Filemón, bie carta o dine oredicue. ¿Nie isoidío? Pablodicue. Jesucristo rafue cue lluamona, cárcelmo iticue. O dine cue uai oredicue. Timoteo cue diga ite. Ie uai jíai orede. Cai Moo Jusiñamuijmo jai cai jaínaiailla jira, naimiedi coco ama. Coco diga Cristo facaina o maijia jira, ona isiruiticoco. <sup>2</sup>Coco uaina Apiamo jíai oredicoco. Cristo dibeimo naiñaiño illamona, naiñaiñodi coco miriño. Coco uaina Arquipomo jíai oredicoco. Naimiedi coco isoi Cristo rafuena llocana jaide. O jofomo rollena oficabidinomo coco uaina jíai oredicoco. <sup>3</sup>Cai Moo Jusiñamui, cai Nama Jesucristo diga, omoína jai duenait. Iena mai uiñocana omoí jai. Iaimaiaí omoína uri jai itatate. Iena omoí uiñocana mai omoí jai.

## Filemón Cristona iñocana jaide

<sup>4</sup>Jusiñamui diga cue ñaia, o facaina cue jíia, naimiemo iobillacinona fecadicue. Mare rafuena o finuana cue fidia jira, naimiemo iobillacinona fecadicue. <sup>5</sup>Cai Nama Jesúna iñocana o jaillana fididicue. Nana creyentiaina o isiruillana jíai fididicue. <sup>6</sup>Cristo dibeimo cai illa muidona, naimemonia diga marecinona feiñoticaí. Cristona o iñuamona, jíiae creyentiaina o nabaia, omona naie marecinona uiñoitímaci. Naga mare ra uiñocana naimaci jaillana

jitaidicue. <sup>7</sup>Cue ama, creyentiaina o isiruilla jira, iobidicue. O muidona creyentiai comeciai caimare uri illa jira, cue comeci iocire ite.

## Onésimo facaina Pablo ñaite

<sup>8</sup>Cue comeci iocire ite; iadedi daje rafuena o diga ñaiacadicue. Cristo uai cuemo illamona ñaiñeiticue; <sup>9</sup>iadedi conima coco isiruilla jira, o diga ñaiticue. Jai uaicimadicue. Jesucristo rafuena cue llua muidona, cárcelmona jai ñaiticue. <sup>10</sup>Onésimo facaina ñaiacadicue. Cárcelmo cue illa facaiseconi, cue muidona Cristona naimie iñua jira, naimie cue jitona jaide. <sup>11</sup>Omo naimiedi maraiñede rafue navui finode. O mullaima naimie illanona, raise maijíñede. Bene aisiamoná, Cristona naimie iñote. Cuena birui eo canode; iadedi birui o diga raise iacade. <sup>12</sup>O dine naimiena abido oretaiticue. Dama naimiena oretañeiticue; iadedi naimiena cue eo isiruillamona cue comecina jíai oretaiticue. <sup>13</sup>O facaina naimie cuena birui canode. Cue diga naimie fiebillana jitaidicue; <sup>14</sup>iadedi: “Jee” o nia raiñena jira, ieße finoñeiticue. Iena omo jicañeiticue. Omo cue jicanuamona buena o finuana jitaiñedicue; iadedi dama o comeci jitaila jira, mare rafuena o finuana jitaidicue. <sup>15-16</sup>O anamo naimie nia ite; iadedi Cristona naimie jai iñua jira, naimie o isiruiga

amana feiño. Naimiena isiruiticue. O dine naimie jaca abido illena, o dinena janorena facaise cue dine navui bite. Naimiedi o mullaíma; ia naimiedi jiai birui o ama. Naimiena isiruillanona feiño.<sup>17</sup> O nabaina iticuena cuena o feiñua isoi, naimiena feiño.<sup>18</sup> Naimie maraiñede rafuena omo navui finode. Omo naimie nia debia, cue facaina jone.<sup>19</sup> Iena ibaiticue. Bie carta dama cue cuiamona, naimie debiana cue ibajana uiñoticue. Omo eo lloñeiticue; iadedi cue muidona Cristona o iinua jira, ailluena cuemo debedio.<sup>20</sup> Cue ama, coco Nama Cristomo coco jainaiailla jira, cue jitaille rafuena fino. Ie mei cue comeci uri iite.<sup>21</sup> Cue jitailla rafue o finollena uiñoticue.

Cue jitailla rafue baifemo o finollena uiñoticue.<sup>22</sup> Jiaie rafuena lloiacadicue. O jofomo daje cuarto cuejena fino. Cue facaina o jiiia, Jusiñamui jitaia, o dine jaíticue.

#### Damierie imaci uaina jiai orede

<sup>23</sup>Omo Epafras ie uaina orede. Jesucristo rafue llua muidona, cárcelmo cue diga naimie ite.<sup>24</sup> Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue diga majide.<sup>25</sup> Cai Nama Jesucristo nana omoi creyentiai comeciaina ocuiñotajamona omoina duenailasa. Mai. Macabaite. Pablodicue.

## HEBREOS COMINIMO ORETAGA RABE

Jesucristo rafuena jai cai  
cacajamona, Jusiñamuiña  
jai uiñoticaí

**1** <sup>1</sup>Jusiñamuidi caína ie rafuena jai uiñotade. Iena omoimo ja lloiticue. Cai jaiagai micoriaimo Jusiñamuidi ie rafuena llote. Naimacimo ie rafuena llollena, jiaicaiño ie jaienisaina orede. Jiaicaiño nicaí anado Jusiñamui ie rafuena llote. Iena llollena, jiaicaiño ie facaina llorainí micoriaina orede; <sup>2</sup>iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticaí. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiaí finode. Jusiñamuidi nana ra, nana comini diga ie Jito anamo ico illena jai llote. <sup>3</sup>Ie Jito uaido nana naie rana finocana uite. Naimie muidona Jusiñamui marena ebirenana uiñoticaí. Jusiñamui marena naimie illa isoi, naimiemona Jusiñamuina uiñoticaí. Eniruemo billanona, cai comećimo ite jeacino facaina naimie fiodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

Jusiñamui Jito Jusiñamui  
jaenínesai baifemo faite

<sup>4</sup>Jusiñamui Jitona naimie illamona, naimie illano Jusiñamui jaenínesai illano

baifemo faite. Ie illanomona naimie Jusiñamui jaenínesai baifemo faiana uiñoticaí. <sup>5</sup>Jusiñamuidi: “Cue Jitodio” Cristomo llote; iadedi ie jaenínesaimo iese lloñede. Jiaicaiño llote: “Naimie Moodicue. Naimie cue Jito” llote. Ie jaenínesai ie Jito baifemo faiñena jira, ie jaenínesaimo iena jaca lloñede. <sup>6</sup>Ie dajede Jito eniruemo oretaja facaiseconi Jusiñamui llote:

Nana cue jaenínesai naimiemo iobillacinona fecaja;  
<sup>7</sup>iadedi jiaie rafuedo ie jaenínesaina ñaite:

Cue ocuilla rafuena naimaci finollena, cue ocuilla díese naimacina oretacabiticue.

<sup>8</sup>Ie Jitona ñaianona raite:

Cue isoi o illa jira, cominina o sedajafue jaca iite.  
Eo marecinodo cominina jaca sedadio.

<sup>9</sup> Mare rafue finuana jitaidio. Maraiñedicinona finuana jitaiñedio. Ie jira ona caimare jai itataticue. Monamo o abido billanona, cue jaenínesai baifemo ona caimare itataticue  
raite. <sup>10</sup>Jiaicaiño Jusiñamui ie Jitona raite:

Cue isoi o illa jira, o uai diga nanodofococoni eniruena jaie finodio.

Mona jiaí finodio.

<sup>11</sup> Bie eniruedi mona diga ico fuite. Ìnroi fuilla isoi, iñeite; iadedi odi jaca iitio.

<sup>12</sup> Eniruena mona diga meidotaitio; iadedi odi jaca daje isoitio.

Jaca iiitio

raite. <sup>13</sup>Ie Jitomo biена lloте; ia ie jaиenisaимo damiemo iese lloñede. Ie Jitomo llote:

Illaimana o illamona, cue nabei дine ana rai.

Nana o dibeimo iñedinona o anamo itataiticue.

<sup>14</sup>Ie jaиenisaimo iena lloñede; iadedi naimacina oretacobite, ie Jitona iinotinona canollena. Ie jira nana naiemona, ie Jito ie jaиenisaи baifemo faiana uiñoticai.

Jusiñamui caina Jillotaja  
rafuena cai jamaiñena

**2** <sup>1</sup>Jusiñamui Jito siño jitonana jira, naimie birui lloga rafuena eo raise cai cacajasa. Naiemona abido cai jaиnellena, naiena cai feitañellena, naiena eo raise cai iinuasa. <sup>2-3</sup>Ero, Jusiñamui ie jaиenisaina jaie oretajanona, Moisés micorimo diga rafuena jaie llote. Naie lloga rafuena bu raise finoñenia, iena bu raise iinoñenia, Jusiñamui naimieno eo duere finode. Jusiñamui jaиenisaи lloga rafue mare; iadedi Cristo birui lloga rafue jaиenisaи jaie lloga rafue baifemo faia jira, Cristo rafuena cai iinoñenia, Jusiñamui caina duere finollemona ua jilloñeiticaи. Ero, naimie cai jeacinomona caina Jillotaiacade. Naie rafuena cai jamaia, iena cai iinoñenia, naimie caina duere finollemona ua jilloñeiticaи. Cai Nama Cristo naie rafuena jaie llote. Naimieno cacadinodi caimo iena jai llotimaci. Cristo rafuedi uanaicinona llotimaci. <sup>4</sup>Jusiñamui uai diga jiaforiede siño rafuena naimaci finuamona, Cristo rafuedi uanaicinona uiñoticai. Naimie jitalla diese naga creyentemo Jusiñamuidi ie uaina itatate. Naga

creyente naimie dibeimo raise maijillena, ie uaina itatate. Naga creyentemo naie uai illamona, Cristo rafuedi uanaicinona uiñoticai. Ie jira naie rafuena cai iinuasa.

Cai isoi illena,  
Jesucristo iimana jaide

<sup>5</sup>Jusiñamuidi ie jaиenisaina oretauide, ie jitalla rafuena naimaci finollena; iadedi naimaci anamo comini ico illena jaca lloñede. Cristo anamo comini ico illena llote. <sup>6</sup>Jusiñamuimo David micori iena jaie llote:

Cai jamai bue isoidicai; iadedi caimo comecin facadio.

Jamai cominidicai; iadedi caina canodio.

<sup>7</sup> Caina cominina o finua jira, o jaиenisaи isoi iñedicai.

Fiodaiñedimaci; iadedi nana enirue rana o finuanona, Adán micori anamo iena jaie o itataja jira, caina eo iobitadio.

<sup>8</sup> Nana rana naimie anamo o itatajana jaie llotio.

Iese llote; iadedi nana naie lloga rafue nia suiñede, jeacinona Adán micori jaie finua jira. <sup>9</sup>Jesúna dane lloitice.

Naimieno uiñoticai. Eniruemo naimie jaie billamona, Jusiñamui ecimona

naimie billa jira, Jusiñamui jaиenisaи illa isoi, dallu naimie iñede. Comena jaide.

Cai facaina duere sefuillanona, naimie fiodaite. Caina Jusiñamui

dueruillanona, nana cai facaina Jesús fiodaite. Naimie fiodailla jira, ie abimo naimieno Jusiñamui abido itatajamona, Jusiñamui naimieno iobitade.

<sup>10</sup>Jusiñamui nana rana finode. Nana cominina comuitate. Naimieno iobitallenona, nana finode. Naimie jitalla jira, naimieno marena jira, Jusiñamui ie Jitona orede. Cai facaina fiodaillena, ie Jitona orede. Cai jeacino

facaina fiodaite. Ie Jito fiodaillamona, ailluena Jusiñamui cominina jaidicai. Naimie illanomo ico iiticai. Naimie jitalla jira, ie Jito duere sefuillanona fiodaite. Duere sefuillana ie Jito jai uiñuamona, naimiena iinotinodicaína jai raise canorede.<sup>11</sup> Naimie fiodaillamona marebicaidicai. Naimie dibeimo jai cai illa jira, daajena mooredicai. Ie jira naimiedi: "Cue cominidomoi" caina meiruiñeno llote.<sup>12</sup> Jusiñamui facaina lloraini micoriai llogacínomona naie rafue uanaicinona uiñoticai. Jesús ie ico finolle rafuena jaie llotimaci:

Ie cominimo ie Moo rafuena lloite.  
Ie comini diga naimie ofia, daajena Jusiñamuimo roitimaci  
jaie llotimaci.<sup>13</sup> Jesúna dane ñaitimaci:  
Ie comini diga naimiedi  
Jusiñamuina iinocana jaite.

Jusiñamui cominina damierie jailla jira, naimacidi jiai naimie comini ñaitimaci. Naimaci ñaia isoi, Jusiñamui cominina birui jaidicai.<sup>14</sup> Jusiñamuina iinotinodi cominina jira, cai isoi naimie illena, Jesúdi comena jaide. Cai fiodailla isoi, naimie jiai fiodaite. Taife uaina cai iinoia, jeacino finodicai. Iemonia fiodaicana jaidicai. Jeacino anamona caina Jesús jai jillotaja jira, Jusiñamuimona Taife uai jai saide. Jusiñamui dibeimo iñenanomona jai jillodicai.<sup>15</sup> Jesús nia fiodaiñenia, nana cai illa dinori fiodaillana jaciruicana jaidicai. Jesús jai fiodailla jira, caina jaciruillacino anamona jillobitade.<sup>16</sup> Jeacino anamo naimaci iñena jira, Jusiñamui jaienisaimo ie comeicina facañede; iadedi Abraham micori isoi iinotinomo naimie comeicina facade. Naimacina naimie jilloitallena, naimiedi comena jaide.<sup>17</sup> Comena naimie illena, Jusiñamui naimiena orede. Cai isoi naimie duere sefuillena, naimiena

orede. Cai isoi ramo naimie Taife faiamona, naimie fueollena, naimiena orede. Cai illana raise uiñote. Iemonia caina dueruite. Jusiñamui jitallaçino finuana raise uiñote. Ie jira Jusiñamui diga cai facaina nanoca ñairaimana naimie raise jaide. Ie jira cai jeacinona oni dotajana Jusiñamuimo jicanote.

<sup>18</sup> Naimie duere sefuilla jira, naimie ramo Taife faia jira, cai ramo Taife faia isoi, naimie caina canorede. Taife uai naimie iñoñena jira, caina canorede. Taife uaina cai finoñellena, cai comeciaína ocuiñotade.

### Jesús Moisés micori baifemo faite

**3** <sup>1</sup>Cue amatiai, jeacino anamo omoi jai iñena jira, ie dibeimo omoína Jesús jai fetua jira, naimie siño jitona jira, naimemo omoi comeciaína faca. Naimiena ja ñaiticue. Ie rafuena llollena, Jusiñamui naimiena orede. Naimie lloga rafuena jai cai iñuamona, naimiedi Jusiñamui diga cai facaina nanoca ñairaima.<sup>2</sup> Ie Moo cominina naimie raise sedajanona, naimiedi ie Moo uaina iñuanona, iena finode. Nana Israel cominina naimie sedajanona, Moisés micori Jusiñamui uaina iñuanona, iena finode.

<sup>3</sup> Jusiñamuimona Jesúdi Moisés micori baifemo faite. Moisés micori mare; iadedi naimie caina jillotañeedi. Jesús caina jillotaja jira, Moisés micori baifemo Jesúri Jusiñamui iobide. Cai jillua jira, Jusiñamui cominina jaidicai.

<sup>4</sup> Buena cai finuamona, naimie cominina jaiñedicai; iadedi naimie caina ie cominina dama itatarede.<sup>5</sup> Naimie facaina maijano, Jusiñamui llua isoi, Moisés micorídi nana hebreos cominina raise sedade. Ie cominimo Moisés micori Jusiñamui naimemo lloga uaina raise llote. Naimiemonia Jusiñamui ico llolle uaidi uanaicinona uiñoticai.<sup>6</sup> Jusiñamui

facaina majianona, Moisés micori ie cominina sedade; iadedi Cristodi Jusiñamui Jitona jira, naimie ie cominina sedade. Naimiena cai iñocana jaia, naimiemo caimare cai ocuria, Jusiñamui ua cominidicai.

**Jusiñamuimona abido cai  
jaiñellena, bie rafuemona cai fueua**

**7** Jusiñamui Joreño caimo birui lloia, iena cacarei. Ero, Jusiñamui jaie lluana cuetatate:

**8** Omoi jaiagai isoi iñeno.

Jofue iñenanomo omoi jaiagai ia, cue uaina iñonoñedimaci.

**9** “Naimie uaina raise uiñoticaí”  
raillanona, cuena  
facacabitimaci.

Cuarenta años cue siño finoca rana  
ciódimaci; iadedi jaca  
iñonoñedimaci.

**10** Naimacimo lloticue: “Omoi diga  
iciriticue.

Cue dibeimo omoi illamo omoi  
comeciaina facañedomoi.

Cue lloga uaido jaiacaiñedomoi”.

**11** Omoi diga cue icirilla jira, nainomo  
uri illena, omoimo cue lloga  
eniruemo jaca jaiñeitomoi.

**12** Cue amatiai, cai jaiagai rafuena cai  
uiñuamona, cai fueua. Uanai  
Jusiñamuimona abido omoi jaiñellena,  
naimie jai lloga rafuena omoi iñocana  
jai. Omoimona bu raise iñoiacaiñenia,  
naimiemo llono. **13** Jusiñamui rafuena  
omoi raise iñollena, nagarui conini  
omoi comeciaina ocuiñota. Omoimona  
jeacinona ebiruiñellesmona, jeacino  
anamo omoi iñellesa, birui Jusiñamui  
rafuena raise iñeno. Jeacino anamo omoi  
dane jaia, Jusiñamui rafuena  
iñonoñitomoi. Lemona naimie riicailafue  
anamo dane iitomoi. **14** Cristomo cai  
duilla jira, naimie caina jaca canuanona,  
cai comeciaina marena caimare jaca

itataite. Nana cai ille dinori naimiena  
cai nano iñuua isoi, cai iñocana jaia,  
marena caimare iitícaí. **15** Le jira  
naimiena iñno. Bie jaie cuega:

Jusiñamui lloga uaina birui cacarei.

Jofue iñenanomo cai jaiagai ia,

Jusiñamui uaina iñonoñedimaci  
cuega. Naimaci isoi iñeno.

**16** Egipтомона Moisés micori anado  
jaidimaci. Diga icaíño Jusiñamui uaina  
cacadimaci; iadedi iena raise  
iñonoñedimaci. **17-18** Cuarenta años jofue  
iñenanomo itimaci; iadedi naimiena  
naimaci iñooñena jira, Jusiñamui naimaci  
diga icirite. Naimiena iñooñena jira,  
naimacimo Jusiñamui llote: “Omoimo  
cue lloga eniruemo jaca jaiñeitomoi”  
llote. Le jira jofue iñenanomo naimacimo  
Jusiñamui jai lloga eniruemo jaiñeno  
fioldaitimaci. **19** Jusiñamui uaina naimaci  
iñooñena jira, naie Canaán railla  
eniruemo jaca jaiñedimaci. Naimaci  
comeciai jaca uri illana uiñoñedimaci.

**4** **1** Jusiñamui dibeimo raise cai  
illamona, Jusiñamui cai comeciai  
birui uri illana jitaide. Naimie lloga uai  
nia saiñede. Caimona damierie iese  
iñellesa, cai jaiagai isoi cai iñellena,  
abina rairuicana mai cai jailla.

**2** Jusiñamuidi comini comeciai uri illana  
jitaide. Cai jaiagaimo iena llote. Diga  
icaíño naie mare rafuena cacadimaci;  
iadedi iena naimaci iñooñena jira,  
iemona buena oñedimaci. **3** Jusiñamuidi  
cai comeciai uri illana birui caímo jai  
llote. Cristo ie mare rafuena jai  
cacadicai. Naimie uaina cai iñuua jira,  
cai comeciai jai uri ite. Cai jaiagai  
comeciai uri iñede. Moisés micori  
cuiamona iena uiñoticaí. Cuega:

Naimaci diga Jusiñamui icirilla jira,  
naimacimo lloga eniruemo  
jaiñedimaci

Comeciai uri illana jaca  
uiñoñedimaci

cuega. Jusiñamuidi nana comini comeciai uri illana jitaide. Eniruena naimie finocamo, comini comeciai uri illana jitaide. <sup>4-9</sup>Iena Moisés micori jaie cuega:

Seis digarui raifi illanona,  
Jusiñamui nana rana finode.  
Naimiemona nana naimie finoca ra  
mare.

Naimie comeci caimare uri  
illamona, siete iruimo jafaici ote  
cuega. Jusiñamuidi nana comini  
comeciai uri illana nia jitaide. Moisés  
micori facaise cai jaiagai comeciai uri  
illana jitaide; iadedi naimiena naimaci  
iinoñena jira, naimaci comeciai jaca uri  
iñede. Moisés micori fiodailla mei, bie  
eniruemo Josué micori cai jaiagaña  
ifode; iadedi naimaci rilla mei,  
Jusiñamuina naimaci iinoñena jira,  
naimaci comeciai jaca uri iñede. Josué  
micori illa facaisemona diga años  
illanona, David micori comeciai uri  
illana jiai llote:

Naimie uaina birui omoi cacaia,  
ieno iino

llote. Naiemona Jusiñamui cai comeciai  
uri illana jitaillana uiñotcai. Naimiena  
iinotinodicaimo naie rafue jai duide.  
<sup>10</sup>Jusiñamuina cai iinuamona, cai  
comeciai jai uri ite. Cai comeciai uri  
illena, jiae rafuedo jaiñedicai.  
Naimiena cai iinuamona, naimie  
illanomo ico iiticai. Nana naimie finoca  
rafuena naimie fuidua mei, nainomo uri  
iiticai.

<sup>11</sup>Cai jaiagai iinoñedimaci. Cai  
faifiñellena, naimaci isoi cai jaiñena;  
iadedi Jusiñamui uaina iinocana mai cai  
jailli. Jusiñamuina cai iinuamona,  
naimiedi cai comeciai uri itatare.

<sup>12</sup>Naimiena cai iinoñenia, naimie iena  
uiñote. Naimie jaca ite. Naimie siño. Ie  
jira naimie lloga uai jaca sañede. Jaca  
siño. Cai comeciaimo riire baite. Eo

jairede lloebi bue isoide jaitaia, iena oni  
econuanona, nana nainomo fo ite rana  
bairetate. Ie isoide Jusiñamui lloga uai.  
Nana cai comeciaimo iticinona riire  
bairetate. Nana cai comeciaina  
facajacinuaina riire bairetate.

<sup>13</sup>Jusiñamuimona buna reirinide.  
Jusiñamui nana caña ciode. Nana cai  
finoca rafuena uiñote. Nana cai  
comeciaimo iticinona uiñote. Ie jira  
naimie uaina iinocana mai cai jailli

### Jesúdi cai facaina Jusiñamui diga nanoca ñairaima

<sup>14</sup>Jesúdi naie uaina cai iinuamo  
canoite, naimiedi cai facaina Jusiñamui  
diga nanoca ñairaimana jira. Ie Jito  
illamona, monamo Jusiñamui abimo  
birui naimie illamona, cai facaina  
Jusiñamui diga naimie ñaicabite. Ie jira  
naimiena iinocana jaiticai. <sup>15</sup>Taife cai  
ramo faia, cai comeciai raise cai  
ocuiñoñenia, Jesús caña canorede. Cai  
ramo faia isoi, Taife naimie naga isoide  
ramo faite; iadedi Taife uaina naimie  
iinoñede. Iemonia Taife ramo faiacina  
iinoñenana naimie uiñua jira, jeacina  
oñede. Caña canorede. “Naimacina  
cano” ie Moomo llocabite. <sup>16</sup>Cai facaina  
ie Moo abimo naimie illa jira, cai  
comeciaina naimie ocuiñotaiacana jira,  
Jusiñamuina jaciruiñeno naimemo cai  
jiai. Naimie caña duenaillamona, cai  
jeacina feitaite. Cai comeciaina jiai  
ocuiñotaite.

**5** <sup>1</sup>Naga Jusiñamui diga ñairaima  
comini facaina ñaia jira, caña  
naimie jai feiñua jira, Jusiñamui diga  
jaciruiñeno jai ñaiticai. Moisés  
micorimo Jusiñamui jaie llua isoi,  
Aarón micorina Jusiñamui fetuanona,  
jeacino facaina comini Jusiñamuimo  
faga toiniaina fecauidimaci. Cominina  
Jusiñamui feiñollena, imaci ñairaima  
Jusiñamui diga ñaite. <sup>2</sup>Nana comini isoi

naimiedi jeacino finuamona, comini facaina Jusiñamui diga ñairaimana raise uiñote. Jusiñamui dibeimo raise jaiñedinona fecuise canorede. <sup>3</sup>Comini facaina toiniaína fecauide; iadedi naimiemo jeacino illa jira, naimie facaina toiniaína jaiá fecauide.

<sup>4</sup>Naimie jitaila jira, Jusiñamui diga ñairaimana buna jaiñede; iadedi naimieno Jusiñamui fetua jira, iena jaide. Jusiñamui Aarón micorina fetuana uiñoticai. <sup>5</sup>Cristo jitaila jira, cai facaina Jusiñamui diga ñairaimana naimie jaiñede; iadedi naimieno Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimieno fetode. David micori jaie cuegafuiaímona iena uiñoticai. David micori Jusiñamui lluana jaie cuega:

Cue Jitodio. Jai o Moodicue cuega. <sup>6</sup>Ie Jitona jiaicaiño Jusiñamui naite:

Melquisedec micori isoi ona comini facaina cue diga ñairaimana jaca itataticue.

<sup>7</sup>Eniruemo Cristo ia, iimana naimie jailla jira, duere sefuide. Naimie fiodaiacana iairei ia, Jusiñamuimo eo jiide. Naimie fiodaiñena Jusiñamui jillotarede; iadedi Jusiñamuimo ado llote: “Cueno llegi cacaitaño; iadedi cue comeci jitaila isoi finoñeno. O comeci jitaila isoi finoñeno” llote. Jusiñamui uaina naimie raise iiuua jira, Jusiñamui naimie jiiana cacajano fairiote.

<sup>8</sup>Naimiedi Jusiñamui Jito; iadedi Jusiñamui naimieno llegi cacataate. Lemona Jusiñamuina iinocana jaca jaillana naimie uiñote. <sup>9</sup>Naimieno ie Moo oretajanona, ie jitaila rafuena naimie raise marena fuidua jira,

Jusiñamui ecimo naimaci jaca illena, nana naimieno iinotinona jillotaite. <sup>10</sup>Melquisedec micori isoi comini

facaina ñairaimana jaca illena, Jusiñamuidi naimieno fetode. Melquisedec micori uai jaca saiñena jira, naimie ifomo illena, jiaimieno jaca fetoñede. Ie isoi Jesús uai jaca saiñede.

### Cristo dibeimona abido danomo jaiñeno

<sup>11</sup>Bie isoide rafuena omoímo lloiacadicue. Bie rafue irirede; iadedi Cristo rafuena omoí raise cacaiñena jira, omoí comeciaí iena raise jitaiñena jira, omoímo iena raise llonidicue. <sup>12</sup>Cristo rafuena are omoí cacaja jira, iedo omoí raise jaidomoídena, llofuerainina jaidomoi; iadedi iedo nia raise omoí jaiñena jira, jiaimie omoína llofuiiana nia jitaidomoí. Cristo dibeimo omoína itatare rafuena nia jitaidomoí. Cristona nano omoí cacaja rafuena nia jitaidomoí. Cristo rafuena iinocana nia raise jaiñedomoi. Eo janorede janosa monoí ijina jitaicabide. Einamaci isoi guillena nia jitaiñede. Janosa isoidomoi. Creyentena bu como jaia, Cristo rafuedo nia eo jaiñede. Iena eo uiñóñede. Monoí ijina jitaide isoide. Janosa monoí ijirua mei, jiaie guille guillamona moonaite. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi. <sup>13</sup>Janosa monoí ijina nia jitaila jira, naimie nia moonaiñemana uiñoticai. Naimie nia abina uiñóñede. Jusiñamui jitaila isoi marecinona finuana nia uiñóñede.

<sup>14</sup>Guilledi moonaitimie ie. Ie isoide. Cristo rafuedo raise jaidimiedi Cristo rafuena uiñocana jaide. Lemona marecinona finollena, llofuiiana uiñote. Maraiñedicinona finoñellena, llofuiiana jiai uiñote.

**6** <sup>1</sup>Diga icaiño bie rafuena jai cacadomoi. Cristona nano cai cacaja rafuena raise cai iiuamona, jiaie Cristo rafuena raise uiñocana mai cai

jailla. Cai nano cacaja rafuena cai fueoacana siadocabiñelli. Cristo dibeimo caña itatañede rafuedo navui jaidicai; iadedi cai comecia iuai birui jai meidoticai. Cristo dibeimo itatate rafuedo birui jaidicai. Jusiñamuina iiñuamona, naimie dibeimo jaidicai. <sup>2</sup>Cristo dibeimo bautizajana jai uiñoticai. Llofueraimana jaillena fetuana jai uiñoticai. Creyentiaina naimaci sedallena, naimacimo cai onollíjonianona, Jusiñamuimo cai jiñanona, naimaci fetuana jai uiñoticai. Nana creyentiai fiodaillamona jilluana jai iiñoticai. Jusiñamuidi naimiena iiñóñedina ico jaca duere finollena jai iiñoticai. <sup>3</sup>Naie isoide rafue mare; iadedi iena cai raise iiñuamona, Jusiñamui jitailla jira, naimie caina canuamona, jiae Cristo rafuena fueocana mai cai jailli. <sup>4</sup>Uanaicinona omoi comeciai uiñuamona, Cristona omoi iiñuamona, Jusiñamui Joreño omoimo illamona, <sup>5</sup>Jusiñamui uaina mare omoi uiñuamona, Cristo uai siñonana omoi uiñuamona, abido danomo omoi jaiñellena, abina rairuicana omoi jai. <sup>6</sup>Cristo dibeimona omoimona bu sofetena, jiaimie naimieno jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitaiñena jira, Cristo fiodaillana jai jitaiñede. Cristona jeare jai finode. Cristo finoca rafuena jamaide. Cristona naimie jitaiñenia, ¿niese naimie jillobite? Jillobiñeite. Ie jira abido danomo omoi jaiñellena, abi rairuicana omoi jai. <sup>7</sup>Ero, iena jiae rafuedo lloitice. Jusiñamui noci deitacabilla jira, enirue naimie raitacabilla jira, iemo riara sicuanona, iena ie nama raitia, naimemonia ie llisillana naimie uamona, Jusiñamui iobide; <sup>8</sup>iadedi naie eniruemona riara sicoñenia, maraiñede.

Monaigü cuirao diga naimemonia dama sicoia, maraiñede. Jusiñamui nainomo noci deitate; iadedi naimemonia llisillana onide. Naie enirue caimanide. Maraiñede. Ie nama iobiñena jira, iena fainonocade. Naie enirue isoidomoi. Jusiñamuimona mare rafuena cacadomoi. Iena iiñocana omoi jaia, naimie omoina iobitaite. Iena omoi jitaiñenia, naimemonia duere sefuitomoi.

### **Jusiñamui llua jira, cai comeciai ocuiñocana jaidicai**

<sup>9</sup>Cue isiruigaomoi, abi rairuilllicinona omoimo lloticai; iadedi cai llofuiacino omoimo duiñenamo cai comeciaina facañedicai. Cristona iiñocana omoi jaillamo cai comecinia facadicai.

<sup>10</sup>Jusiñamui omoina raise uiñote. Naimieno omoi isiruillamona, jiae creyentiaina omoi isiruillamona, naimacina navui canodomoi. Naimacina nia canodomoi. Ie jira naimemonia duere sefuiñetomoi. <sup>11</sup>Omoi comeciaimona jiae creyentiaina omoi canua isoi, Cristo rafuedo nana omoi ille dinori iiñocana omoi iocire jaillana jitaidicai. Naimie diga ico jaca omoi ille jira, iese omoi jaillana jitaidicai.

<sup>12</sup>Cristo rafuedo omoi jaillamona omoi sefuiruiñenana jitaiñedicai. Jusiñamui lloga uaina iiñocana jaidino isoi, omoi jaillana jitaidicai. Naimieno naimaci iiñuamona, naimie lloga uai fecuisse naimaci ocuirillanona, naimie lloga uaina oitimaci. Naimaci isoi omoi jaia, naimie lloga uaina jiae oitomoi.

<sup>13</sup>Ero, Jusiñamuidi Abraham micorimo lloga uaina uiñotomoi. Naimiedi Jusiñamuina jira, uanaicinona llote. Taínona lloñede. <sup>14</sup>Abraham micorimo llote: “Ona jaca canoitice. O diga jaca iiticue. Cue llua jira, o jito comuite. O uruiaina eo jebuitaiticue”

llote. <sup>15</sup>Abraham micori naimie lloga uaina iinote. Iena suillemo fecuisse ocuride. Ie jito Isaac micori, Jusiñamui llua isoi, comuide. <sup>16</sup>Uanaicino cai llocabillana jiae comini uiñollena, Jusiñamui mamecina lliinoticaí. "Jusiñamui caina ciode" lloticaí. "Uanaicinona cai lloñenia, Jusiñamui caina duere finoite" lloticaí. Ie jira cai lloga uaina buna uaitañede. <sup>17</sup>Ie isoide. Jusiñamuidi ie finolle rafuena caimo jai llote. Naimie lloga uai meidonillana cai uiñuana naimie jitaide. <sup>18</sup>Naimiedi Jusiñamuina jira, ie uai naimie jai llua jira, naimie tainona llonillana uiñoticaí. Ie jira naimie lloga uai naimie finuana uiñoticaí. Naimiena cai iinuamona, naimie anamo cai illa jira, caina naimie eenua jira, cai comeciai ocuiñocana jaidicai. Naimie illanomo ico cai jaca illemo ocuiridicai. <sup>19</sup>Naie rafuena Jusiñamui llua jira, cai comeciai ocuiñocana jaidicai. Ie lloga uaina naimie finolle iinoticaí. Monamo Jusiñamui illanomo ico cai illena eo raise uiñoticaí. Nainomo fiebillena, barco ie lloelluna illemo dotaja isoi, cai comeciai naganomo iñellena, Jesús caina eenote. <sup>20</sup>Jesús nainomo jai illa jira, naimie muidona nainomo jiaí iiticaí. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micori ñaia uai saiñena isoi, Jesús cai facaina ñaia uai jaca saiñeite.

**Melquisedec micori illa isoi,  
Jusiñamui diga ñairaimana  
Jesús jaide**

**7** <sup>1</sup>Iena omoi raise ubiñollena, Melquisedec micori rafuena omoimo lloiticeue. Naimie micoridi Salem railla nairai ie illaima. Naimiedi comini facaina cai Moo Jusiñamui diga ñairaima. Cinco illaimana Abraham

micori anafefitaja mei, ie jofomo Abraham micori abido billano, naisomo naimie dine Melquisedec micori bite. Abraham micorimo marecinona Melquisedec llote: "Birui Jusiñamui ona canode. Naimie ona jaca canollena uiñoticue" llote. <sup>2</sup>Jusiñamui diga ñairaimana Melquisedec illa jira, naimiemo Abraham micori dajerie rana fecade. Naie cinco illaimana anafefitajanona, naimaci rana bairuanona, nana naie ramona, riai uaimona ie décima facaina rana Melquisedecmo fecade. Melquisedec micoridi Salem railla nairai illaima. Melquisedec mameci oni dobaiñuamona, "Cominina raise marena sedadimie" railla. Ie cominina raise sedajamona, ie comini uri illa jira, comini illano Salem railla mamecina jonega. <sup>3</sup>Naimie moona, naimie eina, naimie cominina uiñoñedicai. Naimie jeiciaruina uiñoñedicai. Naimie fiodaillaruina uiñoñedicai; iadedi Jusiñamui Jito isoi Jusiñamuimona naimie feiñoga uai saiñena jira, comini facaina Jusiñamui diga ñairaimana jaca jaide. Naimie ifomo jiaimie iñena jira, naimie ñairaimana nia ite isoide.

<sup>4</sup>Ero, cai cominimona Abraham micori cai jaiagai baifemo faite; iadedi Melquisedec micori Abraham micori baifemo faite. Ie jira naimiemo ie décima facaina rana fecade. <sup>5</sup>Moisés micorimona Abraham micori uruiai Jusiñamui lloga uaina cacadimaci. Naimacimo Jusiñamui ie sedaja jofo finuana llote. Nainomo maijidinomo nainomo maijiana llote. Abraham micori uruaimona Leví railla nairaina fetode. Nainomo maijidino comini facaina Jusiñamui diga ñaiuidimaci. Jusiñamui ocuica rafue naimaci maijia jira, naimaci comini ramona décima facaina rana feiñouidimaci.

<sup>6</sup>Melquisedec micorimo Abraham micoridi ie rana fecade; iadedi Melquisedec micori Abraham micori cominiñede. Leví railla nairai imieñede. Naisomo Abraham micori dine Melquisedec micori billanona, Abraham micorimo marecinona llote: “Jusiñamui ona jaca canoite. O diga jaca iite” llote.

<sup>7</sup>Melquisedec micori Abraham micori baifemo faia jira, naie marecinona naimemo llote. <sup>8</sup>Ero, Melquisedec micorimo Abraham micori rana fecade; iadedi Melquisedec micori fiodaillaruina uiñoñedicai. Naimie uai sañena jira, jiaimie naimie ifomo jaca iñede. Comini facaina Jusiñamui diga ñairainimo naimaci ramona décima facaina cai judiuai comindí fecauidimaci; ia naie ñairaini fiodaicana jaillana uiñoticai. Naimaci uai sailla jira, jiaño naimaci ifomo meidoudimaci. <sup>9-10</sup>Leví micoridi Abraham jito. Leví micorimona Leví railla nairai comuide. Naimacidi Jusiñamui diga ñairainina jaidimaci. Cominimona décima facaina rana feiñoudimaci. Leví micori nia comuiñenia, Melquisedec micorimo Abraham micori décima facaina rana fecajamona, Abraham micori Leví ie usumana jira, Melquisedec micoridi Leví nairai baifemo faiana uiñoticai. Melquisedec micoridi Jusiñamui diga ñairaini baifemo faiana uiñoticai. Melquisedec isoi Cristo illa jira, Cristodi Leví baifemo faiana uiñoticai. Cristodi nana naie ñairaini baifemo faiana jiai uiñoticai.

<sup>11</sup>Jusiñamui diga ñairaini finouilla rafuedo Jusiñamui jitaila isoi marebicaiñedicai. Naimaci finouilla rafuedo cai jillobidicaidena, jiae rafuena jitaiñedicai. Naie rafuedo cai jillobiñena jira, Jusiñamuidi Cristona orede. Cai facaina Cristo ñairaimana jaillena, naimiena orede. Caina

jillobitallena, naimiena orede, jiae rafuedo cai jillobiñena jira. Jusiñamui Moisés micorimo jaie llua isoi, comini facaina nano ñairaimadi Aarón micori. Naimiedi Leví railla nairai imie. Naimie jitoniaimona comini facaina ñairainina itimaci. Iena uiñotomoi. Aarón jitoniaimona Cristo iñede. Aarón majia rafuemo Cristo duiñede; iadedi Melquisedec rafuemo duide. <sup>12</sup>Comini facaina ñairainina jaillana jai meidua jira, Jusiñamuidi naimaci rafuena jiae meidote. <sup>13</sup>Iena lloitícue. Aaróndi Leví railla nairaimo duide. Dani Leví nairaidi comini facaina ñairainidimaci. Dani naimacidi comini facaina Jusiñamuimo rana fecauidimaci. Cristo naie nairaimo duiñede. <sup>14</sup>Cristo jiae nairaimo duide. Judá nairaimo duide. Judá nairaimona Jusiñamui Jito comuillana uiñoticai. Naie nairaimona comini facaina ñairaimana bu jaillana Moisés micori jiae jaca lloñede.

<sup>15</sup>Cristo billa jira, Moisés micori lloga rafue meiduana uiñoticai. Melquisedec micori illa isoi, comini facaina ñairaimana Cristo jaca iite. <sup>16</sup>Moisés micori lloga rafue isoi, Cristodi ñairaimana jaiñede; iadedi Jusiñamui uaido ñairaimana naimie jaide.

<sup>17</sup>Jusiñamui lloga uaimona iena uiñoticai. David micori naimiena jiae cuega:

Melquisedec micori illa isoi, odi  
comini facaina ñairaimana jaca  
iiitio

cuega. <sup>18</sup>Comini facaina ñairaimana jaillena Moisés micori jaie cuega. Naiemona jilluana comini oñena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci começiaina ocuiñotañedimaci. Naiedo jaillamona, naimaci Jusiñamuina nabaiñedimaci.

<sup>19</sup>Naiedo jaillamona, Jusiñamui jitaila

isoi marebicaiñedicai. Iedo birui jaiñedicai. Jiaie rafuemo birui ocuiridicai. Cristo finoca rafue muidona, Jusiñamuina cai nabaillamona, Jusiñamui diga birui ñairedicai.

<sup>20</sup>Jusiñamui llua jira, Cristo cai facaina ñairaimana jaide. <sup>21</sup>Leví micori jitoniaidi imaci jeiciamona, comini facaina ñairainina jaidimaci. Naga icaiño Jusiñamuidi naimacina ñairainina jaillana fetóñede; iadedi ie lloga uaina jira, Cristo cai facaina ñairaimana jaide. David micori Jusiñamui lluana jiae cuega:

Cue jai llua jira, cue lluana finoiticue.

Cristomo lloticue: “Comini facaina ñairaimana jaca iitio” cuega. <sup>22</sup>Jesús ñairaimana jaca illa jira, naimie jailla rafue Moisés micori lloga rafue baifemo uaide. <sup>23</sup>Moisés micori lloga rafue anamo ailluena ñairainidi itimaci. Naimaci fiodaicana jailla jira, ailluena ñairaini jitaide, fiodaitino ifomo meidlenna. <sup>24</sup>Naimie jaca illa jira, Cristo ñairaimana jaca iite. Naimie ifomo jaca buna meidoñeite. <sup>25</sup>Naimie jaca illa jira, comini facaina Jusiñamui diga jaca ñaicabite. Ie jira Cristodi nana Jusiñamui dibeimo iacardinona, naimaci jeacinomona, ua jaca jillotaredé.

<sup>26</sup>Caína canollena, naimie isoide nanoca ñairaimana jitaídicaí. Ie Moo isoi naimiedi mareuidimie. Naimiemo jeacino jaca iñede. Jeacino finouidino dibeimo naimie iñede. Jusiñamuidi ie ecimo naimieno itatate. Ie jira naimie caína canorede. <sup>27</sup>Jusiñamuimo fecallena, naimaci jeacino facaina naimie iba oñellena, Moisés micori llua isoi, nanoca ñairainidi nagarui toiniaina fatimaci. Dani naimaci jeacino facaina nagarui iese finodimaci. Iemei comini facaina nagarui iese jiae finodimaci. Cristo naimaci isoiñede. Naimie jitailla

jira, comini jeacino facaina naimie fiodailla jira, comini facaina dacaiño fiodaite. Naimaci jeacino facaina naimie dane fiodaíñeite. <sup>28</sup>Moisés micori facai ñairainidi jeacinona finocana jaidimaci. Fiodaicana jiae jaidimaci; iadedi jiae rafue birui illa jira, ie uaido Jusiñamuidi ie Jitona ñairaimana jaillana jai fetode. Naimiedi jaca mareuidimie. Jeacino jaca finoñede.

### Cristo muidona jiae rafue birui ite

**8** <sup>1</sup>Cristomo ite rafuena lloitice. Cai facaina ñairaimana birui naimie ite. Illaímana naimie illa jira, monamo Jusiñamui ecimo ite. <sup>2</sup>Jusiñamui illanomo naimie illanona, nainomo cai facaina birui ñaicabite. Moisés micori facaise comini finoca jofomo Jusiñamui diga ñaíuidimaci; ia birui Jusiñamui finoca illanomo Cristo illamona, cai facaina ñaicabite. <sup>3</sup>Moisés micori naga ñairaima jeacino facaina Jusiñamuimo faga toiniaina fecauilla llote. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fiodaite. <sup>4</sup>Moisés micori jaie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie Jainide. <sup>5</sup>Comini facaina Jusiñamui diga ñaillena, Moisés micori facaise naie ñairaini Jusiñamui jofomo jaisoidimaci. Iemonia Cristo monamo finocabilla rafuena uiñoticai. Monamo cai facaina Jusiñamui diga Cristo birui ñaicabite. Iemo naimie começina facajanona, Jusiñamui jofona Moisés micori jaie niacanía, Jusiñamui naimieno llofueté: “Monamo iticue; ia cue jofo eniruemo jiae finoítomoi. Sinaí railla anedu navui o ia, ona llofueticue. Ona cue llofuiá isoi, cue jofona fino” llofueté. <sup>6</sup>Eniruemo Cristo birui iñenamona, monamo cai facaina

Jusiñamui diga birui ñaicabite. Cristomona cai cacaja rafuedi Moisés micorí facaise ñairainimona cai cacaja rafue baifemo faia jira, Cristodi Moisés micorí facaise ñairainí baifemo faite. Cristomona cai cacaja rafuedi cai comeciai marena itatate. Ie jira, bie rafue jiae rafue baifemo faite. <sup>7</sup>Moisés micorí facaina rafuedo jaillamona, Jusiñamui jitilla isoi buna marebicaiñede. Ie jira Jusiñamui jiae rafue illena llote.

<sup>8</sup>Moisés micorí lloga uaina cai jaiagai iinoñena jira, Jusiñamui jai llote:

Naie cominimo jiae rafuela ico jiairuido lloitue.

<sup>9</sup> Naimaci jaiagaimo cue lloga rafuela jaie llotue.

Naie facaiseconi Egipmona naimacina canuanona, naimacina atidicue; iadedi Moisés micorimo cue lloga rafuedo jaiñedimaci.

Ie jira naimacina fainonocaidicue.

<sup>10</sup> Naimacimo jiae rafuela ico jiairuido lloitue.

Iena naimaci uiñuamona, cuena raise iñoitimaci.

Naimaci Jusiñamuidicuena jira, naimaci cuena sedaitimaci.

Cue anamo raise naimaci illa jira, cue comininitimaci.

<sup>11</sup> Nana naimaci cuena uiñoitimaci. Ie jira naimacimo: “Cai Namana omoi iino” buna niese lloñeite.

Jamai bue isoñinomona cuena iñoitimaci.

Jamai bue isoñedinomona cuena jiae iñoitimaci.

<sup>12</sup> Naimacina cue duenallamona, naimaci jeacinona jaca feitaiticue llote. <sup>13</sup>Jiae rafuela Jusiñamui jai lluamona, Moisés micorimo lloga rafue jai saillana uiñoticaí. Moisés micorí lloga rafue caimo jai duiñede.

Cristomona jiae rafuela birui jai cacadicai.

**Hebreos comini Jusiñamui jofona eníruemo jaie nitimaci. Monamo Cristo birui illanona, Jusiñamui ecimo naimie ite**

**9** <sup>1</sup>Jusiñamuidi Moisés micorimo diga rafuela jaie llote. Naie rafuemona cai fueollena, iena lloitue. Naimena sedajana llote. Naimie sedalle jofo finuana jiae llote. <sup>2</sup>Jusiñamui llua isoi, hebreos comini naie jofona nitimaci. Jedaciede iniroimona finoca jofona nitimaci. Naie jofo jeraimo mena cuartos ite. Nano fo jailla cuartomo Jusiñamuina nagaruí sedadimaci. Nainomo lamparín isoide ra ite. Siete diga naie boadi ite. Mesa jiae ite. Nainomo doce llomenico joide. <sup>3</sup>Mena cuartos illena iniroina sebiñoga. Naie baifemo iticuertodi Jusiñamui illano. <sup>4</sup>Naie iniroi facai oromona finoca mesa ite. Nainomo caímare soride rana jobaisoidimaci. Baifemo iticuertomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruaide guille. Aarón micorí jiguida nainomo jiae ite. Jusiñamui uaido naie jiguida dacaiño llisilla jira, nainomo ite. Jusiñamui cuega nofici ibici jiae ite.

<sup>5</sup>Cajón emodo ibaillabicedi ite. Ie emodomio nagafebei dine oromona finoca mena Jusiñamui jaienici joreño ite. Conimamo fo eruaide. Naie motomo Jusiñamui quenirena baireuide. Naie rafuela raise omoi jai uiñua jira, iena omoimo are lloñeitue.

<sup>6</sup>Naie isoide rana finodimaci. Iemei Jusiñamui diga ñairainimona damierie nano fo jailla cuartomo nagaruí jaidimaci. Moisés micorí llua isoi, nainomo ite rafuela finollena, iedo jaidimaci. <sup>7</sup>Baifemo iticuertomo jaca

jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibaillabicingo llerede. Dama naimie jeacino facaina diruena nano llerede. Chivo fajanona, dane fo jaide, ie comini jeacino facaina diruena llerellena. Iena finuamona, cominina duenaillamona, Jusiñamui naimaci jeacino facaina ibana oñede.<sup>8</sup> Jusiñamui Joreño caina llofuiamona, biena birui uiñoticai. Naie jofo nia ia, jamai comini fo jainina jira, Jusiñamui diga, cominidi atona nabairinidimaci.<sup>9</sup> Bie rafuena birui nia finodimaci. Moisés micori lloga uaido bu jaia, ie jeacino facaina faga toiniaina Jusiñamuimo fecallena jobaide. Iena finocabidimaci; iadedi Jusiñamui jitaila isoi, naiemona naimaci comeciaína raise finonidimaci.<sup>10</sup> Jusiñamuina naimaci raise sedallena, Moisés micoridi diga guille famaide. Jiruana jiai famaide. Naimaci abiaina finollena jiai llote. Nie isoide guille, nie isoide jirolle, niese naimaci abiai finollena, nana naie isoide rafuedo jaidimaci. Cristo nia biñena facaiseconi iesen jaidimaci, naimaci comeciaína raise finobitallen; iadedi Cristo billamona, jiaie rafue birui ite.

<sup>11</sup>Moisés micori finoca jofomo Jusiñamui díne Cristo jaiñede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidicai. Cai comeciaí raise jai finobide.<sup>12</sup> Naimie fiodailla mei, dane jilluanona, Jusiñamui díne monamo naimie abide jaide. Toiniai diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi dacaiño naimie fiodaillamona, naimie diruedo cai jeacino facaina caina jillotate.<sup>13</sup> Maraiñede rafuena finoia, Moisés micori llogacino anamo itino

Jusiñamuina sedallena, naimie jofomo jainidimaci. Moisés micori jaie llua isoi, toiniai diailla mei, jobaide toiniai ie jusefo oni faianona, Jusiñamui jofomo jairedimaci. Nainomo naimienia sedallena, fo jairedimaci. Lemona Jusiñamui naimacina duere finoñede.<sup>14</sup> Toiniaina fañeno Jusiñamuina birui sedadicai. Cristo fiodaicacina jira, naimie diaillamona, cai jeacino facaina Jusiñamui caina duere finoñeite. Cristo comeci jitaila jira, Jusiñamui Joreño naimienia oretaja jira, naimie fiodaite. Cristodi Jusiñamui Jitona jira, naimiemo jeacino iñena jira, cai jeacino facaina naimie fiodaillamona, cai comeciaína raise finobitade.<sup>15</sup> Cristo jai finoca rafue muidona, Cristo monamo jailla jira, jiaie rafue birui ite. Bie rafuedi comini Jusiñamui diga jaca illena llote. Nana Jusiñamuina iñotino ie. Moisés micori lloga uai anamo itinodi jeacinona finocana jaidimaci. Naimaci jeacino facaina faga toiniaina Jusiñamuimo jaie fecauqidimaci; iadedi Cristo jai fiodailla jira, naimienia bu iñonia, naimie jeacino facaina Jusiñamui birui ibana oñete. Nana Jusiñamuina iñotinodi naimie jai llua isoi, naimie diga jaca itimaci.

<sup>16-18</sup> Jusiñamui jofo jaie finua mei, Moisés micorimo Jusiñamui llote: “Cue lloga rafuena raise finodomoi. Bie jofomo cuena sedallena, faga toiniai dirue diga bie jofona llereca. Nana naiemo ite rana jiai llereca. Iena o finuamona iobiticue. Cue lloga uai finocana mai o jai” llote. Iese naie rafue jaie tainede. Cristo fiodailla jira, Jusiñamuimona birui jiaie rafue caimo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai jeaconomona jai jillobidicai.<sup>19</sup> Ie cominimo nana naimiemo Jusiñamui lloga rafuena

Moisés micori llua mei, faga jurareta dirue diga, faga chivo dirue diga, nana naie lloga rafue cuegabiaina llerede. Cominina jíai llerede. Naie dirue jinui diga nano faite. Febecode ra jiairede iniroi diga maiga. Iemei naie ra diga naie diruena llerede.<sup>20-21</sup> Jusiñamui jofona dirue diga llerede. Nana nainomo ite rana jíai llerede. Llote: "Jusiñamui llua isoi, biena finodicue. Naimie llua jira, bie dirue illa jira, naimie caína duere finoñeite".<sup>22</sup> Moisés micorimo Jusiñamui llua isoi, raise finobilena, nana rana dirue diga llerede. Toiniai fajamona, dirue illa jira, Jusiñamuidi jeacino facaina ibana oñede; iadedi jeacino facaina iba oñellenia, jíiae rafuena Moisés micorimo lloñede.

**Cristo fiodailla jira, Jusiñamui cai jeacinona oni dotade**

<sup>23</sup> Jusiñamuidi Moisés micorimo toiniaína fajana jaie llote. Naie lluana finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toiniai baifemo faia jira, monamo cai jaca illena, jeacinona oni dotallena, Cristo fiodaite.<sup>24</sup> Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite.<sup>25</sup> Dacaiño cai facaina monamo Jusiñamui dine naimie jaide. Moisés micori facaise nanoca ñairaima Cristo isoñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toiniaína fajanona, ie diruena uite.<sup>26</sup> Cristo iese itena, nano facaisemona diga icaiño comini jeacino facaina naimie fiodaite. Iese iñena jira,

eniruemo birui dacaiño naimie billanona, naimie jitaila jira, naimie dacaiño fiodaite. Jeacino anamo cai iñellena fiodaite.<sup>27</sup> Nana dacaiño fiodaitecái. Iena uiñoticai. Fiotailla mei, Jusiñamui uicomó iiticai. Naimienca iinoia, caina feiñoite. Naimienca iinoñedinona duere finoite.<sup>28</sup> Dacaiño Cristo jai fiodaillana uiñoticai. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie billemo iocire ocuiritinona monamo Jusiñamui illanomo uite.

**10**<sup>1</sup> Moisés micori facaise naie ñairainidi Jusiñamuimo fecallena, toiniaína fajanona uisoidimaci; iadedi Jusiñamui jitaila isoi, nailemona marebicaiñedimaci; iadedi Moisés micori lloga uaimona jeacino cai finuana uiñoticai. Jusiñamui cai jeacino oni dotajana uiñoticai. Jusiñamui jaca mareuidimiena uiñoticai. Jusiñamuina nabaillena janore uiñoticai. Cristo jíiae rafue caimo jai iga. Naimie fiodailla jira, cai jeacino jai feide. Jusiñamuina raise nabairedicai.<sup>2</sup> Naie faga toiniai Jusiñamuimo fecajamona comini marebicaidena, naíena fecarainidimaci. Naimaci jeacino dacaiño dotaiaidedi, faga toiniaína dane fecañedimaci; iadedi naimacimo jeacino jaca illa jira, faga toiniaína fecauidimaci.<sup>3</sup> Naíena fecauillamona, jeacinona finocana naimaci nia jaillana uiñotimaci.<sup>4</sup> Toiniai dirue illa jira, Jusiñamuidi comini jeacinona jaca feitañede. Dama Jesús dirue illamona, Jusiñamuidi comini jeacinona feitate.<sup>5</sup> Eniruemo jaie billanona, Jusiñamuimo iena Cristo llote: Jeacino facaina toiniai fajana jai jitaiñedio. Ie jira eniruemo comena jaillena, comini jeacino facaina cue fiodaillena, cuena oredio.

<sup>6</sup> Jeacino facaina ailluena faga  
toiniaina jai jitaiñedio.

<sup>7</sup> Iena cue uiñuamona, eniruemo cue  
billanona, o jitaila rafuena  
finoiticue.

O facaina lloraini micoriai iena jaie  
cuetimaci

llote. <sup>8</sup>Cristo lluana dane ñaiticue.  
Cristodi Jusiñamui Moisés micorimo  
llogacinona ñaite. Jusiñamui jaie llua  
isoi, naimiemo cominidi jeacino facaina  
faga toiniaina jaie fecauqidimaci. Iena  
Jusiñamui birui jai jitaiñede. <sup>9</sup>Cristodi:  
“Jusiñamui jitaila rafuena finuabiticue”  
lluamona, Moisés micorimo llogacino jai  
saillana uiñoticaí. Jiaie rafue birui illana  
jiai uiñoticaí. <sup>10</sup>Jusiñamui jitaila jira,  
Jesucristona orede. Cai facaina naimie  
fiodaillena naimiena orede Jesucristo ie  
Moo jitailacínona finuamona, cai  
jeacinomona jai jaca jillobidicai. Jai  
marebicaidicai.

<sup>11</sup>Nana Moisés micori llogacinodo  
jaide ñairainidi nagarui comini jeacino  
facaina faga toiniaina Jusiñamuimo  
fecauqidimaci; iadedi naie rafue naimaci  
finuamona, Jusiñamui naimaci  
jeacinona feitañede; <sup>12</sup>iadedi dacaiño  
Cristo fiodaillamona, Jusiñamuidi nana  
cai jeacinona feitate. Bene naimie  
finoacaga rafue fuilla jira, illaimana jira,  
Jesús Jusiñamui ecimo abido jaide.

<sup>13</sup>Nana naimie dibeimo iñedinona  
naimie emodofillemo naimie birui  
ocuiride. <sup>14</sup>Dacaiño Cristo  
fiodaillamona, naimiena cai iiñuamona,  
Jusiñamuima jaca marebicaidicai.  
<sup>15</sup>Jusiñamui facaina lloraima micori  
cuegafuemonia Jusiñamui Joreño caina  
ieno uiñotade. Naimie facaina lloraima  
micori Jusiñamui lluana jaie iese cuega:

<sup>16</sup> Hebreos cominimo jiaie rafue ico  
jiairuido lloitice.

Cue rafuena naimaci uiñuamona,  
cuena raise iinoitimaci.

<sup>17</sup>Jiai cuega:

Naimaci jeacino jaca feitaiticue.

<sup>18</sup>Cristo jai fiodailla jira, jeacinona  
Jusiñamui jai feitaja jira, faga toiniaina  
naimiemo fecajana dane jai jitaiñede.

### Jusiñamuina cai nabailli

<sup>19</sup>Cue amatiai, Jesús fiodailla jira,  
Jusiñamuina jaciruiñeno birui  
nabairedicai. Naimie cai Moo jai  
illanona, naimie diga meiruiñeno  
jaciruiñeno birui jiai ñairedicai.

<sup>20</sup>Moisés micori facaise nanoca  
ñairaima fo iticuartomo jaillena,  
sebiñoga iniroi oni dibeimo jaidimaci.  
Iese Jusiñamui illanomo ridimaci. Jamai  
comini nainomo Jainidimaci; iadedi  
Cristo jai fiodailla jira, Jusiñamuina  
atona birui nana nabairedicai. Naimie  
diga birui atona nana ñairedicai.

<sup>21</sup>Cristona jai cai iiñua jira, cai facaina  
nanoca ñairaimana naimie illa jira, <sup>22</sup>cai  
mare comeciaimonia Jusiñamui diga  
birui cai ñailli. Naimiena eo cai  
iiñuamona, cai comeciai jeanillamona,  
naimie dibeimo cai bautizajamona,  
naimiena mai cai nabailli. <sup>23</sup>Cristo caina  
jilluana iiñoticaí Monamo naimie diga  
cai illemo ocuridicai. Jusiñamui  
iiñogamienna jira, naie rafuena iiñocana  
mai cai jailli. <sup>24</sup>Jiaie creyentiaimo cai  
comeciaina cai facaja. Conini cai  
isiruitacana cai jailli. Coninimo cai  
mare rafue finocana cai jailli. <sup>25</sup>Rollena  
omoimona damierie oficabiñedimaci.

Naimaci isoi omoi iñeno; iadedi  
Jusiñamuina sedallena oficabi. Abido  
omoi danomo jaiñellena, conini  
comeciaina ocuiñotallena, oficabi.  
Jesucristo abido billirui iairei illa jira,  
naimiena raise iiñollena, conini omoi  
comeciai ocuiñocana mai omoi jai.

<sup>26</sup>Cristo finoca rafuena bu uiñua mei,  
ieno naimie iinoñenia, jeacinona naimie  
finocana jailla jira, Jusiñamui naimie

jeacinona feitañeite. Cristo fiodaillana bu jamaia, Jusiñamui ie jeacinona feitañeite;<sup>27</sup> iadedi Jusiñamuidi naimiena duere finoite. Eo jacirede rafue anamo iite. Iraimo Jusiñamui nana naimie dibelmo iñedinona duere finoite.<sup>28</sup> Moisés micori jaie cuega: “Jusiñamui llote: ‘Menamie naimiena daje isoi lloillamona, Moisés micori llogacina jamaidimena dueruiñeno meinega’”.<sup>29</sup> Iese duere sefullana jaie llote; iadedi birui ite lloga rafue bu jitaiñenia, bai duere sefuite. Jusiñamui Jitona bu jitaiñenia, Jusiñamui birui lloga uaina bu jitaiñenia, Cristo fiodaillana bu jamaia, Jusiñamui Joreñona jeare bu ñaia, Jusiñamuimona naimie eo duere sefuite. Cristo fiodaillamona, Jusiñamui naimiena iñotimienna marebicaítarede. Jusiñamui Joreño naimiena duenaite; iadedi iena naimie jai jamaitaia, iena naimie jai jitaiñenia, Jusiñamui naimiena bai duere finoite.<sup>30</sup> Ero, Jusiñamui jaie llote: “Maraiñedicinona bu finoia, ibana oiticue. Cuena iinoñedinona duere finoiticue” llote.<sup>31</sup> Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoi iñellenia, Jusiñamui lloga rafuena jamaiñeno.

<sup>32</sup> Creyentiaína nano omoi jaillamo dane comeciaína faca. Creyentiaíñedinomona eo duere sefuidomoi; iadedi Cristona iñocana jaidomoi.<sup>33</sup> Omoimona damierie marefomo navui duere sefuidomoi. Omoiri jaisitímaci. Omoina jifanododimaci. Omoina jeare finodimaci. Damierienia meineticimaci.<sup>34</sup> Cárcelmo jonetinona duenallamona, naimacina canocabidomoi. Cristomo omoi duilla jira, creyentiaíñedino omoi rana bairodimaci; iadedi omoi comeciaínia iocire itomoi. Omoi ramo omoi

comeciaína eo faceñedomoi; iadedi Cristomo jai omoi duilla jira, naimie omoi comeciaína jaca marebicaítaja jira, iemo omoi comeciaína facajamona, iocire itomoi.<sup>35</sup> Jusiñamuimona iba ico omoi feiñua jira, Cristona nia iñocana omoi jai.<sup>36</sup> Jusiñamui jitailacino omoi finollena, monamo jaca omoi illena, nie isoide ramo omoi jiria, Jusiñamuina nia iñocana omoi jai.<sup>37</sup> Jusiñamui biena llua jira, iese suite:

Cristo abido billirui iairei illa jira, naimiena iñocana omoi jai.

<sup>38</sup> Naimie nia abido biñenia, omoina cue jai marebicaítaja jira, cuena iñocana mai omoi jailli; iadedi cuena jitaiñedinori iobiñedice.

<sup>39</sup> Naie isoidino jillobiñeitimaci. Naimaci isoi iñedícai. Jusiñamuina iñocana cai jaillamona, jaca jillobidicai. Ie jira naimiena iñocana mai cai jailli.

### Jusiñamuina iñocana jaidicai

**11** <sup>1</sup> Jusiñamuina cioiñedicai; iadedi naimie illana iñoticai. Naimie lloga uaina iñocana jaidicai. Naimie lloga uai suillena iñoticai. Ie lloga uai suillemo ocurridicai.<sup>2</sup> Cai jaiagaimona damierie iese iñocana jailla jira, Jusiñamuimona marebicaídmaci.<sup>3</sup> Jusiñamui finoca rana birui ciódicai; iadedi jaie nano dofoconi jaca buena iñede. Naie facaiseconi dama ie uaido Jusiñamuidi eniruena finode. Mona finode. Nana rana finode. Nana rana comuitate. Iena iñoticai.

<sup>4</sup> Cai jaiagai rafuena ja lloitue, naimona cai fueollena. Abel micori Jusiñamuina jaie iñuamona, naimiemo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Caín raise iñoñena jira, naimie fecaca rari iobiñede. Iena

feiñoñede. Abel micorí Jusiñamuina iinua jira, Jusiñamuimona naimie marebicaide. Abel micorí jaie fiodaite; iadedi Jusiñamuina cai raise iinollena, naimiemona nia fueoiticai.

<sup>5</sup>Enoc Jusiñamuina jaie iinote. Naimiedi Jusiñamuina eo iobitate. Moisés micorí cuegafuiaimona iena uiñoticaí. Jusiñamuina iinuamona, Jusiñamuina eo iobitaja jira, naimie fiodañede; iadedi fiodañeno monamo Jusiñamui naimiena namienna uite. <sup>6</sup>Jusiñamuina cai iinoñenia, naimiena iobitañedicai. Jusiñamuina cai nabaiacania, naimiena cai raise sedaacania, naimie illana iinoticaí. Naimiena cai nabaiacania, cai jitai raillano, caña canollena iinoñicaí.

<sup>7</sup>Noé micorí Jusiñamuina jaie jiai iinote. Jusiñamui ico suille rafuena naimemo llote. Enirue buillena llote. Iena iinuanona, Noé micorí aillue balsa emodomio jofona finode. Enirue buillamona ie comini diga jilloiacana jira, Jusiñamui llua isoi, balsana finode. Jusiñamui lluana Noé micorí iinua jira, jillode. Noé micorí Jusiñamui lluana iinote; iadedi naimie facaise ite comini iinoñena jira, Jusiñamui riicallafue anamo itimaci. Jusiñamuina naimie iinua jira, Jusiñamui uruena naimie jailla jira, Jusiñamuimona Noé micorí marebicaide.

<sup>8</sup>Abraham micorí Jusiñamuina jaie jiai iinote. Ie moo eniruemona naimie jaianillena Jusiñamui naimemo llote. Are ite eniruemona naimie jaianillena llote. “Jiae enirue omo iiticue” Jusiñamui llote. Abraham micorí iinote; iadedi ie jaillinona uiñoñede. <sup>9</sup>Jusiñamui lloga eniruemona Jusiñamuina iinocana jaide. Naie eniruemona ride; iadedi naie enirue naimemo nia raise duñede. Chivo itiraimona niga iniroimona sebiñoga jofomo naimie jaca

ite. Ie jito, Isaac micorí, naie isoide jofomo jiai ite. Isaac micorí jito, Jacob micorí, naie isoide jofomo jiai ite. Jusiñamuidi nana naimacimo daje isoide rafuena llote: “Bie enirue omoimo iiticue” llote. <sup>10</sup>Abraham micorí mare jofona finoñede, naie eniruemona naimie jaca iacaiñena jira; iadedi Jusiñamui diga monamo jaca illemo naimie ocuride. Monamo Jusiñamui mare finolle illanomo ocuride.

<sup>11</sup>Abraham micorí aidi Sara micori. Jusiñamuina Sara micorí iinua jira, Jusiñamui naiñaiño abina mafritate. Naiñaiño eo jionaide; iadedi uruesite. Naiñaiñomo Jusiñamui llua isoi, naiñaiño uruesillana iinote. <sup>12</sup>Abraham micorí jiai eo jionaide; iadedi jitona comuitate. Naimie jitomona naimie nairai eo jebuide. Facadonide ucuaí isoi jebuidimaci. Facadonide conillie isoi jebuidimaci. Ailluena ucuaí illa jira, naimaci facadonidicai. Ailluena conillie illa jira, iena facadonidicai. Ie isoide. Eo ailluena Abraham micorí uruiaí illa jira, naimacina facadonidicai.

<sup>13</sup>Abraham micorí, Isaac micorí, Jacob micorí Jusiñamuina iinocana jaidimaci. Nana naimacimo Jusiñamui lloga uaina suiñedemo fioldaitimaci. Nia fioldaiñenia, Jusiñamui llogacinona cacadimaci. Iena iinotimaci. Ie jira bie eniruemona naimaci jaca illemo comeicina facañedimaci;

<sup>14</sup>iadedi monamo jaca illemo comeiciaína facadimaci. <sup>15</sup>Naimaci jaie billa eniruemona comeiciaína naimaci facadena, nainomo abido jaidimaci; <sup>16</sup>iadedi jiae illanomo comeiciaína facadimaci. Jusiñamuina nabaillemo, monamo Jusiñamui diga jaca illemo comeiciaína facadimaci. Naimiena naimaci iinua jira: “Jusiñamuidi cai Moo” naimaci raia, Jusiñamui naimaciri meidaiñede. Ie jira monamo Jusiñamui naimaci illinona jai finode.

<sup>17-18</sup>Jusiñamuina Abraham micori iinua jira, ie jitona comuitate. Jusiñamui Abraham micorimo llote: "O jito Isaacmona o nairai eo jebuite" llote. Iemei Jusiñamui Abraham micorina facacite. Abraham micori naimiena iinuana raise uiñollena, facacite. "O jitona fano" Abraham micorimo llote. Abraham micori Jusiñamuina iinuanona, ie jito faiacade. <sup>19</sup>Le jito fiodaillemona, Abraham micoridi Jusiñamui naimiena jilloitallena iinote. Isaac micori fiodaiñede; iadedi fajamona jillode.

<sup>20</sup>Isaac micori Jusiñamuina jiai iinote. Naimie fiodaiacania, Jusiñamui ie llogacino finollena iinuamona, mena ie urue iaímaiamo ie uaina fecade. Llote: "Jusiñamui llua isoi, jebuicana jaitomico". <sup>21</sup>Jacob micori Jusiñamuina jiai iinote. Naimie fiodaiacania, Jusiñamuimo jiihanona, ie jiguidamo juita naidaidemo, José micori ie mena urue iaímaaimo marecinona llote. Jusiñamui ie llogacino finollena iinuanona, llote: "Jusiñamui llua isoi, jebuicana jaitomico. Naimie omicona canoite" llote. <sup>22</sup>José micori fiodaiacania, ie cominimo llote: "Jusiñamui omoina canuano, Egipтомона ico jiairuido omoi jaillena iinoticue. Omoi jaia, cue illaiciaina omoi diga uiño. Canaan raiilla eniruemo omoi ria, nainomo cue illaiciaina raino".

<sup>23</sup>Moisés micori moo, ie ei diga Jusiñamuina jiai iinotiaímaiai. Hebreos comini jebuiñellena, naie facaiseconi Egipто illaíma nana hebreos iisaiaína meiniana llote. Iaímaiai jito jeicia mei, iaímaiai uruena daje amani fivui reidiiamaiai. Jusiñamuina iinuanona, naimie maresana eruilla jira, jaciruiñeno naimiena jofomo fo reide. Illaíma lluamona Jusiñamui naimiena

jillotajana iinotiaímaiai. Le jira Faraón jisa anamo comuide. Faraón di Egipto nairai illaíma. <sup>24</sup>Moisés micori Jusiñamuina iinote. Naimie eimienamona, naimiedi Faraón jisa ie jitona mamecireacaiñede; <sup>25</sup>iadedi naimiedi Jusiñamui naimiena ie cominina Egipтомона jillotajana iinote. Jusiñamui naimie fetua jira, ie comini dibeimo naimie iacade. Le comini diga duere sefuiacade. Jusiñamuina iinoñedino diga ie comeci jamai iobitaiacaiñede. <sup>26</sup>Faraón jisa anamo naimie comuilla jira, naimiemo eo aillue rana ite; iadedi Egipтомо ite ebirede ramo ie comecina eo facañede. Jusiñamuimona iba naimie ico feiñoiacana jira, Jusiñamui Jito billemo ie comecina facajano, duere sefuide. <sup>27</sup>Le jira Egipтомона Moisés micori Faraóna jaciruiñeno oni jaide. Jusiñamui naimiena eenuana iinote. Jusiñamuina cioiñede; iadedi Jusiñamui illana naimie iinua jira, iinocana jaide.

<sup>28</sup>Jusiñamui ie cominina jillotajana Moisés micori iinua jira, Jusiñamui llua isoi, pascua raiilla rafuena finode. Le cominimo toica llauda fallena llote. Le dirue nase fuemo jidellena llote. Naie naio Jusiñamui jaienici nana nano doforanina meinesiñellena, Jusiñamui lluana finodimaci. <sup>29</sup>Egipтомона naimaci billa mei, jiairede raiilla monaillai ruica dine jaillena, Jusiñamuina iinotimaci. Jusiñamui Moisés micorimo lluana naimaci iinuamona, jinui motodo saferedifodo ruica jaidimaci; iadedi Egipto soldaduai daje isoi ruica jaiacadimacimo, nana corobaitimaci.

<sup>30</sup>Canaán raiilla eniruemo hebreos comini rilla mei, Jericó raiilla nairai dine ridimaci. Jusiñamuina iinuanona, Jusiñamui llua isoi finodimaci. Siete digarui Jericó ecimo naimaci macarilla

mei, Jusiñamui llua isoi, naie llaigafo ana bijide. Naie nairaina emodofidimaci.<sup>31</sup> Naie facaiseconi Jericómo Rahab micori fiodaiñede. Naiñaiñodi callirediñaiño. Nana Jericó comini Jusiñamuina iinoñena jira, fiodaitimaci; iadedi jofue iñenanomo, nia Canáamo hebreos comini riñena facaise, Jusiñamui finoca rafuena naiñaiño fidiano, naiñaiño Jusiñamuina iinote. Mena hebreos comini iaímaiana naiñaiño feiñua jira, Jericó nairaina emodofilla facaise naiñaiñona meineñedimaci.

<sup>32</sup>Diga jiae comini Jusiñamuina iinocana jaidimaci; iadedi nana naimaci finoca rafuena cue cuellena, abi juanide. Naimacimona damierie mameciaina jamai cueiticue: Gedeón micori, Barac micori, Sansón micori, Jefté micori, David micori, Samuel micori Jusiñamui facaina jaie llorainina jiae eo cueñeiticue.<sup>33</sup> Jusiñamui naimacina canuamona, iinotimaci. Ie jira damierie naimaci bacauaina emodofidimaci. Illaíma isoi jiaíno naimaci cominina raise marena sedadimaci. Jusiñamui llogacino suillana ciódimaci. Leones naimacina rriacanamona damierie jillode.<sup>34</sup> Iraimo usillamona damierie jillodimaci. Lloebi diga meiniamona damierie jillodimaci. Jiaíno jamai bue isoidino; iadedi jamai bue isoiñedina jaídimaci. Jobaime raise finuamona, jiaíno imaci bacauai soldaduaina judaisitade.<sup>35</sup> Dañaiñorie riñoniaimona uruiai fiodailla mei, fiodaillamona Jusiñamui damierienai jillotate. Illaicomiminona jiaíno duere fiodaitimaci. Jusiñamuina faínnonocaiacaiñena jira, naimacina meineticimaci. Naimaci fiodaiacania, monamo Jusiñamui diga ico jaca illena naimaci iinua jira, Jusiñamuina faínnonocaiñeno fiodaitimaci.<sup>36</sup> Jiaíno

duere sefuidimaci. Naimaciri jaísitimaci. Naimacina jeare ñaitimaci. Rao diga naimacina duere fatimaci. Damierienai maianona, cárcelmo jonetimaci.<sup>37</sup> Damierie nofici diga fairinuamona, meineticimaci. Damierie ramo faitimaci. Meinellena, naimacina serrucho diga denaisite. Damierie lloebi diga meineticimaci. Jiaíno buenidimaci. Naimaci iñiroi jamai igoí ie. Dueredimaci. Naimaci iñiroi raise iñede. Aime guisoidimaci. Jiae cominimona duere sefuisoidimaci.<sup>38</sup> Jiae cominimona jamai bue isoidimaci; iadedi Jusiñamuimona jamai bue isoñedimaci. Damierie jofonidimaci. Ie jira jamai jai jaicaisoidimaci. Jofue iñenanomo jaidimaci. Eniruemo jamai biita iniuidimaci.<sup>39</sup> Jusiñamuina iinocana jaidimaci. Naimaci finoca rafuemona Jusiñamui comini naimaci illana uiñoticai. Jusiñamuina iinotimaci; iadedi nana naimacimo Jusiñamui lloga rafue naimaci illa facaise suiñede.<sup>40</sup> Jusiñamui jitalla jira, naimaci illa facaise nana naimacimo lloga rafue suiñede; iadedi naimie jitalla jira, fiodaillena Cristona jai orede. Ie cominina birui cai jiae jaillena, Cristona jai orede. Ie jira cai diga danomo monamo Jusiñamuina nabaitimaci. Nana naimie lloga rafue jaca suite.

Jesús finoca rafuemo cai  
comeciaina cai facallí

**12**<sup>1</sup>Cai jaiagai Jusiñamuina iinocana jaillana uiñoticai. Ie jira caidi naimaci isoi, Jusiñamuina iinocana birui mai cai jailli. Marena riire cai aisiacania, ailluena rana abiñedicai. Ie isoide. Jeacinona cai finoñellena, naimiena raise cai iinollena, jeacino finuacinona mai cai fainonocaiilli. Nie isoide rafue caimo ia, Jusiñamui jitillacina finocana mai

duere cai jailli. <sup>2</sup>Jesús finoca rafuemo cai comeciaina cai facallí. Cai jeacino facaina naimie fiodailla jira, cai comeciaina naimie ocuiñotajanona, Jesúna iinoticai. Cruzmo maraiñedimie isoi fiodaite. Fiodaillamona jilluana naimie uiñuamona, naimie fiodaite. Ie Moo ecimo dane illena naimie uiñuamona, iocire fiodaite. Illaimana naimie illamona, ie Moo ecimo birui ite. Jesúmo cai comeciaina facajamona, caimare mai cai jailli. <sup>3</sup>Jusiñamui dibeimo iñedinomona Jesús eo duere sefuide. Ie isoi cai duere sefua, Jesúmo cai comeciaina facajamona, cai comeciaina ocuiñotacana mai cai jailli. <sup>4</sup>Jusiñamui dibeimo iñedinomona duere sefuillamona, Jesús isoi duere nia sefuiñedomoí. Omoina nia meineñedimaci. <sup>5</sup>Duere omoi sefua, bie jaie cuegafuiaina feitañeno. Naimie cominina omoi illamona, Jusiñamui llote:

Cue uruiaí, omoína cue duere finoia, cuena nia iino.

Duere sefuillamona, cuena fainonocaiñeno.

<sup>6</sup> Omoina cue isiruillamona, omoína duere finodice.

Cue dibeimo omoína raise itatallena, omoína duere finodice.

Nana cue cominina cue llofuecabillamona, naimacina duere finodice

llote. <sup>7</sup>Naimie jitaillocinona cai finollena, caina duere finode. Ie uruiaina cai illamona, caina duere finode. Ero, nana ie uruiaina isiruillamona, naimaci ie jitaillocinona finollena, naga eniruemo ite moo ie uruiaina duere finocabide. Ie isoide Jusiñamui. Ie jitaillocinona cai finollena, caina duere finocabide.

<sup>8</sup>Caina iinotallena, Jusiñamui caina

duere finoñenia, naimie cominiñediaci. Naimiedi nana ie cominina duere finocabide. <sup>9</sup>Cai eniruemo ite cai mootiai caina duere finoia, naimaci uaina iinoticai. Ie isoide. Cai Moo Jusiñamui caina isiruillamona, caina duere finoia, naimie uaina cai iinua. Naimiena cai iinuamona, monamo naimie diga ico jaca iiticai. <sup>10</sup>Naimaci comeciai llua isoi, cai eniruemo ite mootiai dallu caina duere finode. Cai Moo Jusiñamui caina llofuelleña, caina duere finode. Naimie illa isoi, mare rafue dibeimo caina itataiacade. <sup>11</sup>Jusiñamuimona duere cai sefua, iena gaiñediaci. Iena jitaiñediaci; iadedi naiemona cai fueoia, jeacinona dane cai finoñellena, naimie jitalla isoi marcinciona finocana jaiticai.

### Jusiñamui rafuena cai cacaia, ienca cai aruiruiñena

<sup>12</sup>Nie isoide ramo caimo jiria: “Jusiñamui caina nibai canoñede” raiticai. Lemona naimiena fainonocaiacadacai; ia iemo cai comeciaina cai faceñena. Jusiñamui rafuena cai sefuiruia, duere cai sefua, nie isoide rafue caimo ia, cai comeciaina ocuiñocana mai cai jailli. Jusiñamui caina canuamona, naimiena cai raise iinuamona, cai comeciai ocuiñocana mai cai jailli. <sup>13</sup>Jiae rafuedo cai jaiñena; iadedi Cristo rafuedo raise iinocana mai cai jailli. Iese cai jaia, Cristo rafuedo naimaci jiai raise jaillena, jiae creyentiaina canoiticaí.

<sup>14</sup>Nana comini diga uri omoi i. Jusiñamui jitalla isoi, marcinciona fino. Iese bu iñenia, Jusiñamui jitalla isoi bu marebicaiñenia, Jusiñamui illanomo jaca iñeite. <sup>15</sup>Jusiñamui caina duenallamona, nana cominina jillotaiacade. Omoimona buna Jusiñamui duenallacínona

fainonocaillana jitaiñedicue. Omoimo iese suia, iemona comini gaiñenacino comuirede. Iena jitaiñedicue. Omoi comeciai daje isoi lloillana jitaídicue. <sup>16</sup>Jearede rafuena jaca finoñeno. Esaú micori jaie finoca rafuena uifñotomo. Jusiñamui ie moo Isaac micorimo mare rafuena suillena llote. Esaú nano doforamiena illamona, ie moo fiodaille mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fiodaiñena facaise dacaiño Esaú aimetailla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitaila ramo comeciná facade. <sup>17</sup>Ie amamo ie uaina fecaja mei, ie comeci iuai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede; iadedi ie moo ie uai naimiemo jai fecanide. Jusiñamui lloga rafuemu Esaú comeciná facañede. Naimie isoi Jusiñamui rafuena omoi jamaiñeno.

<sup>18</sup>Moisés micori facaise cai hebreos cominimo Jusiñamui ie rafuena jaie llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiai jitibicaide. Nainomo aifi eo ite. Eo boriuide. Eo gurude. <sup>19-20</sup>Trompeta ficirenana cacadimaci. Iena ciuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toiniae nainomo macaria, nofici diga fairiuamona, naimieno omoi meine” llote. Jusiñamui lluana cacajamona, eo jaciruitimaci. Moisés micorimo: “Jusiñamui caimo nia lluana jai jitaiñedicai” llotimaci. <sup>21</sup>Eo jacirede ra illa jira, nana comini diga Moisés jiai

jaciruite. <sup>22</sup>Sinaí anedumona lloga rafuedo birui jaiñedicai; iadedi jiae rafuedo birui jaidicai. Birui Jusiñamuina atona nabaidicai. Cai hebreos comini isoi, Sión railla anedumo Jerusalémo Jusiñamui jofomo naimieno nabaillena jaiñedicai. Monamo Jusiñamui ite; iadedi birui naimieno atona nabairedicai. Cai fiodaia, naimie dine jaiticai, naimie diga jaca cai illena. Nainomo ie jaienisaí naimiemo iobillacinona fecacabidimaci. <sup>23</sup>Ailluena comini diga, Cristona birui iinoticai. Nana caina Jusiñamui fetuanona, cai mameciai monamo ite rabenicomo jai cuega. Jusiñamui nana comini comeciaina uiñote. Naimieno iinotinomona ailluena jai fiodaitimaci; ia naimie ecimo naimaci joreñuai jiai jai itimaci. <sup>24</sup>Jesús fiodailla jira, Jusiñamuina nabairedicai. Naimie fiodailla jira, caimo jiae rafue birui ite. Naie rafuena cai iinuamona, cai comeciai jai marena iticai. Jiai cai jeacinona oni dotade. Iena jiai jai feitate. Abel micori jaie fiodaia, naiemona Jusiñamui buna ie jeacinona feitafñede; iadedi Jusiñamui Abel micori meinetiñiemo ibana ote.

<sup>25</sup>Ero, Jusiñamui rafuena omoi cacaia, iena jamaiñeno. Iena aruiruiñeno. Moisés micori facaiseconi naie comini Jusiñamui lloga rafuena cacadimaci. Jiaño iena jitaiñedimaci. Iena iinoñedimaci. Ie jira Jusiñamui naimacina duere finode. Cristomona jiae rafue birui cacadicai. Bie rafuedi Moisés lloga rafue baifemo faite. Jusiñamui duere finollicinomona buna jillobinide. Cai duere sefuiñellena, Cristo rafuena cai iinua. <sup>26</sup>Moisés micorimo ie rafue llua facaise, Jusiñamui naie eniruena niraidotade. Jusiñamui jiairuido jiai llote: “Eniruena dane niraidotaiticue. Ucuaina, fivuina, jitoma

diga, jiai niraidotaiticue” llote. <sup>27</sup>Naimie lloga uaimona enirue fuillena uiñoticai. Monamo ite ra fuillena jiai uiñoticai. Nana naie rana naimie fuidoite; iadeti naimiena cai iiñua jira, naimie caina fuidoñeite. Ico cai illinona jai finode. Iena naimie fidoñeite. <sup>28</sup>Illaimana naimie illamona, naimie caina sedaite. Ie jira naimimo iobillacina cai fecaja. Naimiena cai iiñuamona, naimiena cai raise sedajamona, naimiena cai iobitaja. <sup>29</sup>Naimiena iiñoñedínona Jusiñamui eo duere finolle jira, naimiena jaciruillanona naimiena cai iiñua.

#### Jusiñamuina cai iobitaja

**13** <sup>1</sup>Dani comini jiae creyentiaina isiruicana omoi jai. <sup>2</sup>Abraham micori Jusiñamui jaienisaína uiñoñeno jiae nafuete. Jiae illanomona jiae creyentiai bia, naimaci inillino iñena jira, naimacina nafue. Jusiñamuimona ibana feiñotomo. <sup>3</sup>Cristo rafue muidona damierie creyentiai cárcelmo itimaci. Nainomo omoi jiae itomoídena, naimacina feitañeno. Naimacina isiruillamona cano. Damierie creyentiai duere sefuiá, naimacina jiae cano. Jiairuido naimaci isoi nibai duere sefuitomo. <sup>4</sup>Airedimie jiae riño diga illemo ie comeciná facañena. Ínirediñaiño jiae iima diga illemo ie comeciná facañena. Ie añaede riño diga bu ia, ie iniñede iima diga bu ia, maraiñede. Iena finoñeno. Iena bu finoia, ie jeacino Jusiñamuimo lloñenia, Jusiñamui naimiena duere finoite. Naiñaiñona jiae duere finoite. <sup>5</sup>Ailluena ucube ollena, iemo niciñeno. Omoimo ite ra diga caimare i. Iena Jusiñamui facaina lloraima jiae cuega: “Jusiñamui llote: ‘Omoína jaca canoitice. Omoína jaca fainonocaiñeiticue’ llote”. <sup>6</sup>Naiena cai uiñuamona, cai comeciaina ocuiñoiticai. Jaie cuegafue isoi lloiticaí:

Cai Nama caina canoite.  
Ie jira cai comeciai jarire  
finoñeiticai.  
Buena jaciruiñeiticai.  
Jiaimie buena caina jaciruitanide.

<sup>7</sup>Cristo rafuena omoimo navui llogenomo omoi comeciaina faca. Naimacimona Cristo rafuena nano cacadomoi. Cristo dibeimo naimaci illamo omoi comeciaina facajanona, naimaci isoi Jesucristona iiñocana mai omoi jai. <sup>8</sup>Naimie jaca iiñogamienä uiñoticai. Naimie ie lloga uaina jiae jaca finode. Iena birui finode. Ico iena jaca finoite. Ie jira naimiena cai iiñua. <sup>9</sup>Cristo ieñede rafuedo jaiñeno. Diga jiae llofuiacino ite; iadeti ideo jaiñeno. Jusiñamui caina canuamona, cai comeciaina birui ocuiñocana jaiticai. Moisés micorimo lloga rafuedo navui jaidicai. Diga ra famaide; iadeti naiedo cai jaillamona, cai comeciai raise illena, buena oñediaci. <sup>10</sup>Cruzmo Cristo fiodaillamona, cai jeacino facaina fiodaite. Moisés micori lloga rafuedo nia jaidino Cristo rafuemo duiñedimaci. <sup>11</sup>Moisés rafue llua isoi, nanoca ñairaima toiniaina faja mei, naie dirue dacaiño naga año fo iticuartomo uite; iadeti naie toi abi naimaci comini illanomona jino uite. Iena jai jitaiñena jira, nainomo iena jobaide. <sup>12</sup>Ie isoide. Cristona comini jitaiñena jira, ie comini nairaimona jino uillanona, naimiena meineticaci. Nainomo jeacino facaina fiodaite, comini comeciaina raise finollena. <sup>13</sup>Ie jira Moisés micori lloga rafuena cai fainonocaida, dani Jesucristo rafuedo cai jailli. Naimiena jeare finodimaci. Caina jeare finoia, naimiena jaca iiñocana cai jailli. <sup>14</sup>Beno jaca cai

illemo ocuiríñedicai; iadedi monamo Jusiñamui díga cai jaca illemo ocuiridicai.<sup>15</sup> Jesú finoca rafue muidona, Jusiñamuimo iobillacinona jaca cai fecaja. Jusiñamuina cai uiñuamona, naimemo iobillacinona jaca cai fecaja.<sup>16</sup> Marecinona finocana mai cai jailli. Jiae creyente jitai raillano, omoi raruiaimona naimieno omoi cano. Iena omoi finoia, Jusiñamui omoiri iobite.

<sup>17</sup>Omoi llofueraini uaina iiño. Naimaci anamo raise omoi i. Cristo dibeimo omoina raise itataiacadimaci. Iese naimaci finoacaiñenia, Jusiñamui naimacina duere finoite. Naimaci uaina omoi iiñoia, Cristo dibeimo caimare maijiiitimaci. Naimaci uaina omoi iiñoñenia, sunaitimaci. Sunailla jira, naimaci llofuiacintonoma buena oñeitomoi.

<sup>18</sup>Jusiñamui diga omoi ñaia, cai facaina omoi jii. Jusiñamuimona cai comeciai marena illana uiñoticai. Naimie jitaila isoi, mare rafuena finocana jaiacadicai.<sup>19</sup> Omoi díne cue raire illena cue facaina Jusiñamuimo eo omoi jii.

### Naimaci marena jaca illana jitaide

<sup>20</sup>Jusiñamui conini omoi comeciaina uri itatajana jitaídicue. Cai Nama Jesú fiodailla mei, Jusiñamui naimieno jai jillotate. Jusiñamui llua isoi, Jesú fiodaite. Naimie fiodailla jira, Jusiñamui cai jeacinona feitate. Naimie fiodailla jira, naimie anamo cai illamona, caina raise sedarede.<sup>21</sup> Jusiñamui ie jitailacino omoi finuana canoite. Cristona omoi iiñuana canoite. Mare rafuena omoi finuana canoite. Jesucristo uaido omoina canoite, naimie jitailacina omoi finollena, Jesucristomo iobillacinona cai jaca fecajasa. Iena jitaídicue.

<sup>22</sup>Cue amatiai, bie cartana caimare feiño. Eo are rafuena cueñedicue. Janore cueticue.<sup>23</sup> Cai ama Timoteo cárcelmona jai jino bite. Cue díne naimie raire bia, omoi díne naimieno atiiticue.<sup>24</sup> Nana omoi llofuerainimo cue uaina oredicue. Ua nana creyentiaímo cue uaina oredicue. Italianoma bitino imaci uaina jiai oredimaci.<sup>25</sup> Jusiñamui omoina jaca duenallana omoi uiñuana jitaídicue. Mai. Macaibaite.

## SANTIAGO ORETAGA RABE

### Uaiduacino

**1** <sup>1</sup>Caimaci, omoimo cartana oredicue. Santiago. Cue mameci jiaicidi Jacobo. ¿Nigacino? ¿Nie isoidomo? Jusiñamui jitalla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiamo omoi duillamona, omoi jai judaisilla jira, omoimo cue uaina oredicue.

### Ramo omoi jiriadedi, omoi comeciaina maírita

<sup>2</sup>Amatiai, diga ie ramo omoi jiriadedi, eo iobilla. <sup>3</sup>Ramo omoi jiriadedi, Jusiñamui uaina raise omoi iinuana uiñotomoi. Lemona omoi comeciai mairillemona, iinocana omoi jaitomoi. Bierna omoi uiñua jira, iobilla. <sup>4</sup>Mairicana omoi comeciai jaia, omoi comeciaidi marebicaite. Marebicallamona, omoi comeciaimo buena fiebicaiñeite. Nana Jusiñamui llogacinuaina ja muidomo iinotomoi; <sup>5</sup>iadedi omoimo rafue ia, niese nibaiana omoi uiñoñenia, Jusiñamuimo jica. Ie mei omoimo naimiedi abi uiñoracinona iite. Jusiñamuidi nana naimiemo llotinomo iena caidiñeno icabilla jira, omoimo iena jiai iite; <sup>6</sup>iadedi omoi jicaia, uai iinuanona jica. Omoi comeciai iinoñenia, jicañeno. Comecina iinoñedimiedi aifi betaja jorai isoide.

Naimie comeci naganomo ite.

<sup>7</sup>Naimiedi Jusiñamuimona ra feiñollemo tainona sedaite. <sup>8</sup>Naie isoidimiedi nana naimie illa dinori ie comeci naganomo iite.

<sup>9</sup>Naime ramo jiriadedi, Jusiñamuimona naimie jamai bue isoñena jira, duerede creyente iobilla; <sup>10</sup>iadedi ramo jirillamona ie ucubena naimie fañfa, Jusiñamuimona naimie ucubedi ieñena jira, ucuberede creyente iobilla. Safia isoi, naimie ico safenaite.

<sup>11</sup>Jitoma a ia, eo ecasillamona, safia safenaite. Lliride. Ie mei jai ebinide. Jai iñede. Ie isoi ucuberedimie safenaite, naimie maijanona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

### Nana mare rafue

### Jusiñamuimona feiñotcaí

<sup>12</sup>Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiena caimare itataite. Jusiñamui jai llote: “Cuena isiruitinona cue illanomo jaca itataiticue”. <sup>13</sup>O ramo bu faia, Iloñeno: “Jusiñamuidi cuena ramo faite”. Maraiñede rafue dibeimo naimie ieñena jira, naimiedi buna ramo jaca faiñede. <sup>14</sup>Cai comecimo naie jitillacino illa jira, ramo faia uai iinotcaí. Naie facaiseconi caimoná ebirena jirari, iena finoacadicai. <sup>15</sup>Cai

jitailla jira, jeacinona finodicai. Jeacinona finocabillanona jaillano, faifiticai.<sup>16</sup>Ero, cue isiruiga amatiai, Jusiñamui omoina ramo faitatañena jira, naimiemona da mare rafue billa jira, dani omoi abina jifueñeno.<sup>17</sup>Nana mare rafue cai Moomona feiñoticai. Naimiedi monamo ite lligaiñoranainaa jaie finode. Naie radi nagarui daje isoi lligaiñoñede; iadedi naimie daje isoñede. Naimie comeci jacañano danoconi nagarui ite.<sup>18</sup>Naimie jitailla jira, ie uai lluano, naimie caña ie uruiaina itatate. Ie uruiaimona nano doforanidcai.

#### *¿Nie isoide rafuena finoacadicai?*

<sup>19</sup>Cue isiruiga amatiai, Jusiñamui rafuemo raise cacarei. Ie mei naie uaina uaitañeno. Jíai raire iciriñeno.<sup>20</sup>Icirillamona, Jusiñamuidi cai marena jitailla isoi, buna jaca marebicaiñede.<sup>21</sup>Ie jira nana maraiñedicinona oni fañonocai. Jusiñamui uai omoi começimo fecuise abi ideoñeno nagarui feiñocana omoi jai. Naimie ie uai omoi começimo jai itatate, iduai eniruemo cai rilla isoi. Iduai sicutamona, llisilladi ite. Jusiñamui uai cai comeciaimo itabillamona, caina jillotaredi.<sup>22</sup>Cacajamona iena iñocana jai. Cacajanona iena omoi iñoñenia, dani abina jifuetomoi.<sup>23</sup>Bu naie uaina cacajamona iñoñenia, naimiedi acaranimo eruaidimie isoide.<sup>24</sup>Ie uiecona eruade. Naimie jailla meincono, ie eruaila ie uiecona jai raire feitate.<sup>25</sup>Jusiñamui llogacínona bu eo facajia, iena feitañede. Iena iñote. Naie uaidi jearedicino ie finuamona naimieno marena itatate. Jusiñamui uaina naimie feitañena jira, iena iñua jira, naimie comeci caimare ite.<sup>26</sup>“Jusiñamuina sedadicue” raillanona ie começina facadimiedi jeare ñaia,

maraiñeno ñaia, dama naimie abina jifute. Jusiñamuina taño sedade.<sup>27</sup>Cai Moo Jusiñamuina bu marena raise sedaacanía, diga rafuena finoite: Naimiedi moonidinona canoite. Feciñuaina canoite, imaci sure illa facaiseconi. Jeacinona jiai finoacaiñete. Jusiñamui dibeimo iñedino isoi iacaiñete. Jusiñamui naimie iese sedajia, Jusiñamuimona eo mare.

#### **Nana cominimo comeciaina Iloitaiacadicai**

**2** <sup>1</sup>Amatiai, cai Nama Jesucristo uai eo ebirede. Naimieno omoi iñua jira, naimacimo daje isoi comeciai lloillamona, nana cominina daje isoi naue. <sup>2</sup>Ero, omoi roracomo mena iima bia, ¿nie iimana nafuetomoi? Damie ucuberedimie. Naimieno oro ie anillos ite. Eo mare iniroina jitade.  
<sup>3</sup>Ucuberedimie llotomoi: “Bai bene bancomo rai”. Dueredimie llotomoi: “Bai bene naidai. Raiacanía, eniruemo rai”. <sup>4</sup>Iese omoi lloia, damieno jai raise nafuetomoi; ia damieno jai raise nafueñedomoi. Iaimaiai iniroimo omoi eruailamona, nafuetomoi. Mare rafuemo comeciaina facañedomo.

<sup>5</sup>Cue isiruiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenidimaci, naimieno naimaci eo iñua illa jira. Naimieno naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iiticie”. <sup>6</sup>Ero, Jusiñamui dueredinona nafuete; iadedi dueredimieno jai nafueñedomo. Dueredinomona duere sefuiñedomo; ia dueredimieno jai duere finodomio. Ucuberedinomona duere sefuiçabidomo; ia ucuberedimieno raise nafuetomoi. Maijitalena, juez dñe ucuberedino omoina uitatatiñaci,

omoina llogidollena. Dueredino iese omoina finoñedimaci; ia ucuberedinodi iena finocabidimaci. <sup>7</sup>Cristomo omoi jainaiaillamona, ucuberedino naimiena jeare jiai ñaitimaci.

<sup>8</sup>“Cristo llogacino finodicai” raillanomo comeciaina facajamona ucuberdimieno omoi nafueia, cuemono mare. Cristo naiena iese caiimo llote: “O jofo ecimo itinona isirui, dama o abina o isiruilla isol”. Iese omoi ia, cuemono mare; <sup>9</sup>iadedi nana cominina daje isoi omoi nafueñenia, jeacinona jai finodomoi. Jai Jusiñamui llogacinonoma jai maraiñeno itomoi. <sup>10</sup>Nana Jusiñamui llogacinuaimona daje llogacinona omoi iinoñenia, Jusiñamuimona nana naie llogacinuaina jai iinoñedomoi. <sup>11</sup>Jusiñamui caiimo jai llote: “O aiñede riño diga iñeno. O iñiñede iima diga iñeno”. Jiai llote: “Jaimieno meineñeno”. O aiñede riño diga iñedio; iadedi jiaimieno o meineia, nana Jusiñamui llogacinuai jai iinoñedio. <sup>12</sup>Jairuido Jusiñamuidi juez isoi omoimo lloite. Omoi comeciaimo iticino diese omoimo lloite. Ie jira marena ñaino. Marena i. <sup>13</sup>Ero, omoimo naimie lloia, jiae cominina omoi birui duenaiñenia, Jusiñamui naie facaise omoina duenaiñeite. Omoimo riire lloite. Omoina duere finoite; iadedi jiae cominina birui omoi duenaia, Jusiñamui naie facaise omoina jiai duenaita. Duere sefullena omoimo lloñeite.

#### Jusiñamuina cai iinuamona, diga rafuena cai finua

<sup>14</sup>Amatiai, “Jusiñamuina iinoticue” raitimiedi mare rafuena jaca finoñenia, ¿niese naie iinoracindri naimiena jillotaite? Jillotañeite. <sup>15</sup>Jiae rafuedo iena lloitice. Omoimona daje creyente iñiroinia, guille iñenia, <sup>16</sup>naie creyente

omoi dine bia, naimiemo omoi lloia: “Mai jai. Rosiruiñeno. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomoi? <sup>17</sup>Ero, Jusiñamui omoi iinuamona mare rafuena omoi finoñenia, omoi iinoracino ieñede. <sup>18</sup>Omoimona damie cuemo nibai lloite: “Jusiñamuina raise iinoticue”. Jaimie cuemo nibai lloite: “Mare rafuena finocabidicue”. Iaimaiaimo lloitice: “Jusiñamuina cai raise iinoia, mare rafuena finocabitica. Mare rafuena cai finuamona, Jusiñamuina cai raise iinuana uiñoticai”. <sup>19</sup>Dajede Jusiñamuidi illana iinotio. Iena o iinuano, mare; iadedi jananiai iena jiai iinotimaci. Ie jira Jusiñamuina jaciruitimaci. <sup>20</sup>“Jusiñamuina raise iinoticue” nibai nia raitio. Abina raise nia uiñóñedio. Mare rafue o jiai finoñenia, dama abi o iinoracindri ieñede. <sup>21</sup>¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitalla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori. <sup>22</sup>Abraham micori iinote. Mare rafuena jiai finode. Mare rafue naimie finuamona, naimie jai raise iinote. <sup>23</sup>Iemona Jusiñamui ie llogacino suide. Iena Moisés micori cuete: “Abraham micori Jusiñamuina iinote. Ie jira Jusiñamuimona naimie marebicaide”. Jiai cuete: “Naimiedi Jusiñamui nabai”. <sup>24</sup>Abraham micori rafuemona daje rafuena uiñoticai. Dama ie iinoracino diga jaca bu marebicainede; iadedi Jusiñamuina iinuano, mare rafuena finuano, marebicaide. <sup>25</sup>Jiae rafuedo iena lloitice. Jaie Rahab raillañaiño ite. Naiñaiño callirediñaiño. Mare rafuena finuano, naiñaiñodi Jusiñamuimona

marebicaide. Naiñaiñodi ie jofomo Josué ie rafuena uiraimaiaína feiñote. Naiñaiño nairaidi iaímaiaína meinellena jenodimaci. Meineñellena, naiñaiño iaímaiaína reide. Ie mei iaímaiaína bainino oretate. Mare rafuena naiñaiño finuamona, Jusiñamuimona naiñaiño marebicaide. <sup>26</sup>Ero, bumo ie joreño jai iñenia, cajeñede. Ie isoide. Mare rafue bu finoñenia, ie iiñoracinodí ieñede.

Cai fuiaimona jeacinodi comuide

**3** <sup>1</sup>Amatiai, omoimona diga comini creyentiaina llofuerainina jaiñeno. Jusiñamudi juez isoi ico lloite. Llofueraini jiae comini baifemo uiñuamona, Jusiñamui rafuena naimaci eo raise iinoñenia, Jusiñamui naimacina jiaino baifemo duere finoite. Iese riire naimacimo lluana jaciruillano, llofuerainina ailluena jaiñeno. <sup>2</sup>Nana caidi diga maraiñede rafuena finocabidicai. Maraiñedecinona bu ñaiñenia, jai marebicaide. Naimie nana ie comeci namarede. <sup>3</sup>Jiae rafuedo iena lloitue. Caballos cai jitaila rana finollena, imaci fuemo lloemamona finoca janorede rana joneticaí. Ie mei nana caballo ie abina namatadicai. <sup>4</sup>Riire aifi aillue botena nine uiacade; iadedi eo janorede quilla diga, ie jailla dine piloto botena dataoicaide. <sup>5</sup>Ie isoide cai fuiá. Eo janorede; iadedi cai fuiaimona diga rafuena comuide. Ero, eo janorede iraimona nana rasillaina bootate. <sup>6</sup>Cai fuiáidi irai isoide. Caímo jeacinona eo finotate. Nana cai comeciaina jearetataste. Taifemona ie uai ote. Nana cai ille dinori caina jearedecinona finotaiacadé.

<sup>7</sup>Nana rana toiredicai; ocainaiai, sillñiai, ofomaiai, eniruemo biicaidino, Illiciai. Nana toiredicai; <sup>8</sup>iadedi jaca bu ie fuena namatanide. Cai fuiiai jaca eo maraiñede. Lemona eo maraiñede rafue

icabite. <sup>9</sup>Cai fuiāi diga cai Namamo, ua cai Moomo, marecinona lloticai. Caina naimie finuamona Jusiñamuina eruaidicai; iadedi cai fuiāi diga naimiena jeare jiai ñaiticai. <sup>10</sup>Cai fuedi dajede; iade marecinona ñaiticai. Maraiñedicinona jiai ñaiticai. Amatiai, iese cai ñaiñena. <sup>11</sup>Ero, daje pozomona mare jinui, erirede jinui diga, oñedicai. <sup>12</sup>Amatiai, higuera railla riaramona aceitunadi comuiñede. Uvas railla riaramona higo railla riaradí jiai comuiñede. Cuerede jinuimona mare jinuina oñedicai. Cai fuiaimona jeacino comuiñellena, cai fuiāiña cai namataia.

## Una abierta minoración

<sup>13</sup>Omoimona, ¿bu ua abi uiñote? Naimie ua abi uiñoia, naimie marena illamona, iena uiñotomoí. Abi iedoñeno mare rafuena naimie finoia, naimiemo ua abi uiñoracino illana uiñotomoí; <sup>14</sup>iadedí naimie abi eo uradoia, dama naimiemo ite ramo comecina facaia, naimie abi uiñoracino diga naimie abina iedoñena. Jai tainona llote. Naimie llua isoi iñede. <sup>15</sup>Naie isoide uiñoracinodi Jusiñamuimona iñede. Bie enirue ie. Comini ie. Taife ie. <sup>16</sup>Comini abina uradoia, dani naimacimo ite ramo comeciaina naimaci facaia, comini uri iñedimaci. Diga maraiñede rafue naimacimo ite. <sup>17</sup>Jusiñamuimona ite ua abi uiñoracinodi mare. Bumo ia, uri ite. Riinide. Comeci jinide. Jiae cominina duenaite. Mare rafuena finocabide. Cominina raise nafuete. Abi tainona jifueñede. <sup>18</sup>Bu uri ia, jiae cominina uri itatare. Ie jira naimie marena iite, Jusiñamui jitailla isoi.

¿Bue ñellena uri iñedicai?

**4** <sup>1</sup>¿Bue ñellena fuiriruidomoi? ¿Bue ñellena iciriruidomoi? Omoi comeciaimo maraiñedicino illa muidona.

Omoi comeciaimo maraiñeno jitailacino illa muidona. Naie jitailacino omoi comeciaimo namataacana muidona.

<sup>2</sup>Rana jitaidomoi. Iena omoi feiñoñena jira, naimaci rana fiillena, comena meinetomoi. Eo uradoidomoi. Omoi jitaille rana feiñoñena jira, fuiridomoi. Omoi jitaille rana Jusiñamui omoi jicañena jira, iena feiñoñedomoi.

<sup>3</sup>Jiaicaiño Jusiñamui omoi jicadomo; iadedi raise jicañedomoi. Ie jira iena feiñoñedomoi. Dani omoi jitalla ra feiñollena, omoi comeci jaisillena, jicadomoi. <sup>4</sup>Jusiñamuina birui raise jitaíñedomoi; ia naimie dibeimo iñedinona jai jitaidomoi. Bie eniruemo ite rafuena omoi isiruillamona, Jusiñamuina jai raise nabaiñedomoi. ¿Niese iena uiñoñedomoi? Bu naie rafuena isiruiacania, Jusiñamui dibeimo jai iacaiñede. <sup>5</sup>Jusiñamui cuetatagafuiaina raise facañedomoi. Naiedi caimo llote: “Jusiñamui omoimo jai fecaca Joreñodi omoi comecin eo raise namataacade”.

<sup>6</sup>Caina eo duenalla jira, naimie dibeimo cai raise illena, Jusiñamuidi caina eo canoacade. Jusiñamui cuetatagafuiai iena llote: “Jusiñamuidi abi iedotimieno canoñede; iadedi abi iedoñedimieno canode”. Naimie dibeimo iacaiñedimieno ñaite. Naimie dibeimo iacadimieno canuana jiai ñaite.

<sup>7</sup>Ie jira Jusiñamui anamo omoi i. Naimieno raise omoi iino. Taife uaina jitaiñenanona, naimie uaina oni caiño. Ie mei omoimona naimie oni jaite.

<sup>8</sup>Jusiñamuina nabaillena, naimie dine iaire omoi i. Ie mei naimie omoi dine iaireno iite. Jeacinona finoraini, omoi comeciai iuaillaína meido. Naganomo omoi comeciaina facañeno. Omoi comeciaina marena fino. <sup>9</sup>Maraiñede rafue omoi jai finuamona, omoi sunai. Jaisiñeno, ie ia omoi jeacino facaina omoi mai ee. Caimare iñeno; ia omoi jeacino

facaina omoi mai sunai. <sup>10</sup>Jusiñamui dibeimo abina iedoñeno omoi i. Ie mei naimie omoi comeciaina iobitaite.

### Jiaino jinafomo jeare ñaiñeno

<sup>11</sup>Amatiai, maraiñede rafuena naimaci finoiadeti, jiaino jinafomo jeare ñaiñeno. Creyente jinafomo bu jeare ñaia, creyentena bu jicoia, creyentena naimie isiruiñena jira, Jusiñamui uaina raise iinoñede. Jusiñamui uaina naimie iinoñenamona, Jusiñamui uaina jiai jamaiñocaide. <sup>12</sup>Jusiñamuidi maraiñede rafuena finodimieno duere finoite. Cai jeacynomona caina jillotaredi. Cai jeacino facaina caina duere finoredi. Ie jira jiae creyentena jicoñeno.

### Ico are caimo suite rafuena uiñoñedicai

<sup>13</sup>Jiae rafuena lloiacadicue. Nibai llotomoi: “Birui jiae nairaimo jaiticai. Birui cai jaiñenia, ico are jaiticai. Rana fecajamona ucube cai ollena, nainomo daje año iiticai”. <sup>14</sup>Iese llotomoi; iadedi nie isoide rafue ico are illena uiñoñedomoi. Cai ille dinori uillie illa isoi iticai. Dallu bene iticai. Ie mei jai iñedicai. <sup>15</sup>Ie muidona omoi llua: “Cai Nama jitaia, nia iiticai. Cai Nama jitaia, nie isoide rafuena finoitica”. <sup>16</sup>Iena lloñedomoi; iadedi dani omoi comeciaina facajano llotomoi. Iemonia eo abina iedotomoi. Abina ieduadi maraiñede. <sup>17</sup>Mare rafuena finuana uiñotimiedi mare rafuena finoñenia, jeacino jai finode.

### Ucuberedinomo lluacino

**5** <sup>1</sup>Ucuberedino, daje rafuena omoimo jiai lloiacadicue. Omoimo ramo jirite. Ja eo duere sefuitomoi. Ie jira cuiri-cuiri ee. <sup>2</sup>Omoi raruiai ja sabite. Omoi mare iniroi ja sabite, ibuisai guilla jira. <sup>3</sup>Omoi ucube ja ieñeite. Ieñena jira,

comini omoi faifillana uiñoitimaci.  
Abina faifitomoi, iraimo ra boa isoi.  
<sup>4</sup>Ero, ailluena ucube irairuillai iena jai  
eenotomoi. Naie facaisedi jai ride. Omoi  
majjiraini majjamona ucubedi omoimo  
nia ite. Omoi eniruemo majjidimaci; ia  
naimacina raise ibañedomoi. Jai  
eedimaci. Cai nanoca Nama iena cacade.  
<sup>5</sup>Omoi illa dinori ailluena raruiai  
omoimo ite. Nana omoi comeciai jitaila  
rafuena finodomoi. Omoi comeci jitaila  
isoi itomoi. Naie iba olirui jai ride.  
<sup>6</sup>Maredinona duere finodomoi. Nie  
isoide rafuena omoimo finoñedimaci.  
Abina riidoñedimaci; iadedi naimacina  
meinetomoi. Ie jira Jusiñamuimona ja  
duere sefuitomoi.

**Cai Nama billemo  
fecuisse omoi ocuiri**

<sup>7</sup>Amatiai, cai Nama billemo fecuisse  
omoi ocuiri. Cominidi imaci illimona  
riara feiñuana sedadimaci. Noci deillemo  
fecuisse ocuiridimaci. Ie mei riara  
llisillana otimaci. <sup>8</sup>Ie isoi cai Nama  
billemo fecuisse ocuiri. Omoi comeciai  
rucaicueriñeno, cai Nama bille iaire illa  
jira. <sup>9</sup>Duere omoi sefua, Jusiñamui juez  
isoi omoimo llo i Raillano, “Jiae creyente  
muidona duere sefuidicue” raiñeno.  
Jusiñamui omoi illana raise uiñote.  
<sup>10</sup>Amatiai, Jusiñamuina lloraini  
micoriamona cai fueua. Cai Nama  
dibeimo ñaitimaci. Duere sefuidimaci;  
iadedi eecuñedimaci. <sup>11</sup>Naimaci  
Jusiñamuina fañonocaiñena jira:  
“Naimaci comeciaidí caimare itimaci”  
raiticai. Job micorina jiai comecitcái.  
Naimie jaie ite. Naimie eeñeno duere  
sefuide. Duere sefuide; ia Jusiñamuina  
fañonocaiñede. Ie mei ja muidomo nie  
isoide cai Nama naimiena finuana  
uiñotacai. Cai Namadi naimiena duenalla  
jira, naimiena raise canode. Caina jiai  
duenaite. Ie jira caina jiai canoite.

<sup>12</sup>Cue amatiai, nanoca rafuena nia  
lloiacadicue. Omoi lloga uai omoi  
finollena jiae comini uiñollena,  
Jusiñamui mamecina llinotomoi. “Iena  
cai llinoia, cai lloga uaina cai finoñenia,  
Jusiñamui caina duere finoite” raitomoi.  
Omoi lloga uai omoi finollena,  
Jusiñamui mamecina jamai ebena  
llinoñeno. Monamo ite ra mamecina  
jamai ebena llinoñeno. Eniruemo ite ra  
mamecina jamai ebena llinoñeno; iadedi  
nie isoide rafuena omoi lluamona,  
uanaicinona jaca llono. Iese llono,  
Jusiñamui omoina duere finoí raillano.

<sup>13</sup>Omoimona duere sefuidimie ia,  
naimie Jusiñamuimo jicaja. Comeci  
caimare itimie ia, Jusiñamuimo  
iobillacina rúa. <sup>14</sup>Duidimie ia,  
naimaci naimieri Jusiñamuimo jiñlena,  
creyentiaina sedarainina uaidua.  
Naimacidi farena naimie abimo già, cai  
Namamo jiñanona, naimie ie duicomona  
jilloillena. <sup>15</sup>Jiñuano jiñia, jilloite. Cai  
Nama naimiena jillotaite. Naimie finoca  
jeacinona oni jiai dotajite. <sup>16</sup>Ie jira  
coninimo omoi marañediginona llono.  
Ie mei Jusiñamuimo coninaina omoi jiñ,  
omoi duicomona omoi jilloillena.  
Jusiñamuimo marebicaidimie jiñia, diga  
rafuena finorede. <sup>17</sup>Elíana comecitomoi.  
Jaie ite; ia naimiedi cai isoide.  
Jusiñamuimo jiñide, noci deiñellena. Ie  
mei daje amani fiemona abimo  
atomonado jaca deiñede. <sup>18</sup>Ie mei dane  
jiñide, noci deillena. Ie jira noci deide. Ie  
mei riara dane sicode.

<sup>19</sup>Amatiai, omoimona damiedi  
Jusiñamui ie uanaicino dibeimona jaia,  
dane Jusiñamui dibeimo naimiena bu  
itataia, eo mare. <sup>20</sup>Iena bu finoia,  
naimiena ie uaiñediginomona itatae.  
Fañillemona jai jillotate. Jusiñamuidi  
naimie jeaciuñaina oni dotajamona,  
iemona jiai jillotate. Mai.  
Santiagodicue.

## PEDRO NANO ORETAGA RABE

**Tuude cominimo  
Pedrodi cartana cuete**

**1** <sup>1</sup>¿Nigacino? ¿Nie isoidomoi? Bie carta omoimo oredicue. Pedropicue. Jiae comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue. <sup>2</sup>Naimie jitallamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi iinollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uiñocana mai omoi jai. Jusiñamui omoina uri itatajana uiñocana mai omoi jai.

**Jesucristo diga jaca  
cai illemo ocuridicai**

<sup>3</sup>Naimiedi cai Nama Jesucristo ie Moo illanona, cai Moo Jusiñamuimo iobillacina cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, iinocana cai jailemo jiai ocuridicai. <sup>4</sup>Omoi ocurillafuedi monamo ite. Faifiñeitomoi; ia nainomo

caimare marena jaca iitomoi. Jusiñamui iese omoina itataite. <sup>5</sup>Jusiñamuina omoi iinua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uiñoitomoi. <sup>6</sup>Ieri iobidomoi; iadedi dallu diga rafuemona duere sefuidomoi.

<sup>7</sup>Jiae rafuedo iena lloitice. Ero, ua oro raise omoi uiñollena, orona facacitomoi. Irai emodomio rainajamona, cocuillamona, gajamona, difai oro jai fiebide. Iena “Mare” llotomoi. Oro eo raifide; iadedi jaca iñede. Ie isoide. Cristona omoi ua iinuana facacillena, diga rafuemona duere sefuidomoi. Hinocana omoi jaillamona, Jesucristo abido bille facaiseconi Jusiñamuidi omoina: “Mare” lloite. Omoiri eo iobite. <sup>8</sup>Jesucristona jaca cioñedomoi; iadedi naimiena jai isiruitomoi. Naimiena jaca cioñedomoi; iadedi naimiena jai iinotomoi. Ie jira eo iocire itomoi. <sup>9</sup>Cristona omoi iinuamona, jeacinomona jai jillobidomoi. <sup>10</sup>Jusiñamui facaina lloraini micoriaidi Jusiñamui omoina jai duenaillana jaie llotimaci. Jusiñamui omoina jilluana jaie llotimaci. Iena naimaci raise cacaiñenia, naíemo comeciaina facauidimaci. <sup>11</sup>Cristo Joreñodi naimacina uiñotajamona, Cristona llotimaci. Cristo duere sefullena llotimaci. Fiodaillamona naimie jilloillena jiai llotimaci. Monamo naimie abido jaillena llotimaci. Bumo

iese ico suillena uiñoiacadimaci. Naie facaise illemo comeciaina jiai facadimaci.<sup>12</sup> Jusiñamuidi naie rafue naimacimo duiñenana uiñotade. Naimacina naie rafue caímo duillana jiai uiñotade. Jusiñamui ie Joreñona monamona naimacimo oretajanona, ie uaido naimaci lluamona, naimie facaina llorainimona bie mare rafuena birui jai cacadomoi. Jusiñamui jaienisaí bie rafuena jiai raise uiñoiacadimaci; ia cai isoi iena uiñoñedimaci.

**Naimie jitaillacinaona cai finollena,  
Jusiñamui caina fetode**

<sup>13</sup>Ie jira omoi comeciai raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uiñotomoi. Iemo iocire ocurri. <sup>14</sup>Jusiñamuina omoi nia uiñoñena facaise dani omoi comeciai jitaille rafuedo jaisoidomoi. Naimiena omoi jai iinua jira, naimiena omoi nia uiñoñega facaise finoca rafuedo birui omoi jaiñeno. Mare uruiai imaci moo uaina iinotimaci. Jusiñamui uruiaina omoi jai illa jira, naimie uaina iino. <sup>15</sup>Jusiñamui ie uruiaina omoi illena, jai omoina fetode. Naimie mareuilla jira, marena omoi i. <sup>16</sup>Iena naimiedi jaie cuetataste: “Cue mareuidimieno isoi, marena omoi i”.

<sup>17</sup>Cai Moona Jusiñamui illamona, naimiemo birui jiidomoi; iadedi juez isoi nagamiemo ico Jusiñamui llua jira, nana omoi ille dinori jaciruicana omoi jai. Nagamieno ie maraiñede finoca rafue diese duere finoite; ia maraiñede rafuena finoñedimieno duere finoñeite. <sup>18</sup>Omoi einamaci rafuedo jaie jaisoidomoi. Naie rafue jamaifue. Naifuemona Jusiñamui omoina jai jillotate. Ibatajamona omoi jeacinomona jillotañede. Ucubedi raire cueruide. Raire cueruide ra diga omoina

jillotañede;<sup>19</sup>iadedi Cristo diruedo naimie dacaiño fiodaillamona, omoina jaca jillotate. Cai comini imaci jeacino facaina mare toica laudana fauidimaci; ia Cristomo jeacino iñena jira, cai jeacino facaina birui dacaiño fiodaite. <sup>20</sup>Caina jilloitallena, enirue nia iñena facaiseconi Jusiñamui Cristona jaie fetode. Naimiena omoi uiñollena, birui bene eniruemo Jusiñamui naimiena oretate. <sup>21</sup>Cristo muidona Jusiñamuina iinotomoi. Cristo fiodaite; ia iemonia Jusiñamui naimiena jillotate. Ie mei monamo ie ecimo naimiena dane itatate. Ie jira Jusiñamuina iinotomoi. Omoi fiodaia, dane jilloillemo jiai jai ocuridomoi. <sup>22</sup>Uanaicinona omoi iinuamona, omoi comeciai jai jeanidimaci. Ie muidona jiae creyentiaina isiruicana omoi jai. Omoi comeciaimona conini omoi isirui. <sup>23</sup>Jusiñamui cominina jai jaidomoi. Naimie uaido iese jaidomoi. Comini uaido iese jaiñedomoi. Naimie uai jaca fuiñeite. Jaca iiite. Naie uaido naimie cominina jaca iiticai. <sup>24</sup>Jusiñamui facaina lloraima micori iena jaie cuete:

Nana cominidi raiticiai isoïdimaci.  
Safia dallu ebirede; iadedi raiticiai  
ie safia diga are iñede.  
Ie isoide. Diga rafuena finuanona,  
dallu iticai.

Are iñedicaí;<sup>25</sup>iadedi Jusiñamui uai  
jaca ite

cuete. Naie uaidi mare rafue. Naie  
rafuena birui jai cacadomoi.

**2** <sup>1</sup>Jusiñamui cominina cai illa jira,  
jiae cominina gaiñenacinaona  
fañonocai. Nana jifuacinaona  
fañonocai. Abina caitajacinaona feita.  
Nana abi uradoillacinaona feita. Jiae  
comini joreñona ñaiñeno. <sup>2</sup>Ero, raise  
moonaillena, raise ecairellena, janosa  
monoí ijina jitaide. Ie isoide. Omoi  
comeciai raise marena illena, Jusiñamui

rafuena jitaídomoi. <sup>3</sup>Cai Nama omoína duenaillana jai omoí uiñuamona, naimie uaina iinocana jai.

**Cristodi jofomo ite  
nanoca nofici isoide**

<sup>4</sup>Ie comínina raise omoí illena, Jusiñamui rafuena finocana jai. Naimie omoína jai fetode. Naimiemo omoí raise duillana jitaide. Iena omoí raise uiñollena, jiae rafuedo iena lloiticue. Naimiedi jofona niacade isoide. Noficimona niacade. Diga noficina jitaide. Naimie naie noficiaina jai fetode. Nanoca nofici diga naie jofo nillana tainede. Cristodi naie nanoca nofici isoide. Cai nairai Cristona jaie jitaiñedimaci; iadedi Jusiñamui mona naimie maredimiena jira, Jusiñamui naimieno fetode. Caíd jiae noficiai isoidicai. Ie jofona nillena isoillena, Jusiñamui caina fetode. <sup>5</sup>Naimieno cai jai iinua jira, naimie comínina jai jaídicai. Naimie diga jai atona ñairedicai. Naimie diga jiae comini facaina jiae ñaicabitcaí. Naimieno cai raise sedallena, Jesucristo caina canuamona, Jusiñamui jitaillacina finocana jaídicai. <sup>6</sup>Jusiñamui facaina lloráima iena jaie cuega:

Ero, Jerusalémo cue jofona nillena, daje noficina fetoiticue.

Eo mare noficina fetoiticue. Cue Jitona ñaiticue.

Naimieno cai fetodicue. Naimiedi eo mare.

Naimieno iinuamona, comini iobitímaci

cuega. <sup>7</sup>Naimieno omoí iinoia, Jusiñamui omoína iobitaite. Naimieno omoí iinoñenia, faítomoi. Jusiñamui facaina lloráima micorí iena jaie cuega:

Jofona finoraini jitaiñena nofici nana naie jofomo ite noficiai baifemo jai faiga

cuega. Ie isoide. Cai nairai Cristona jitaiñede; iadedi Jusiñamui naimieri eo iobide. <sup>8</sup>Dane cuega:

Nine naimaci macaria, naie noficimona eicaitaillamona, uaitimaci

cuega. Cristona cuete. Cristo uaina naimaci iinoñena jira, Jusiñamui llua isoi faítimaci.

**Pedro Jusiñamui  
fetocanona llofueté**

<sup>9</sup>Jusiñamui jai fetocanodomoi. Naimiemo omoí jai duillamona, naimie diga atona ñairedomoi. Jusiñamui ua comínidomoi. Naimieno omoí nia iinoñenia, jeacino anamo omoí illa jira, jitiredinomo itomoi isoidomoi. Naiemono omoína jai jillobitade. Naimie anamo jai omoí illamona, useredinomo jai itomoi isoidomoi. Eo mare rafue omoímo naimie finua jira, iena llocana omoí jai. <sup>10</sup>Jaie Jusiñamui comínidomoi; iadedi birui Jusiñamui comínidomoi. Naimie omoína duenaillana jaie uiñoñedomoi. Birui iena uiñotomoí.

**Pedro Jusiñamui jitaillacina  
finocana cai jaillana llofueté**

<sup>11</sup>Cue isiruiganodomoi. Jusiñamui illanomo omoí birui jainaialla jira, eniruemo jaca iñeitomoi. Eniruemo jaca omoí iñena jira, jeacina finocana jaiñeno. Jeacino omoí comeciaina namataacana jira, iena ebiruiñeno, naie anamo omoí i raillano. <sup>12</sup>Jusiñamuina iinoñedino motomo omoí illamona, mare rafuena finocana jai. Omoína birui jeare ñaitimaci; iadedi omoí marena illana naimaci uiñuamona, Jusiñamuina ico naimaci iinoia, naimiemo iobillacina fecaitimaci. <sup>13</sup>Cai Namamo omoí duilla jira, illaicomini anamo raise i. Riaí diga omoí nanoca

illaima uaina iino.<sup>14</sup> Naimacina omoi illacomini fetua jira, omoi gobernadores uaina iino. Maraiñede rafue omoi finoia, omoina duere finoitimaci; iadedi mare rafuena omoi finoia, omoiri ibotimaci.<sup>15</sup> Jusiñamuidi mare rafuena omoi finuana jitaide. Iena omoi finua jira, omoina ebena ñaitino uaina lliçaitaitomoi.<sup>16</sup> Jusiñamui anamo cai illamona: "Jiae illaima uaina iinoñiteicai" raiñeiticai. Cai enirue illaima uaina cai iinoñenia, jeacinona finodicai. Jusiñamui dibeimo cai illa jira, naimie jitailiacinona finocana cai jailli.<sup>17</sup> Nana cominimo marena fino. Nana creyentiaina isirui. Jusiñamuina jaciruioicaida iino. Riae diga omoi illaima uaina iino.

**Cristo duere sefuilla  
rafuemona fueoiticaí**

<sup>18</sup>Patrón anamo damierie itomoi. Omoi patrón ocuica uaina iinocana omoi jai. Omoi patrón marena fecuisse ocuia, naimie uaina iino. Naimie raire iciria, naimie ocuica uaina jiae iino. <sup>19</sup>Maraiñede rafuena omoi finoñenia, omoi patrón omoina duere finoia, Jusiñamuimo omoi comeciaina facajanona, ibana oñeno. Fbana omoi oñenia, Jusiñamuimona mare. <sup>20</sup>Maraiñede rafuena omoi finoia, omoi patrómona duere sefuitomoi; iadedi maraiñede rafuena omoi finoñenia, omoi patrón omoina duere finoia, ibana omoi oñenia, Jusiñamuimona mare. <sup>21</sup>Duere omoi sefuiá, ibana oñeno. Iese omoi illena, Jusiñamui omoina fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli. <sup>22</sup>Naimiedi maraiñede rafuena jaca finoñede. Taínona jaca lloñede. <sup>23</sup>Comini naimiena jeare ñaitimaci; iadedi naimiedi uai oñede. Naimie

duere sefuide; iadedi: "Omoina ico duere finoiticue" raiñede. Naimiedi Jusiñamui naimacina ico raise duere finollena uiñote.<sup>24</sup> Cruzmo naimie fiodaillamona jeacino anamo cai iñellena, cai jeacino facaina naimie fiodaite. Jusiñamui jitailla isoi naimie fiodaite. Naimie jai duere sefuilla jira, cai jeacimonona jai jillodicai. <sup>25</sup>Sedañega toica llaudaiai isoi jaie ebena jaisoidicai. Cai sedaraima anamo jai iticai. Naimiedi cai comeciaina jai enote.

**Pedrodi inirediñaiñuina,  
airedino diga llofueté**

**3** <sup>1-2</sup>Inirediñaiñuai, omoimo jai lloiacadicue. Omoi iniñiai uaina iino. Nibai birui Cristo rafuena iinoñedimaci; iadedi omoi marena illamona, Cristo dibeimo naimacina itataitomoi. Jusiñamui uaina omoi iinuamona, omoi marena illamona, damierie Cristona iinoñimaci. <sup>3</sup>Dañaiñorie abina eo finocabidimaci, naiñaiñuina jiae comini ebinaillena. Naiñaiñuai ifotieno eo finocabidimaci. Eo raifide rana jitacobidimaci. Eo ebirede raifide iniroina jitacobidimaci. Naie isoide ra comeciná marena itatañede; ia Jusiñamui jitailiacinodo jaillamona, comeci marena ite. Jiae comini omoina ebinai raillano, iese omoi iñeno;<sup>4</sup> iadedi jiae comini omoina ebinaillena, omoi comeciai marena fino. Omoi iniñiai uaina oñeno. Naimaci jitailla rafuena fino. Omoi comeciai iese ia, Jusiñamuimona eo mare.<sup>5</sup> Cai jaiagai facaise Jusiñamuina iñotíñaiñuai iese itimaci. Cue birui llofua isoi, naiñaiñuai abina jaie finodimaci. Naiñaiñuai iniñiai uaina iñotíñimaci. <sup>6</sup>Iese Sara micori ie ini Abraham micori uaina iñote. Ie anamo naiñaiño illa jira, ie ocuica uaina jaca iñote. Mare

rafuena finocana omoi jaia, buena omoi jacinuiñeno, naiñaiño isoi iitomoi. Iemonia naiñaiño uruiaína jaitomoi isoitomoi.

<sup>7</sup>Airedino, omoimo jai lloiacadicue. Omoi ainiaímo comeciaína faca. Cai isoi naiñaiñuaí mairiñena jira, naiñaiñuaína isiruillamona, naiñaiñuaína marena raise seda. Jusiñamui omoína duenallamona, naimie cominina jai jaidomoi. Omoína jai jillotate. Omoi ainiaína omoi raise sedañenia, Jusiñamui daajena raise jiñidomoico.

### Cristo dibeimo caí illa rafue

<sup>8</sup>Daje isoi comeciaí lloicana jai. Coninina duenai. Naga creyentena isirui. Jiaínona cano. Abina ideoñeno. <sup>9</sup>Omoína jiae comini duere finoia, ibana oñeno. Omoína naimaci jeare ñaia, ibana oñeno; iadedi naimaciri marena ñaino. Mare rafuena cai finollena, Jusiñamui caina fetode. Iese cai jaia, Jusiñamui dinena: "Mare" caina raite. <sup>10</sup>Jusiñamui facaina lloraima micori iena jaie cuega:

Marena uri jaca bu iacania, jeare ñaiñeno.

Tainona lloñeno.

<sup>11</sup>Jearede rafue finuana fainonocai. Mare rafuedo jai.

Omoi ecimo itino diga, uri icana omoi jai.

<sup>12</sup>Naimie jitalla rafue omoi finoia, Jusiñamui iena uiñuamona, omoína raise sedade.

Naimie diga omoi ñaia, iena cacade; iadedi maraiñede rafue bu finoia, Jusiñamui naimie diga icirite.

<sup>13</sup>Mare rafuena omoi finocana jaia: "Maraiñede rafuena naimaci finua jira, naimacina duere finoiticai" rainidimaci; <sup>14</sup>ia mare rafuena omoi finuamona omoi duere sefua, Jusiñamui omoína canoite.

Omoína duere finodinona jaciruiñeno. Jarire iñeno; <sup>15</sup>ia omoi comeciaí jitallamona Cristona seda. Naimiedi cai Nama. "¿Bue ñellena Cristona iinotomoi?" omoimo bu jicanoia, uaina raise ono. Fecuise iciriñeno, uaina ono. <sup>16</sup>Mare rafuena finocana jai. Omoína jiaíno jeare ñaia, mare rafuena omoi finocabillamona meidaitimaci. Omoi marena illamona, tainona naimaci lluana bairenite. <sup>17</sup>Mare rafuena omoi finuamona, Jusiñamui jitallamona omoi duere sefua, dama iese duere sefutomoi; ia maraiñede rafuena omoi finuamona omoi duere sefua, omoi muidona.

<sup>18</sup>Cristomo omoi comeciaína faca. Dacaiño caí jeacino facaina naimie fiadaite. Naimie mareuidimie; iadedi maraiñedino facaina fiadaite. Jusiñamui dibeimo caina itataiacade. Naimienia meinitemaci; iadedi naimie Joreño jaca ite. <sup>19</sup>Ie Joreñodo naimie jaillanona, jaie fioldaitino imaci joreñuai eenoranomo ie finoca rafuena lluaide. Naimaci nia fioldaiñenia, Jusiñamuina jaca iinoñedimaci; ia Cristo ie finoca rafuena naimaci joreñuaimo lluaide. <sup>20</sup>Jusiñamui rafuena jaie iinoñedimaci. Noé micori facaise Jusiñamuidi naimaci naimienia iinuamo fecuise ocuride. Jinuimona jillobilena, Noé micori ie balsana finode. Ocho digamie jillobidimaci. <sup>21</sup>Ie isoide. Omoi bautizaia: "Jusiñamui dibeimo jai iticai" llotomoi. "Jeacimonona jai jillobidicai" llotomoi. Omoi abimo ite jearenamona jillobiñedomoi; iadedi omoi comeciaí jai marena ite. Fioldallamona Jesucristo jillua muidona, jillobidicai. <sup>22</sup>Naimie jillua mei, monamo abido jai jaide. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisaí naimie anamo jai itimaci. Taifena Jesucristo anafevilla jira, Jesucristo anamo naimie ite; ia naimienia janafefitañede.

**Jusiñamuimona cai feiñoga  
uai diga, naga jiae  
creyentena cai canua**

**4** <sup>1</sup>Cai isoi naimie illamona, Cristo duere sefuide. Naimie duere sefuide; ia jeacinona finoñede. Duere omoi sefua, naimie illamo omoi comeciaina faca. <sup>2</sup>Nana omoi ille dinori comini jitaillocinodo jaïñeno; iadedi Jusiñamui jitaillocinodo omoi jai. <sup>3</sup>Jusiñamuina uiñoñedino isoi jiae bie isoide rafuena finouidomoi: Omoi aiñede riñomiai diga isoidomoi. Omoi iniñede iiñiai diga isoidomoi. Jearedo rafuena ebiruitomoi. Jifairuidomoi. Jiruana ebiruitomoi. Jusiñamui rairuica jiraraína sedauidomoi. <sup>4</sup>Naie isoide rafuena omoi jai finoñenia, Jusiñamuina uiñoñedinodi omoiri raijicaidimaci. Omoína jeare ñaitimaci. <sup>5</sup>Iese itimaci; iadedi Jusiñamui uicomó ico iitimaci. Naimacina duere finoite. Nia fiódaiñedinona duere finoite. Jai fiódaitinona jiae duere finoite. <sup>6</sup>Naimaci nia fiódaiñena facaise, Jesucristo rafuena cacadimaci. Jeacino muidona nana fiódaitimaci; iadedi naimaci navui iinoia, naimaci joreñuai, Jusiñamui isoi, jaca iitimaci.

<sup>7</sup>Bie enirue raire fuite. Ie jira ebena jaïñeno. Comeciaina raise faca. Jusiñamuimo raise jiñlena, iese omoi jai. <sup>8</sup>Coninina isiruicana omoi jai. Omoi isiruillacino jiae rafue baifemo faite. Jiae diga nicino ia, naimiena omoi isiruillemona, naicinona raire feitaitomoi. <sup>9</sup>Jiae cominina jafueoicaida feiñonoñeno; ia caimare feiñ. <sup>10</sup>Creyentiaína omoi jailla facaise Jusiñamuimona omoi uaina feiñotomoi. Naimie dibeimo omoi maijillena feiñotomoi. Nagamiemo daje isoide uai iñede. Omoi uai diga, naga jiae creyentena cano. <sup>11</sup>Cristo rafuena bu

llofueia, Jusiñamui naimiemo llua isoi, naimie llofuria. Jiae creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemona Jesucristo mamecido iese cai jailla. Illaimana naimie illamona, caina jaca sedade. Naimiemo iobillacínona jaca cai fecacabillasa. Iena jitaidicue.

**Cristo dibeimo cai illamona,  
duere sefuiticai**

<sup>12</sup>Cue isiruiganodomoi. Eo duere omoi sefua, rajicaiñeno. Creyentiaína omoi jailla jira, duere sefuitomoi. Jusiñamuidi Cristona raise omoi iiñuana facacite. <sup>13</sup>Cristo jai duere sefuide. Naimie isoi omoi duere sefua, ieri iobi. Naimie dane bene bia, naimie bairiari eo iobitomoi. <sup>14</sup>Creyentiaína omoi illamona, omoína bu jeare ñiaia, caimare omoi i. Iemonia Jusiñamui Joreñó omoímo illana uiñoñitomoi. Naimie: "Mare" omoína raite. <sup>15</sup>Jiaínodi cominina meineticaci. Rana fiidimaci. Maraiñede rafuena finodimaci. Naimacimo duide rafuena abimo oñeno. Naie isoide rafuena bu finoia, duere sefuite. Iena omoi finoñeno. Naie isoide rafuena omoi finuamona omoi duere sefuillana jitaiñedicue. <sup>16</sup>Creyentiaína omoi illamona omoi duere sefua, ieri meiruiñeno; iadedi creyentiaína omoi illamona, iobillacínona Jusiñamuimo feca.

<sup>17</sup>Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedi naimie cominiñedinona cai baifemo eo duere finoite. <sup>18</sup>Jusiñamui facaina lloraima micori iena jiae cuega: "Mareuidinodi niadeti jillobiñedimacimo, ¿niese

comeciaina jearedinodi jillobitimaci?  
 ¿Niese maraiñedinodi jillobitimaci?  
 Níbai jaca jillobiñeitimaci” cuega.  
<sup>19</sup>Iena omoi uiñuamona, mare rafuedo  
 jai. Jusiñamui jitallamona duere omoi  
 sefua, mare rafuedo jai. Jusiñamui  
 caimo finuana omoi uiñuamona, naimie  
 anamo raise i. Naimie omoina raise  
 enoite. Ie lloga uaina jaca finoite.

#### Pedro creyentiaina nia llofuete

**5** <sup>1</sup>Creyentiaina llofueraini, omoimo  
 rafuena lloiacadicue. Cuedi jiai  
 llofueraimadicue. Cristo fiodallana  
 ciodicue. Naimie ebire abido bia, jiae  
 creyentiai diga iena cioiticue. Iese cue  
 illamona, omoimo lloiacadicue. <sup>2</sup>Omoi  
 anamo ite creyentiaina raise seda.  
 Naimacina raise llofue. Jiaimie railla  
 jira, llofueñeno; iadedi omoi jitalla jira,  
 llofue. Rana ollena llofueñeno; iadedi  
 iocire llofue. <sup>3</sup>Omoi anamo itinona riire  
 llofueñeno; iadedi mare rafuedo omoi  
 jaillamona, naimacina llofue. <sup>4</sup>Cai  
 creyentiai nanoca sedaraimadi Cristo.  
 Naimie abido bia, naimiemona ibana  
 feñoitomoi. Naimie diga jaca iitomoi.  
<sup>5</sup>Conirueni, omoi llofueraini uaina  
 raise iino. Coninimona abina iedoñeno.  
 Jusiñamui facaina lloraima micori iese  
 jiae cuega:

Bu abina iedoia, Jusiñamuimona  
 maraiñede;  
 iadedi bu abi iedoñenia,  
 Jusiñamuimona mare.

Jusiñamui naimiena duenait  
 cuega. <sup>6</sup>Iese illa jira, cai Jusiñamui  
 siñona jira, naimie anamo abina  
 iedoñeno mai raise omoi i. Lemona  
 naimie jitalliruido omoina ibitaite.  
<sup>7</sup>Nie isoide rafue ia, Jusiñamui omoina  
 canocabillana omoi uiñuamona, omoi

comeciai jarire finoñeno. Naimie  
 omoina enoite.

<sup>8</sup>Ebena jaiñeno. Jeacino finuamo  
 abina rairui. Taife caina ramo faicabite.  
 Janallari ie rille jenua isoi, Taife  
 omoina jenocabide. Jeacino omoi  
 finuana jitaide. <sup>9</sup>Naimie ra faia uaina  
 iiñoñeno; ia Cristona iinocana jai. Omoi  
 duere sefua illamona, nana jiae creyentiai  
 duere sefuidimaci. Iena omoi  
 uiñuamona, omoi comeciai ocuiñocana  
 jai. <sup>10</sup>Cai Jusiñamui caina eo duenaita.  
 Cristomo jai cai duilla jira, Jusiñamui  
 illanomo ico jaca iiticai. Dallu birui  
 duere cai sefua, Jusiñamui cai  
 comeciaina raise finoite. Cai comeciaina  
 raise ocuiñotaite. <sup>11</sup>Illaimana naimie  
 illamona, caina jaca sedade. Naimiemo  
 iobillacino cai fecacabillasa. Iena  
 jitaidecue.

#### Naga creyentiaimo carta oria rafue

<sup>12</sup>Silvanona uiñotomoi. Naimiena bie  
 cartana cuetataticue. Cristomo naimie  
 duilla jira, cue ama isoi naimie ite.  
 Cuemona naimiedi raise iinogamie.  
 Omoi dine oretallena, janorede cartana  
 cuetataticue. Bie rafuena dane  
 lloiacadicue: Bie rafuedi Jusiñamui ie.  
 Naimie caina duenallana omoi  
 uiñuamona, bie rafuena iinocana jai.

<sup>13</sup>Babiloniamo ite creyentiai omoi  
 dine imaci uaina oredimaci. Naimacina  
 Jusiñamui jai fetuamona, creyentiaina  
 jaidimaci. Marcos ie uaina jiae orede.  
 Cristomo naimie jai duilla jira, naimie  
 cue jitona eruaide. <sup>14</sup>Conini omoi  
 isiruillamona, nana creyentiaina eo  
 caimare uaido. Cristomo jai omoi duilla  
 jira, naimie omoi comeciaina uri  
 itatajana uiñocana mai jai. Macaibaite.  
 Pedrodicue.

## IE EMODOMO PEDRO ORETAGA RABE

Pedro creyentiaimo carta orede

**1** <sup>1</sup>¿Nigacino? ¿Nie isoidomoi? Bie carta omoimo oredicue. Simón Pedrodicue. Jesucristo dibeimo maijamona, ie rafuena lloticue. Cuena oretajamona, ie lloga uaina finodicue. Cai isoi jai iinotomo. Cai Jusiñamui marena illa jira, Jesucristo marena illa jira, Jesucristo omoina jillotaja jira, jai iinotomo. Jusiñamuimona cai isoi omoi illa jira, bie carta omoi dine oredicue. <sup>2</sup>Jusiñamuina omoi uiñuamona, cai Nama Jesús omoi uiñuamona, iaimaiai omoina duenaillana uiñocana jai. Iaimaiai omoi uri itatajana uiñocana jai.

Creyentiai marena illa rafue

<sup>3</sup>Jesús siñona illamona, bene cai marena illena, naimiedi nana rafue caímo jai iga. Naimiena cai uiñocana jaillamona, caímo ite. Naimie uai ebirede. Naimie jaca mareuidimie. Naimie isoi cai illena, caina jai fetode. <sup>4</sup>Naimie iese illamona, eo mare rafuena caímo jai llote. Jiae rafue baifemo faíte. Bie rafue muidona jeacinomona jillobidicai. Cai comeciai jaie jitaila jira, faificana jaidicai; iadedi naimie rafuena cai iinuamona, naimie illa isoi, icana jaidicai. <sup>5</sup>Jesucristona jai iinotomo. Naimiemo omoi duillamona, mare rafuena finocana jai. Jusiñamui jitaillicinona finocana jai. Lemona abina uiñocana jai. <sup>6</sup>Jearede rafue

finocana jaiñeno; iadedi omoi comeciaina eeno. Iena ocuiñocana jai. Jusiñamuina sedacana jai. <sup>7</sup>Jiae creyentiaina isiruicana jai. Nana cominina isiruicana jai. <sup>8</sup>Naie isoidicinona jitaidomoi. Iedo omoi raise jaia, cai Nama Jesucristona eo raise uiñocana jaitomo; <sup>9</sup>iadedi iedo omoi jaiñenia, abina nia raise uiñoñedomo. Omoi jeacinomona jai jilluana jiai jai feitatomo. Mare rafuena finocana jaillena, omoi jeacinomona jillobidomoi. Iena feitañeno. <sup>10</sup>Cue amatiai, naie isoidicinona finocana jai. Lemona Jusiñamui omoina fetuana raise uiñotomo. Abido danomo jiai jaiñeitomo. <sup>11</sup>Iese omoi jaia, cai Jilloitaraimana naimie illamona, cai Nama Jesucristo ie illanomo omoina eo marena feijoite. Nainomo naimie anamo jaca iitomo.

<sup>12</sup>Ie jira bie isoide rafuena diga icaiño omoimo lloiticue. Bie rafuena uiñotomo. Bie rafue uanaicinona jai raise uiñocaidomoi. <sup>13-14</sup>Cai Nama Jesucristo cuemo jai llua jira, raire cue fioldailenai uiñoticue. Nia cue fioldaiñenia, bie rafuena omoimo diga icaiño lloiticue. Iese omoimo cue lloia, cuemonia mare. <sup>15</sup>Bie rafue omoi raise nagarui uiñollena, omoina birui canoiticue. Cue fioldaille mei, nagarui bie rafuena omoi feitañenana jitaidicue. Ie muidona bie rafuena jai cueticue.

### Pedro Cristona ebirenana jaie ciode

<sup>16</sup>Jamai rafue omoimo lloñedicai. Omoina jifueiacaiñedicai. Cai Nama Jesucristo siñonana lloticai. Naimie abido billena jiai lloticai. Naimien aebirenana jaie ciodicai. <sup>17-18</sup>Eniruemo naimie jaie ia, anedu muidomo naimie diga jaidicai. Jusiñamui nainomo jiai illa jira, naie illano mare. Naie facaise Jusiñamui lluana cacadicai. Jusiñamui naimien alobitaiacade. Ebire llote: "Bimie cue isiruiga Jito. Naimieri iobidicue". Iena jaie cai ciuanona, birui naimie siñonana lloticai. <sup>19</sup>Naiemona Jusiñamui facaina jaie lloraini micoriai lloga rafue suillena jai raise uiñoticai. Naimaci lloga rafuemo omoi comeciaina faca. Lamparín jitiredinomo lligaiñua isoi, naie rafue cai comeciaina uanaicinona uiñotade. Monairaicuduna cai cioia, iairei monaille ua illana uiñoticai. Ie isoide. Cristo dane baireia, iena raise uiñoticai. Jusiñamui facaina lloraini micoriai rafuena cai uiñuamona, uanaicinona ua uiñoticai. <sup>20</sup>Bienia uiñoticai. Dani comeciaimona Jusiñamui facaina lloraini micoriaidi naimaci lloga uaina llofueñedimaci. <sup>21</sup>Dani naimaci comeciai jamai facajamona naie rafuena oñedimaci; iadedi Jusiñamui Joreño naimacimo illamona, naimacina iena uiñotajamona, Jusiñamui rafuena jino llotimaci.

### Pedro tainona llofuerainina llote

**2** <sup>1</sup>Cai jaiagai facaise tainona llofueraini itimaci. Birui ie isoide. Omoi motomo tainona llofueraini iitimaci. Jusiñamui rafuena raise llofueñedimaci; iadedi naie rafuemona omoina itataiacanitimaci. Naimaci facaina Jesucristo fiodaite; iadedi: "Jesucristo cai Nama" raiñetimaci. Naimaci finolle rafue muidona, raire

ebena faifitimaci. <sup>2</sup>Naimaci jearede rafuedo ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñetimaci. <sup>3</sup>Ucube ollena, naimaci tainona llofuiacindodo omoina jifueiacanitimaci; iadedi Jusiñamui riicallaue anamo jai itimaci. Jusiñamui naimacina ico duere finoite.

<sup>4</sup>Naimie ecimo ite jaenisaimona damierie jeacino jaie finua jira, Jusiñamui naimacina jai oni dotade. Naimie riicallaue anamo naimaci jai illamona, naimacimo ite uai jai iñede. Jitiredinomo jai itimaci. Naimacina duere finoite, nana comini Jusiñamui dine illirui ia. <sup>5</sup>Jusiñamui Noé micori facaise ite cominina jaie duere finode. Noé micori Jusiñamui ie mare rafuena naimacimo llote; iadedi Jusiñamuina iinoiacaiñedimaci. Eo nocí deitajamona, enirue buillamona, Jusiñamui naimacina duere finode. Naiemona Noé micorina, ie siete comini diga, jillotate. <sup>6</sup>Sodoma railla nairai, Gomorra railla nairai diga, Jusiñamuidi bootate. Naimien aaimaci iinoñena jira, naimacina fuidode. Naiemona naimienia iinoñedinodí fueua. <sup>7</sup>Sodomamona Jusiñamui Lot micorina jillotate. Lot micori maremie. Eo jearede rafuena naie nairai finua jira, Lot micori comeci jarire ite. <sup>8</sup>Naimaci motomo naimie illamona, nagarui naimaci maraiñede rafue naimie ciuamona, naimie comeciuri iñede. <sup>9</sup>Naimienia jaie iinoñedinona Jusiñamui jai duere finode; iadedi Jusiñamui naimienia iinotino ramo fañamona jilloitajana uiñote. Jusiñamui naimienia iinoñedinodí naimie riicallaue anamo illana jiai uiñote. Ico naimacina duere finoite.

<sup>10</sup>Jearede jitallacino finocabidinona ua duere finoite. Jusiñamui uaina jamaidinona ua duere finoite. Bie

tainona llofueraini mafefodo llofuecabitimaci. Naimaci jitallacina llofuecabitimaci. Jusiñamui jaienisaña jacinriñeno jeare ñaitimaci.<sup>11</sup> Jusiñamui jaienisai uai naimaci baifemo faite; iadedi Jusiñamui illanomo naimaci illamona, bie tainona llofuerainina jeare ñaiñedimaci.<sup>12</sup> Ocainaiai abina raise uiñoñena muidona, cai rillena naimacina faticai. Bie tainona llofueraini ocainaiai isoidimaci. Naimaci raise uiñoñega rafuena jeare ñaitimaci. Ocainaiai faifilla isoi, faifitimaci.<sup>13</sup> Jiae cominiña naimaci duere finua dinori duere sefuitimaci. Birui ite rafuena nagarui ebiruitimaci. Danomo omoi guicabia, naimaci illa jira, raise nabairinidomoi. Jearedimaci. Jearedre rafuena naimaci ebiruilla jira, raise conini diga nabairinidomoi.<sup>14</sup> Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise iinoñedinona jeacinona finotaiacadimaci. Rana eo nicidotimaci. Jusiñamui naimacina duere finoite. Jaca faifitimaci.<sup>15</sup> Cristo rafuena fainonocaillanona, jiae rafuedo birui jaidimaci. Balaam micori rafuedo jai jaidimaci. Balaam micori Beor micori jito. Ucube ollena, Balaam micori uanaicinona jaie lloiacaiñede; iadedi jiae rafuena llollena, jiae nairai dine jaide.<sup>16</sup> Naisonona naimie jaidemo, ie burra naimie diga ñaite. Jeacino naimie finoñellena, ie burra naimie diga ñaite. Uairico isoi Balaam micori jaiñellena, naimie diga ñaite. Birui bie tainona llofueraini, Balaam isoi, jiae rafuedo jaidimaci.

<sup>17</sup>Omoina canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerainimona buena

oñedomoi. Naimaci comeciai daje isoi lloñedimaci. Jusiñamui naimacina ico duere finoite. Jusiñamui illanomo naimaci iñenano, jitiredinomo jaca iitimaci.<sup>18</sup> Jamai ñaia diga abina iedotimaci. Uanaifede rafuemona, como Cristomo iñotinona ramo faitimaci. “Jearedre rafue finuana mare” raitimaci.<sup>19</sup> Cai jitalla rafuena finoredicai raitimaci. Iese raitimaci; iadedi jeacino anamo jai itimaci. Jeacino finocana naimaci jaiilla jira, ie anamo jai itimaci.<sup>20</sup> Cai Nama Jesucristo. Naimiedi cai Jilloitaraima. Naimiena naimaci jaie iñuamona, maraiñedicino anamona jai jillodimaci; iadedi maraiñedicinona dane finocana jaidimacina, naie maraiñedicino anamo dane itimaci. Eo fodo jai jaidimaci.<sup>21</sup> Cristo rafuena jaie uiñoñedimaci. Birui iena uiñotimaci; iadedi naie mare rafuedo raise jaiñedimaci. Iena fainonocaillamona, eo jai fodo jaidimaci.<sup>22</sup> Cai comini iena iese llocabitimaci; “Jico cicuia mei, ie cicuiana dane abido guite. Chanchona cai jocua mei, ie jearedre illanomo raire abido jaicabide”. Cristo rafuemona danomo abido jaidinodi daje isoidimaci.

### Pedro cai Nama Cristo dane billena llofueté

**3** <sup>1</sup>Cue isiruiganodomoi. Navui jiae carta omoimo oredicue. Birui dane cueticue. Bie rafuena jai uiñotomoi; iadedi iena omoi ua raise uiñollena, iena dane cueticue. Iemo omoi comeciai raise facajana jitaidicue. <sup>2</sup>Jusiñamui facaina jaie lloraini micoriai lloga rafuena jai uiñotomoi. Cai Nama caina oretajanona, ie lloga rafuena omoimo jai lloticai. Naimie muidona jillobidomoi. Bie rafuemona omoi comeciai facajana jitaidicue. <sup>3</sup>Biemano omoi comeciaina faca. Cristo nia abido biñenia, Cristo rafuena uaitatino

iitimaci. Naimaci jitailla rafuedo jaitimaci.<sup>4</sup> Jícanoitimaci: “¿Niese Cristo nia abido biñede? Enirue finua facaisemona nana ra daje isoi comuicana jaide. Caī mootiāi jai fiodaicana jaidimaci. Cristo jaca biñeite”.<sup>5</sup> Iese raitimaci; iadedi iese iñede. Jaie suide rafuemo comeciaina facaacaiñedimaci. Jusiñamui jaie lluamona, ie uaido mona finode. Enirue jiai finode. Jinuimona iena finuamona, jinuimona eniruedi bairede.<sup>6</sup> Jinui diga Jusiñamuidi Noé micori facaise cominiña jaie fuidode.<sup>7</sup> Jusiñamui mona, enirue diga, ico fuidollena jai llote. Mona, enirue diga, bootaite. Ie jitaillirui Jusiñamui naimiena iiñoñedinona iese duere finoite. Ie uai jai llote; ia nia suiñede.

<sup>8</sup>Cue isiruiganodomoi. Biena feitañeno. Ie lloga uai jaca suite. Cai Namamona daruidi mil años isoide. Naimiemona mil añodi daruibicaide isoide.<sup>9</sup> Damierie comeciai facadimaci: “Are suiñena jira, cai Nama ie lloga uaina nibai finoñeite”. Iese cai Nama iñede; iadedi comini naimiena iiñuana fecuise sedade. Comini imaci uai meidollena sedade. Naimaci faifillana jitaiñede. Ie muidona nia abido biñede. Ie lloga uai nia suiñede.<sup>10</sup> Fiiriraima billa isoi, cai Nama ebena abido biite. Naimie bia, mona eo ficirenomona fuite. Jitoma, fivui diga, ucuai diga, bootajamona, fuite. Enirue, nana benomo ite ra diga, bootaite.<sup>11</sup> Bie rafue suillena uiñoticai. Naie cai uiñuamona, Jusiñamui jitailla rafue finocana cai jailla. Naimiena raise cai sedajasa.<sup>12</sup> Naie facaise billemo iocire cai sedaja.

Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuai diga bootajamona iena fuidoite.<sup>13</sup> Naimie jai llua isoi, jiaie mona, jiaie enirue diga illena sedadicai. Nainomo Jusiñamui jitailla isoi marena jaca iiticai. Nainomo mare rafue finocana jaiticai.

<sup>14</sup>Cue isiruiganodomoi. Bie rafue nia suiñena jira, naimie abido nia biñena jira, jeacino finoñeno i. Uri icana omoi i. Iese omoi ia, naimie abido bia, omoina: “Mare” raita. Omoiri iobite.

<sup>15</sup>Raire abido cai Nama biñenia, naimiedi comini naimiena iiñuamo ocuride. Iena uiñoticai. Cai isiruiga ama Pablo, bie isoide rafue omoimo navui cuete. Cristo naimiena uiñotaga rafue diese cuete.<sup>16</sup> Nana naimie cartaiaimo bie isoide rafuena cuete. Naimie cartaiaimo diga rafue ite. Dajerie rafue irirede. Cristo rafuena raise uiñoñedino, Cristona raise uiñoñedino iena tainonana llofuecabitimaci; iadedi iemonia faificana jaidimaci. Jiaie Cristona cuegafuiaina tainonana llofuecabitimaci.

<sup>17</sup>Bie rafue birui uiñotomoi. Iena omoi uiñuamona, jearede rafue finocabidino rafuedo jaiñeno. Abido danomo omoi jaiñellena, iemonia abina rairui.<sup>18</sup> Cai Nama cai duenallana uiñocana jai. Naimiedi cai Jilloitaraima. Naimiena omoi uiñocana jaillamona, naimiena nabai. Naimiena birui cai iobitajasa. Naimiena ua jaca cai iobitajasa. Mai. Macaibaite. Pedropicue.

# JUAN NANO FUEÑE ORETAGA RABE

Jusiñamui diga cai jaca illena,  
Juan cuete

**1** <sup>1</sup>Cue uruaína omoi isoilla jira, omoimo cartana oredicue. ¿Nie isoidomo? Nano dofoco ni itimiena lloiacadicue. Naimiedi Jesucristo. Jiaé llofueoicaigano diga, jaie cai motomo naimie illamona, naimie llofuiiana cacadicai. Naimiena ciodiacai. Naimiena jiai jetadicai. Caina Jusiñamuina uiñotade. Jusiñamui diga cai jaca illena, jiai caina llofuite. <sup>2</sup>Jusiñamui dinena billanona, iimana jaide. Naimiena jaie raise cai ciua jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiena jai ciodiacai. <sup>3</sup>Cai ciua rafuena, cai cacaja rafuena, omoimo lloitice. Jusiñamuina cai diga omoi nabaillena jitaidicue. Jusiñamui Jito Jesucristona, cai diga omoi nabaillena jiai jitaidicue. <sup>4</sup>Omoi comeciai caimareficaillena, omoimo bie rafuena cueticue.

Jusiñamuidi jaca mareuidimiena jira, useredinomo ite isoide

<sup>5</sup>Jesucristomona cai cacaja rafuena omoimo ja lloitice. Jusiñamuidi jaca mareuidimiena jira, useredinomo ite isoide. Naimie comecidj jaca jeanina jira, jitiredinomo iñede isoide. <sup>6</sup>“Jusiñamuina nabaidicai” cai raia, iadedi jeacinona finocana cai jaia, tainona lloticai. Uanaicinodo nia

jaiñedicai. <sup>7</sup>Jusiñamui jeacino jaca finoñede. Naimie isoi jeacino finoñeno cai jaia, coninina nabaidicai. Jesucristo fiodaillamona, naimie diaillamona, Jusiñamui cai jeacinona oni dotade. Iena feitate. <sup>8</sup>“Caimo jeacino jaca iñede” cai raia, daní cai abina jifueticai. Uanaicinodo nia jaiñedicai. <sup>9</sup>Naimiemo cai finoca jeacino cai lloia, Jusiñamui cai jeacinona dotaite. Nana cai maraifedicinona dotaite. Naimie iñogamienna jira, naimie maremienna jira, iese finoite. <sup>10</sup>“Omoimo ite jeacino” Jusiñamui llotte; iadedi: “Jeacino finocabiñedicai” cai raia, “Jusiñamui tainona llotte” raiticai. Iemonia naimie uaina jai uaitaticai.

Cai facaina riidotimiedi Cristo

**2** <sup>1</sup>Cue uruaí isoí cue mamecaomoi. Jeacino finocana omoi jaiñellena, omoimo birui cueticue. Jeacinona omoi finuana jitaiñedicue; ia jeacino bu finoia, Jusiñamuimona naimie facaina riidotimie jai ite. Jesucristo maremienna jira, cai facaina caina riidoite. <sup>2</sup>Cai jeacino facaina naimie fiodaite. Iemonia Jusiñamui riicaillifue anamona jillobidicai. Jesucristo cai facaina fiodaite; ia nana comini facaina jiai fiodaite. <sup>3</sup>Jusiñamui llogacinona cai iñuamona, naimienia cai uiñuana jai uiñoticai. <sup>4</sup>“Naimienia uiñoticue” raitimiedi ie llogaciuai iñoenia, naimiedi tainona lloraima. Uanaicinona

uiñofede; <sup>5</sup>ia Jusiñamuina llogaciuaina iinotimiedi Jusiñamuina eo isiruicana jaite. Naimiena cai isiruillamona, naimiena cai nabaillana jai uiñoticai. <sup>6</sup>“Cristona nabaidicue” raitimiedi, Cristo isoi, mare rafuena finoite.

### Cristo rafuedo jaidomoí

<sup>7</sup>Cue isiruiganodomoi. Creyentiaína omoi jailla facaise bie rafuena cacadomoí. Ie jira jiae rafuena birui omoimo cueñeiticue; <sup>8</sup>ia naicinona abido dane lloiticue. Cristo iedo jaide. Iedo jiae jai jaidomoi. Jeacino anamo omoi jaie illamona, jitiredinomo itomoí isoidomoi; ia Cristo rafuena omoi jai uiñuamona, useredinomo jai itomoí isoidomoi. <sup>9</sup>“Cristo rafuedo jaidicue” raitimiedi jiae creyentena enoa, Cristo rafuedo nia jaiñede. Jitiredinomo naimie nia ite isoide. <sup>10</sup>Jiae creyentena bu isiruia, Cristo rafuedo raise jaide. Iedo naimie jaia, jiae naimieno jeacinona finotañeite; <sup>11</sup>iadedi jiae creyentena bu enoa, jitiredinomo nia ite isoide. Jeacino anamo nia ite. Uisnidimie ie jaillinona raise uiñoñena isoi, Jusiñamuina dine rillena raise uiñoñede. Ie isoi abina uiñoñede.

<sup>12</sup>Cue uruiaí isoi cue mamecaomoi. Cristo muidona omoi jeacino Jusiñamuina jai dotajamona, nana omoimo bie cartana cueticue.

<sup>13-14</sup>Einamaci, Jusiñamuina are omoi jai iinuamona, omoimo bie cartana cueticue. Naimie nano dofoconi jaca ite. Conirueni, jeacinona finoñellena omoi comeciaína ocuiñuamona, Jusiñamuina uai omoi comeciaímo raise itabillamona, maraiñedimieno omoi jai anafefitaja jira, omoimo bie cartana cueticue. Naimiedi Taife. Uruiai, Jusiñamuina uaina omoi como iinuamona, omoimo bie cartana cueticue. <sup>15</sup>Omoi ecimo maraiñede rafuena ebiruiñeno.

Iena bu ebiruia, cai Moo Jusiñamuina isiruiñede. <sup>16</sup>Cai comeciaímo ite maraiñede jitailiacinodi Jusiñamuina ieñede. Cai uisido ebire jaide rafuedi Jusiñamuina ieñede. Raruiaí diga, abi ieduacinodi Jusiñamuina ieñede.

<sup>17</sup>Jusiñamuina ieñede rafue jaca fuite. Naie isoide rafuedo jaidinodi jiae faifitimaci; iadedi Jusiñamuina jitailiacinona finodimie Jusiñamuina illanomo jaca iiite.

### Cristona abi caitadino rafue

<sup>18</sup>Cue uruiaí isoídomoi. Jesucristo abido billirui iairei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairedimaci. Iemona Jesucristo abido billirui iairei illana jai uiñotomoi. <sup>19</sup>Cai creyentiaí motomo nano itimaci; ia Cristo dibeimo naimaci iñena jira, naimaci llofuiiana cai nafueñena jira, cai motomo birui fiebiñedimaci. Caimona naimaci jailla jira, Cristomo naimaci duíñenana jai uiñoticai. <sup>20</sup>Jesucristomona Jusiñamuina Joreñona jai omoi feiñua jira, nana omoi Jusiñamuina dibeimo ite rafuena jai uiñotomoi. <sup>21</sup>Ie jira uanaicinona bu llofueia, iena uiñotomoi. Uanaiñedicinona bu llofueia, iena jiae uiñotomoi.

<sup>22</sup>Tainona llofuerainina ja cueiticue. “Cristo cai jilloitaraímañede” llotinodi taino llofueraini. “Jusiñamudi cai Mooñede” llotinodi taino llofueraini. “Jesúdi Jusiñamuina Jitoñede” llotinodi taino llofueraini. <sup>23</sup>Cristona iinoñedimodi Jusiñamuina jiae iinoñedimaci. Cristona iinotino Jusiñamuina jiae iinotimaci. Jusiñamuina Joreño omoimo illamona, iena jai uiñotomoi. <sup>24</sup>Ie jira creyentiaína omoi jailla facaise omoi cacaja rafuedo iinocana nia omoi jai. Iedo omoi

iinocana jaia, Jusiñamui Jitona raise nabaitomoi. Jusiñamuina jiai raise nabaitomoi.<sup>25</sup> Jusiñamui caimo jai llua isoi, naimie diga jaca iticai.<sup>26</sup> Omoina damierie jifueiacana jira, bie rafuena jai cueticue.<sup>27</sup> Jusiñamui Joreñona jai feiñotomoi. Omoina Jusiñamui rafuena naimie uiñotaja jira, jiae rafuena llofuerainina jai jitaiñedomoi. Jusiñamui Joreño uanaicinona omoina uiñotacabide. Naimie omoina uiñotaja isoi, Cristona nabaicana omoi jai.<sup>28</sup> Cristo ico abido biite. Omoi jacinañellen, naimieno omoi meiruiñellen, naimieno birui raise omoi nabai.<sup>29</sup> Jusiñamui marenieno cai uiñuamona, nana mare rafuena finocabidino naimiemo duillana jiai uiñoticai.

**Juandi Jusiñamui  
cominina llua rafue**

**3** <sup>1</sup>Jusiñamui caina isiruilla mona, naimie cominina jai jaidicai. Iemo omoi comeciaina facajana jitaadicue. Naimieno naimaci uiñonena jira, Jusiñamuina iinoñedino cai uiñoga rafuena jiai raise uiñonédimaci.<sup>2</sup> Ero, birui Jusiñamui comindicai. Cristo dane bia, cai illena nia raise uiñonédicai; ia naimie illa isoi cai ico illena jai uiñoticai. Ico naimieno cai cioillemona, iena raise uiñoticai.<sup>3</sup> Iemo cai ocurillamona, naimie marena illa isoi, cai comeciai marena itataja.<sup>4</sup> Jeacinona finocana bu jaia, Jusiñamui llogaciuaina iinoñede. Jusiñamui llogaciuaina bu iinoñenia, jeacinona jai finode.<sup>5</sup> Jusiñamui dinena Cristo billanona, iimana jai jaide. Cai jeacinona oni dotallena, eniruemo naimiedi bite. Naimiemo jeacino jaca iñena jira, jeacino dibeimo naimie jaca iñede.<sup>6</sup> Naimieno nabaidimedi jeacino finocana jaiñede. Jeacinona finocana

jaidimiedi Cristona nia raise cacaiñede. Naimieno nia raise uiñonede.<sup>7</sup> Cue uruiai isoidomoi. Cristo llua isoi tainona llofueraini birui itimaci. Jeacino finuana rairuiñedimaci. Naimaci omoina jifueñellen, abina rairui. Jescristo jaca marenie. Mare rafuena finocana cai jaia, naimie isoi marenitcái;<sup>8</sup> ia jeacino finocana bu jaia, Taifemo duide. Nano dofomona Taifedi jeacino finocana jaide. Ie jira Jusiñamui Jito bite, Taife rafuena anafefitallená.<sup>9</sup> Naimiemo Jusiñamui uai illamona, Jusiñamui cominina jaiñede. Jusiñamui cominina jaillamona, jeacino finocana naimie jainide.<sup>10</sup> Lemona Jusiñamui dibeimo itinona raise uiñoticai. Taife dibeimo itinona jiai raise uiñoticai. Mare rafuena finocana jaiñedimie Jusiñamuimo duiñede. Jiae creyentena isiruñedimie Jusiñamuimo jiai duiñede.

**Coninina cai isiruilla rafue**

<sup>11</sup>Creyentiaina omoi jailla facaise: “Coninina isirui” raillana cacadomoi. Jiae creyentiaina nia omoi isiruñenia, Jusiñamuimo nia duiñedomoi.<sup>12</sup> Caín micorimona cai fueua. Naimie ie amana isiruñena jira, Taife naimieno ramo faiamona, ie amana meinete. Ie ama Jusiñamui jitailla rafuena finouide; ia Caín micori Jusiñamui jitailla rafuena finoñede. Uradoillamona ie amana meinete.<sup>13</sup> Ie isoxide. Jusiñamui jitailla rafuena birui cai finuamona, Jusiñamui dibeimo iñedinodi caina enoidimaci. Ieri jacinañeno.<sup>14</sup> Cristona nia cai iñoñena facaise jeacino anamo cai illa jira, Jusiñamuimona fiodaitino isoidicai. Jiae creyentena cai isiruia, Cristomo jai cai duillana jai uiñoticai; ia jiae creyentena bu isiruñenia, jeacino anamo naimie nia ite.<sup>15</sup> Jiae creyentena bu enoia, naimiemo ie

meinelle uai jai ite. Naie isoidimie Jusiñamuimo nia duiñede.<sup>16</sup> Cristomona cai fueua. Naimie jitaila jira, cai facaina fiodaite. Iemonia jiae creyentiaina cai isiruillana uiñoticai. Ie jira naimaci facaina naimaci ramo jiriñellena fiodaicanitcai.<sup>17</sup> Jiae creyentiaina cai isiruillamona, naimacina canoitcai. Omoimo ra ia, jiae creyentemo ra iñenia, naimiena omoi canoñenia, Jusiñamuina raise isiruñedomoi.<sup>18</sup> Cue uruiai isodomoj. “Jamai uaido jiae creyentiaina isiruiticai” cai raiñena; iadedi cai finoca rafuemona naimacina cai canua.

#### **Jusiñamuimo jaciruiñeno jiiredicai**

<sup>19</sup> Jiae creyentiaina isiruicana cai jaia, Jusiñamui cominina cai illana raise uiñoticai. Jusiñamui muidona cai comeci uri ite.<sup>20</sup> Cai comecimo iticinona uiñoticai. Siñonamiena jira, Jusiñamui iena jiai uiñote.<sup>21</sup> Cai comecimo jeacino iñenia, Jusiñamuimo jaciruiñeno jiiredicai.<sup>22</sup> Naimie llogacinona cai iñoia, naimie jitailacinona cai finoia, naimiemo cai jicaca rafuena birui feiñoticai.<sup>23</sup> Naimie Jito Jesucristo cai iñuana jitaide. Cristo llua isoi, coninina cai isiruillana jiae jitaide.<sup>24</sup> Naimie llogacinuaina cai iñoia, naimiema nabaídicaí. Caina jiae nabaide. Naimie Joreño caino illamona, naimie caina nabaillana jai uiñoticai.

#### **Juan tainona llofuerainina llua rafue**

**4** <sup>1</sup>Omoina isiruiticue. Naga llofueraima uaina iñoñeno. Ailluena tainona llofueraini birui illa jira, Jusiñamuimona naimaci feiñoga uaina niica naimacina facaci:  
<sup>2</sup>“Jusiñamui dinena Jesucristo billanona, iimana jaide” naimaci lloia, Jusiñamuimona naimaci uaina otimaci;

<sup>3</sup>ia “Jusiñamui dinena Jesucristo biñede” naimaci lloia, Jusiñamuimona naimaci uaina oñedimaci. Cristona abina caitadimiemona naimaci uaina otimaci. Naimie billena jai fididomoi. Comini comeciaína feidocana birui jaidimaci.<sup>4</sup> Ero, Jusiñamuimo jai cai duillamona, Jusiñamui caimo ite. Taino llofueraini dibeimo omoi jaiñena jira, naimaci llofuiiana oñedomoj. Naie taino llofuerainimo Taife ite; ia Jusiñamui Taife baifemo faite.<sup>5</sup> Naie tainona llofueraini Jusiñamuina iinoñedino duidimaci. Naimaci ecimo ite rafuena llofuecabitimaci. Jusiñamuina iinoñedino naimaci llofuiiana ebiruitimaci.<sup>6</sup> Jusiñamuimo jai duidicai. Jusiñamuina iñotino cai llofuiiana cacaacadimaci; ia Jusiñamuina iñoñedino cai llofuiiana cacaacaiñedimaci. Iemonia Jusiñamui uaina llofuerainina uiñoticai. Iemonia tainona llofuerainina jiae uiñoticai.

#### **Jusiñamui caina isiruilla rafue**

<sup>7</sup>Omoina isiruiticue. Coninina cai isiruilla. Jusiñamui caina isiruillamona, caina jiaeñona isiruitade. Ie isoi isiruitinodi Jusiñamui comini. Jusiñamui rafuena uiñocana jaidimaci.<sup>8</sup> Jusiñamuimo cai duillamona, caina jiaeñona naimie isiruitaja jira, jiaeñona isiruñedimedi Jusiñamui rafuena nia uiñoñede.<sup>9</sup> Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui dine jaca iiticai. Ie finoca rafuemona Jusiñamui caina isiruillana jai uiñoticai.<sup>10</sup> Jusiñamuina cai isiruillana ñaiñedicue; ia Jusiñamui caina isiruillana ñaiticue. Cai jeacino facaina fiodaillena, ie Jito eniruemo orede. Iemonia cai jeacintonia feitate. Iemonia isiruillana raise uiñoticai.<sup>11</sup> Caina Jusiñamui isiruilla isoi, coninina cai

isiruilla. <sup>12</sup>Buna Jusiñamuina jaca cíoñede; iadedi coninina cai isiruillamona, Jusiñamui caimo illana jai uiñoticai. Naimiena isiruicana jiai jaídicai. <sup>13</sup>Naimie Joreño caimo itatajamona, naimiena cai nabaillana uiñoticai. Caina naimie nabaillana jiai uiñoticai. <sup>14</sup>Bie rafuena jiai uiñoticai. Jusiñamui ie Jitona eniruemo jaie oretate. Naimiena iiñoñedínona jilloitallena, naimiena oretate. Naimie Jitona ciódicai. Ie jira iena birui llotícaí. <sup>15</sup>“Jusiñamui Jitodí Jesús” llotimedi Jusiñamuina nabaide. Jusiñamui naimiena jiai nabaide. <sup>16</sup>Ie jira Jusiñamui caina isiruillana uiñoticai. Caina jiaínona naimie isiruitade. Iedo cai jaíllamona, caina nabaide. Naimiena jiai nabaidicai. <sup>17</sup>Iemonia Jusiñamuina isiruicana jaíticai. Naimie uicomó ico nana cai ille facaise naimiena jaciruiñeíticai. Jusiñamui Jitona Cristo illanona, Jusiñamui cominina cai jiai illanona, naimiena birui jaciruiñedícaí. <sup>18</sup>Jusiñamuina cai isiruia, naimiena jaciruiñedícaí. Eo raise naimiena cai isiruia, ¿niese naimiena jaciruiticai? Naimiena cai jaciruia, naimie caina duere finuana jaciruiticai. Jusiñamuina jaciruitimedi Jusiñamuina nia raise isiruiñede. <sup>19</sup>Nano Jusiñamui caina isiruilla jira, caidi naimiena isiruiticai. <sup>20</sup>“Jusiñamuina isiruiticue” raitimedi jiaie creyentena enoia, jai taino llote. Creyentena ciode; ia naimiena isiruiñede. Jusiñamuina cíoñede. ¿Niese ie cíoñenamienia isiruite? <sup>21</sup>Jusiñamui iena caimo jai llote: “Cuenca isiruitimie jiaie creyentena jiai isiruite”. Ie jira coninina isirui.

#### Taife ie rafuena anafefitaticai

**5** <sup>1</sup>Jusiñamuimona Jesús billana cai iiñoia, Jesús cai Jilloitaraimana cai iiñoia, Jusiñamui cominina jaídicai.

Jusiñamuina cai isiruia, nana naimie cominina jiai isiruiticai. <sup>2</sup>Jusiñamuina cai raise isiruia, naimie llogaciuaina cai iiñoia, naimie cominina jiai isiruiticai. <sup>3</sup>Jusiñamuina cai isiruia, naimie llogaciuaina jiai jai iiñoticaí. Naimie uai raise iiñuamona, iena finollena sefuiruiñedícaí. <sup>4</sup>Jusiñamui dibeimo itinodí Taife ie rafuena anafefitamaci. Cristona cai iiñuamona, Taife ie rafuena anafefitaticai. <sup>5</sup>Jesúdi Jusiñamui Jitonana cai iiñuamona, Taife rafuena anafefitaticai.

#### Jesucristodí Jusiñamui Jito

<sup>6</sup>Jesucristona dane ñaiticue. Naimiedi Jusiñamui Jitona iiñoticaí. Naimie bautizajamona, naimie fiodaillamona naimiedi Jusiñamui Jitonana uiñoticai. <sup>7</sup>Uanaicinona naimie uiñuamona, Jesucristo bautizaja facaise Jusiñamui Joreño caina iena jiai uiñotade. <sup>8</sup>Jusiñamui Joreñomona, Jesús bautizajamona, Jesús fiodaillamona, Jesúdi Jusiñamui Jitonana raise uiñoticai. <sup>9</sup>Jesús bautizaja facaise “Jesúdi cue Jito” Jusiñamui caimo llote. Jesúna comini lloia, iena feiñoticai. Comini llua baifemo Jusiñamui llua faía jira, Jusiñamui lluana jiai ua feiñoticai. <sup>10</sup>Jesúdi Jusiñamui Jitonana cai iiñuamona, cai comeciaí daje isoi lloide; ia Jusiñamui ie Jitona lluana iiñoñedínodi: “Jusiñamui taíno llote” raitimaci. <sup>11</sup>Biená ñaiticue. Jusiñamui naimie diga caina jaca itataiacade. Naimie Jitona cai iiñuamona, iese caina jai itatae. <sup>12</sup>Jusiñamui Jitona iiñotino Jusiñamui diga jaca iitímaci; ia naimienia iiñoñedino Jusiñamui diga jaca iñeitimaci.

#### Jusiñamui caina raise uiñote

<sup>13</sup>Jusiñamui diga ico omoi jaca illena omoi raise uiñollena, bie

cartana jai cueticue. <sup>14</sup>Jusiñamuina cai iinuamona, naimiena jai jaciruiñedicai. Naimiemo cai jiiia, naimie jitilla isoide rafuena cai jicaia, naimie caina cacajana raise uiñoticai. <sup>15</sup>Iese cai jiiia, naimie jaca fairiuana jiai uiñoticai. <sup>16</sup>Jiae creyente jeacino finuana omoi cioia, naimie facaina Jusiñamuimo jii. lemona Jusiñamui dibeimo naimiena dane itataitomoi. Jusiñamui rafuena jamaidimie facaina omoi jiiiana lloñedicue. Naimie faificana jaiacade. <sup>17</sup>Jusiñamui llogacinona bu iinoñenia, jeacino jai finode; ia naimie facaina omoi jiiia, Jusiñamui iena feitaite. Faificana jaiacadimie facaina omoi jiiiana

lloñedicue. <sup>18</sup>Jusiñamui comini jeacinona finocana jaiñedimaci. Naiemona Cristo caña eenote. Ie jira Taife caña duere finonide. <sup>19</sup>Jusiñamuimo jai duidicai. Naimie anamo jai iticai; ia naimiena iinoñedino Taife anamo jai itimaci. <sup>20</sup>Jusiñamui Jito jaie eniruemo billana uiñoticai. Lemona caña nanoca Jusiñamuina uiñotade. Naimiena cai iinuamona, nanoca Jusiñamuimo jai duidicai. Jesucristomo jiai jai duidicai. Ie jira Jusiñamui diga ico jaca iiticai. <sup>21</sup>Cue uruiai isoidomoi. Daje rafuena nia lloitícue. Jiraraímona abina rairui. Jusiñamui ieñede rafuedo omoi jaiñeno. Mai. Juandicue.

## JUAN IE EMODOMO ORETAGA RABE

---

### Uanaicinona coninina cai isiruilla

<sup>1</sup>Juandicue. Creyentiaina sedaraimadicue. Ñoo, ¿nie isoidio? Cue uaina o díne oredicue. O uruaimo cue uaina jíai oredicue. Jusiñamui ona jai fetuamona, Cristo ie uanaicinona cue uiñua jira, omoina isiruiticue. Nana naie uanaicinona uiñotinodí omoina isiruitimaci. <sup>2</sup>Naie uanaicinona cai uiñua jira, omoina isiruitcái. Iena uiñocana jaca jaiticai. <sup>3</sup>Cai Moo Jusiñamui ie Jito Jesucristo diga, caina jaca duenaita. Iaimaiai caina jaca uri itataite. Uanaicinona cai uiñuamona, iaímaiaina cai isiruillamona, iese iiticai.

<sup>4</sup>Caimo cai Moo llua isoi, uanaicinodo o uruaimona dajerie jailla jira, iobidicue. <sup>5</sup>Ñoo, daje rafue omo lloiacadicue. Bie rafuena navui uiñotio. Cristo rafuena nano cai iinoia, bie rafuena uiñoticai. Coninina cai isiruillana ñaiticue. <sup>6</sup>Iena ñaiacadicue. Coninina cai isiruillanona, Jusiñamui llogacinona iinocana jaídicai. Cristona nano omoi iinoia, Jusiñamui lluacinsona cacadomoi. Coninina cai isiruillana cacadomoi.

### Diga taino lloraini ite

<sup>7</sup>Diga taino lloraini illa jira, iena ñaiticue. Jesucristo monamona jai billanona, iimana jaiñenana llofuecabitimaci. Bu iese llofueia, cominiña jifueté. Naimiedi Cristona abi caitadimie. <sup>8</sup>Cristo rafuedo omoi jailla jira, Jusiñamuimona buena omoi faifiñellena, omoi abina rairui. Jusiñamuimona ibana feiñoitomoi. <sup>9</sup>Cristo llogacinona bu fainonocaia, Cristo rafuedo bu jaiñenia, Jusiñamuina ua uiñoñede; iadedi Cristo rafuedo bu jaia, cai Moo Jusiñamuina uiñote. Ie Jitona jíai uiñote. <sup>10</sup>O jofomo Cristo rafuedo jaiñedimie bia, Cristo rafuena cue llofua isoi naimie llofueñenia, naimiena nafueñeno. “Jusiñamui ona canuamona, marena o jai” lloñeno. <sup>11</sup>“Marena jai” o lloia, naimie maraiñede rafue facaina jai itio.

### Rafuena nia lloiacade

<sup>12</sup>Diga rafue ite omoimo cuellena; iadedi aillue cartana cueñeíticue. Omoi díne raire cue illemo ocuriridicue. Danomo cai rillamona ñaiticai, cai comeciai caimarecaillena. <sup>13</sup>O díne o euiño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

# JUAN IE EMODOMO JIAIE ORETAGA RABE

---

## Gayo mare rafue finocana jaide

<sup>1</sup>Juandicue. Creyentiaina sedaraimadicue. Gayo, bie carta o dine oredicue. <sup>2</sup>Nie isoidio? Cristo ie uanaicinona coco uiñua jira, ona isiruiticue. <sup>3</sup>Cue isiruigamedio. Nana o finua rafue marena jaillana jitadicue. O ecairenana jiai jitadicue. O comeci marena illana jai uiñoticue. <sup>4</sup>Cue dine dajerie creyentiai bite. Uanaicinodo omoi jaillana lloote. Cristo rafuedo omoi jaillana lloote. Ie jira iobidicue. <sup>5</sup>Uanaicinodo omoi jailla jira, eo iobidicue. Cue muidona Cristona omoi iiñua jira, cue uruaidomoi isiodomoi. Uanaicinodo omoi jailla jira, eo iobidicue. <sup>6</sup>Cue isiruigamedio. Naga icaiño jiaie creyentiaina o canoia, eo mare. Nia o uiñoñega creyentiai o illanomo ria, naimacina o canoia, ua eo mare. <sup>7</sup>Niae isoide creyentiaina o isiruillana jiai fididicue. Rollena creyentiai ofia, ona marena ñaitimaci. Naimaci jaillinomo naimaci jiai, naimacina o canoia, Jusiñamui jitaila isoi, ua eo mare. <sup>8</sup>Naimie rafue llua muidona, jai macaritimaci. Jusiñamuina uiñoñedimonona jaca buena feiñoñedimaci. <sup>9</sup>Creyentiaina cai illa jira, naimacina cai canua. Naimacina cai canua jira, uanaicinona llocana jaidicai.

## Diótrefes maraiñede

<sup>10</sup>O dine ite creyentiaimo cartana jai oredicue. Diótrefesna janore ñaiacadicue. Naimiedi eo uicoidimie. Naimiedi cue uaina uiñoiacaiñede. <sup>11</sup>O dine cue ria, naimie finoca rafuena omoimo lloitdicue. Cuena jeare ñaite. Jiaie illanomona bite creyentiaina feiñoiacaiñede. Naimaci feiñuana rairuide. Roracomo naimaci bia, naimacina jino dotade.

<sup>11</sup>Jeacino finoraini isoi omoi iñeno; iadedi marcenona finoraini isoi omoi i. Marcenino finocabidimiedi Jusiñamui ie. Jeacino finocabidimiedi Jusiñamuina ua uiñoñede.

## Demetrio marena ite

<sup>12</sup>Nana creyentiaidi Demetritrona marena ñaitimaci. Uanaicinodo naimie jaide. Iese naimiena jiai ñaiticai. Cai lluacinodi uanaicinona uiñotio.

## Rafuena nia lloiacade

<sup>13</sup>Diga rafuena cueiacadicue; iadedi cueñeiticue. <sup>14</sup>Raire ona cue ciollemo ocuriridicue. Ie mei ñaiticoco. <sup>15</sup>Uri o i. Cue dine ite o nabaiñiaidi uaina omo oredimaci. O dine ite cue nabaiñiaimo cue uaina oredicue. Mai. Juandicue.

## JUDAS ORETAGA RABE

### Judadí Jusiñamui fetocanomo cartana orede

<sup>1</sup>Cue nabaiñiai, bie carta omoi dine oredicue. ¿Nie isoidomoi? Judadicue. Ie rafuena llollena, Jesucristo dibeimo jai maijídicue. Jacobo cue ama. Jusiñamui omoína jai fetuana cue uiñuamona, bie cartana oredicue. Cai Moo Jusiñamui omoína isiruite. Jeacinona omoi finoi raillano, Jesucristo omoína jai sedade. <sup>2</sup>Jusiñamui omoína eo duenallana omoi uiñocana omoi jaillana jitaidicue. Naimie omoi comeciaina raise uri itatajana omoi uiñocana omoi jaillana jitaidicue. Naimie omoína eo isiruillana omoi uiñocana omoi jaillana jitaidicue.

### Tainocinona llofueraini ite

<sup>3</sup>Cue isiruigano, omoímo Jusiñamui caina jai jillotaja rafuena iocire cueiacadicue; iadedi jiae rafue birui illa jira, omoimo cueticue. Jusiñamuimona cai feiñoga rafuena omoi eo riiduana jitaidicue. Naie rafuena Cristo oretaganomona cacadicai. Naie rafuena meidonidicai. Ieconi duide. Jusiñamui jiae rafuena lloñeite. <sup>4</sup>Caimo ite rafuena omoi eo riiduana jitaidicue. Cai creyentiai motomo dajerie tainocinona llofueraini illa jira, iena jitaidicue. Uanaicinona llofuecana naimaci illamo cai comeciaina facadicaí; iadedi Jusiñamui jitaillicinona finoñedimaci. “Jusiñamui caina duenallamona,

jeacino finocana cai jaia, cai jeacinona oni dotaite” llofuecabitimaci. “Cai jeacino facaina caína duere finoñeite” llofuecabitimaci. “Jeacino finocana cai jaiacanía, caimoná mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isoidinona duere finoiticue” Jusiñamui jaie llote. Naimie duere sefullacino anamo jai itímaci.

<sup>5</sup>Iemonia omoi raise fueollena, bie rafuemo omoi comeciaina faca. Bie rafuena navui llofueticai. Iena raise cacadomoi; iadedi iena dane uibío. Iena lloitice. Ero, bie eniruemo naimaci billena, Egipciona Jusiñamui cai jaiagaina bitatate. Naimiena naimaci iiñoñena jira, bie eniruemo riñedimaci; iadedi Jusiñamuidi jofue iiñenanomo naimaci fioldallena llote. Iemonia naimaci fioldaitimaci. Ie isoide. Naimiena birui omoi iiñoñenia, omoína duere finoite. <sup>6</sup>Ero, bie rafuemona omoi fueua. Jusiñamui ecimo ite jaienisaimona dajerie imaci illanona jaie jitaiñedimaci. Naimie isoi iacadimaci. Naimaci illano naimie ecimo jaie itímaci. Naimaci jitailla rafuena naimaci finollena, naimie ecimo illana fainonocaidimaci. Iemonia naimie naimacina jai oni dotade. Naimie illanomo dane iñeitimaci. Naimacimo ite uai jai iñede. Naimie riicallaafue anamo jai itímaci. Naimie dine nana

comini illirui ia, naimacina duere finoite. Naimacimona omoi fueua. Jeacinona Jusiñamui díbeimo itíno finoia, Jusiñamui naimacina duere finoite. <sup>7</sup>Ero, bie rafuemona omoi fueua. Sodoma railla nairai micoriai maraiñediginona jaie eo finoudimaci. Gomorra railla nairai micoriai daje isoidimaci. Nainomo ianori ite nairaiai daje isoidimaci. Naimaci aiñede riñoniai diga itimaci. Naiñaiñuai iniñede iiñiai diga itimaci. Coninina aifeditomaci. Lemona Jusiñamui naimacina jaie duere finode. Nana naimaci illanona raise jaie jobaitate. Naimacimona omoi fueua. Jusiñamui nana jeacinona finodinona duere finoite.

<sup>8</sup>Naie tainocinona llofueraini daje isoidimaci. Nicairillafuedo jaillamona, ebena jaidimaci. Naimaci abimo jearede rafuena finodimaci. Jusiñamui uaina jamaidimaci. Jusiñamui jaienisaina jeare ñaitimaci. <sup>9</sup>Miguelna mamecirede jaienici isoi iñedimaci. Miguel Jusiñamui nanoca jaienici. Moisés micori fiodailla mei, Miguel Moisés micori abina raiacade. Taife diga Moisés micori abina uaitate. Taife Moisés micori abina bairoacade. Miguel iena jiai jitaide. Miguel Taife diga riire ñaite; iadedi Taifena jeare ñaiñede. Miguel ie comeicina facañede: “Cuemo ite uai Taifena oni oretallena”; iadedi naimiemo llote: “Jusiñamui ona duere finoite”. <sup>10</sup>Naie taino llofueraini iese iñedimaci. Jusiñamui jaienisaina jeare ñaitimaci. Ocainaiai imaci comeciai uiñuacindodo jailla isoi, naie taino llofueraini imaci uiñoga rafuedo jaidimaci. Lemona ja muidomo faifitimaci. <sup>11</sup>Caín micori isoi naimaci illa jira, Jusiñamui naimacina duere finoite. Jusiñamui jitailla rafuena Caín micori finoacaiñena jira, ie ama micori ie

ama micorina jaie meinete. Caín micori rafuedo naie taño llofueraini jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam micori isoi naimaci illa jira, naimacina duere finoite. Ucube ollena, Balaam micori uanaicinona jaie lloñede; iadedi cai judíuai cominina jeacinona finotate. Ucube ollena, naie taño llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusiñamui naimacina duere finoite. Moisés micori uaina Coré micori iñóñena jira, Jusiñamui naimie micorina meinete. Jusiñamui uaina naie taino llofueraini iñoiacaiñena jira, jiai faifitimaci. <sup>12</sup>Dani omoi nabairillamona danomo omoi guia, naie taño llofueraini jiai bitimaci. Naimaci illa jira, raise nabairinidomoi. Meiruñeno eo guitimaci. Dani naimaci comeximo ite jitaillacinona finodimaci. Omoina canoacaiñedimaci. Maraiñedimaci. Monamo jamai ite uillie isoidimaci. Aifi naie isoide uillie oni ñaitade. Ie mei nocí deide. Nocí deiñenia, enirue saferena jira, buena sicoñede. Maraiñede. Naie taño llofueraini maraiñedimaci. Naimacimo marcino iñena jira, llisiñede riara isoidimaci. Llisilla facaise riara llisiñenia, maraiñede. Riara llisiñenia, iena oni aiñodícaí. Maraiñena jira, safenaita. Naimaci maraiñena jira, naie taño llofueraini jiai safenaitimaci. <sup>13</sup>Naie taño llofueraini jearede rana finocabidimaci. Eo bagode monaillai isoidimaci. Monaillai eo bagoia, monaillai fuemo jearede rana oni ñaicosite. Ucuaina eruallamona naiona cai macarillana uiñoticai; iadedi ucudu ana feia, cai macarillana raise uiñonédicai. Naie taño llofueraini ana fede ucudu isoidimaci. Comini

uanaicinona uiñotañedimaci. Naimaci llofuiacynomona Jusiñamui jitaila rafuedo cai raise jaillana uiñoñediaci. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitímaci.

<sup>14</sup>Naimacina Enoc jaie llote. Adán micori facaisemona Enoc facaisemo Adán cominimona siete moodi comuide. Enoc llote: “Ero, cai Namadi ie ailluena jaienisai diga biite, <sup>15</sup>nana naimiena iinoñedina duere finollena. Naimie jitaila rafuena naimaci finoñena jira, maraifnedicinona naimaci finua jira, naimiena naimaci jeare riire ñaia jira, naimacina duere finoite” llote. <sup>16</sup>Naie taino llofuerainidi creyentaina sedarainina uaitaside. Jusiñamuina jeare ñaoidimaci. Dani naimaci jitaila rafuena finoidimaci. Eo abina biruidimaci. Jiae cominimona rana jamai feiñollena, nano naimacina iobitadimaci. Iobitajano, rana jamai jicadimaci. Naimaci isoi omoi iñeno.

#### Cristona iinotinomo lluacino

<sup>17</sup>Cue isiruiga amatiai, cai Nama Jesucristo oretagano jai llogacinona omoi comeci. <sup>18</sup>Raitimaci: “Jesucristo nia abido biñena facaiseconi naimie uaina iinoñedino jaca iitímaci. Naimaci jearede jitillacinodo jaitimaci” raitimaci. <sup>19</sup>Naie taino llofueraini comini comeciai daje isoi lloillana itatañedimaci. Jusiñamui dibeimo iñede rafuena gaidimaci. Jusiñamui Joreño naimacimo iñede.

<sup>20</sup>Cue isiruigano, naimaci isoi omoi iñeno; iadedi Jusiñamui rafue iñocana

mai omoi jai. Naie rafuedi mare. Jusiñamui Joreño omoina canuacínodo Jusiñamuimo omoi jii. <sup>21</sup>Jusiñamui omoina isiruillacinona uiñocana omoi jai. Jusiñamui ecimo cai jaca illemo fecuise ocuiri. Caina cai Nama Jesucristo duenalla jira, naimie ecimo jaca iitímaci. <sup>22</sup>Diga comini naie taíno llofueraini rafuedo jaidimaci. Iemona dajerie Jusiñamui uaina raise nia iinoñedimaci. Naimacimo llono: “Mai iño. <sup>23</sup>Dajerie cominina Jusiñamui duere sefullacynomona jillote”. Taíno llofueraini rafuedo naimaci jailla jira, niadi fafitimaci. Naie rafuedo naimaci jailla jira, damierie jeacinona eo finodimaci. Jeacinona naimaci finua isoi omoi finoi raillanova, naimacina jaciruioicaida duenai.

#### Jusiñamuimo iobillacínona cai fecacabillasa

<sup>24</sup>Jusiñamuidi omoina jeacinona finoñenana itatarede. Naimie uicom omoina ico itataite. Omoina jeacinona omoi jaca finoñedena nainomo itataite. Nainomo iocire iitomoi. <sup>25</sup>Jusiñamuidi jaca dajede. Cai facaina cai Nama Jesucristo fiodaillamona, caina cai jeacinomona jai jillotate. Jusiñamuimo iobillacínona cai fecacabillasa. Naimiedi siño. Naimie uai ebirede. Nana radi naimie anamo ite. Naga rana naimie ocuillena, naimiemo siño uaudi ite. Jaie jaca iese naimiedi ite. Birui jaca iese naimie ite. Ico jaca iese naimie iite. Mai. Macaibaite. Judadícue.

# JUAN ICO SUILLE RAFUENA CUIAFUE

## Jesucristo ico suille

### rafue lluana cueticue

**1** <sup>1</sup>Jesucristona cueticue. Juandicue. Jesucristo facaina maijicabidicue. Ie dibeimo itinomo iena Jesucristo llollena, Jusiñamui naimiena bie rafuena uiñotade. Jiairuido ico ebena suille rafuena uiñotade. Cuena iena uiñallena, iena cuemo llollena, ie jaeníci cue dine oretate. <sup>2</sup>Jusiñamui cuena birui uiñotaga rafuena jai cueticue. Jesucristo cuemo birui lloga rafuena jai cueticue. Nana birui cue ciua rafuena jiai jai cueticue. <sup>3</sup>Bie ico suille rafuena ado facacabidinodi caimare iitimaci. Biña cacacobidino iena iiñuamona, caimare iitimaci. Bie rafue suillirui iairei illa jira, iemo raise cacarei.

## Siete creyentiai illanuaimo bie carta oredicue

<sup>4</sup>Asia railla eniruemo ite creyentiai, omoi dine cue uai oredicue. Siete illanomo omoi illamona, bie rafue omoi uiñuana jitaidicue. Iena omoi uiñollena, biña cueticue. Jusiñamui ie Joreño diga, Jesucristo diga, omoina duenaicabide. Omoina uri itatacabite. Iena omoi uiñocana mai omoi jai. Jusiñamui jaie jaca ite. Birui naimie jaca ite. Ico jaca iite. Ie Joreño naimie abimo illamona, omoina bie rafuena raise cacataite. Iena iinotaite. <sup>5</sup>Ie Moo

uaina raise iiñuamona, eniruemo naimie illa facaise Jesucristo ie Moo rafuena raise atona llouide. Naimie fiodaite; iadedi naiemona jillode. Naimie dane fiodaiñena jira, nana illaicomini naimie anamo jai itimaci. Caina jaca isiruite. Naimie fiodaillamona caina cai jeacinomona jai jillobitade. <sup>6</sup>Naimie fiodaillamona naimie cominina jaidicai. Naimie anamo illaíma isoi caina sedallena, caina itatate. Naimie cominina cai illa jira, naimie Moo Jusiñamui diga atona birui ñairedicai. Ie muidona naimiemo iobillacínona jaca cai fecacabillasa. Naimie caina sedajasa. Iena jitaidicue.

<sup>7</sup>Ero, eniruemo uillie motodo Jesucristo biite. Naimie bia, nana comini naimiena citoitimaci. Naimieno jaie meinete nairaidi naimieno citoitimaci. Duere sefuillana jacinaillamona nana comini eecuitimaci. Iese jaca suite.

<sup>8</sup>Cai Nama Jusiñamui cuemo llote: “Jaca bue nia iiñenia, jaie jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iticue. Siño jitodicue”.

## Juan Cristona ciode

<sup>9</sup>Daajena Cristomo cai duilla jira, omoi amadicue isoidicue. Cristomo cai duillamona, birui duere sefuidicai. Cominina ico naimie sedaia, nainomo iiticai. Naimie cai comeciaína

ocuiñotajamona iemo birui ocuiridicai. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uiasimo birui iticue. Cárcelmo illa isoi duere sefuillena, illacomini bene cuena birui oredimaci.<sup>10</sup> Jusiñamuina cue sedajamona, naimie Joreño cuena namatajamona, iniñenamona nicairilla isoi cue jinafo dine damie ado lluana cacadicue. Trompeta isoi ie uaidi ficirede.<sup>11</sup> Cuemo llote:

—O ciaoacalle rafuena cueno. O cacaacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramo, Sardimo, Filadelfiamo, Laodiceamo. Diese illanuaimo oreta —llote.

<sup>12</sup>Cuemo llotimieno cue cioillena, jinafo dine erodaticue. Siete oromona finoca lamparínai ciodicue. Naga lamparín ie oromona finoca rairacomo raide.<sup>13</sup> Naie lamparínai motomo iimana eruaidimieno ciodicue. Naimedi Cristo. Areroina jitade. Oromona finoca cinturóna jitade.

<sup>14</sup>Naimie ifotirai userede iniroi isoi eo userede. Naimie uisi irai boa isoi eruaide.

<sup>15</sup>Naimie eillidi bronce eo dua isoi quenirede. Naimie uai aillue ille tua isoi eo ficirede.<sup>16</sup> Ie nabeillimo siete ucuduna lliide. Naimie fuemo nagafebei eo jairede lloebi ite. Naimie uieco eo quenirede, jitade eo lligaiña isoi.

<sup>17</sup>Naimieno cue ciuamona, naimie uicomodo fiodaitimie isoi ana uайдicue; iadedi ie nabeilli diga cuena jetajamona raite:

—Cueno jaciruiñeno. Siño jitona cue illamona, jaie jaca iticue. Ico jaca iiticue.<sup>18</sup> Jaie fiodaiticue; iadedi naiemono jaie jillodicue. Jaca iiticue. Dane fiodañeiticue. Cue uai siñona jira, comini fiodailliruina lloticue. Cueno iinoñedino fiodailla mei, naimaci joreñuai illinona jiai lloticue.<sup>19</sup> O como ciua rafuena

cueno. Omo cue ja lolle rafuena cueno. O ciolle rafuena jiai cueno.<sup>20</sup> Ailluena rafue omo lloitice. Ona iena uiñotaiticue. Cue nabeillimo siete ucuduaína ciodio. Bie siete ucuduaídi bie siete creyentiai llofueraini isoide. Bie siete lamparínai bie siete illanomo ite creyentiai isoide. Bie creyentiaina ja ñaiacadicue —raite.

### Cristo Efesomo ite creyentiaimo lloga rafue

**2** <sup>1</sup>Cristo cuemo llote:  
—Efesomo ite creyentiaimo llollena, nainomo ite llofueraimamo cue lluana cueno: “Cue nabeillimo siete ucuduaí ite. Siete oromona finoca lamarínai motomo iticue. Omoina ñaiticue. Omoi llofueraima cue anamo ite. Omoi motomo cue illamona, cuena nabaidomoi.<sup>2</sup> Omoi motomo cue illa jira, omoi illana raise uiñoticue. Omoi comeciai ocuiñocana iciriñeno itomoi. Maraiñedicinona finoraini diga nabairiñedomoi. Omoi motomo damierie ‘Cristo oretagacai’ raitinona facaciamona, naimaci tainona llorainina uiñotomoi.<sup>3</sup> Omoi comeciai ocuiñocana jaicabidomoi. Cue muidona duere sefuidomoi; iadedi iena sefuruiñedomoi. Cuena iinocana nia jaidomoi.<sup>4</sup> Iese itomoi; iadedi omoi abi rafue cuemono birui janore ite. Creyentiaina omoi nano jailla facaise cuena eo isiruitomoi; iadedi birui iese cuena isiruiñedomoi.<sup>5</sup> Iemo omoi comeciaina faca. Cue dibeimo dane raise i. Cuena omoi nano isiruilla facaiseconi omoi illa isoi, cue jitallacinona birui omoi fino. Cue dibeimo omoi comeciai dane raise iñenia, omoina duere finoiticue. Iemono omoi lamparín oni uiticue. Omoi creyentiaina ñaiticue. Cue dibeimo raise omoi iñenia, jiairuido omoi illanomo creyentiai iñeitimaci.<sup>6</sup> Omoina marecinona jiai lloitice. Nicolaítas railla comini finoca rafuena gaiñedomoi. Iena

jiai gaiñedicue. Eo maraiñede rafuena finocana jaidimaci.<sup>7</sup> Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai iinua. Cuena raise iinotinomo Jusiñamui illanomo ite riarana iiticue. Ie llilemona jaca iitimaci” cueno.

#### Cristo Esmirnamo ite creyentiaimo lloga rafue

<sup>8</sup>Cristo cuemo llote:

—Esmirnamo ite creyentiaimo llollena, nainomo ite llofueraimamo cue lluana cueno: “Jaie jaca iiticue. Eniruemo jaie cue ia, fiodaiticue; iadedi naiemona jai jillodicue. Jaca iiticue. <sup>9</sup>Cue cominina omoi illa jira, duere sefuidomoi. Omoi duerenana uiñoticue. Benomo dueredomoi; iadedi Jusiñamuimona duenidomoi. Naimie dine ico omoi ia, buerenitomoi. Damierie omoina jeare ñainaia uiñoticue. Naimacidi judíuai comini; iadedi cue dibeimo iñedimaci. Taife anamo itimaci. <sup>10</sup>Íco omoi duere sefuria, jaciruiñeno. Taife cárcelmo omoimona damieriena itataite. Abido danomo omoi jaillena, iese omoina duere finoite. Diez digarui duere sefuitomoi. Omoi ille dinori cuena iinocana omoi jai. Duere sefullamona bu fiodaia, cue diga jaca iite. <sup>11</sup>Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai iinua. Jusiñamuidi cuena raise iinotinona naimaci jeacino facaina ibana oñeite. Iraimo faifiñeitimaci; ia Jusiñamui dine jaca iitimaci” cueno.

#### Cristo Pérgamomo ite creyentiaimo lloga rafue

<sup>12</sup>Cristo cuemo llote:

—Pérgamomo ite creyentiaimo llollena, nainomo ite llofueraimamo cue lluana cueno: “Nagafebei eo jairede lloebi cuemo ite. <sup>13</sup>Omoi illana uiñoticue. Taife anamo

itino motomo itomoi; iadedi cuena iinocana nia jaidomoi. Omoimona Antipas micorina navui meineticaci. Naimie micoridi cue rafuena raise llofueuide. Naie facaise cuena fañonocaiñedomoi;<sup>14</sup> iadedi cuemonia janore rafue omoi diga birui ite. Omoimona damieriedi Balaam micori llofuiacinodo jaidimaci. Balaam micori Balac micorimo jaie llua jira, omoi jaiagai jeacino finodimaci. Balac cominimo omoi jaiagai diga nabairillena llote. Ie jira omoi jaiagai jiraraimo fecaca guillena naimaci diga guittimaci. Iemei naimacimona ainiaina otimaci. Jusiñamuina iinoñedinomona ainiaina otimaci. Naiemona jearede rafue comuide. Omoimona birui damierie iese isoidimaci. Cuena iinoñedinomona ainiaina otimaci. <sup>15</sup>Omoimona damierie nicolaítas railla llofuiacinodo jiai jaidimaci. Naimaci llofuiacinodi uanaiñedicino. <sup>16</sup>Naie llofuiacinomona eneno mai omoi i. Iedo jaiñeno. Naie llofuiacinodo jaidinomo: ‘Omoi comeciai iuai dane meido’ llono. Iena naimaci finoñenia, cue dibeimo naimaci raise iacaiñenia, cuemo ite lloebi diga cuena iinoñedinona duere finoiticue. <sup>17</sup>Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai iinua. Judíuai jaiagaimo maná railla guille cue illa isoi, cuena raise iinotinomo monamo jai ite maná isoi iiticue. Bierna ñaiticue. Imaci comeciaina ocuiñotajacinona iiticue. Cue cominina naimaci illamona, naimacimo userede noficina jiai iiticue. Nainomo mameci ite. Dani naiena feiñotino naie mamecina uiñoitimaci” cueno.

#### Cristo Tiatiramo ite creyentiaimo lloga rafue

<sup>18</sup>Cristo cuemo llote:

—Tiatiramo ite creyentiaimo llollena, nainomo ite llofueraimamo cue lluana

cueno: "Jusiñamui Jitona cue illanona, bie rafue omoimo lloiacadicue. Cue uisi irai isoi boode. Cue eilli bronce eo dua isoi quenirede.<sup>19</sup> Omoi finoca rafuena uiñoticue. Jusiñamuina omoi isiruillana uiñoticue. Jiae cominina omoi isiruillana uiñoticue. Cuena omoi iinuana uiñoticue. Jiae creyentiaina omoi canocabillana uiñoticue. Duere sefuidomoi; iadedi omoi comeciai ocuiñuana uiñoticue. Navui iese icana jaidomoi. Birui baí lliai jaidomoi;<sup>20</sup> iadedi cuemo omoi diga rafue ite. Omoi motomo maraiñede riño ite. Jezabelna ñaiticue. Naiñaiñona omoi oni dotañena jira, cuemo omoi diga rafue ite. 'Jusiñamui rafuena jino llua uai cuemo ite' naiñaiño llote. Unañifedicinona llofuecabilla jira, omoimona damierena jifuete. Jearede rafuena llofuecabite. Omoi aíñede riño diga illana llofuet. Omoi iniñede iima diga illana llofuet. Jiraraimo fecaca guille guillena llofuet. Iena guilla jira, omoimona damierie naie jiraraina sedade. Iese naiñaiño llofuecabite.<sup>21</sup> Naiñaiño comeci iuai meidollena are sedadicue; iadedi naiñaiño naie jearede rafuena faínocaiacaiñede.<sup>22</sup> Naiñaiño duere sefullena, naiñaiñona duitaiticue. Naimaci comeciai iuai naimaci meidoñenia, naiñaiño llofuiacinodo jaidinona jiai eo duere finoiticue.<sup>23</sup> Naiñaiño dibeimo itinona meineiticue. Nana creyentiaidi nana comini comeciai iuallaina cue uiñuana jiai uiñoitmaci. Nana comini comeciai facajacina cue uiñuana jiai uiñoitmaci. Ie jira omoi finolle rafue diese cuemonia duere sefuitomoi.<sup>24</sup> Jezabel llofuiacinodo jaiñedinomo ja lloitcue. Taife come uiñóñega rafuena uiñote. Iena nia uiñóñedomoi. Omoimo jiae rafuena lloñeiticue;<sup>25</sup> iadedi cue nia abido biñenia, cuemonia omoi uiñoga rafuena

iinocana mai jai.<sup>26</sup> Cue Moomona cue uaina feiñoticue. Cuena raise iinuamona, abido cue bia, cue jitaillicinona finocabidinomo cue uaina iiticue. Naie facaise cue uai diga cue anamo ite nairaiaina raise sedaitimaci.<sup>27</sup> Naimacina riire raise sedaitimaci, cue jitailla rafue naimaci finollena. Iena naimaci finoñenia, naimacina duere finoitimaci, lloedosi diga, nogeo eo llaila isoi.<sup>28</sup> Cuena iinotinomo monairacuduna jiai iiticue.<sup>29</sup> Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai iinua" cueno.

### Cristo Sardimo ite creyentiaimo lloga rafue

**3** <sup>1</sup>Cristo cuemo llote:  
—Sardimo ite creyentiaimo llollena, nainomo ite llofueraimamo cue lluana cueno: "Jusiñamui Joreño cuemo ite. Naimie Joreño omoina canocabide. Omoina sedacabide. Siete ucuduai cuemo jiai ite. Omoi llofueraimana ñaiticue. Omoi finoca rafuena uiñoticue. 'Cristona raise iinoticaí' raitomoi; iadedi omoi comeciaimonia raise iñedomoi.<sup>2</sup> Cue dibeimo raise dane i. Cuena dane raise iinocana jai. Cuena jai faínocaiacadomoi. Jusiñamui omoi finoca rafueri iobiñede.<sup>3</sup> Cue rafuena jiae cacajamona, iena iinotomoi. Iedo dane jai. Omoi comeciai iuaina dane meido. Cue dibeimo dane raise omoi iacaiñenia, firiraima bainino billa isoi, omoina duere finollena, ebena biiticue. Omoi dine cue billiruina uiñóñetomoi.<sup>4</sup> Omoinona damierie jearede rafuena finocana jaiñedimaci. Jusiñamuimona naimaci comeciai marena jira, cue dine naimaci illena, userede iniroina jitaitimaci.<sup>5</sup> Cuena iinocana jaidinodi userede iniroina jitaitimaci. Cuemo ite rabenicomona naimaci mameciaina

doñeiticue. Cue illanomo jaca iitimaci. 'Naimacidi cue comini' cue Moomo lloiticue. Naimie jaienisaimo iena jiai lloiticue.<sup>6</sup> Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai iiñua" cueno.

#### Cristo Filadelfiamo ite creyentiaimo lloga rafue

<sup>7</sup>Cristo cuemo llote:

—Filadelfiamo ite creyentiaima llollena, nainomo ite llofueraimamo cue lluana cueno: "Mareuidimiedicue. Uanaicinona jaca lloticue. David micori jitona cue illamona, illaimana cue illa jira, siño uai cuemo ite. Le muidona cue jitaila diese cominina feiñoticue. Jusiñamui illanomo naimaci illena, naimacina feiñoticue. Cue jitaila diese cominina feiñonédicue.<sup>8</sup> Omoi finoca rafuena uiñoticue. Omoina cue canua jira, jaca buna cue rafuena omoi lluana itatanide. Jamai bue isoidomoi; iadedi cue rafuena iiñocana jaidomoi. Cuena janóñedomoi.<sup>9</sup> Omoi díne damierie Taife anamo itimaci. Naimacidi judíuái; iadedi cue dibeimo iñedimaci. Tainona llocabitimaci. Ero, omoi díne naimacina cue bitatajamona, omoina cue isiruillana uiñoitimaci. Cue dibeimo naimaci jailla mei, cuemo iobillacina fecaitimaci.<sup>10</sup> Nana cuena iiñóñedinona ico eo duer finoíticue. Iemonia cuena naimaci iiñóñenana uiñoticue. Omoi duere sefuiñellena, naie facaisemona omoina jillotaiticue.<sup>11</sup> Eniruemo ebena abido biiticue. Cuemonia ibana omoi feiñóñeni raillano, cue dibeimo iiñocana omoi jai. Cue dibeimo raise omoi jaiñenia, cuemonia jiaimie omoi facaina ibana feiñote.<sup>12</sup> Cuena raise iiñotino comeciaína ocuiñotaiticue. Cue illanomo jaca iitimaci. Cuemo naimaci duilla jira, cue jiaié mamecina naimaci abimo cueiticue. Jusiñamui mamecina

naimaci abimo cueiticue. Jusiñamui illano mamecina naimaci abimo cueiticue. Naimie illanodi comue Jerusaléna mamecirede. Naimiemonia, monamona ico ana biite.<sup>13</sup> Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai iiñua" cueno.

#### Cristo Laodiceamo ite creyentiaimo lloga rafue

<sup>14</sup>Cristo cuemo llote:

—Laodiceamo ite creyentiaimo llollena, nainomo ite llofueraimamo cue lluana cueno: "Siño Jitodicue. Cue lloga uaina jaca finocabidicue. Uanaicinona jaca llocabiticue. Cue uaido Jusiñamui nana finode. Nana comuitate.<sup>15</sup> Omoi finoca rafuena uiñoticue. Cue rafuedo jaillana nia fainonocaiñedomoi; ia cue rafuedo eo raise jaiñedomoi. Janore iiñocana jaidomoi.<sup>16</sup> Omoi finoca rafuena cue gaiñena jira, cuemonia omoina oni dotaíticue.<sup>17</sup> Ucuberedicaí raitomoi. 'Raruiaíredicai. Nana cai jitaila ra caímo ite' raitomoi. Cuemonia iese iñedomoi. Cuemonia dueredomoi; ia iena uiñóñedomoi. Cuemonia caímare iñedomoi. Cuena omoi raise iiñóñena jira, uisnidino isoidomoi. Taimiedomoi isoidomoi.<sup>18</sup> Ie jira omoina dajerie rafuena llofueiticue. Cuemonia omoi eo duerena jira, omoi comeciaí raise iiñena jira, omoimo fiebidicinona cuemo jica. Cuemonia ono. Omoi duenillena, cuemonia eo mare oro isoide rana ono. Omoi taimieñelle isoiñellena, cuemonia omoi meiruiñellena, userede iniroi isoide ra cuemonia ono. Omoi uisina ciolle isoillena, cuemonia manue ono. Omoi comeciaína ñaiticue. Cuena raise omoi iiñioia, buena omoi comeciaímo fiebiñete.<sup>19</sup> Cue isiruigano cue dibeimo raise illena, naimacimo riire llocabiticue. Cue uaina naimaci iiñollena, naimacina jiai duere

finocabidicue. Ie jira cue dibeimo raise omoi i. Jeacino omoimo ia, iena faínonocai.<sup>20</sup> Ero, nase tuticue isoidicue. Bu cuena cacajia, cue fo billena cuena uaidoia, nasena bu econoia, fo jaiticue. Naimiena nabaillanona, naimie diga guiticue. Omoi comeciaña ñaiticue. Cue rafuena omoi cacaja mei, iena omoi iínoia, cuena feiñoitomoi. Iemonia conini nabaiticai.<sup>21</sup> Eniruemo cue Moo jitalla rafuena jaie cue fuidua mei, naimie ecimo abido jai iticue. Cueri naimie iobillamona, illaimana cue illamona, naimie ecimo jai iticue. Le isoide. Cuena raise iñotino monamo cue ecimo itataiticue. Cue cominina naimaci illa jira, naimacina iobitallena, cue ecimo naimacina nabaiticue.<sup>22</sup> Jusiñamui Joreñomona cue lloga rafue ite, omoi creyentiai iena. Bie rafuena bu cacajia, iena jíai iñuua” cueno.

#### Juan Jusiñamui illanomo ciua rafue

**4** <sup>1</sup>Dallu illanona monamo cue eruaia, jíiae rafuena ciodicue. Nainomo Jusiñamui illanomo econoga nasena ciodicue. Ailli cue diga ñaitimedi cuena uaidote. Naimie uai trompeta isoi ficirede. Llote:

—Monamo bi. Jiairuido suille rafuena omo acataiticue.

<sup>2</sup>Jusiñamui Joreño anamo cue illamona, nicaírilla isoi Jusiñamui illanona ciodicue. Nainomo naimie ana raíllana ciodicue.<sup>3</sup> Naimie eo quenirede. Eo raifide ebirede noficina eruaide. Jaspe railla noficina eruaide. Jaspe enefebecodo ciode. Cornalina railla noficina eruaide. Cornalina jiairede. Naie illano ecimo ameona ciodicue. Ameo mocorenja jira, esmeralde railla noficina eruaide.<sup>4</sup> Naie illano ecimo veinticuatro rairabici jíai ite. Nainomo userede iniroina jitajanona veinticuatro einamaci ana raidimaci. Naimaci ifogímo oromona finoca nuicirai ite.<sup>5</sup> Jusiñamui illanomona boricabide.

Jíai gurucabide. Bue isoi eo ficirede. Naie illano uicom siete reitirai boode. Naie reitiraidi Jusiñamui Joreño mamecido nainomo boode.<sup>6</sup> Jusiñamui illano uicom vidriona eruaide joraina ciodicue. Eo quenirede. Naimie illano ecimo cuatro cajedino ite. Diga uisi naimaci uiecomo ite. Diga uisi naimaci emodomio ite.

<sup>7</sup>Damie leónna eruaide. Jiaimie jurareta jitona eruaide. Jiaimie ie uieco come uiecona eruaide. Jiaimie feede majaiñona eruaide.<sup>8</sup> Nagamiaimo seis iaico ite. Ailluena uisi naimaci iaicuaimo ite. Naimaci abimo uisi jíai eo ite. Nagarui iníñeno jaca llotimaci:

Mare, mare, mare.

Cai siño Nama Jusiñamuidi eo mareuidimie.

Jaie jaca ite. Birui ite. Fco jaca iite.

<sup>9</sup>Naimaci iese llua jira, Jusiñamuina iobitadimaci. Naimiemo iobillacinona naimaci iese fecaia,<sup>10</sup>naie veinticuatro einamaci Jusiñamui uicom ana bitadajanona, naimiemo iobillacinona jíai fecadimaci. Naimieri iobillanona, naimaci nuiciraina naimie díne faianona,<sup>11</sup>rotimaci:

Cai Nama Jusiñamui, ona eo iobitaiacadai.

Odi mareuidio.

Nana rana comuitatio.

Nana cominina comuitatio.

O jitalla jira, naimaci itimaci. Ie jira iobillacinona omo fecacabidai.

#### Juan Jusiñamui illanomo ferinoga rabe illana ciode

**5** <sup>1</sup>Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cuega rafue jai ite. Siete nitaca ra illamona, naie rabe raise ibaibide.<sup>2</sup> Jusiñamui ie nanoca jaienici ado lluana cacadicue. Naimie jicanote:

—¿Bumo ite uaidi nitaca rabe econollena, naie rabena facallen?

<sup>3</sup>Monamo itinomona, enirue itinomona, jai fiodaitinomona, bumo ie uai ifiede, naie rabe oni econollena. Naie rabe facanidimaci. <sup>4</sup>Jaca bumo naie uai iñena jira, eo eedicue. <sup>5</sup>Naie facaise naie veinticuatro einamacimona damie cuemo llote:

—Mai eeñeno. Judá nairai ie Leónna mameciredimedi iena econorede. Naimiedi David micori comini imie. Ie dibeimo iñedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

<sup>6</sup>Naie facaiseconi Toica Llaudana ciodieue. Jusiñamui illano uicomó naimie ite. Naie cuatro cajedino naimie ecimo ite. Naie veinticuatro einamaci naimie ecimo jiai itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jiai ite. Naie uisidi Jusiñamui Joreño mamecido ite. Nana cominina canollena, naimacimo Cristodi Jusiñamui Joreñona jai orede. <sup>7</sup>Naie facaise Jusiñamui ie nabellimona naie rabena ote. <sup>8</sup>Iena naimie ua mei, naie cuatro cajedino, naie veinticuatro einamaci diga, naimiena sedallena, naimie uicomó ana bitadatimaci. Nagamiemo guitarra eruaide arpa ite. Nagamiemo oromona finoca copa ite. Naga copamo caimare soride ra boode. Naie radi Jusiñamuimo comini jiíacino mamecido ite. <sup>9</sup>Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

—Ie nitaca rana oni suiñoitio.

Jiaino jaie ona meineticaci.

O fiodailla jira, o diaillamona, Jusiñamui dibeimo naga nairaimona cominina itatatio.

Naimaci jeacinomona jillotatio.

<sup>10</sup>Naimacina jai fetodio.

O comini naimaci illamona, Jusiñamui diga atona ñaicabitimaci.

Naimie anamo jiairuido eniruemo ite cominina sedaitimaci.

Ie jira naie rabena oni suiñoredio.

<sup>11</sup>Iemei dane eruaillamona, naimie ecimo eo ailluena Jusiñamui jaienisaína ciodicue. Naie cuatro cajedino ecimo, naie veinticuatro einamaci ecimo itimaci. Diga illa jira, facanide. <sup>12</sup>Ado llotimaci:

Bie Toica Llauda isoidimie jaie fiodaite; ia jai jillode.

Naimie eo mareuidimieno jira, Jusiñamui ie uai naimiemo jai illamona, Jusiñamui nana naimiemo jai illamona, Jusiñamui naimiena eo abina uiñotajamona, naimiena jiai iobitaiacadai.

Naimiena cai iiñuanona, naimiemo iobillacina feacaacadai.

<sup>13</sup>Ie facaise nana comini, nana Jusiñamui comuitaga ra diga, lluana cacadicue. Monamo itino, enirue itino, jai fiodaitino, monaillaimo itino lluana cacadicue. Llotimaci:

Jusiñamuina jaca cai iobicabillasa. Toica Llauda isoidimieno jaca cai iobicabillasa. Iobillacina jaca feacaacadai. Caina jaca sedallesa.

<sup>14</sup>Naie cuatro cajedino raitimaci:

—Ie isoi jiai lloiacadai.

Ie facaise naie Llauda isoidimieno sedallena, naie veinticuatro einamaci ana bitadatimaci.

*Juan siete nitaca ra oni suiñuana ciode*

**6** <sup>1</sup>Toica Llauda isoidimie iobillacina naimaci fecaja mei, Llauda isoidimie daje nitaca ra oni suiñuana ciodicue. Naie cuatro

cajedinomona damiedi gurua uai isoi lluana cacadicue. Naimie llote:

—Mai bi.

<sup>2</sup>Naimie llua mei, userede caballo billana ciodicue. Caballo emodo itimiemo sicuira ite. Illaimana jira, naimie ifogimo nuicirai jiide. Ie bacauai anafefitallen, oni jaide.

<sup>3</sup>Iemei Llauda isoidimie jiae nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

<sup>4</sup>Naimie llua mei, jiairede caballo billana ciodicue. Caballo emodo itimiemo are lloebi illamona, Jusiñamui jitaila jira, caballo emodo itimie eniruemo itinona uri itatañede. Naimaci ur iñena jira, conini icirilla jira, conini meineticaci.

<sup>5</sup>Iemei Llauda isoidimie jiae nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

Naimie llua mei, jitirede caballo billana ciodicue. Aime guille facaise illa jira, caballo emodo itimie onollimo ra facaradi ite. <sup>6</sup>Naie cuatro cajedino motomona damie llote:

—Guille raise iñena jira, comini aime guitimaci. Daje kilo trigo ie core darui majija ua ucube diese raifide. Iemonia llomenicona finoia, dacaiño guille raifi ite. Tres kilos cebada ie core darui majija ua ucube diese raifide. Iena damie oia, iemonia llomenicona finoia, dacaiño amani guille raifi ite. Illimo riara nia ite; ia iena iballena ucube baiñede. Ie muidona aime guitimaci —llote.

<sup>7</sup>Iemei Llauda isoidimie jiae nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

<sup>8</sup>Naimie llua mei, lliai usereode caballona ciodicue. Ie emodo itimie

mamecidi Fiadaitadimie. Jusiñamui uai naimiemo illa jira, naimie jailla mei, ailluena fiadaitino itimaci.

Jobairillemona, aime guillemona, duicomona, riirede ocainaiaimona fiadaitimaci. Atuedo meinetasñeite; iadedi eo ailluena meinetasite. Riai uaimona ie cuarta facaina comini fiadaitimaci.

<sup>9</sup>Iemei Llauda isoidimie jiae nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidicai” naimaci llua jira, Jusiñamuina iinoñedino naimacina meineticaci. Jai fiodaillamona naimaci joreñuai Jusiñamui illanomo jai itimaci.

<sup>10</sup>Jusiñamuimo ado llotimaci:

—Cai Nama, siño jitodio.

Mareuidimedio. O uaina jaca finodio.

¿Niruido caina meineticona duere finoito? ¿Niruido ibana oitio?

<sup>11</sup>Jusiñamui cominina illamona, naimacimo Jusiñamuidi userede areroina jitallena fecade. Llote:

—Janore jisa seda. Ñbana nia oñeiticue. Cue dibeimo omo majija isoi, cue cominina nia meineticaci.

Naimacina meinia mei, ibana oiticue.

<sup>12</sup>Iemei Llauda isoidimie jiae nitaca ra oni suiñana ciodicue. Suiñuanona, aillue ñuisaño suide. Jitoma eo jitireficaide. Fivuidi diruena eruaide. Jiairede. <sup>13</sup>Riirede aifi riara ana llutaja isoi, monamona eniruemo ucuai llude.

<sup>14</sup>Ferinoga rabe oni uilla isoi, mona iñebicaide. Naga anedu, naga uiasi diga jiai oni jaide. <sup>15</sup>Ie jira illaimoni, jamai bue isoiñedino, ucuberedino, patrón anamo itino, patrón anamo iñedino, ua nana comini jaciruillamona reiritimaci.

Damierie nofici moto ifomo reiritimaci. Damierie anedu motomo reiritimaci.

<sup>16</sup>Anedumo llotimaci. Noficimo llotimaci:

—Caina ibaillena, cai emodomomo ana uai. Jusiñamui riicaillafuemonia caina reirita. Llauda isoidimie riicaillafuemonia caina reirita. <sup>17</sup>Iaimaiai riicaillarui jai ite. Naiemonia buna jillobinide —llotimaci.

**Juan ailluena Israel comini  
Jusiñamui sello diga nitajana ciode**

**7** <sup>1-2</sup>Naie facaise jiae ico suille rafuena ciodicue. Cuatro Jusiñamui jaeníncina ciodicue. Damie jitoma billanomo ite. Jiae jitmota jaillanomo ite. Jiae iaimaiai beicimo itiaimaiai. Aifi biñellena itimaci. Ie muidona monaillai dine aifi iñede. Aifi iñena jira, amenaiai nirairiñede. Eniruena monaillai diga maraiñeno finollena naimacimo uai ite. Naie facaise jiae jaenínci jitoma billanomona billana ciodicue. Naimiedi cai cajede Jusiñamui ie sellona uite. Jiae jaenínsaimo ado llote:

<sup>3</sup>—Eniruena aifi diga maraiñeno nia finoñeno. Monaillaina maraiñeno nia finoñeno. Amenaiaina maraiñeno nia finoñeno. Jusiñamui dibeimo itino uecuai itofiai sello diga nia cai nitañenia, eniruena maraiñeno finoñeno.

<sup>4</sup>Ailluena comini sello diga nitade. Ciento cuarenta y cuatro mil díese nitajana cacadicue. Nana naimaci Israel cominimona itimaci. <sup>5</sup>Judá micori cominimona doce mil ite. Rubén micori cominimona doce mil ite. Gad micori cominimona doce mil ite. <sup>6</sup>Aser micori cominimona doce mil ite. Neftalí micori cominimona doce mil ite. Manasés micori cominimona doce mil ite.

<sup>7</sup>Simeón micori cominimona doce mil ite. Leví micori cominimona doce mil ite. Isacar micori cominimona doce mil

ite. <sup>8</sup>Zabulón micori cominimona doce mil ite. José micori cominimona doce mil ite. Benjamín micori cominimona doce mil ite. Diese nitade.

**Juan ailluena comini userede  
iniroina jitajana ciode**

<sup>9</sup>Naie facaise ailluena cominina ciodicue. Ailluena jira, naimacina facadonidicue. Naga nairaiaimona itimaci. Naga jiae ñaia uaido ñaitino itimaci. Jusiñamui uicomodo itimaci. Toica Llauda isoidimie uicomodo itimaci. Userede iniroina jitadimaci. Naimaci onollimo raforuai ite. <sup>10</sup>Ado llotimaci:

Bie Llauda isoidimie jiae fiodaillamona, cai jeacynomona Jusiñamui caina jai jillotate.

<sup>11</sup>Naie facaise nana Jusiñamui jaenínsai naimie ecimo naidaillana ciodicue. Naie veinticuatro einamaci ecimo, naie cuatro cajedino ecimo jiae naidaidimaci. Naie facaise Jusiñamui uicomodo ana bitadajanona, naimiena sedadimaci. <sup>12</sup>Raitimaci:

Bie comini isoi omo iobillacinona jiae feacaacadai. Odi mareuidimedio. Abina eo uiñotio. Odi jaca siño jitodio. Ie jira iese lloticai.

Ona jaca cai iobitajasa.

<sup>13</sup>Naie facaise naie veinticuatro einamacimona damie cuemo jicanote:

—¿Userede iniroina jitadinodi nimaci? ¿Ninena bitimaci?

<sup>14</sup>Uai oticue:

—Uiñoñedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina iñoñedino meinegano. Naimaci iniroina jai jocoritimaci. Llauda isoidimie jiae fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiae

ñaiticue. Llauda isoidimie fiodailla jira, naimaci comeciai jai jeanide.<sup>15</sup> Ie jira Jusiñamui uicomu itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise eenoite.<sup>16</sup> Dane duere sefuiñeitimaci. Nana naimaci jitaila ra naimacimo iite. Aime dane guifeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemonia dane usitañeitimaci.<sup>17</sup> Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenallamona, duere sefuiña monona dane eeñeitimaci. Dane sunaiñeitimaci.

**Juan Llauda isoidimie iraie nitaca  
ra oni suiñuana ciode**

**8** <sup>1</sup>Toica Llauda isoidimie iraie nitaca ra oni suiñuanona, media hora monamo tií raiñoicaide.<sup>2</sup> Iemei siete Jusiñamui jaienici naimie uicomu illana ciodicue. Nagamieno daje trumpetana fecade.<sup>3</sup> Naie facaise jiae jaienici billanona, Jusiñamuimo caimare soride ra jobaisoillano ecimo naidaide. Naie jobaisoillanodí oromona finoca. Ie onollimo oromona finoca cucharón eruaide ra iite. Ailluena caimare soride ra naimie feiñua mei, iena jobaide. Ie facaise nana Jusiñamuina iinotino jiiacino Jusiñamuimo jaide.<sup>4</sup> Jobaillamona Jusiñamui uicomu a jaide. Nana Jusiñamuimo jiiacino diga a jaide.<sup>5</sup> Naie facaise Jusiñamuimo jobaisoillanomona boode reici jaienici uanona, cucharón eruaide ramo iena jonianona, eniruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

**Juan trompetas fillana cacade**

<sup>6</sup>Iemei naie siete jaienici naimaci trompetas fillena llinote.<sup>7</sup> Damie ie trumpetana fite. Filla jira, monamona janorede hielo, boode ra diga, dirue diga, eniruemo uaide. Atuedo enirue booñede; ia ailluena boode. Riai uaimona ie tercera facaina boode. Nainomo nana amenaiai boode. Nainomo nana raiticíño boode.

<sup>8</sup>Jiae jaienici ie trumpetana fite. Filla jira, Jusiñamui anedu isoide boode ra monaillaimo faite.<sup>9</sup> Iemonia monaillai diruena jaide. Atuedo iese jaiñede; ia ailluena iese jaide. Riai uaimona ie tercera facaina diruena jaide. Ie muidona ie tercera facaina lliciai fiodaite. Nainomo ite botemona ie tercera facaina jiai anabaite.

<sup>10</sup>Jiae jaienici ie trumpetana fite. Filla jira, monamona aillue boode ucudu eniruemo uaide. Iemonia ie tercera facaina illeniai, ie tercera facaina jorainiai diga erireficaide.<sup>11</sup> Ie muidona naie ucudu Ajenjona mamecirede. Riai uai oni dobaiñuamona “Eriredimie”. Iemonia jinui erireficaide. Iena jiruamona, ailluena comini fiodaitimaci.

<sup>12</sup>Jiae jaienici ie trumpetana fite. Filla jira, jitoma, fivui diga, ucuai diga, fuiride. Iemonia aremona cuatro horas raise usenide. Naiona cuatro horas eo jitirede.

<sup>13</sup>Iemei jaienici ado curioillana cacadicue. Monamo feianona llote:  
—Eniruemo itino ua eo duere ja sefuitimaci. Daje amani jaienici imaci trumpetana nia fiñede. Iena naimaci fia, comini eo duere sefuitimaci.

**9** <sup>1</sup>Jiae jaienici ie trumpetana fite. Filla jira, naie facaise monamona eniruemo damie ucudu mamecido jai uaillana ciodicue. Naimieno Jusiñamui

daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci. <sup>2</sup>Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma raise bainide. Mona jitireficaide. <sup>3</sup>Uilliemona fioduaína eruaíllanona, Taife comini, Janaba comini diga jino billanona, nana eniruemo bitimaci. Jusiñamui llua jira, acaido isoi fioduai eruaídinodi maitimaci. <sup>4</sup>Raiticíño naimaci guillena, ibena naimaci guillena Jusiñamui rairuide. Naimie jitaila jira, naimie sella diga nitañeganona duere finodimaci. <sup>5</sup>Jusiñamui jitaila jira, cinco fivui naimacina duere finoitimaci; ia cominina meineñeditimaci. Acaido isoi isire maitimaci. Eo isirenite. <sup>6</sup>Iese ico suia, eo duere comini sefuilla jira, fiodaillana jitaitimaci. Naimaci abina meineacanitimaci. Fiodaianitimaci; ia fiodainitimaci.

<sup>7</sup>Fioduaídi jobaime dine jaide caballuaina eruaídinaci. Naimaci ifogimo oromona finoca nuicirai eruaide radi ite. Naimaci uiecuai cominina eruaídinaci. <sup>8</sup>Naimaci ifotie arena illanona, riño ifotiena eruaide. Naimaci isiduau leones isiduaina eruaide. <sup>9</sup>Naimaci abiaimo ico isoi ra ite. Lloemona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficiredimaci. <sup>10</sup>Naimaci omacai acaido isoide. Naie diga maillanona, cinco fivui cominina duere finoitimaci. <sup>11</sup>Naimaci illaimadi naie ana ifona sedadimie. Judíuá uaimona naimie mamecidi Abadón. Griego uaimona naimie mamecidi Apolión. Oni dobaínuamona naimie mamecidi Cominina Fuidodimie. <sup>12</sup>Daje duere sefuilla rafue jai fuite. Mena nia suiñede.

<sup>13-14</sup>Naie facaise jiae jaienici ie trompeta fite. Jusiñamui uicomodo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llote:

—Eufrates railla ille fuedo cuatro maiga jaienicina suíño —llote. <sup>15-16</sup>Iena finode. Naimaci anamo eo ailluena soldaduá ite. Doscientos millones soldaduá illana fididicue. Bie facaise, bie hora, birui, bie fivui, bie año, Jusiñamui jitaila facaise ailluena cominina meinetimaci. Atuedo meineñedimaci. Riaí uaimona ie tercera facaina meinetimaci. <sup>17</sup>Soldaduai caballos emodo itimaci. Soldaduai jogobemo ra ite. Daje facaise eo jiairede. Daje facaise mocorede. Daje facaise borarede. Caballos ifogiai leones ifogiaina eruaide. Naimaci fuemonia boode radi, uillie diga, azufre boa isoi jino bite. <sup>18-19</sup>Naimaci fuemonia bite rado ailluena cominina meinetimaci. Ie tercera facaina meinetimaci. Caballos omacai jaiona eruaídinaci. Naimaci omacaimo jaiona eruaide ifogi itimaci. Ailluena cominina jiai duere finodimaci.

<sup>20</sup>Iese ie tercera facaina meinetimaci; ia fiebidino naimaci jeacintonoma naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, broncemona, nocimona, amenamona finoca jiraraíaina nia sedaacadimaci. Naie isoide radi cajeñena jira, jaca cioiñede. Naie isoide radi jamai rana jira, jiai jaca buena cacaiñede. Jaca macariñede. Cajeñede; ia iena sedacabidimaci. <sup>21</sup>Conini meinecabitimaci. Aimaniai dine jaicabidimaci. Naimaci aiñede riño, naimaci iniñede iiima diga icabitimaci. Rana fiicabidimaci. Jeacintona finocana nia jaidimaci.

**Juan Jusiñamui jaienici, econoga rabenico diga, billana ciode**

**10** <sup>1</sup>Ie facaise Jusiñamui illanomona eniruemo jiaie jaienici billana ciodicue. Naimiemo Jusiñamui uai eo ite. Uillie motomo naimie ite. Naimie ifogí afemo ameo ite. Naimie ueco jitoma isoi quenirede. Naimie idai eo boode amena isoi eruaide. <sup>2</sup>Naimie onollimo econoga rabenico ite. Eniruemo naimie ria, naimie nabei eilli monaillai emodomo naidaide. Ie jarifebei eilli eniruemo naidaide. <sup>3</sup>León eo irilla isoi, ado llote. Naie facaise siete gurua ñiaia isoidino uai cacadicue. <sup>4</sup>Naimaci lluana cacaja mei, iena cueiacadicue; iadedi monamona damie cuemo llote:

—Naie lluana lloñeno. Iena cueñeno.

<sup>5</sup>Naie jaienici ie nabei onollí mona dine ñuitajanona, <sup>6</sup>Jusiñamuimo llote:

—Jaca itio. Monana nainomo ite ra diga finodio. Eniruena nainomo ite ra diga jiai finodio. Monaillai nainomo ite ra diga jiai finodio. Cue baifemo o faia jira, uanaicinona cue lluana uiñotio. O lloga uaina jaca suite. <sup>7</sup>Iraie jaienici ie trompeta ja fite. Filla mei, bie facaise Jusiñamui ie facaina lloraini micoraimo jiae lloga rafue suite. Comini naie rafue jiae raise cacaiñedimaci; ia iena ja raise cacaitimaci —llote.

<sup>8</sup>Monamona cuemo aillí llotimie dane llote:

—Jaienici onollimo econoga ite rabenicona llinuai.

<sup>9</sup>Ie jira jaienici dine cue jaillanona:

—Iena cuemo ine —lloticue.

Uai ote:

—Iena ono. Iena mai guiño. Ciifo isoi o fuemo iena cacaitio; iadedi o jebemo erirede ra isoi iena cacaitio.

<sup>10</sup>Llinua mei, iena guiticue. Ciifo isoi naimerede rana cacadicue; ia guilla mei,

erirede ra isoi cue jebemo ite. <sup>11</sup>Cuemo dane llote:

—Omo cue lolle rafuena lloitio.

Ailluena cominimo ico suille rafuena lloitio. Illaicominimo ico suille rafuena lloitio.

**Juan menamie Jusiñamui rafuena lluana cascade**

**11** <sup>1</sup>Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo nigá metros ite facajai. Atona ruica jiai faca. Nainomo cuemo jobaisoillanona jiai faca. Nigá comini naie jofomo ite jiai faca. <sup>2</sup>Cue jofo ecimo ite taibirina facañeno. Naie illano judúaiñedinomo jainaiaide. Cue jitalla jira, Jerusaléna naimaci emodofillamona, daje amani años abimo atomonado iena duere finoitimaci. <sup>3</sup>Naie facaise menamiemo cue uaina iiticue. Iaimaiai cue lolle rafuena daje amani años abimo atomonado lloitiiaimaiai. Comini comeci uiui meiduana iaimaiai jitalla jira, sunaillamona, ebinide iniroina jitaitiiaimaiai —llote.

<sup>4</sup>Iaimaiai mena olivos railla riara mamecido itiiaimaiai. Enirue Namana Jusiñamui illanona, naimie uicomó mena ite lamparín ie rairaco mamecido itiiaimaiai. <sup>5</sup>Iaimaiai duere bu finoacania, naimiena meineitiiaimaiai. Iaimaiai fuemoná boode ra billanona, naimiena meinetiiaimaiai Iaimaiaina duere finodino iese fiadaitimaci.

<sup>6</sup>Iaimaiai Jusiñamui rafue lolle facaiseconi nocí deitañellena, iaimaiaimo Jusiñamui uai iiite. Jinui diruena jaitallena iaimaiaimo uai iiite. Iaimaiai jitaicabilla facaise, diga isoide rafue finuamona cominina duere finoitiiaimaiai; <sup>7</sup>iadedi Jusiñamui rafue iaimaiai llua mei, eo ana ite ifomona

ocainana eruallanona, Taife jino biite. Jino billanona, iaimaiai díga fuirite. Iaimaiaina anafefitaja mei, iaimaiaina meineite. <sup>8</sup>Raiafomo joneñetimaci; iadedi iaimaiai abi Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitaiñena jira, Sodoma jaie ite nairai isoidimaci. Egípto jaie ite nairai jiai isoidimaci. Jerusalémo Jesúna jaie jiai meineticaci. <sup>9</sup>Raiafomo iaimaiai joniana rairuitimaci. Darui amani abi atomonado ailluena comini, naga nairaiaimona iaimaiaina jibuisaibitimaci. <sup>10</sup>Nana eniruemo ite comini iaimaiai fiodaillari iobitimaci. Iaimaiaimona comini duere sefuilla jira, iaimaiai jai fiodailla jira, iobitimaci. Rafuena finuanona, dani coninina rana fecaitimaci. <sup>11</sup>Darui amani abi atomonado illanona, fiodaillamona iaimaiaina Jusiñamui dane jillotaite. Ie muidona naidaitiaaimaiai. Nana iaimaiaina ciódino eo jacinaitimaci.

<sup>12</sup>Naie facaise monamona damie iaimaiaina uaiduana cacadiiaimai. Llote:

—Bene mai bi.

Ieconi iaimaiaina enoidimacidi uillie motomo monamo iaimaiai jaillana ciódimaci. <sup>13</sup>Naie facaise aillue ñuisaño suide. Ie jira janore facai Jerusalén goide. Riai uaimona ie décima facai goide. Naiemona siete mil comini fiodaitimaci. Fiðainédino jacinaillamona:

—Jusiñamuidi ua siño jito  
—lloitimaci. <sup>14</sup>Mena duere sefuilla facaise jai fuite. Nia daje suiñede; ia raire suite.

#### Juan iraie trompeta fillana cacade

<sup>15</sup>Naie facaise jiaie jaienici ie trompetana fite. Monamo itino ado llotimaci:

Jusiñamui, Cristo diga, illaíma isoi, eniruemo ite cominina biruimona jaca sedaite. Naie comini naimie anamo raise iitimaci.

<sup>16</sup>Naie veinticuatro einamaci Jusiñamui ecimo illanona, naimie uicomó ana bitadajanona naimienas sedadimaci.

<sup>17</sup>Llotimaci:

Jusiñamui, cai Nama, omo iobillacínona feacaacadai. Siño jitodio. O jitalla rafuena jaca finodio.

O uaido bie cominina jai sedadio.

<sup>18</sup>Ona naimaci iinoñenamona, o diga iciritimaci; iadedi naimacina emodofidio.

Bie facaise jai fiðaitino jillotajamona, ona naimaci iinoñena jira, naimacimona ja ibana oitio.

Jearede rafuena naimaci finua jira, naie facaise ona iinoñedínona duere finoitio.

O dibeimo maijidino, o facaina lloraini, nana ona iinotino omóna ibana feiñoitimaci.

Nibai jamai bue isoidimaci.

Nibai jamai bue isoñedimaci; iadedi omóna ibana feiñoitimaci.

<sup>19</sup>Naie facaise monamo ite Jusiñamui sedajano nase econuana ciódicue. Naie fo ite cajóna ciódicue. Ieconi boricabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielo ana llude.

Juan daje riñona,  
eo aillue jaio diga, ciode

**12** <sup>1</sup>Naie facaise monamo daje riñona ciódicue. Naiñaiñona cue ciuamona, Jusiñamuidi eniruemo itinomo ico suille rafuena cue uiñuana jitaide. Naiñaiño iniroidi jitoma isoi bairede. Naiñaiño eilli anamo fivui ite.

Naiñaiño ifogimo nuicirai isoi doce ucuduai ite. <sup>2</sup>Jai uruesite. Jocoacana jira, como isirede. <sup>3</sup>Ie facaise monamo jiaimena ciodicue. Naimiedi Taife. Naimie illamona jiae rafue suillena uiñoticue. Naimiedi eo aillue jaiona eruaide. Jairede. Siete ifogi naimemo ite. Diez sigai naimemo ite. Naga ifogimo nuicirai ite. Riai uaimona naimiedi dragón. <sup>4</sup>Naimie omacai diga ailluena ucuaina eniruemo ana butade. Riai uaimona ie tercera facaina butade. Ie uruena gutallena, riño uicomo naidaita naiñaiño jocollena sedade.

<sup>5</sup>Naiñaiño iimana jocode; ia jaio naimena gutañede. Nana nairaiai naimie anamo ico illanona, naimacina ie jitailacinona finotajamona, naimacina eo riire sedaite. Naimacina naimie nia sedañenia, monamo Jusiñamui ie illanomo naimena uite. Ie ecimo Jusiñamui naimena itatate.

<sup>6</sup>Jemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñona sedaite.

<sup>7</sup>Naie facaise monamo Jusiñamui jaienisaidi jaiona eruaidimie diga fuiridimaci. Jaiona eruaidimie jaienisai diga jiai fuiridimaci. Jusiñamui jaienisai illaima mamecidí Miguel. <sup>8</sup>Naimaci dinena emodofidimaci. Jaio ie jaienisai anafefilla jira, Jusiñamui illanomo naimaci illano jai iñede. <sup>9</sup>Eniruemo jaiona eruaidimie ie jaienisai diga dotadimaci. Naie jaiodi Taife. Satanás. Jaiona Taife jaie jaillanona, eo ailluena cominina jai jifuete. <sup>10</sup>Monamo damie ado lluana jai cacadicue:

—Jusiñamui lloga uai jai suide. Ie cominina raise jillotate. Naimie uai eo siño. Ie uai Cristomo illanona, Cristodí cominina raise sedaite. Eniruemo Taifena jai dotaja jira, Jusiñamuina bu raise iinoñenia, jeacínona bu finoia,

Jusiñamui uicomo birui naimie finocabilla isoi, Taife caina llogidoñeite.

<sup>11</sup>Toica Llauda isoidimie naimaciri fiodailla jira, naimie rafuena naimaci lluamona, Taifena emodofidimaci. Fiodaitimacina, naie rafuena llocana jaiacadimaci. <sup>12</sup>Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiemona duere sefuitimaci. Naimie eo icirite. Nainomo naimie are ifellena uiñote. Naimie icirillamona eniruemo itino eo duere sefuitimaci —llote.

<sup>13</sup>Eniruemo jaiona eruaídime dotajamona, naiñaiñona duere finollena, naimiedi iimana jai jococa riñona racade. <sup>14</sup>Naimiemona jilloillena, Jusiñamui mena iaico, majaiño iaico isoi, naiñaiñomo ite. Feianona, jofue iñenanomo daje amani años abimo atomonado illena nainomo jaide. Naiñaiñona Jusiñamui eenollena, nainomo jaide. <sup>15</sup>Ie facaise jaiona eruaídime fuemonia eo ailluena jinubi. Ille isoi tote, naiñaiñona corobaitallená; <sup>16</sup>ia enirue bojuamona, nana jinui nainomo ana jaide. Enirue naiñaiñona canua jira, naiñaiño corobaiñede. <sup>17</sup>Naie facaise jaiona eruaídime riño diga icirillamona, naiñaiño comini diga jobairiacade. Nana Jusiñamui llogacino iñotino diga, nana “Jesúmo duidicai” raitino diga, jobairiacade.

### Juan mena riirede ocainana ciode

**13** <sup>1</sup>Naie facaise monaillai fuemo cue naidaillanona, daje riirede ocaina monaillaimona billana ciodicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogiaimo Jusiñamuina jeare ñaia mameci ite. <sup>2</sup>Naie ocaina abi janallarina

eruaide. Ie eilli oso eillina eruaide. Ie fue león fuena eruaide. Eniruemo itinona sedallena, naimiemo aillue jaiona eruaidimedi ie siño uaina fecade.

<sup>3</sup>Naimiemo ite ifogimona daje jai bofede. Fiodaitena eruaide; ia naiemona jai jillode. Naimieri rajjicaillamona, nana eniruemo ite comini naimie dibeimo jaidimaci. <sup>4</sup>Ocainamo ie uaina aillue jaiona eruaidimie fecaja jira, jaiona sedajanona, iobillacinona naimiemo fecadimaci. Ocainana jiai sedajanona, iobillacinona fecadimaci. Raitimaci:

—Naimie siño jito. Naimiena buna emodofinide.

<sup>5</sup>Naimiemo Taife uai illa jira, abina uradoillamona, Jusiñamuina eo jeare ñaite. Taife jitaila jira, cuarenta y dos fivui iese nana cominina sedade.

<sup>6</sup>Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite. <sup>7</sup>Taife uai naimiemo illa jira, Cristona eniruemo ite iñotino diga jobairite. Naimacina emodofide. Iemonia nana comini naga nairaiaimona naimie anamo itimaci. <sup>8</sup>Nana Jusiñamui rabenicomodo cueñega mameciai diese ocainana sedaitimaci. Jusiñamuidi naimaci mameciaina naimiemo ite rabenicomodo eniruena nia finoñena facaise jaca cueñede; ia Toica Llauda isoidimie fiodailla jira, Jusiñamui naimiena iñotino mameciaina naie rabenicomodo jai cuete. Naimie illanomo jaca illena, naimaci mameciaina cuete.

<sup>9</sup>Omoi jeforena jira, raise fueollena, bie rafuemo cacarei. <sup>10</sup>Duere sefuillena, naie facaise cárcelmo Cristona iñotinona joneitimaci. Naimacina meinia mei, naimacina meinetino Jusiñamuimona daje isoi ibana feiñoitimaci. Ie muidona Cristona iñotino comeciai ocuiñocaida iñocana jailla.

<sup>11</sup>Naie facaise jiae riirede ocaina eniruemonia billana ciodicue. Toica Llauda isoi naimiemo mena sigai ite. Aillue jaio isoi ñaite. <sup>12</sup>Monailaimona bite ocaina uai eniruemonia bite ocainamo jiai ite. Ie uai diga, nana cominina monailaimona bite ocainana sedatare. <sup>13</sup>Eo siño rafuena finocabite. Comini cioillena, monamona eniruemo boode ra ana bitatate. <sup>14</sup>Siño rafuena finuamona, Taife jitaila jira, eniruemo itinona jifuete. Iena naimaci sedallena, cominina monailaimona bite ocaina joreño finuana ocuide. Monailaimona bite ocaina lloebi diga navui bofiamona jai jillode. <sup>15</sup>Joreño finua mei, eniruemonia bite ocaina iena ñaitatate. Iena bu sedañenia, ocaina naimiena meiniana ocuide. <sup>16</sup>Nana cominimo naimie númerona cuetatate. Número cuetatañenia, naimie mamecinia cuetatate. Ie nabeillimo cuetatañenia, ie uiecomo cuetatate. Jamai bue isoidinomo cuetatate. Jamai bue isoñedinomo cuetatate. Ucuberedinomo cuetatate. Ucubenidinomo cuetatate. Patrón anamo itinomo cuetatate. Patrón anamo iñedinomo cuetatate. <sup>17</sup>Iese bumó iñenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie númerona cuetatate. <sup>18</sup>Iena raise cacaillena, iemo omoi comeciaina faca. Abina uiñotimie bie númerona uiñoite. Come mamecido iite. Bie númerodi seiscientos sesenta y seis.

Juan 144,000 comini ruana cacade

**14** <sup>1</sup>Naie facaise Jerusalémo Sion railla anedu muidomo Toica Llauda isoidimie naidaillana ciodicue. Naimie diga ciento cuarenta y cuatro mil comini itimaci. Naimaci uiecuai itofiaimo naimie mameci, ie Moo mameci diga, jai cuega. <sup>2</sup>Monamona

damie ñaiana cacadicue. Aillue ille surua isoi, eo ficirede. Eo gurua isoi jiai ficirede. Ailluena comini arpas taila isoi, naimie ñaiana cacadicue.

<sup>3</sup>Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamaci nainomo itimaci. Dani bie ciento cuarenta y cuatro mil comini bie comue ruana rotimaci. Jiaino iena fueonidimaci. Bie ciento cuarenta y cuatro mil comini eniruemona naimaci dibeimo iñedinomona jai jillodimaci.  
<sup>4</sup>Bie ciento cuarenta y cuatro mil comini jearede rafuena ebiruiñedimaci. Llauda isoidimie rafuena iinocana jaidimaci. Llauda isoidimie fiadilla jira, eniruemo itinomo naimacidi nano jillodino Jusiñamui iena, Llauda isoidimie iena. <sup>5</sup>Cristo rafuedo jeacinona finocabiñeno raise jaidimaci.

#### Juan daje amani jaieniac rafue lluana cascade

<sup>6</sup>Naie facaise mona motomo jaienici feiana ciodicue. Naga nairaimo, nana eniruemo itinomo mare rafuena lluaide. <sup>7</sup>Ado llote:

—Jusiñamuina iinuanona naimiena seda. Naimiemo iobillacinona feca. Naimiemo iinoñedinona ja duere finoite. Monana, enirue diga, monaillai diga, ille diga, naimie finua jira, naimiena seda.

<sup>8</sup>Jiae jaienici billanona llote:

—Babilonia railla naira illano eo aillue; iadedi ja iñeite. Nainomo itino ja fuitimaci. Jeacinona nainomo itino eo finua jira, jiae nairaaina jeacinona jiae eo finotatimaci. Babiloniamo jaie itino isoi, Jusiñamuimona duere sefuitimaci.

<sup>9</sup>Naie facaise jiae jaienici billanona, ado llote:

—Monailaimona bite ocainana bu sedaia, ie joreñona bu sedaia, ie uieco

itofemo, ie onollimo ocaina cuetataga ra bumia ia,<sup>10</sup> Jusiñamui riicailla fuemonia, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaidi Llauda isoidimie diga, iena cioitimaci.<sup>11</sup> Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fiadaiñeno jaca duere sefuitimaci —llote.

<sup>12</sup>Bie rafue suille facaise Jusiñamui lloga uaina raise iinuanona, Jesús dibeimo raise illanona, comeciai ocuiñocana naimaci jaille.

<sup>13</sup>Iemei monamona Jusiñamui Joreño llote:

—Bien cueno: “Biruimona Jesúna iinuanona, meineganodi caimare iitimaci. Jesús dibeimo naimaci illamona, navui duere sefuidimaci. Lemona uri iitimaci. Ieri Jusiñamuimona ibana feiñoitimaci”.

#### Juan Jusiñamui eniruemo itinona duere finua rafuena cascade

<sup>14</sup>Naie facaise monamo cue eruaia, userede uilliena ciodicue. Uillie emodo Cristo raide. Ímana eruaide. Naimie ifogimo oromona finoca nuicirai ite. Ie onollimo jairede lloebi ite.

<sup>15</sup>Jusiñamuina sedajanomona jiae jaienici billanona, Cristomo ado llote:

—O lloebi diga eniruemo ite riarana cota, iena ollena. Jai einaite —llote.

Iese llote; ia cominina duere finollena ñaite. Naimaci duere finua facaisena ñaite. <sup>16</sup>Jaienici llua isoi, ie lloebi diga Cristo cotade. Nana iena finode. Cominina duere finode. <sup>17</sup>Jusiñamuina sedajanomona naie facaise jiae jaienici bite. Naimie onollimo jairede lloebi jiae ite. <sup>18</sup>Ieconi Jusiñamuimo

jobaisoillanomona jiae jaienici bite.

Eniruemo boode ra dotaja uaidi naimiemo ite. Lloebiredimiemo ado llote:

—Jai einailia jira, naimacina o ollena, o lloebi diga illimo ite uvaiaina tino.

Iese llote; iadedi cominina duere finollena ñaite.<sup>19-20</sup> Jainici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie iji jino eo tote. Cominina ñaiticue. Jusiñamui riicaillafue anamo eo duere sefuitimaci. Eo diaitimaci. Trescientos kilómetros dirue enirue emododo toite. Caballo ifogi facaise a llerite.

**Juan siete jaienisai cominina  
duere finoacana ciode**

**15** <sup>1</sup>Naie facaise monamo jiae rafuena ciodicue. Ieri eo raijicaidicue. Iena cue ciuamona, Jusiñamuidi eniruemo itinomo suille rafuena cue uiñuana jitaide. Siete jaienisaina ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Lemona ie riicaillifue saite.

<sup>2</sup>Aillue joraina eruaide rana jiai ciodicue. Quenirede. Uifinide. Boode ra diga tamiana eruaide. Jorai fuemo monaillaimona bite ocainana emodofidinona ciodicue. Ocaina joreño anamo jai iñedimaci. Ie cuetataga número anamo jai iñedimaci. Naimaci onollimo Jusiñamui arpas illanona, naimacina taillanona,<sup>3</sup> jai emodofilla jira, Moisés micori ie ruana rotimaci. Moisés micori Jusiñamui facaina jaie maijuide. Jeacinomona naimaci jiai jai jillua jira, Toica Llauda isoidimie ie ruana jiai rotimaci:

Eo siño ebirede rafuena finodio. Jusiñamuina o illanona, jaca siño jitodio.

Mare rafuena jaca finocabidio. O lloga uai jaca finodio.

Naga nairai o anamo jai itimaci.

<sup>4</sup> Cai Nama, nana comini ona jaciruillamona, ona iiñoitimaci. O marena jira, omo iobillacina fecaitimaci.

O duere finoca rafue uidona nana comini ona sedaitimaci.

<sup>5</sup> Jusiñamuina sedajanomo dane eruaidecue. Ie fo iticuartomo ciodicue.

<sup>6</sup> Naiemona siete jaienisai billana ciodicue. Nagamie cominina duere finoacade. Eo userede linomona finoca iniroina jitade. Oromona finoca cinturones naimaci jogobemo jitade.<sup>7</sup> Naie cuatro cajedinomona damie naga jaienicimo oromona finoca copana fecade. Copamo Jusiñamui eniruemo itinona eo duere finollincino ite isoide. Jusiñamui jaca illa jira, ie lloga uai suicanja jaite.<sup>8</sup> Jusiñamui ebirede siño uai illamona, ie sedajanomo uillie eo illana ciodicue. Bie siete jaienisaimo ite rafue nia suiñena jira, Jusiñamuina sedajanomo buna fo jainide.

**Juan eniruemo copas oni  
totajanona ciode**

**16** <sup>1</sup>Ie sedajanomona Jusiñamui naie siete jaienisaimo ado llote:  
—Cue riicaillafue omoi copamo illa jira, eniruemo itinona duere finollena, omoi copas oni tota.

<sup>2</sup>Daje jaienici iena finode. Eniruemo ite cominina duere finode. Monaillaimona bite ocaina cuetataganona jiai duere finode. Ocaina joreñona sedadionna duere finode. Naimaci abiaimo jodollaaina comuitate. Lemona duere sefuidimaci.

<sup>3</sup>Iemei jiae jaienici ie copa oni totajanoma, monaillaina duere finode. Nana monaillaidi fioldaitino dirue isoi jaide. Eo jearedena eruaide. Nana nainomo ite cajedino fioldaitimaci.

<sup>4</sup>Iemei jiae jaienici ie copa oni totajanoma, nana illiai, nana jorainiai diga, duere finode. Diruena jaide.

<sup>5-6</sup>Naie facaise nana jinuina sedacabide jaienici llote:  
—Jusiñamui, o jaca mareuidimedio. Ona iinotinona eniruemo itino meinia jira, o facaina llorainina naimaci meinia jira, naimacina o raise uiñuamona, naimacina duere finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

<sup>7</sup>Jusiñamui mo caimare soride ra jobaisoillanomona jiae jaienici llote:

—Cai Nama Jusiñamui, ua siño jitodio. Naimaci finocabilla isoi naimacina jai duere finodio.

<sup>8</sup>Naie facaise jiae jaienici ie copa oni totajamona, jitomana duere finode. Eo lligaiñotajamona, eniruemo itino eo usidimaci. <sup>9</sup>Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uiñotimaci; ia naimie dibeimo naimaci começiai iuaina meidoiacaiñedimaci. Jeacinona finuana fainonocaiacaiñedimaci. Naimiemo iobillacinaona feacaacaiñedimaci.

<sup>10</sup>Naie facaise jiae jaienici ie copamona ie duere sefuillacinaona monaillaimona bite ocaina sedajano dine totade. Ie muidona nana enirue jitireficaide. Eo duere sefullamona, comini imaci iffena ainitimaci. <sup>11</sup>Duere sefullamona, Jusiñamuina jeare ñaitimaci. Naimaci abaimo ite jodollaiai isirede; iadedi naimaci começiai iuaina meidoñedimaci. Jeacinona finuana fainonocaiacaiñedimaci.

<sup>12</sup>Naie facaise jiae jaienici ie copamona ie duere sefuillacinaona Eufrates railla ille dine totade. Ie muidona naie aillue ille safenaite. Safenaillamona, jitoma billanomo ite nairaiai illaicomini, imaci soldaduai diga, ruica dine raise birenitimaci.

<sup>13</sup>Naie facaise aillue jaio fuemonia, monaillaimona bite ocaina fuemonia, naimie facaina lloraima fuemonia, daje amani jananiai billana ciodicue. Nagamiemonia daje janaba bite. Nai jananiai jerocina eruaide. <sup>14</sup>Taifemonia bite. Siño rafuena finocabite. Nana illaicomini, imaci soldaduai diga uaidollena, naimacina oreite. Danomo ofillena illaicomina uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uiñoitimaci. <sup>15-16</sup>Armagedón railla illanomo ofitimaci. Naie illano mamecidi judíuai uai mameci. Ieconi cai Nama cuemo llote:

—Fiiriraima isoi ebena biiticue. Cue billemo ocuridimie iocire iite. Cue billemo naimie ocuriria, cue bia, naimie cue jitailiacinona finuamona, naimie meiruiñeite.

<sup>17</sup>Naie facaise jiae jaienici jafaici dine ie copamona ie duere sefuillacinaona totade. Ieconi ie sedajanomona Jusiñamui llote:

—Bie duere sefuillacino diga, cominina cue duere finoacanacino ja fuite.

<sup>18</sup>Ieconi boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemonia iese ñuisaño jaca suiñede. <sup>19</sup>Iemonia nanoca nairai illano daje amani facaina goide. Nana jiae illanuai jiai goidimaci.

Jusiñamuidi Babilonia railla nairaina raise uiñuamona, nana ie riicallaufemonia iena eo duere finode.

<sup>20</sup>Naie ñuisaño monona naga uiasi jai cioñena. Naga anedu jiai cioñena.

<sup>21</sup>Monamona noci deilla isoi, hielo jiai ana jurude. Naga hielo cuarenta kilos nibai merede. Cominimo baillanona, eo duere sefuidimaci. Eo duere sefullamona, Jusiñamuina nia jeare ñaitimaci.

**Juan eo maraiñede riñona duere  
sefuillana ciode**

**17** <sup>1</sup>Naie facaise naie siete copas diga ite jaienisaimona cue díne damie billanona cuemo llote:

—Cue diga bi. Eo maraiñede riño duere sefuillana omo acataitice. Monaillai emodomo naiñaiño jai raide isoide. Naiñaiñodi nanoca nairai illano mamecido ite. Nana illaicomini naie nairai anamo itimaci. <sup>2</sup>Naiñaiñona sedajamona, naiñaiño diga, illaicominiði jearede rafuena finocabidimaci. Naiñaiñona nabailamona, eniruemo ite comini jearede rafuena eo ebiruitimaci —llote.

<sup>3</sup>Nicairilla isoi, jaienici cue joreñona uillanona, jofue iñenanomo cue joreñona uite. Eo jiairede riirede ocaina emodomo naie riño raillana ciodicue. Jusiñamuina eo jearede ñaiacino ocaina abimo eo ite. Ocainamo siete ifogiai ite. Diez sigai jiai ite. <sup>4</sup>Naie riño jiduirede iniroi, jiairede iniroi diga jitade. Eo raifide quenirede ra diga, naiñaiño abi eo finobide. Dajerie ra oromona finoca. Dajerie perlas railla ramona finoca. Ie diga ie abi eo finobide. Naiñaiño onollimo oromona finoca copana uite. Nainomo eo maraiñede jearede rafuena finocana uite isoide. <sup>5</sup>Jusiñamui naiñaiño finoca rafuena uiñotaiacana jira, naiñaiño uiecomo mameci jai cuetataga: “Nanoca Babilonia raillañaiñodicue. Cuemona eo jearede rafue comuicana jaicabide. Cue muidona comini jearede rafuena finocabide”. <sup>6</sup>Naiñaiñodi ailluena Jusiñamuimo duidinona, ailluena ua Jesúna iinotinona meinetajana eo ebiruite. Naiñaiñona cue cioia, eo rajjicaidicue. <sup>7</sup>Jaienici cuemo jicanote:

—¿Bue ñe rajjicaidio? Naiñaiñomo ite rafuena omo lloitice. Naiñaiñodi

ocaina emodomo raide. Naie ocaina rafuena jiai lloitice. <sup>8</sup>Naie ocaina navui ite; ia birui jai iñede. Ico eniruemonia, eo ana ite ifomona, dane biite; iadedi faifite. Ieri Jesucristona iinoñedino rajjicaitimaci. Jesucristona naimaci iinoñena jira, monamo Jusiñamuidi ie rabenicomo enirue nia finoñena facaise naimaci mameciaina jaca cueñede. Naimie illanomo jaca iñeitimaci. <sup>9</sup>Ocaina rafuena omo ja lloitice. Jusiñamui ona uiñotajanova iena cacaitio. Bie siete ifogidi siete anedu mamecido ite. Riño nainomo raide. <sup>10</sup>Ie siete ifogidi siete illaicomini mamecido ite. Naimacimona cinco illaicomini jai iñede. Damie cominina birui sedade. Jiaimie cominina nia sedañede. Cominina naimie sedaia, are naimacina sedañeite. Dallu sedaite.

<sup>11</sup>Ifomona bite ocainana dane lloitice. Cominina jiai sedaite; ia bie siete illaicomini sedajacinomo duite. Cominina naimie sedaja mei, naimie faifite. <sup>12</sup>Ie diez sigaidi diez illaicomini mamecido ite. Diez nairaina sedaitimaci; iadedi nia sedañedimaci. Cominina dallu sedallena, ocainamona naimaci uaina feiñoitimaci. <sup>13</sup>Daje isoi comecina lloitimaci. Ocainana nabaitimaci. Naimie jitalla rafuena finuanona, naimie anamo iitimaci. <sup>14</sup>Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illaicomini baifemo faia jira, nanoca imiena jira, naimacina emodofite. Ie cominina naimie fetode. Naimienia iinotimaci. Jai emodofitimaci —llote.

<sup>15</sup>Jaienici nia llote:

—Riño monaillai emodomo raillana aillí cioldio. Monaillaidi nana comini mamecido ite. Naga nairai mamecido ite. <sup>16-17</sup>Naie diez illaicominiði, ocaina

diga riñona enoitimaci. Naiñaiñona duere finoitimaci. Jusiñamui jitaila jira, naimie jitaila rafue fuidollena, naimie lloga uai suillena, naimaci comechina daje isoi lloitaite. Ocaina anamo naimacina itataite. Riñona iese fuidoitimaci. Naiñaiño iniroina oni dotatajanona, naiñaiño taiñaiñona iite. Naiñaiñona meineitimaci. Ie llicisina riitimaci. Ja muidomo iraimo naiñaiñona dotaitimaci. Iese naiñaiñona duere finuanona, naiñaiñona fuidoitimaci.<sup>18</sup> Bie riñodí nanoca nairai illano mamecido ite. Naie nairai anamo nana eniruemo ite illaicomini iitimaci —llote.

**Juan Babilonia railla nairai illano goilla rafuena ciode**

**18** <sup>1</sup>Ie facaise monamona jiae jaenínci ana billana ciódicue. Naimie uai siño. Naimie uai siñona jira, eniruena lligaiñote. <sup>2</sup>Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai iñedimaci. Nainomo Taife jaenínci birui itimaci. Jananaija nainomo birui itimaci. <sup>3</sup>Nia goiñenia, bie nairai jeacinona eo finuamona, nana nairaija iena ebiruitimaci. Bie nairaina nabaillamona, nana illaicomini jearede rafuena jiai finocabidimaci. Jearede rafuemonia nana rana fecaraini bie nairaimona alluena ucubena ganocabidimaci —llote.

<sup>4</sup>Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i. <sup>5</sup>Bie nairai jeacino eo finocana jaidimaci; iadedi iena Jusiñamui uiñuamona, naimacina jai duere finoacade.

<sup>6</sup>Jusiñamui, naimaci finua diese ibana

ono. Naimacina ua eo duere fino. <sup>7</sup>Jeacino finuamona iobidimaci. Iemonia abi iedotimaci. Jeacino finuana eo ebiruitimaci. “Illaicomnidicai. Nana cai jitaila ra caimo ite. Feciño isoi duere jaca sefuiñeitacai” comeciaña facadimaci; <sup>8</sup>iadedi cai Nama Jusiñamui naimacina ebena eo duere finoite. Duicomona, sure illamona, aime guillamona fiódaitimaci. Naimaci jofue booite. Jusiñamui siño jitona jira, naimacina raire fuidoite —llote.

<sup>9</sup>Bouamona uillie naimaci ciobia, sunaillamona, naie nairai diga nabairite illaicomini eo eeitimaci. <sup>10</sup>Duere sefuijena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite —lloitimaci.

<sup>11</sup>Naimaci rana naie nairai jai oñena jira, rana fecaraini eo sunaillamona eo eeitimaci. <sup>12</sup>Iese fecacabidimaci: oro, plata, abi finollena raifide ra, diga eo mare raifide iniroi, diga caimare soride rabiciai, elefante sigainiai, jofona nille ra, bronce, lloeona, mare nofici, <sup>13</sup>guille caimaretade ra, caimare soride ra, vino, guille ie aceite, mare harina, core, juraretaiai, toica llaudaiai, caballos, carretas, comini. Vendellena, cominina aticabidimaci. <sup>14</sup>Sure illamona lloitimaci:

—Caimona omoi comeciai jitaila rana ja oñenitomoi. Omoi ebiruiga rana ja oñenitomoi.

<sup>15</sup>Duere sefuijena naimaci jaciruilla jira, nainomona ucubena jai oñenamona, rana fecaraini aremona ado eo eeitimaci. Sunaitimaci. <sup>16</sup>Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare iniroi diga ebiruitimaci. Eo raifide abina finolle rana eo ebiruitimaci. Oromona finoca ra, perlamona finoca

rana eo ebiruitimaci; <sup>17</sup>iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo maijiuidino diga, nainomo jaidino diga, botedo rana fecaraini diga, <sup>18</sup>aaremona uilliena ciuamona, naie nairai bouana fidiano, lloitimaci:

—Naie nairai nana jiai nairaiai baifemo navui faite. Jiae nairai ie isoi ebinide.

<sup>19</sup>Sure illamona, naimaci ifogimo imuicina faianona, eeitimaci. Lloitimaci:

—Bie nairai eo duere sefuide. Bie nairaimona boteredinodicaí navui ailluena ganadicai. Bie nairai jai raire fuite.

<sup>20</sup>Naie facaise monamona damie llote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui maijidomoi. Naimie rafuena navui llofueidomoi. Naie nairaimona duere sefidomoi; iadedi omoi facaina Jusiñamui ibana jai ote.

<sup>21</sup>Naie facaise jiae jaienicimo siño uai illanona, eo ailluenofici llinuanona, monailaimo iena faite. Llote:

—Bie nofici dane cai cioiñena isoi, Babilonia railla nairai dane iñeite. Jusiñamui iena eo riire fuidoite.

<sup>22</sup>Nainomo buna dane roñeite. Buna guitarrana eruaiade arpas jaca tainéite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca finoñeite. Buna jaca doberiñeite. Llomenicona finollena, buna dane maijíñeite.

<sup>23</sup>Nainomo naiona lamparíniai dane booñeite. Rafue dane iñeite. Eo caimare iobitaja rafue dane iñeite.

Iraisiñeitimaci. Saiñeitimaci. Naie nairai rana fecarainidi navui nanoca fecaraini. Naimacina Taife canua jira, ailluena nairaiaina navui jifuecabidimaci. <sup>24</sup>Naie

nairai ailluena Jusiñamuina iinotinona meineticimaci. Ailluena Jusiñamui facaina llorainina meineticimaci; iadedi naimacina Jusiñamui duere finua jira, ua eo mare —llote.

**19** <sup>1</sup>Ie facaise monamo eo ailluena comini ado lluana cacadicue. Jusiñamuimo llotimaci:

Ona cai iobitajasa. Caina jai jillotatio.

O uai ebirede. Odi siño jitodio.

<sup>2</sup> O anamo itinona raise uiñuamona, uanaicinona o uiñuamona, naimacina duere jai finodio.

Naie jearede rafuena finode riñona jai duere finodio.

Naie riño ailluena cominina jearede rafuena finotate.

Ailluena o facaina maijidinona jai meinetade; iadedi iba jai otio.

<sup>3</sup>Iemei dane llotimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —llotimaci.

<sup>4</sup>Naie veinticuatro einamaci, naie cuatro cajedino diga, Jusiñamui ecimo ana bitadajanona, naimienas sedadimaci. Llotimaci:

—Omoi lluacino mare. Ie isoi jiai lloiacadicai. Jusiñamuina cai iobitajasa.

<sup>5</sup>Jusiñamui illanomona damie llote:

Nana cai Jusiñamuina facaina maijidino iobitajasa.

Nana naimienas iinotinonanaimienas iobitajasa.

Jamai bue isoidino naimienas iobitajasa.

Jamai bue isoñedino naimienas iobitajasa.

**Juan Toica Llauda isoidimie aina ua rafuena cascade**

<sup>6</sup>Naie facaise monamo eo ailluena comini lluana cacadicue. Ailluena jinui

surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai  
ibotajasa.

Naimie siño jito. Nana cominina  
birui jai sedade.

<sup>7</sup> Eo iobidicai. Naimiemo  
iobillacina eo caī fecajasa.

Llauda isoidimie ie aina ua rafue  
facaise jai suide.

Naiñaiño jai finobide.

<sup>8</sup> Mare iniroi naiñaiñomo jai ite. Eo  
userede. Quenirede. Jeanide  
llotimaci. Iese iniroina llotimaci; ia  
Cristo, ie comini diga, jaca illena  
ñaitimaci. Ie ai diga, ini ie riño jaca  
caimare illa isoi, nana naimie comini  
diga, naimie caimare jaca iiite. Naie  
mare iniroidi, Jusiñamui jitallacina  
finuamona, naimie iinotino imaci mare  
finoca rafue isoide.

<sup>9</sup>Jaienici cuemo llote:

—Biena cueno: “Llauda isoidimie aina  
ua rafue dine uaidoganodi caimare  
ititimaci”. —Iemei llote:

—Jusiñamui iena llua jira,  
uanaicinona omo lloticue.

<sup>10</sup>Jaienici uicomodo eillimo ana  
bitadaticue, naimiena sedallena; ia  
cuemo llote:

—Dama ite. Cuena sedañeno; ia dama  
Jusiñamua seda. Jesús ie dibeimo  
itinona uanaicinona jai uiñotade. Ie jira  
naga o diga naimiena iinotino isoi,  
Jusiñamui facaina jiai maijidicue. Naga  
Jusiñamui facaina maijidimie Jusúna  
llocabite. Ie muidona dama  
Jusiñamua seda.

#### **Juan userede caballo emodomoo itimienia ciode**

<sup>11</sup>Naie facaise mona ecorillana  
ciodicue. Nainomo userede caballona  
ciodicue. Naie emodomoo itimieno mena  
mameci ite. Hinogamieno mamecirede.

Uanaicinona Llocabitimieno jiai  
mamecirede. Naimacina raise  
uiñuamona, naimie dibeimo iñedínona  
duere finollena, naimaci diga jobairite.

<sup>12</sup>Naimie uisidi irai isoide. Illaimana  
jira, naimie ifogimo ailluena nuicirai  
ite. Naimiemo cuega mamecina buna  
uiñoñede. Dama naimie iena uiñote.

<sup>13</sup>Naimie jitaca iniroi ie dibeimo  
iñedino diruemo mutaca. Jusiñamua  
naimie uiñotaja jira, Jusiñamui  
Uairedimieno mamecirede. Naimiedi  
Jesucristo. <sup>14</sup>Naimie jinafona soldaduai  
isoí Jusiñamui facaina itino monamona  
billana jiai ciodicue. Eo mare userede  
jeanide iniroina jitadimaci. Userede  
caballuaí emodomo itimaci. <sup>15</sup>Eniruemoo  
ite naíraiaina emodofillena, naimie  
fuemo jairede lloebi ite. Naimacina  
emodofilla mei, naimacina naimie  
jitallacina finotallena, naimacina eo  
riire sedaite. Jusiñamui siño jitona jira,  
naimie riicaillifue anamo itinona eo  
duere finoite. <sup>16</sup>Naimie iniroimo, naimie  
idaímo jai cuega: “Nanoca Illaima.  
Nanoca Nama”.

<sup>17</sup>Naie facaise jaienici jitoma  
lligaiñuanomo ciodicue. Nana inoniaina  
uaidote:

—Llicisina mai riaibi. Jusiñamuidi  
ailluena cominina ja meiniamona rille  
eo iiite. <sup>18</sup>Naimacina emodofillamona,  
ailluena llicisi ja iiite. Ailluena cominina  
ja meineite. Illaicomini itimaci.  
Soldaduai illaicomini itimaci. Caballuaí  
itimaci. Caballuaí emodomo jaicabidino  
itimaci. Diga comini ite. Jamai bue  
isoidino itimaci. Jamai bue isoñedino  
itimaci. Patrones anamo itino itimaci.  
Patrones anamo iñedino itimaci.  
Naimaci llicisi mai riaibi —llote.

<sup>19</sup>Naie facaise monaillaimona bite  
riirede ocainadí enirue illaicomini diga  
ofide. Naimaci soldaduai jiai ofidimaci.  
Userede caballo emodomoo itimie diga,

naimie dibeimo itino diga jobairiacadimaci.<sup>20</sup> Userede caballo emodomio itimie ie dibeimo itino diga naimacina emodofide. Ocainana gaitadimaci. Naimie facaina tainona lloraimana jiai gaitadimaci. Naie lloraima ocaina uai diga cominina jifuecabite. Siño rafuena finuamona, ocaina cuetataga ra itinona, ie joreñona sedadinona jifuecabite. Naie iaimaiaina gaitaja mei, eo boode iraimo iaimaiaina cajena dotadimaci. Azufre boa isoi irai boode.<sup>21</sup> Caballo emodomio itimiedi ie fuemo ite lloebi diga iaimaiai soldaduaina meinete. Jaienici llua isoi, inoniaci naimaci llicisina ritimaci. Lemona eo monidimaci.

#### Juan mil años Taife maiana ciode

**20** <sup>1</sup>Naie facaise monamona jaienici billana ciodicue. Eniruemo eo ana ite ifo llave naimiemo ite. Aillue lloeo ie onollimo ite. <sup>2</sup>Aillue jaiona eruaidimiena gaitade. Naimiedi Taife. Riai uaimona Satanás. Jiaici dragón. Mil años iese illena lloeo diga naimiena maite. <sup>3</sup>Ana ite ifomo naimiena dotade. Llave diga ifona ibaide. Cominina ramo faiñellena, naimacina jeacinona finotañellena, naimie uaina itatañede. Mil años cominina jifuenide. Mil años fuilla mei, dallu naimiena jino oretaite, cominina ramo faillena.

<sup>4</sup>Ie mei monamo diga jueces illanuaína ciodicue. Jusiñamui uai diga nainomo itinodi maraíñede rafue finodinomo jamai duere sefuillicinona lloitimaci. Ie facaise jai meineganona jiai ciodicue. Eo duere sefuilla facaise “Jesús cominidicai” naimaci llua jira, Jusiñamui uaina naimaci llua jira, naimaci ifogiaina jaitajanona, naimacina meineganodimaci. Monaillaimona bite ocainana

sedafñedimaci. Ie joreñona sedañedimaci. Ie cuetataga ra naimaci uiecomo, naimaci onollimo iñede. Navui fiodaitimaci; ia iemona bie facaise jai jillobitimaci. Imaci abiai diga Jusiñamui naimacina jillotaite. Cristo diga mil años eniruemo itinona sedaitimaci.<sup>5</sup> Naimacidi nano jillodino. Naie mil años nia fuiñenia, jiae jai fiodaitino nia jilloñeitimaci; ia mil años fuilla mei, jilloitimaci. <sup>6</sup>¡Nano jillodino caimare marena iitimaci! Dane fiodaiñenamona Jusiñamui illanomo jaca iitimaci. Faifíñeitimaci. Cominina sedajanona, comini Jusiñamuina raise uiñollena, comini Cristona raise uiñollena, naimacina canoitimaci. Cristo diga mil años naimacina sedaitimaci.

<sup>7</sup>Bie mil años fuilla mei, Jusiñamuidi ana ite ifomona Taife jino oretaite. <sup>8</sup>Nana eniruemo ite nairaiaina jifuiaibite. Gog railla illaicominina, Magog railla nairaiai diga, jifueite. Naimaci nairaiaina ofitaite. Eo ailluena naimaci illa jira, conillienca cai facadonina isoi, naimacina facadonidicue. Jusiñamuina iñotino diga jobairillena, ofitimaci. <sup>9</sup>Danomo ofillanona, Jusiñamuina iñotinona ciribitaitimaci. Jerusaléna, Jusiñamui isiruiga nairaina, ciribitaitimaci. Naie facaise monamona boode ra billanona, jobairiacadinona fuidoite. <sup>10</sup>Cominina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monaillaimona bite ocainana jaie dotade. Naimie facaina tainona lloraima jaie dotade. Nainomo ua jaca duere sefuitimaci

#### Juan aillue rairabicina ciode. Nainomona Jusiñamui duere finollicinona Iluana cacade

<sup>11</sup>Naie facaise aillue userede rairabicina ciodicue. Illaimana naimie

illamona, nainomo Jusiñamuina jiai ciódicue. Naimie siño illamona, mona enirue diga jai iñede.<sup>12</sup>Naie facaise Jusiñamui uicomono nana fiodaitino naidaillana ciódicue. Jamai bue isoíñedino itimaci. Jamai bue isoídinio itimaci. Naimacimo juez isoi Jusiñamui llollena, itimaci. Ie rabenicaímo naimaci jai finoca rafuena jibuide. Naimaci finoca rafue nainomo jai cuega. Iemei Jusiñamui jiaie rabenicona jibuide. Naimie diga jaca ille comini mameciai nainomo jai cuega. Naimaci mameciai nainomo iñenia, naimaci finoca rafue díese Jusiñamui naimacimo duere sefuiñella llote.<sup>13</sup>Monaillaimo ite corobaitino abiai, joreñuaí diga, jilloñitmaci. Raigano abiai joreñuaí diga jilloñitmaci. Naimaci finoca rafue díese Jusiñamui naimacimo duere finollena lloite.<sup>14</sup>Naimaci abiai naimaci joreñuaí diga iraimo dotaite. Jaca faifitimaci. Naiemona jaca jilloñitmaci. Jusiñamuimona eneno jaca itimaci.<sup>15</sup>Monamo ite rabenicomodo cueñega comini mameciai díese itinona iraimo dotaite.

**Juan comue monana,  
comue enirue diga ciode**

**21** <sup>1</sup>Birui ite mona, birui ite enirue diga jai iñede. Monaillai jiai jai iñede. Iemei comue mona ciódicue. Comue eniruena jiai ciódicue.<sup>2</sup>Comue nairai illanona ciódicue. Comue Jerusaléna ciódicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie ñinina ua facaise isoi, eo ebirede.<sup>3</sup>Jusiñamui illanomona damie ado llote:

—Comini motomo Jusiñamui illano jai ite. Naimaci diga naimie iite. Naimie comininitimaci.<sup>4</sup>Naimaci illanomo naimie iite. Naimacina naimie

nabaillamona, naimie jitaila jira, naimacina caimadoite. Dane eeñeitimaci. Fiodaiñeitimaci. Sunaiñeitimaci. Duere sefuiñeitimaci. Birui ite rafuemo comeciaína naimaci nainomo facañena jira, ie facaise sunaiñeitimaci —llote.

**5 Jusiñamui llote:**

—Ero, nana ra comuena birui finoiticue. Cue lluacino uanaicinona jira, cue lluacínona cue finua jira, bie rafuena cueno.

**6 Iemei cuemo llote:**

—Bie rafue jai fuite. Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena iñotino comeciai eo caimare itataiticue. Ebatañeno cue diga illena, naimacina jaca itataiticue.<sup>7</sup>Cuena raise iñotinona iese itataiticue. Jaca naimaci Jusiñamuiniticue. Naimaci jaca cue comininitimaci.<sup>8</sup>Jiaino jaca eo boode iraimo jaca iñtimaci. Azufre boa isoi irai booite. Naiemona jaca jilloñitmaci. Cuemona eneno jaca iñtimaci. Diese nainomo iñtimaci: abido danomo jaidino, cuena raise iñofidino, jearede rafue finocabidino, cominina meinettino, aiñede riño diga icabitino, iñiñedino iima diga icabitino, aiñinai, jiraraina sedacabidino, tañona llocabitino —llote.

**Juan comue Jerusaléna llote**

<sup>9</sup>Naie facaise naie siete jaienisaimona damie cue dine bite. Naie jaienisai imaci copamo cominina duere finollicinona navui ite isoide. Naimie cuemo llote:

—Cue diga mai bi. Hima ie aina jai ua isoi, Toica Llauda isoidimie ie cominina jai ote. Ie ai isoidimaci. Llauda

isoidimie jai oga comini illanona omo acataitice.

<sup>10</sup>Nicairilla isoi, Jusiñamui Joreño cue joreñona eo a ite aillue anedumo uite. Nainomona, Jusiñamuimona, monamona Jerusalén billana ciodicue. Jusiñamui iena jira, eo mare.

<sup>11</sup>Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruailla jira, enefebecodo ciode. <sup>12</sup>Le llaigafo eo a ite. Eo jedacie. Doce nasiai ite. Naga nasemo daje jaienici ite. Israel micori uruiai mameciai naie nasiaimo cuega. Doce uruiai illa jira, naga naserie daje mameci cuega. <sup>13</sup>Jitoma bicabillano dine eruaide llaigafomo daje amani nase ite. Jitoma jaicabillano dine eruaide llaigafomo daje amani nase ite. Naga beici dine eruaide llaigafomo daje amani nase ite. <sup>14</sup>Naie llaigafo anamo doce nofici ite. Nainomo Toica Llauda isoidimie ie doce llofueoicaigano mameciai cuega.

<sup>15</sup>Cue diga ñaite jaienicimo oromona ra facara ite. Naie nairai facallena ite. Ie nase, ie llaigafo diga, facallena ite.

<sup>16</sup>Naie nairaina naimie facajamona, nagafebei daje isoi illana uiñoticue. Dos mil doscientos kilómetros nagafebei are ite. Dos mil doscientos kilómetros nagafebei a ite. <sup>17</sup>Le llaigafona jiaí facade. Sesenta y cuatro metros a ite. Comini facaja isoi, jaienici iena facade.

<sup>18</sup>Ie llaigafo jaspe railla noficimona finoca. Bie nairai difai oromona finoca. Enefebecodo ciode. <sup>19</sup>Diga eo quenirede noficina eruaide ra llaigafomo ite noficimo jai nitade. Nano jaspe. Enefebecodo ciode. Iemei zafiro. Mocorede. Jiae ágata. Mocorede. Jiae esmeralda. Mocorede. <sup>20</sup>Jiae ónico. Jiairede userede diga faiga. Jiae cornalina. Jiairede. Jiae crisólito.

Orona eruaide. Jiae berilo. Mocorede. Jiae topacio. Borarede. Jiae crisoprasa. Mocorede. Jiae jacinto. Jiduirede. Jiae amatista. Jiduirede. Naie llaigafo anamo ite noficiai doce diga ite. <sup>21</sup>Ie doce nasiaidi perlas. Userede. Naga nase daje perlamona finoca. Bie nairai naisuaidi difai oro. Enefebecodo ciode.

<sup>22</sup>Bie illanomo Jusiñamuina sedajanona cioiñedicue. Nana bie illanodi naimie sedajano. Cai Nama Jusiñamui, Toica Llauda isoidimie diga, nainomo illa jira, iaimaiai uicom sedaiticai. <sup>23</sup>Jusiñamui siñona jira, nainomo comini jitomana jitaiñeitimaci. Fivuina jitaiñeitimaci. Jusiñamui, Llauda isoidimie diga, iena lligañoite.

<sup>24</sup>Nana comini iaimaiai nabaicana jaitimaci. Nana illacomini iaimaiai dine billanona, iaimaiaimo iobillacino jaca fecaitimaci. <sup>25</sup>Bie nairai nasiai jaca ibaiñeite. Nainomo naionadi jaca iñeite. <sup>26</sup>Iaimaiaimo iobillacina fecallena, nana comini nainomo biitimaci.

<sup>27</sup>Nainomo jeacino jaca iñeite. Jearedre rafue finodino nainomo biñeitimaci. Tainona lloraini biñeitimaci. Dani Llauda isoidimiemo ite rabenicom cuega mameciai itinodi nainomo biitimaci. Bie rabenicom Jusiñamui illanomo jaca iitino mameciai jai cuega.

**22** <sup>1</sup>Naie facaise jaienici cuena daje ille acatate. Nainomo ite jinui jiruamona cominina jaca itataite. Uifinide. Jusiñamui, Llauda isoidimie diga, illanomona tote. <sup>2</sup>Nanoca naiso motodo tote. Nagafebelle dine jaca itataite amenaiai ite. Naga fivui llisillamona, naga fivui llisilla ite. Ie ibiai illamona, comini caimare marena itimaci. <sup>3</sup>Jeacino nainomo iñena jira, Jusiñamui jaca buna duere finoñeite. Jusiñamui, Llauda isoidimie diga illamona, naimie comini naimiena jaca sedaitimaci. <sup>4</sup>Naimiena marefodo

cioitimaci. Naimiemo naimaci duillamona, naimaci uiecuai itofiaimo naimie mameci cueite. <sup>5</sup>Nainomo naonadi iñeite. Lamparína jitaiñeitimaci. Jitomana jitaiñeitimaci. Cai Nama Jusiñamui naimacina lligaiñoite. Illaicomini isoi jaca iitimaci.

**Juan Jesucristo billirui  
iarei illana cacade**

<sup>6</sup>Jaienici cuemo llote:

—Bie lluacinodi uanaicino. Naimie facaina llorainimo ie rafuena llollena, ie uaina itatate. Naimiena iñotinona ico suille rafuena ja uiñotaiacade. <sup>7</sup>“Raire biiticue” Cristo llote.

Bie rabenicomodo ite ico suille rafuena iñotinodí caimare iitimaci.

<sup>8</sup>Juandicue. Bie rafuena cacadicue. Iena ciodicue. Iena cue cacaja mei, iena cue ciua mei, iena cuemo acataga jaienici uicomodo ana bitadaticue. Naimiena sedaacadicue; <sup>9</sup>iadedi cuemo llote:

—Dama ite. Cuena sedañeno. O diga, naimie facaina lloraini isoi, bie rabenicomodo ite llogacinona iñotino isoi, naimie dibeimo jiai maijidicue. Dama Jusiñamuina seda. <sup>10</sup>Bie rafue suillirui iairei illa jira, iena jino llono. Iena uiñota. <sup>11</sup>Bie rafuena bu iñoenia, naimie jitaila jira, maraiñede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie iñoina, naimie jitaila jira, mare rafue naimie finoacania, mare rafuena finocana jailla. Jusiñamui jitailacina bu finoacania, naimie jitailacina nia finocana jailla.

<sup>12</sup>Jesucristo cuemo llote:

—Ero, raire biiticue. Naimie finoca rafue diese nagamiemo ibana feacitue. <sup>13</sup>Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siñofitodicue. <sup>14</sup>Naimaci iñiroina naimaci

jocoia, caimare iitimaci. Naimaci comecina ñaiticue. Ie jeacinona oni dotacamie jaca itataite amena llisillamona lliite. Cue cominina naimie illamona, Jusiñamui illanomo ie nasedo jaicabite; <sup>15</sup>ia naimacina jeacinona naimaci fañonocaiñenia, Jusiñamui illanomo maraiñede rafuena finocabidino, aima dñe jaicabidino, aiñede riño diga icabitino, iñiñede iima diga icabitino, cominina meinetino, jiraraina sedacabidino, tainona llocabitino duiñeitimaci. <sup>16</sup>Creyentiaina bie rafuena uiñotallena, cue jaienici o dñe jai oretaticue. David micori ie jitodicue. Monairaicudu bairia isoi, Jusiñamui jitailacina cue finollena, baireiticue —llote.

<sup>17</sup>Bie facaise Jusiñamui Joreñodi, Cristo jai oga ai railla comini diga, naimiena nia iñonéedinona uайдote:

—Bie rafuena mai cacarei. Iena mai iñino. Iena bu iñoina, jiaimemo iena lluai: Iena mai cacarei. Iena mai iñino.

Jiroacadímiemo lloticue:

—Mai jiruaibi. Bie jinua raifiñede. Biña o jiroacania, jaca iitió. Iese lloticue; ia ie comecina ñaiticue. Bie rafue iñuana ñaiticue. <sup>18</sup>Bie ico suille rafue ite rabenicona bu facajia, naimiemo rafuena lloiacadicue. Bie rafue baifemo bu lloia, bie rafuena bu meidoia, bie rabenicomodo ite duere finuacino isoi, Jusiñamui naimiena duere finoite. <sup>19</sup>Bie rafuena bu jamaia, Jusiñamui naimiena duere finoite. Jaca illena Jusiñamui ie mamecina ite rabenicona jaca cueñeite. Comue Jerusalémo jaca duiñeite. Naiena jai lloticue.

<sup>20</sup>Cristo raite:

—Bie rafue jaca suite. Ua raire biiticue. Iena raire suillena jiai jitaidicue. Cai Nama Jesús raire billena eo jitaidicue.

<sup>21</sup>Naimie duenallacina nana Jesucristona iñotino uiñocana jaillana jitaidicue. Macaibaite. Juandicue.